


Tti jian joajné
Jesucristo



New Testament in Popoloca, San Marcos Tlalcoyalco

Tti jian joajné Jesucristo

New Testament in Popoloca, San Marcos Tlacooyalco

copyright © 1982 Wycliffe Bible Translators, Inc.

Language: San Marcos Tlacooyalco Popoloca (Popoloca, San Marcos Tlacooyalco)

Translation by: Wycliffe Bible Translators, Inc.

Popoloca, Tlacooyalco [pls], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Marcos Tlacooyalco

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files dated 29 Jan 2022
a23ba35e-b016-5f67-a705-694e460cf18a

Contents

SAN MATEO	1
SAN MARCOS	67
SAN LUCAS	108
SAN JUAN	176
LOS HECHOS	226
ROMANOS	287
1 CORINTIOS	315
2 CORINTIOS	341
GÁLATAS	359
EFESIOS	369
FILIPENSES	379
COLOSENSES	386
1 TESALONICENSES	393
2 TESALONICENSES	398
1 TIMOTEO	401
2 TIMOTEO	409
TITO	414
FILEMÓN	418
HEBREOS	420
SANTIAGO	441
1 PEDRO	448
2 PEDRO	456
1 JUAN	461
2 JUAN	468
3 JUAN	469
JÚDAS	470
APOCALIPSIS	473

Tti Jian Joajné Jesucristo Que Dicjin Mateo

Cain niñançhen de ixin Jesucristo

(Lc. 3.23-38)

¹ Jihi ná lista de cain niñançhen de ixin Jesucristo. Jehe Jesucristo joixin de ngain razé chojní David co de Abraham.

² Abraham cjoí ndodé Isaac, co Isaac cjoí ndodé Jacob, co Jacob cjoí ndodé Judá conixin cainxin xanchó Judá. ³ Judá cjoí ndodé Fares co Zara, co janné na cjoí Tamar. Fares cjoí ndodé Esrom, co Esrom cjoí ndodé Aram. ⁴ Aram cjoí ndodé Aminadab, co Aminadab cjoí ndodé Naasón, co Naasón cjoí ndodé Salmón. ⁵ Salmón cjoí ndodé Booz co janné Booz cjoí Rahab. Booz cjoí ndodé Obed co janné Obed cjoí Rut. Obed cjoí ndodé Isaí. ⁶ Isaí cjoí ndodé rey David, co rey David cjoí ndodé Salomón, co janné Salomón icha saho cjoí jan nçiçhihi ná tattíta que vinhi Urías.

⁷ Salomón cjoí ndodé Roboam, co Roboam cjoí ndodé Abías, co Abías cjoí ndodé Asa. ⁸ Asa cjoí ndodé Josafat, co Josafat cjoí ndodé Joram, co Joram cjoí ndodé Uzías. ⁹ Uzías cjoí ndodé Jotam, co Jotam cjoí ndodé Acáz, co Acáz cjoí ndodé Ezequías. ¹⁰ Ezequías cjoí ndodé Manasés, co Manasés cjoí ndodé Amón, co Amón cjoí ndodé Josías. ¹¹ Josías cjoí ndodé Jeconías conixin cainxin xanchó Jeconías. Co ngain tiempo mé chojni Babilonia savicao cain chojni Israel para ngain nonttehe Babilonia de esclavo.

¹² Después de mé Jeconías cjoí ndodé Salatiel, co Salatiel cjoí ndodé Zorobabel. ¹³ Zorobabel cjoí ndodé Abiud, co Abiud cjoí ndodé Eliaquim, co Eliaquim cjoí ndodé Azor. ¹⁴ Azor cjoí ndodé Sadoc, co Sadoc cjoí ndodé Aquim, co Aquim cjoí ndodé Eliud. ¹⁵ Eliud cjoí ndodé Eleazar, co Eleazar cjoí ndodé Matán, co Matán cjoí ndodé Jacob. ¹⁶ Jacob cjoí ndodé José tti cjoí xixihi María, co María cjoí janné Jesús, que dinhi Cristo, tti Dios rroanha.

¹⁷ Jañá cjoí catorce ndodaha desde Abraham hasta rey David co de rey David icatorce ndodaha hasta are chojni Israel cjoí na ngain Babilonia de esclavo, co iná catorce ndodaha de are mé hasta are concjiji Cristo.

Are concjiji Jesucristo

(Lc. 2.1-7)

¹⁸ Janhi conhe para concjiji Jesucristo: janné Jesús, María, ovechonda compromiso ngain José para rrocottehe. Co saho de rroguinttecao chó na, María oveyá çhjan de ixin joachaxín Espíritu Santo. ¹⁹ José, tti joigoan xixihi María, cjoí ná xí jian de ngain Dios, co jehe joinaoha coequin çhijni de ixin María. Jehe ijoinaoha rrogucao María. Mexinxin jehe çaxaon que irrocjanha ngain María. Jehe joinaoha conohe icha chojni que ixin jehe na ijeha novio na, mexinxin jehe çaxaon jañá. ²⁰ Co are José jixaxaon jañá, ná ángel de Dios joí ngain cottachin are tajjioa José co ángel mé ndaçho:

—José, jaha tti razé David, çaonha que ixin María soan çhiha, ixin çhjan que jehe rrochonda joixin xan de ngain Espíritu Santo. ²¹ Jehe sincheconcjiji ná xanxí, co jaha sinchequinhí xan JESÚS. Sinhi xan jañá ixin jehe xan tsjenga xan hna cainxin tti jianha que nchehe chojní xan.

²² Cain yá conhe para que joiconhe tti dindaçho Dios ngain profeta que nichja:

²³ Ná xannchí que xa xonhi xí catte, xan mé xan seyá chjan, co are tsoncjihí chjan mé, sinhi xan Emanuel, co mé rroçho: Dios jí ngayá na.

²⁴ Are José xingamehe de cottaçhin, jehe joinchehe inchin coetonha ángel de Dios co vayé María para çhihi. ²⁵ Pero vintteha na junto hasta que María joincheconcjihí xenhe que veyá. Co joincheguinhí xan JESÚS.

2

Are tti ní xí sabio joitsjehe Jesús

¹ Jesús concjixin ngain rajna Belén, ngain nonttehe Judea are Herodes vehe rey ngain nontte mé. De ngain iná nontte icha oriente vinttequixin ní xí para ngain ciudad de Jerusalén. Co canio xí mé de ixin conotse vagatsoanxin xa de ixin quehe siconhe ngataha nontte, ² co nntiha joanchiangui xa:

—¿Quettinó jí tti rey de chojni judío que oconcjihí? Janha na desde ngain lado oriente viconxin na conotsé rey mé, co jai janha na joihi na nntihi para sinttasayá na rey mé.

³ Are rey Herodes conohe jihí, jehe veva contento, jehe conixin cain chojni que te ngain Jerusalén. ⁴ Cottimeja jehe rey Herodes vayé cain xidána que vaquetonha ngain icha xidána, co cain ximaestroe ley, co jehe rey joanchiangui ngain cain nimé ixin ttinó tsoncjixin Cristo, tti Dios rrorroanha. ⁵ Jehe na vinttendaçho na:

—Ngain rajna Belén ngain nonttehe Judea, ixin profeta dicjin janhi:

⁶ Co jaha, rajna Belén que rrihi ngain nonttehe Judá, jaha tti icha importante de cainxin rajna que ttetonha nntiha, ixin de nganji saçhjexin ná xí que tsetonha, co xí mé tti senda chojnina Israel.

⁷ Cottimeja Herodes jimao vayé canio xí que vinttequixin de lado oriente co joanchiangui Herodes ngain xa ixin quexehe nchanho mero xago conotse mé. ⁸ Cottimeja Herodes coetonha canio xí mé para cjoí xa ngain rajna Belén co ndaçho ngain xa:

—Ttji ra nntiha, co danchiangui ra jian ttinó jí chjan yá. Co are osinchí ra xan, nchenona ra para que janha cai tsji sinttasayá xan.

⁹ Conixin tti ndaçho rey jihí, canio xí mé savinttecji xa. Co tti conotse que vintteguicon xa de ngain lado oriente jitaon va nntiha dirección de tti tettji xa hasta que tavehe va dirección de ngain lugar tti jí xanxichjan.

¹⁰ Are canio xí mé vintteguicon xa conotse mé, anto vintteché xa; ¹¹ co are vintteguixinhi xa nchia tti jí xanxichjan ngain janné xan, María, canio jehe xa vinttettoxin nntajochjihí xa co joinchesayehe xa xanxichjan. Cottimeja vanttjé xa canxion caja que joicao xa para joinchetoen xa xanxichjan oro, co tsjoca, co iná cosa que dinhi mirra, que chojni vanchegonda inchin perfume. ¹² Cottimeja canio xí mé vitonhe xa ngain cottaçhin que ixin irrocjanha xa ngain Herodes, mexinxin ojé nntiha savinttecjanxin xa para ngain nacioen xa.

Are María co José savicao na xanxichjan para Egipto

¹³ Después de savinttecji jehe tti canio xí que vinttequixin de ngain lado oriente, are tajjioa José, ná ángel de Dios joí ngain cottačhín José co ndačho ángel mé:

—Dingattjen co sattingacoho xanxichjan conixin janné xan. Sattji ra para ngain nonttehe Egipto co tadintte ra nntiha hasta que janha rronddattjo ra, ixin Herodes tsjé xanxichjan para nasoenxon xan.

¹⁴ Cottimeja vingattejen José conixin María para sajoicao na xanxichjan de ttie para Egipto. ¹⁵ Nntiha vintte na hasta que ndavenhe Herodes. Jañá conhe para joiconhe tti dindačho Dios ngain profeta, co jehe profeta dicjin: “De ngain nonttehe Egipto vayaxin Xanhna.”

Are coetonha Herodes para venhe cain xanxichjan

¹⁶ Are Herodes conohe ixin tti canio xí que vinttequixin de ngain lado oriente icjanha xa ngain inchin jehe coetonhe xa, jehe anto coñao co coetonhe xisoldadoe para nasoenxon xa cainxin xanxichjan que vinttechonda de yó nano para nontte que vintte ngain rajna Belén conixin xanvintte ngain icha rajna ngandanji Belén inchin tti tiempo que vinttendačho canio xí que vinttequixin de ngain lado oriente. ¹⁷ Jañá joiconhe tti diquentaxin profeta Jeremías:

¹⁸ Coinhi ni ná tté chojni de ngain ciudad de Ramá, que tsjanga co ta joachjaon.

Co mé Raquel tti vatsjangaxin xenhe, co vačhoja para que iná chojni rrogantsjehe joachjaon mé ixin cain xenhe ondavintteguenhe xan.

¹⁹ Pero después de ndavenhe Herodes, ná ángel de Dios joí ngain cottačhín are José tajjioa nntiha ngain Egipto, co ndačho ángel mé ngain José:

²⁰ —Dingattjen co sacjanchoho xanxichjan conixin janné xan para ngain nontte Israel ixin ondavintteguenhe tti chojni que joinao narrogoenxon xanxichjan.

²¹ Cottimeja vingattjen José co sajoicao xanxichjan conixin janné xan para ngain nontte Israel. ²² Pero are conohe José ixin Arquelao tti jittetonha ngain Judea en lugar de Herodes, ndodé jehe Arquelao, José xaon para rrocji nntiha. Mexinxin jehe vitonhe ngain cottačhín para sacjoi ngain regioen Galilea. ²³ Are jehe joiji nntiha, jehe sajoiguenhe ngain rajna Nazaret. Jihi conhe para joiconhe tti vinttendačho profeta que Jesús sinhi nazareno.

3

Juan ndache chojni ngagaha jna joajné Dios

(Mr. 1.1-8; Lc. 3.1-9, 15-17; Jn. 1.19-28)

¹ Ngain tiempo mé Juan, tti vancheguitte chojni, joí ngain regioen Judea, ngagaha jna tti jí joxon nchise para vandache chojni de ixin Dios, ² co vandačho ngain na:

—Āo tenchehe ra jianha, incheha ra jamé. Ttentoxinhi ra vidá ra ixin tti tettonha Dios ochian joí.

³ Jehe Juan jihi tti diquentaxin profeta Isaías janhi:

Tsinhi na ná tté chojni que tsoyaoxin de ngagaha jna co rronddačho: “Nchechjian ra nntiha para ixin jehe tti chonda cain joachaxin; danttjehe ra ná nntiha nao.”

⁴ Lonttoe Juan diconchjian de xehe cocamello, co cinturoen de roa, co jehe vane ná tipo de coxoali que dinhi langosta, co tsjén cormena que jehe vaguittja ngagaha jna mé. ⁵ Vaquí chojni de ciudad de Jerusalén ngain Juan para vaquinhi na tti vandačo, co vaquí cainxin chojni de ngain nonttehe Judea co cai cain chojni que vintte ngain rajna que vintte chiaon de río Jordán. ⁶ Co are vaquendoenhe ñao na de cain tti jianha que vanchehe na, cottimeja Juan vancheguitte na ngain río Jordán.

⁷ Pero are Juan vicon que atto tsje xifariseo co xisaduceo cjoí xa ngain para rrojiguitte xa cai, jehe ndačo ngain xa:

—¡Jaha ra razé conché! ¿Quensen jointtanoha ra ixin nchao setanha ra tti castigo anto soji que jitonchian? ⁸ Chonda ra que sinchehe ra jian para que jamé sicon ni claro que jaha ra ocoentoxinhi ra vidá ra, ⁹ co ndacheha chó ra: “Ján na razé Abraham na”; ixin janha rrondattjo ra que hasta xo jihi Díos nchao sinchechjian xo chojni de razé Abraham. ¹⁰ Hacha ojí listo para tsončhinji nttá, co cain nttá que danjoha jian ttochjoin rročhinji nttá mé co rroche nttá ngain xohi. ¹¹ Ndoa que jai janha rrinttaguitte jaha ra conixin jinda, co mé jehó ná señal que ixin jaha ra ocoentoxinhi ra vidá ra; pero tti tsí después de janha, jehe sinttaguitte ra conixin Espíritu Santo co Espíritu mé tsiaho inchin xohi para sincheroa almá ra inchin oro toroaxin ngain xohi. Jehe mé chonda icha tsje joachaxin que janha, hasta que janha ni jiquininxinha na ni para tsjiá catté. ¹² Co jehe mé ochonda palé ngá rá para tsjendoaxin trigo para sachjehe trigo paja. Jehe tsenchjinha trigoe ngain nchiandoha, co paja tsjaga ngain ná xohi que xonhi tiempo danga.

Are joiguitte Jesús

(Mr. 1.9-11; Lc. 3.21-22)

¹³ Co Jesús joixin de Galilea para cjoí ngain río Jordán, tti vehe Juan para que Juan joincheguitte Jesús. ¹⁴ Pero Juan čhoha para rrojincheguitte Jesús, co ndačo ngain Jesús:

—Jaha tti jiquininxin sincheguitte na janha; ¿quedonda janha sinttaguitte jaha?

¹⁵ Pero Jesús ndačo:

—Pero jaxon sonttoha na jamé ixin ján na jiquininxin sonttoho na inchin rinao Díos.

Cottimeja Juan vitticaon. ¹⁶ Co are joexin joiguitte Jesús, vačhjenguixin de jinda. Co rato mé ngajni xiré, co Jesús vicon Espíritu Santo de Díos que xincanji inchin ná conttoanajni ngataha Jesús. ¹⁷ Cottimeja coinhi na tté Díos de ngajni, que ndačo:

—Jehe jihi tti Xanhna que janha anto rinaho, co de ixin jehe Xan janha anto chahna.

4

Are inchínji joinao rrojincheyehe Jesús

(Mr. 1.12-13; Lc. 4.1-13)

¹ Cottimeja jehe Espíritu mé joicao Jesús para ngagaha jna tti jí joxon nchise para que inchínji rrojincheyehe Jesús.

² Nttiha vehe Jesús cuarenta nchanho co cuarenta ttie, co ngoixin tiempo mé jehe joinaha. Cottimeja jehe venhe jintta. ³ Cottimeja inchínji conchienne ngain Jesús para rrojincheyehe, co ndačo ngain Jesús:

—Si ndoa jaha Xenhe Díos, ttetonha que xo tehe rrocjan xo niottja.

⁴ Pero Jesús ndačo:

—Tti jitaxin Palabré Dios ndačo: “Chojni sinttechonxin na jeoha de tti jine na, sino cai de cain palabra que Dios ndačo.”

⁵ Cottimeja jehe inchínji sajoicao Jesús para ngain ciudad de Jerusalén co nttiha inchínji joinchecani Jesús para ngataha tti nihngo icha importante ⁶ Co nttiha ndačo inchínji ngain Jesús:

—Si ndoa jaha Xenhe Dios, daritsingaxin de nttihi hasta tti nontte, ixin ndačo ngain tti jitaxin Palabré Dios:

Dios tsetonhe ángel de jehe para senda jaha.

Cain ángel mé rrocaha conixin rá para que xonhi tti tsonihi rottea de ixin xo.

⁷ Jesús ndačo:

—Cai ndačo ngain tti jitaxin Palabré Dios: “Daqueha prueba ngain Dios tti chonda joachaxin para ixin jaha.”

⁸ Cottimeja jehe inchínji sajoicao Jesús para ngataha ná jna anto noi. Co de nttiha cjoagoexin inchínji Jesús cainxin nación que jí ngoixin mundo co cain tti chjoin que jí ngain cain nación mé. ⁹ Co ndačo inchínji ngain Jesús:

—Janha rrochjaha jaha cain yá si jaha sarittoxin nttajochjiha co sinchesayana janha.

¹⁰ Cottimeja Jesús ndačo ngain inchínji:

—Sattjixin de nganji janha, Satanás, ixin ndačo ngain tti jitaxin Palabré Dios: “Nchesayehe jehó Dios tti chonda joachaxin para ixin jaha, co jehó ngain jehe ditticaon jaha.”

¹¹ Cottimeja inchínji sacjoixin de ngain Jesús, co jói canxion ángel de Dios para joincheatendehe Jesús.

Jesús coexinhi xé ngain Galilea

(Mr. 1.14-15; Lc. 4.14-15)

¹² Are Jesús conohe que Juan jiaxinhi ngain cárcel, jehe sacjoi para nonttehe Galilea. ¹³ Pero jehe taveha ngain rajna Nazaret, sino que jehe sacjoi joiguehe ngain rajna Capernaum, co mé ná rajna que jí ngandehe lago que dinhi Galilea ngain regioen Zabulón co Neftalí. ¹⁴ Jamé joiconhe tti dindačo profeta Isaías:

¹⁵ Nonttehe Zabulón co nonttehe Neftalí

que te ngaca jinda que dinhi Galilea toenxin río Jordán, nonttehe Galilea tti te chojni que jeha judío.

¹⁶ Tti chojni que vintte inchin ngain tti naxin xehe, jai jehe na inchin ná xohi joinchengasañehe na.

Co tti chojni que inchin ondavenhe pero jai cjan xechon na iná.

¹⁷ Desde are mé Jesús coexinhi ndache chojni de ixin Dios. Jehe vandačo ngain na:

—Ttentoxinhi ra de tti jianha que jaha ra tenchehe ra ixin Dios que ttjen ngajni otoi tsetonha nganji ra.

Jesús nichjé nó xí que vatse copescado

(Mr. 1.16-20; Lc. 5.1-11)

¹⁸ Jesús mero jidatto ngandehe lago que dinhi Galilea are jehe vicon yó xí, co cayoi xí mé ichó xa. Ná xa vinhi xa Simón, co cai vinhi xa Pedro, co

iná xa vinhi xa Andrés. Co cayoi xí mé vatse xa copescado, co rato mé tetjahngui xa nonchaha jinda. ¹⁹ Jesús ndačo ngain cayoi xí mé:

—Ǽacoi ra chjin na; jaha ra ttjejo ra copescado pero jai janha sintta-coanha ra queǵén tsjejo ra chojni para ixin Dios.

²⁰ Co rato mé cointtohe na nonchaha co sajoicao na Jesús.

²¹ Nchion icha ndaha Jesús vicon iyó xí, co cayoi xí mé íchó xa cai. Cayoi xí mé xenhe Zebedeo. Ná xa vinhi xa Jacobo co iná xa vinhi xa Juan. Cayoi xí jiji tate xa conixin ndodé xa Zebedeo ngá ná barco tatetteyehe na nonchaha. Jesús vayé na, ²² co ngain rato mé cointtohe na ndodé na nntiha ngain barco mé co sarroé na Jesús.

Jesús joinchecoenhe tsje chojni de ixin Dios

(Lc. 6.17-19)

²³ Jesús ngaria ngoixin nonttehe Galilea para joinchecoenhe chojni de ixin Dios ngain cain nihngo que te nntiha. Jehe ndache na tti jian joajna de ixin queǵén ttetonha Dios co jehe vanchexingamehe cain chojni que vinttechonda quexeho chin. ²⁴ Co hasta chojni de ngoixin regioen Siria conohe na tti jian que vanchehe Jesús co joiaho na ngain Jesús cain chojni que vinttechonda quexeho chin; tti vinttechonda dolor ngain cuerpoe, tti vinttechonda espíritu jianha, tti vinttechonda chin denda, co tti čhoča vaguinttequingui rioho cuerpoe. Co Jesús joinchexingamehe cain chojni mé. ²⁵ Co ngain tiempo mé tsje chojni de tsje parte rroé na Jesús tti jehe savacji; chojni de Galilea, de ngoi regioen Decápolis, de ngain Jerusalén, de Judea, co de toenixin río Jordán.

5

Tsje nichja Jesús ngain chojni are ngain jna

¹ Are Jesús vicon anto tsje chojni ǵatte ngain, jehe coani ngain ná jna para que jehe nchao ndache cain chojni mé de ixin Dios, co are jehe nntiha, cain chojni que vacao vintte na ngandanji jehe. ² Cottimeja jehe coexinhi ndache na janhi:

Quexehe chojni tti chonda čhjoin vida

(Lc. 6.20-23)

³—Anto čhjoin para ixin tti chojni que ǵaxaon ixin rrongondehe na que Dios tsjenguijna na, ixin chojni mé tequininxin na ngajni tti ttetonha Dios.

⁴Anto čhjoin para ixin tti chojni que techín de ixin anto tsje cosa jianha jí ngataha nontte jiji, ixin Dios sincheconsolá chojni mé.

⁵Anto čhjoin para ixin tti chojni que dintteha orgulloso, ixin jehe na nisayé tti nontte que Dios ndačo sanjo.

⁶Anto čhjoin para ixin tti chojni que anto rinao sinchehe inchin ttetonha Dios, ixin jehe Dios tsjenguijna chojni mé para sinchehe na jamé.

⁷Anto čhjoin para ixin tti chojni que ttiacnoehe icha chojni, ixin Dios tsiacnoehe chojni mé.

⁸Anto čhjoin para ixin tti chojni que iǵonhi jianha teca ixin chojni mé sicon na Dios.

⁹Anto čhjoin para ixin tti chojni que ttjenguijna icha chojni para tsetoha na, ixin Dios sincheguinhí cain chojni mé xenhe jehe Dios.

¹⁰ 'Anto ĉjoin para ixin tti chojni que anto tangui tonhe ixin jehe na tenchehe na inchin rinao Dios, ixin chojni mé tequininxin na ngajni tti ttetonha Dios.

¹¹ 'Co anto ĉjoin para ixin jaha ra are chojni feo ndattjo ra na, co feo nchehe na nganji ra, co ndattjo ra na tsje cosa que jeha ndoa para rroningacoanxin ra na ixin jaha ra nichja ra joajnana janha. ¹² Masqui jamé tsonha ra, jaha ra ĉjoin tonoha ra co dintte ra contento, ixin jaha ra sayehe ra jie premio ngajni. Ixin cai jañá feo joinchehe chojni ngain cain profeta que joí icha saho que jaha ra.

Chojni que ditticaon Jesús inchin xijntta co inchin joadingasán para ngain mundo jihi

(Mr. 9.50; Lc. 14.34-35)

¹³ 'Jaha ra inchin xijntta para ngain chojni ngataha nontte jihi. Pero si xijntta mé ndarroccjan simple que ijeha xijntta, ¿queĉén nchao sinchegonda chojni? Xijntta mé iĉonhi ĉé, jeho para singo ndaha co tsingachje chojni.

¹⁴ 'Co jaha ra inchin joadingasán para icha chojni de ngataha nontte jihi. Inchin ná ciudad que jí ngataha ná jna, cain chojni de cjin nchao siconxin na ciudad mé. ¹⁵ Ni ná lámpara are jinchengasán ĉhoja sehe ngaxinhi ná cajón ixin lámpara mé chonda que sehe noi para sinchengasenhe cain chojni que te ngain nchia. ¹⁶ Jamé jaha ra cai, nchehe ra jian para que tti jian que jaha ra sinchehe ra, mé inchin joadingasán para ngatto con cain chojni para que are jehe na sicon na tti jian que jaha ra sinchehe ra, jehe na sinchecoanxinhi na Ndodá ra que ttjen ngajni.

Jesús cjoagoe chojni quehe rroĉho ley que vayé Moisés

¹⁷ Co Jesús ndaĉho cai:

—Ĥaxaonha jaha ra que janha joihi para jointtaxante ley que vayé Moisés ni cain tti ndaĉho cain profeta are saho; janha joiha para jointtaxante cain mé, janha joihi para jindattjo ra tti mero ndoa quehe rroĉho cain mé. ¹⁸ Janha rrondattjo ra ndoa que cain tiempo que sehe ngajni co nontte, ley mé rroxantteha ni rioho ni ná letra saĉjeha hasta tsoenja cain tti jitaxin ngain ley mé ixin cain mé chonda que tsonhe. ¹⁹ Mexinxin tti chojni que ditticaonha quexeho parte que ley jihi ttetonha, masqui parte mé antoha importante, co si chojni mé tsjagoe icha chojni para sinchehe na ĉajeho, Dios rrondaĉho que chojni mé antoha importante ngajni, tti ttetonha Dios. Pero tti chojni que ditticaon cain tti ttetonha ley jihi, co jehe nchecoenhe icha chojni ĉajeho inchin jehe nchehe, Dios rrondaĉho que ixin chojni mé anto importante na ngajni tti ttetonha Dios. ²⁰ Ixin janha rrindattjo ra, que si jaha ra sincheha ra icha jian que cain ximaestroey ley mé co tti nchehe cain xifariseo, jaha ra ĉhoja sintte ra ngajni tti ttetonha Dios.

Are Jesús ndache chojni quehe tsonhe chojni que tsoñaohé chó

(Lc. 12.57-59)

²¹ 'Jaha ra coinhi ra tti vitonhe nindogolitoa ra ĉanĉjen janhi: “Dantsjeha ra vidé iná chojni, ixin quexeho tti santsjehe vidé iná chojni, tti tjaya chonda que soenhe juzgado.” ²² Pero janha rrondattjo ra que quexeho tti tsoñaohé iná chojni, tti tsoñaó mé chonda que soenhe juzgado. Co quexeho tti rrondache feo iná chojni, tti rronichja feo mé soenhe juzgado de ngain tti juzgado que chonda icha tsje joachaxin

nttihi ngataha nontte. Co tti ncheguinhí iná chojni, tonto, tti ndačo mé chonda peligro de tsji ngacjan xoi infierno.

²³ 'Mexinxin are jaha tsjiho ofrenda ngain alté Dios para sanjo ngain, co rato mé jaha rroaxaon que ixin iná chojni ningaconha jaha, ²⁴ nttiha tinttohe ngaca altar tti jaha sanjo ngain Dios, co ttji ngain tti chojni que ningaconha co nchetsenhe ñao que itsoñaoha nganji ni jaha ngain jehe. Cottimeja cjan jaha para danjo tti jaha rridanjo ngain Dios.

²⁵ 'Si chonja chojni sičo jie para ixin jaha, co tsjiho ngain juzgado, icha jian de ngatjao nttiha jaha nchetsenhe ñao chojni mé para que jehe sinttatjañaha cain tti rrica, para que jehe itsjioha ngain xijuez. Ixin si nahi, xijuez tsetonhe xa xipolicía para que tsiaxinha xa jaha. ²⁶ Co ndoa tti janha rrindattjo, que nttiha siaxinha hasta que tsjengaja hna cainxin tomi que jaha rrica.

Are Jesús ndache chojni que ixin jianha para ná xí sejoacaho xa iná nchí

²⁷ 'Jaha ra ocoihni ra ixin ley que vayé Moisés ttetonha janhi: "Dinttechincoha ra iná nchí que jaha nchíchiha ra." ²⁸ Pero janha rrindattjo ra que quexeho ná xí tsiacohne iná nchí, xí mé rročo que inchin ojoinchehe xa tti jehe xa xaxaon xa ngain nchí mé de ngain ansén xa.

²⁹ 'Mexinxin si jmacon sinttaaxaon para sinchehe jianha, ncheha cosa mé masqui hasta dantsjengui jmacon mé co danca ndaha, ixin icha jian sinchetján ná parte de cuerpoa co nahi ngoixin cuerpoa tsji ngain infierno. ³⁰ Co si rá sinttaaxaon de sinchehe jianha, ncheha cosa mé masqui hasta tonchinji rá mé co danca ndaha, ixin icha jian sinchetján ná parte de cuerpoa co nahi ngoixin cuerpoa tsji ngain infierno.

Are Jesús ndačo de ixin tti chojni que dačhjendehe chó

(Mt. 19.9; Mr. 10.11-12; Lc. 16.18)

³¹ 'Cai ndačo ngain ley que vayé Moisés: "Tti rinao sačhjendehe nchíchihi chonda que sinchechjienhe ncha ná xón que setaxin que jehe ndoa ondavačhjendehe ncha para ngoixin vidé." ³² Pero janha rrindattjo ra, que si ná xí sinao xa sačhjendehe xa nchíchihi xa (co jaha ixin vittjaxin xa ncha tajijoacaho ncha iná xí,) xixihi ncha tti culpé ngattoxon con Dios co por ixin tti sinchehe jehe xa, nchí sinchehe ncha jianha cai. Co xí que jehe ncha secoa ncha después, sinchehe xa jianha cai ixin secoa xa nchí mé.

Are Jesús ndache chojni ixin nchejuraha

³³ Cai ndačo Jesús:

—Cai jaha ra ocoihni ra ixin vitonhe nindogoelitoa ra xančhjen janhi: "Tinttoeha de nchehe tti jaha joincheprometé conixin ná juramento de ixin nombré Dios." ³⁴ Pero janha rrindattjo ra que xonhi tiempo sinchejurá ra. Nchejuraha ra de ixin ngajni ixin nttiha tti ttjen Dios. ³⁵ Ni nchejuraha ra de ixin ngataha nontte ixin nttihi tti nchejogaxin rotté Dios. Ni nchejuraha ra de ixin Jerusalén ixin mé tti ciudad de Dios, tti Rey de cainxin cosa. ³⁶ Ni nchejuraha ra de ixin já ra ixin jaha ra čhoja sinchettie ra ni sincheroa ra ni ná xajá ra. ³⁷ Mexinxin icha jian jeha ndačo ra "ján" o "nahi" ixin si rrondačo ra icha, mé tsixin de ngain inchínji.

Are Jesús ndačo ixin tsjengueyexinha ni iná chojni que joinchehe jianha ngain ni

(Lc. 6.29-30)

³⁸ 'Jaha ra ocoinhi ra quehe ttetonha ley que vayé Moisés: "Tti tsončhinga jmacon ná chojni, cai jehe chonda que rročhinga jmacon. Co tti sanqué neno ná chojni, cai jehe chonda que setsinga neno." ³⁹ Pero janha rrindattjo ra que ncheha ra jamé ngain tti chojni que sinchehe jamé nganji ra. Sino que, si čhonja chojni rrožanguiha ra ná manazo ngá con ra, dittoaxin ra para rrožanguiha ra iná manazo. ⁴⁰ Co si čhonja chojni sičo jie para ixin jaha ra co sino na santsjaha ra na camisá ra, jaha ra dittoaxin ra danjo ra hasta chamarrá ra cai. ⁴¹ Si čhonja chojni tsetonha que jaha ra tsjiho ra ná carga yó kilómetro, jaha ra dittoaxin ra ttjiho ra carga mé hasta nó kilómetro. ⁴² Co quexeho chojni que sanchiaha ra ná cosa, jaha ra chjehe ra; co ndačhoja ra nahi ngain chojni mé.

*Are Jesús ndačo chonda que sino ni chojni que ningaconhe ni
(Lc. 6.27-28, 32-36)*

⁴³ 'Cai jaha ra ocoinhi ra ixin ley que vayé Moisés janhi ttetonha: "Rinao chojni amigoa co ningaconhe tti chojni que ningaconha jaha." ⁴⁴ Pero janha rrindattjo ra que rinao ra tti chojni que ningaconha ra, co nichja ra jian de ixin tti chojni que nichja jianha de ixin jaha ra co nchehe ra jian ngain tti chojni que ningaconha ra, co nchetsenhe ra ñao Dios que jehe sinchehe jian ngain tti chojni que feo ndattjo ra co nchehe feo nganji ra. ⁴⁵ Jańá sinchehe ra para que sintte ra ndoa xenhe Ndo dá ra que ttjen ngajni. Ixin jehe Ndo mé tti rroanha nchanho para nchengasañehe cain chojni, tti chojni que nchehe jian co tti chojni que nchehe jianha, co jehe Ndo tti rroanha čhin para cainxin chojni cai, tti nchehe jian co tti nchehe jianha. ⁴⁶ Ixin si jaha ra rinao ra jeho tti chojni que jehe rinao ra jaha ra, xonhi premio sayehe ra ixin hasta tti chojni que chonxinha de ixin Dios cai nchehe jamé, inchin cain xicobrador de impuesto. ⁴⁷ Co si jeho amigoa ra rronichjehe ra, cai mé ¿quehe jian sinchehe ra? ixin hasta tti chojni que chonxinha de ixin Dios nchehe na jamé cai. ⁴⁸ Nchehe ra de que dintte ra chojni jian, jańá inchin Ndo dá ra que ttjen ngajni jehe Ndo jian Ndo.

6

Are Jesús ndačo ixin chonda ni que tsjenguijna ni chojni noa

¹ 'Nchehe ra tti jian jeoha are tatetsjehe icha chojni para que jehe na sicon ra na co rrožaxaon na ixin jaha ra anto jian ra. Si jamé sinchehe ra, Ndo dá ra que ttjen ngajni xonhi tsjengaha ra Ndo hna. ² Mexinxin are jaha ra tsjenguijna ra chojni noa, ttequinha ra ngain cainxin chojni inchin nchehe canxion chojni are ngain nihngo Israel co ngá nttiha. Chojni mé ndačo ixin nchehe na jańá para ixin Dios, pero ndoaha; chojni mé nchehe na jańá para que icha chojni rronichja na jian de ixin chojni mé. Pero janha rrindattjo ra que Dios xonhi tsjenguehe hna chojni mé ixin ojoacha de tti jian que nichja icha chojni por ixin jehe. ³ Mexinxin jaha ra are tsjenguijna ra chojni noa, xonhi chojni ttequinhi ra, ni chojni icha amigoa ra ndacheha ra. ⁴ Rročo que ttjenguijna ra chojni mé, pero jimao. Co Ndo dá ra que ttjen ngajni sicon Ndo tti jaha ra sinchehe ra; co jehe Ndo tsjengaha ra Ndo hna.

*Jesús cjoago quexén sinchecoanxinhi ni Dios
(Lc. 11.2-4)*

⁵ Co Jesús ndačo cai:

—Are jaha ra sinchecoanxinhi ra Dios, ncheha ra inchin nchehe tti chojni que ncheřoxinhi na nchecoanxinhi na Dios tatengattjen na ngaxinhi nihngo co ngain esquiné nttiha, para que icha chojni sicon na. Chojni mé ndařho na ixin nchehe na jańá para ixin Dios, pero ndoaha. Janha rrindattjo ra que Dios tsjengueha hna chojni mé tti jehe na tenchehe na, ixin ochonda na tti sachá na. ⁶ Mexinxin are jaha ra sinchecoanxinhi ra Dios, dixinhi ra nchiandoi ra co ttejehe ra puerté nchia co nchecoanxinhi ra Dios Ndodá ra que ttjen nganji nttiha, jaho ra conixin jehe Ndo. Co Dios tti sicon tti jaha ra tenchehe ra, co jehe Ndo tsjengaha ra Ndo hna.

⁷Are jaha ra sinchecoanxinhi ra Dios cjantaonha ra de nichja ra tti palabra que řonhi řé, inchin tti chojni que chonxinha de ixin Dios, ixin jehe na řaxaon na que Dios sinchehe caso cain tti jehe na tendařho na ixin anto tsje tenichja na. ⁸ Mexinxin jaha ra ncheha ra inchin nchehe jehe na, ixin Ndodá ra que ttjen ngajni onohe Ndo quehe rrogondaha ra icha saho que jaha ra sanchiehe ra Ndo. ⁹ Mexinxin jaha ra nchecoanxinhi ra Ndo janhi:

Padre soixin que ttjen ngajni,
nombrea soixin jiquininxin tsosayehe.

¹⁰ Siquetonha nttihi soixin.

Co tsonhe inchin soixin rinao nttihi ngataha nontte, jańá inchin tonhe nttiha ngajni.

¹¹ Chjana ra jai tti sine na que rrogondana na.

¹² Nchetjańana ni ra tti jianha que jointtaha na, jańá inchin janha na jointtatjańá na tti chojni que joinchehe jianha nganji na.

¹³ Nchegattoha ni ra tangui; tanřhjandaha ni ra ngain tti jianha.

Ixin soixin tti ttetonha co soixin tti chonda cainxin joachaxin co gloria para cainxin tiempo. Amén.

¹⁴ 'Ixin si jaha ra nchetjańehe ra tti chojni que nchehe jianha nganji ra, Ndodá ra que ttjen ngajni sinttatjańaha ra Ndo jaha ra cai. ¹⁵ Pero si jaha ra nchetjańeha ra chojni mé, Ndodá ra que ttjen ngajni cai řhoja sinttatjańaha ra Ndo cain tti jianha que jaha ra nchehe ra.

Are Jesús ndařho queřén sinttecjáńo ni

¹⁶ Co Jesús ndařho cai:

—Are jaha ra sinttecjáńo ra para ixin Dios, dinttechinha ra inchin tti chojni que ncheha inchin ndařho. Chojni mé ndařho na ixin tecjáńo na para ixin Dios pero nahi, ixin chojni mé dinttechín na para que icha chojni dicon que ixin jehe na tecjáńo na. Pero janha rrindattjo ra seguro que chojni mé Dios řonhi tsjenguehe na hna ixin ochonda na tti sachá na. ¹⁷ Pero jaha ra are sinttecjáńo ra para ixin Dios, tontti ra jinda ngá con ra co nchejinji ra já ra jian, ¹⁸ para que icha chojni rrořaxaonha na que ixin jaha ra tecjáńo ra para ixin Dios. Jeho Ndodá ra que ttjen nganji tsonohe Ndo, co jehe Ndo tsjengaha ra Ndo hna.

Cosa rentte que rrochonda na ngajni

(Lc. 12.33-34)

¹⁹ Cai ndařho Jesús:

—Datseha ra tsje cosa nttihi ngataha nontte, nttihi tti ndattjehe cochí co nttihi tti cain cosa ndaditján, co nttihi tti jí tti chehe que tté cain cosa.

²⁰ Icha jian datse ra tsje cosa para ngajni, nttiha tti řonhi cochí jí para

tsjehe cain cosa, ni cain cosa diha chjín, ni tti chehe coha nttiha para tsé.
²¹Ixin ngain lugar tti jaha ra rrochonda ra cosa icha importante para ixin jaha ra, cai nttiha sehe joarrixaoan ra co ansean ra.

Jmacon ni, mé tti lamparé cuerpoe ni

(Lc. 11.34-36)

²²Cai ndačo Jesús:

—Jmacon jí inchin ná lámpara ngain cuerpoa. Mexinxin si jmacon jian, cai ngoixin cuerpoa rrochonda joadingasán. Rročo si joadingasán que Dios rroanha jí ngain ansean, jaha ná chojni jian. ²³Pero si jmacon jianha, cai ngoixin cuerpoa jí ngain tti naxin xehe. Rročo que si coha nganji tti joadingasán que Dios rroanha, jaha inchin chojni chejo ixin čhoha dicon nntié Dios. ¡Co tti naxin xehe mé anto jianha para ixin jaha!

Chonda que icha sinoa ni Dios que tomi

(Lc. 16.13)

²⁴Ŷonhi chojni nchao sinchehe xé yó xinajni ngain nacoa tiempo, ixin icha sinoa ná xinajni co rroningaonhe iná xinajni, o icha sitticaon ngain ná xinajni co ngain iná xa isincheha caso. Jańá cai čhoha sinoa ni tomi co sinoa ni Dios ngain nacoa tiempo.

Dios jinda cain xenhe

(Lc. 12.22-31)

²⁵Cai ndačo Jesús:

—Co janha rrindattjo ra que taha ra joachjaon de ixin tti sintte ra co de ixin tti sihi ra para sinttechonxin ra, ni taha ra joachjaon de ixin lontto para sinttengaha ra ixin icha rentte vidé ni que tti jine ni, co icha rentte cuerpoe ni que lonttoe ni. Ixin Dios chjá ra vida que techonxin ra, mexinxin jehe tti rrochjá ra cain cosa que rrogondaha ra ngain vida jihi. ²⁶Tsjehe ra que cain conttoa que tjanganga va ngataonhe čhintto; jehe va Ŷonhi ttenga va ngataon jngui, co jamé Ŷonhi cosecha tsín va, ni ttenchjianha va cosecha ngain ná nchia. Pero masqui jamé, Nnodá ra que ttjen ngajni danjo Ndo tti jine cainxin coxigochjan mé. Co jaha ra seguro que icha rentte ra que cain coxigochjan mé. ²⁷Co jaha ra masqui anto tsa ra joachjaon pero čhoha sahgui ra ni irioho metro icha de tti jininxin ra.

²⁸¿Quedonda jaha ra anto ta ra joachjaon de ixin lontto? Ŷaxaon ra jian quexén dangui cain tsjo ngataon jngui que cain tsjo mé ncheha tsjo Ŷa, ni tajinha tsjo chjon. ²⁹Co ni rey Salomón, que jehe anto čhjoin vaguitsá, pero Ŷonhi tiempo jehe vetsá icha čhjoin que cain tsjo. ³⁰Si Dios jańá nchetsá cain ca que jehó jai jí ca ngataon jngui co ndoe ondarroxema ca co rroche ca ngain Ŷohi, mexinxin Dios sinchehe icha jian nganji jaha ra masqui Ŷa ditticaonha ra jian ngain Dios. ³¹Mexinxin taha ra joachjaon ni tendačoha ra: “¿Quehe sontte na? o ¿quehe sonho na? o ¿quehe lontto sitoxianxin na?” ³²Ixin cain icha chojni cain jihi tti taxin na joachjaon, pero jaha ra chonda ra ná Nnodá ra que ttjen ngajni co jehe Ndo onohé Ndo que jaha ra ján rrogondaha ra cain cosa jihi. ³³Mexinxin cain tiempo ditticaon ra cain tti jehe Ndo ttetonha Ndo, co nchehe ra tti jehe Ndo rinao Ndo, co jamé sayehe ra cain cosa jihi. ³⁴Co taha ra joachjaon de ixin quexén sinchehe ra ndoe, ixin ndoe tsiaho oje problema. Nchanho co nchanho chonda problemé, pero jaha ra chonda ra confianza ngain Dios ixin jehe tti sinttaŶaxaon ra quehe sinchehe ra.

7

*Ncheha ra juzgado iná chojni**(Lc. 6.37-38, 41-42)*

¹'Ncheha ra juzgado iná chojni para que Dios sincheha juzgado nganji ra. ²Ixin jehe sinttajuzgá jaha ra xajeho inchin jaha ra nchejuzguehe ra icha chojni, co jehe sinchehe nganji ra inchin nchehe jaha ra ngain icha chojni. ³¿Quexén nchao sicon ra tti anto nchín caxineno que jingangui jmacon iná chojni, co diconha ra tti caxineno anto jie que jingangui jmacon ra jaha ra? ⁴Si jaha ra jingangui ná caxineno anto jie ngangui jmacon ra, ¿quexén nchao rrondache ra iná chojni: "Tančhjanda na santsjenguiha caxineno que jingangui jmacon"? ⁵Jaha ra tti chojni que ncheha tti ndačo! Saho dantsjengui ra tti caxineno anto jie que tengangui con ra, co jamé nchao sicon ra jian para santsjengui ra tti caxineno nchín que jingangui jmacon iná chojni.

⁶'Ncheha ra sigue ndačo ra joajné Dios ngain tti chojni que anto čhintto inchin conia ixin joajna mé anto jian co jehe chojni mé puede rrocjancoa na nasoenxon ra na. Ni ncheha ra sigue ndačo ra joajné Dios ngain tti chojni que deporsín ncheřoxinhi nchehe jianha, ixin chojni mé te inchin cocochi co joajné Dios inchin perla que anto fino, co jehe na sincheha na caso, inchin are cocochi ttingachjexon va noa co jineha va.

*Quexén sanchia cosa de ngain Dios**(Lc. 11.9-13; 6.31)*

⁷'Danchia ra co Dios rrochjá ra. Ttjé ra co sinchí ra. Dinga ra puerta co puerta mé rroxiré. ⁸Ixin tti chojni que danchia dayé; co tti chojni que ttjé, jehe dittja; co tti chojni que dinga puerta, xiré puerta mé para ixin jehe.

⁹¿Ixin apoco čhonja de jaha ra nchao rrochjehe ra xanha ra ná řo are sanchiaha ra xan niottja? ¹⁰¿O apoco nchao rrochjehe ra xan nntaohe conché are sanchiaha ra xan nntaohe copescado? ¹¹Jańá, si jaha ra que jeha jian ra noha ra danjo ra cosa jian ngain xanha ra, mexinxin Ndodá ra que ttjen ngajni seguro rrochjá ra Ndo cosa jian jaha ra řo sanchiehe ra Ndo.

¹²'Mexinxin cainxin tiempo nchehe ra ngain icha chojni inchin jaha ra rinao ra sinchehe jehe na nganji ra, ixin jamé ttetonha ley que vayé Moisés co cain tti dicjin cainxin profeta are saho.

*Tti puerta jno**(Lc. 13.24)*

¹³'Para tsji ra ngajni chonda que sixinxin ra de ngain tti puerta jno, ixin tti puerta ton co tti nttiha ton, mé tti sattjixin tsje chojni ngain infierno. ¹⁴Pero tti puerta co tti nttiha que satsjixin chojni para ngajni, cayoi mé nojno, co tsjeha chojni chonxin puerta mé co nttiha mé.

*Nttattochjoin datsoan ni nnta de ixin ttochjoín nnta**(Lc. 6.43-44)*

¹⁵'Ttjiho ra cuidado de ixin tti chojni mentiroso que ndačo na ixin jehe na nichja na de ixin Dios pero ndoaha. Jehe na ndačo na jańá de ngain rroha na pero de ngain ansén na jehe na jianha na inchin coxigo čhintto ngagaha jna. ¹⁶Jaha ra nchao satsoan ra chojni mé de ngain tti jehe na nchehe na ixin inchin nntanchaha čhoaha sinchian nnta uva, ni canchaha čhoaha sinchian ca higo, ¹⁷jańá cai cain nttattochjoin jian

danjo nnta ttochjoin jian, co tti nttattochjoin que xonhi xé danjo nnta ttochjoin que xonhi xé. ¹⁸ Nttattochjoin jian čhoha sanjo nnta ttochjoin que xonhi xé ni cai nttattochjoin que xonhi xé čhoha sanjo nnta ttochjoin jian. ¹⁹ Cain nttattochjoin que danjoha ttochjoin jian činji nnta mé co che nnta ngain xohi. ²⁰ Co jamé jaha ra rrochonxin ra chojni mé de ngain tti jehe na nchehe na.

Cainxinha chojni tsji na ngajni tti ttetonha Dios
(Lc. 13.25-27)

²¹ Cainxinha chojni que ndachjenji na janha: “Soixin, Soixin”, tsji na ngajni tti ttetonha Ntodana, sino que jehó tti chojni que nchehe cain tti rinao Ntodana que ttjen ngajni. ²² Are tsí nchanho mé, tsje chojni rrondachjenji na janha: “Soixin, Soixin, janha na ndattjan na chojni de ixin soixin, co ngain nombrea venguixin na espíritu jianha de ngaxinhi cuerpoe tsje chojni, co de ixin nombrea jointtaxin na tsje milagro.” ²³ Pero ngain nchanho mé janha rronhattjan na: “Janha xonhi tiempo joatsoan jaha ra inchin chojnina. Sattjixin ra de nganji janha, jaha ra xó joinchehe ra jianha.”

Tti nchia que jingattjen ngataha ttjao co tti nchia que jingattjen ngataha nchise
(Lc. 6.47-49; Mr. 1.22)

²⁴ Jańá mexinxin tti chojni que ditticaon na janha co nchehe tti janha ndačhjan, chojni mé inchin ná xí que xaxaon jian para joinchechjian nchiandoha ngataha ttjao. ²⁵ Co are jói čin, coyé jinda ngain río, co cjoa čhintto soji ngain nchia mé, pero nchia vetsingaha nchia ixin soji jingattjen nchia ngataha ttjao. ²⁶ Pero tti chojni que ttinhi tti janha ndačhjan co ncheha jamé, chojni mé inchin tti ná xí que xonhi xé tti jehe xa xaxaon xa ixin dinchechjian xa nchiandoha xa ngataha nchise. ²⁷ Co are jói čin, coyé jinda ngain río, co cjoa čhintto soji, nchia mé cjamangui nchia. Co mé anto tangui para ixin xí mé.

²⁸ Are Jesús joexin nichja cain jihi, cain chojni que tettinhi nttiha vinttegoan na admirado de ixin tti ndačo Jesús, ²⁹ ixin Jesús ndačo ngain na conixin anto tsje joachaxin, co jeha inchin cain ximaestroe ley.

8

Jesús joinchexingamehe ná tti vechonda lepra
(Mr. 1.40-45; Lc. 5.12-16)

¹ Are Jesús vaniixin de ngain jna mé, anto tsje chojni rroé. ² Co conchienne ná xí que veninxin chin dinhi lepra. Xí mé vettoxin nnta-jochjihi xa ngattoxon con Jesús co ndačo xa:

—Si rinao soixin, nchao nchexingamana de ixin chin que janha rri-chonda.

³ Cottimeja Jesús catte xí mé co ndačo ngain xa:

—Ján, rinaho. Co jaxon oxingamaha jaha.

Co are Jesús ndačo yá jehe tti venihi mé xingamehe de ixin tti chin que jehe vechonda. ⁴ Co Jesús ndačo ngain tti xí mé:

—Tsjenxin, xonhi chojni ndache. Jehó ttji co tonchienne ngain xidána para que jehe xa sicon xa ixin jaha oxingamaha, co danjo para ixin Dios inchin ttetonha ley que vayé Moisés, para que cain chojni nttiha tsonohe na que jaha oxingamaha de ixin tti chin que joarichonda.

Jesús joinchexingamehe ná xanxí, xinchehe xé ná xicapitán romano
(Lc. 7.1-10)

⁵ Are joigaha Jesús rajna Capernaum, ná xisoldado capitán romano conchienne xa co joinchetsenhe xa ñao Jesús, ⁶ co ndačo xa:

—Nttatsanha ñao soixin nchexingamehe ná xinchehe xana ixin nihi xa. Tajitsinga xa ngain nchia co čoha ttingui xa co cai anto jittín xa.

⁷ Jesús ndačo:

—Janha tsji sinttaxingamá xí mé.

⁸ Co xicapitán mé ndačo xa:

—Nttatsanha ñao soixin, janha ni jiquininxinha na para soixin sixinhi nchiania. Jeho rinaho janha que soixin ttetonha co xinchehe xana orroxingamehe xa. ⁹ Janha nona jamé ixin janha ditticanho cain tti ttetonna xichonda icha tsje joachaxin que janha, co cai janha chonda joachaxin de ttetoan cain xisoldadona. Are janha ndattjan ná de jehe xa que tsji xa quexeho parte, jehe xa ttji xa. Co are ndattjan xa que tsí xa, jehe xa ttí xa. Co are ttetoan ná de xinchehe xana de sinchehe xa quexeho xa, jehe xa nchehe xa xa mé.

¹⁰ Are Jesús coinhi jihi jehe goan admirado co ndačo ngain chojni que jidicao:

—Janha rrindattjo ra ndoa que cainxin rajna de Israel xonhi chojni vetan janha que anto jian ditticaon inchin xí jihi. ¹¹ Janha rrondattjo ra que tsje chojni de icha nación inchin xisoldado romano jihi tsji na siguintte na ngain Abraham, co Isaac co Jacob nttiha ngajni tti ttetonha Dios. ¹² Co tsje chojni Israel que tequininxin tsji nttiha, pero tsjiha na nttiha ixin Dios rrorroanha na ngain tti naxin xehe, nttiha tti puro rrotsjanga na, co hasta sinetaon neno na.

¹³ Cottimeja Jesús ndačo ngain xicapitán mé:

—Sattji nchiandoi, co tsonhe inchin jaha ditticaon.

Co xinchehe xé mé xingamehe xa ngain rato mé.

Jesús joinchexingamehe jannché Pedro

(Mr. 1.29-31; Lc. 4.38-39)

¹⁴ Jesús cjoí nchiandoha Pedro, co nttiha vicon Jesús jannché Pedro tajitsinga jan de ixin soa. ¹⁵ Jesús jeho tsehe rá jan co ondavathjehe jan soa que veyá jan, co vingattjen jan para joincheatendehe jan na.

Jesús joinchexingamehe tsje chojni nihi

(Mr. 1.32-34; Lc. 4.40-41)

¹⁶ Co are ondaconaxin xehe, tsje chojni joiaohe na Jesús tsje chojni que chonda espíritu jianha, co jehe, conixin nacoa palabra que jehe nichja, vengui cain espíritu jianha mé. Co cai ngain rato mé jehe joinchexingamehe cainxin chojni nihi que conchienne ngain. ¹⁷ Jihi conhe para que joiconhe tti dindačo profeta Isaías are jehe dicjin: “Jeho mismo vayé chinha na co sajoicao tti anto ttín cuerpoa na.”

Tti chojni que joinao rrogacao Jesús

(Lc. 9.57-62)

¹⁸ Are Jesús vicon que anto tsje chojni xatte ngain, jehe coetonhe chojni que vacao para vatto na conixin jehe para toenxin lago. ¹⁹ Co ngain rato mé conchienne ná ximaestroey ley Israel ngain Jesús co ndačo xa:

—Maestro, janha rinaho sacjin na tti soixin sacji.

²⁰ Jesús ndačo:

—Cain condaniŕa chonda va cuevé va co cain conttoa chonda va caqué va; pero janha, tti Xí que joixin de ngajni, chondaha ni ttinó saričhin.

²¹ Co iná de tti chojni que vacao Jesús ndačho:

—Janha ján sacjin na, pero chonna na hasta ndasenja ndodana para que janha tsjavá ndo.

²² Co Jesús ndačho:

—Chjin na co tančhanda tti chojni que ditticaonha na janha tsjavá chó na.

Jesús tajoaquehe čhintto conixin olé lago

(Mr. 4.35-41; Lc. 8.22-25)

²³ Cottimeja Jesús conixin chojni que vacao coani na ná barco co sacjoixin na de nttiha. ²⁴ Co are ongataonhe jinda mé, cjoa ná čhintto anto soji que tsín olé jinda que hasta cjoanotaon barco mé. Co Jesús tajijoa ngaxinhi barco hora mé. ²⁵ Cottimeja cain chojni que joicao cjoi na joinchexingamehe na Jesús co ndačho na ngain:

—Nttatsanha na ñao soixin, tančhandaha ni ra ndasenhe na ixin barco ndajixincanjingui jinda.

²⁶ Jesús ndačho ngain na:

—¿Quedonda anto ŕaon ra? ¡Jaha ra antoha jian ditticaon ra tti janha ndattjo ra!

Cottimeja vingattjen Jesús co nichjé čhintto conixin jinda, co ngain rato mé tavehe čhintto conixin jinda. ²⁷ Co cain chojni mé vinttegoan na admirado, co vinttendačho na:

—¿Quehe joachaxin chonda xí jihu que hasta čhintto co jinda ditticaon tti ndačho xa?

Xí de ngain nonttehe Gadara que vinttechonda espíritu jianha

(Mr. 5.1-20; Lc. 8.26-39)

²⁸ Are Jesús joiji toenixin lago mé ongain nonttehe Gadara, yó xí vinttegačhxin xa de ngaxinhi cueva tti vaguittohe cuerpoe chojni que ndavaguenhe ngain tiempo mé. Co xí mé vintteconchienhe xa ngain Jesús. Cayoi xí mé vinttechonda xa espíritu jianha ngaxinhi cuerpoe xa, co anto čhintto vintte xa que ni ŕonhi chojni nchao vagattoxin ngain lugar mé. ²⁹ Co vinttendačho xa sén:

—¿Quedonda joihu nganji na, jaha Jesús, Xenhe Dios? ¡ŕa jaha tiempo para que jaha sincheguetan ni ra tangui!

³⁰ Co nonttiha chiaon rridinttene anto tsje cocochi. ³¹ Co cain espíritu jianha joinchetsenhe ñao Jesús co ndačho:

—Si senguixin na de ngaxinhi cayoi cuerpo tehe, nttatsanha na ñao tančhanda na sixinhi na ngaxinhi cocochi taha.

³² Cottimeja Jesús ndačho:

—Ján, diguixinhi ra nttiha remé.

Co cain espíritu jianha vačhxin de ngaxinhi cayoi cuerpoe xí mé co savixinhi ngaxinhi cain cocochi mé. Cottimeja cain jehe va ndavinttecoloco va co coinga va xincanji va ngain ná lago nttiha, co nttiha joingui va jinda co nttiha ndavintteguenxin cainxin va ixin vinttecjonhe va jinda.

³³ Co tti chojni que vaquingaria cain cocochi mé vintteŕaon na co coinga na cjoi na ngain rajna que jí icha chian para joindačho na tti conhe cain cocochi, co tti conhe ngain cayoi xí que vinttechonda espíritu jianha. ³⁴ Cottimeja cain chojni de ngain rajna mé vintteci na tti jí Jesús.

Co are vicon na Jesús, jehe na joinchetsenhe na ñao Jesús que satsjixin de ngain nonttehe na.

9

Jesús joinchexingamehe ná xí que čhoha vacji

(Mr. 2.1-12; Lc. 5.17-26)

¹ Cottimeja Jesús coani barco iná co sacjoi para toenixin jinda ngain rajna Capernaum, rajné Jesús tiempo mé. ² Ntitiha joicaohé na Jesús ná tti xí que čhoha vacji, tajitsingataha xa ná camilla. Are Jesús vicon que cain chojni que joicao tti nihi mé chonda seguro que Jesús sinchexingamehe jehe tti nihi mé, Jesús ndačo ngain tti nihi:

—Āaonha, janha ojointtatjañaha cain tti jianha que jaha rrica.

³ Co cainxin ximaestroé ley Israel que te nttiha vintteřaxaon xa: “Nchaoha tti jinichja xí jihi; Dios tsoñaohe xa.” ⁴ Pero Jesús ovenohe tti tteřaxaon xí mé, co jehe ndačo ngain xa:

—¿Quedonda anto jianha tti jaha ra řaxaon ra? ⁵ ¿Quexehe tti icha tanguiha rročhjan: “Ovitjañaha jaha cain tti jianha que joinchehe”, o rrondačhjan: “Dingattjen co sattjixin rottea”? ⁶ Nchao remé, janha tsjagoha ra que janha, tti Xí que joixin de ngain, chonda joachaxin nttihi ngataha nontte para nttatjañá chojni tti jianha que nchehe na.

Cottimeja ndačo Jesús ngain tti čhoha vacji mé:

—Dingattjen co tsinhi camillá co sattjixin rottea para nchiandoi.

⁷ Co ngain rato mé jehe tti čhoha vacji, vingattjen co sacjoi para nchiandoha. ⁸ Co cain chojni que te nttiha are vicon na milagro jihi, jehe na vintteřaon na co ndačo na que ixin Dios jian ixin joanjo joachaxin mé ngain chojni.

Jesús nichjé Mateo

(Mr. 2.13-17; Lc. 5.27-32)

⁹ Cottimeja Jesús sacjoixin de nttiha, co ngatja nttiha Jesús vicon Mateo tají ngaca mesa tti jinchexin cobro cain impuesto. Co Jesús ndačo ngain:

—Āacoi, chjin na.

Co ngain rato mé jehe Mateo vingattjen co sacjoi conixin Jesús.

¹⁰ Co después Jesús tajine ngain nchiandoha Mateo. Co nttiha conchienne tsje xicobrador de impuesto, co icha chojni que nchehe jianha, co cain nimé joine na ngain mesa conixin Jesús conixin cain chojni que jehe vacao. ¹¹ Pero canxion xifariseo vintteguicon xa jihi, co después vinttejanghiangui xa ngain tti chojni que vacao Jesús co vinttendačo xa:

—¿Quedonda ximaestroa ra jinecaho xa cain xicobrador de impuesto, co icha chojni que nchehe jianha?

¹² Jesús coinhi jihi, co jehe ndačo ngain xa:

—Chojni que niha, chojni mé rrongondeha xincheřoan, jecho tti chojni nihi, mé tti rrongondehe xincheřoan. ¹³ Sattji ra co diquinxin ra quehe rročo tti parte ngain Palabré Dios que jitaxin: “Janha rinaho que jaha ra tsiacnoehe ra chojni, co nahi ixin sonhe ra coxigo para tsín ra para ixin janha.” Mexinxin janha joiha para joinichjá chojni jian, sino que janha joihi para joinichjá chojni jianha para que tsentoxinhi na de tti jehe na tenchehe na.

Are joanchianguihi na Jesús ixin quedonda chojní jehe dinttecjaño na (Mr. 2.18-22; Lc. 5.33-39)

¹⁴ Cottimeja chojni que vacao Juan, tti vanheguitte chojni, conchienne na ngain Jesús co ndačo na:

—¿Quedonda janha na, conixin cain xifariseo anto dinttecjaño na para ixin Dios, co chojni que čhjiho jaha dinttecjaño na?

¹⁵ Jesús ndačo ngain na:

—¿Apoco cain chojni que ttji ngain ná vandango tti tottehe na nchao sinttecjaño na si xinovió řa jí xa ngayehe na? Pero, ján, tsí tiempo que xinovió satsjixin xa de ngain na, cottimeja jehe na sinttecjaño na.

¹⁶ Ķonhi chojni tteyehe lontto naroa ngain rioho lontto nttaxí, ixin lontto naroa ndadixehe co ndattinchje lontto nttaxí, co tti diguichje icha tojie. ¹⁷ Ni cai řonhi chojni ttequia řan que jidatsoxinhi ngá ná roanřan nttaxí ixin řan mé anto daca tsončhintaon řan roanřan mé, co cayoi cosa mé ndasitján. Mexinxin řan que jidatsoxinhi siquia řan ngain ná roanřan naroa para que sitjanha cayoi cosa mé, ixin roanřan mé sichjeha co řan mé singoha řan. Jańá tti costumbre que jaha ra chonda ra jiha de acuerdo ngain tti janha rrindattjo ra.

Are xingamehe xannčhichjenhe Jairo conixin tti nčhí que catte lonttoe Jesús

(Mr. 5.21-43; Lc. 8.40-56)

¹⁸ Jesús řa jindačo cain palabra yá are joí ná xí que ttetonha ngain nihngo nttiha. Vettoxin nttajochjihi xa ngain Jesús co ndačo xa:

—Ná xannčhichjanha jaxon joexin ndavenhe xan. Pero si soixin sihi co tsín rá ngataha xan, jehe xan rrocjan rroxechon xan iná.

¹⁹ Jesús vingattjen co sajoicao xí mé conixin tti chojni que vacao. ²⁰ Co are ongatja nttiha conchienne ná nčhí que ovechonda tteyó nano que veguenguihi nča jni. Jimao conchienne nča toenxin Jesús co catte nča ngandehe tti manta que jitsá, ²¹ ixin jehe nča řaxaon nča: “Conixin jeho rrocatte lonttoe Jesús, janha rroxingamana.” ²² Pero Jesús ngaria co jehe vicon nčhí mé, co ndačo ngain nča:

—Ķaonha, jaha oxingamaha ixin vitticaon.

Co desde ngain rato mé, nčhí mé ondaxingamehe nča.

²³ Co después are Jesús joiji ngain nchiandoha xí que vaquetonha ngain nihngo, Jesús vicon que onttiha te ximusico para sasicjavá na xannčhichjan mé. Co icha chojni anto tetsjanga na. ²⁴ Jesús ndačo ngain na:

—Dachjexin cain ra de nttihi, ixin xannčhichjan yá jeha ndadiguenhe xan, jeha tajjjoa xan.

Cain chojni nttiha cjoanoa na Jesús ixin jehe ndačo jańá. ²⁵ Pero jehe coetonhe na que vačhjexin na de nttiha, cottimeja jehe joixinhi co tsehe rá xannčhichjan mé, co jehe xan vingattjen xan. ²⁶ Co ngoixin región mé anto daca conohe chojni de ixin tti milagro jian que joinchehe Jesús.

Jesús joinchexingamehe yó xí que vaguiconha

²⁷ Are Jesús sacjoixin de nttiha, rroé yó xí que vaguiconha co vintten-dačo xa sén:

—¡Ttiaoconoana ni ra soixin, tti razé David co tti chonda joachaxin que vechonda rey David!

²⁸ Co are Jesús joixinhi nchiandoha, jehe cayoi tti vaguiconha mé vintteconchienne ngaca Jesús co jehe joanchianguihi cayoi xí mé:

—¿Aditticaon ra que janha nchao sinttaꝑoán jmacon ra?

Cayoi xí mé ndaꝑho xa:

—Ján ditticanho na que soixin nchao sincheꝑoanna ni ra.

²⁹ Cottimeja Jesús catte ngataha jmacon cayoi xí mé co ndaꝑho:

—Tsonhe inchin jaha ra ditticaon ra.

³⁰ Co ngain rato mé ndaxingamehe jmacon cayoi xí mé. Cottimeja Jesús anto coetonhe xa co ndaꝑho ngain xa:

—Ꝑonhi chojni ttequinhi ra quehe conha ra.

³¹ Pero are sacjoixin xa de nttiha, jehe xa coexinhi xa coequín xa chojni ngoixin región mé tti joinchehe Jesús.

Jesús joinchexoenhe ná tti ꝑhoha vanichja

³² Are cayoi xí mé tedaꝑhjexin xa de nttiha, canxion chojni joiaohe na Jesús iná xí que ꝑhoha vanichja ixin vechonda ná espíritu jianha. ³³ Are Jesús joantsje espíritu jianha mé, jehe tti xí mé coexinhi nichja. Cain chojni que vicon nttiha vinttegoan na admirado co ndaꝑho na:

—Nttihi Israel ꝑonhi tiempo vocon na ná cosa inchin jihi.

³⁴ Pero xifariseo vinttendaꝑho xa:

—Xí jihi nchao dengui xa espíritu jianha de ixin joachaxín Satanás ixin Satanás tti ttonhe cain espíritu jianha.

Jesús ttiaconoehe cain chojni

³⁵ Jesús vacji ngain cain ningoe cain rajna nttiha co ngain ningoe cain rajnanchjan para vandache chojni de ixin Dios. Jehe vandaꝑho tti jian joajna de ixin queꝑén ttonha Dios, co vanchexingamehe cain chojni que vinttechonda quexeho chin. ³⁶ Are Jesús vicon cain chojni jihi, jehe coiaconoehe na ixin jehe na chonda na joachjaon co tedoan na desanimado inchin coleco que chondaha va tti ttngaria va. ³⁷ Cottimeja jehe ndaꝑho ngain tti chojni que vacao:

—Ján ndoa, que cosecha atto tsje pero ninchehe ꝑa tsjeha na. ³⁸ Mexinxin ndache ra Xinajni que rrorroanha Xa icha ninchehe ꝑa para que satse na cain cosecha jihi.

10

Jesús coinchiehe tti tteyo chojni que vacao

(Mr. 3.13-19; Lc. 6.12-16)

¹ Cottimeja Jesús vayé tti tteyo chojni que vacao co joanjo joachaxin ngain na de nchao sengui na espíritu jianha de ngain chojni, co de nchao sinchexingamehe na cain chojni que ninxin quexeho chin.

² Jihi nombré tti tteyo chojni que vacao Jesús: tti saho vinhi Simón, co cai vinhi Pedro; Andrés xanchó jehe Pedro; Jacobo conixin Juan xanchó jehe Jacobo, co cayoi nimé xenhe Zebedeo. ³ Co Felipe; Bartolomé; Tomás; Mateo, tti cobrador de impuesto; Jacobo, xitsihi Alfeo; Lebeo, que cai vinhi Tadeo; ⁴ Simón, jehe ná de tti partidoe chojni político que vaquetocaho chojni romano; co Judas Iscariote, tti joindaꝑho para tse na Jesús.

Jesús rroanha chojni que vacao para joinichja na de ixin Dios

(Mr. 6.7-13; Lc. 9.1-6)

⁵ Jesús coetonhe tti tteyo chojni jihi janhi:

—Ttjiha ra ngain región tti te chojni que jeha judío, ni ttjiha ra ngain nonttehe Samaria. ⁶ Ttji ra jeho ngain chojni judío ixin jehe

na te na inchin coleco que diguicho. ⁷ Ttji ra co dindache ra chojni mé que oconchiaon tiempo para que Dios tsetonha ngain ansén jehe na. ⁸ Nchexingamehe ra chojni nihi, nchexechon ra chojni que ondadiguenhe, nchexingamehe ra tti chojni que techonda chin lepra, co dehngui ra espíritu jianha de ngain chojni. Jaha ra vittonha ra joachaxin jihi, mexinxin are sinchegonda ra joachaxin jihi ncheha ra cobro.

⁹ Ttjioha ra tomi; ni de oro ni de plata ni de cobre. ¹⁰ Ni ttjioha ra tti sintte ra ngatja nttiha. Co ttjioha ra icha lontto ni icha catte que jehó catte que jaha ra techjanga ra co jehó lontto que jaha ra tengaha ra, ni ttjioha ra nttacotto ixin jaha ra chonda ra derecho de sayehe ra tti sintte ra co cain icha que sondaha ra de ngain tti chojni que tsji ra.

¹¹ Are saso ra ngain ná rajna o ngain ná rajnanchjan, ttjé ra nttiha ná chojni jian para dittoha ra nttiha ngain nchiandoha chojni mé hasta que jaha ra satsjixin ra de ngain rajna mé. ¹² Are saso ra ngain nchia mé chjehe ra na joajna co nchetsenhe ra ñao Dios que jehe sinchenciaon chojni mé. ¹³ Si chojni de nchia mé jian na, ján, Dios sinchenciaon na. Pero si jehe na jianha na, Dios sinttanchaon jaha ra en lugar de jehe na. ¹⁴ Co si ngain ná nchia rroçhoha na sayaha ra na ni sincheha na caso tti jaha ra rrondate ra na, jaha ra dachjexin ra de ngain nchia mé o de ngain rajna mé co tontsjenga ra rottea ra para que sinttji cain jinche que teyá rottea ra nttiha. Jamé para ná señal ixin vitticaonha na jaha ra. ¹⁵ Janha rrindattjo ra seguro que are ngain tti nchanho que are Dios sinchejuzguehe cain chojni, rajna mé icha soji castigo sayé que tti castigo que vayé chojni ngain Sodoma co Gomorra.

Jesús ndache tti tteyó chojni ixin icha chojni feo sinchehe ngain na

¹⁶ Tsjenxin ra! Janha rrorroanha jaha ra inchin coleco ngayehe condaniça. Dittoaxinha ra para sinttayaha ra na inchin conché dittoexinha va para denhe va. Pero dintteha ra çhintto; sino que dintte ra inchin conttoanajni. ¹⁷ Pero ttjiho ra cuidado ixin rrotse ra na co sinttachianha ra na ngain juzgado, co tsaxin ra na nttá ngaxinhi nihngo. ¹⁸ Co hasta tsjiho ra na ngain tsje xigobernador co ngain tsje rey de ixin causananxin janha. Co jamé jaha ra rrochonda ra oportunidad de rronichja ra ngain cain xí mé de ixin janha, co hasta rronichja ra ngain icha chojni que jeha judío. ¹⁹ Pero are rrotse ra na co tsjiho ra na ngain juzgado, jaha ra taha ra joachjaon de ixin quehe palabra sinchegonda ra, ixin are mé Dios rrorroanha palabra que jaha ra rronichja ra. ²⁰ Ixin jeha jaha ra tti rronichja ra, sino que Espíritu Santo que rrorroanha Ndodá ra que ttjen ngajni, mé tti rronichja.

²¹ Chojni siçho jie para ixin xanchó para nasoexon na xan. Co sehe ndodaha que jehó ndo siçho ndo jie para nasexon xenhe ndo. Co sehe chjan que rroningaconhe xan ndodé xan co janné xan co jehó xan siçho xan jie para nasexon nindoha xan. ²² Cainxin chojni ngoixin mundo rroningaconha ra na ixin causananxin janha. Pero quexeho ra ço sitticaon ni ra co sinchehe ra cain tti janha coetonha ra hasta are ndasenhe ra, jaha ra rrochonda ra iná vida naroxin ngain Dios. ²³ Are chojni de ngain ná rajna feo sinchehe na nganji ra jaha ra sattjixin ra de nttiha co sattji ra ngain iná rajna. Janha rrindattjo ra seguro que ni ça tsjaha ra tsingaria ra ngain cainxin rajna de chojni Israel are janha, tti Xí que joixin de ngajni, orrocjan na sihi iná.

²⁴'Ni ná tti jitangui jeha icha nohe que ximaestroe, co ni ná tti nchehe x̄a jeha icha tsetonha que xinajní. ²⁵Tti jitangui, čoha tsangui icha que jeho tti nohe ximaestroe, co tti nchehe x̄a čoha icha tsetonha que jeho inchin tsetonha xinajní. Jañá si janha tti inchin ndodá ra de ngain nchia co ncheguinhí na na Beelzebú, que rročo Satanás, seguro jeha na rronichja na icha feo de ixin jaha ra.

Quensen jiquininxin rroxagoen ni
(Lc. 12.2-9)

²⁶'Pero xagoenra ra ni ná chojni ixin anto daca tsononxin cain tti ndoa de ixin Dios co xonhi cosa jima que tsononxinha. ²⁷Cain tti rrindattjo ra, nchenohe ra tsje chojni, co cain tti rrindattjo ra jimao, jaha ra nchenohe ra icha tsje chojni inchin rrocani ra ná nchia co de nttiha rronichjabin ra. ²⁸xagoenra ra tti chojni que natjayaxon ixin mé čoha nasoenxon almé ni. xagoenhe ra jeho Dios ixin jeho mé tti nchao nasoenxon cuerpoe ni co almé ni ngain infierno.

²⁹'¿Quejanhi rentte yó conttoachjan? ¡Anto tsjeha tomi! Pero masqui jamé ni ná de jeha va denha va si Ndodá ra que ttjen ngajni danjoha joachaxin. ³⁰Co jeha Ndo nohe Ndo hasta quejanhi x̄ajá ra chonda ra. ³¹Mexinxin jaha ra x̄aonha ra, ixin para Dios, jaha ra icha rentte ra que tsje conttoa.

Tti chojni que ndačo ngattoxon con icha chojni ixin Jesús jian
(Lc. 12.8-9)

³²'Cain chojni que rrondačo ngattoxon con icha chojni que ixin janha jian na, cai janha rrondačhjan ngattoxon con Ndodana que ttjen ngajni que ixin chojni mé jian cai. ³³Pero tti chojni que ndačo ngattoxon con icha chojni que ixin janha jeha jian na, cai janha rrondačhjan ngattoxon con Ndodana que ttjen ngajni que ixin chojni mé jeha jian cai.

Causexin Jesús chojni rrochjeya
(Lc. 12.51-53; 14.26-27)

³⁴'X̄axaonha ra que janha joihi ngataha nontte jihi para que cain chojni sinoa chó ixin tsoenja jamé, sino que cainxin chojni rrochjeya na ixin janha joihi. ³⁵Ixin ttoha chojni sitticaon na janha co ttoha na nahi, mexinxin ná x̄anxí co ndodé xan tsoñaohé chó na co xannčhí co janné xan tsoñaohé chó na, co nčhidainda co jannché ncha tsoñaohé chó na. ³⁶Jañá cada chojni rroningaconhe na jeho nindoha na.

³⁷'Chojni que rinao ndodé o janné icha que janha, chojni mé jiquininxinha soan chojnina, co tti chojni que rinao nčhichjehe o xitsihi icha que janha, chojni mé jiquininxinha soan chojnina, ³⁸co tti chojni que tsinha en peligro vidé na para ixin janha, chojni mé jiquininxinha soan chojnina. ³⁹Tti icha rinao vidé, mé sinchetján vidé. Pero tti sinchetján vidé de ixin causananxin janha, mé rrochonda iná vida naroaxin.

Tti chojni que rroxengehe hna
(Mr. 9.41)

⁴⁰'Tti chojni que jian sayaha jaha ra, chojni mé cai sayehna na janha, co tti chojni que sayehna janha, chojni mé cai sayé na jeha tti rroanha na janha. ⁴¹Co tti chojni que sayé ná profeta ixin profeta nichja joajna que dayé de ngain Dios, chojni mé Dios tsjengehe hna inchin xengehe hna ná profeta. Co tti sayé ná xí jian ixin xí mé jian xa, chojni mé

Dios tsjenguehe hna xajeho inchin xenguehe hna ná chojni jian. ⁴² Co quexeho chojni que sanjo masqui ná vaso de jinda quin ngain quexeho chojni que ditticaon na janha jehó ixin ditticaon na janha, chojni mé Dios tsjenguehe hna cai.

11

Tti chojni que Juan rroanha
(Lc. 7.18-35)

¹ Are Jesús joexin ndache cain cosa jiji tti tteyó chojni que vacao, sacjoixin de nttiha para joindache icha chojni de ixin Dios ngain icha rajna que vintte ngain región mé.

² Juan, tti vanheguitte chojni, ovehe ngaxinhi cárcel tiempo mé pero jehe conohe cain tti jian que jinchehe Jesucristo. Cottimeja jehe rroanha yó chojni que vacao para joiganchianguihi na Jesús ³ ixin quensen jehe, co ndaço na ngain Jesús:

—¿Ajaha tti Cristo tti chonda que tsí, o xa rrochonda na que rrochoan na iná chojni?

⁴ Jesús ndaço:

—Ttji ra co dindache ra Juan tti jaha ra tedicon ra jaxon co tti jaha ra tettinhi ra. ⁵ Diquequinhí ra Juan ixin tti chojni que vaguiconha, jai onchao dicon, co ixin tti çhoha vacji, jai onchao çhji, co ixin oxingamehe tti chojni que veninxin tti chin que dinhi lepra, co ixin tti chojni que vaquinha, jai onchao ttinhi, co ixin tti chojni que ondavenhe, jai oxechon, co ixin tti chojni que xa vaquinha de ixin Dios, jai janha ndattjan. ⁶ Co anto çhjoin para ixin tti chojni que chonda seguro nganji na janha.

⁷ Are cayoi tti chojni mé sacjoi na, Jesús coexinhi ndache icha chojni que te nttiha de ixin Juan, tti vanheguitte chojni, co Jesús ndaço:

—Are cjoí ra ngagaha jna tti xonhi chojni te para joitsjehe ra Juan, ¿quehe xaxaon ra rroguicon ra jehe? ¿Axaxaon ra ixin joarrixaoen seguroha inchin nttaxiji que nchequingui çhintto, ⁸ o ani ná xí que jingá lontto anto fino inchin ná rey? ¿Apoco chonxinha ra ixin tti chojni que jingá lontto anto fino, jehe na te na ngain nchia anto fino? ⁹ Mexinxin ¿quehe xaxaon ra rroguicon ra? ¿A ná profeté Dios? Ján ndoa que Juan ná profeté Dios, co jehe icha rentte que ná profeta. ¹⁰ Juan, mé tti rroço ngain tti jitaxin Palabré Dios:

Icha saho que jaha tsji, janha rrorroanha ná tti sicao joajnana para que jehe mé sinchechjian nttiha para ixin jaha.

¹¹ Janha seguro rrindattjo ra que de cainxin chojni que concjixin ngataha nontte jiji hasta jai, ngattoxon con Dios xonhi chojni icha importante que jehó Juan. Pero masqui jamé, tti chojni que icha importanteha de ngain tti parte que ttetonha Dios de ngain ansén chojni, chojni mé xa icha importante que Juan.

¹² Desde que Juan joí para joindache chojni de ixin Dios hasta jai, atto tsje chojni rinao na rrocayaoen na tti ttetonha Dios que ttjen ngajni, co chojni çhintto rinao na sinhexantte na tti ttetonha Dios. ¹³ Cain profeté Dios que joí co ley que vayé Moisés jinchenohe chojni de ixin queçén tsetonha Dios ngain ansén chojni hasta que joí Juan para joinchenohe chojni que ixin otoin tsí tiempo mé. ¹⁴ Co si jaha ra rinao ra sitticaon ra, ján, Juan mé tti profeta Elías que chonda que joí iná. ¹⁵ Xo tsinxin ra, ttinhi ra jian.

16 '¿Quehe sinttacinxin chojni de ngain tiempo jihi? Jehe na inchin tti xannchinnchinchjan que tsonaon ngataon ndásin co toyaotte xan icha xancompañeroe xan: 17 “Janha na jointtachjian na són conixin ná nntaxo pero jaha ra tteha ra, mexinxin janha na tsje na canto que ttiha joachjaon pero jaha ra tsjangaha ra.” 18 Rroçho ixin jói Juan, tti vancheguite chojni, co jehe vaguiha vino ni vajineha tsje. Co jaha ra ndaço ra que ixin jehe chonda ná espíritu jianha. 19 Cottimeja joihi janha, tti Xí que joixin de ngajni, que jinecaho chojni co dihi vino. Co jaha ra ndaço ra que ixin janha anto jine co anto dihi hasta coan na, co ixin janha amigoe cain chojni que tenchehe jianha, co xicobrador de impuesto. Pero tti ncheoenhe Dios chojni, mé anto jian ixin tti jian mé xago ngain tti nchehe chojni que ditticaon ngain jehe.

Rajna que vintteguitticaonha
(Lc. 10.13-15)

20 Cottimeja Jesús coexinhi joinchesattehe chojni de cain rajna tti jehe joinchehe icha tsje milagro, ixin cain chojni mé xa coentoxinha na vidé na de tti jianha que tenchehe na. Mexinxin Jesús ndaço ngain na:

21 —¡Anto tanguí tsonha jaha ra de ngain rajna Corazín, co cai jaha ra de ngain rajna Betsaida! Ixin tti cain milagro que janha jointtaha ngayaha ra, si cain milagro mé rroconhe ngayehe chojni de ngain ciudad de Tiro co ciudad de Sidón, cain chojni mé osé rroquentoxinhi na vidé na de tti jianha que vanchehe na. Co para rrocjago na que ixin jehe na orroquentoxinhi na vidé na, jehe na rroguintengá na lontto ttie co rrocjinttjitte na ntesoguihi já na. 22 Pero jaxon janha rrindattjo ra que para ngain tti nchanho que Dios sinchejuzguehe cain chojni, jaha ra tti sayehe ra ná castigo icha soji que chojni ngain ciudad de Tiro co Sidón. 23 Co jaha ra de ngain rajna Capernaum, ¿axaxaon ra que ixin anto importante ra para ngain Dios? Jeha jamé ixin jaha ra chonda ra que tsji ra ngain infierno. Ixin tti cain milagro que janha jointtaha ngayaha ra, si mé rroconhe ngayehe chojni de ngain ciudad de Sodoma, cain chojni mé seguro rroquentoxinhi na vidé na co ciudad mé xa rroquehe hasta jai. 24 Pero janha rrindattjo ra que para ngain tti nchanho que Dios sinchejuzguehe cainxin chojni, jaha ra tti sayehe ra ná castigo icha soji que cain chojni de ngain regioen Sodoma.

Are Jesús ndaço: “Sihi ra nganji co nchejogaha ra”
(Lc. 10.21-22)

25 Ngain rato mé Jesús ndaço:

—Padre soixin que joinchechjian ngajni co nontte, janha chjaha gracias soixin ixin soixin coema tti ndoa para ngain tti chojni que anto chonxin co anto sé coanguí na, co cjoago tti ndoa mé ngain tti chojni que tsjeha chonxin. 26 Ján, Padre, ixin soixin jañá rinao.

27 'Ndodana que ttjen ngajni chjana Ndo cain cosa. Xonhi chojni chonxin cainxin de ixin Xenhe Ndo, sino que jeho jehe Ndo nohe Ndo de ixin Xenhe Ndo. Co xonhi chojni chonxin cainxin de ixin jehe Ndo, sino que jeho Xenhe Ndo conixin cain tti chojni que jehe Xan sinao Xan sinchenohe Xan de ixin jehe Ndo. 28 Xacoi ra nganji na, cain jaha ra xo atto conchjen ra de ngain xa co de joachjaon que techonda ra, co nganji na janha sinchejogaha ra. 29 Dittoaxin ra ditticaon ra nchehe ra tti janha rritetonha ra co tanguí ra cain tti janha rrinttacoanha ra, ixin janha jeha

čhintto na, co anto nda ansenna, co jamé nchao sinchejogaha almá ra.
³⁰Tti janha rritetonha ra tanguiha para jaha ra sitticaon ra sinchehe ra.

12

Chojni que vacao Jesús cončhinji na trigo ngain nchanho que nchejogaha ni

(Mr. 2.23-28; Lc. 6.1-5)

¹Ngain tiempo mé ngain ná nchanho que nchejogaha ni, Jesús conixin tti chojni que vacao vatto na ngain canxion ngui que dinga trigo. Co chojni mé venhe na jintta, mexinxin coexinhi na cončhinji na canxion ninchjenhe trigo para joine na. ²Co canxion xifariseo vintteguicon xa mé, co vinttendačo xa ngain Jesús:

—Tsjenxin, chojni que čhjiho tenchehe na řa co jiquininxinha sinchehe ni řa ngain tti nchanho que nchejogaha ni.

³Pero Jesús ndačo ngain xa:

—¿Ařa tsjeha ra tti jitaxin ngain Palabré Dios ixin quehe joinchehe David conixin cain xicompañeroe ná nchanho are vintteguenhe na jintta? ⁴David conixin cain xicompañeroe mé joixinhi na tti nihngo icha importante co joine na tti niottja que jiquininxinha para rrojine na jehe na, sino que jeha xidána vequininxin vane xa niottja mé. ⁵¿O ani řa tsjeha ra tti jitaxin ley que vayé Moisés que ixin cain xidána de ngain nihngo icha importante řonhi tiempo nchejogaha xa ngain tti nchanho que nchejogaha ni, co mé jeha ná cosa jianha para ixin jehe xa? ⁶Co janha rrindattjo ra que jí nganji ra jaxon ná tti icha importante que nihngo mé. ⁷Jaha ra řa coinxinha ra tti ndačo Dios ngain tti jitaxin Palabré que ndačo: “Janha rinaho que jaha ra tsiacnoehe ra chojni, co nahi ixin sonhe ra coxigo para tsín ra para ixin janha.” Si jaha ra orroquinxin ra mé irronichjaha ra jianha de ixin chojni que ncheha ni ná cosa jianha. ⁸Janha, tti Xí que joixin de ngajni, cai chonda joachaxin para tti nchanho que nchejogaha ni.

Ná xí que ndadixemadoho ná rá

(Mr. 3.1-6; Lc. 6.6-11)

⁹Cottimeja Jesús sacjoixin de nttiha, co sajoixinhi iná nihngo. ¹⁰Co ngaxinhi nttiha tají ná xí que ndadixemadoho ná ra, co xifariseo techonhe xa quehe cosa nchaoha rrojinchehe Jesús para rrocjanguihi xa. Mexinxin joanchiangui xa ngain co ndačo xa:

—¿Ají joachaxin para que sinchexingamehe ni chojni nihi mero ngain tti nchanho que nchejogaha ni?

¹¹Jesús ndačo:

—Si ná de jaha ra chonda ra ná coleco, co si setsingá va ná pozo ngain tti nchanho que nchejogaha ni, řatsjiha ra para sigantsjea ra va? ¡Seguro que ján! ¹²Nchao, janché ndachjenji ni ra, řajeha anto icha rentte ná chojni que ná coleco? Mexinxin jeha jianha para que jehe ni sinchehe ni ná cosa jian ngain tti nchanho que nchejogaha ni.

¹³Cottimeja ndačo Jesús ngain tti xí que dixemadoho rá:

—Ttinxe rá.

Co are jehe coinxe rá, ojian vittohe ra inchin ra jngo. ¹⁴Cottimeja xifariseo mé vinttegačhxin xa de nttiha co coexinhi xa cjoao chó xa ixin queřén sinchehe xa para nasoexon xa Jesús.

Tti dindačo profeta Isaías de ixin Jesús

¹⁵ Are Jesús conohe cain mé, jehe sacjoixin de nttiha co anto tsje chojni rroé na Jesús. Co jehe joinchexingamehe cainxin chojni nihi que vetan.

¹⁶ Co jehe vaquetonhe na que rroundacheha na icha chojni ixin quensen jehe. ¹⁷ Jamé, para que joiconhe tti dicjin profeta Isaías que ndačo:

¹⁸ Yá chonda ra tti nchehe xana, tti janha coinchiá, tti janha anto rinaho, co de ixin jehe, janha anto chahna.

Co sanjo Espiritu Santo ngain jehe,

co jehe tti rroundache cain chojni de cainxin nación quehe jiquininxin sinchehe na.

¹⁹ Jehe xonhi chojni tsetocaho, ni tsoyaotteha chojni, ni jehe rronichjaha soji ngain chojni ngá nttiha.

²⁰ Jehe sincheanimá tti chojni que anto tangui tonhe na co jion sinchecoehne chojni que ditticaon nchion,

hasta que cainxin chojni sinchehe na jian inchin jehe tsetonha.

²¹ Co cainxin nación satsoan que ixin jehe tti ttjenguijna chojni.

Are ndačo chojni ixin Jesús chonda joachaxín Satanás

(Mr. 3.19-30; Lc. 11.14-23; 12.10)

²² Cottimeja joicaohe na Jesús ná xí que čhoha vaguicon ni vanichja ixin vechonda xa ná espíritu jianha. Co Jesús joinchexingamehe xí mé para que jehe xa onchao vicon xa co onchao nichja xa. ²³ Cainxin chojni goan na admirado ngain rato mé, co vinttendačo na:

—Puede jiji tti razé David que rrochonda xajeho joachaxin que vechonda rey David.

²⁴ Pero are xifariseo vinttequinhi xa jiji, vinttendačo xa:

—Xí jiji dengui xa espíritu jianha pero de ixin joachaxín Satanás, tti rey de cain espíritu mé co tti dinhi Beelzebú cai.

²⁵ Jesús oconohe quehe tendáčho xifariseo mé, mexinxin jehe ndačo ngain xa:

—Si chojni ngain ná nación chjea na para ttetocaho chó na, nación mé tsončjenha sé, co si ná rajna o ná nindoha anto tteto na, cai tsončjenha chojni mé sé. ²⁶ Jamé cai si Satanás dengui chó jeho, rročo que jeho ttetocaho chó co joachaxín tsončjenha sé, toin ndatsjexin. ²⁷ Mexinxin, si inchin ndačo ra jaha ra que janha dehngui espíritu jianha de ixin joachaxín Satanás, si jamé ¿quensen danjo joachaxin ngain chojnia ra para que jehe na dengui na espíritu jianha? Mexinxin jeho chojnia ra tjago que jaha ra jeha ndoa tti jaha ra xaxaon ra. ²⁸ Pero janha dehngui espíritu jianha de ixin joachaxín Espiritu Santo de Dios, co mé rročo que tti ttetonha Dios ojí nganji ra.

²⁹ 'Ixin si ná chojni rinao santsjehe cosé iná xí tsanga de ngaxinhi nchiandoha xa, saho chonda que tsia xa.

³⁰ 'Tti chojni que ncheoxinha tti janha rrinttaha, chojni mé ningaconna janha, co tti čhjiha nganji na janha para ttjejo na chojni, mé icha tonchjequé na.

³¹ 'Mexinxin janha rrindattjo ra que cain chojni nchao sitjañehe na cain tti jianha que nchehe na co cain tti jianha que nichja na, pero si rronichja na jianha de ixin Espiritu Santo, Dios sinchetjañehe na palabra mé. ³² Co quexeho tti rronichja palabra jianha de ixin janha, tti Xí que joixin de ngajni, nchao sitjañehe chojni mé, pero tti chojni que rronichja

palabra jianha de ixin Espíritu Santo, Dios xonhi tiempo sinchetjañehe chojni mé, ni jaxon ni después que jehe ndasenhe.

Nttattochjoin datsoan ni ntta de ixin ttochjoín ntta
(Lc. 6.43-45)

³³ 'Si nttattochjoin jian ntta, cai ttochjoin que nchechjian ntta jian tto; co tti nttá xonhi xé, cai ttochjoin que nchechjian ntta xonhi xé tto. Mexinxin cada nttattochjoin datsoan ni ntta de ixin ttochjoín ntta. ³⁴ ¡Jaha ra inchin xenhe conché! ¿Queñén nchao rronichja ra cosa jian si jaha ra jianha ra? Rroha ni nichja cain tti jí ngain ansén ni. ³⁵ Ná chojni jian jehe nichja cosa jian ixin tti jian jí ngain ansén; co ná chojni jianha jehe nichja cosa jianha ixin tti jianha mé jí ngain ansén. ³⁶ Co janha rrindattjo ra que are ngain tti nchanho que Dios sinchejuzguehe cainxin chojni, are mé cainxin na chonda que tsjenga na hna de ixin cain palabra que xonhi xé ndačho na. ³⁷ Ixin inchin rronichja jaha, jamé Dios sinchejuzgá nganji. Co are mé tsonoha si ján rrica o ni xonhi rrica.

Are chojni jianha joanchia na ná milagro
(Mr. 8.12; Lc. 11.29-32)

³⁸ Cottimeja canxion xifariseo co canxion ximaestroe ley Israel vintendačho xa ngain Jesús:

—Maestro, janha na rinaho na sicon na que jaha sinchehe ná milagro.

³⁹ Jesús ndačho ngain xa:

—Chojni jianha que ditticaonha na Dios rinao na sicon na ná milagro, pero chojni mé Dios tsjagoeha na icha milagro que jehó inchin tti conhe profeta Jonás. ⁴⁰ Ixin jamé inchin Jonás vehe ní nchanho co ní ttie ngaxinhi tsehe copescado jie, jamé janha cai, tti Xí que joixin de ngajni, sarihi ngadoho nontte ní nchanho co ní ttie. ⁴¹ Cain chojni que vinte ngain ciudad de Nínive, jehe na singattjen na ngain tti nchanho are Dios sinchejuzguehe cainxin chojni para rročho na jie para ixin cain chojni de ngain tiempo jihi, ixin jehe na coentoxinhi na vidé na are Jonás joindache na joajné Dios. Co nttihi nganji ra jaxon jí ná tti icha importante que Jonás, pero jaha ra čhoja ra ditticaon ra. ⁴² Cai tti reina que joixin de ngain nontte Sabá icha sur, singattjen ngain tti nchanho are Dios sinchejuzguehe cainxin chojni de ngain tiempo jihi para que reina mé rročho jie para ixin jehe na ixin jehe reina mé joixin anto cjin para joiquinhi tti venohe Salomón, co nttihi nganji ra jaxon jí ná tti icha importante que Salomón.

Tti espíritu jianha que cjan
(Lc. 11.24-26)

⁴³ Co Jesús ndačho cai:

—Are ná espíritu jianha dačhjexin de ngain cuerpoe ná chojni, espíritu mé sattji ngain tsje lugar xema para dicjé ttinó sinchejogaha, co are jehe idittjaha lugar mé, jehe xaxaon: ⁴⁴ “Janha rrocjan na ngain nchiania tti vačhjexin.” Co are jehe espíritu jianha mé cjan, dittja ngain cuerpoe chojni mé inchin ná nchia que xonhi chojni te, tti diganjo na jian, co cain roa ngaxinhi nchia mé. ⁴⁵ Cottimeja jehe espíritu jianha mé dirroé iyáto espíritu icha jianha que jehe para que dintte cain espíritu mé ngaxinhi cuerpoe chojni mé, co chojni mé cjan icha tangui tonhe que are saho. Co jamé tsonhe ngain chojni jianha tehe cai.

*Janné Jesús co xanchó**(Mr. 3.31-35; Lc. 8.19-21)*

⁴⁶ Jesús xa jinichja cain yá ngain chojni are jói janné conixin xanchó Jesús ixin joinao na rronichjé na Jesús, pero ndoja tavintte na ixin tsje chojni sinxinhi nchia tti jí Jesús. ⁴⁷ Ná chojni ndačo ngain Jesús:

—Janná co xanchó ndoja nttihi te na co rinao na rronichja na nganji.

⁴⁸ Pero Jesús ndačo ngain chojni mé:

—¿Quensen jannana, co quecá xanchian?

⁴⁹ Cottimeja jehe cjoago ngain chojni que vacao co ndačo:

—Chojni tehe tti inchin jannana co jehe na tti inchin xanchian, ⁵⁰ ixin quexeho chojni que nchehe inchin rinao Ndodana que ttjen ngajni, chojni mé tti xanchian co chojni mé tti jannana.

13*Ejemplo tti joiquenga trigo ngataon jngui**(Mr. 4.1-9; Lc. 8.4-8)*

¹ Ngain nchanho mé Jesús vačhjexin de nchia mé co sacjoi para ngandehe lago. ² Pero anto daca xatte anto tsje chojni ngain jehe, mexinxin jehe coani ná barco para ngataonhe jinda mé co de nttiha ndachexin cain chojni mé de ixin Dios. Cain jehe na tavintte na ngandehe jinda mé. ³ Ngain rato mé jehe joinchegonda tsje ejemplo para joinchecoenhe na tsje cosa. Saho jehe ndačo:

—Ná xí cjoia xa joiquenga xa trigo ngataon jngui. ⁴ Co are coexinhi xa cjoa xa trigo ngataon jngui, canxion noanchjan de trigo vinttji ngá nttiha, co jói conttoa ndajoine va trigo mé. ⁵ Co icha noanchjan de trigo vinttji ngataha tti jí ttjao tti ttjinha jinche jí, co trigo mé anto daca čhinhi ixin tsjeha jinche xanotaon. ⁶ Pero are čhinhi nchanho, ndaxehntte catrigo mé, co ixin xonhi noehe ca vechonda ca, anto daca ndaxema ca. ⁷ Co icha noanchjan de trigo vinttji ngacjan canchaha, co canchaha mé icha daca vangui ca co coanchjandaha ca trigo para vangui. ⁸ Pero icha noanchjan de trigo vinttji tti jí jian jinche, co mé joanjo jian cosecha. Canxion nihi trigo mé joanjo de cien noanchjan cada trigo, icanxin trigo joanjo de sesenta noanchjan, co icanxin trigo joanjo de treinta noanchjan, cada trigo. ⁹ Si jaha ra ttinxin ra, ttinhi ra jian.

*Quedonda Jesús joinchegonda tsje ejemplo**(Mr. 4.10-12; Lc. 8.9-10)*

¹⁰ Cottimeja tti chojni que vacao Jesús conchienenhe na ngain co ndačo na:

—¿Quedonda ndache chojni conixin ejemplo?

¹¹ Jesús ndačo ngain na:

—Jaha ra Dios ndačo para que tsonoha ra quexén ttetonha jehe ngain ansén chojni, pero jehe na čhoha tsonohe na. ¹² Tti ttinxin, Dios sinchequinxin icha para que jehe icha tsinxin; pero tti xonhi ttinxin, Dios santsjehe hasta tti nchion que jehe ttinxin. ¹³ Mexinxin janha ndattjan na de ixin ejemplo ixin jehe na dicon na pero inchin rroguiconha na, co jehe na ttinhi na pero inchin rroquinha na ixin ttinxinha na tti jehe na ttinhi na. ¹⁴ Jañá tti jehe na tenchehe na yá joiconhe tti dindačo Dios ngain profeta Isaías are Isaías dicjin:

Jaha ra seguro tsinhi ra, pero tsinxinha ra; sicon ra, pero satsoanha ra.

¹⁵ Ixin ansean ra atto ndaconcha, co ndatsjoan ra ttjenguijnaha ra para daca tsinxin ra, co masqui tonoha ra que jmacon ra teẁangué, pero tteje, para que rrochonxinha ra tti jaha ra dicon ra, ni tsinxinha ra tti jaha ra ttinhi ra, ni ansean ra tsinxinha, ni rroẁaxaonha ra sihi ra nganji na janha para que janha tsjenguijna ra.

¹⁶ Cottimeja Jesús cjan ndaĉho ngain chojni que vacao:

—Pero janha ndaĉhjan que anto ĉhjoin para ixin jaha ra ixin chonxin ra tti dicon ra, co ttinxin ra tti ttinhi ra de ngain ndatsjoan ra. ¹⁷ Janha seguro rrindattjo ra que are icha saho tsje profeta co tsje chojni jian de ngain ansén joinao na rroguicon na cain tti jaha ra tedicon ra jaxon, pero jehe na iviconha na. Co cai joinao na rroquinhi na cain tti jaha ra tettinhi ra jaxon, pero jehe na icoinha na.

Jesús ndaĉho quehe rroĉho ejemploe tti joiquenga trigo
(Mr. 4.13-20; Lc. 8.11-15)

¹⁸ Ttinhi ra quehe rroĉho ejemploe tti joiquenga trigo ngataon jngui. ¹⁹ Tti chojni que ttinhi tti joajna de ixin queẁén siquetonha Dios ngain ansén na, co jehe na ttinxinha na joajna mé, chojni mé inchin tti trigo que vinttji ngá nttiha. Co ttí inchínji co jehe ndanchetjanji na joajné Dios que vittohe ngain ansén na. ²⁰ Co tti trigo que vinttji ngataha tti jí ttjao, mé rroĉho tti chojni que ttinhi joajné Dios co jehe na anto ĉhjoin tonohé na dayé na joajna mé. ²¹ Pero inchin trigo mé chondaha tsje noehe seha tonĉhjenhe trigo, jamé jehe chojni mé cai are tangui tonhe na co icha chojni feo nchehe ngain na ixin ditticaon na joajné Dios, cottimeja jehe na ndadoan na desanimado. ²² Co tti trigo que vinttji ngacjan canchaha, mé rroĉho tti chojni que ttinhi joajné Dios, pero jehe na icha ẁaxaon na cain cosa que jí ngataha nontte jihi co tomi, mé tti ncheyehe na, co cain mé tti ndanchetjañehe na joajné Dios co incheha na inchin ttetonha joajna jihi. ²³ Pero tti trigo que vinttji ngain tti jian jinche, mé rroĉho tti chojni que ttinhi joajné Dios co ttinxin na, co jehe na inchin tti trigo que anto tsje noa joinchechjian. Canxion jehe na inchin tti trigo que joinchechjian cien noa ngain nacoa ninchjan, co icanxin na inchin tti trigo que joinchechjian sesenta co de treinta noa ngain nacoa ninchjan.

Ejemploe ca ẁonhi ẁé ngagaha trigo

²⁴ Cottimeja Jesús ndaĉho ngain na iná ejemplo jihi:

—Rrondattjo ra queẁén ttetonha Dios que ttjen ngajni. Mé inchin ná xí que coenga jian trigo ngain jnguihi. ²⁵ Pero ttie are cain chojni tatejoa na, cjoí ná chojni nttiha que ningaconhe jehe tti jnguihi mé co coenga anto tsje tsehe ca que ẁonhi ẁé ngain jngui mé, co sacjoi. ²⁶ Are trigo mé vangui, ocoexinhi joinchechjian ninchjan, hasta are mé cononxin quehe clase de ca jí nttiha. ²⁷ Cottimeja ninchehe ẁé tti jnguihi mé cjoí na joindaĉho na ngain: “Si tti trigo que soixin coenga ngataon jngui cjoí joxon trigo jian, ¿quettinó joixin ca jihi que ẁonhi ẁé?” ²⁸ Tti jnguihi mé ndaĉho ngain na: “ĉhonja chojni que ningaconna joinchehe jihi.” Cottimeja ninchehe ẁa joanchiangui na co ndaĉho na: “¿Arinao tsji na janha na sigantsjengui na cain ca mé?” ²⁹ Pero tti jnguihi ndaĉho ngain na: “Nahi, ixin are santsjengui ra ca mé, santsjengui ra trigo cai. ³⁰ Icha jian tanĉhjana ra ca sanguicaho ca trigo hasta are cosecha, cottimeja

janha rrorroanha ninchehe xana para que saho santsjegaha na ca yá, co tsia na ca para rroche ca, cottimeja tsenchjinha na joxon trigo ngain nchiania.”

Ejemploe ná tsé que dinhi mostaza

(Mr. 4.30-32; Lc. 13.18-19)

³¹ Cai ndacho Jesús ngain na ejemplo jiji:

—Tti ttetonha Dios ngain ansén chojni, mé inchin ná tsé de ca que dinhi mostaza que ná xí ttenga ngataon jnguihi xa. ³² Tsé mé anto icha nchinnchin tse que cainxin tsehe icha ca; pero qué tsé mé anto dangui ca hasta icha jie diji ca que cain icha ca. Co dangui ca inchin ná nttá jie que hasta conttoa nchechjian va caqué va ngagaha ramé ca mé.

Ejemploe levadura

(Lc. 13.20-21)

³³ Cai ndacho Jesús ngain na ejemplo jiji:

—Tti ttetonha Dios ngain ansén chojni, mé inchin levadura que ná chojni ttinttjecjan ngain hariné niottja para que nchegangui nchoho.

Quexén vanchegonda Jesús cain ejemplo

(Mr. 4.33-34)

³⁴ Jesús ndacho cain jiji ngain chojni de ixin ejemplo, co si jeha de ixin ejemplo, jeha xonhi vandacho ngain na. ³⁵ Jañá conhe para joiconhe tti dindacho Dios ngain profeta are jeha dicjin janhi:

Janha rronichja de ixin ejemplo;

janha rrondaçhjan cosa que vinttema desde que are nontte conchjian nontte.

Jesús ndacho quehe rrocho ejemploe tti ca que çhinhi ngagaha trigo

³⁶ Jesús joanjo joajna ngain cain chojni mé, cottimeja jeha conixin chojni que vacao sacjan na para ngain tti nchia que vintte na are mé. Are ngain nchia mé cain chojni que vacao conchienne na co ndacho na ngain:

—Ndanchenji ni ra quehe rrocho ejemploe tti ca que çhinhi ngagaha trigo ngataon jngui.

³⁷ Cottimeja Jesús ndacho:

—Tti ttenga jian trigo, mé janha, tti Xí que joixin de ngajni. ³⁸ Co jngui rrocho mundo jiji. Co tti jian trigo, mé rrocho tti cain chojni que chonda parte ngain tti ttetonha Dios, co tti ca que çhinhi ngagaha trigo, mé rrocho tti cain chojni que nchehe inchin ttetonha inchínji. ³⁹ Co tti coenga ca, mé tti ningaconna, co mé rrocho mero inchínji. Co cosecha rrocho are ondatsjexin mundo. Co tti satse cosecha jiji, mé cain ángel de Dios. ⁴⁰ Jamé inchin ca que çhinhi ngagaha trigo xatse ca para che ca ngacjan xohi, cai jamé tsonhe chojni inchínji are ondatsjexin mundo jiji. ⁴¹ Janha, tti Xí que joixin de ngajni, rrorroanha tsje ángel para sigantsjeyexin de ngain chojni que ditticaon na janha tti cain chojni que ncheyehe icha chojni para nchehe na jianha, co cain chojni que nchehe jianha, ⁴² para siguinttjiate na ngacjan xohi. Nttiha tti rrotsjanga na co sinetaon neno na. ⁴³ Cottimeja cain tti chojni que nchehe inchin rinao Dios, chojni mé tsonguixima na inchin nchanho ngain lugar tti ttetonha Ndodá na que ttjen ngajni. ¡Si jaha ra ttinxin ra, ttinhi ra jian!

Ejemploe tti tesoro que jixavá

⁴⁴ Jesús ndacho iná ejemplo jiji:

—Tti ttetonha Dios ngain ansén chojni, mé inchin ná tesoro que jiřavá ngataon ná ngui. Are ná xí dittja xa tesoro mé, cjan xa tjavá xa nttiha iná. Cottimeja anto ché xa sacjan xa nchiandoha xa, nhecji xa cainxin cosa que chonda xa co ttehna xa jehe tti nontte que jiřavá tesoro mé.

Ejemploe tti perla que anto rentte

⁴⁵ 'Co cai tti ttetonha Dios ngain ansén chojni, mé inchin tti perla que anto rentte. Co xitachji perla, ⁴⁶ are dittja xa perla mé, jehe xa ttji xa co nhecji xa cainxin cosa que chonda xa para ttenanxin xa perla mé.

Ejemploe ná nonchaha

⁴⁷ 'Co cai tti ttetonha Dios ngain ansén chojni, mé inchin ná nonchaha que tja na ngangui jinda co tse cain clase de copescado. ⁴⁸ Are ondacaon nonchaha mé de copescado, xitse va dantsjengui xa nonchaha mé hasta tti ngandehe jinda. Co nttiha ttinchiehe xa cain copescado; tti copescado jian ttenga xa va ngain nntaxa co copescado que řonhi řé jehe xa ttinttji xa va. ⁴⁹ Jamé tsonhe are ondatsjexin mundo jiji; tsí tsje ángel de Dios para santsjenda cain chojni que nchehe jianha de ngayehe chojni que nchehe jian. ⁵⁰ Co ángel mé rrorroanha cain chojni que nchehe jianha para ngacjan řohi, nttiha tti jehe na rrotsjanga na co sinetaon neno na.

Tti tesoro naroaxin co tti tesoro onttaxí

⁵¹ Cottimeja Jesús joanchiangui ngain chojni que vacao, co ndařo:

—¿Attinxin jaha ra cain jiji?

Jehe na vinttendařo na:

—Ján.

⁵² Cottimeja Jesús ndařo:

—Mexinxin cain jiji rrořo que are ná ximaestroe ley Israel ditticaon xa tti janha ndařjan, jehe xa inchin ná chojni que diquenchjinha yó tesoro ngaxinhi nchiandoha co jehe nchao dantsje tesoro naroaxin co tesoro nttaxí. Ixin ximaestroe ley mé nchao nchecoenhe xa chojni quehe ttetonha ley mé co jai cai nchao ndache xa chojni tti ndařjan janha. Mexinxin rrořo que chonda xa yó tesoro, tti nttaxí co tti naroaxin.

Jesús ngain Nazaret

(Mr. 6.1-6; Lc. 4.16-30)

⁵³ Are Jesús joexin ndařo cain ejemplo jiji, jehe sacjoixin de nttiha. ⁵⁴ Co sacjoi para Nazaret, tti jehe vanguixin. Nttiha coexinhi joinchecoenhe chojni de ixin Dios ngain ningoe na, co cain chojni nttiha vagoan na admirado co ndařo na:

—¿Queřén coanguixin xí jiji? Ixin anto nohe xa jai. ¿Queřén nchao nchehe xa cain milagro jiji? ⁵⁵ Ixin xí jiji xitsihi tti carpintero co janné xa María, co xanchó xa Jacobo, co José, co Simón, co Judas. ⁵⁶ Co cai xanchó xa xannčhí nttihi te xan ngain rajná na jiji. ¿Queřén coanguixin xa cain tti nohe xa yá?

⁵⁷ Mexinxin jehe na řhoha na joinchehe na caso tti ndařo Jesús. Pero Jesús ndařo ngain na:

—Cain chojni nchesayehe na ná profeta pero nahi profeta que ttixin de ngain řajeho rajné na o profeta que ttixin de ngain řajeho nindoha na.

⁵⁸ Co tsjeha milagro joinchehe Jesús nttiha ixin chojni nttiha vitticaonha na Jesús.

14

Quexén ndavenhe Juan, tti vanheguitte chojni

(Mr. 6.14-29; Lc. 9.7-9)

¹ Ngain tiempo mé Herodes, tti vehe gobernador nttiha Galilea, jehe cai conohe tti vanchehe Jesús. ² Co jehe mé ndačo ngain chojni:

—Jehe xí yá, mé Juan, tti vanheguitte chojni, que xechon. Mexinxin chondaxin joachaxin de nchehe milagro yá.

³ Ixin Herodes tti coetonhe xisoldadoe para tse xa Juan co coia xa co joiquixinhi xa ngain cárcel. Herodes joinchehe jañá ixin causexin ná nchí que vinhi Herodías tti cjoy nchíchihi ná xichó jehe Herodes que vinhi Felipe. ⁴ Juan vandačo ngain Herodes:

—Jianha ixin rricoho nchí yá.

⁵ Herodes desde are mé joinao narrogoenxon Juan, pero vañaoncoa ngain chojni ixin cainxin na vaguitticaon na que Juan vanichja joajné Dios que jehe vagayé. ⁶ Pero are quié Herodes, ná nchichjehe jehe Herodías joi ncha co tte ncha són ngattoxon con cain chojni que te ngain Herodes rato mé. Co Herodes anto joincheřoxinhi quexén tte xannchí mé, ⁷ hasta que joinchejurá Herodes que jehe sanjo ngain xan quexeho ná cosa que jehe xan sanchia xan ngain jehe. ⁸ Co jehe xan ocoá xan consejo de ngain janné xan, mexinxin ndačo xan ngain Herodes:

—Chjana ngá na láto já Juan, tti nheguitte chojni.

⁹ Co rey Herodes are coinhi jihi, jehe anto vechín, pero ixin jehe ondačo que seguro sanjo quexeho cosa que jehe xannchí mé sanchia xan, co ixin coinhi cain chojni que tate ngain Herodes rato mé, mexinxin jehe coetonha que sayé xannchí mé tti jehe xan joanchia xan. ¹⁰ Herodes coetonha para joicončhinjihi na já Juan ngain cárcel. ¹¹ Cottimeja joiaho na já Juan ngá ná láto, joanjo na ngain xannchí mé, co jehe xan joanjo xan ngain janné xan.

¹² Cottimeja vinttequí chojni que vacao Juan para sajoicao na cuerpoe Juan co joicjavá na. Cottimeja cjoy na para joinchenohe na Jesús.

Are Jesús joanjo joine naho mil xí

(Mr. 6.30-44; Lc. 9.10-17; Jn. 6.1-14)

¹³ Are Jesus conohe yá, jehe coani ná barco co sacjoi jeho ngain ná lugar tti řonhi chojni te. Pero chojni vicon na para ttinó sacjoi, co tsje chojni de ngain rajna nttiha rroé na conixin rotté na. ¹⁴ Mexinxin are Jesús joihi nttiha co vačhjexin de barco mé, vicon anto tsje chojni sinchonhe nttiha, co jehe coiaconoeha na co joinchexingamehe cain chojni nihi que joicao na. ¹⁵ Co ixin ocoexinhi conaxin xehe, chojni que vacao Jesús conchienne na co ndačo na ngain jehe:

—Otsocjin co řonhi nchia jí ngain lugar jihi. Ndache cain chojni que onchao, para que jehe na sasintteci na ngain rajna para siquehna na tti sine na.

¹⁶ Jesús ndačo:

—Chondaha na que sasintteci na; danjo ra jaha ra tti sine na.

¹⁷ Jehe na ndačo na:

—Janha na nttihi řonhi chonda na, jeha naho niottja co yó copescado.

¹⁸ Jesús ndačo:

—Sicohna ra cain yá nttihi.

¹⁹ Cottimeja jehe coetonhe cainxin chojni para tavintte na ngataha ca ngataha nontte. Cottimeja jehe coá tti naho niottja ngá rá co tti yó copescado co tsjehe para ngajni, joanjo gracias ngain Dios co váña niottja mé co joanjo nio ngain chojni que jehe vacao para que jehe na conchjea na nio ngain cainxin chojni mé. ²⁰ Cainxin chojni mé joine na, co cojehe na jian, co después xa joinchecaon na tteyó nntaxa de pedazo que xexin joine na. ²¹ Tti chojni que joine niottja mé cjoí inchin naho mil xí, aparte nchí co icha xannchinnchinchjan.

Jesús cjoixin rotté ngataonhe jinda

(Mr. 6.45-52; Jn. 6.16-21)

²² Cottimeja Jesús coetonhe tti chojni que vacao para coani na barco co satto na toenxin jinda mé icha saho que jehe ixin jehe xa vittohe nntiha ixin jidoan despedido de ngain cain chojni mé. ²³ Co después de goan despedido de ngain cain chojni mé, jecho coani ná jnanchjan para joinchecoanxinhi Dios. Co are ondaconttie Jesús nntiha taji jecho. ²⁴ Co barco que sajoicao tti chojni que vacao ojoiji barco ngosine jinda mé. Co olé nda coexinhi cjoinhi nganito barco mé ixin chintto anto soji joixin chintto de tti satettji na. ²⁵ Co are ochiaon vingasán Jesús conchienne ngain na jittjixin rotté ngataonhe jinda. ²⁶ Co are tti chojni que vacao vicon na que jehe jittjixin rotté ngataonhe jinda, jehe na vintteñaon na, co de joañaon jehe na vinttecoyao na sén co ndačo na:

—¡Yá ná nttanchanha!

²⁷ Pero Jesús nichjé na co ndačo ngain na:

—¡Xaonha ra, ixin janha joihi!

²⁸ Cottimeja Pedro nichja ngain co ndačo:

—Si ndoa soixin, ttetonna tsjixin rotnena ngataonhe jinda hasta tti ttjen soixin.

²⁹ Co Jesús ndačo ngain:

—Xacoi remé.

Cottimeja Pedro vanianxin de barco mé co coexinhi cjoixin rotté ngataonhe jinda para sarrocji ngain tti jí Jesús. ³⁰ Pero are jehe conohe ixin anto soji chintto, jehe xaon co ixin jehe coexinhi ndaxincanjingui jinda, jehe ndačo sén:

—¡Tançhjangaha na rroxincanjingui na jinda!

³¹ Ngain rato mé Jesús tsehe rá co ndačo ngain:

—¡Jaha tantoha ditticaon! ¿Quedonda joidoho joañaon?

³² Co are cayoi jehe na coani na barco mé, otavehe chintto. ³³ Cottimeja nidiguittohe ngaxinhi barco mé vinttettoxin nntajochjihí na ngain Jesús, co vinttendačo na:

—Ján ndoa, soixin Xenhe Dios.

Jesús joinchexingamehe tsje chojni nihi ngain nonttehe Genesaret

(Mr. 6.53-56)

³⁴ Coattoa na jinda mé, co joihi na ngain nonttehe Genesaret. ³⁵ Are chojni de ngain lugar mé joatsoan na que jehe Jesús, jehe na joinchenohe na chojni de ngoixin región mé, co joiaho na cain chojni nihi ngain Jesús. ³⁶ Co vanchetsenhe na ñao Jesús ixin sanjo joachaxin ngain cain tti nihi mé de rrocatte na masqui jecho rioho ngandehe lonttoe, co cainxin chojni que catte lonttoe Jesús, xingamehe na de ixin tti chin que vinttechonda na.

15

Tti nchejianha chojni
(Mr. 7.1-23)

¹ Cottimeja vintteconchiehe ngain Jesús canxion xifariseo co canxion ximaestroe ley Israél que vinttequixin xa de ngain ciudad de Jerusalén, co joanchiangui xa ngain Jesús co ndačo xa:

²—¿Quedonda chojni que čhjiho ncheha na tti costumbre que coetonha nigoelitona xančhjen? Ixin jehe na tonttiha na jinda rá na tsje nttiha saho que sine na.

³ Pero Jesús joanchiangui ngain xa co ndačo:

—¿Quedonda jaha ra ncheha ra tti ttetonha Dios co jeho nchehe ra inchin costumbre que jaha ra chonda ra? ⁴ Ixin Dios coetonha: “Ttjiho ra respeto ngain ndodá ra co ngain janná ra”, co “Tti rronichja jianha de ixin ndodé o janné, chojni mé jiquininxin nasenxon.” ⁵ Pero jaha ra ndačo ra que ná chojni nchao rrondache ndodé o janné: “Janha čhoha tsjenguijna soixin ixin cain cosa que janha chonda, ojoanjo ngain Dios.” ⁶ Co jaha ra ndačo ra que quexeho chojni que rrondačo jaňá, irrochondaha na que tsjenguijna na ndodé na o janné na. Jaňá jaha ra incheha ra caso tti coetonha Dios co nchehe ra inchin costumbre que jaha ra chonda ra. ⁷ Jaha ra ncheha ra tti ndačo ra! Jian dindačo profeta Isaías de ixin jaha ra, are jehe dicjin:

⁸ Chojni tehe nchesayana na de ngain rroha na, pero de ngain ansén na řa icjin te na para sino na na janha.

⁹ Mexinxin řonhi řé masqui tenchecoanxinna na;

ixin tti jehe na tenchecoenhe na chojni joxon tti ttetonha xí nttihi ngataha nontte.

¹⁰ Cottimeja Jesús vayé cainxin chojni que vintte nttiha co ndačo ngain na:

—Ttinhí ra tti rrondattjo ra co ttinxin ra jian: ¹¹ Jeha tti jine co tti dihi chojni nchejianha na, sino que cain palabra jianha que dačhjexin de rroha na, mé tti nchejianha na.

¹² Cottimeja tti chojni que vacao Jesús conchienne na ngain co ndačo na:

—¿Anoaha soixin ixin xifariseo yá feo vintteconohe xa are vinttequinhí xa tti soixin ndačo?

¹³ Pero Jesús ndačo ngain na:

—Quexeho nttattochjoin que Nnodana que ttjen ngajni cjoengaha, nttá mé chonda que sačhjenguinoa nnta. ¹⁴ Tančhjanda ra xa ncheha ra xa caso ixin jehe xa inchin tti diconha que dicao iná tti diconha. Co jaňá si ná tti diconha sicao iná tti diconha, cayoi chojni mé sinttjia na ngain ná ttoe.

¹⁵ Cottimeja Pedro ndačo ngain Jesús:

—Ndachjenji na quehe rročo ejemplo yá.

¹⁶ Jesús ndačo:

—¿Acai jaha ra ttinxinha ra? ¹⁷ ¿Attinxinha ra que cain tti jine ni sattji para ngaxinhí tsehe ni, cottimeja dačhjexin de ngain cuerpoe ni? ¹⁸ Pero tti palabra que dačhjexin de ngain rroha ni ttixin de ngain ansén ni, co palabra mé tti nchejianha ní. ¹⁹ Ixin de ngain ansén chojni ttixin cain cosa jianha que jehe na řaxaon na, co jehe na řaxaon na para santsjehe na vidé iná chojni, co jehe na dinttejoacaho na iná nčhí que

jehe n'chichihi na, jehe na tté na cosé iná chojni, jehe na nichja na ndoaha de ná cosa, co jehe na ncheʒoxinhi na nichja na cuentoe iná chojni que jehe ndoa. ²⁰ Cain cosa yá tti nchejianha chojni, pero tti tonttiha na jinda tsje nttiha saho que sine na, jehe mé tti nchejianha na.

Ná n'chí de iná nacion que vitticaon n'cha Jesús

(Mr. 7.24-30)

²¹ Jesús va'chjexin de nttiha co sacjoi para regioen ciudad de Tiro co Sidón. ²² Co ná n'chí que joixin de ngain nacioen Canaán tiempo mé vehe n'cha ngain región mé, co joí n'cha ngain Jesús co nda'cho n'cha sén:

—¡Soixin tti razé David, nttatsanha ñao ttiaconoana na! Ná xanhna xann'chí chonda xan ná espíritu jianha co anto tangui tonhe xan.

²³ Pero Jesús joincheha caso n'chí mé. Cottimeja tti chojni que vacao joí na ngain co joinchetsenhe na ñao Jesús co nda'cho na:

—Ndache n'chí jiha satsji n'cha ixin atto sén jinichja n'cha jirroá na n'cha.

²⁴ Cottimeja nda'cho Jesús ngain n'cha:

—Dios rroanha na janha pero jeho para ngain chojni de nacioen Israél que ndadiguitján inchin coleco.

²⁵ Pero n'chí mé conchiennehe n'cha co vettoxin nttajochjihi n'cha ngain Jesús co nda'cho n'cha:

—¡Nttatsanha ñao ttjenguijna na soixin!

²⁶ Jesús nda'cho ngain n'chí mé:

—Nchaoha jí si ná chojni santsjehe xenhe niottja para rrochjé conia nio.

²⁷ Pero jehe n'chí mé nda'cho n'cha:

—Ján ndoa, pero hasta conia nchao jine va tti nchoe niottja que dinttjixin de ngataha mesé nindoha va.

²⁸ Cottimeja Jesús nda'cho ngain n'chí mé:

—¡Jaha anto jian ditticaon! Tsonhe inchin jaha rinao.

Co ngain rato mé xenhe tti n'chí mé ndaxingamehe xan.

Are Jesús joinchexingameje tsje chojni nihi

²⁹ Jesús sacjoixin de nttiha co vatto ngandehe lago de Galilea, cottimeja coani ngataha ná jna co tavehe nttiha. ³⁰ Tsje chojni joí ngain Jesús tti jehe tají, co joiaho na ngain Jesús tsje chojni nihi; tti rrengo, tti chejo, tti ttapo, tti chonda rá que ʒonhi ʒé ra, co icha ninihi. Cain chojni mé coín na ngandaxinhi Jesús, co jehe joinchexingamehe cainxin na. ³¹ Co cainxin chojni que te nttiha goan na admirado are jehe na vicon na que tti chojni ttapo onchao nichja, co tti vaquín rá ondaxingamehe, co tti rrengo onchao sacjoixin rotté, co tti chejo onchao vicon. Co cainxin chojni mé coexinhi na joinchecoanxinhi na Dios de chojni Israel.

Are Jesús joanjo joine nó mil xí

(Mr. 8.1-10)

³² Cottimeja Jesús vayé tti chojni que vacao co nda'cho ngain na:

—Janha ttiaconoá cain chojni tehe ixin ochonda ní nchanho que te na nttihi nganji na, co ʒonhi chonda na para sine na. Janha rinaoha rrorroanha na para nchiandoha na si sineha na ixin puede ndatson'chjexin na jintta ngatja nttiha.

³³ Cottimeja tti chojni que vacao Jesús nda'cho na ngain:

—Pero ¿queñen sonttó na tti sine na jehe na? Ixin anto tsje na, co nttihi ngain lugar jihi ñonhi nchia jí.

³⁴ Jesús joanchiangui ngain jehe tti chojni que vacao co ndaño:

—¿Quejanhi niottja chonda ra?

Co jehe na ndaño na:

—Yáto niottja co nchion copescadochjan.

³⁵ Cottimeja Jesús coetonhe cain chojni mé que tasintte na ngataha nontte. ³⁶ Co jehe coá tti yáto niottja mé co copescado co joanjo gracias ngain Dios. Cottimeja váña nio co copescado co joanjo ngain tti chojni que vacao, co jehe na conchjea na nio conixin copescado ngain cainxin chojni mé. ³⁷ Cainxin na joine na co cojehe na jian. Cottimeja ña joinchecaon na yáto nntaña de tti xexin joine na. ³⁸ Cain chojni que joine mé cjoí nó mil xí co icha ñhí co chjan. ³⁹ Cottimeja Jesús goan despedido de ngain cainxin chojni mé, co joixinhi barco co sacjoi para regioen Magdala.

16

*Xifariseo co xisaduceo joanchia xa ixin Jesús rrojinchehe ná milagro
(Mr. 8.11-13; Lc. 12.54-56)*

¹ Xifariseo co xisaduceo cjoí xa vintteguitsjehe xa Jesús, co para que rroguicon xa que Jesús rrojinchehe ná cosa nchaoha, jehe xa ndaño xa ngain que jehe rrojinchehe ná señal de milagro que rroquixin de ngajni.

² Pero Jesús ndaño ngain xa:

—Are totsocjin jaha ra ndaño ra: “Anto ñhjoin tsí nchanho ndoe ixin ngajni jatse.” ³ Co are ndoyo ndaño ra: “Jai ñhjoinha sehe nchanho ixin jatse ngajni co jiá ttjoi.” ¡Jaha ra ncheha ra tti ndaño ra! Jaha ra noha ra datsoenhe ra queñen sehe tiempo are tsjehe ra ngajni, pero noaha ra datsoenhe ra quehe rroño señal de ngain tiempo jihi. ⁴ Jaha ra chojni jianha de ngain tiempo jihi que ditticaonha ra co tedanchia ra ná señal de milagro. Pero ñonhi icha señal sayehe ra que jecho inchin señal que conhe Jonás.

Jañá ñho Jesús ngain xa, co cointtohe xa nttiha co jehe sacjoi.

Tti levaduré xifariseo

(Mr. 8.14-21)

⁵ Are tti chojni que vacao Jesús vatto na toenxin lago mé, jehe na tjañehe na de joicao na niottja para rrojine na. ⁶ Cottimeja Jesús ndaño ngain na:

—Tsjenxin ra, ttjiho ra cuidado de ixin levaduré xifariseo co levaduré xisaduceo.

⁷ Co tti chojni que vacao Jesús coexinhi na ndache chó na:

—Jañá ndattjo na na ixin ján na joicoha na niottja para sontte na.

⁸ Jesús conohe quehe tetjao na co jehe ndaño ngain na:

—¿Quedonda ndaño ra ixin chondaha ra niottja? ¡Jaha ra seguro que tantoa ditticaon ni ra! ⁹ ¿Aña ttinxinha ra, ni ñaxaonha ra de tti naho niottja que janha conchjeyá tti naho mil xí, co ixin tsje nntaña joinchecaon ra de tti niottja que xexin joine na? ¹⁰ ¿Ani ñaxaonha ra de tti yáto niottja que conchjeyá tti nó mil xí, co ixin tsje nntaña joinchecaon ra de tti niottja que xexin joine na? ¹¹ ¿Queñen ñaxaonxin ra que janha rrindañjan de ixin tti sintte ra are ndañjan ixin tsjiho ra cuidado de ixin levaduré xifariseo, co levaduré xisaduceo?

¹² Cottimeja jehe na coinxin na que Jesús jeha jindache na ixin sicao na cuidado de ixin levaduré niottja, sino que tti tenchecoenhe xifariseo icha chojni co tti tenchecoenhe xisaduceo icha chojni.

Pedro ndačo que Jesús, mé tti Cristo

(Mr. 8.27-30; Lc. 9.18-21)

¹³ Are Jesús joiji ngain regioen Cesarea de Filipino, jehe joanchiangui ngain tti chojni que vacao co ndačo:

—¿Quehe ndačo chojni ixin quensen na janha, tti Xí que joixin de ngajni?

¹⁴ Jehe na ndačo na:

—Canxin chojni ndačo na que jaha Juan tti vancheguite chojni, icanxin na ndačo na que jaha Elías, co icanxin na ndačo na que jaha Jeremías o iná profeta.

¹⁵ Cottimeja ndačo Jesús ngain tti chojni que vacao:

—Co jaha ra, ¿quehe ndačo ra ixin quensen na janha?

¹⁶ Cottimeja ndačo Simón Pedro:

—Soixin tti Cristo, tti Xenhe Dios que jichon.

¹⁷ Jesús ndačo ngain Pedro:

—Anto çhjoin para ixin jaha, Pedro, tti xenhe Jonás, ixin ni ná chojni ndattjoha yá, sino que Ndodana que ttjen ngajni tti ndattjo yá. ¹⁸ Co janha rrindattjo que jaha dinhi Pedro, co nombre jihi rročo xo. Co ngataha xo jihi sinttachjian ningona; co ni joachaxín infierno tsixinha ngain nihngo jihi. ¹⁹ Janha rrochjaha jaha cain joachaxin de tsinxin quehe rinao Dios nttiha ngajni; inchin janha rrochjaha jaha llave de ngajni. Co tti jaha tsiatte nttihi ngataha nontte, Dios ocoiatte nttiha ngajni; co tti tsonxindanguehe jaha nttihi ngataha nontte, Dios oconxindanguehe mé nttiha ngajni.

²⁰ Cottimeja Jesús coetonhe jehe tti chojni que vacao que çonhi chojni rrondate na ixin jehe tti Cristo.

Jesús ndačo ixin jehe ndasenhe

(Mr. 8.31—9.1; Lc. 9.22-27)

²¹ Desde are mé Jesús coexinhi ndache jehe tti chojni que vacao que ixin jehe chonda que tsji para ciudad de Jerusalén co nttiha anto tangui tsonhe jehe ngain cain xittetonha ngain nihngo nttiha, co ngain cain xidána que vaquetonha ngain icha xidána, co ngain cain ximaestroe ley Israel. Co ndačo que cain xí mé nasoenxon xa jehe, pero ngain nchanho ninxin jehe rroxechon. ²² Cottimeja jehe Pedro joantsjenda Jesús co coexinhi Pedro ndache Jesús:

—¡Nichjaha jamé ixin Dios sicao cuidado de ixin soixin que çonhi tiempo tsonha jihi!

²³ Pero Jesús ngaria co ndačo ngain Pedro:

—¡Sattjixin de nganji na, Satanás! ixin jaha rinao rrocayaconhna na janha. Jaha çaxaonha inchin çaxaon Dios, sino inchin çaxaon chojni que te ngataha nontte.

²⁴ Cottimeja Jesús ndačo ngain tti chojni que vacao:

—Si çhonja de jaha ra rinao ra sacjin na, pero chonda ra que rrotjañaha ra cain tti chonda ra co masqui anto tangui tsonha ra co hasta nasenxon ra. ²⁵ Ixin tti rinao que vidé çonhi tsonhe, mé sinchetján vidé; pero tti sinchetján vidé de ixin causananxin janha, mé sechon para cainxin

tiempo. ²⁶ Ixin xonhi xé que ná chojni sacha cainxin que jí ngain mundo jiji co ndasinchetján almé, ¿o quejanhi tsenanxin chojni almé? ²⁷ Ixin janha, tti Xí que joixin de ngajni, sihi iná conixin gloria que rrochjana Nnodana conixin cain angelna, cottimeja cada chojni tsjengá na hna inchin jehe na joinchehe na. ²⁸ Co atto seguro rrindattjo ra, que ttoha ra xo te ra nganji na jaixon, xa senha ra hasta que siconja ni ra janha, tti Xí que joixin de ngajni, rrocjan na sihi conixin joachaxin para siquetonha cain cosa.

17

Are vicon na Jesús anto ojé

(Mr. 9.2-13; Lc. 9.28-36)

¹ Vatto incjaon nchanho, cottimeja Jesús joicao Pedro co Jacobo co Juan, xanchó Jacobo, co Jesús cjoí conixin jehe na ngataha ná jna anto noi, ² co nttiha vicon na Jesús anto ojé. Ngá con Jesús anto conguixian inchin tté nchanho, co lonttoe anto coroa lontto hasta conguixima lontto. ³ Co ngain rato mé jehe na vicon na Moisés co Elías, tatetjao na Jesús nttiha. ⁴ Cottimeja Pedro ndačo ngain Jesús:

—Soixin, ¡Atto nchao ixin janha na te na nttihi! Si rinao, janha na sinttachjian na ní nchiachjan: ná nchiachjan para ixin soixin, ná nchiachjan para ixin Moisés, co iná nchiachjan para ixin Elías.

⁵ Pedro xa jinichja jañá are joí ná ttjoi anto roa hasta jitonguixima ttjoi, co ttjoi mé ndacjoanotaon na, co de ngacjan ttjoi mé coinhi na tté Dios que ndačo:

—Jihi tti Xanhna que janha anto rinaho, co de ixin jehe Xan janha anto chahna. Ditticaon ra tti rrondačo Xan.

⁶ Cottimeja tti canio chojni que joicao Jesús nttiha are coinhi na yá, canio na vinttettoxin na co visé na ngataha nontte, co anto xaon na.

⁷ Cottimeja Jesús conchienne ngain na, catte na co ndačo ngain na:

—Dingattjen ra, co xaonha ra.

⁸ Co are jehe na tsjehe na, ixonhi chojni vicon na, más que jeho Jesús.

⁹ Are tedania na de ngataha jna mé, Jesús coetonhe na co ndačo:

—Xonhi chojni ttequinhi ra tti jaha ra vicon ra, hasta que janha, tti Xí que joixin de ngajni, rroxechon na.

¹⁰ Cottimeja jehe tti canio chojni que joicao Jesús joanchiangui na ngain Jesús co ndačo na:

—¿Quedonda ndačo ximaestroey ley Israel ixin Elías chonda que tsí icha saho que jaha?

¹¹ Jesús ndačo ngain na:

—Ján ndoa que Elías tti tsí icha saho que janha co jehe tti siquentonxinhi vidé chojni para que nchao sayehna na janha. ¹² Pero janha rrindattjo ra que Elías ojoí co jehe na joatsoanha na, sino que joinchehe na ngain inchin jehe na joinao na. Jamé janha cai, tti Xí que joixin de nganji, tangui tsonna de ngain rá jehe na.

¹³ Cottimeja jehe tti canio chojni que joicao Jesús xaxaon na que Jesús jindačo de ixin Juan, tti vancheguitte chojni.

Jesús joinchexingamehe ná xanxí que vechonda chin denda

(Mr. 9.14-29; Lc. 9.37-43)

¹⁴ Are joihi na ngain tti vittohe icha chojni que vacao Jesús, nttiha anto tsje chojni sinchonhe na Jesús. Are conchienne ná xí ngain Jesús co vettoxin nttajochihi xa co ndačo xa:

¹⁵ —Nttatsanha ñao soixin, ttiaconoehe xanhna ixin chonda xan chin denda co anto tangui tonhe xan. Tsje nttiha detsingatte xan xohi o ngangui jinda. ¹⁶ Nttihi joiquinha xan ngain chojni que čhjiho tehe, pero čhoha nchexingamehe na xan.

¹⁷ Jesús ndačo:

—Jaha ra chojni que ditticaonha ra co jianha ra! ¿Hasta quesa janha chonda que sarihi nganji ra? ¿Hasta quesa janha chonda que tsixinna nganji ra? Sicohna ra chjan yá nttihi.

¹⁸ Cottimeja Jesús joinchesattehe tti espíritu jianha que vechonda chjan mé, co venguixin espíritu mé de ngaxinhi cuerpoe xan. Co desde ngain rato mé jehe xan ndaxingamehe xan.

¹⁹ Cottimeja are jehó Jesús nttiha conixin chojni que vacao, jehe na joanchiangui na ngain co ndačo na:

—¿Quedonda janha na čhoha vehngui na espíritu jianha yá?

²⁰ Jesús ndačo ngain na:

—Ixin jaha ra antoha jian ditticaon ni ra janha. Co janha atto seguro rrindattjo ra que si tti ditticaon ra jixin rroguehe inchin ná tsehe ca dinhi mostaza, nchao rrondache ra jna jiha: “Sattjixin de nttihi co sattji iná lugar”, co jna yá satsjixin jna de tti jí jna. xonhi cosa que čhoha sinchehe ra si ndoa ditticaon ra. ²¹ Pero clase de espíritu jianha yá jehó nchao dengui ni are nchecoanxinhi ni Dios co dinttečajño ni saho.

Jesús ndačo iná ixin jehe ndasenne

(Mr. 9.30-32; Lc. 9.43-45)

²² Ná nchanho are řa vintte na ngain regioen Galilea, Jesús ndache tti chojni que vacao ixin chojni sinchechienhe na jehe, tti Xí que joixin de ngajni, para ngain chojni jianha. ²³ Co ixin nasoenxon na jehe Jesús, pero ngain nchanho ninxin jehe rroxechon iná. Co chojni que vacao anto vinttechín na are coinhi na yá.

Are Jesús cjoenga hna impuesto ngain nihngo

²⁴ Are Jesús conixin chojni que vacao joihi na ngain rajna Capernaum, tti xí que vanchehe cobro impuesto nihngo cjoí xa ngain Pedro co joanchianguihi xa co ndačo xa:

—¿Attjenga hna ximaestroa ra impuesto para ixin nihngo?

²⁵ Pedro ndačo:

—Ján.

Cottimeja Pedro are cjoí ngaxinhi nchia para rrojindačo tti ndačo xicobrador, pero Jesús saho ndačo ngain jehe:

—Pedro, ¿quensen řaxaon jaha nchehe cobro impuesto xittetonha ngataha nontte nttihi? ¿Achojni de ngain nacioen xa o ni chojni que ttixin cjin?

²⁶ Pedro ndačo:

—Tti chojni que ttixin cjin.

Jesús ndačo:

—Mexinxin chojni xa chondaha na que tsjenga na hna. ²⁷ Pero para que xonhi chojni sonttoñao na, ttji jaha ngain lago, dancanguihi anzuelo co dantsjengui tti saho copescado que rrotse anzuelo. Co ngaxinhi rroha

copescado mé sinchí ná tomi. Tomi mé sittja para tsjengaxin na hna impuestona janha co impuestoa jaha. Ttjiho tomi mé co ttjenga hna cain.

18

¿Quensen tti icha importante?

(Mr. 9.33-37; Lc. 9.46-48)

¹ Ngain rato mé chojni que vacao Jesús conchiennehe na ngain Jesús co ndačo na:

—¿Quensen icha importante ngajni?

² Cottimeja Jesús vayé ná xannchinchjan co coín xan ngayehe na, ³ co ndačo:

—Atto seguro rrindattjo ra que si jaha ra tsentoxinha ra vidá ra co rrocjan ra inchin xannchinnchinchjan, čhoha rrochonda ra parte ngain tti ttonha Dios. ⁴ Mexinxin quexeho chojni que jaha orgulloso co cjan inchin chjan jihi, chojni mé tti sehe icha importante nntiha ngajni. ⁵ Co tti chojni que sayé ná tti inchin xannchinchjan jihi ixin ditticaon na janha, cai chojni mé sayehna na janha.

Tti sinchenchehe ni cosa jianha

(Mr. 9.42-48; Lc. 17.1-2)

⁶ Quexeho chojni que sincheyehe ná chojni mé que řa antoha jian ditticaon na janha, icha jian sečhianito ná řočhin ngain ttoxin chojni mé para rroxincanjingui ndachaon. ⁷ Atto nchaoha ixin jí cosa ngataha nontte nntihi que tenchenchehe chojni tti jianha. Cosa mé cainxin tiempo sehe nntihi, pero janto tangui tsonhe tti chojni que sincheyehe iná chojni para sinchehe jamé!

⁸ Mexinxin si ná rá o ná rottea sinttařaxaon para sinchehe jianha, ncheha cosa mé, masqui hasta tončhinji rá o rottea co tja cjin, ixin icha jian rrochonda vida naroaxin masqui coha ná rá o ná rottea, co nahi tsji conixin yoixin rá o yoixin rottea ngain infierno tti řonhi tiempo danga řohi. ⁹ Co si jmacon sinttařaxaon para sinchehe jianha, ncheha cosa mé, masqui hasta dantsjengui jmacon co tja cjin, ixin icha jian rrochonda vida naroaxin masqui nacoa jmacon, co nahi tsji conixin cayoixin jmacon ngain infierno tti řonhi tiempo danga řohi.

Ejemploe tti coleco diguitján

(Lc. 15.3-7)

¹⁰ řaxaonha ra ixin chojni que řa antoha jian ditticaon na janha jaha importante na. Ixin janha rrindattjo ra que ngajni cain ángel que tenda jehe na, cainxin tiempo te ángel mé ngattoxon con Nnodana que ttjen ngajni. ¹¹ Ixin janha, tti Xí que joixin de ngajni, joihi para joicjenguijna tti chojni que otequininxin rrocji ngain infierno.

¹² Inchin si ná xí chonda xa cien coleco co ndasitján ná va, ¿quexén sinchehe xa? ¿Atsinttoeha xa tti noventa y nueve va ngagaha jna, co satsji xa sicjé xa coleco vitján? ¹³ Co si sittja xa va, seguro que icha rroché xa ngain coleco mé que ngain tti noventa y nueve coleco que vitjanha. ¹⁴ Jamé cai Nnodá na que ttjen ngajni rinaoha Ndo que sitján ni ná chojni que řa antoha jian ditticaon na janha.

Quexén sinchetjañehe ni chojni que ditticaon Jesús

(Lc. 17.3)

¹⁵ Si ná chojni que ditticaon na janha sinchehe ná cosa nchaoha nganji jaha, nichjehe jaho co jehe co ndache ixin jehe nchaoha joinchehe. Si jehe sinchehe caso tti jaha rrondache, nchao, ixin jaha ocoenguijna jehe para que jehe rrochonda parte ngain tti ttetonha Dios. ¹⁶ Pero si sincheha caso tti jaha rrondache, cottimeja ttjé ná o yó chojni para ttjiho dinichjehe ra jehe que tti joinchehe nchaoha jí, co jehe cayoi chojni mé sintte na de testigo de quehe rrondache chó ra. ¹⁷ Co si jehe xa sincheha caso masqui cjoiho cayoi chojni mé, cottimeja jaha dindache cain chojni ngain nihngo. Co si chojni mé xa sincheha caso tti rrondačo cain chojni ngain nihngo, cottimeja cain ra dantsjenda ra chojni mé inchin tti chojni que ditticaonha Dios o inchin ná chojni jianha.

¹⁸ Janha rrindattjo ra seguro que cain tti tsia ra nttihi ngataha nontte, Dios ocoia cosa mé nttiha ngajni. Co cain tti jaha ra tsonxindanguehe ra nttihi ngataha nontte, Dios oconxindanguehe cosa mé nttiha ngajni.

¹⁹ Cai rrindattjo ra que si yó de jaha ra sintte ra de acuerdo nttihi ngataha nontte de sanchia ra čhonja are tencheoanxini ra Nnodana que ttjen ngajni, seguro que jehe Ndo rrochjá ra Ndo. ²⁰ Ixin tti te yó o ní chojni que tenichja na conixin nombrena janha, janha nttiha rrihi ngayehe na.

²¹ Cottimeja Pedro cjo i joanchianguihi Jesús co ndačo:

—¿Quejanhi nttiha chonda janha que sinttatjañá ná tti sinchehe jianha nganji na janha? ¿Achonda que sinttatjañá hasta yáto nttiha?

²² Jesús ndačo ngain Pedro:

—Janha rrindattjoha que hasta yáto nttiha, sino que hasta yáto de tti setenta nttiha.

Ejemploe ná tti nchehe xa que čhoha joinchetjañehe ná xicompañeroe

²³ Mexinxin rrondattjo ra quečén tti ttetonha Nnodana que ttjen ngajni. Mé inchin ná rey que joinchechjienhe cuenté cain ninchehe xé ixin quejanhi teca na cada na. ²⁴ Jehe mero coexinhi jinchechjian cuenta mé are joiaho na ngain rey mé ná tti nchehe xa que jica tsje millones. ²⁵ Pero ixin tti nchehe xa mé chondaha quehe tsjengaxin hna, mexinxin coetonha rey mé que rrojinchecji na tti nchehe xa mé ngain iná xinajni conixin čihi co xenhe co cain cosa que jehe vechonda para rroxengaxin hna tti jehe jica ngain rey. ²⁶ Cottimeja jehe tti nchehe xa mé vettoxin nttajochjili ngain rey co ndačo: “Nttatsanha ñao chonna na nchion co tsengaha hna cainxin tti rricaha.” ²⁷ Rey coiaconoehé tti nchehe xa mé co joinchetjañehe cain tomi que veca co coanchjanda sacjoi. ²⁸ Pero are jehe tti nchehe xa mé vačhje para sacjoi, nttiha vetanxin iná tti nchehe xa, xicompañeroe. Co jehe mé veca nchion tomi ngain tti sajittji. Co jehe tti sajittji mé tse co tsenguihi ttosin xicompeñeroe co coejehe tté xa, co ndache chó: “¡Ttjengana hna tti rricana na!” ²⁹ Cottimeja jehe tti veca vettoxin nttajochjili co ndačo: “Nttatsanha ñao chonna na, co tsjengaha hna cain tti rricaha.” ³⁰ Pero tti sajittji čhoha, sino que sajoicao coiaxinhi ngain cárcel hasta que rrocjengaja hna tti jica. ³¹ Co are icha ninchehe xa vicon na jiji, anto vinttechín na co cjo i na joindačo na cain jiji ngain xinajni na, jehe tti rey mé. ³² Cottimeja jehe rey mé rroanha joajna para joičacoa tti cjoaya, co ndačo ngain: “¡Jaha ná ninchehe xa anto jianha! Janha jointtatjañaha jaha cain tti joaricana na ixin joinchetsena ñaho na. ³³ Jaha cai rrochonda que rroquiaconoehé xicompañeroa, jañá inchin janha coiaconoaha jaha.” ³⁴ Co jehe rey mé

anto coñao co coetonha para que sayé castigo jehe tti nchehe ꝥa mé hasta que tsjengaja hna cain tti jica.

³⁵ Co are ojoexin ndačo Jesús cain yá jehe ndačo:

—Cai jańá sinchehe Ndodana que ttjen ngajni nganji ra, si jaha ra sinchetjańeha ra icha chojni tti nchaoha que sinchehe na nganji ra.

19

Jesús ndačo de ixin xí que dachjendehe čhihi

(Mr. 10.1-12; Lc. 16.18)

¹ Después que Jesús ndačo cain cosa yá, jehe sacjoixn de Galilea co joiyi ngain tti parte de regioen Judea que jí lado čhinxin nchanho de río Jordán. ² Anto tsje chojni rroé na Jesús, co nttiha jehe joinchexingamehe tsje chojni nihi.

³ Cottimeja canxion xifariseo vintteconchienne xa ngain Jesús para rrojinchenichja xa Jesús ná cosa nchaoha para que nchao rrocjanguihi xa. Joanchiangui xa ngain jehe co ndačo xa:

—¿Anchao ná ni sachjendehe ni čhihi ni de ixin quexeho cosa que jehe ni isincheřoxinha ni?

⁴ Jesús ndačo ngain xa:

—¿Atsjeha ra tti jitaxin Palabré Dios? Nttiha jitaxin ixin Dios tti joinchekhjian chojni are saho. Co jehe mé joinchekhjian xí co nčí. ⁵ Cai jitaxin nttiha: “Mexinxin xí sachjendehe xa ndodé xa co janné xa para secaho xa jeha čhihi xa, co cayoixin na sintte na inchin nacoaxinxon chojni.” ⁶ Co jańá ijeha yó chojni, sino que nacoaxinxon chojni. Mexinxin xí čhoha sachjendehe xa čhihi xa ixin Dios joinchekhjian cayoi jehe na nacoa chojni.

⁷ Cottimeja vinttendačo jehe xa:

—¿Quedonda diquetonha Moisés que nchao sanjo ni ngain ncha ná řón que jitaxin que jehe ni ondavačhjendehe ni čhihi ni, co jamé ondatsinttohe ni ncha?

⁸ Jesús ndačo:

—Moisés ndačo jańá ixin jaha ra atto cha ansean ra, mexinxin jehe joanjo joachaxin yá de sachjendehe ra nčičihi ra, pero are icha saho jeha jańá coetonhe Dios. ⁹ Co janha rrindattjo ra, que tti dachjendehe nčičihi (co jeha de ixin vittjaxin ncha tajjoacaho ncha iná xí), co jehe decaho iná nčí, jehe nchehe jianha řajeho como si rrochonda yó nčí. Co tti decaho ná nčí que digačhjendehe xixihi, cai chojni mé jianha nchehe, řajeho inchin rrochonda nčičihi iná xí.

¹⁰ Cottimeja chojni que vacao Jesús ndačo na ngain:

—Si jańá jí remé de ixin xí co nčí, icha jian sinttecaoha chó ni.

¹¹ Jesús ndačo ngain na:

—Pero jeha cain chojni nchao sintte na jeha na, sino que jeha tti chojni que Dios ndačo para que sintte na jeha na. ¹² Jí tsje razón para que xí dinttecaoha xa nčí. Te xí deporsín desde are toncjihí xa cuerpoe xa rinaoha nčí, co icanxin xí čhoha sinttecao xa nčí ixin chojni joincheřoenhe xa ngain tti parte jima de cain xí, co icanxin xí rinaoha xa dinttecao xa nčí ixin icha rinao xa nchehe xa inchin ttetonha Dios que ttjen ngajni. Co řo rinaoha ra sinttecoho ra nčí ixin sinchehe ra inchin ttetonha Dios, nchao nchehe ra.

Jesús joinchenaon xannchinnchinchjan

(Mr. 10.13-16; Lc. 18.15-17)

¹³ Cottimeja joiaohe na Jesús canxion xannchinnchinchjan para que Jesús rroquín rá ngataha já xan co sinchetsenhe ñao Dios ixin sinchenaon xan. Pero chojni que vacao Jesús coexinhi na joinchesattehe na cain tti chojni que joicao cain chjan mé. ¹⁴ Pero Jesús ndačo ngain chojni que vacao:

—Tančhanda ra que xannchinnchinchjan tsí xan nganji na janha, cayacoenha ra xan ixin ngajni tti ttetonha Ndodana, nttiha para cain chojni inchin jehe xan.

¹⁵ Co Jesús coín rá ngataha cain xannchinnchinchjan mé co joinchetsenhe ñao Dios ixin sinchenaon xan, cottimeja Jesús sacjoixin de nttiha.

Ná xanxí anto rico cjoao xan Jesús

(Mr. 10.17-31; Lc. 18.18-30)

¹⁶ Ná xanxí cjoí xan joitsjehe xan Jesús, co joanchiangui xan co ndačo xan:

—Maestro, soixin que anto jian, ¿quehe icha cosa jian chonda janha que sinttaha para que janha rrochonda iná vida nroaxin que xonhi tiempo tsjexin?

¹⁷ Jesús ndačo ngain xanxí mé:

—¿Quedonda ncheguinhí na janha jian? xonhi iná tti icha jian, jeha nacoaxinxon, co mé jehe Dios. Pero si jaha rinao rrochonda iná vida nroaxin, ditticaon co nchehe cain tti coetonha Dios.

¹⁸ Xanxí mé ndačo xan:

—¿Quecá?

Co Jesús ndačo ngain xan:

—Dantsjeha vidé iná chojni; xonhi nchí ncheyehe; xonhi cosé iná chojni ttehe; ndačooha cosa ndoaha de iná chojni; ¹⁹ ttijho respeto ngain ndodá co ngain janná; co rinao cain chojni inchin rinao cuerpoa.

²⁰ Xanxí mé ndačo xan ngain Jesús:

—Cain yá rrinttaha desde are xa nchín na, ¿quehe xa ditján sinttaha?

²¹ Jesús ndačo ngain xan:

—Si jaha rinao sarihi chojni jian ndoa, ttji co nchecji cainxin tti chonda co tonchjeyehé chojni noa tomi, cottimeja ngajni jaha rrochonda cosa icha rentte, cottimeja sihi para sacjin na tti sacji janha.

²² Pero are xanxí mé coinhi xan yá, anto vechín xan co sacjoi xan ixin anto rico vehe xan.

²³ Cottimeja Jesús ndačo ngain chojni que vacao:

—Atto seguro rrindattjo ra que atto tanguí para que chojni rico rrochonda na parte ngain tti ttetonha Ndodana que ttjen ngajni. ²⁴ Icha tanguiha para ná cocamello sattoxinhi va ttoechjenhe ná nttachiehe manta que para chojni rico rrochonda na parte ngain tti ttetonha Dios.

²⁵ Are chojni que vacao Jesús coinhi na yá, anto vinttegoan na admirado co joanchianguihi chó na co ndačo na:

—¿Mexinxin quensen nchao rrochonda iná vida nroaxin remé?

²⁶ Jesús tavetsjehe ngain na co ndačo:

—Chojni nttihi čoha sinchehe na jamé, pero Dios nchao sinchehe cainxin.

²⁷ Cottimeja Pedro ndačo ngain Jesús:

—Janha na cointtoa na cain tti joichonda na, para que jai nchao çhjin na nganji soixin. Mexinxin, ¿quehe rrochonda na janha na?

²⁸ Jesús ndaço ngain na:

—Atto seguro tti rrindattjo ra, que ngain tti tiempo que tsí, are cainxin rrocjan naroaxin, are mé janha, tti Xí que joixin de ngajni, sarihi ngain tti lugar que chonda gloria, co jaha ra que çhjin na jai cai sintte ra ngain tteyó lugar de joachaxin para que sinchejuzguehe ra tti tteyó grupoe chojni Israel. ²⁹ Co cain chojni que ttinttohe na nchiandoha na, o xanchó na, o ndodé na, o janné na, o çhihi na, o xenhe na, o jnguihi na para tenchehe na çana janha, chojni mé sayé na cien ntliha icha tsje co cai sayé na iná vida naroaxin que çonhi tiempo tsjexin. ³⁰ Pero tsje chojni que jai çaxaon na ixin jehe na anto importante na, pero are mé, çonhi rentte na. Co tsje chojni que jai çaxaon na ixin jehe na jeha importante na, pero are mé jehe na nisintte icha importante.

20

Ejemplo ninchehe ça

¹ Cai ndaço Jesús:

—Tti ttetonha Dios ngajni, mé inchin joinchehe ná xí que vechonda jie jngui. Xí mé vaçhe xa ndoyo para joicjé xa ninchehe ça para sinchehe na ça ngain ntauva. ² Jehe xí mé ndaço xa ngain na que tsjenguehe xa na hna tti jiquininxin dacha ni ngoi ná nchanho, co jehe na vittoeixin na. Mexinxin jehe xa rroanha xa na para ngain jnguihi xa joinchehe na ça. ³ Cottimeja jehe xa vaçhe xa iná ça jidacao inchin las nueve co vittja xa icanxin chojni ngain ndásin que çonhi ça tenchehe. ⁴ Jehe xa ndaço xa ngain na: “Cai jaha ra ttji ra dinchehe ra çana ngain jnguihna, co tsjengaha ra hna inchin jiquininxin.” Co chojni mé vinttecji na. ⁵ Cottimeja jehe xí mé vaçhe xa iná inchin chonguixin co cai iná inchin ní hora tsocjin, co joinchehe xa çajeho. ⁶ Co inchin naho hora tsocjin cjan vaçhe xí mé iná para ngain ndásin, co vittja xa icanxin chojni que çonhi ça tenchehe na cai, co jehe xa ndaço xa ngain na: “¿Quedonda ntlihi Tate jaha ra ngoixin nchanho co çonhi ça tenchehe ra?” ⁷ Jehe na vinttendaço na: “Ixin çonhi chojni çjana na ça.” Cottimeja jehe xa ndaço xa ngain na: “Cai jaha ra ttji ra dinchehe ra çana ngain jnguihna, co tsjengaha ra hna inchin jiquininxin.” ⁸ Co are ondacontie, jehe xa ndaço xa ngain tti jinda ça mé: “Dayehe cain ninchehe ça co ttjenguehe na hna. Ttexinxin ngain tti chojni que joixinhi después, co ttjaxin ngain tti nijoinxhi icha saho.” ⁹ Cottimeja vintteconchienhe tti chojni que coexinhi joinchehe ça inchin naho hora tsocjin, co cada na xenguehe na hna lo de ngoixin nchanho. ¹⁰ Cottimeja are xenguehe hna tti chojni que joixinhi joinchehe ça icha saho, jehe na çaxaon na que rroxenguehe na hna icha tsje, pero cai xenguehe na hna jeha tti ná nchanho. ¹¹ Are xenguehe na hna tti nijoinxhi joinchehe ça icha saho, jehe na coexinhi na ndaço na ixin jianha joinchehe tti jnguihi. ¹² Jehe na ndaço na ngain xinajni mé: “Cain chojni tehe que joinchehe na ça jeha nacoa hora co cjoenguehe na hna çajeho que janha na que jointtaha na ça ngoixin nchanho ngandaohe soa.” ¹³ Pero jehe xinajni mé ndaço xa ngain ná na: “Amigo, janha çonhi ni ná cosa jianha rrinttaha nganji ra. ¿Acjoanha na ixin tsjengaha ra hna lo de ná nchanho? ¹⁴ Jaxon dayehe tomia co sattji. Janha rinaha tsjengá chojni tehe hna çajeho inchin rrittjengaha

ra hna jaha ra. ¹⁵ ¿Apoco janha chondaha derecho de sinttaha tti janha rinaho ngain tomina? ¿O ani jaha ra tonchjoaha ra ixin janha danjoncoa tomina?” ¹⁶ Mexinxin jihi rrocho ixin tti chojni que jai xaxaon na ixin jehe na jeha importante na, pero are mé jehe na nisintte icha importante. Co tti chojni que jai xaxaon na ixin jehe na anto importante na, pero are mé xonhi tsorentte na. Ixin janha nichjá anto tsje chojni pero cainxinha na rinao na na janha.

Jesús cjan ndacho iná ixin jehe ndasenhe
(Mr. 10.32-34; Lc. 18.31-34)

¹⁷ Are Jesús ojittji ngatja nttiha para Jerusalén, jehe joantsjenda tti tteyó chojni que vacao co ndacho ngain na:

¹⁸ —Jaha ra tedicon ra que jaxon satettjin na para Jerusalén. Nttiha janha, tti Xí que joixin de ngajni, sinchechienhe na na ngain xidána que ttetonha ngain icha xidána co ngain ximaestroe ley Israel, co nimé ni rrondacho que ixin janha nasenxon na. ¹⁹ Co sanjo na na janha ngain xí de ojé nontte para que nimé tsjanao na na janha, co rroxanguihna na cuarta de roa, co sinchecrucificá na na. Pero ngain nchanho ninxin janha rroxechon na.

Tti joanchia janné Jacobo co Juan
(Mr. 10.35-45)

²⁰ Cottimeja conchienenhe ngaca Jesús, janné Jacobo co Juan, cayoi nimé xenhe Zebedeo. Co jehe janné na conixin cayoi jehe na vintteconchienenhe na ngain Jesús. Co jehe jan vettoxin nttajochjihi jan ngain Jesús para joanchia jan ná joatotsenhe ñao jan ngain Jesús. ²¹ Jesús ndacho ngain naníta mé:

—¿Quehe rinao?

Naníta ndacho:

—Ttetonha soixin que are soixin tsetonha cainxin cosa, ná de xanhna tehe sehe lado jian de soixin co iná xan sehe xan ngain lado cjon de soixin.

²² Pero Jesús ndacho ngain Jacobo co Juan:

—Jaha ra noaha ra tti danchia ra. ¿Anchao tsonha ra tti anto tangui que janha tsonna, co anchao ndasenhe ra inchin janha ndasenhe na?

Jehe na vinttendacho na:

—Ján nchao.

²³ Jesús ndacho ngain na:

—Ján ndoa que jaha ra tangui tsonha ra, co senhe ra inchin janha senhe na, pero de tti sintte ra lado jian na co lado cjon na, jeha janha tti danjo joachaxin mé, sino que Ndodana Ndo nohe quensen sintte nttiha.

²⁴ Co are tti itte chojni que vacao Jesús coinhi na yá, coñao na ngain Jacobo co Juan. ²⁵ Pero Jesús vayé na, co ndacho ngain na:

—Jaha ra noha ra que cain xí que ttetonha ngain nación, ttetonha xa inchin rinao xa, co cai icha xí que chonda joachaxin nttiha anto ttetonha xa ngain chojni. ²⁶ Pero jeha jamé tsonhe ngayaha jaha ra, sino que tti rinao icha tsetonha ngayaha ra, pero mé chonda que icha tsjenguijna icha chojni. ²⁷ Co quexeho de jaha ra xo rinao ra icha tsetonha ra, pero cai chonda que sintte ra inchin esclavo para icha chojni. ²⁸ Janhi inchin janha, tti Xí que joixin de ngajni, joiha para que chojni tsjenguijna na janha, sino que janha joihi para joicjenguijna chojni co para que janha sanjo vidana para tsjenga hna tti teca tsje chojni.

Jesús joinchexingamehe yó tti chejo

(Mr. 10.46-52; Lc. 18.35-43)

²⁹ Are Jesús conixin tti tteyó chojni que vacao vačhjexin na de ciudad de Jericó, anto tsje chojni rroé Jesús. ³⁰ Ngandehe nttiha mé tate yó tti xí chejo, co are vintequinhi xa que Jesús jidatto nttiha, jehe xa ndačo xa sén:

—¡Soixin, razé David, ttiaconoana ni ra janha na!

³¹ Cain chojni que tettji nttiha joinchesattehe na cayoi xí mé para que rrotencoaxa, pero jehe xa icha coyao xa co ndačo xa:

—¡Soixin, razé David, ttiaconoana ni ra janha na!

³² Cottimeja Jesús tavengattjen, co vayé cayoi tti chejo mé co joanchiangui ngain co ndačo:

—¿Quehe rinao ra sinttaha janha nganji ra?

³³ Cayoi tti chejo mé vinttendačo:

—Janha na rinaho na sicon na.

³⁴ Cottimeja Jesús coiaconoeha cayoi xí mé co cattehe jmacon xa. Co ngain rato mé cayoi tti chejo mé onchao vicon, co cayoi sacjoi conixin Jesús.

21

Jesús joigaha ciudad de Jerusalén

(Mr. 11.1-11; Lc. 19.28-40; Jn. 12.12-19)

¹ Are joiji na ngain rajna Betfagé, chiaon ngaca Jerusalén, co ngaca tti jnanchjan que dinhi Nttaolivo, Jesús rroanha yó de tti chojni que vacao.

² Co ndačo ngain na:

—Ttji ra ngain rajnanchjan jimé. Yá sinchí ra ná colochojichoa va co nttiha jí colochochjenhe va. Toxindanguehe ra va co sicohna ra cayoi va nttihi. ³ Co si čhonja chojni rronhattjo ra čhonja, jaha ra ndache ra que ximaestroa ra rrogondehe xa va co toin sicán ra va iná.

⁴ Jihi conhe para que joiconhe tti dindačo profeta are diquentaxin janhi:

⁵ Ndache ra ciudad de Jerusalén:

“Tsjenxin, tti Rey de jaha joí nganji, co jehe joí inchin ná chojni que jeha importante, co jitaha ná colochojicho, que mé colochochjan nchín, xenhe ná colochojicho que otame va.”

⁶ Cottimeja cayoi chojni mé sacjoi na co joinchehe na inchin coetonha Jesús. ⁷ Joiaho na colochojicho mé conixin xenhe va, co manta que tetsá na cjoajinhi na colochochjan para Jesús vetaha va. ⁸ Co tti anto tsje chojni que joichonhe na Jesús, ttoha na coingo na ngá nttiha tti manta que tetsá na, co icanxin na cončhinji na ramé nttá para coingo na ngá nttiha. ⁹ Co cain chojni que tetaon nttiha co cain chojni que terroé coexinhi na ndačo na:

—¡Gloria para ixin xí jihi ixin jehe xa razé rey David co chonda xa joachaxin que vechonda rey David! ¡Anto jian jehe tti joí conixin nombré Dios! ¡Gloria ngain Dios!

¹⁰ Are Jesús joixinhi ciudad de Jerusalén, cainxin chojni que te nttiha xatte na ngain ixin anto ché na, co tsje na joanchiangui na co ndačo na:

—¿Quensen jihi?

¹¹ Co icha chojni ndačo na:

—Jihi tti profeta que dinhi Jesús, tti joixin de ngain rajna Nazaret ngain nonttehe Galilea.

Jesús joincheroa nihngo icha importante

(Mr. 11.15-19; Lc. 19.45-48; Jn. 2.13-22)

¹² Después Jesús joixinhi patioe nihngo icha importante para ixin Dios, co nttiha vengui cain chojni que tettehna co tenchecji. Concjamangui cain mesé tti chojni que tedasinguixinhi icha chojni tomi para rrochondaxin na suelto, co concjamangui nttaxintaoen cain nitenchecji conttoanajni. ¹³ Co ndačo ngain na:

—Ngain tti jitaxin Palabré Dios jindačo: “Nchiania sehe nchia para sinchecoanxinna na janha”, pero jaha ra ndadinchecjian ra nchia ná lugar tti xatte xichehe.

¹⁴ Co nttiha ngain nihngo mé canxion tti chejo co canxion tti rrengo conchienne na ngain Jesús, co Jesús joinchexingamehe cain chojni mé.

¹⁵ Pero xidána que vaquetonha ngain cain icha xidána co ximaestro ley Israel are vintteguicon xa cain milagro que jehe Jesús jinchehe co are vinttequinhi xa quexén cain chjan ngaxinhi nihngo ndačo xan sén: “¡Gloria para ixin xí jiji ixin jehe xa razé rey David co chonda xa joachaxin que vechonda rey David!” Are vinttequinhi xa yá vinttegoña co xa ¹⁶ co vinttendačo xa ngain Jesús:

—¿Arrittinhi tti tendačo chjan taha?

Co Jesús ndačo ngain xa:

—Ján, rritian. Pero jaha ra ¿aãa tsjeha ra ngain tti jitaxin Palabré Dios? Nttiha jitaxin de ixin jiji ixin ndačo janhi:

Dios joinchecoenhe cain chjan hasta xan nandá toncjihí para nchesayehe xan jehe jian.

¹⁷ Cottimeja jehe xa nttiha vintteguittohe xa co Jesús sacjoixin de ngain ciudad de Jerusalén co sacjoi para ngain rajna Betania co nttiha vattoxin ttie mé.

Are Jesús nichja ngain nttahigo que xonhi ttochjoin jiyá

(Mr. 11.12-14, 20-26)

¹⁸ Ndoexin dacao are Jesús cjan para ngain Jerusalén iná, jehe venhe jintta. ¹⁹ Ngandehe nttiha mé Jesús vicon ná nttahigo co jehe conchienne ngain nnta, pero xonhi ttochjoin vittja ngain nnta, jehó qué nnta chonda nnta. Cottimeja Jesús ndačo ngain nnta:

—¡Xonhi tiempo jaha rrocjan sinchecjian ttochjoin!

Co ngain rato mé ndaxema nttahigo mé. ²⁰ Are chojni que vacao Jesús vicon na yá, vinttegoan na admirado, co joanchiangui na ngain Jesús co ndačo na:

—¿Quexén ndaxemanxin nttahigo yá anto daca?

²¹ Jesús ndačo ngain na:

—Atto seguro tti rrindattjo ra que si seguro ditticaon ra co xaxaonha ra que ixin choha tsonhe, jeoha sinchehe ra jiji, tti janha jointtaha ngain nttahigo yá, sino que jaha ra nchao rrondache ra jna jiha: “Sattjixin de yá co digaritsiahngui ndachaon”, co jamé tsonhe. ²² Co cain tti sanchia ra ngain Dios, co si ditticaon ra que sayehe ra, ján sayehe ra.

Tti joachaxin que chonda Jesús

(Mr. 11.27-33; Lc. 20.1-8)

²³ Cottimeja Jesús joixinhi ngaxinhi tti nihngo icha importante, co are jehe jindache cain chojni nttiha de ixin Dios, conchienne ngain jehe

canxion xidána que vaquetonha ngain cain icha xidána conixin icanxin xittetonha ngain nihngo mé, co vinttejangchiangui xa ngain Jesús co ndačo xa:

—¿Quehe joachaxin chonda jaha para nchehe cain cosa jiji? ¿Quensen chjá joachaxin jiji?

²⁴ Jesús ndačo ngain xa:

—Janha cai sanchianguiha ra ná cosa jaha ra, co si jaha ra rrondachjenji ni ra tti janha sanchianguiha ra, cottimeja janha rronhattjo ra quexehe joachaxin nttaxin janha cain cosa jiji. ²⁵ ¿Quensen rroanha Juan para joincheguitte chojni? ¿A Dios, o ani chojni?

Cottimeja coexinhi xa joanchianguihi chó xa co ndačo xa:

—Si rrondačo na que Dios tti rroanha Juan, xí jiji nchao rronhattjo na xa: “¿Quedonda vitticaonha ra remé?” ²⁶ Co si rrondačo na que chojni tti rroanha Juan, pero ján na xagoen na chojni ixin cainxin chojni ditticaon na que Juan vanichja joajna que vagayé de ngain Dios.

²⁷ Co mexinxin vinttendačoxin xa ngain Jesús:

—Nonaha na.

Cottimeja Jesús ndačo ngain xa:

—Mexinxin ni janha rronhattjoha ra cai quexehe joachaxin nttaxin janha cain cosa jiji.

Ejemploe tti yó xanxí

²⁸ Jesús ndačo ngain xa:

—¿Quexén xaxaon ra de ixin ejemplo jiji? Ná xí vechonda xa yó xenhe xa xanxí, co ndache xa xansaho: “Ttji jai dinchehe xa ngain nttauva.”

²⁹ Co jehe xan ndačo xan: “Rinaoha tsji.” Pero después xaxaon xan oje co ján, cjoí xan joinchehe xan xa. ³⁰ Cottimeja tti xí mé joitsjehe xanyoxin co ndačo xa xajeho ngain xan mé, co xan mé ndačo xan: “Ján tsji.” Pero jehe xan cjoíha xan. ³¹ ¿Quexehe de cayoi xan joinchehe xan inchin joinao ndodé xan?

Jehe xa vinttendačo xa:

—Xansaho.

Cottimeja Jesús ndačo ngain xa:

—Atto seguro tti rrindattjo ra, que cain xicobrador de impuesto, co cain nchí que vanchecji cuerpoe ngain icha xí, nimé ni icha saho rrochonda parte ngain tti ttetonha Dios que jaha ra. ³² Ixin Juan, tti vancheguitte chojni, jehe joí para joindattjo ra quexén chonda ra que sintte ra ngain vidá ra, co jaha ra vitticaonha ra tti ndačo jehe Juan. Pero xicobrador de impuesto co nchí que vanchecji cuerpoe ngain icha xí, cain nimé vitticaon na tti ndačo Juan. Pero jaha ra masqui vicon ra jamé, coentoxinha ra vidá ra para rroguitticaon ra tti ndačo Juan.

Ejemploe ninchehe xa jianha

(Mr. 12.1-12; Lc. 20.9-19)

³³ Ttinhí ra iná ejemplo jiji: Ná tti vechonda jie jngui ngoixin jngui cjoenga nttauva co ngoixin jngui coendanji cerco, co joinchechjian ná tanque tti vagueninxin na ttouva, co joinchechjian ná torre para siconxin tti senda ngoixin jngui de nttattochjoin mé.

’Cottimeja tti xí mé joanjo xa nttattochjoin media ngain canxion tti nchehe xa co jehe xa sacjoi xa cjin. ³⁴ Co are ojoí tiempo de cosecha, jehe xí mé rroanha xa canxion ninchehe xé xa ngain tti nicoá nttattochjoin media para joiganchia na tti parte de cosecha que jiquininxin sayé

xinajni mé. ³⁵ Pero jehe tti nicoá nttattochjoin media tse na jehe tti ninchehe xé xinajni mé; ná coaxin na nttá, ná nagoenxon na, co iná coaxin na xo. ³⁶ Jehe xinajni mé cjan rroanha icha tsje ninchehe xé iná para joiganchia na tti parte de cosecha que jiquininxin sayé xinajni. Pero jehe tti nicoá nttattochjoin mé media, cjoaya na iná, co joinchehe na xajeho inchin joinchehe na ngain tti nicjoi icha saho.

³⁷ 'Ultimo jehe xinajni mé rroanha xenhe xanxí, ixin jehe xaxaon: “Chonda na que sicao na respeto ngain xanhna.” ³⁸ Pero are vicon tti nicoá nttattochjoin media que joiiji xenhe jehe xinajni, jehe na ndache chó na: “Jihi tti sayé ngoi nontte jihi de nttattochjoin. Nasoenxon na jehe para que ján na sittoá na ngoixin jngui de nttattochjoin.” ³⁹ Co jamé joinchehe na; tse na xan, joantsjegaxin na xan de ngain nttattochjoin mé co nagoenxon na xan.

⁴⁰ Cottimeja Jesús joanchiangui ngain xa co ndaço:

—Are tsí tti jnguihi mé, ¿quehe sinchehe ngain tti nicoá nttattochjoin mé media?

⁴¹ Jehe xa vinttendaço xa:

—Jehe xinajni mé sincheniha xa para nasoenxon xa cain tti nchehe xa jianha que coá nttattochjoin media co jehe sanjo nttattochjoin media ngain oje chojni, que sanjo na ngain jian tiempo tti parte de cosecha que jiquininxin sayé xinajni.

⁴² Cottimeja Jesús ndaço ngain xa:

—¿Axonhi tiempo tsjehe ra jaha ra tti jitaxin Palabré Dios? Ndaço janhi:

Tti xo que joinchegondaha xittette nchia, pero xo mé tti xo joiguehe esquiné nchia.

Co jihi joinchehe Dios,

co para ixin ján na cosa jihi anto çhjoin.

⁴³ Mexinxin janha ndattjo ra que jaha ra sachjaha ra parte ngain tti tteonha Dios, co sayé tti chojni que sinchehe inchin jiquininxin ngain tti tteonha Dios. ⁴⁴ Co para tti xo que rrindattjo ra, quexeho chojni que tsonttenguixin xo jihi, tsonchjian pedazo cuerpoe na. Co si xo jihi setsinga xo ngataha quexeho chojni, rrocjan cuerpoe chojni mé polvo.

⁴⁵ Are cain xidána que vaquetonha ngain icha xidána co cain xifariseo vinttequinhi xa cain ejemplo que ndaço Jesús, coinxin xa que ixin jinichja de ixin jehe xa. ⁴⁶ Mexinxin joinao xa are mé rrotse xa Jesús, pero xa joincheha xa ixin xagoen xa chojni que te ntilha ixin cain chojni vaguitticaon na que Jesús vanichja palabré Dios.

22

Ejemploe tti quiai are tottehe na

¹ Jesús coexinhi ndaço iná ngain na de ixin ejemplo, co ndaço:

² —Tti tteonha Dios ngajni, mé inchin joinchehe ná rey que coín ná vandango are cottehe xitsihi. ³ Jehe rey mé coetonhe cain xinchehe xé para joindache xa cain chojni que ovintteinvitado para sijine na ngain vandango mé, pero cain chojni mé çhoaha na cjoí na. ⁴ Jehe rey mé cjan rroanha icha ninchehe xé, co ndaço ngain na: “Ndache ra cain chojni que ote invitado que otsí na sine na ixin onchao jí comida. Ndache ra na ixin janha ocoetonha para venhe coxintahna co cain coxigo que janha jointtanttao, co cainxin onchao jí. Ndache ra na que tsí na ngain

vandango jiji.” ⁵ Pero cain tti chojni que ovintte invitado čhoha na cjoï na. Ná de jehe na sacjoi na ngataon jnguihi na, co iná na ngain negocioe na, ⁶ co icanxin na tse na jehe ninchehe xé rey mé, co feo joinchehe na ngain na hasta nagoenxon na na. ⁷ Cottimeja rey mé anto coñao, co rroanha cain xisoldadoe para nagoenxon xa cain jehe tti chojni que cjoaya co cjoaga xa rajné na. ⁸ Cottimeja ndačho rey mé ngain ninchehe xé: “Vandango onchao jí, pero cain chojni que jointtainvitá rrojine na tequininxinha na para rroquí na. ⁹ Jai ttji ngain cain nttiha yeye co ndache ra cain chojni que setan ra que tsí na sine na.” ¹⁰ Cain ninchehe xé rey mé vačhe na ngain cain nttiha, co joatse na cain chojni que vetan na, tti jian co tti jianha; co jamé hasta caon nchia mé de chojni.

¹¹ Cottimeja jehe rey mé joixinhi para joitsjehe cain chojni que tejjine, co jehe vicon nttiha ná xí, pero diguitoxinha xa inchin ná chojni que ttji ngain ná vandango. ¹² Jehe rey ndačho ngain tti xí mé: “Amigo, ¿quedonda joixinxin jaha nttihi que ditoxinha para ngain vandango jiji?” Pero jehe tti mé tencoa. ¹³ Cottimeja rey mé ndačho ngain tti nitedayá láto ngain mesa: “Ttia ra xí yá de rotté xa co de rá xa co diganca ra xa ndoja ngain tti naxin xehe tti rrotsjanga xa co sinetaon neno xa.” ¹⁴ Ixin janha nichjá anto tsje chojni, pero cainxinha na rinao na na janha.

Tti rroxenga hna ngain impuesto

(Mr. 12.13-17; Lc. 20.20-26)

¹⁵ Cottimeja xifariseo savinttecci xa, co vinttecjao chó xa quexén sinchehe xa para sinchenichja xa Jesús ná cosa nchaoha para mé tsjanguixin xa Jesús. ¹⁶ Mexinxin rroanha xa canxion chojni xa, conixin canxion chojni Herodes para joindačho na ngain Jesús:

—Maestro, janha na nona na que soixin ndačho tti ndoa, co soixin ndoa nchecoenhe chojni de ixin Dios, co ncheha caso tti nichja icha chojni ixin soixin ncheha juzgado chojni rico ojé que chojni noa. ¹⁷ Ndachjenji ni ra: ¿Anchao jí tsjenga na hna impuesto ngain xiemperador, o ani nahi?

¹⁸ Pero Jesús oconohe de tti jianha que jehe xa teřaxaon xa de ixin jehe, co jehe ndačho ngain xa:

—Jaha ra řo ncheha ra tti ndačho ra! ¿Quedonda rinao ra sincheyana ra? ¹⁹ Tjagohna ra ná tomi que ttjengaxin ra hna impuesto.

Co jehe na cjoagoe na Jesús ná tomi de plata que vanchegonda chojni tiempo mé. ²⁰ Are vicon Jesús tomi mé joanchiangui ngain na co ndačho:

—¿Quensen con jinganito jiji, co quensen nombré jitaxin jiji?

²¹ Jehe xa vinttendačho xa:

—Con xiemperador co nombré xa.

Cottimeja Jesús ndačho ngain xa:

—Chjehe ra xiemperador tti jiquininxin xa co danjo ra ngain Dios tti jiquininxin sayé jehe.

²² Are vinttequinhi xa jiji, jehe xa vinttegoan xa admirado; co nttiha cointtohe xa Jesús co jehe xa savinttecci xa.

Canxion chojni joanchiangui quexén tti rroxechon ni

(Mr. 12.18-27; Lc. 20.27-40)

²³ Ngain nchanho mé canxion xisaduceo cjoï xa para joitsjehe xa Jesús. Xisaduceo vaguitticaon xa que chojni que ndadenhe irroxechonha na; mexinxin joanchiangui xa ngain Jesús co ndačho xa:

²⁴ —Maestro, ley que vayé Moisés jitaxin que si ná xí que jicao xa čihi xa ndasenne xa co xonhi chjan tsinttohe xa, chonda que ná xanchó xa xanxi secao nchiganha mé co rrochonda na chjan para que chjan mé sehe xan inchin xenne tti ndavenhe. ²⁵ Nttili ngayehna janha na vintte yáto xanxi, cain xanchó xan. Xansaho vecao xan čihi xan pero ndavenhe xan, co ixin xonhi chjan cointtohe xan, nchiganha mé vecao ncha xanchó tti ndavenhe, xanyoxin. ²⁶ Xajeho jamé conhe ngain xanyoxin cai, co después vecao ncha xanninxin, pero xajeho jamé conhe, co hasta vecao ncha tti xanyatoxin co xonhi chjan joichonda ncha. ²⁷ Co después de cain mé, cai jehe ncha ndavenhe ncha. ²⁸ Mexinxin ndachjenji ni ra, are rroxechon cain ni yá, ¿quexehe de tti yáto xanchó mé sehe mero xixihi jehe nchi mé ixin cain xan vinttecao xan xajeho nchi mé?

²⁹ Jesús ndacho:

—Jaha ra noaha ra quehe tendacho ra ixin noaha ra tti jitaxin ngain Palabré Dios, ni noaha ra tti joachaxin que chonda Dios. ³⁰ Ixin cain chojni que ondavenhe, are rroxechon na, isinttecaoha chó na de xí co ni de nchi, ixin are mé sintte na inchin cain ángel de Dios que te ngajni. ³¹ Pero de tti jaha ra danchianguina ra de ixin tti chojni que ndadenhe, ¿atsjeha jaha ra tti jindattjo ra Dios mismo? Jehe dindacho janhi: ³² “Janha tti Dios de Abraham co Isaac co Jacob.” Dios jeha Dios de tti nindadiguenhe, sino que Dios de chojni que techon.

³³ Cain chojni que te nttiha, are vinttequinhi na yá, cain na vinttegoan na admirado de ixin tti nichja Jesús.

Tti icha importante que ttetonha Dios

(Mr. 12.28-34)

³⁴ Are xifariseo conohe xa que Jesús ndajoinchetenco xisaduceo, jehe xifariseo xatte xa ngain Jesús. ³⁵ Co ná de jehe xa que vehe xa maestroe ley Israel joinao xa rrojinchenichja xa Jesús ná cosa nchaoha; mexinxin joanchiangui xa ngain Jesús co ndacho xa:

³⁶ —Maestro, ¿quexehe tti icha importante que ttetonha Dios sinchehe ni?

³⁷ Jesús ndacho:

—“Rinao Dios, ngain ansean, conixin ngain almá, conixin ngain joar-rixaoan.” ³⁸ Jihi tti icha importante, co tti saho que ttetonha Dios sinchehe ni. ³⁹ Co tti yoxin chiaon xajeho ixin ndacho: “Rinao cain chojni inchin rinao cuerpoa.” ⁴⁰ Jehe cayoi cosa yá tti icha importante de ngain ley que vayé Moisés co de cain tti ndacho cain profeté Dios.

Tti dindacho David de ixin Jesucristo

(Mr. 12.35-37; Lc. 20.41-44)

⁴¹ Are cain xifariseo xa tate xa nttiha, ⁴² Jesús joanchiangui ngain xa co ndacho:

—¿Quehe xaxaon ra de ixin Cristo? ¿Quensen mé?

Jehe xa vinttendacho xa:

—Mé tsixin de ngain razé rey David.

⁴³ Cottimeja ndacho Jesús:

—Mexinxin ¿quedonda Espiritu Santo joinchenichja David, co David joincheguinhi Cristo, soixin? Ixin David dindacho:

⁴⁴ Tti Ttetonha cainxin cosa ndacho ngain tti Ttetonna janha: “Darihi ngain lado jian na

hasta que janha sinttagacha jaha de ngain cain tti ningaonha.”

⁴⁵ Mexinxin, ¿queñen que Cristo jehe ná xanntí David si jehe David mismo ndaço que Cristo tti ttetonha ngain jehe?

⁴⁶ Co ni ná xa iñonhi ndaço xa ngain Jesús, co desde ngain nchanho mé ni ná xa iñonhi joanchianguihi xa Jesús.

23

Jesús joinchesattehe xifariseo co ximaestroe ley

(Mr. 12.38-40; Lc. 11.37-54; 20.45-47)

¹ Cottimeja Jesús ndaço ngain cain chojni que te nttiha co ngain chojni que vacao:

²—Cain ximaestroe ley Israel co cain xifariseo chonda xa joachaxin de nchecoenhe xa chojni cain tti coetonha ley que vayé Moisés. ³ Mexinxin jaha ra ditticaon ra co nchehe ra cain tti rrondattjo ra xa, pero ncheha ra inchin jehe xa tenchehe xa ixin jehe xa dinttendaço xa ná cosa co dinttenchehe xa oje. ⁴ Ndache xa chojni que sinchehe na tti anto tangui que jehe xa ttetonha xa, que ni jehe xa çhoha ni rinaoha xa nchehe xa cain mé. ⁵ Jehe xa nchehe xa cosa jian pero jeho para que icha chojni dicon, co para çaxaon na que jehe xa anto jian xa. Co jehe xa ttianito xa nttattjen xa co rá xa cajachjan de roa tti jingá rioho çón que jitaxin canxion parte de Palabré Dios, co dinttengá xa lontto icha jinjini que icha chojni. ⁶ Co anto ncheçoxinhi xa ttji xa ngain vandango co dintte xa ngain tti lugar icha importante. Co are dintteçji xa ngain nihngo dintte xa ngain nttaxintaon icha importante. ⁷ Co are rridintte xa ngain nttiha, rinao xa que chojni sanjo na joajna ngain xa conixin anto tsje respeto, co sincheguinhi na xa maestro.

⁸ Pero jaha ra dittoaxinha ra que chojni sinttaguinhi ra na maestro, ixin cain jaha ra inchin chó ra cainxin ra co chonda ra jeho nacoaxinxon Maestro, que mé Cristo. ⁹ Co nttihi ngataha nontte ni ná chojni ncheguinha ra padre, ixin chonda ra jeho nacoaxinxon Ndodá ra que ttjen ngajni. ¹⁰ Ni dittoaxinha ra que chojni rrondattjo ra na ixin jaha ra anto importante ra ixin Cristo jeho mé tti icha importante para ixin jaha ra. ¹¹ Tti chojni que ttjenguijna icha chojni, mé tti icha importante de cain jaha ra. ¹² Ixin tti chojni que tonohé ixin jehe tti anto importante, mé settoxin nttajochjhi nganji ra co tti chojni que jai tonohé que jehe jeha importante, chojni mé tti sehe icha importante.

¹³ ¡Pobre de jaha ra, ximaestroe ley co jaha ra chojni fariseo, ço ncheha ra tti ndaço ra! Ixin jaha ra tecayacoenhe ra chojni para que jehe na çhoha rrochonda na parte ngain tti ttetonha Dios que ttjen ngajni. Ni jaha ra mismo rinaoha ra rrochonda ra parte ngain tti ttetonha Dios, ni tançhjangaha ra icha chojni para rrochonda na parte nttiha.

¹⁴ ¡Pobre de jaha ra, ximaestroe ley co jaha ra chojni fariseo, ço ncheha ra tti ndaço ra! Ixin jaha ra dantsjehe ra nchiandoha nçhiganha ixin ittixinha nça ttjenga nça hna contribución, cottimeja para que çonhi chojni rroçaxaon tti jaha ra tenchehe ra, anto sé nchecoanxinhi ra Dios. Mexinxin jaha ra sayehe ra icha jie castigo que icha chojni.

¹⁵ ¡Pobre de jaha ra ximaestroe ley co jaha ra chojni fariseo, ço ncheha ra tti ndaço ra! Ixin jaha ra anto ttingaria ra para que ttje ra chojni que sitticaon çajeho inchin jaha ra co are odinçhi ra chojni mé, masqui jeho

nacoa, jaha ra nchenchehe ra chojni mé cosa que jiquininxinha para que jehe icha jiquininxin tsji ngain infierno que jaha ra mismo.

¹⁶ ¡Pobre de jaha ra, xo tenchecanttjen ra icha chojni que noeha. Ixin ndačo ra que are ná chojni ndačo sinchehe ná cosa, co sinchejurá de ixin ningoe Dios, juramento mé xonhi xé; pero si sinchejurá de ixin tti oro que jixinhi nihngo, juramento mé nchoe jian. ¹⁷ ¡Jaha ra tonto ra co chejo ra! ¿Quexehe tti icha importante, aoro o nihngo que jinchejian oro mé? ¹⁸ Co cai ndačo ra que are ná chojni ndačo sinchehe ná cosa, co sinchejurá de ixin altar que jixinhi nihngo, juramento mé xonhi xé; pero si sinchejurá de ixin cain tti jí ngataha altar, juramento mé ján jian. ¹⁹ ¡Jaha ra tonto ra co chejo ra! ¿Quexehe tti icha importante, a tti jí ngataha altar o jehe altar que jinchejian cain cosa mé? ²⁰ Ixin tti chojni que nchejurá de ixin altar, chojni mé jinchejuraha de ixin jeho altar, sino que de ixin cain cosa que jí ngataha. ²¹ Co tti chojni que nchejurá de ixin nihngo, chojni mé jinchejuraha de ixin jeho nihngo, sino que cai de ixin Dios que jí ngaxinhi nttiha. ²² Cai tti chojni que nchejurá de ixin ngajni, chojni mé cai jinchejurá de ixin tti jitaha Dios co cai de ixin jehe Dios mismo, ixin jehe tti jí nttiha.

²³ ¡Pobre de jaha ra ximaestroey ley co jaha ra chojni fariseo, xo ncheha ra tti ndačo ra! Jaha ra danjo ra para ixin Dios tti ttxin parte de ca inchin cañanchoni, co de anís, co de comino, pero ncheha ra tti icha importante de cain tti coetonha Dios, inchin de tti sinchehe ra jian ngain vidá ra, co tti tsiaconoehe ra icha chojni, co tti sitticaon ra jian de ixin Dios. Cain yá tti chonda ra que sinchehe ra cain nchanho, co cai nchehe ra sigue danjo ra tti ttxin parte de ca mé. ²⁴ ¡Jaha ra tenchecanttjen ra icha chojni que noeha! ¡Jaha ra nchecanguihi ra ná coxisenchjan de ngain vasoa ra pero dinga ra nchejio ná cocamello!

²⁵ ¡Pobre de jaha ra ximaestroey ley co jaha ra chojni fariseo, xo ncheha ra tti ndačo ra! Jaha ra inchin vaso co láto que chojni ncheroa de ngama, pero de ngaxinhi ansean ra anto ttoaha ra ixin xa teca ra de cain cosa que diquehe ra co de puro rinao ra que jaho ra rrochonda ra cainxin cosa. ²⁶ Jaha ra xo fariseo chejo. Saho ncheroa ra ansean ra co jamé cai tsoroa ngama ra, inchin nchehe ra ngain vaso co láto.

²⁷ ¡Pobre de jaha ra, ximaestroey ley co jaha ra chojni fariseo, xo ncheha ra tti ndačo ra! Ixin jaha ra inchin cueva tti texinhi cuerpoe chojni que ndadiguenhe ixin cueva mé chjoin te ixin diguingaxin nttésó ndojaxin, pero ngaxinxin tecaon de loroe chojni co cain cosa que ttoaha. ²⁸ Jamé te ra jaha ra; de ndojaxin xago ra ixin jian ra ngain chojni, pero de ngaxinhi ansean ra tecaon ra de cosa jianha.

²⁹ ¡Pobre de jaha ra ximaestroey ley co jaha ra chojni fariseo, xo ncheha ra tti ndačo ra! Ixin jaha ra nchechjian ra monumento anto chjoin ngataha tti teřavá cuerpoe cain profeta que ndavenhe are saho co nchetsonji ra monumentoe cain tti chojni que cjoí jian. ³⁰ Cottimeja ndačo ra: “Si janha na rroguinttechon na ngain tti tiempo que vinttechon nindogoelitoa na xančhen, janha na rrocjenguijnaha na na para narrogoenxon na cain profeta que goen jehe na.” ³¹ Conixin yá jaha ra mismo datsoan ra que jaha ra xanntí tti chojni que nagoenxon cain profeta que venhe. ³² ¡Janché jaha ra nchejexin ra tti coexinxin joinchehe nindogoelitoa ra xančhen!

³³‘Jaha ra te ra inchin conché, co inchin razé conché ra! Jaha ra chonda ra que tsji ra ngain infierno. ³⁴ Mexinxin janha rrorroanha profeta nganji ra, co xí que Espíritu Santo joinchenohe, co xí que sinttacoanha ra de ixin Dios. Pero jaha ra nasoenxon ra na co sinchecrucificá ra canxion na co icanxin na rroʒanguihi ra na nttá o tton ngaxinhi nihngo, co rrorroehe ra na de rajna co rajna ngoi tti jehe na sacji na para feo sinchehe ra ngain na. ³⁵ Mexinxin jaha ra tti teca ra vidé cainxin chojni jian que vintteguenhe, desde Abel, tti cjoí xí jian para ngain Dios, hasta Zacarías, xenhe Berequías tti nindogoelítoa ra nagoenxon na ngain lugar entre nihngo co altar. ³⁶ Atto seguro tti janha rrindattjo ra, que cain chojni judío que techon jai, nijihi, niteca cain yá.

Jesús tsjanga por ixin Jerusalén
(Lc. 13.34-35)

³⁷ Cottimeja ndačo Jesús iná:

—¡Chojni de Jerusalén, jaha ra que nadoenxon ra profeté Dios co ʒanguihi ra ʒo tti chojni que ttiaho joajna que Dios rroanha nganji ra; anto tsje nttiha janha joinaho rrogatse ra inchin ná cochia datse va xenhe va nganguihi nenehe va, pero jaha ra joinaoha ra! ³⁸ Tsjenxin ra; nchiandoi ra ndasittohe nchia jeho nchia, ³⁹ ixin janha rrindattjo ra que irrocjanha ra sicon ni ra janha hasta que tsija tti tiempo que jaha ra rrondačo ra: “Anto jian tti joí de ngain nombré Dios.”

24

Jesús ndačo que nihngo icha importante rroxantte
(Mr. 13.1-2; Lc. 21.5-6)

¹ Jesús vačhjexin de nihngo icha importante co sajittji are chojni que vacao conchienne na ngain co ndačo na ixin rrotsjehe Jesús ngoixin nihngo mé. ² Pero Jesús ndačo ngain na:

—¿Adicon jaha ra cain yá? Atto seguro tti rrindattjo ra que yá sittoeha ni ná ʒo ngataha iná ʒo; cainxin rroxantte.

Quehe tsonhe icha saho que mundo ndatsjexin
(Mr. 13.3-23; Lc. 21.7-24; 17.22-24)

³ Cottimeja savinttecji na ngain tti jnanchjan que dinhi Nttaolivo, co are Jesús tavehe nttiha, chojni que vacao conchienne na co joindačo na ngain jimaio:

—Rinaho na que rrondachjenji ni ra quesa tsonhe yá, ¿Quehe señal rroʒago are soixin rrocjan sihi iná, co are ondatsjexin mundo jihi?

⁴ Cottimeja Jesús ndačo ngain na:

—Ttjiho ra cuidado que ʒonhi chojni sinttayaha ra. ⁵ Ixin atto tsje chojni tsí co sinchegonda na nombrena rrondačo na: “Janha tti Cristo na”; co sincheyehe na tsje chojni. ⁶ Jaha ra tsinhi ra que sehe guerra nttihi co ngain icha lugar, pero ʒaonha ra ixin jamé chonda que tsonhe; pero ʒa jeha tti nchanho que ndatsjexin mundo. ⁷ Ixin ná nación tsetocaho iná nación, co ná región tsetocaho iná región. Co ngain tsje parte de nontte sehe jintta, co chin, co tsingui nontte. ⁸ Cain yá nandá tsexinxin tsonhe tti anto tangui que tsonhe chojni.

⁹ Cottimeja sinttachienne ra na jaha ra ngain chojni que ningaconha ra para feo sinchehe na nganji ra, co nasoenxon na jaha ra, co ngoixin mundo rroningaonha ra chojni ixin ditticaon ni ra janha. ¹⁰ Ngain

tiempo mé tsje chojni isincheha na sigue sitticaon na nganji na janha co rroningaconhe chó na co jeha na sinchechienhe chó na ngain tti ningaonna janha. ¹¹ Are mé tsononxin tsje tti rronichja cosa ndoaha, co jehe na rrondačo na que jehe na tenichja na joajné Dios, co sincheyehe na tsje chojni. ¹² Co anto tsje cosa jianha sehe, que hasta tsje chojni isinaoha chó na. ¹³ Pero tti chojni que sinchehe sigue sitticaon na janha hasta ndasenhe, chojni mé rrochonda iná vida naroaxin. ¹⁴ Co tti jian joajna de que^{xén} ttetonha Dios, jiji tsonohe chojni ngoixin mundo para que chojni ngain cainxin nación tsonohe na tti jian joajna jiji. Are tsjexin cain yá, cottimeja ndasitján mundo jiji.

¹⁵ Profeta Daniel diquentaxin de ixin tti cosa que icha jianha de cainxin cosa. Co are jaha ra sicon ra que cosa mé siguehe ngain tti lugar santo de ngain nihngo icha importante, (tti tsjehe xón jiji chonda que tsinxin), ¹⁶ cottimeja tti chojni que te Judea rrochonda na que satsinga na ngagaha jna. ¹⁷ Co tti sintte ngataha techoe nchiandoha, are jehe sania, rrochjeha tiempo para sicao cosé de ngaxinhi nchia ixin anto daca satsinga. ¹⁸ Co tti sintte ngataon jngui, chondaha que rrocjan ni para sirroé lonttoe ngain nchiandoha. ¹⁹ ¡Pobre de cain nchí que sintteyá chjan co cain nchí que rrochonda chjan que tetai ngain nchanho mé! ²⁰ Nchetsenhe ra ñao Dios que jaha ra rrochondaha ra que satsinga ra mero ngain tiempoe quin, ni ngain tti nchanho que nchejogaha ni, ²¹ ixin are mé anto tangui tsonhe, que xa xonhi tiempo tonhe jamé ni desde are coexinhi vehe nontte jiji, ni tsonhe después. ²² Co si Dios rrojinchenchinha tiempo mé, xonhi chojni rroxeha, pero Dios sinchenchín tiempo mé ixin jehe anto rinao cain tti chojni que jehe coinchiehe.

²³ Si are mé chonja chojni rronhattjo ra: “Nttihi jí Cristo”, o “Nojiha jí”, jaha ra ditticaonha ra. ²⁴ Ixin are mé tsí tsje chojni que sincheyehe tsje chojni ixin rrondačo na que jehe na ni Cristo co tsí chojni que rrondačo ixin jehe na dayé na joajné Dios. Co sinchehe na tsje señal co milagro para sincheyexin na tsje chojni, co si nchao hasta tti chojni que Dios mismo coinchiehe sincheyehe na. ²⁵ Janha ondattjo ra cain yá desde jaxon. ²⁶ Mexinxin si rronhattjo ra na: “Cristo cjan joí co jehe jí ngagaha jna tti xonhi chojni jí”, jaha ra ttijha ra ditsjehe ra nttiha, o si rronhattjo ra na: “Cristo nttihi jí ngaxinhi ná cuarto”, jaha ra ditticaonha ra. ²⁷ Ixin janha, tti Xí que joixin de ngajni, are sihi iná, janha tsononxin na inchin are tonguixin anto daca dattoa xohi ngajni desde tti chinxin nchanho hasta tti diataonxin nchanho. ²⁸ Co tti sarihi janha, nttiha rroxatte cain chojnina.

Que^{xén} tsí tti Xí que joixin de ngajni

(Mr. 13.24-37; Lc. 21.25-33; 17.26-30, 34-36)

²⁹ Nttihi tsjexin satto cain tti nchanho que anto tangui mé, cottimeja nchanho isinchengasanha nchaon, co conittjao co conotse sinttjixin va de ngajni, co hasta cainxin cosa que jí ngajni, rroxanga. ³⁰ Cottimeja sicononxin ngajni señal de janha, tti Xí que joixin de ngajni, co ngain cainxin rajna de ngoixin mundo rrotsjanga chojni, co sicon na na janha, tti Xí que joixin de ngajni, sihi are mé ngacjan ttjoi de ngajni conixin anto tsje joachaxin co gloria. ³¹ Co janha rrorroanha cain angelna para que are tsoyao trompeta, jehe satse cainxin chojni que janha coinchíá de cainxin parte de ngoixin mundo.

³² 'Tangui ra ejemploe nttahigo: Are xesan ramé ntta co čhinhí que ntta, jaha ra onoha ra que ojoiconchian tiempoe čhin. ³³ Ķajeho jamé cai, are jaha ra sicon ra que cain cosa yá tsexinhí tsonhe, jaha ra onoha ra que janha ochiaon rrocjan na sihi iná. ³⁴ Atto seguro tti rrindattjo ra que cain yá tsonhe icha saho que generación jihi sitján. ³⁵ Ngajni co nontte ndasitján, pero tti janha ndačhjan sitjanha ixin chonda que tsonhe cain tti ndačhjan.

³⁶ 'Pero nchanho co hora que tsonhe mé, ni ná chojni noeha, ni cain ángel que te ngajni, ni janha tti Xenhe Dios nonaha. Jeho Dios Ndodá na tti nohe quesá co quehe hora.

³⁷ 'Jańá inchin conhe ngain tiempoe Noé cai jamé tsonhe are sihi janha, tti Xí que joixin de ngajni. ³⁸ Ngain tiempo mé are icha saho que vitjanxin na jinda, cain chojni vanchehe sigue vanchehe na inchin costumbré na; vajine na co vaguihi na, vacottehe na co vaganjo na nčhichehe na para vacottehe nča. Jańá hasta ngain tti nchanho que Noé joixinhi para ngaxinhí tti arca que jehe joinchechjian. ³⁹ Co coinxinha na que ixin ndarroguítján mundo hasta que joí jinda co ndagoen cainxin na. Jamé tsonhe cai are sihi janha, tti Xí que joixin de ngajni. ⁴⁰ Ngain rato mé si yó xí tenchehe Ķa ngataon jngui, ná rrochonda iná vida naroxin co ná nahi. ⁴¹ Co si yó nčhí tedaho, ná nča sayá nča co iná nča nahi.

⁴² 'Jaha ra cain nchanho dintte ra listo ixin noaha ra quesá sihi janha tti chonda cain joachaxin. ⁴³ Pero ttettexin ñao ra jihi, que si xinajní ná nchia rroconohe Ķa quehe hora rroquí xichehe are ttie, xinajni rrogujoaha Ķa; jehe Ķa rroguenda Ķa nchiandoha Ķa para rrocánčhjánda Ķa xichehe rroguixinhi Ķa rroqué Ķa. ⁴⁴ Mexinxin jaha ra cai dintte ra listo ixin noaha ra quesá janha, tti Xí que joixin de ngajni, sihi iná.

Ná tti nchehe Ķa jian co ná tti nchehe Ķa jianha

(Lc. 12.41-48)

⁴⁵ 'Tti nchehe Ķa que ditticaon nchehe cain tti ditonhe co chonxin tti jian; xinajni chonda Ķa confianza ngain chojni mé para que jehe dittoehe icha ninchehe Ķé Ķa para danjo jine na hora que denhe na jinta. ⁴⁶ Anto čhjoin para ixin jehe tti nchehe Ķa si jehe jinchehe cain tti vitonhe are tsí xinajní. ⁴⁷ Atto seguro tti rrindattjo ra, que xinajní rrochjé Ķa joachaxin para que jehe senda cainxin cosa que jehe Ķa chonda Ķa. ⁴⁸ Pero si tti nchehe Ķa mé jianha, co rroĶaxaon que xinajní tsiha Ķa toin, ⁴⁹ co si jehe tsexinhí sinchesattehe icha ninchehe Ķé Ķa, co sehe sinecaho co sicaho cain tti dicoan, ⁵⁰ pero cottimeja xinajní tsí Ķa ngain ná nchanho que ni jehe rroĶaxaonha, co ngain ná hora que ni jehe noeha. ⁵¹ Co rrochjé Ķa ná castigo anto tangui, que Ķajeho inchin castigo que sayé cain chojni que ncheha na tti jehe na ndačo na. Cottimeja ntthi jehe rrotsjanga co sinetaon neno.

25

Ejemploe tti tte xannčhí

¹ Cai ndačo Jesús:

—Jihi ná ejemploe queĶén ttetonha Dios que ttjen ngajni. Mé inchin ná xanxí que tsothehe. Co tte xannčhí vinttecji xan ngain vandango mé co joicao xan lámpara de aceite para joichoexin xan xinovio ngatja ntthi. ² Naho de jehe xan lista xan co naho xan Ķaxaonha xan jian. ³ Tti xan Ķaxaonha jian joicaoha xan icha aceite para rroquequia xan

lamparé xan iná. ⁴ Co tti xan lista joicao xan icanxin xoxao de aciete aparte de lamparé xan. ⁵ Co ixin xinovio dacaha joí xa, cain xannčí mé tse xan cottačin co tavinttejoa xan. ⁶ Cottimeja inchin ngosine ttie, coinhi xan coyao ná tti ndačo: “¡Ojoí xinovio, dačhje ra dichoenxin ra xa ngatja nttiha!” ⁷ Cain xannčí mé vintteguingattjen xan, para vinttenchegacaon xan lamparé xan. ⁸ Cottimeja tti xan naho que xaxaonha jian vinttendačo xan ngain tti xan naho que vintte lista: “Chjana ni ra nchion aceite ixin lamparana na ndatedanga lampara.” ⁹ Pero tti xan naho que vintte lista vinttendačo xan: “Nahi, ixin sittjaha aceite para ixin janha na co jaha ra. Icha jian ttji ra tti tochji aceite, co nttiha ttehna ra aceite para ixin jaha ra.” ¹⁰ Pero are tti naho xannčí mé joiquehna xan aceite, xinovio ojoí xa. Co cain tti xannčí que tedacaon lamparé joixincaho xan xinovio ngaxinhi nchia tti jí vandango co coejé na puerta. ¹¹ Cottimeja vinttequí tti inaho xannčí co vinttendačo xan: “Nttatsanha ra ñao danttjena ni ra puerta.” ¹² Pero xinovio ndačo xa: “Chonxinha quensen jaha ra.”

¹³ Cottimeja Jesús ndačo:

—Dintte ra listo cain nchanho ixin noaha ra quesá ni quehe hora rocjan na sihi janha, tti Xí que joixin de ngajni.

Ejemploe tomi

¹⁴ Jihí iná ejemploe que xén ttetonha Dios que ttjen ngajni. Mé inchin na xinajni que sajittji para ngain iná nación. Pero icha saho que jehe xa sacjoi xa, vayé xa cain ninchehe xé xa co ndačo xa ngain na: “Nttihi cada ra tsinttoaha ra tomina.”

¹⁵ Ngain ná de jehe na joanjo xa inchin naho mil de tomi mé, co ngain iná na joanjo xa inchin yó mil, co ngain iná na inchin ná mil. Cada na vayé na tomi inchin jehe na nohe na nchenchehe na tomi xa. Cottimeja jehe xinajni mé sacjoi xa cjin. ¹⁶ Tti nchehe xa que vayé tti naho mil de tomi mé, jehe joinchegonda tomi mé co joacha iná naho mil. ¹⁷ Co jamé joinchehe tti vayé tti yó mil, co joacha iná yó mil. ¹⁸ Pero tti vayé ná mil, mé ngue co cjoavá tomí xinajní.

¹⁹ Vatto tsje tiempo, cottimeja cjan xinajní cain ninchehe xa mé para joitse xa cuenta ngain na. ²⁰ Saho conchiennehe tti vayé naho mil, co joanjo iná naho mil, co ndačo ngain xa: “Chjana naho mil, co nttihi dayehe iná naho mil que joacha janha.” ²¹ Xinajni mé ndačo xa ngain: “Atto nchao jí; jaha ná ninchehe xa atto jian co nchehe cain tti ditonha. Jaha ojoinchehe jian ngain tti tomi que chjaha masqui tsjeha, mexinxin jai rrochjaha icha tsje. xacoi dixinhi nchiania para rrochaha conixin janha.” ²² Cottimeja conchiennehe tti nchehe xa que vayé tti yó mil, co ndačo: “Chjana yó mil, co nttihi dayehe iná yó mil que joacha janha.” ²³ Xinajni ndačo xa ngain: “Atto nchao jí; jaha ná ninchehe xa atto jian, co nchehe cain tti ditonha. Jaha ojoinchehe jian ngain tti tomi que chjaha masqui tsjeha, mexinxin jai rrochjaha icha tsje. xacoi dixinhi nchiania para rrochaha conixin janha.” ²⁴ Pero are conchiennehe tti nchehe xa que vayé tti mil, ndačo ngain xinajni: “Janha nona que soixin anto soji ansean que dantsjehe chojni tti soixin danjoha co jamé tsinhi cosecha tti soixin ttengaha. ²⁵ Mexinxin janha xaon na nganji co joiquema tomia, joicjavá tomi. Pero nttihi dayehe tti tomia que chjana.” ²⁶ Xinajni ndačo xa: “Jaha ná ninchehe xa jianha, co atto saha. Si onoha que janha dantsjá chojni tti janha danjoha, co jamé janha tsinhi cosecha tti janha coengaha,

27 mexinxin icha jian si jaha rrojicán tomina ngain ná banco, co are janha rrocjan na rrojihu, rrogayá tomina conixin tti rrogacha tomi.” 28 Co ndačo xa ngain nite nttiha: “Dantsjehe ra xa tti mil que jichonda xa co danjo ra ngain tti jichonda tte mil. 29 Ixin tti chonda, sayé icha, co rrochonda hasta rroxehé. Co tti xonhi chonda, sačjehe hasta cain tti chonda masqui tsjeha chonda. 30 Co tti nchehe xa que xonhi xé jihi, dehngui ra ndoja tti naxin xehe, nttiha tti rrotsjanga jehe co sinetaon neno.”

Quexén soenhe juzgado cain nación

31 ‘Janha, tti Xí que joixin de ngajni, are janha sihi inchin ná Rey, conixin cain angelna, are mé sarihi ngain lugar de joachaxin. 32 Chojni de cainxin nación rroxatte na ngattoxon con, co janha santsjenda na cada na inchin tti ttingaria coleco dantsjenda coleco de ngayehe cottentso. 33 Janha tsín coleco lado jian na co cottentso lado cjon na. 34 Cottimeja janha, tti Rey na, rrondattjan tti chojni que te lado jian na: “Xacoi ra, jaha ra xo ojointtanchaon ra Ndodana, co dayehe ra tti lugar que jichjian para ixin jaha ra desde que are Ndodana joinchechjian Ndo nontte. 35 Ixin janha venhe na jintta, co jaha ra chjana ra tti joine; co venhe na jinda co jaha ra chjana ra tti vihi; janha vacji inchin chojni de ojé nontte co jaha ra chjana ra nchia tti janha joarihi. 36 Janha xonhi lonto joarichonda, co jaha ra chjana ra lonto que joaringaha; janha conina co jaha ra joasotsjena ra; janha viaxinna ngain cárcel, co jaha ra joasotsjena ra.” 37 Cottimeja tti chojni jian rrondačo na: “¿Quesa vicon na que soixin venhe jintta, co janha na ján chjaha ra tti jointte? ¿O quesá vicon na que soixin venhe jinda co janha na ján chjaha ra tti vihi? 38 ¿O quesá vicon na que soixin vacji inchin chojni de ojé nontte, co janha na ján chjaha ra nchia tti joarihi? ¿O quesá joarichondaha lonto co janha na ján chjaha ra lonto? 39 ¿O quesá vicon na janha na que soixin coniha o joarihi ngaxinhi cárcel co janha na ján joasotsjaha ra soixin?” 40 Co janha tti Rey na rrondačjan: “Atto seguro tti rrindattjo ra que cain tti jian que joinchehe ra ngain chojni tehe que ditticaon na, masqui chojni mé anto importanteha na, pero rročo ixin nganji na janha tti joinchehe ra mé.”

41 ‘Cottimeja janha tti Rey na rrondattjan tti chojni que te lado cjon na: “Sattjixin ra de nganji na janha, jaha ra chojni jianha. Sattji ra ngain infierno tti xonhi tiempo danga xohi, que mé conchjian para ixin inchínji conixin cain ángel de jehe. 42 Ixin janha venhe na jintta co jaha ra chjanaha ra tti joine; venhe na jinda co chjanaha ra tti vihi. 43 Janha vacji inchin chojni de ojé nontte, co jaha ra chjanaha ra nchia tti joarihi. Janha ivechondaha lonttona, co jaha ra chjanaha ra lonto. Janha conina, cottimeja viaxinna ngain cárcel, co jaha ra joasotsjenaha ra.” 44 Cottimeja jehe na rrondačo na: “¿Quesa vicon na que soixin venhe jintta o venhe jinda, o inchin chojni de ojé nontte, o quesá vicon na que soixin ijoarichondaha lontoa, o quesá que soixin coniha, o viaxinha ngain cárcel co janha na cjoenguijnaha ra soixin?” 45 Co janha tti Rey na rrondattjan na: “Atto seguro tti rrindattjo ra que cada nttiha que čoha ra cjoenguijna ra chojni tehe que ditticaon na janha masqui chojni mé anto importanteha na, ngain rato mé rročo ixin jaha ra cjoenguijnaha ni ra janha.” 46 Cottimeja cain chojni jihi satsji na ngain infierno tti xonhi tiempo danga xohi, co tti chojni jian satsji na tti rochonda na iná vidé na naroaxin que xonhi tiempo tsjexin.

26

QueXén Xaxaon na para tse na Jesús

(Mr. 14.1-2; Lc. 22.1-2; Jn. 11.45-53)

¹ Are Jesús joexin ndačo cain yá, jehe ndačo ngain chojni que vacao:

² —Inchin jaha ra onoha ra, nttihi yó nchanho tsí tti quiai dinhi pascua co janha, tti Xí que joixin de ngajni, jehe na rrondačo na para rrotse na na co sinchecrucificá na na.

³ Cai ngain Xajeho nchanho mé cain xidána que ttetonha ngain icha xidána co cain ximaestroe ley Israel co cain xittetonha ngain nihngo, cain chojni mé Xatte na ngain patioe palacioe Caifás, tti dána icha importante.

⁴ Nttiha cjoaxin na de ixin queXén sinchehe na para que sincheyehe na Jesús para rrotse na co nasoenxon na. ⁵ Pero vinttendačo na:

—Sonttoha na ngain mero nchanho de quiai para que tsoñaoha chojni.

Ná nChí cointtjitte aceite cuerpoe Jesús

(Mr. 14.3-9; Jn. 12.1-8)

⁶ Ngain tiempo mé Jesús vehe ngain rajna Betania ngain nchiandoha Simón tti vancheguini na Leproso. ⁷ Co nttiha, are tene na ngain mesa conchienne ná nChí que joicao ná Xoxao de joxon marmol hasta jiče de aceite que anto Xajni co anto rentte. Jehe nChá cointtjitte nChá aceite mé ngataha já Jesús. ⁸ Are chojni que vacao Jesús vicon na yá, coñao na co coexinhi na ndačo na:

—¿Quedonda coxinoa aceite yá? ⁹ Nchao rrocchji aceite yá conixin tsje tomi para rrocjenguijnaxin na chojni noa.

¹⁰ Jesús coinhi mé, co jehe ndačo ngain na:

—¿Quedonda jaña tečo ra ixin nChí jiji? Tti jehe nChá joinchehe nChá nganji na janha; jiji ná cosa jian. ¹¹ Ixin chojni noa cain tiempo sintte na ngayaha ra, pero janha cainxinha tiempo sarihi ngayaha ra. ¹² Tti joinchehe nChí jiji, are jehe nChá cointtjitte nChá aceite cuerpona, jehe nChá ocoinga na nChá yá para are rroxavá na. ¹³ Atto seguro tti janha rrindattjo ra que cain tti rrondačo na tti jian joajna jiji ngoixin mundo, cai rrondačo na tti joinchehe nChí jiji para rroxaxaonxin na nChá.

Judas ndačo para rrotse na Jesús

(Mr. 14.10-11; Lc. 22.3-6)

¹⁴ Cottimeja ná de tti tteyó chojni que vacao Jesús, mé vinhi Judas Iscariote, cjoí para joicjao canxion xidána que vaquetonha ngain icha xidána, ¹⁵ co ndačo ngain xa:

—¿Quejanhi tomi rrochjana ra si janha rrondattjo ra queXén sinchehe ra para rrotse ra Jesús?

Cottimeja jehe xa cjoenguehe xa hna treinta tomi de plata. ¹⁶ Co desde ngain rato mé Judas cjoé queXén sinchecchienhe Jesús ngá rá xidána mé.

Are joinecaho Jesús tti tteyó chojni que vacao

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Saho nchanho de tti quiai que jine na niottja que chondaha levadura, tti tteyó chojni que vacao Jesús conchienne na ngain jehe co joanchiangui na co ndačo na:

—¿Quettinó sinttachjianxin na tti sintte soixin para ngain quiai pascua?

¹⁸ Jesús ndačo ngain na:

—Ttji ra ngain Jerusalén ngain nchiandoha tti xí que jaha ra onoha ra co ndache ra que janha ndačhjan que ochian jóí tiempo para janha

ndasenne na co ngain nchiandoha jehe sinttasayaxin janha tti quiai pascua conixin chojnina que çhjinha.

¹⁹ Chojni mé vitticaon na joinchehe na inchin coetonha Jesús, co nttiha joinchechjiaxin na cain tti joine na ngain tti quiai pascua.

²⁰ Ngain ttie mé Jesús joincaho tti tteyó chojni que vacao. ²¹ Co are cain na tatene na, jehe ndaço ngain na:

—Atto seguro rrindattjo ra que ná de jaha ra rrondache chojni queçén para rrotse na na janha.

²² Cottimeja cain jehe na anto vinttechín na co coexinhi na, ná na co ná na joanchiangui na ngain Jesús co ndaço na:

—¿Apoco janha?

²³ Co Jesús ndaço ngain na:

—Ná tti rrinequinha janha ngain lato jiji, mé tti rrondache chojni queçén para rrotse na na. ²⁴ Ján ndoa janha, tti Xí que joixin de ngajni, senhe na inchin ndaço ngain tti jitaxin Palabré Dios, pero anto tanguí tsonhe tti rrondache chojni queçén para rrotse na na. Icha jian para ixin jehe si rroconcjiha.

²⁵ Cottimeja nichja Judas, tti ndache chojni queçén para rrotse na Jesús, co jehe ndaço ngain Jesús:

—Maestro, ¿apoco janha?

Jesús ndaço ngain:

—Ján, jaha.

²⁶ Are tejjene na, Jesús coá niottja co joanjo gracias ngain Dios, co váña nio. Cottimeja joanjo nio ngain chojni que vacao, co ndaço ngain na:

—Jintte ra, jiji rroço cuerpona janha.

²⁷ Cottimeja coá tti vaso de vino, co joanjo gracias ngain Dios. Cottimeja joanjo ngain na co ndaço:

—Dihí ra cainxin ra jaha ra vino jiji, ²⁸ ixin jiji tti rroço jnina janha que sinchese gurá tti trato naroaxin. Co jnina singo jni para rroxengaxin hna tti jianha que nchehe tsje chojni. ²⁹ Pero rrindattjo ra que janha irrocjanha na síhi vineo uva hasta tti nchanho que janha conixin jaha ra sonho na tti vino naroaxin ngain lugar tti ttetonha Ndodana ngajni.

Jesús ndaço que Pedro rrondaço ixin jehe chonxinha Jesús

(Mr. 14.26-31; Lc. 22.31-34; Jn. 13.36-38)

³⁰ Co vinttetsje na ná himno, cottimeja savinttecji na ngain jnanchjan que dinhi Ntaolivo. ³¹ Cottimeja Jesús ndaço ngain na:

—Janha tti cain jaha ra sinttechinhi ra de ixin janha ngain ttie jiji, ixin ndaço ngain tti jitaxin Palabré Dios: “Dios nasoenxon tti ttingaria coleco, co cain coleco rrochjequé va.” ³² Pero después que janha rroxechon na, janha saho tsji Galilea que jaha ra.

³³ Cottimeja Pedro ndaço ngain Jesús:

—Masqui cainxin na sinttechín na de ixin soixin, pero janha nahi.

³⁴ Cottimeja ndaço Jesús:

—Janha rrindattjo seguro que ngain ttie jiji, saho que rrotsje conttaxichia, jaha orrondaço ninxin nttiha que chonxinha na.

³⁵ Pedro ndaço:

—Masqui rrochonda que senxin na tti soixin senxin, pero rrondaçhjanha ixin chonxinha soixin.

Co cain ni icha ndaço na çajeho cai.

Are Jesús joichetsenhe ñao Dios ngain Getsemani

(Mr. 14.32-42; Lc. 22.39-46)

³⁶ Cottimeja Jesús conixin tti chojni que vacao joihi na ngain ná lugar dinhi Getsemani, co nttiha Jesús ndačo ngain na:

—Ntthi dintte ra co chonna ra ixin janha sinttatsán ñao Dios.

³⁷ Co Jesús sajoicao Pedro co cayoi xenhe Zebedeo, co jehe coexinhi conohe ná joachjaon anto soji ngain almé. ³⁸ Cottimeja jehe ndačo:

—Janha tonona ngain almana ná joachjaon anto soji que hasta rinaho ndasenhe na. Dittoha jaha ra ntthi nganji na janha, co dinttechinha ra.

³⁹ Cottimeja Jesús sacjoi nchion icha cjin co nttiha vecjantaha nontte, co joinchetsenhe ñao Dios, co ndačo:

—Padre, si nchao, tančhjandaha na que janha sattoha ngain tti anto tangui que tsonna; pero tsoenha inchin janha rinaho, sino que tsonhe inchin soixin rinao.

⁴⁰ Cottimeja cjan para ngain tti ní chojni que joicao, pero are jehe joihi nttiha, jehe na otatejoa na. Co jehe ndačo ngain Pedro:

—¿Acoixianha ra tavinttetsjehe ra ni ná hora para rroguinttenda ni ra? ⁴¹ Tadinttetsjehe ra co nchetsenhe ra ñao Dios, para que xonhi cosa jianha sinttatjanji ra. Ndoa que espiritua ra anto rinao sintte jian, pero cuerpoa ra sojiha.

⁴² Yoxin nttiha jehe cjan para joinchetsenhe ñao Dios iná co ndačo:

—Padre, si čhoha para que soixin tsančhjandaha na janha satto ngain tti anto tangui jiji, que tsonhe inchin soixin rinao remé.

⁴³ Cottimeja jehe cjan co jehe na tatejoa na iná ixin jmacon na icoixinha de anto cottachin. ⁴⁴ Jesús nttiha cointtohe na co jehe sacjan para joinchetsenhe ñao Dios ninxin nttiha, co ndačo xajeho. ⁴⁵ Cottimeja cjan ngain tti vittohe jehe tti ní chojni que joicao, co ndačo ngain na:

—Janché dinttechin ra co nchejogaha ra. Hora ojoí que janha, tti Xí que joixin de ngajni, sinchechienhe na na ngá rá chojni jianha. ⁴⁶ Dingattjen ra sachjin na; ojoí tti ndačo quexén para rrotse na na janha.

Are tse na Jesús

(Mr. 14.43-50; Lc. 22.47-53; Jn. 18.2-11)

⁴⁷ Jesús xa jindačo jañá are ojoí Judas, ná de tti tteyó chojni que vacao Jesús. Judas joiaho anto tsje chojni que teyá na espada co nttá. Xidána que vaquetonha ngain icha xidána co xittetonha ngain nihngo, xí mé rroanha cain chojni mé. ⁴⁸ Judas, tti joindache xa quexén para tse na Jesús, mé dindačo ngain cain chojni que joiaho:

—Tti janha tsetoxin para rrochjaha joajna, jehe mé. Tse ra co sattjiho ra.

⁴⁹ Cottimeja jehe Judas conchienenhe ngain Jesús co ndačo:

—¡Deo, Maestro!

Co coetoxin. ⁵⁰ Jesús ndačo ngain Judas:

—Amigo, ¿quedonda joihi nttihi?

Cottimeja cain nicjoi conchienenhe na co tse na Jesús co sajoicao na.

⁵¹ Ngain rato mé, ná de tti tteyó chojni que vacao Jesús joantsje espadá co cončhinjihi ndatsjoen ná xinchehe xé xidána icha importante.

⁵² Cottimeja ndačo Jesús ngain:

—Ttenchjinha espadá lugué espada. Ixin cain chojni que tjayaxin conixin espada, conixin espada senxin cai. ⁵³ ¿Anoaha que janha nchao

rrondattjan Nnodana co jehe Ndo jaxon rrorroanna Ndo icha que sententa mil ángel? ⁵⁴ Pero si jamé rroconhe, ¿queéxn para tsonhe tti ndačo ngain tti jitaxin Palabré Dios, que mé chonda que siconhe?

⁵⁵ Cottimeja Jesús ndačo ngain cain chojni que cjoí:

—¿Ajoihí jaha ra conixin espada co nttá para joitse ni ra como si janha rrocji ná xichehe? Cain nchanho vatto janha vagarihi ngayaha ra ngain nihngo icha importante para vanttacoanha ra de ixin Dios co xonhi tiempo tse ni ra. ⁵⁶ Pero cain jihí tsonhe para que siconhe cain tti dindačo cain profeta ngain tti jitaxin Palabré Dios.

Cottimeja cain tti chojni que vacao Jesús ndacointtohe na jeho Jesús nttiha co jehe na sacoinga na.

Are Jesús ngain juzgadoe nihngo

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Cain nijoitse Jesús sajoicao na para ngain nchiandoha Caifás, mé vehe xidána icha importante, co nttiha tti dixatte cain ximaestroe ley co cain xittetonha ngain nihngo. ⁵⁸ Co Pedro ta tti cjin jirroexin hasta joiji ngain patioe nchiandoha jehe Caifás. Nttiha joixinhi Pedro co tavehe ngayehe xipolicía que te nttiha para vicon quehe joinchehe ni icha ngain Jesús.

⁵⁹ Cain xidána que vaquetonha ngain icha xidána, co cain xittetonha ngain nihngo, co cain xittetonha ngain juzgadoe nihngo cjoé xa quehe sinchecaxin xa Jesús, masqui ndoaha joinchehe Jesús ná cosa jianha, jeho para ttjé xa para nasoenxon xa Jesús. ⁶⁰ Pero xonhi cosa vittja xa masqui anto tsje chojni conchienne para ndačo na cosa ndoaha de ixin quehe joinchehe Jesús. Cottimeja vintteconchienne yó chojni testigo que nichja cosa ndoaha. ⁶¹ Chojni mé ndačo na:

—Xí jihí ndačo xa: “Janha nchao tsonxante ningoe Dios, co rrocjan na sintachjian nihngo iná ngain nincoa nchanho.”

⁶² Cottimeja vingattjen xidána icha importante co ndačo xa ngain Jesús:

—¿Axonhi nichja jaha? ¿Andoa tti ndačo chojni tehe o ni nahi?

⁶³ Pero Jesús tencoa. Cottimeja ndačo xidána icha importante mé:

—Conixin joachaxín nombré Dios que jichon, janha rrittetonha jaha que rrondachjenji na ndoa. Ndachjenji na si jaha tti Cristo, Xenhe Dios.

⁶⁴ Jesús ndačo:

—Ján, janha inchin jaha ndačo. Co cai rrondattjo ra jaha ra que sicon ni ra janha, tti Xí que joixin de ngajni, sarihi ngain lado jian de Dios que chonda cainxin joachaxin, co sicon ni ra sihi ngacjan ttjoi de ngajni.

⁶⁵ Cottimeja jehe xidána icha importante coinchje xa lonttoe xa para ná señal que jehe xa anto coñao xa co ndačo xa:

—Xí jihí nichja xa jianha para ixin Dios. ¿Quehe rrogondá na icha testigo? Jaha ra coinhi ra tti jianha que ndačo xa. ⁶⁶ ¿Quehe xaxaon ra?

Cain na ndačo na:

—Jiquininxin xa senhe xa.

⁶⁷ Cottimeja canxion na cjoatjo na nttatté na ngá con Jesús co xanguí na tton. Icanxin na xanguí na manazo ngá con Jesús. ⁶⁸ Co ndačo na ngain:

—Jaha que Cristo, ¡datsoenhe quensen goen!

Pedro ndaĉho que jehe chonxinha Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ De cain mé Pedro tají ndoja ngain patio, co conchienne ngain jehe ná nĉhimozé xidána icha importante co ndaĉho nĉha:

—Jaha cai vacjiho Jesús, tti joixin nonttehe Galilea.

⁷⁰ Pero ngattoxon con cain nite nttiha, Pedro ndaĉho:

—Nonaha de quehe rrindachjenji na.

⁷¹ Pedro are jehe sajittji ngain puerté patio are vicon iná nĉhimozé xidána mé, ndaĉho nĉha ngain nite nttiha:

—Xí jiha cai vacao xa Jesús, tti rajné Nazaret.

⁷² Pedro joinchejurá co ndaĉho:

—Janha chonxinha xí yá.

⁷³ Nchion después cain nite nttiha conchienne na ngain Pedro co ndaĉho na ngain:

—Ján ndoa, jaha cai ná de tti chojní Jesús ixin datsoan ni hasta de queĉén nichja.

⁷⁴ Cottimeja Pedro joanchia ná castigo ngain Dios para ixin jehe ixin joinchejurá ngain Dios co ndaĉho:

—Dios nchao nasoenson na janha si ndoaha tti rrindachjan que janha choxinha xí yá.

Co ngain rato mé tsje ná conttaxichia. ⁷⁵ Cottimeja Pedro ꝥaxaon tti ndaĉho Jesús ngain jehe: “Saho que conttaxichia rrotsje va, jaha orrondaĉho ninxin nttiha que ixin chonxinha na.” Cottimeja Pedro vaĉhjexin de nttiha co anto tsjanga.

27

Are joicao na Jesús ngain Pilato

(Mr. 15.1; Lc. 23.1-2; Jn. 18.28-32)

¹ Are ovingasán cain xidána que vaquetonha ngain icha xidána co cain xittetonha ngain ningoe chojni judío cjoao na ixin queĉén sinchehe na para nasoenson na Jesús. ² Cottimeja coia na Jesús co joicao na ngain Pocio Pilato, tti vehe xigobernador.

Are ndavenhe Judas

³ Judas, tti joindache xidána para tse na Jesús, are jehe conohe que nasoenson na Jesús, jehe ꝥaxaon que jianha joinchehe co anto feo conohe, co cjan cjoí ngain xidána que vaquetonha ngain icha xidána co xittetonha ngain nihngo para joiconcjan tti treinta tomi de plata, ⁴ co ndaĉho ngain xa:

—Janha jianha jointtaha ixin joindattjo ra queĉén para tse ra ná xí que ꝥonhi jica para que nasoenson ra xa.

Pero jehe xa vinttendaĉho xa ngain Judas:

—Pero mé, ¿janha na quehe ndosenna na? ¡Yá problemá jaha!

⁵ Cottimeja Judas cjoa tomi mé ngaxinhi nihngo nttiha, co sacjoi para joiquenttedonguihi ttosin ná jino jeho para ndavenhe.

⁶ Jehe xidána que vaquetonha ngain icha xidána joatse xa tomi mé co ndaĉho xa:

—Choha tsín na tomi jihi ngain cajé tti tomi que danjo chojni ixin tomi jihi xengaxin hna jni.

⁷ Cottimeja cjoao chó xa para que conixin tomi mé coenanxin xa tti nontte que dinhi Nonttehe tti Nchechjian Chi para que nttiha sehe ná

lugar tti tsjavá na chojni que ttixin de iná nación. ⁸ Mexinxin jngui mé dinhi hasta jai, Jngui de Jni. ⁹ Jamé joiconhe tti dindačo profeta Jeremías: “Coá na tti treinta tomi de plata, (tti tomi que chojni Israel cjoenga hna para ixin jehe). ¹⁰ Conixin tomi mé coenanxin na tti jnguihi tti nchechjian chi, co jamé conhe inchin coetonna Dios.”

Jesús ngain Pilato

(Mr. 15.2-5; Lc. 23.3-5; Jn. 18.33-38)

¹¹ Joicao na Jesús ngain xigobrador que vinhi xa Pilato, co jehe xa joanchianguihi xa Jesús co ndačo xa:

—¿Ajaha tti Rey de chojni judío?

Jesús ndačo ngain xa:

—Ján janha jañá inchin jaha ndačo.

¹² Co are cain xidána que vaquetonha ngain icha xidána, co cain xittetonha ngain nihngo tenichja xa tti jeha ndoa de ixin Jesús, jehe xonhi ndačo. ¹³ Cottimeja Pilato ndačo ngain Jesús:

—¿Attinha cain tti tendačo na de ixin jaha?

¹⁴ Pero Jesús xonhi ndačo ngain Pilato; co jamé jehe xigobrador Pilato goan xa admirado co inoeha xa quehe rrojinchehe xa ngain rato mé.

Are ndačo na ixin Jesús chonda que ndasenhe

(Mr. 15.6-20; Lc. 23.13-25; Jn. 18.38—19.16)

¹⁵ Nchao remé, ngain cain quiai mé xigobrador vechonda xa costumbre de vacančjanda xa ná de tti teaxinhi para savacji. Jehe xa vacančjanda xa quexeho de tti chojni que vaquinchiehe jehe na. ¹⁶ Ngain tiempo mé nttiha vehe ngaxinhi cárcel ná tti vinhi Barrabás, co tsje chojni chonxin jehe mé. ¹⁷ Co are cainxin chojni xatte na nttiha, Pilato joanchiangui ngain na co ndačo:

—¿Quensen rinao ra tsančjanda janha para que jehe satsji; a Barrabás o ani Jesús, tti dinhi Cristo?

¹⁸ Jamé ndačo Pilato ixin oconohe que cain xidána conchjoehe xa ngain Jesús ixin jehe cainxin jian vanchehe, mexinxin joinchechienxin xa Jesús nttiha.

¹⁹ Ngain rato mé are Pilato tajitaha nttaxintaoen tti vanchejuzguexin chojni, nchičhihi rroenhe ncha ná joajna que dindačo ncha: “Dixinteha jaha ngain xí jian yá ixin are ttie, janha atto feo coxinanxin de ixin jehe xa.”

²⁰ Pero cain xidána que vaquetonha ngain icha xidána co xittetonha ngain nihngo ndache xa cain chojni que rrondačo na ixin Barrabás tti sačhjexin cárcel, co ixin Jesús chonda que senhe. ²¹ Jehe Pilato joanchiangui ngain na iná, co ndačo:

—¿Quexeha de cayoi xí tti rinao ra tsančjanda para que jehe satsji?

Co cain jehe na vinttendačo na:

—Barrabás.

²² Pilato joanchiangui ngain na iná co ndačo:

—¿Co quehe sinttaha janha conixin Jesús, tti dinhi Cristo?

Cain na ndačo na:

—¡Nchecrucificá!

²³ Cottimeja Pilato ndačo ngain na:

—¿Quehe cosa jianha joinchehe?

Pero jehe na cjan na ndačo na sén iná:

—¡Nchecrucificá!

²⁴ Are Pilato vicon que čhoaha na para que Jesús sarrocji, sino que cain na anto tedomo na, Pilato coetonha para que joí jinda, co contti rá ngattoxon con cainxin chojni nttiha, co ndačo ngain na:

—Janha řonhi sarica ixin ndasenhe xí jihi, ixin jehe xa řonhi cosa jianha joinchehe xa. Jaha ra tti sintteca ra yá.

²⁵ Co cainxin chojni ndačo na:

—¡Janha na conixin xanhna na, mé tti sintteca na ixin ndasenhe xí yá!

²⁶ Cottimeja Pilato joantsje Barrabás para coančhanda sacjoi, co coetonha para que vicaon Jesús. Cottimeja Pilato joanjo Jesús para que goan crucificado.

²⁷ Cottimeja xisoldadoe jehe Pilato joicao xa Jesús ngain palacio, co řatte cainxin xisoldado ngandanji Jesús. ²⁸ Cottimeja joantsjehe xa lonttoe Jesús co joinchetsá xa ná lontto jatse. ²⁹ Co joinchecjinga xa Jesús ná corona de joxon nttanchaha, co joinchetse xa ná nttá ngain rá lado jian. Cottimeja vinttetoxin nttajochjihi xa ngatto con Jesús, co cjoanoa xa co ndačo xa ngain:

—¡Viva tti Rey de chojni judío!

³⁰ Cai cjoatjo xa nttatté xa, co coá xa tti nttá que joinchetse xa Jesús para řanguí xa nttá já Jesús. ³¹ Cottimeja are joexin cjoanoa xa jańá, joantsjehe xa tti lontto jatse que joinchetsá xa co coengaha xa lonttoe. Cottimeja sajoicao xa para joinchecrucificá xa.

Are joinchecrucificá xa Jesús

(Mr. 15.21-32; Lc. 23.26-43; Jn. 19.17-27)

³² Co are tedathjecoxin xa Jesús de nttiha, vetan xa ná xí que vinhi Simón que joixin de ngain ciudad de Cirene; co joinchecame xa crue Jesús.

³³ Co jamé joiicaho xa Jesús conixin Simón ngain ná lugar que dinhi Gólgota que rročo Lugué Nttalorojá Chojni. ³⁴ Nttiha chjexin xa Jesús ná vino que jittecyan ná cosa anto tsja. Pero are Jesús joincheprobá vino mé, jehe čhoaha vihi.

³⁵ Co are ojoinchecrucificá xa Jesús, cain xisoldado mé joantsje xa suerte de lonttoe Jesús, para jamé chjejehe xa lontto mé. Jańá conhe para joiconhe tti dindačo profeta: “Joantsje na suerte para chjejehe na lonttona.” ³⁶ Cottimeja tavintte xa nttiha para vinttenda xa. ³⁷ Co nganito cruz icha noi que já Jesús coín xa ná letra que ndačo quedonda chonda que ndavenhe. Co letra mé ndačo: “Xí jihi Jesús, tti Rey de chojni judío.”

³⁸ Cai yó xichehe goan xa crucificado conixin Jesús, ná xa vehe crue xa lado cjon Jesús, co iná xa lado jian de Jesús. ³⁹ Co cain nivatto nttiha cjoanoa na Jesús co coenttjoinga rroha na. ⁴⁰ co ndačo na ngain Jesús:

—Jaha que rrojinchexante nihngo icha importante co nincoa nchanho ttjexinxin nchechjian nihngo iná, danianxin de cruz jaho, si ndoa jaha Xenhe Dios.

⁴¹ Jamé cai cjoanoa cain xidána que vaquetonha ngain icha xidána, ximaestroey ley Israel, co xifariseo conixin cain xittetonha ngain nihngo, co ndache chó xa:

⁴² —Jehe nchao cjoenguijna icha chojni, pero jehe čhoaha tsjenguijna cuerpoe jehe mismo. Si ndoa jehe tti Rey para ixin ján na, socon na sanianxin de ngain cruz yá para que sotticaon na jehe. ⁴³ Jehe chonda confianza ngain Dios, mexinxin jai socon na si Dios tsančhandaha para

senhe, si ndoa Dios anto rinao jehe ixin jehe ndattjo na que jehe tti Xenhe Dios.

⁴⁴ Jamé ndačho chojni hasta tti cayoi xichehe que vintte crucificado nntiha ngaca jehe cjoanoa xa Jesús cai.

Are ndavenhe Jesús

(Mr. 15.33-41; Lc. 23.44-49; Jn. 19.28-30)

⁴⁵ Cottimeja ngoixin ngataha nontte ndaconaxin xehe desde ngosine nchanho hasta ní hora tsocjin. ⁴⁶ Co inchin ní hora tsocjin Jesús coyao soji co ndačho:

—Elí, Elí ¿lama sabactani? —que rročho: Diona, Diona, ¿quedonda ndacointtona na janho?

⁴⁷ Canxion de tti xite nntiha coinhi xa mé co ndačho xa:

—Xí jihi jidayé xa tti profeta Elías.

⁴⁸ Ngain rato mé ná tti xite nntiha coinga xa joiroé xa ná esponja. (Cosa mé datse jinda inchin chjon algodón.) Co jehe xa xangui xa esponja mé ná vino anto san inchin vinagre co coencjin xa con ná nttá. Cottimeja tsín xa noi ngaca rroha Jesús para que jehe rroguíhi. ⁴⁹ Pero xi icha ndačho xa:

—Tančhanda, socon na aco ndoa tsí Elías para tsjenguijna.

⁵⁰ Jesús cjan coyao soji iná, co ndavenhe. ⁵¹ Ngain rato mé tti manta que vettoa ngaxinhi tti nihngo icha importante, hasta yó vichjenga manta mé de noi hasta tti nontte. Co coingui nontte hasta ttjao vichjenga. ⁵² Co tsje lugar tti xavá chojni xiré co tsje chojni que vaguitticaon na Dios, co ndavenhe na, are mé xechon na. ⁵³ Cottimeja vačhje cain chojni jihi de ngain tti xavá na, co después de xechon Jesús vinttecji na ngain ciudad de Jerusalén. Nntiha anto tsje chojni vicon jehe cain chojni mé que xechon.

⁵⁴ Are jehe xicapitán conixin cain xisoldadoe xa que tenda Jesús nntiha vintteguicon xa que coingui nontte co conaxin xehe co icha cosa que conhe, anto vinttexaon xa co vinttendačho xa:

—Ján ndoa que xí jihi Xenhe Dios.

⁵⁵ Co cjinha de ngain cruz nntiha tate canxion nčhí que vacji conixin Jesús desde ngain Galilea co vagayaconhe nčha Jesús. ⁵⁶ Nntiha vehe María Magdalena, co María tti janné Jacobo co José, co janné cain xenhe Zebedeo.

Are Jesús xavá

(Mr. 15.42-47; Lc. 23.50-56; Jn. 19.38-42)

⁵⁷ Are coexinhi conaxin xehe, joí ná xí anto rico que vinhi xa José, xí mé rajné xa Arimatea, co jehe xa cai vitticaon xa Jesús. ⁵⁸ Jehe José mé cjoí joitsjehe Pilato para joanchiehe joachaxin de sasicao cuerpoe Jesús. Cottimeja Pilato coetonha que sanjo xa cuerpoe Jesús. ⁵⁹ José joinchegania cuerpoe Jesús co coensiha ná manta anto roa. ⁶⁰ Co joicán cuerpo ngain tti cueva que jehe José joinchechjian ngadoho ná ttjao para ixin jehe José o quexeho de nindoha que ndarroguenhe icha saho. Cottimeja jehe coejé cueva mé conixin ná xó jie co sacjoi. ⁶¹ Co nntiha tají María Magdalena, co tti iná María tate na ngandanguí jehe cueva mé.

Tti venda lugar tti xavá Jesús

⁶² Ngain nchanho yoxin, rročho sábado, cain xidána que vaquetonha ngain icha xidána co cain xifariseo vinttecji xa joitsjehe xa Pilato, ⁶³ co vinttendačho xa ngain:

—Janha na xaxanho na que tti xí ndavenhe que vanichja cosa ndoaha, jehe ndačo are xa vechon que ngain nchanho ninxin jehe rroxechon. ⁶⁴ Mexinxin janha na rinaho na que soixin rroanha canxion xisoldado para sinttenda xa tti jehe jiřavá hasta tti ngain nchanho ninxin para que chojni que vacao tsjiha na ngain ttie co siqué na cuerpoe. Cottimeja rrondate na icha chojni que ixin jehe xechon. Co si jamé rrondate na, icha feo tsonhe que are saho.

⁶⁵ Pilato ndačo ngain xa:

—Yá chonda ra canxion xisoldado. Jaha ra ttji ra co jian ttejehe ra cueva tti jiřavá.

⁶⁶ Cottimeja savinttecji na conixin xisoldado co coín na ná señal ngain tti xo que jijé cueva mé para que sicon na si xo mé tsingui xo. Co nttiha cointtohe na xisoldado para vinttenda xa.

28

Are xechon Jesús

(Mr. 16.1-8; Lc. 24.1-12; Jn. 20.1-10)

¹ Are vatto tti nchanho que nchejogaha ni, co ojidingasán tti saho nchanho de semana, María Magdalena co tti iná María cjoí na joitsjehe na tti řavá Jesús. ² Ngain rato mé coingui nontte anto soji. Are mé ná ángel de Dios xincanjinxin de ngajni co joí ngain cueva mé. Jehe vinttjia tti xo que jijé puerté cueva co tavehe ngataha xo mé. ³ Angel mé anto jitonguixima inchin tti xohi que xincanjinxin de ngajni, co lonttoe anto roa lonto inchin čhintta que jí ngataha jnanchaha. ⁴ Are tti xisoldado que tenda nttiha vicon xa mé, anto vintteřaon xa hasta ndavinttji xa de joařaon, řá ndavintteguenhe xa. ⁵ Cottimeja ángel mé ndačo ngain jehe yó nčí que vinttecji:

—Řaonha ra. Janha nona que tettjé ra Jesús, tti joinchecrucificá na. ⁶ Jehe coha nttihi ixin jehe oxechon inchin jehe ndačo. řacoi ra sitsjehe ra tti lugar que jehe na coín na. ⁷ Jaicoa ttji ra co dindache ra tti chojni que vacao: “Jehe ndavenhe pero jai jehe oxechon co jehe tsji Galilea icha saho que jaha ra. Nttiha siconxin ra.” Jeho yá tti chonda janha que joindattjo ra.

⁸ Cottimeja jehe nčí mé jaicoa savinttecjixin nča de nttiha. Jehe nča vintteřaon nča co řajeho tiempo anto vintteché nča cai. Co coinga nča joindache nča tti chojni que vacao Jesús. ⁹ Co are jehe nča tettinga nča, Jesús conchienhe ngain nča co joanjo joajna ngain nča. Jehe nča vintteconchienhe nča ngain Jesús co vinttettoxin nntajochjihi nča co cjoa nča rotté Jesús co joinchesayehe nča. ¹⁰ Co jehe ndačo ngain nča:

—Řaonha ra. Ttji ra dindache ra chojnina que jehe na chonda na que tsji na Galilea co nttiha siconxin na na janha.

Tti coequin xisoldado que vinttenda tti řavá Jesús

¹¹ Are nčí mé savintteguicao nča joajna mé, canxion xisoldado que vinttenda lugar tti řavá Jesús vinttecji xa joindache xa xidána que vaquetonha ngain icha xidána cain tti conhe. ¹² Co xí mé jaicoa joindache xa cain xittetonha ngain nihngo para que cjoao chó xa queřén sinttenchehe xa. Cottimeja vintteganjo xa anto tsje tomí ngain tti xisoldado que vinttenda lugar tti řavá Jesús, ¹³ co vinttendačo xa ngain xisoldado mé:

—Jaha ra ndačo ra que are jaha ra tatečhin ra ttie, cjoí tti chojni que vacao Jesús co coé na cuerpoe. ¹⁴ Co si xigobernador tsonohe xa jihi, janha na sicjao na xa co jaha ra xonhi tsonha ra.

¹⁵ Cottimeja cain xisoldado mé vittoexin xa vinttegayé xa tomi mé, co vinttecji xa co vinttendačo xa inchin vitonhe xa. Co jamé ttequin chojni judío hasta jai.

Tti coetonhe Jesús nirepresentanté jehe

(Mr. 16.14-18; Lc. 24.36-49; Jn. 20.19-23)

¹⁶ Jamé tti ttejngo chojni que vacao Jesús savinttecji na para Galilea ngain tti jna que Jesús coetonhe na. ¹⁷ Co are vintteguicon na Jesús, jehe na joinchesayehe na Jesús, masqui ittoha na xa vitticaonha na ixin jehe Jesús. ¹⁸ Cottimeja Jesús conchienne ngain na co ndačo:

—Janha ovayá cainxin joachaxin de ngajni co de nttihi ngataha nontte. ¹⁹ Jai jaha ra ttji ra ngain chojni de cainxin nación co ndache ra na que sitticaon na na janha co sintte na chojnina, co ncheguite ra na conixin joachaxín nombré Ndodana co joachaxín nombrena janha tti Xenhe Ndo conixin joachaxín nombré Espíritu Santo, ²⁰ co nchecoenhe ra na sitticaon na sinchehe na cainxin tti janha coetonha ra. Co noha ra que janha rrihi nganji ra cainxin nchanho hasta are tsjexin mundo. Amén.

Tti Jian Joajné Jesucristo Que Dicjin Marcos

Juan ndache chojni ngagaha jna joajné Dios

(Mt. 3.1-12; Lc. 3.1-9, 15-17; Jn. 1.19-28)

¹ Janhi coexinxin joajné Jesucristo, Xenhe Dios.

² Profeta Isaías dicjin janhi:

Ndačo Dios ngain Xenhe: Tsjexin, saho rrorroanha ná tti sicao joajnana para sinchechjian nttiha para ixin jaha.

³ Co tsinhi na ná tté chojni que tsoyaoxin ngagaha jna que rrondačo: “Nchechjian ra ná nttiha para ixin jehe tti chonda cain joachaxin; danttjehe ra ná nttiha nao.”

⁴ Cottimeja, ndoa, jañá jói Juan ngagaha jna, vancheguitte chojni. Co vandačo ngain na ixin chonda na que tsentoxinhi na cain cosa jianha que tenchehe na co siguitte na. Co jamé Dios sinchetjañehe na cain cosa jianha que joinchehe na. ⁵ Mexinxin vacji cainxin chojni que vintte nonttehe Judea co chojni que vintte ngain ciudad de Jerusalén para vaquinhi na quehe vandačo Juan. Co are jehe na vaquendoenhe ñao na cainxin cosa jianha que vanchehe na, cottimeja Juan vancheguittexin na ngain río Jordán.

⁶ Lonttoe Juan diconchjian de joxon xehe cocamello, co cinturoen de joxon roa. Co tti vane Juan joxon coxoali co tsjén cormena que vagoan ngagaha jna. ⁷ Co Juan vandačo ngain chojni:

—Después de janha tsí iná chojni que chonda anto tsje icha joachaxin que janha. Co janha jiquininxinha na ni para sisehe para tsonxindangá corrié catté. ⁸ Janha nttaguittexin jaha ra conixin jinda; pero jehe sinttaguittexin ra conixin Espíritu Santo.

Are joiguitte Jesús

(Mt. 3.13-17; Lc. 3.21-22)

⁹ Co tiempo mé Jesús vačhjexin de ngain rajna Nazaret jí ngain nonttehe Galilea para sacjoi ngain Juan. Co Juan joincheguitte Jesús ngain río Jordán. ¹⁰ Co are Jesús vačhjenguixin de jinda, vicon que ngajni xiré, co Espíritu Santo de Dios xincanji xá ná conttoanajni ngataha Jesús. ¹¹ Co rato mé coinhi na tté Dios que nichjaxin de ngajni co ndačo:

—Jaha tti Xanhna que janha anto rinaho; co de ixin jaha, janha anto chahna.

Satanás rrojinao rrojinchehe Jesús

(Mt. 4.1-11; Lc. 4.1-13)

¹² Cottimeja Espíritu Santo de Dios sajoicao Jesús para ngagaha jna tti xonhi chojni jí. ¹³ Co nttiha ngagaha jna tti vintte tsje coxigo čhinto, vehe Jesús cuarenta nchanho. Cottimeja Satanás cjoí ixin joinao rrojinchehe Jesús para rrojinchehe cosa jianha, pero coixinha joinchehehe. Cottimeja jói ángel de Dios para joincheatendehe Jesús.

Jesús coexinhi xé ngain Galilea

(Mt. 4.12-17; Lc. 4.14-15)

¹⁴ Después que coiaxinhi na Juan ngain cárcel, Jesús cjoí para nonttehe Galilea, co joindačo tti jian joajna de quexén ttetonha Dios. ¹⁵ Vandačo Jesús ngain chojni:

—Ojoí tiempo que Dios siquetonha daca ngataha nontte. Ttentoxinhi ra cain cosa jianha que tenchehe ra co ditticaon ra tti joajna que danjo iná vida naroaxin.

Jesús nichjé nó xí que vatse copescado

(Mt. 4.18-22; Lc. 5.1-11)

¹⁶ Are Jesús jittji ngandehe lago de Galilea, Jesús vicon Simón co xanchó Simón xan Andrés. Cayoi nimé copescado vatse na, co rato mé tatetjahngui na nonchaha jinda. ¹⁷ Co Jesús ndačo ngain na:

—Ǽacoi ra rroehna ra; jaha ra tse ra copescado, pero janha tsjagoha ra queǼén satse ra chojni para ixin Dios.

¹⁸ Co rato mé cointtohe na nonché na co sacjoi na conixin Jesús.

¹⁹ Cjinha joihi na are Jesús vicon Jacobo co Juan, cayoi nimé xenhe Zebedeo. Tate na ngá ná barco tetteyehe na nonché na. ²⁰ Co rato mé Jesús vayé cayoi jehe na, co jehe na nttiha cointtohe na ndodé na Zebedeo ngain barco mé conixin ninchehe Ǽé, co cayoi jehe na sacjoi na conixin Jesús.

Ná xí que vechonda espíritu jianha

(Lc. 4.31-37)

²¹ Cottimeja joihi na ngain rajna Capernaum. Co Jesús vixinhi nihngo nttiha para joinchecoehne chojni Israel ngain nchanho que nchejogaha na. ²² Co cain nivaquinhí tti vanichja Jesús vagoan na admirado ixin Jesús vanichja inchin ná chojni que chonda anto tsje joachaxin co jeha inchin vanichja ximaestroey ley Israel. ²³ Co ngain ningoe rajna mé vehe ná xí que vechonda xa espíritu jianha co coyaotte xa Jesús co ndačo xa:

²⁴ —¿Quehe sinchehe nganji janha na, jaha Jesús de Nazaret? ¿Ajaha joihi para santsjena ra joachaxin que chonda na? Janha chonxin jaha co nona ixin jaha tti anto jian de ngain Dios.

²⁵ Cottimeja Jesús joinchesattehe espíritu jianha mé co ndačo:

—Tencoja jaha espíritu jianha, co sattjixin de ngain xí yá.

²⁶ Co are espíritu jianha vachjexin de ngain tti xí mé, jehe espíritu jianha joincheguenda jehe xa, coyao soji co sacjoixin de ngain tti xí mé. ²⁷ Co cainxin chojni que te nttiha Ǽaon na co joanchianguihi chó na co ndačo na:

—¿Quehe jiji? Ojé cosa jitjagoa na xí jiji. ¡Xí jiji chonda xa joachaxin hasta ttetonhe xa espíritu jianha, co espíritu jianha ditticaon tti ndačo xa!

²⁸ Co cainxin rajna que te ngain nonttehe Galilea anto daca conohe na quehe vanchehe Jesús.

Jesús joinchexingamehe jannché Simón Pedro

(Mt. 8.14-15; Lc. 4.38-39)

²⁹ Cottimeja Jesús vachjexin de nihngo mé. Co jehe Jesús, conixin Jacobo co Juan sacjoi na para nchiandoha Simón co Andrés. ³⁰ Co tiempo mé jannché Simón Pedro venihi jan ixin soa. Co ndačo na ngain Jesús ixin venihi naníta mé. ³¹ Cottimeja Jesús conchiennehe, co tsehe rá naníta mé co joinchengattjen. Co toin rato mé xingamehe co ixonhi soa veyá. Co jehe naníta mé joincheatendehe na.

Jesús joinchexingamehe anto tsje chojni nihi

(Mt. 8.16-17; Lc. 4.40-41)

³² Co are viataon nchanho co conaxin xehe, joicaohé na Jesús cainxin chojni venihi co cainxin chojni que vechonda espíritu jianha tiempo mé.
³³ Co cainxin chojni ngain rajna mé xatte na ngandanguí nchia tti vehe Jesús. ³⁴ Jesús joinchexingamehe anto tsje chojni que vechonda ojeje chin. Co chojni que vechonda espíritu jianha Jesús joantsjexin espíritu mé de ngain na. Pero Jesús joanjoha joachaxin para nichja cain espíritu jianha ixin cain espíritu jianha ovenohe quensen jehe Jesús.

Jesús nichjé chojni ngain Galilea de ixin Dios

(Lc. 4.42-44)

³⁵ Co are ochian jidingasán, Jesús vingattjen co vachjexin de ngain rajna mé para sacjoi ngain iná lugar tti xonhi chojni vintte co nttiha joinchecoanxinxin Dios. ³⁶ Cottimeja Simón co icha chojni que vacao Jesús joicjé na. ³⁷ Co are vittja na Jesús, ndačho na ngain:

—Cainxin chojni tedanchiangui na jaha.

³⁸ Pero Jesús ndačho:

—Ján, pero sachjin na ngain icanxin rajna chian para que janha rronichja nttiha cai tti joajné Dios que janha joiquinha, porque para ixin mé joihi janha nttihi.

³⁹ Jamé vacji Jesús ngain cainxin nihngo que vintte ngain nonttehe Galilea para ndache na de ixin Dios co para vaguenguixin espíritu jianha de ngain chojni.

Jesús joinchexingamehe ná xí que vechonda lepra

(Mt. 8.1-4; Lc. 5.12-16)

⁴⁰ Ná tattíta veninxin chin lepra conchienne ngain Jesús, co tattíta mé vettoxin nttajochjihí co ndačho ngain Jesús:

—Si jaha rinao, nchao sinchexingamana de chin que rrichonda.

⁴¹ Jesús coiaconoehe, mexinxin catte conixin rá co ndačho:

—Ján, rinaho. Xingamaha.

⁴² Co are Jesús joexin ndačho yá, tattíta mé ndavačhjehe chin lepra que vechonda, co ixonhi chin vechonda. ⁴³ Cottimeja Jesús coetonhe sacjoi, co ndačho:

⁴⁴ —Pero xonhi chojni ndache, jehó ttji ngain xidána para que jehe xa sicon xa que jaha ixonhi chin chonda. Co danjo cosa ngain Dios inchin coetonhe Moisés para que cainxin chojni tsonohe na ixin jaha oxingamaha.

⁴⁵ Pero tattíta mé sacjoi, co coequín chojni cainxin tti jehe conhe. Mexinxin Jesús ichoha vařago ngain rajna. Co vacji jehó ngain lugar tti xonhi chojni vintte. Pero masqui jamé, vacji tsje chojni de cainxin rajna ngain tti vehe Jesús.

2

Jesús joinchexingamehe ná xí que čhoha vacji

(Mt. 9.1-8; Lc. 5.17-26)

¹ Vatto canxion nchanho cottimeja Jesús cjan cjoi ngain rajna Capernaum. Co chojni conohe ttinó mero vehe Jesús nttiha. ² Anto daca xatte anto tsje chojni ngain Jesús que ni vittjaha nchia vixinhi na co hasta tti ndoja víxin na. Co nttiha Jesús ndache na joajné Dios. ³ Cottimeja nó tti xí tetsengui iná xí que čhoha vacji; vintteguicao xa ngain Jesús. ⁴ Pero čhoha vatto na para tti jí Jesús, ixin anto tsje chojni te ngandanguí nchia

mé. Mexinxin cjoáso na ngataha nchia co vinttjian na rioho techoe nchia co nttiha joinchexincanjinxin na tti nihi mé conixin ná jino ngain camillé para ngain lugar tti jí Jesús. ⁵ Co are Jesús vicon quexén joinchehe na, jehe conohe ixin jehe na vitticaon na que jehe chonda joachaxin. Co Jesús ndačo ngain tti nihi mé:

—Ojointsatjañaha jaha cain tti jianha joinchehe.

⁶ Co nttiha tate canxion ximaestroe ley Israel, co xaxaon xa: ⁷ “¿Quedonda jañá jinichja xí yá? Ixin ndačo xa nchao nchehe xa cosa que jehó Dios nchao nchehe. xonhi quensen nchao nchetjañehe chojni tti jianha que nchehe na; jehó Dios tti nchao nchetjañehe na.” ⁸ Pero Jesús oconohe tti xaxaon ximaestro mé, co ndačo ngain xa:

—¿Quedonda jañá xaxaon jaha ra? ⁹ ¿Quexehe tti icha tanguiha, rrondattjan ná tti nihi: “Ovitjañaha jaha cain tti jianha joinchehe”, o rrondattjan: “Dingattjen, co tsinhi camillá co sattjixin rottea”? ¹⁰ Co tsjagoha ra cai ixin janha tti Xí que joixin de ngajni chonda joachaxin ngataha nontte nttihi para nttatjañá chojni tti jianha que nchehe na.

Cottimeja ndačo Jesús ngain tti nihi mé:

¹¹ —Jaha rrondattjo, dingattjen, co tsinhi camillá co sattji para nchiandoi.

¹² Co rato mé vingattjen tti nihi mé, co coame camillé, co vathjexin de nttiha are tatetsjehe ni icha. Co rato mé cainxin chojni que vintte nttiha goan na admirado co joinchesayehe na Dios ixin jehe anto jian co chonda cainxin joachaxin. Co ndache chó na:

—Xonhi nttiha vocon na ná cosa janhi.

Jesús nichjé Leví

(Mt. 9.9-13; Lc. 5.27-32)

¹³ Cottimeja Jesús cjoí ngandehe lago de Galilea iná, co are conchienne tsje chojni ngain Jesús, jehe joinchecoenhe na de ixin Dios. ¹⁴ Co are Jesús sacjoixin de ngandehe lago mé co vatto ngandanguí ná caseté cobro, Jesús vicon nttiha tají ná tattíta vinhi Leví jinchehe cobro nttiha, co ndodé vinhi Alfeo. Jesús ndačo ngain jehe Leví:

—Xacoi nganji co rroehna na.

Co Leví vingattjen co sacjoi conixin Jesús.

¹⁵ Co después are Jesús tajine ngaxinhi nchiandoha Leví, conchienne anto tsje xicobrador co icha chojni que vanchehe cosa jianha. Cain chojni mé jinecaho na Jesús conixin cain chojni que vacao ixin anto tsje chojni varroé. ¹⁶ Co cai cjoí canxion ximaestroe ley co icanxin xifariseo ngain nchiandoha Leví. Cain chojni mé vicon ixin Jesús jine conixin tsje chojni que nchehe cosa jianha, co ndačo cain xí mé ngain chojni que vacao Jesús:

—¿Quedonda ximaestroatra ra jinecaho xa co dicaho xa xicobrador co icha chojni que nchehe cosa jianha?

¹⁷ Are Jesús coinhi yá ndačo:

—Chojni que niha, chojni mé rrogondeha xinchexoan, jehó tti chojni nihi, mé tti rrogondehe xinchexoan. Mexinxin janha joiha para joinichjá chojni jian, sino que janha joihi para joinichjá chojni que tenchehe jianha.

Are joanchianguihi na Jesús ixin quedonda chojni jehe dinttecjañoha na (Mt. 9.14-17; Lc. 5.33-39)

18 Nchanho mé chojni que vacao Juan co chojni que vacao xifariseo vinttecjáño na. Co icanxin chojni cjoí na ngain Jesús co joanchianguihi na co ndačo na:

—¿Quedonda chojni que xicao Juan co chojni que xicao xifariseo dinttecjáño na pero chojni que čhjiho jaha nahi?

19 Jesús ndačo:

—¿Acaso cain chojni que tti ngain ná vandango tti tottehe na nchao sinttecjáño na are xa nttiha jí xinovio ngain na? Nahi, jehe na čhoja sinttecjáño na si xa jí xinovio ngain na. 20 Pero are tsí nchanho que xinovio satsjixin de ngain na, cottimeja jehe na chonda que sinttecjáño na.

21 Co Jesús ndačo iyó ejemplo:

—Xonhi chojni tteyehe rioho lonto narao ngain ná lonto nttaxí ixin lonto narao ndadixehe co ndattinchje lonto nttaxí, co tti diguichje icha tojie. 22 Co cai xanttjoa are jidatsoxinhi xan, čhoja siquia xan ngá ná roanxan onttaxí ixin tsončhintaon xan roa mé, co ndasitján xanttjoa co ndasitján roanxan. Mexinxin xanttjoa are jidatsoxinhi xan, chonda que siquia xan ngá ná roanxan naraoxin para dacaha tsončhintaon xan roanxan mé. Jañá tti costumbre que jaha ra chonda ra jiha de acuerdo ngain tti janha rrindattjo ra.

Chojni que vacao Jesús cončhinji na trigo ngain nchanho que nchejogaha ni

(Mt. 12.1-8; Lc. 6.1-5)

23 Ná nchanho que nchejogaha ni, Jesús conixin chojni que vacao vatto na ngain canxion jngui tti diguinga trigo, co chojni que vacao Jesús cončhinji na canxion ninchjan de trigo para joine na. 24 Co canxion xifariseo vicon xa quexén tenchehe na. Mexinxin ndačo xa ngain Jesús:

—Tsjexin, ¿quedonda chojni que čhjiho nchehe xa jai que jiquininxinha nchehe chojni xa, ixin jai nchanho para nchejogaha cain chojni?

25 Co Jesús ndačo:

—¿Axa tsjeha ra tti jitaxin de ixin quexén joinchehe David conixin cain xicompañeroe are vechondaha na tomi co venhe na jintta? 26 Are mé Abiatar vehe xidána icha importante, co David joixinhi ngaxinhi nchiandoha Dios co joine niottja que vehe ngataha altar, co jeha xidána jiquininxin para jine niottja mé. Co David chjé chojni que vacao nio cai co joine na nio.

27 Cai ndačo Jesús ngain xa:

—Nchanho que nchejogaha chojni jí nchanho para ixin chojni co jeha chojni te para ixin jehe nchanho mé. 28 Mexinxin cai janha, tti Xí que joixin de ngajni, chonda joachaxin para ngain nchanho que nchejogaha ni.

3

Ná xí que ndadixemadoho ná rá

(Mt. 12.9-14; Lc. 6.6-11)

1 Iná nchanho Jesús cjoí ngaxinhi ná nihngo iná. Co nttiha tají ná xí que ndadixemadoho ná rá. 2 Co nttiha tetsaya canxion xifariseo para sicon xa aco sinchexingamehe xí mé ngain nchanho que nchejogaha ni, para jamé rrochonda quehe rrocjanguxin xa Jesús. 3 Cottimeja ndačo Jesús ngain tti xí que ndadixemadoho ná rá:

—Dingattjen co darihi nttimé ngosine.

⁴ Cottimeja joanchiangui Jesús ngain xicanxin co ndaço:

—¿Quehe jiquininxin sinchehe ni ngain nchanho que nchejogaha ni? ¿Asinchehe ni jian o sinchehe ni jianha? ¿Atsançhjandaha ni ndasenne ná chojni, o ani nasoenxon ni?

Co cain xa tencoa xa. ⁵ Cottimeja Jesús goñao co tsjehe ngain xa co anto vechín ixin vicon que jehe xa joinaoha xa coinxin xa de ixin Dios. Co ndaço Jesús ngain tti venihi:

—Ttinxe rá.

Co jehe tti xí mé coinxe rá co ndaxingamehe ra. ⁶ Cottimeja cain xifariseo sacjoi xa co coexinhi xa cjoao xa chojni que vacao Herodes ixin queñén sinchehe na para nasoenxon na Jesús.

Are anto tsje chojni xatte ngandehe lago

⁷ Cottimeja Jesús sacjoixin de nttiha conixin cainxin chojni que vacao co sacjoi na para ngandehe lago de Galilea co anto tsje chojni Galilea rroé na. ⁸ Co chojni joixin de nontte dinhi Judea, de ciudad de Jerusalén co de ngain iná nontte dinhi Idumea. Icha chojni joixin lado çhinxin nchanho de río Jordán. Icha na joixin na de ngain ciudad de Tiro co Sidón. Co icha na joixin na de icha rajna. Cainxin chojni mé cjoai na joitsjehe na Jesús ixin jehe na conohe na de ixin cainxin cosa jian que vanchehe Jesús. ⁹ Mexinxin Jesús ndache chojni que vacao ixin cjoé na ná barco para sengá ngataonhe jinda are rroxatte tsje chojni para sixintjaha chó na ngaca Jesús. ¹⁰ Ixin anto tsje chojni venihi joinchexingamehe Jesús, mexinxin cainxin ninhi vaçattetja na Jesús para vacatte na. ¹¹ Co are chojni que vechonda espíritu jianha vaguicon Jesús, vaguettoxin nntajochjihí co vandaço sén:

—¡Jaha tti Xenhe Dios!

¹² Pero Jesús vaquetonhe ixin rrondaçhoaha quensen jehe Jesús.

Jesús coinchiehe tti tteyó chojni que vacao

(Mt. 10.1-4; Lc. 6.12-16)

¹³ Cottimeja Jesús coani ná jna, co nttiha jehe vayé chojni que jehe joinao coinchiehe co jehe na conchienne na ngain jehe. ¹⁴ Co jehe coinchiehe tteyó chojni para sacao co para rrorroanha na icanxin rajna para rronichja na joajné Dios. ¹⁵ Co joanjo joachaxin ngain na para sinchexingamehe na chojni nihi co para senguixin na espíritu jianha de ngain chojni. ¹⁶ Co janhi vinhi tti tteyó chojni mé. Ná vinhi Simón, co Jesús joincheguinhi jehe Pedro cai; ¹⁷ co Jacobo conixin Juan xanchó jehe Jacobo, co cayoi nimé xenhe Zebedeo co cayoi nimé Jesús joincheguinhi na Boanerges ixin anto çhintto vintte na; ¹⁸ co icha chojni vinhi Andrés; Felipe; Bartolomé; Mateo; Tomás; co iná tti vinhi Jacobo cai, pero mé xenhe Alfeo; co Tadeo; co Simón, jehe ná de tti partidoe chojni politico que vaquetocaho chojni romano; ¹⁹ co Judas Iscariote, tti joindaço para tse na Jesús.

Are ndaço chojni ixin Jesús chonda joachaxín Satanás

(Mt. 12.22-32; Lc. 11.14-23; 12.10)

Cottimeja Jesús sacjoi ngain nchia tti vehe conixin cain chojni que vacao. ²⁰ Co nttiha anto tsje chojni xatte iná co çonhi tiempo vechonda Jesús ni para joine conixin cain chojni que vacao. ²¹ Co are conohe

niparienté Jesús ixin quehe vanchehe, jehe na cjoí na para sarrojicaon na Jesús ixin xaxaon na que Jesús ndajoinchetján sentidoe.

²² Cai canxion ximaestroey ley que joixin de ciudad de Jerusalén ndačho xa:

—Xí jihí chonda xa Beelzebú, tti ttetonha ngain cain espíritu jianha, ixin jehe xa nchao ttetonha xa co denguí xa espíritu jianha.

²³ Cottimeja Jesús vayé cain chojni mé co ndačho ná ejemplo ngain na:

—¿Satanás quexén senguí xajeho Satanás? ²⁴ Co si ná gobierno chjea para tsetocaho chó, gobierno mé čhoha tsončhenhe sé ²⁵ co si ná nindoha ngain nchia atto tteto na, cai tsončjenha. ²⁶ Co cai Satanás si tseto jeho, cai tsončjenha sé. Chonda que ndatsjexin.

²⁷ Xónhi quensen sixinhi ngaxinhi nchiandoha ná xí que anto tsanga para santsjehe cosé xa que chonda xa ngaxinhi nchiandoha xa si tsiaha xa saho. Solo jamé para nchao sasicaon cosé xa que jí ngaxinhi nchiandoha xa.

²⁸ Anto ndoa tti rrondattjo ra: Cain chojni nchao sitjañehe cainxin cosa jianha que nchehe na co cainxin tti jianha que nichja na. ²⁹ Pero chojni que nichja jianha ixin Espíritu Santo, chojni mé nchoe sitjañeha, co cainxin tiempo sintteca na tti jianha mé.

³⁰ Jañá ndačho Jesús ngain na ixin jehe na ndačho na ixin Jesús vechonda espíritu jianha.

Janné Jesús co xanchó

(Mt. 12.46-50; Lc. 8.19-21)

³¹ Cottimeja cjoí janné Jesús conixin xanchó pero čhoha joixinhi na nchia ixin anto tsje chojni te ngain Jesús. Mexinxin tavintte na ndoja co coetonha na que rroquí ngain na. ³² Co chojni que tate ngaca Jesús ndačho na ngain:

—Janná co xanchó ndoja nttihi te na, co rinao na rronichjaha na jaha.

³³ Co Jesús ndačho:

—¿Quensen jannana, co quecá xanchian?

³⁴ Cottimeja Jesús tsjehe ngayehe cain nite ngandanji jehe co ndačho:

—Cain chojni tehe tti inchin jannana co jehe na tti inchin xanchian, ³⁵ ixin quexeho chojni que nchehe inchin rinao Dios, mé tti xanchian co mé tti jannana.

4

Ejemploe tti joiquenga trigo ngataon jnguí

(Mt. 13.1-9; Lc. 8.4-8)

¹ Iná nchanho Jesús coexinhi cjoagoe chojni de ixin Dios ngandehé lago de Galilea, co xatte anto tsje chojni ngain Jesús nttiha. Mexinxin Jesús vengá ná barco que vehe nttiha ngataonhe jinda. Co cainxin chojni vittohe na ngandehé jinda. ² Cottimeja Jesús cjoagoe na anto tsje cosa de ixin ejemplo co cai ndačho janhi ngain na:

³ —Ttinhí ra tti rrondačhan janha. Ná xí cjoí xa joiquenga xa trigo ngataon jnguí. ⁴ Pero are jitja xa trigo ngataon jnguí toha noanchjan de trigo vinttji ngá nttiha co joí conttoa co ndajoiné va trigo mé. ⁵ Co icha noanchjan de trigo vinttji ngataha tti jí ttjao tti ttjinha jinche jí. Co trigo mé anto daca čhinhi ixin ttjinha jinche xanotaon. ⁶ Pero nchanho toin ndajoinchexema catrigo mé ixin tsjeha noehé ca vechonda ca. ⁷ Co icha noanchjan de trigo vinttji ngagaha canchaha. Co canchaha icha daca

vanguí ca co coančjandaha ca trigo vanguí, co cain catrigo mé xonhi joinchechjian ca. ⁸ Pero ichta noanchjan de trigo vinttji tti jian jinche, co trigo mé nchoe joanjo noa. Canxion nihi trigo mé joinchechjian de treinta noanchjan cada ninchjan, co icanxin trigo joinchechjian hasta sesenta noanchjan cada ninchjan, co icanxin trigo joinchechjian hasta cien noanchjan cada ninchjan.

⁹ Co ndačo Jesús ngain na cai:

—Xo nchao ttinxin ra, ttinhi ra jian.

Quedonda Jesús joinchegonda tsje ejemplo

(Mt. 13.10-17; Lc. 8.9-10)

¹⁰ Cottimeja are sacjoi cainxin chojni co jehó Jesús conixin tti tteyo chojni que vacao co icanxin ni xa vittohe nttiha, joanchiangui na ngain Jesús ixin quehe rročo ejemplo mé. ¹¹ Co Jesús ndačo ngain na:

—Jaha ra Dios ndačo ixin tsonoha ra tti jima de ixin quexén ttetonha jehe. Pero janha nichja ngain chojni que čhjioha na jehó de ixin ejemplo. ¹² Jamé para que masqui dicon na tti nttaha pero inchin rroguiconha na, co masqui ttinhi na tti ndačjan pero ttinxinha na, co para tsentoxinha vidé na ni sitjañeha na cain cosa jianha que nchehe na.

Jesús ndačo quehe rročo ejemploe tti joiquenga trigo

(Mt. 13.18-23; Lc. 8.11-15)

¹³ Ndačo Jesús ngain na cai:

—¿Attinxinha jaha ra quehe rročo ejemplo jiji? ¿Mexinxin quexén tsinxin jaha ra ichta ejemplo que janha rrondačjan? ¹⁴ Tti coenga trigo, mé inchin tti ndačo joajné Dios ngain ichta chojni. ¹⁵ Canxion chojni inchin tti trigo que vetsinga ngá nttiha, rročo ixin ttinhi na joajné Dios, pero Satanás tti co ndanchetjañeha na palabra que coinhi na. ¹⁶ Icanxin chojni inchin tti trigo que vetsinga ngataha tti jí ttjao ixin are ttinhi na joajné Dios, anto čhjoin tonohe na dayé na joajna mé. ¹⁷ Pero inchin trigo que chondaha tsje noehe seha tončjenhe trigo, jamé jehe chojni mé cai; cottimeja are tangui tonhe na co ichta chojni feo nchehe ngain na ixin ditticaon na joajné Dios, jehe na ndadoan na desanimado. ¹⁸ Co icanxin chojni inchin tti trigo que vinttji ngagaha canchaha. Rročo que jehe na ttinhi na joajné Dios ¹⁹ pero ichta xaxaon na cain problema que jehe na chonda na nttihi ngataha nontte, co tomi ncheyehe na para ichta nchexoxinhi na cosa que jí ngataha nontte. Co cain yá ndanchetjanji joajna mé, co incheha na inchin ttetonha joajna jiji. ²⁰ Pero te icanxin chojni que ttinhi na joajné Dios co dayé na ngain ansén na co nchehe na inchin ttetonha joajna mé. Co cain chojni mé inchin tti trigo que vinttji tti jian jinche co joanjo tsje noatrigo. Canxion chojni mé inchin tti trigo que joinchechjian de treinta noa ngain nacoa ninchjan, co icanxin na inchin tti trigo que joinchechjian de sesenta co de cien noatrigo ngain nacoa ninchjan.

Ejemploe lámpara

(Lc. 8.16-18)

²¹ Cai ndačo Jesús:

—¿Apoco ná chojni sinchegacaon ná lámpara cottimeja tsema lámpara mé ngaxinhi ná cajón o ngangui saoen? Nahi, chonda que tsín lámpara ngataha ná cosa noi para nchao sinchengasán ngaxinhi nchia. ²² Xonhi cosa jima que tsononxinha, co xonhi cosa jima que texaxaon ni ngain

ansén ni que chojni tsonoeha; cain cosa chonda que tsononxin cosa.
²³ Jaha ra que ttinxin ra, ttinhi ra jian.

²⁴ Cai ndačo Jesús:

—Ttjiho ra cuidado tti tsinhi ra. Inchin medida que jaha ra dattechoaxin ra, Dios jamé sattechoha jaha ra cai. Co Dios rrochjá ra icha, jaha ra ʒo ttinxin ra. ²⁵ Ixin chojni que chonda, Dios tsjenguijna na para rrochonda na icha, pero chojni que ʒonhi chonda, Dios santsjehe cainxin tti jehe na chonda na masqui tsjeha chonda na.

Ejemplo de quexén dangui jino

²⁶ Ndačo Jesús cai:

—Tti tteonha Dios inchin noa que ttenga chojni ngataon jngui.
²⁷ Chojni ttenga co sacjan dinttejoa, cottimeja dingattjen co jamé datto ttie co datto nchanho. Co noa ʒhintaon noa co ʒhinhi jino pero tti jnguihi noeha quexén dangui jino mé. ²⁸ Ixin nontte nchegangui jino mé. Saho ʒhinhi ʒán jino cottimeja ntté, cottimeja noa. ²⁹ Co are ocha noa mé ngain ní co ndaxema ní jian, ovittja tiempo para tsanda na ní mé.

Ejemplo de ná tsé que dinhi mostaza

(Mt. 13.31-32; Lc. 13.18-19)

³⁰ Cai ndačo Jesús:

—¿Quehe cosa nchao sinttacininxin tti tteonha Dios? ³¹ Mé inchin ná tsé icha nchin de cainxin tsehe ca co tsé mé dinhi mostaza. ³² Pero are dinga tsé mé, dangui qué tse icha que cainxin ca hasta conttoa nchao nchejogaha va ngagaha ntté ca mé.

Quexén vanchegonda Jesús cain ejemplo

(Mt. 13.34-35)

³³ Jańá vacjago Jesús joajné Dios conixin tsje ejemplo inchin cain ejemplo yá, hasta tti, chojni nchao coinxin jian. ³⁴ Jesús jeho nichjé chojni de ixin ejemplo, pero después, vandache chojni que vacao tti rročo cainxin ejemplo yá.

Jesús tajoaquehe ʒhintto conixin olé lago

(Mt. 8.23-27; Lc. 8.22-25)

³⁵ Nchanho mé are ndaconttie, Jesús ndache chojni que vacao:

—Sachjin na toenxin lago jiji.

³⁶ Cottimeja nttiha cointtohe na cainxin chojni co sajoicao na Jesús ngá barco tti vengá. Co rroé icanxin barco cai. ³⁷ Co joí ná ʒhintto anto soji ngataon jinda; anto soji coeto nda co viquia nda barco tti jidicao Jesús. ³⁸ Co are mé Jesús tajicjon ná almohada tajijoa ngá barco ngain ná lugar noton barco, co chojni que vacao Jesús joinchexingamehe na co ndačo na ngain jehe:

—¡Maestro! ¿Andosanha ixin ndatexincanjngui na jinda?

³⁹ Cottimeja vingattjen Jesús, co joinchesattehe ʒhintto co jinda co ndačo ngain:

—¡Tenco! ¡Co tadaríhi ndacoa!

Co rato mé tavehe ʒhintto ndacoa co tavehe jinda ndacoa. ⁴⁰ Cottimeja ndačo Jesús ngain chojni que vacao:

—¿Quedonda anto ʒaon ra? ¿Quedonda ʒa chondaha ra confianza ngain Dios?

⁴¹ Pero jehe na anto ʒaon na, co jeho na ndache chó na:

—¿Quensen jiji que hasta ʒhintto co jinda ditticaon tti jehe ndačo?

5

Tti xí de ngain nonttehe Gadara que vechonda espíritu jianha
(Mt. 8.28-34; Lc. 8.26-39)

¹ Joiji na toenxin lago mé, ngain nonttehe Gadara. ² Co are Jesús vachjexin de ngá barco, jói ngain Jesús ná xí que vechonda espíritu jianha. ³ Xí mé vehe ngaxinhi tti vaʒanguindehe na chojni que ndavaguenhe tiempo mé. Co ʒonhi chojni coixinhi coia xa masqui conixin cadena. ⁴ Tsje nttiha are icha saho chojni ʒa vaquixinhi na vaquiixin na xa cadena rotté xa co rá xa, pero cainxin tiempo jehe xa vaconchintaon xa cadena co vagáña xa cadena. Co iʒonhi chojni vaquixinhi ngain xa. ⁵ Co cain tti vacji xa ngagaha jna co ngaxinhi tti vaʒanguindehe na chojni que ndavaguenhe puro vacoyao xa ttie co nchanho, co vanchenihi nntaohé xa conixin ʒo. ⁶ Pero are vicon xa Jesús ʒa cjon, jehe xa coinga xa jói xa ngain Jesús co vettoxin nntajochjihi xa ngattoxon con Jesús; ⁷ co ndačo xa sén:

—¿Quedonda dixintte nganji, jaha Jesús, Xenhe Dios que ttjen ngajni? Conixin nombré Dios nntatsanha ñao que ncheguetanha na tangui janha.

⁸ Ndačo jañá ixin Jesús ojindačo ngain:

—Jaha espíritu jianha, sattjixin de ngain xí jihi!

⁹ Co Jesús joanchiangui co ndačo:

—¿Queʒén dinhi jaha?

Co jehe espíritu jianha ndačo:

—Janha dinhi na Legión ixin janha na anto tsje na.

¹⁰ Co espíritu jianha anto joinchetsenhe ñao Jesús ixin senguixinha de ngain región mé. ¹¹ Co ixin nttiha vintte anto tsje cocochi vajinea va chiaon rotté ná jna, ¹² mexinxin cain espíritu jianha joinchetsenhe ñao Jesús co ndačo:

—Rroanha ni ra ngain cocochi taha co tančjanda ni ra sixinhi na ngaxinhi va.

¹³ Cottimeja Jesús joanjo joachaxin, co cain espíritu jianha mé vachjexin de ngaxinhi xí mé, co sajoixinhi ngaxinhi cocochi. Nttiha vintte inchin yó mil cocochi, co cainxin cocochi mé ndavinttecoloco va co coinga va xincanji va ngain lago co nttiha joingui va jinda co ndavintteguenxin cainxin va ixin vinttecjonhe va jinda.

¹⁴ Cottimeja cain chojni que vaquingaria cocochi mé ʒaon na co coinga na joiquequin na chojni ngagaha rajna co icha chojni que vintte ngataon jngui. Co cjoí chojni mé joitsjehe na quehe conhe. ¹⁵ Co are joiji na tti jí Jesús, vicon na tti xí que vechonda tsje espíritu jianha ojingá xa lonttoe xa co tají xa ndacoa. Co jehe na are vicon na mé, anto ʒaon na. ¹⁶ Co cain chojni que vicon coequin na queʒén conhe tti xí que vechonda tsje espíritu jianha co queʒén conhe cain cocochi. ¹⁷ Cottimeja cain na coexinhi na joinchetsenhe na ñao Jesús que satsjixin de ngain nonttehe na.

¹⁸ Are Jesús coani barco, tti xí que vechonda tsje espíritu jianha joinchetsenhe ñao Jesús ixin rrocji ngain Jesús cai. ¹⁹ Pero Jesús čhoaha, co ndačo:

—Sattji para nchiandoi co diquequinhi cain ni ichó cainxin tti joinchehe Dios nganji, co queʒén coiaconoaha.

²⁰ Cottimeja tti xí mé sacjoi co joi quequín chojni que vintte regioen Decápolis cainxin tti joinchehe Jesús ngain jehe. Co cainxin chojni que coinhi, goan na admirado.

Are xingamehe xannchichjenhe Jairo conixin ná nchí que catte lonttoe Jesús

(Mt. 9.18-26; Lc. 8.40-56)

²¹ Co are Jesús cjan toenxin lago iná conixin barco, cjoí anto tsje chojni ngain Jesús, co jehe nttiha tavehe ngandehe jinda. ²² Cottimeja joí ná xí que vaquetonha xa ngain nihngo nttiha, co vinhi xa Jairo. Are Jairo joí, vettoxin nttajochjiji ngain Jesús, ²³ co anto joinchetsenhe ñao Jesús co ndačo:

—Xannchichjanhna ndajidenhe xan. Nttatsanha ñao, chjin na co ttín rá ngataha xan para rroxingamehe xan co sechon xan icha.

²⁴ Cottimeja sajoicao xí mé Jesús. Pero anto tsje chojni cjoí cai co anto conttedo na ngaca Jesús. ²⁵ Co ngacjén chojni mé vehe ná nchí que venihi ncha; ovechonda tteyó nano que veguenguihi ncha jni. ²⁶ Co anto tsje ngain xincheñoan cjoí ncha pero xonhi xon vittja. Ojoexin joinchexinhi ncha cainxin tti vechonda ncha, pero icha co icha venihi ncha. ²⁷ Co are coinhi ncha ixin Jesús vanchexingamehe tsje chojni, conchienne ncha ngacjén chojni co jimao catte ncha lonttoe Jesús, ²⁸ ixin vařaxaon ncha co vandačo ncha: “Si rrocatte masqui jeho lonttoe Jesús, janha rroxingamana.” ²⁹ Co are nchí mé catte ncha lonttoe Jesús, rato mé tavehe jni que jehe ncha vechonda ncha. Co conohe ncha ngain cuerpoe ncha ixin ondaxingamehe. ³⁰ Cottimeja Jesús conohe ixin ná chojni ojoinchegonda joachaxin que chonda Jesús. Mexinxin ngaria Jesús co tsjehe ngayehe chojni co joanchiangui co ndačo:

—¿Quensen catte lonttona?

³¹ Cottimeja chojni que vacao Jesús ndačo na:

—Soixin dicen que anto tsje chojni tonttedo na ngaca soixin, mexinxin quedonda soixin danchiangui: “¿Quensen catte?”

³² Pero Jesús tsjehe ngayehe na para rroguicon quensen catte lonttoe. ³³ Cottimeja nchí mé onohe quehe conhe, co jiřanga ncha de ixin joařaon cjoí ncha vettoxin nttajochjiji ncha ngain Jesús, co ndačo ncha ixin quehe joinchehe ncha. ³⁴ Cottimeja Jesús ndačo ngain nchí mé:

—Jaha oxingamaha ixin vitticaon na. Sattji contenta ixin irrocjanha tsoniha de ixin chin que jaha joarichonda.

³⁵ řa jinichja Jesús jařá are joí canxion chojni de ngain nchiandoha Jairo co ndačo na ngain Jairo:

—Xanha ondavenhe xan. Inchemolestaha ximaestro.

³⁶ Pero Jesús joincheha caso tti ndačo na, co ndačo Jesús ngain Jairo:

—řaonha; jeho ditticaon na janha.

³⁷ Co sajoicao Jairo Jesús ngain nchiandoha pero Jesús řhoha joicao tsje chojni, jeho Pedro, Jacobo co Juan xanchó Jacobo. ³⁸ Co are joiji na ngain nchiandoha Jairo, cainxin chojni que te nttiha anto tetsjanga na co tetoyao na. ³⁹ Jesús joixinhi co ndačo ngain na:

—¿Quedonda anto toyao jaha ra co tsjanga ra? Xannchichjan ndavenha xan, jeho tajioa xan.

⁴⁰ Pero jehe na cjoanoa na Jesús. Cottimeja Jesús ndache cain chojni mé que vařjexin na de nchia. Co jeho Jesús conixin ndodé xannchichjan

co janné xan conixin tti ní chojni que joicao Jesús joixinhi na tti jí xannchichjan mé. ⁴¹ Co Jesús tsehe rá xan co ndačo ngain xan:

—Talita, cumi —que rročo: Xannčí, janha rroundattjo, dingattjen.

⁴² Co rato mé, jehe xannchichjan mé, que vechonda tteyó nano, vingattjen xan co nchao sacjoixin rotté xan. Co cain chojni nttiha anto goan na admirado. ⁴³ Pero Jesús anto coetonhe na ixin xonhi chojni rroundache na de ixin tti joinchehe Jesús. Co ndačo Jesús cai ixin rrochjé na xannchichjan mé sine xan.

6

Jesús ngain Nazaret

(Mt. 13.53-58; Lc. 4.16-30)

¹ Cottimeja Jesús conixin chojni que vacao sacjoixin na de nttiha co sacjoi na para Nazaret, rajné Jesús. ² Co are jói nchanho para nchejogaha chojni Israel, Jesús coexinhi cjoagoe na de ixin Dios ngaxinhi nihngo. Co tsje chojni tti coinhi quehe nichja Jesús goan na admirado co ndačo na:

—¿Ttinó coanguixin xí yá cainxin cosa yá? ¿Quexén xí yá anto jian chonxin de ixin Dios, co quexén nchehe xa anto tsje milagro? ³ Xí yá tti carpintero, xenhe María co xanchó xa Jacobo, José, Judas co Simón; co cai cain xanchó xa xannčí nttihi te xan ngain rajná na.

Mexinxin čhoha na joinchehe na caso tti ndačo Jesús. ⁴ Pero Jesús ndačo ngain na:

—Cainxin chojni nchesayehe ná profeta, pero nahi profeta que ttixin de ngain xajeho rajné na ni profeta que ttixin de ngain xajeho familié na ni de ngain xajeho nindoha na.

⁵ Mexinxin Jesús čhøjaha joinchexingamehe tsje chojni nttiha. Pero Jesús catte nchion chojni nttiha co jehe na xingamehe na. ⁶ Co Jesús goan admirado ixin chojni nttiha čhoha na vitticaon na ngain jehe. Cottimeja Jesús coingaria icanxin rajna que te chiaon para joicjagoe chojni de ixin Dios.

Jesús rroanha chojni que vacao para joinichja na de ixin Dios

(Mt. 10.5-15; Lc. 9.1-6)

⁷ Cottimeja nichja ngain tti tteyó chojni que vacao co rroanha yó co yó na ngain icha rajna para joinichja na de ixin Dios. Co jehe Jesús joanjo joachaxin ngain na cai para sengui na espíritu jianha que te ngain chojni. ⁸ Co coetonha ngain na cai que xonhi sicao na ngoixin tti satsji na, ni ná bolsa, ni niottja, ni tomi. Jeho sicao na nttacotto para tsjixin na are tsončjen na co ⁹ catte corriente tsjanga na co sinttengá na nanacoa camisa, čhoha sinttengá na yoyó camisa. ¹⁰ Co ndačo Jesús ngain na cai:

—Are saso ra ná nchiandoha na co jehe na rroundačo na ixin nchao tasinte ra nttiha, jaha ra tadinte ra nttiha hasta que satsjixin ra de ngain rajna mé. ¹¹ Co sí čhonja rajna sinaoha na sayaha ra na ni sinaoha na tsinhi na tti rronichja ra, dachjexin ra de nttiha co tontsjenga ra jinche que jiyá cattea ra. Jamé para ná señal ixin vitticaonha ra na. Co ndattjo ra que are tsí nchanho que Dios sinchejusguehe cainxin chojni, are mé, seguro que chojni que vintte ngain ciudad Sodoma co Gomorra icha sojiha castigo sayé que cain chojni ngain rajna tti rročhoha sayaha ra.

¹² Cottimeja savinttecji chojni que vacao Jesús ngain tsje rajna co ndache na cain chojni ixin chonda na que tsentoxinhi vidé na. ¹³ Co cai

venguixin na tsje espíritu jianha de ngaxinhi cuerpoe chojni, co coinga na aceite ngataha já tsje chojni nihi, co jamé joinchexingamehe na na.

Are ndavenhe Juan, tti vanheguitte chojni

(Mt. 14.1-12; Lc. 9.7-9)

¹⁴ Are ngoixin mundo venohe quehe vanchehe Jesús, cai rey Herodes conohe co ndačo:

—Juan tti vanheguitte chojni cjan xechon, mexinxin chonda cain joachaxin yá.

¹⁵ Co icanxin chojni vandačo:

—Mé tti profeta Elías.

Co icanxin chojni vandačo:

—Mé ná profeta inchin cain profeta que vacji are saho.

¹⁶ Pero are Herodes coinhi cain yá, jehe ndačo:

—Jehe seguro Juan, tti janha coetonha para činji já, co jai xechon.

¹⁷ Are saho Herodes coetonha para joicao na Juan viaxinhi co coia na conixin cadena ngaxinhi cárcel ixin ná naníta vinhi Herodías ndačo jamé. Jehe Herodías cjoí čihi Felipe, xanchó jehe Herodes, pero Herodes joantsjehe xanchó čihi xan para vecaho jehe Herodes. ¹⁸ Co are mé Juan ndačo ngain Herodes:

—Jianha ixin jaha rricoho čihi xanchó.

¹⁹ Mexinxin jehe Herodías anto goñao ngain Juan ixin ndačo Juan jañá, co joinao narrogoenxon Juan. Pero čoha joinchehe mé ²⁰ ixin Herodes venohe que Juan anto jian ngain ansén co vaguitticaon ngain Dios. Mexinxin vañaon Herodes para narrogoenxon Juan, co coančjandaha Herodes Herodías para cjoaya ngain Juan. Co masqui Herodes antoha jian vaquinxin tti vandačo Juan, pero jehe ján vajinao vaquinihi. ²¹ Pero are quié Herodes, Herodías nchao coetonha para ndavenhe Juan. Ixin are mé Herodes vechonda ná vandango. Co jehe joanjo joine tsje xí que vaquetonha ngain regioen Galilea, co tsje xí que vaquetonha ngain xisoldado, co icha chojni importante nttiha. ²² Co ná xannčí xenhe Herodías joixinhi xan co tte xan ngaxinhi nchia tti tenexin cainxin chojni mé. Herodes co icha chojni que tenecaho nttiha anto joincheřoxinhi na ixin queřén tte xannčí mé. Mexinxin Herodes ndačo ngain xannčí mé:

—¿Quehe cosa rinao? Danchiana co janha rrochjaha.

²³ Co jehe Herodes ndačo co joinchejurá ixin sanjo quexeho cosa sanchia xannčí mé masqui hasta ngosinexin región que jehe vaquetonha. ²⁴ Jehe xan vačje xan co ndačo xan ngain janné xan:

—¿Quehe sanchiá rey?

Co janné xan ndačo:

—Danchiehe rey já Juan tti ncheguitte chojni.

²⁵ Co jaicoa cjan xan joixinhi xan tti jí rey co ndačo xan ngain:

—Janha rinaho que jai rrochjana já Juan ngá ná láto.

²⁶ Cottimeja rey anto vechín. Pero ixin jehe ojoinchejurá ixin sanjo tti sanchia xan, co ixin coinhi cain chojni que te ngain, mexinxin jehe joinaoha ndache xannčí mé nahi. ²⁷ Co rato mé coetonhe Herodes ná xisoldado para joirroé xa já Juan. ²⁸ Cjoí xisoldado mé ngain cárcel tti jiaxinhi Juan co cončinjihí xa já co ngá ná láto joiaoxin xa co joanjo xa ngain xannčí, co jehe xan joanjo xan ngain janné xan.

²⁹ Co are cain chojni que vacao Juan conohe na quehe conhe, joí na co sajoicao na cuerpoe para joicjavá na cuerpo.

*Are Jesús joanjo joine naho mil xí
(Mt. 14.13-21; Lc. 9.10-17; Jn. 6.1-14)*

³⁰ Are nirepresentanté Jesús joixin na de ngain cain rajna tti sacjoi na, cjan na para ngain Jesús, co ndačo na quehe joinchehe na, co quehe cjoagoe na chojni ngoixin tti cjoi na. ³¹ Cottimeja Jesús ndačo ngain na:

—Ķacoi ra, chjin na dinttojogaha na ná lugar tti xonhi chojni jí.

Jesús ndačo jańá ixin vacji co vacjan anto tsje chojni ngain na, co ni tiempo vechondaha na para vane na. ³² Cottimeja jeho Jesús conixin nirepresentanté sacjoi na ngá barco para iná lugar tti xonhi chojni vintte. ³³ Pero anto tsje chojni vicon are sacjoi co joatsoan na Jesús. Mexinxin anto tsje chojni de tsje rajna coinga na joichonhe na nttiha co icha saho joiiji cain jehe na que Jesús. ³⁴ Co are Jesús vačhjexin de ngá barco, vicon anto tsje chojni nttiha iná, co Jesús coiaconoehe na ixin jehe na sín na nttiha xá coleco que xonhi chojni ttingaria. Co Jesús coexinhi joinchecoenhe na nttiha tsje cosa de ixin Dios. ³⁵ Co are ocotsocjin chojni que vacao Jesús joí na ngain co ndačo na:

—Otsocjin co nttihi xonhi nchiandoha chojni te. ³⁶ Ttetonhe cain chojni satsji na tti jí nchia o rajna icha chian para siquehna na tti sine na, ixin xonhi chonda na.

³⁷ Co Jesús ndačo:

—Jaha ra danjo ra tti sine na.

Co jehe na ndačo na:

—¿Quexén janha na tsji na siquehna na niottja para sine cainxin chojni yá? Ixin tomi que sitte cain niottja que sine cain chojni yá inchin tsjexin tomi que dacha ná ninchehe xá yáto conittjao.

³⁸ Co Jesús ndačo ngain na:

—¿Quejanhi niottja chonda ra? Sattji ra ditsjehe ra.

Co are jehe na conohe na quejanhi niottja techonda na, joí na co ndačo na ngain Jesús:

—Jí naho niottja co yó copescado.

³⁹ Cottimeja Jesús coetonhe cainxin chojni para tavintte na grupochjan co grupochjan ngataha cachji. ⁴⁰ Co tavintte na de cien na co de cincuenta na ngataha cachji. ⁴¹ Cottimeja Jesús coá tti naho niottja co tti yó copescado co tsjehe para noi co chjé gracias ngain Dios. Cottimeja váńa niottja co copescado co chjé chojni que vacao para conchjejehe na cainxin chojni. ⁴² Co cainxin chojni joine na co cojehe na jian. ⁴³ Cottimeja xá joinchecaon na tteyó nntaxa de tti xexin joine na, de niottja co copescado. ⁴⁴ Co jeho xí que joine niottja mé cjoi naho mil xa.

*Jesús cjoixin rotté ngataonhe jinda
(Mt. 14.22-27; Jn. 6.16-21)*

⁴⁵ Cottimeja Jesús coetonhe chojni que vacao para coani na barco co coattoa na lago para sacjoi na ngain rajna Betsaida icha saho que jehe. Co Jesús vittohe nttiha para jindache chojni que onchao sasinttecji na. ⁴⁶ Co are cainxin chojni sacjoi, Jesús sacjoi para ngagaha ná jna para joinchecoanxinxin Dios. ⁴⁷ Co are ondacontie, barco ojoiiji ngosine jinda, co vé jeho Jesús vittohe nttiha. ⁴⁸ Co Jesús vicon ixin anto tangui tedeca na barco ixin čhintto anto soji joixin čhintto de tti satettji na.

Co ndoyo mé Jesús coingachjetaha jinda co sacjoi hasta tti ngain na co jehe joinchehe inchin rrogatto nao. ⁴⁹ Pero are jehe na vicon na Jesús sajittji conixin rotté ngataonhe jinda, jehe na řaxaon na ixin mé ná nttanchanha, co coyao na ⁵⁰ ixin cainxin na vicon na co anto řaon na. Pero Jesús nichja ngain na co ndařho:

—Řaonha ra, janha joihi.

⁵¹ Co coani barco tti tengá na, co rato mé tavehe řhinto. Jehe na anto řaon na co anto goan na admirado ⁵² ixin řa coinxinha na quehe rrořho tti joinchehe Jesús conixin niottja. Ixin řa cha ansén na.

Jesús joinchexingamehe tsje chojni nihi ngain nonttehe Genesaret (Mt. 14.34-36)

⁵³ Coattoa na lago mé co joihi na nonttehe Genesaret. Co nttiha coenřhoa na barco ngandehe jinda. ⁵⁴ Co are vaniaxin na de barco, chojni que te nttiha anto daca joatsoan na Jesús. ⁵⁵ Co anto daca joinchenohe chó na ngoixin región nttiha. Co cainxin lugar tti sacjoi Jesús, joicao na ninihi conixin camilla ngain Jesús. ⁵⁶ Co ngoixin tti vacji Jesús ngain colonia o ngain ranchería o ngagaha rajna, chojni vaquín na ninihi ngá nttiha co vanchetsenhe na ñao Jesús ixin sittoexin que ninihi rrotse na masqui rioho ngandehe lonttoe Jesús. Co cainxin chojni que tse lonttoe Jesús xingamehe na.

7

Tti nchejianha chojni (Mt. 15.1-20)

¹ Co conchienne canxion xifariseo ngain Jesús conixin icanxin ximaestro ley Israel que joixin de ngain ciudad de Jerusalén. ² Chojni mé vicon ixin canxion chojni que vacao Jesús vaconttiha na jinda rá na tsje nttiha are vane na inchin ttetonha costumbré na. Mexinxin xifariseo co ximaestro ley feo nichja xa de ixin chojni que vacao Jesús. ³ (Jamé ixin cain xifariseo co icha chojni Israel anto vaguitticaon na co vanchehe na costumbré cain ndogoolitoe na řanřjen are icha saho. Rrořho que cainxin tiempo vacontti na jinda rá na tsje nttiha saho de vane na. ⁴ Co are vaquixin na ndásin co si vaconttiha na jinda rá na tsje nttiha saho, vajineha na. Cai vechonda na tsje costumbre icha, inchin queřén vacjén na taza co chi co traste de chia co saoen na.) ⁵ Cottimeja joanchianguí na ngain Jesús co ndařho na:

—¿Quedonda chojni que řhjiho ditticaonha na costumbré ndogoolitoe na řanřjen? Ixin jehe na tonttiha na jinda tsje nttiha saho que jine na.

⁶ Cottimeja Jesús ndařho ngain na:

—¡Jaha ra chojni que ncheha inchin ndařho! Mexinxin nchao diquentaxin Isaías janhi de ixin jaha ra:

Chojni tehe nchesayana na conixin rroha na, pero ngain ansén na řa icjin te na para sinao na na janha.

⁷ Mexinxin řonhi řé masqui tenchecoanxinna na

ixin tti jehe na tenchecoenhe na chojni joxon tti ttetonha xí nttihi ngataha nontte. ⁸ Jihi ndoa de ixin jaha ra ixin jaha ra ditticaonha ra tti ttetonha Dios sino que nchehe ra inchin ndařho costumbré ndogoolitoe ra řanřjen. Rrořho costumbre de queřén ttjén ra vaso co chi co icha costumbre inchin mé.

⁹ Co Jesús ndařho ngain na cai:

—Jaha ra coín ra ná lado tti ttetonha Dios para nchao nchehe ra inchin ndačo costumbrea ra. ¹⁰ Ixin ley que vayé Moisés ndačo: “Ttjiho ra respeto ngain ndodá ra co ngain janná ra”, co “Tti rronichja jianha ngain ndodé o ngain janné, chojni mé jiquinixin ndasenhe.” ¹¹ Pero jaha ra ndačo ra ixin ná chojni nchao rrondache ndodé o janné: “Janha čoha tsjenguijna soixin ixin cain tti janha chonda, mé Corbán” (co jihi rročo ixin jehe ojoanjo cain mé ngain Dios). ¹² Co si ná chojni ndačo jańá, jaha ra itančjandaha ra para tsjenguijna ndodé o janné. ¹³ Co jańá jaha ra incheha ra caso tti ttetonha Dios, sino que jehó nchehe ra inchin costumbre que vayehe ra de ngain ndogolitoa ra co tti jaha ra nchecoenhe ra xanha ra jai. Co nchehe ra icha cosa jianha inchin jihi cai.

¹⁴ Cottimeja Jesús nichjé cainxin chojni iná co ndačo ngain na:

—Ttinhí ra jian cainxin tti janha rrondačjan co ttinxin ra. ¹⁵ Jehá tti jine chojni nchejianha na. Tti ttixin ansén chojni, mé tti nchejianha chojni. ¹⁶ Jaha ra que ttinxin ra, ttinhí ra jian.

¹⁷ Cottimeja Jesús cjan sajoixinhi nchia, co are Jesús ngaxinhi nchia, chojni que vacao Jesús joanchiangui na ngain jehe ixin quehe rročo ejemplo mé. ¹⁸ Co Jesús ndačo ngain na:

—¿Acai jaha ra ttinxinha ra? ¿Attinxinha ra que jehá tti jine chojni nchejianha na? ¹⁹ Tti jine chojni ttjiha ngaxinhi ansén. Cain mé sattji ngaxinhi tsehe, cottimeja chonda que dačje.

Jańá rročo que chojni nchao jine cain cosa. ²⁰ Co ndačo Jesús cai:

—Tti ttixin de ngain ansén chojni, mé tti nchejianha na. ²¹ Ixin de ngaxinhi ansén na dačjexin cosa jianha que jehe na řaxaon na: jehe na řaxaon na para sinchejehe na čihi iná tattíta, co para nasoenxon na chojni, ²² co para tsé na cosé iná chojni. Co ixin jianha řaxaon na, cai jehe na rinao na rrochonda na cosé icha chojni, co nchehe na cosa jianha, co nchejehe na icha chojni, co tosoeha na para nchehe na tti jianha, co chjehe na, co nichja na ndoaha de icha chojni, co anto orgulloso na, co ncheha na jian ngain icha chojni. ²³ Cainxin cosa jianha yá ttixin de ngaxinhi ansén na co nchejianha na.

Ná nčhí de iná nación que vitticaon nčha Jesús

(Mt. 15.21-28)

²⁴ Cottimeja sacjoixin Jesús de nttiha co sacjoi ngain region tti te ciudad de Tiro co Sidón. Co are Jesús joiji nttiha vittja ná nchia para vittohe. Pero joinaoha ixin rroconohe chojni ttinó vehe jehe. Pero masqui jamé, chojni conohe na ttinó vehe Jesús. ²⁵ Co ngain región mé vehe ná xannčhí que vechonda xan espíritu jianha. Co anto daca conohe janné xan ixin nttiha vehe Jesús. Co cjoí naníta mé tti vehe Jesús co vettoxin nttajochjihi ngain Jesús. ²⁶ Naníta mé jehá judía, jehe joixin iná nación dinhi Sirofenicia. Pero joinchetsenhe ñao Jesús ixin Jesús santsjexin espíritu jianha de ngain xenhe naníta mé. ²⁷ Pero Jesús ndačo ngain naníta mé:

—Tajanda que saho tsjenguijna chojni judío que mé chojni Dios. Ixin nchaoha jí si ná ndodaha santsjehe ndo xenhe ndo niottja para rrochjé ndo conia nio.

²⁸ Cottimeja naníta mé ndačo ngain Jesús:

—Ján, ndoa, pero conia que te nganguí mesa nchao jine va tti nchoe niottja que ttinttjinguí čjan.

29 Cottimeja ndačo Jesús:

—Ján, nchao ndačo jaha. Onchao sattji jaxon ixin espíritu jianha osacjoixin de ngain xanha.

30 Co are naníta mé joiji nchiandoha, vittja xenhe ngataha saon tají xan co espíritu jianha que vechonda xan icoha; osadicjixin de ngain xan.

Jesús joinchexingamehe ná tti čhoha vanichja ni čhoha vaquinhi

31 Cottimeja Jesús sacjoixin de ngain región tti jí ciudad de Tiro co vatto ngain ciudad de Sidón co tti rajna que te regioen Decápolis, hasta que joiji ngain lago de Galilea. 32 Co nttiha joiaohe na Jesús ná xí que čhoha vaquinhi co čhoha vanichja. Co joinchetsenhe na ñao Jesús ixin tsín rá ngataha xí mé, para rroxingamehe. 33 Cottimeja Jesús vačhjendacaho xí mé de ngayehe chojni, co xandoho dedoe ngadoho ndatsjoen xa co chjé nttatté dedoe co cattehe neje xa. 34 Cottimeja tsjehe Jesús para ngajni, co váva soji co ndache xa:

—¡Efata! —que rročo: ¡Xirehe!

35 Co xiré ndatsjoen xa co onchao coinhi xa co onchao nichja xa jian. 36 Co Jesús coetonhe cain chojni nttiha ixin rrondačhoha na quehe joinchehe Jesús. Pero masquí Jesús anto vaquetonhe na ixin rrondačhoha na, jehe na icha vaquequin na. 37 Co chojni mé anto vagoan na admirado co vandačo na:

—¡Cainxin nchao nchehe! Ixin hasta chojni que ttinha, jehe nchao nchequinhi co chojni que čhoha nichja, jehe nchao nchenichja.

8

Are Jesús joanjo joine nó mil chojni

(Mt. 15.32-39)

1 Co tiempo mé xatte anto tsje chojni ngain Jesús iná co vechondaha na tti vane na nttiha. Mexinxin Jesús nichjé chojni que vacao co ndačo ngain na:

2 —Janha nchenina chojni tehe, ixin ochonda ní nchanho te na nttihi nganji na co xonhi chonda na para sine na. 3 Si rrondattjan na ixin satsji na para nchiandoha na co sineha na icha saho, ndatsončhjenxin na jintta co ndatsonttiehe na ngatja nttiha, ixin canxion na joixin na cjin.

4 Co chojni que vacao Jesús ndačo na:

—¿Pero que xén rrochjé na cain chojni yá sine na? Nttihi xonhi jí.

5 Jesús joanchiangui ngain na co ndačo:

—¿Quejanhi niottja chonda jaha ra?

Co jehe na ndačo na:

—Yáto niottja.

6 Cottimeja Jesús coetonhe cainxin chojni tavintte na ngataha nontte. Cottimeja coá tti yáto niottja mé co chjé gracias ngain Dios. Cottimeja váña Jesús nio co chjé chojni que vacao nio para que jehe na conchjea na nio ngain icha chojni. 7 Cai vechonda na icanxin copescadochjan, co Jesús chjé gracias ngain Dios co chjé chojni que vacao para que jehe na conchjejehe na chojni para joine na. 8 Cainxin na joine na co cojehe na jian. Cottimeja xa joinchecaon na yáto ntaxa de tti xexin joine na. 9 Co cain chojni que joine mé, chian nó mil chojni. Cottimeja Jesús goan despedido de ngain cain chojni mé, 10 co jehe conixin chojni que vacao vinttengá na barco co sacjoi na para nonttehe Dalmanuta.

Xifariseo joanchia xa ixin Jesús rrojinchehe ná milagro

(Mt. 16.1-4; Lc. 12.54-56)

¹¹ Co are joiji na nttiha, conchienne canxion xifariseo ngain Jesús co joinchediscutihi xa Jesús. Co ndacho xa ixin Jesús rrojinchehe ná cosa para rrocjago ixin joachaxin que jehe chonda joixin de ngajni.

¹² Cottimeja Jesús váva soji co ndacho:

—¿Quedonda chojni que techon jai rinao sicon ná señal de milagro? Janha seguro rrondaçhjan que ni ná señal tsjagoaha na.

¹³ Cottimeja nttiha cointtohe xa co Jesús cjan vengá barco co sacjoi conixin chojni que vacao para toenxin lago.

Levaduré xifariseo

(Mt. 16.5-12)

¹⁴ Co chojni que vacao Jesús ndatjañehe na joicaoha na niottja para rrojine na. Co are ongá barco jeha nacoa niottja techonda na. ¹⁵ Cottimeja Jesús coetonhe na co ndacho:

—Ttjiho ra cuidado de ixin levaduré xifariseo, co levaduré Herodes.

¹⁶ Co cain chojni que vacao Jesús ndache chó na:

—Jehe ndacho jañá ixin xonhi niottja chonda na.

¹⁷ Pero Jesús chonxin quehe ndache chó na co ndacho ngain na:

—¿Quedonda tendacho ra ixin xonhi niottja chonda ra? ¿Aña ttinxinha ra, ni xa noaha ra? ¿Achonda ra ansean ra anto cha? ¹⁸ Masqui dicon ra co ttinhi ra, pero xa ttinxinha ra. ¿Achoha xaxaon ra de ixin tti naho niottja?

¹⁹ Are janha váña tti naho niottja para joine tti naho mil xí, ¿quejanhi nntaça joinchecaon ra de tti xexin joine na?

Cottimeja chojni que vacao Jesús ndacho na:

—Tteyó nntaça.

²⁰ Cottimeja ndacho Jesús iná:

—Co are janha váña tti yáto niottja para joine tti nó mil chojni, ¿quejanhi nntaça joinchecaon ra de tti xexin joine na?

Co chojni que vacao Jesús ndacho na:

—Yáto nntaça.

²¹ Cottimeja Jesús ndacho ngain na:

—¿Aco xa ttinxinha ra ni xa noaha ra tti janha ndattjo ra?

Jesús ngain rajna Betsaida joinchexingamehe ná tti vaguiconha

²² Cottimeja joiji na ngain rajna Betsaida. Co canxion chojni nttiha joiaho na ngain Jesús ná xí que çhoha vaguicon. Co joinchetsenhe na ñao Jesús para rrocatte co rrojinchexingamehe. ²³ Mexinxin Jesús tsehe rá xí mé co sajoicao para ngandehe rajna mé. Co nttiha Jesús cjoatjo nntatté ngain jmacon xa co vaquehe rá ngataha xa, co joanchianguihi xa si aonchao dicon xa. ²⁴ Co jehe xa tsjehe xa co ndacho xa:

—Dicon canxion xí satettji co xí yá inchin canxion nntá.

²⁵ Cottimeja vaquehe rá Jesús ngain jmacon xa iná. Co rato mé jehe xa tsjehe xa jian co jmacon xa ndaxingamehe. Co xí mé onchao vicon cain cosa jian. ²⁶ Cottimeja Jesús coetonhe xa para sacjoi xa nchiandoha xa, co ndache xa:

—Ttjiha ngagaha rajna co xonhi chojni ndache ixin quehe conha.

Pedro ndacho que ixin Jesús, mé tti Cristo

(Mt. 16.13-20; Lc. 9.18-21)

²⁷ Cottimeja Jesús conixin chojni que vacao sacjoi na para ngain rajna que te ngain nonttehe Cesarea de Filipo. Co are tettji na ngatja nttiha Jesús joanchiangui ngain chojni que vacao co ndačo:

—¿Quehe ndačo chojni ixin quensen na janha?

²⁸ Co jehe na ndačo na:

—Canxion chojni ndačo ixin jaha Juan, tti vancheguitte chojni, co icanxin na ndačo na ixin jaha profeta Elías, co icanxin na ndačo na ixin jaha iná de tti profeta que vacji are saho.

²⁹ Cottimeja joanchiangui Jesús ngain chojni que vacao co ndačo:

—Co jaha ra, ¿quehe ndačo ra ixin quensen na janha?

Cottimeja ndačo Pedro ngain Jesús:

—Soixin tti Cristo. —co Cristo rročo: tti Dios Coinchiehe.

³⁰ Pero Jesús coetonhe na ixin xonhi chojni rrondache na jihi.

Jesús ndačo ixin jehe ndasenhe

(Mt. 16.21-28; Lc. 9.22-27)

³¹ Cottimeja Jesús coexinhi ndačo ngain chojni que vacao ixin jehe, tti Xí que joixin de ngajni, chonda que anto tangui tsonhe. Co cain xitte-tonha ngain nihngo co cain xidána que ttetonha ngain icha xidána co cain ximaestroe ley anto rroningaconhe na. Co cain chojni mé nasoexon na jehe pero nchanho ninxin jehe rroxechon. ³² Cain yá nao ndačo Jesús. Cottimeja Pedro joantsjenda Jesús para joinchesattehe Jesús. ³³ Pero Jesús ngaria co tsjehe ngain chojni que vacao, co joinchesattehe Pedro co ndačo Jesús:

—¡Sattjixin de nganji na janha, Satanás! Jaha xaxaonha inchin xaxaon Dios, sino que jaha jeho xaxaon inchin xaxaon chojni.

³⁴ Cottimeja Jesús nichjé chojni que vacao co icha chojni cai co ndačo ngain na:

—Si čhonja chojni rinao sacjinha na, pero chonda que rotjañehe cain tti jeho jehe rinao co sacjinha masqui anto tangui tsonhe co hasta nasenxon. ³⁵ Ixin tti rinao que xonhi tsonhe vidé, mé sinchetján vidé. Pero tti sinchetján vidé de ixin causananxin janha o de ixin causexin tti jian joajna que janha joiquian, mé sechon para cainxin tiempo. ³⁶ Ixin xonhi xé masqui ná chojni sacha cainxin cosa ngataha nontte, si ndasinchetján almé. ³⁷ Ixin ¿quejanhi tsenanxin chojni almé are jehe ndasinchetján? ³⁸ Ixin si čhonja chojni tiempo jai tosoé de nichja jian de ixin janha co de ixin joajnana, cai janha, tti Xí que joixin de ngajni, tsosoahna de ixin chojni mé are sihi conixin ángel co gloria que rrochjana Nnodana que jí ngajni.

9

¹ Cai ndačo Jesús ngain na:

—Ndoa tti rrondattjo ra, que canxion ra xó te ra nttihi senha ra hasta que siconja ra quexén siquetonha Dios nttihi conixin joachaxin que jehe chonda.

Are vicon na Jesús anto ojé

(Mt. 17.1-13; Lc. 9.28-36)

² Vatto incjaon nchanho, cottimeja Jesús sajoicao Pedro, Jacobo co Juan ngagaha ná jna anto noi. Co nttiha canio nijoicao Jesús vicon na Jesús anto ojé. ³ Co lontoe conguxima lonto co ndacoroa lonto inchin čhinta ngataha jnanchaha. Co xonhi chojni nttihi ngataha nontte nchao

rrocjén lontto co rrojincheroa lontto jamé. ⁴ Co nttiha vicon na Elías co Moisés cjoao Jesús. ⁵ Cottimeja Pedro ndačo ngain Jesús:

—Maestro, anto nchao ixin janha na te na nttihi. Sinttachjian na ní nchiachjan nttihi: ná para ixin soixin, ná para ixin Moisés, co iná nchiachjan para ixin Elías.

⁶ Jañá čo Pedro ixin jehe noeha quehe rronichja ixin jehe co tti yó xicompañeroe anto xaon na are vicon na jamé. ⁷ Cottimeja joí ná ttjoi co ndavittohe na ngacjan ttjoi mé. Co de ngagaha ttjoi mé coinhi na tté Dios que ndačo:

—Jihi tti Xanhna que anto rinaho. Ditticaon ra tti rrondattjo ra Xan.

⁸ Co rato mé ixonhi vicon na masqui tsjehe na ngoixin ngandanji na. Jeho Jesús vicon na tajingattjen nttiha, pero Elías co Moisés iviconha na.

⁹ Co are texincanji na de jna mé, Jesús coetonhe canio na ixin xonhi chojni rrondache na tti vicon na, hasta que jehe, tti Xí que joixin de ngajni, rrocjan rroxechon de ngacjén tti nindadiguenhe. ¹⁰ Mexinxin xonhi chojni ndache na tti vicon na. Pero anto vandache chó na jeho na de ixin quehe rročo tti rroxechon de ngacjén tti nindadiguenhe.

¹¹ Cottimeja joanchianguihi na Jesús co ndačo na:

—¿Quedonda ndačo cain ximaestroey ley ixin Elías tti tsí saho que jaha?

¹² Jesús ndačo ngain na:

—Ján ndoa que Elías tti tsí icha saho que janha co jehe siquentoxinhi vidé chojni para que nchao sayehna na janha. ¿Co quehe ndačo ngain tti jitaxin Palabré Dios de ixin janha, tti Xí que joixin de ngajni? Ndačo nttiha ixin chonda que anto tanguí tsonna, co ixin tsje chojni tsjanao na ixin sitticaonnaha na. ¹³ Pero janha rrondattjo ra que Elías ojoí. Co chojni joinchehe na feo ngain ixin joinchehe na inchin joinao na ngain jehe inchin jitaxin ngain Palabré Dios.

Jesús joinchexingamehe ná xanxichjan que vechonda espíritu jianha

(Mt. 17.14-21; Lc. 9.37-43)

¹⁴ Co are joí na ngain tti vittohe icha chojni que vacao Jesús, vicon na anto tsje chojni te ngandanji tti nueve chojni que vittohe nttiha. Co cai nttiha te canxion ximaestroey ley co tenchediscutihi xa tti nueve chojni que vittohe nttiha. ¹⁵ Co are vicon cain chojni ixin joihi Jesús, cain na anto goan na admirado co coinga na cjoí na ngain Jesús para chjé na joajna.

¹⁶ Co Jesús joanchiangui ngain tti nueve chojni co ndačo:

—¿Quehe tetjao ra ximaestroey ley yá?

¹⁷ Co ná de tti chojni que ote nttiha ndačo:

—Maestro, nttihi joiquinha xanhna nganji ixin chonda xan ná espíritu jianha que ndajoinchettapo xan. ¹⁸ Cain tti tsexin xan espíritu jhi jehe danza xan ngataha nontte, co hasta ttočo ttixin rroha xan co netaon neno xan. Cain yá tonhe xan co mexinxin xonhi fuerza chonda xan. Ojointtatsán ñao chojni que chjiho tehe ixin rroguengui na espíritu jhi de ngain xanhna pero coixinha na.

¹⁹ Jesús ndačo:

—¿Quedonda chojni jai choha ditticaon? ¿Hasta quesa janha chonda que sarihi nganji ra? ¿Co hasta quesa janha chonda que tsixinna nganji ra? Sicó ra chjan mé nttihi.

²⁰ Cottimeja joiaho na chjan mé ngain Jesús. Pero are espíritu jianha vicon Jesús, joincheguetan xan tanguí co joanca xan ngataha nontte.

Co conchindoha xan co joixin ttoxo rroha xan. ²¹ Cottimeja Jesús joanchianguihi ndodé xan co ndačo:

—¿Quejanhi tiempo tonhe xan janhi?

Co ndodé xan ndačo ndo:

—Desde xa nchín xan. ²² Co anto tsje nntiha dancatte espíritu jianha xan xohi co dancangui xan jinda, para rrogoen xan. Si nchao, nttatsaha ñao, ttiaconoana na co nchexingamena xanhna.

²³ Co ndačo Jesús:

—Ján, si jaha mismo nchao ditticaon, ixin chojni que ditticaon nchao nchehe cainxin cosa.

²⁴ Cottimeja jehe ndodé xannihi mé ndačo ndo sén:

—Ján, ditticanho nchin; ttjenguijna na para sitticanho icha.

²⁵ Co are vicon Jesús conchienne anto tsje chojni, Jesús joinchesattehe espíritu jianha que vehe ngain chjan mé co ndačo:

—Espíritu jianha, jaha tti rrinchetapo co rrinchecoxo chjan jihi, jaxon janha rrittetonha que dačhjexin de yá. Ttinttohe chjan jihi co icjanha ngain xan.

²⁶ Co jehe espíritu jianha mé coyao, co joincheguenda xan co joanca xan ngataha nontte iná co vačhjexin de ngain xan. Cottimeja jehe xan ndavenhe xan nchin, hasta tsje chojni que te nntiha ndačo ixin ondavenhe xan. ²⁷ Pero Jesús tsehe rá xan co joinchengattjen xan co jehe xan vingattjen xan.

²⁸ Cottimeja Jesús conixin chojni que vacao joixinhi na ngain ná nchia. Co are jehó jehe conixin chojni que vacao, jehe na joanchiangui na ngain Jesús co ndačo na:

—¿Quedonda janha na čhoha vengui na espíritu jianha yá?

²⁹ Co Jesús ndačo:

—Ixin espíritu inchin mé dengui ni jehó are nchecoanxinhi ni Dios co dinttečajño ni saho.

Jesús ndačo iná ixin jehe ndasenhe

(Mt. 17.22-23; Lc. 9.43-45)

³⁰ Co are Jesús sacjoixin de nntiha conixin chojni que vacao, vatto na ngain regioen Galilea. Pero Jesús joinao que xonhi chojni conohe ttinó vehe Jesús, ³¹ para jehe vechonda tiempo para vacjagoe chojni que vacao. Co vandačo ngain na ixin chojni sinchecienne na jehe, tti Xí que joixin de ngajni, para ngain chojni jianha, co icha chojni nasoenxon na jehe. Pero ní nchanho después de ndasenhe, jehe rroxechon. ³² Pero chojni que vacao coinxinha na tti ndačo Jesús ngain na, co xaoconco na para joanchiangui na ngain Jesús ixin quehe rročo palabra mé.

¿Quensen tti icha importante?

(Mt. 18.1-5; Lc. 9.46-48)

³³ Cottimeja joihi na ngain rajna Capernaum co are ojoixinhi ngain nchia tti vintte na, Jesús joanchianguihi chojni que vacao co ndačo:

—¿Quehe tedanchianguihi chó ra are joihi na ngatja nntiha?

³⁴ Pero jehe na tencoa na ixin are jói na ngatja nntiha, joanchianguihi chó jehó na ixin quensen de jehe na tti icha importante. ³⁵ Cottimeja Jesús tavehe co nichjé tti tteyó chojni que vacao co ndačo ngain na:

—Si čhonja chojni rinao sehe tti icha importante, pero mé chonda que sehe tti icha importanteha co tti icha tsjenguijna cainxin icha chojni.

³⁶ Cottimeja Jesús tsehe rá ná chjan co sajoicao xan ngayé na, cottimeja cjóa xan co ndačo ngain na:

³⁷—Chojni que sayé ná chjan inchin chjan jihi ixin ditticaon na janha, chojni mé jañá sayé na janha, co jeoha janha tti sayé na, cai sayé na tti rroanha na janha.

Chojni que ningacoanha na, chojni mé jí nganji na
(Lc. 9.49-50; Mt. 10.42)

³⁸ Cottimeja ndačo Juan ngain Jesús:

—Maestro, janha na vicon na ná xí que vanchegonda xa joachaxin de nombrea para vaguenguixin xa espíritu jianha, pero janha na ndattjan na xa ixin isincheha xa jañá ixin čhijha xa nganji na.

³⁹ Co Jesús ndačo:

—Cayacoenha ra chojni mé. Ixin cain chojni que nchehe milagro conixin joachaxin de nombrena, chojni mé čhoha rronichja jianha de ixin janha. ⁴⁰ Ixin chojni que ningacoanha na, chojni mé ján rinao na. ⁴¹ Rrondattjo ra que Dios seguro tsenguehe hna cain chojni que rrochjá jaha ra masqui ná vaso de jinda jeha ixin jaha ra ditticaon ra ixin janha tti Cristo.

Tti sinchenchehe ni cosa jianha
(Mt. 18.6-9; Lc. 17.1-2)

⁴² Co Jesús ndačo cai:

—Quexeho chojni que sincheyehe iná chojni que xa antoha jian ditticaon na janha para sinchehe cosa jianha, icha jian sečhianito ná xočhin ngain ttosin chojni mé para rroxincanjingui ndachaon. ⁴³ Co si ná rá sinttařaxaon para sinchehe jianha, ncheha cosa mé masqui hasta tončhinji rá. Ixin icha jian tsji conixin nacoa rá ngain Dios, co naha tsji conixin cayoixin rá ngain infierno tti xonhi tiempo nchao danga xohi. ⁴⁴ Co nttiha xonhi tiempo ditján cotsindo co xonhi tiempo danga xohi. ⁴⁵ Co si ná rottea sinttařaxaon para sinchehe jianha, ncheha cosa mé, masqui hasta tončhinji rottea. Ixin icha jian tsji conixin nacoa rottea ngain Dios co naha tsji conixin cayoixin rottea ngain infierno tti xonhi tiempo nchao danga xohi. ⁴⁶ Co nttiha xonhi tiempo ditján cotsindo, co xonhi tiempo danga xohi. ⁴⁷ Co si ná jmacon sinttařaxaon para sinchehe jianha, ncheha cosa mé, masqui hasta dantsjengui jmacon. Ixin icha jian tsji conixin nacoa jmacon ngain Dios co naha tsji conixin cayoixin jmacon ngain infierno, ⁴⁸ tti xonhi tiempo ditján cotsindo co xonhi tiempo danga xohi.

⁴⁹ 'Chojni čhjé na xijntta ngain nntao que danjo na ngain Dios para nchejni na nntao icha. Co jai Dios čhjé chojni cain cosa tangui para sicon si sačhje na jian o ni nahi. Mexinxin cosa tangui inchin xijntta are saho ixin cosa tangui nchečhjoin chojni icha para ixin Dios. ⁵⁰ Xijntta jian, pero si xijntta rocjan xijntta simple, chojni ičhoha sinchegonda xijntta iná. Mexinxin dintte ra chojni que ocojian, rročo chojni que chonda xijntta. Co dintte ra čhjoin, co doñaaha chó ra, sino que rinao chó ra čhjoin.

10

Jesús ndačo de ixin xí que dachjendehe čhihi
(Mt. 19.1-12; Lc. 16.18)

¹ Jesús vachjexin de ngain rajna Capernaum, co sacjoi para ngain regioen Judea co ngain región que jí toenixin río Jordán. Nttiha cjan xatte chojni ngain Jesús iná, co jehe joincheoenhe chojni nttiha inchin jehe vanchehe ngain cain lugar. ² Cottimeja conchienenhe canxion xifariseo ngain Jesús para rrojnichenichja xa Jesús ná cosa nchaoha para que nchao rrocjanguihi xa. Co joanchianguihi xa Jesús ixin anchao ná xí sachjendehe xa čihi xa. ³ Cottimeja Jesús ndačo ngain xa:

—¿Quehe coetonha ley que vayé Moisés?

⁴ Cottimeja jehe xa ndačo xa:

—Ley ndačo ixin nchao para ná xí sinchechjian xa ná xón dinhi acta para sachjendexin xa čihi xa, co ndatsinttohe xa ncha.

⁵ Cottimeja ndačo Jesús ngain xa:

—Ley que vayé Moisés coetonha jańá ixin jaha ra atto cha ansean ra. ⁶ Pero are saho Dios joinchechjian cainxin cosa; co ndačo ngain Palabré Dios janhi: “Dios joinchechjian chojni xí co nčí.” ⁷ “Mexinxin xí dachjendehe xa ndodé xa co janné xa para decao xa jeho čihi xa. ⁸ Co cayoixin chojni mé dintte na inchin nacoaxinxon chojni.” Jańá ijeha yó chojni, jeho nacoa chojni. ⁹ Mexinxin chojni čoha santsjendehe cosa que Dios joinchechjian inchin nacoa.

¹⁰ Cottimeja are sacjan na ngain nchia, chojni que vacao Jesús joanchiangui na ngain jehe ixin cosa yá. ¹¹ Co Jesús ndačo ngain na:

—Si ná xí sachjendehe xa čihi xa co secoa xa iná nčí, anto jianha sinchehe xí mé ngain čihi xa nčisaho. Ixin rročho que xí mé jicao xa yó nčí. ¹² Co si ná nčí sachjendehe ncha xixihi ncha co secoa ncha iná xí, cai nčí mé jianha sinchehe ncha ngain xixihi ncha xisaho. Ixin rročho que nčí mé jicao ncha yó xí.

Jesús joinchenaon xannchinnchinchjan

(Mt. 19.13-15; Lc. 18.15-17)

¹³ Cottimeja joiaho na xannchinnchinchjenhe na ngain Jesús para catte xan conixin rá. Pero chojni que vacao Jesús joinchesattehe na cain chojni que joicao cain chjan mé. ¹⁴ Co are Jesús vicon yá, gońao co ndačo:

—Tančjanda ra xannchinnchinchjan tsí xan nganji; cayacoenhe ra xan. Ixin tti ttetonha Dios, nttiha para cain chojni inchin jehe xan. ¹⁵ Janha seguro rrondattjo ra que tti chojni que sitticaonha tti ttetonha Dios inchin ná xannchinchjan ditticaon xan tti ttetonha xan nindoha xan, chojni mé xonhi tiempo rrochonda parte ngain tti ttetonha Dios.

¹⁶ Cottimeja Jesús cjóa xannchinnchinchjan mé, co vaquehe rá ngataha xan co joinchetsenhe ñao Dios ixin sinchenaon xan.

Ná xanxí rico cjoao xan Jesús

(Mt. 19.16-30; Lc. 18.18-30)

¹⁷ Ná nchanho are Jesús sajittji ngatja nttiha, ná xanxí coinga xan jói xan vettoxin nttajochjihí xan ngain Jesús co ndačo xan:

—Maestro, soixin que anto jian, ¿quehe chonda que sinttaha janha para nchao rrochonda iná vida naroaxin que xonhi tiempo tsjexin?

¹⁸ Jesús ndačo:

—¿Quedonda ncheguinihi na janha jian? xonhi iná tti icha jian, jeho nacoaxinxon, co mé jehe Dios. ¹⁹ Jaha ochonxin tti coetonha Dios inchin: “Ncheyeha čihi iná tattíta, dantsjeha vidé iná chojni, tteha cosé iná

chojni, nichjaha cosa que ndoaha de iná chojni, ncheyeha icha chojni, co ttjiho respeto ngain ndodá co ngain janná.”

²⁰ Cottimeja xanxí mé ndačo xan:

—Maestro, cain yá ojointtaha de xa nchín na.

²¹ Are Jesús tsjehe, jehe joinao xanxí mé co ndačo ngain xan:

—Jeho nacoa cosa ditján sinchehe. Ttji co nchecji cainxin tti chonda co nchettonhe chojni noa tomi. Cottimeja nttiha ngajni jaha rrochonda cosa icha rentte. Cottimeja sihi co sacjin na tti janha sacji masqui anto tangui tsonha hasta ndasenhe.

²² Pero are coinhi xan cain yá, anto vechín xan sacjoi xan ixin jehe xan anto rico vehe xan.

²³ Cottimeja Jesús tsjehe ngayé chojni que vacao co ndačo ngain na:

—Atto tangui para ná chojni que chonda anto tsje cosa rrochonda parte ngain tti ttetonha Dios.

²⁴ Co chojni que vacao Jesús goan na admirado de ixin tti nichja Jesús. Pero Jesús cjan ndačo ngain na iná:

—Chojni que chonda confianza que ixin tomi tsjenguijna na, janto tangui para jehe na rrochonda na parte ngain tti ttetonha Dios! ²⁵ Icha tanguiha sattoxinhi ná cocamello ná ttoechjenhe nttachiehe manta que para ná chojni rico rrochonda parte ngain tti ttetonha Dios.

²⁶ Co are coinhi na yá, icha goan na admirado co joanchianguihi chó jeha na co ndačo na:

—¿Mexinxin quensen nchao rrochonda iná vida naroaxin remé?

²⁷ Jesús tsjehe ngain na co ndačo:

—Chojni čhoha sinchehe jamé, pero Dios nchao sinchehe yá, ixin para Dios xonhi cosa tangui.

²⁸ Cottimeja Pedro ndačo ngain Jesús:

—Janha na cointtoa na cainxin tti vechonda na para čhji na nganji soixin.

²⁹ Jesús ndačo:

—Janha seguro rronhattjo ra ixin quexeho chojni que ttinttohe nchiandoha, o xanchó, o ndodé, o janné, o čhihi, o xenhe, o nonttehe de ixin causananxin janha co de ixin causexin joajna que danjo vida naroaxin, ³⁰ chojni mé sayé cien nttiha icha tsje ngain tiempo jiji inchin nchiandoha, co xanchó, co ndodé, co janné, co xenhe, co nonttehe, masqui tsje chojni rroningaconhe. Co ngain nchanho que tsí sayé vida naroaxin que xonhi tiempo tsjexin. ³¹ Pero tsje chojni que jai xaxaon na ixin anto importante na, are mé, xonhi tsorentte na. Co tsje chojni que jai xaxaon na ixin jehe na jeha importante na, pero are mé jehe na nisintte icha importante.

Jesús cjan ndačo iná ixin jehe ndasenhe

(Mt. 20.17-19; Lc. 18.31-34)

³² Jesús conixin tsje chojni que vacao tettji na ngatja nttiha para Jerusalén; Jesús jitaon nttiha, co chojni que vacao Jesús terroé na. Co jehe na anto tedoan na admirado, co terroé na pero conixin joaxaon. Co Jesús ngaria co vačhjendacaho tti tteyó chojni que vacao de ngayé icha chojni para ndache na quehe tsonhe jehe. ³³ Co ndačo Jesús ngain na:

—Inchin jaha ra tedicon ra, jaxon satettjin na para Jerusalén. Nttiha janha, tti Xí que joixin de ngajni, sinchechienhe na na ngain xidána que ttetonha ngain icha xidána co ngain ximaestroey ley Israel, co nimé ni

rrondaçho que ixin janha nasenxon na. Co sanjo na na janha ngain xí de ojé nontte, ³⁴ co jehe xa tsjanoa na xa janha, co rrořanguihna na cuarta de roa, co tsjatjo na xa nttatté xa co nasoenxon na xa. Pero ngain nchanho ninxin janha rroxechon na.

Tti joanchia Jacobo co Juan

(Mt. 20.20-28)

³⁵ Cottimeja Jacobo co Juan, cayoi xenhe Zebedeo, conchienne na ngain Jesús co ndaçho na:

—Maestro, ná joatotsenhe ñaho na sanchia na nganji.

³⁶ Cottimeja Jesús ndaçho:

—¿Quehe rinao ra?

³⁷ Co jehe na ndaçho na:

—Nttatsanha ra ñao are soixin sayé joachaxin de tsetonha cainxin cosa, que janha na sintte na nganji, ná na lado jian, co ná na lado cjon.

³⁸ Cottimeja Jesús ndaçho ngain na:

—Jaha ra noaha ra tti danchia ra. ¿Anchao tsonha ra tti anto tangui que janha tsonna, co anchao ndasenne ra inchin janha ndasenne na?

³⁹ Co jehe na ndaçho na:

—Ján, nchao.

Co Jesús ndaçho ngain na:

—Ján, ndoa, anto tangui tsonha ra, co senhe ra inchin janha senhe na.

⁴⁰ Pero jeha janha tti danjo joachaxin ixin quensen sehe lado jian na co quensen sehe lado cjon na. Jeho Ndodana tti danjo joachaxin mé ngain quexeho chojni que jehe ochonxin.

⁴¹ Are coinhi tti itte chojni que vacao Jesús ixin quehe joanchia Jacobo co Juan, anto goñao na nganji cayoi. ⁴² Pero Jesús nichjé na co ndaçho ngain na:

—Jaha ra noha ra que cain xí que ttetonha ngain nación, ttetonha xa inchin rinao xa, co cain icha xí que chonda joachaxin nttiha anto ttetonha xa ngain chojni. ⁴³ Pero jeha jamé tsonhe ngayaha ra, sino que tti rinao icha tsetonha ngayaha ra, pero mé chonda que icha tsjenguijna icha chojni. ⁴⁴ Co quexeho de jaha ra řo rinao ra sintte ra icha importante, pero jehe mé cai chonda que sehe inchin esclavo para ngain icha chojni. ⁴⁵ Ixin janha, tti Xí que joixin de ngajni, joiha para que chojni sinchehe xana, sino que janha joihi para joicjenguijna chojni co para sanjo vidana para tsjenga hna tti teca tsje chojni.

Jesús joinchexingamehe Bartimeo, tti vaguiconha

(Mt. 20.29-34; Lc. 18.35-43)

⁴⁶ Cottimeja Jesús conixin chojni que vacao joihi na ngain ciudad de Jericó. Co are Jesús conixin chojni que vacao co anto tsje icha chojni vaçhjegaxin na de ciudad mé, vicon na ngandehe nttiha tají ná xí vaganchiagaha ixin vaguiconha. Co tattíta mé vinhi Bartimeo, xenhe ná tti vinhi Timeo. ⁴⁷ Co are conohe que ochian jidiji Jesús que joixin Nazaret, jehe tti vaguiconha mé coexinhi ndaçho sén:

—¡Jesús, tti razé David, ttiaconoana na janha!

⁴⁸ Anto tsje chojni joinchesattehe na ixin rrotenco, pero jehe ndaçho icha sén:

—¡Soixin, razé David, ttiaconoana na janha!

⁴⁹ Cottimeja Jesús tavengattjen co ndaçho:

—Dayehe ra xí yá.

Cottimeja jehe na vayé na xa co ndačo na:

—Taha joachjaon co dingattjen ixin Jesús jidayaha jaha.

⁵⁰ Cottimeja jehe tti vaguiconha mé nttihaio vanca tti jitsá co vingattjen daca co conchienne ngain Jesús. ⁵¹ Cottimeja ndačo Jesús ngain:

—¿Quehe rinao sinttaha nganji?

Jehe tti vaguiconha ndačo:

—Maestro, janha rinaho sicon.

⁵² Co Jesús ndačo:

—Oxingamehe con ixin vitticaon nganji janha. Co onchao sattji nchiandoi.

Co rato mé jehe tti vaguiconha mé onchao vicon co rroé Jesús tti sacjoi Jesús.

11

Jesús joigaha ciudad de Jerusalén

(Mt. 21.1-11; Lc. 19.28-40; Jn. 12.12-19)

¹ Después joiji na ngandehe rajna Betfagé co rajna Betania que te chian Jerusalén co nttiha tavintte na rotté jnanchjan dinhi Nttaolivo. Nttiha Jesús coetonhe yó chojni que vacao jehe ² co ndačo ngain na:

—Ttji ra ngain rajnanchjan taha. Yá sinchí ra ná colochó jíchó co xa xonhi chojni diguetaha va. Tonxindanguehe ra va co sicó ra va. ³ Co si chonja chojni sanchianguiha ra ixin quedonda jañá tenchehe ra, ndache ra na ixin ximaestroa ra rrongondehe xa va; cottimeja sicán ra va.

⁴ Cottimeja sacjoi cayoi chojni mé co vittja na colochó tajiçhoa va ngain ná puerté nchia ngaxin nttiha, co conxindanguehe na va.

⁵ Co icanxin chojni que te nttiha ndačo na:

—¿Quehe tenchehe ra yá? ¿Quedonda tonxindanguehe ra colochó yá?

⁶ Co cayoi na ndačo na inchin ondačo Jesús ngain na. Co chojni que te nttiha coançhanda na na sacjoi na conixin colochó. ⁷ Cottimeja joicao na colochó mé ngain Jesús co cjoanjihí na va tti tetsá na co Jesús vetaha va. ⁸ Co anto tsje chojni coingo na ngá nttiha tti tetsá na co icanxin na coingo na ramanchjenhe nttá para conchjian chaho tti coingachje colochóhe Jesús.

⁹ Co chojni que vitaonhe Jesús nttiha co chojni que rroé Jesús, cainxin na ndačo na sén:

—¡Gloria ngain Dios! Co anto jian tti jói conixin nombré Dios. ¹⁰ ¡Co anto jian tti siquetonha inchin coetonha David ndogoelitoa na xançhjen! ¡Gloria ngain Dios!

¹¹ Jañá joigaha Jesús ngain ciudad de Jerusalén co joixinhi nihngo icha importante nttiha. Co are joexin tsjehe Jesús cainxin cosa nttiha, sacjan Jesús para ngain rajna dinhi Betania conixin tti tteyó chojni que vacao, ixin ondacotsocjin.

Jesús nichja ngain nttahigo que xonhi ttochjoin jiyá

(Mt. 21.18-19)

¹² Nchanho yoxin are vaçhjexin na de Betania, Jesús venhe jintta. ¹³ Co de cjin viconxin Jesús ná nttahigo que jiyá ntta ca co Jesús joitsjehe ntta ixin ayá ntta ttohigo. Pero vittjaha Jesús ni ná tto ixin xa jeha tiempoe tto. ¹⁴ Cottimeja Jesús ndačo ngain nttahigo mé:

—Xonhi chojni rrocjan sine ttochjoian iná.

Co coinhi cain chojni que vacao Jesús.

Jesús joincheroa nihngo icha importante

(Mt. 21.12-17; Lc. 19.45-48; Jn. 2.13-22)

¹⁵ Cottimeja joí na Jerusalén iná. Co are Jesús joixinhi patioe nihngo icha importante, coexinhi joantsjexin de nttiha cain chojni que tenchecji co tettehna cosa nttiha. Jesús concjamangui mesé cain tti tedasinguixinhi icha chojni tomi para rrochondaxin na suelto, co concjamangui nntaxitaoen cain tti tenchecji conttoanajni. ¹⁶ Co ixonhi chojni coanchjanda Jesús para coattoa na patioe nihngo mé conixin cosé na. ¹⁷ Co Jesús joinchecoene na co ndačo ngain cain na:

—Jitaxin ngain Palabré Dios: “Nchiania sehe nchia para sinchecoanxinna na janha chojni de ngoixin mundo.” Pero jaha ra ndadinchechjian ra nchia ná lugar tti xatte tti chehe.

¹⁸ Co cain xidána que ttetonha ngain icha xidána co cain ximaestroe ley coinhi xa quehe ndačo Jesús, co joincheřoxinha xa. Mexinxin coexinhi xa cjoé xa queřen sinchehe xa para nasoenxon xa Jesús. Pero vařaon xa ixin cainxin chojni tiempo mé joincheřoxinhi na cainxin tti cjoago Jesús. ¹⁹ Co are ondaconaxin xehe, Jesús sacjoixin de ngain ciudad mé.

Nttahigo que ndadixema

(Mt. 21.20-22)

²⁰ Co ndoexin dacao vatto na tti jí nttahigo que Jesús nichjé. Co vicon na ondadixema ngoixin nnta. ²¹ Cottimeja Pedro řaxaon quehe ndačo Jesús co ndache Jesús:

—Maestro, tsjexin, nttahigo que nichjehe, ondadixema nnta.

²² Co Jesús ndačo:

—Ditticaon ra seguro ngain Dios. ²³ Co seguro rrondattjo ra ixin quexeho chojni que rrondache jna jimé: “Sattjixin de yá, co digaritsiahngui ndachaon”, co si chojni mé seguro ditticaon que Dios sinchehe jamé, seguro que jamé tsonhe. ²⁴ Mexinxin ndattjo ra que are sanchia ra ná cosa ngain Dios, ditticaon ra seguro que ovayehe ra co seguro jamé tsonhe. ²⁵ Co are tenchecoanxinhi ra Dios, si řhonja chojni toñaohé ra, nchetjañehe ra. Jamé cai Ndoá ra que jí ngajni sinttatjañaha ra Ndo cain cosa jianha que nchehe ra. ²⁶ Pero si jaha ra sinchetjañeha ra chojni mé, cai Ndoá ra que jí ngajni řhoha sinttatjañaha ra Ndo cain cosa jianha que nchehe ra.

Tti joachaxin que chonda Jesús

(Mt. 21.23-27; Lc. 20.1-8)

²⁷ Cottimeja joihi na Jerusalén. Co cjoí na ngain nihngo icha importante. Co are Jesús tarridehe nttiha ngain nihngo, conchienne ngain Jesús canxion xidána que vaquetonha ngain icha xidána co canxion ximaestroe ley co icanxin xí que ttetonha ngain nihngo. ²⁸ Co ndačo xa ngain Jesús:

—¿Quehe joachaxin chonda jaha para nchehe cain cosa jiji? ¿Quensen chjá joachaxin jiji?

²⁹ Co Jesús ndačo:

—Cai janha sanchianguiha ra ná cosa, co si rrondachjenji ni ra tti janha sanchianguiha ra, cai janha rrondattjo ra quehe joachaxin nttaxin janha cain cosa jiji. ³⁰ Ndachjenji ni ra: ¿Quensen rroanha Juan para joincheguitte chojni? ¿A Dios o ani chojni?

³¹ Cottimeja coexinhi xa joanchianguihi chó jehó xa co ndache chó xa:

—¿Quehe rrondačo na? Si rrondačo na ixin Dios rroanha, jehe rronhattjo na: “¿Quedonda vitticaonha ra tti ndačo Juan remé?” ³² ¿O apoco rrondačo na ixin chojni rroanha?

Ixin vařagoen na chojni ixin cainxin chojni vitticaon ixin Juan vanichja joajna que vagayé de ngain Dios. ³³ Mexinxin ndačo na ngain Jesús:

—Nonaha na.

Cottimeja ndačo Jesús ngain na:

—Mexinxin janha cai rronhattjoha ra quexehe joachaxin nttaxin cain cosa jiji.

12

Ejemplo ninchehe řa jianha

(Mt. 21.33-46; Lc. 20.9-19)

¹ Cottimeja Jesús coexinhi ndache na ixin ejemplo co ndačo:

—Vehe ná xí que cjoenga xa ná jngui de nttauva co joinchechjian xa cerco ngoixin ngandehé jngui mé, co joinchechjian xa ná lugar tti vagueninxin na ttouva, co joinchechjian xa ná torre para vaguiconxin xa ngoixin ngataon jnguihi xa.

‘Co después joanjo xa nttattochjoin media ngain canxion tti nchehe řa co jehe xa sacjoi xa cjin. ² Co are ojoí tiempoe cosecha, jehe xa rroanha xa ná ninchehe řé xa para joiganchia tti parte de cosecha que jiquininxin sayé tti xinajni mé. ³ Pero tti nicoá nttattochjoin media tse na tti nchehe řé xinajni mé, goen na co vengui na co řonhi chjé na. ⁴ Cottimeja xinajni mé rroanha xa iná tti nchehe řé xa, pero cai mé coaxin na řo, conřhintaonhe na já co nichja na feo ngain. ⁵ Cottimeja rroanha xinajni mé iná tti nchehe řé xa, pero mé nagoenxon na. Cottimeja xinajni mé rroanha xa tsje tti nchehe řé xa, pero canxion na vicaon na co icanxin na nagoenxon na na.

⁶ ‘Co jehó nacoa xenhe xa vechonda xa co anto vajinao xa xan co jehó xan mé vittohe ngain xa. Co rroanha xa xenhe xa mé cai ixin řaxaon xa: “Chonda na que sicao na respeto ngain xanhna.” ⁷ Pero jehe tti nicoá nttattochjoin media cjoao na co ndačo na: “Jihi tti sayé ngoixin jngui jiji de herencia. Nadoenxon na co ján na ndasittoá na cain.” ⁸ Mexinxin tse na xan, co nagoenxon na xan co joantsjegaxin na cuerpoe xan de ngain jngui de nttauva.

⁹ Cottimeja Jesús ndačo:

—¿Quehe sinchehe xinajni mé? Tsí xa co nasoenxon xa jehe tti nicoá nttattochjoin media, co sanjo xa jnguihi xa ngain ojé chojni.

¹⁰ ¿Ařa chonxinha ra tti ndačo ngain tti jitaxin Palabré Dios? Nttiha ndačo:

Tti řo que joinchegondaha xittette nchia, pero řo mé tti řo joiguehe icha importante.

¹¹ Co jiji joinchehe Dios, co para ixin ján na cosa jiji anto řhjoin.

¹² Cottimeja cain na joinao na rrotse na Jesús co rroquixinhi na, ixin jehe na nohe na que ejemplo jiji jinichja de ixin jehe na. Pero ixin vařagoen na cain chojni, mexinxin nttiha cointtohe na Jesús, co jehe na sacjoi na.

Tti rroxenga hna ngain impuesto

(Mt. 22.15-22; Lc. 20.20-26)

¹³ Cottimeja rroanha na ngain Jesús canxion xifariseo co icanxin chojni que vacao Herodes, para rrojinchenichja na Jesús cosa ndoaha para nchao rrocjanguihi na Jesús. ¹⁴ Co chojni mé jói na ngain Jesús co ndačo na:

—Maestro, janha na nona na que soixin nichja tti ndoa co ncheha caso tti ndačo icha chojni, ixin soixin ncheha juzgado chojni rico ojé que chojni noa, sino que nchecoehne jian cain chojni de ixin nntié Dios. Mexinxin ndachjenji ni ra: ¿Anchao jí tsjengá na hna impuesto ngain xiemperador o ni nahi? ¿Atsjengá na xa hna o ni tsjengaha na xa hna?

¹⁵ Pero Jesús oconohe de tti jianha que jehe xa teřaxaon xa, co Jesús ndačo ngain xa:

—¿Quedonda jaha ra rinao ra sincheyana ra? Sicohna ra ná tomi para janha sicon.

¹⁶ Co jehe na joicaohe na Jesús ná tomi co are vicon Jesús tomi mé, ndačo ngain na:

—¿Quensen con jinganito tomi jihi co quensen nombré jitaxin nganito nttihi?

Co jehe na ndačo na:

—Con xiemperador co nombré xa.

¹⁷ Cottimeja ndačo Jesús ngain na:

—Chjehe ra xiemperador tti jiquininxin xa co danjo ra ngain Dios tti jiquininxin sayé jehe.

Co goan na admirado ixin jañá čo Jesús.

Canxion chojni joanchiangui queXén rroxechon ni

(Mt. 22.23-33; Lc. 20.27-40)

¹⁸ Cottimeja cjoí canxion xisaduceo ngain Jesús. Xí mé vaguitticaon xa ixin cain tti ndadenhe irroxechonha. Co ndačo xa ngain Jesús:

¹⁹ —Maestro, Moisés diquinttoena na ná ley que ndačo: si ná xí ndasenne co tsinttohe xa čihihi xa, co řonhi chjan tsinttohe xa, mexinxin chonda que ná xanchó xa xanxí secao nřhiganha mé para rrochonda na chjan para que xan mé sintte xan řá rrocji xenhe tti ndavenhe.

²⁰ Nchao remé; vintte yáto xanxí chó xan. Xansaho vecao xan čihihi xan, pero ndavenhe xan co řonhi chjan cointtohe xan. ²¹ Co xanyoxin vecao xan jehe nřhiganha mé, pero cai ndavenhe xan co řonhi chjan cointtohe xan. Co řajeho conhe conixin xanninxin. ²² Co jamé tti yáto xanxí mé vinttecao xan jeha nřhiganha mé, co ni ná xan cointtoeha xan chjan hasta ndavenhe cain xan. Cottimeja ndavenhe nřhiganha mé cai. ²³ Mexinxin are rroxechon na, co rrocjan sinttechon xan, ¿quexehe de tti yáto xan mé sehe mero xixihi jehe nřhí mé, ixin cain xan vinttecao xan nřhí mé?

²⁴ Cottimeja Jesús ndačo:

—Jaha ra nchaoha jí tti tenichja ra ixin chonxinha ra tti jitaxin ngain Palabré Dios co chonxinha ra joachaxin que chonda Dios. ²⁵ Are rroxechon cain chojni que ondavenhe, nttiha ni tsotteha na, ni sanjoha na xenhe na para tsottehe xan ixin sintte na inchin ángel que te noi. ²⁶ Pero de tti jaha ra danchianguina ra de ixin tti chojni que ndadenhe, ¿atsjeha jaha ra libroe Moisés de ixin queXén Dios nichjé Moisés de ngagaha tti canchaha que jiche? Nttiha ndačo janhi: “Janha tti Dios de Abraham co Isaac co Jacob.” ²⁷ Mexinxin Dios jeha Dios de nindadiguenhe, sino

que Dios de chojni que techon, co para ixin Dios cainxin chojni techon na. Mexinxin jaha ra nchaoha jí tti tenichja ra.

Tti icha importante que ttetonha Dios

(Mt. 22.34-40)

²⁸ Cottimeja ná ximaestroe ley que coinhi xa are Jesús cjoao xisaduceo ximaestro mé conchienne ngain Jesús. Co ixin joatsoan xa que ixin Jesús nchao ndajoinchetencoá xisaduceo, mexinxin joanchianguihi xa Jesús co ndačo xa:

—¿Quexehe tti icha importante que ttetonha Dios sinchehe ni?

²⁹ Co Jesús ndačo:

—Tti icha importante de cainxin ndačo janhi: “Ttinhí ra jian jaha ra chojni Israel, nacoaxinxon Dios jí co jecho mé tti chonda cain joachaxin co jecho mé tti Dios de ján na. ³⁰ Rinao ra Dios mé conixin ansean ra, conixin almá ra, conixin joarrixaoran ra co cainxin fuerza que jaha ra chonda ra.” Jihí tti mandamiento icha importante para sinchehe chojni. ³¹ Co iná mandamiento chian xajeho ixin ndačo: “Rinao ra cainxin chojni inchin rinao ra cuerpoa ra.” Co xonhi icha mandamiento icha importante para sinchehe chojni, jecho cayoi mandamiento yá.

³² Co ximaestroe ley ndačo xa:

—Ján, nchao tti ndačo, Maestro, ixin ján, ndoa tti ndačo. Jí jecho nacoaxinxon Dios co xonhi iná dios jí, jecho jehe. ³³ Co para ná chojni rinao Dios conixin ansén, conixin cain joarrixaoren, conixin almé, co cainxin fuerza que chonda, co para rinao cainxin chojni inchin jehe rinao cuerpoe; cain cosa jihí icha jian ndoa, que cain coxigo que tjaga ni ngataha xohi para ixin Dios, co icha jian que coxigo que doen ni para danjo ni ngain Dios.

³⁴ Are Jesús coinhi ixin cain tti ndačo xí mé nchao jí, jehe ndačo ngain xa:

—Jaha ochian rrihi para rrochonda parte ngain tti ttetonha Dios.

Cottimeja cain chojni ndaxaon na para joanchianguihi na Jesús icha cosa.

Tti dindačo David de ixin Jesucristo

(Mt. 22.41-46; Lc. 20.41-44)

³⁵ Ná nchanho are Jesús tajinchecoenhe chojni ngain nihngo icha importante, jehe ndačo:

—¿Quedonda ndačo ximaestroe ley ixin Cristo ná xanntí David?

³⁶ Ixin Espíritu Santo joinchenichja David co ndačo:

Tti Ttetonha cainxin cosa ndačo ngain tti Ttetonna janha:

“Darihi ngaca lado jian na

hasta janha sinttagacha jaha ngain cain tti ningaconha.”

³⁷ Pero ¿quexén que Cristo jehe ná xanntí David, si David mismo ndačo ixin Cristo tti Ttetonha ngain jehe?

Co tti tsje chojni que te nttiha anto ché na coinhi na cain tti nichja Jesús.

Jesús joinchesattehe ximaestroe ley

(Mt. 23.1-36; Lc. 11.37-54; 20.45-47)

³⁸ Co Jesús ndačo are jincheoenhe na:

—Ttjihó ra cuidado de ncheha ra inchin nchehe ximaestroe ley ixin jehe xa ncheoxoinhi xa chji xa conixin lontto icha jinjini, co rinao xa que chojni sanjo na joajna ngain xa conixin anto tsje respeto are ngain nttiha, ³⁹ co are ngaxinhi nihngo, jehe xa ttjé xa tti xintaon icha importante para

dinttetaha xa, co are ttji xa dijine xa, jehe xa rinao xa tti icha jian lugar ngain mesa. ⁴⁰ Cai jehe xa dantsjehe xa nchiganha nchiandoha ncha ixin ittixinha ncha ttjenga ncha hna contribución. Co para xonhi chojni rroxaxaon ixin jehe xa jianha nchehe xa, jehe xa nchecoanxinhi xa Dios anto sé. Mexinxin cain ximaestro mé sayé xa anto soji castigo.

Tomi que joanjo ná nchiganha noa
(Lc. 21.1-4)

⁴¹ Ná nchanho Jesús tají ngaxinhi nihngo icha importante chian ngaca cain cajé alcancia. Tajitsjehe Jesús are chojni tettintohe na tomi nttiha. Co tsje chojni rico cointtohe na anto tsje tomi. ⁴² Co are mé joí ná nchiganha co noa ncha, co cointtohe ncha ngain ná caja mé yó centavochjan que anto rentteha. ⁴³ Cottimeja Jesús vayé chojni que vacao co ndačo ngain na:

—Janha ndoa tti rronhattjo ra, que nchiganha noa jiji joanjo ncha icha tsje que cain chojni que tettenga tomi cain caja. ⁴⁴ Ixin cain chojni danjo na jeho tti xehe na. Pero nchí noa jiji vanjo ncha cain tomi que jehe ncha jichonda ncha.

13

Jesús ndačo ixin rroxantte nihngo icha importante
(Mt. 24.1-2; Lc. 21.5-6)

¹ Co are Jesús vačhjexin de nihngo icha importante, ná de tti chojni que vacao ndačo ngain jehe:

—jMaestro, tsjexin anto yeye xó tehe co anto yeye nchia co anto čhjoin diconchjian nchia!

² Co Jesús ndačo:

—¿Adicon cain nchia yeye yá? Pero yá sittoeha ni ná xó ngataha iná xó; cainxin rroxantte.

Quehe tsonhe icha saho que mundo ndatsjexin
(Mt. 24.3-28; Lc. 21.7-24; 17.22-24)

³ Cottimeja savinttecji na ngain jnanchjan que dinhi Nttaolivo, que jí chian de nihngo mé. Co are Jesús tají nttiha, Pedro, Jacobo, Juan, co Andrés ndačo na ngain Jesús:

⁴ —Rinaho na que rrondachjenji ni ra quesa tsonhe cain cosa yá. ¿Quehe señal sehe are cain cosa yá siconhe?

⁵ Cottimeja Jesús ndačo:

—Ttjiho ra cuidado que xonhi chojni sinttayaha ra. ⁶ Ixin anto tsje chojni tsí co sinchegonda na nombrena co rrondačo na: “Janha tti Cristo na”; co sincheyehe na tsje chojni.

⁷ Co are jaha ra tsinhi ra ixin jí guerra chian co cjin, jaha ra xaonha ra ixin jamé chonda que tsonhe. Pero xa jaha tiempo para ndatsjexin mundo. ⁸ Ixin ná nación tsetocaho iná nación. Co ná región tsetocaho iná región. Co tsingui nontte tsje lugar, co tsje chojni senxin jintta co chojni tsetocaho chó na. Are cain cosa jiji tsonhe nandá tsexinhi tsonhe tti anto tangui que tsonhe chojni.

⁹ Pero jaha ra ttjiho ra cuidado ixin rrotse ra na co sinttachianha ra na ngain xittetonha icha. Co soen ra na ngaxinhi nihngo. Co chonda que jaha ra tsonchienhe ra ngain tsje xigobernador co tsje xirey de ixin causananxin janha. Cain jiji rrochondaxin ra oportunidad de rronichja ra

ngain cain jehe xa de ixin janha. ¹⁰ Ixin icha saho que mundo ndatsjexin chonda que tsonohe chojni de cainxin nación ngoixin mundo tti joajna que danjo iná vida naroaxin. ¹¹ Co are rrotse ra na co sinttachianha ra na ngain xittetonha icha, taha ra joachjaon de ixin quehe rrondačo ra ra ngain xa, co ni řaxaonha ra de ixin mé. Jeho rrondačo ra tti Dios rrondattjo ra rato mé ixin jeha jaha ra tti rronichja ra, sino que Espiritu Santo tti sinttanichja ra. ¹² Co tsje chojni sinchechienhe xanchó na ngá rá niningaconhe xan co rrondačo na para nasenxon xan. Co te nindoha chjan que sinchechienhe xenhe na ngá rá niningaconhe xan, co te chjan que sinchechienhe nindoha xan ngá rá niningaconhe na para que jehe na nasoenxon na na. ¹³ Co cainxin chojni rroningaconha ra de ixin causananxin na janha. Pero chojni que cainxin tiempo sitticaon jian nganji na janha, chojni mé rrochonda iná vida naroaxin.

¹⁴ 'Co profeta Daniel dicjin co ndačo de ixin ná cosa icha jianha de cainxin cosa co anto nchejianha icha cosa. Co are sicon ra cosa jianha mé ngain nihngo icha importante tti jiquininxinha sehe jehe mé —tti tsjehe řón jihi, chonda que tsinxin—, are mé chojni que te Judea chonda que satsinga na para ngagaha jna. ¹⁵ Co chojni que sintte ngataha techoe nchiandoha, are jehe sania, que sixinha ngaxinhi nchiandoha para sirroé cosé que jí ngaxinhi nchia co jaca satsinga. ¹⁶ Co chojni que sintte ngataon jngui, que rrocjanha ni para sirroé lonttoe ngain nchiandoha, sino que jaca satsinga. ¹⁷ ¡Anto tangui para ixin nčhí que sintteyá chjan nchanho mé o nčhí que rrochonda chjan que řa tetai! ¹⁸ Nchetsenhe ra ñao Dios que jaha ra rrochondaha ra que satsinga ra mero ngain tiempoe quin ¹⁹ ixin ngain nchanho mé icha tangui tsonhe chojni, que řa řonhi tiempo tonhe jamé ni desde que Dios joinchechjian mundo, ni tsonhe después. ²⁰ Co si Dios sinchenchinha tiempo mé, řonhi chojni rroxehé. Pero Dios sinchenčhín tiempo mé ixin jehe rinao chojni que coinchiehe.

²¹ 'Co si čhonja chojni rrondattjo ra: "Tsjexin ra nttihi jí Cristo", o "Tsjexin ra nojiha jí", pero jaha ra ditticaonha ra. ²² Ixin tsí anto tsje tti sincheyehe chojni ixin rrondačo na que jehe tti Cristo co rrondačo na ixin jehe na dayé na joajna de ngain Dios. Co sinchehe na tsje señal co milagro para sincheyehe na tsje chojni, co si nchao hasta tti chojni que Dios mismo coinchiehe, sincheyehe na. ²³ Pero jaha ra řaxaon ra que ixin janha ondattjo ra jai cain de ixin nchanho mé.

Quexén tsí tti Xí que joixin de ngajni
(Mt. 24.29-35, 42-44; Lc. 21.25-36)

²⁴ Co Jesús ndačo cai:

—Pero después de tiempo tangui mé, nchanho isinche gasanha, co conittjao isanjoha va čhíxo. ²⁵ Conotse sinttjixin va de ngajni, co hasta cain cosa que jí ngajni rrořanga. ²⁶ Cottimeja sicon na na janha, tti Xí que joixin de ngajni, sihi ngacjan ttjoi conixin anto tsje joachaxin co gloria. ²⁷ Cottimeja rrorroanha cain angelna para tsji sicjejo cain chojni que janha coinchiá de cainxin parte de ngoixin mundo co de ngajni.

²⁸ 'Tangui ra ejemploe nttahigo: Are xesan ramé nnta co čhinhi qué nnta, jaha ra onoha ra ixin ochian tsí tiempoe čhin. ²⁹ Co řajeho jamé cai, are jaha ra sicon ra tsonhe cain cosa yá, jaha ra noha ra ixin ochian sihi janha iná, ongandanguí puerta sihi. ³⁰ Co seguro rrondattjo ra que cainxin cosa yá tsonhe icha saho que cain chojni de generación

jihí ndasenne. ³¹ Ngajni co nontte ndasitján, pero palabrana sitjanha; chonda que tsonhe cain tti janha ndačhjan.

³² Pero nchanho co hora que tsonhe mé ni ná chojni noeha, ni cain ángel que te noi noeha, ni janha, tti Xenhe Dios, nonaha. Jeho Dios Ndodá na tti nohe.

³³ Mexinxin jaha ra dintte ra listo co nchecoanxinhi ra Dios, ixin noaha ra quesa tsí hora mé. ³⁴ Jamé inchin ná xí que satsji cjin co tsinttohe xa nchiandoha xa. Pero icha saho que satsji xa, ttetonhe xa cain ninchehe xé xa ixin sinttenda na jehe nchia mé. Co ndache xa cada na quehe xa sinchehe na, co ttetonha xa ngain xiportero ixin senda xa jian. ³⁵ Mexinxin jaha ra dintte ra listo ixin jaha ra inchin tti nivittoenda nchia mé. Venoeha na quesa rrocjan xinajni na; çatsí xa are tsocjin, o atsí xa are ttie, o tsí xa are ndoyo, o atsí xa are osingasán? ³⁶ Co nchaoha si are sihi janha, jaha ra sintteha ra listo. ³⁷ Tti ndattjo ra jeoha para ixin jaha ra, ndačhjan para ixin cainxin chojni: ¡Dintte ra listo!

14

Are vinttecjao na quexén sinchehe na para rrotse na Jesús
(Mt. 26.1-5; Lc. 22.1-2; Jn. 11.45-53)

¹ Vitján yó nchanho para tti quiai dinhi pascua are jine na niottja que chondaha levadura. Co are mé cain xidána que vaquetonha ngain icha xidána co cain ximaestroey ley cjoé xa quexén sinchehe xa para rrojincheyehe xa Jesús co rrotse xa co nasoenxon xa. ² Pero ndačo xa:

—Sonttoha na are mero quiai ixin cain chojni seguro tsoñaoa na na co tsetocoho na na.

Nchí que cointjtite aceite cuerpoe Jesús
(Mt. 26.6-13; Jn. 12.1-8)

³ Ná nchanho ngain rajna Betania Jesús tajine ngaxinhi nchiandoha Simón tti veninxin chin lepra. Co are jehe tají ngain mesa, joixinhi ná nchí que joicao ná xoxao de marmol jíche de aceite que anto xajni que diconchjian joxon ca dinhi nardo co aceite mé anto rentte. Condai ncha xo mé co cointjtitaha ncha cain aceite mé ngataha já Jesús. ⁴ Co canxion de tti nite nttiha goña na co ndache chó na jeha na:

—¿Quedonda coxinoa aceite yá? ⁵ Nchao rrocchji aceite yá co anto tsje tomi rroguíte, inchin tsjexin dacha ná tti nchehe xa ngoixin ná nano. Co tomi mé nchao rrocjengujna chojni noa.

Co joinchesattehe na tti nchí mé.

⁶ Pero Jesús ndačo ngain na:

—Tančhjanda ra nchí yá. ¿Quedonda nchesattehe ra? Jehé ncha joinchehe ncha ná cosa jian nganji na janha. ⁷ Chojni noa cainxin tiempo sintte na ngayaha ra, co nchao tsjengujna ra na are jaha ra sinoa ra. Pero janha cainxinha tiempo sarihi nganji ra. ⁸ Nchí jihí joinchehe ncha tti nchao conohe ncha joinchehe ncha. Ochjé ncha cuerpona aceite para rroxává na. ⁹ Co seguro rronhattjo ra que ngoixin mundo tti rronichja na tti joajna que danjo iná vida naroxin, cai rronichja na ixin quehe joinchehe nchí jihí nganji na janha, para rroxaxaon na de ixin jehé ncha.

Judas ndačo para rrotse na Jesús
(Mt. 26.14-16; Lc. 22.3-6)

¹⁰ Cottimeja Judas Iscariote, jehe ná de tti tteyó chojni que vacao Jesús, cjoí ngain canxion xidána que vaquetonha ngain icha xidána, para cjoao chó na quexén jehe Judas sanjo Jesús ngain xa. ¹¹ Co are jehe xa coinhi xa ixin quehe joindaçho ngain xa anto ché xa, co ndaço xa ngain ixin sanjo xa tomi. Cottimeja Judas coexinhi xaxaon ixin quexén sinchehe para sinchechienhe Jesús ngain xa.

Are joinecaho Jesús tti tteyó chojni que vacao

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Ngain saho nchaoen quiai que jine na niottja que chondaha levadura, nchanho mé doen na coleco. Co chojni que vacao Jesús joanchianguihi na co ndaço na ngain:

—¿Ttinó rinao sinttachjianxin na tti sintte soixin ngain quiai pascua?

¹³ Cottimeja Jesús coetonhe yó chojni que vacao co ndaço ngain na:

—Ttji ra ngain ciudad de Jerusalén, co nttiha setan ra ná xí que jidicao ná nchíxa de jinda. Sattjiho ra xí mé. ¹⁴ Co tti nchia sixinhi xa, nttiha ndache ra tti ndoha mé: “Tti Maestro ndaço: ¿Ttinó jí cuarto tti sinexin ngain quiai pascua conixin cain chojni que dicao?” Jañá choache ra tti ndoha mé. ¹⁵ Cottimeja jehe tti ndoha mé tsjagoha ra ná cuarto jie ngain piso yoxin que onchao jí. Nttiha nchechjianxin ra tti sontte na.

¹⁶ Cottimeja cayoi chojni mé sacjoi na para ngain ciudad co vittja na cain inchin Jesús ndaço ngain na. Co nttiha joinchechjianxin na tti joine na ngain quiai pascua.

¹⁷ Co are ondaconttie Jesús co tti tteyó chojni que vacao xatte na para joinecaho na. ¹⁸ Co are tene na, Jesús ndaço ngain na:

—Janha seguro rrondattjo ra que ná de jaha ra xo tente ra nganji na jaxon rrondache ra chojni quexén para rrotse na na janha.

¹⁹ Cottimeja cain jehe na tavinttechín na co coexinhi na joanchianguihi na Jesús ná na co ná na, co ndaço na:

—¿Apoco janha?

Co cai iná ndaço:

—¿Apoco janha?

²⁰ Co Jesús ndaço:

—Ná de tti tteyó jaha ra que tejintte ra ngain láto jiji conixin janha.

²¹ Janha, tti Xí que joixin de ngajni, chonda que ndasenne na inchin jitaxin ngain Palabré Dios, pero anto tangui tsonhe tti xí que rrondache chojni quexén para rrotse na na; icha jian si jehe rrogoanha.

²² Co are tene na, Jesús coá niottja co chjé gracias ngain Dios, cottimeja váña nio, co joanjo nio ngain cain na co ndaço:

—Jintte ra. Jiji rroçho cuerpona.

²³ Cottimeja coá Jesús vaso co chjé gracias ngain Dios, co joanjo ngain na cai, co cain na vihi na nchinnchin. ²⁴ Co ndaço ngain na:

—Jihi rroçho jnina que nchesegurá tti trato nroaxin co sinttji jnina para tsjenguijna tsje chojni. ²⁵ Co seguro rrondattjo ra que janha isiha tti danjo ttouva hasta tsí tti nchanho que janha sihi tti vino nroaxin ngain lugar tti ttetonha Dios.

Jesús ndaço que Pedro rrondaço ixin jehe chonxinha Jesús

(Mt. 26.30-35; Lc. 22.31-34; Jn. 13.36-38)

²⁶ Are vinttetsje na ná himno, cottimeja sacjoi na ngain jnanchjan que dinhi Nttaolivo. ²⁷ Cottimeja Jesús ndaço ngain na:

—Cain jaha ra sinttechinhi ra de ixin janha ngain ttie jihi, ixin jitaxin ngain Palabrê Dios: “Janha, tti Dios, nasoexon tti ttingaria coleco, co cain coleco ndarrochjequé va.”²⁸ Pero después que janha rroxechon na, cottimeja janha saho tsji Galilea que jaha ra.

²⁹ Cottimeja Pedro ndaço ngain Jesús:

—Masqui cain jehe na sinttechín na de ixin soixin, pero janha nahi.

³⁰ Cottimeja Jesús ndaço ngain:

—Janha seguro rronddattjo que ngain ttie jihi saho que conttaxichia rrotsje va yoxin nttiha, jaha orrondaço ninxin nttiha ixin chonxinha na janha.

³¹ Pero Pedro xa ndaço ngain Jesús:

—Masqui rrochonda que senhe na conixin jaha, pero janha rrondaçhjanha ixin chonxinha.

Cai cain ni icha ndaço na xajeho.

Jesús joinchetsenhe ñao Dios ngain Getsemaní

(Mt. 26.36-46; Lc. 22.39-46)

³² Cottimeja joiji na ngain ná lugar dinhi Getsemaní, co Jesús ndaço ngain na:

—Tadintte ra nttihi are janha sinttatsán ñao Dios.

³³ Co sajoicao jehó Pedro, Jacobo co Juan. Co Jesús coexinhi conohe ná joaxaon anto soji co cai conohe anto jie joachjaon que joinchenihi ansén.

³⁴ Co ndaço ngain canio nijoicao:

—Janha tonona ngain ansenna ná joachjaon anto soji hasta rinaho ndasenhe na. Jaha ra dittoha ra nttihi, co dintteçhinha ra.

³⁵ Cottimeja Jesús sacjoi nchion cjin de ngain na, co vejantaha ngataha nontte. Co joinchetsenhe ñao Dios que si nchao jehe rrogattoha ngain tiempo que jitonchian are jehe anto tangui tsonhe. ³⁶ Co are jinchetsenhe ñao Dios, ndaço:

—Padre, soixin nchao nchehe cainxin cosa. Mexinxin si nchao, tançhjangaha na janha satto ngain tti anto tangui que tsonna. Pero tsoenha inchin janha rinaho, sino que tsonhe inchin soixin rinao.

³⁷ Cottimeja cjan Jesús ngain tti vittohe canio chojni que vacao, pero otatejoa canio na. Co ndaço ngain Simón Pedro:

—Simón, ¿aotarriçhin? ¿Acoixianha tajoaritsjehe ni ná hora? ³⁸ Tadinttetsjehe ra co nchetsenhe ra ñao Dios para que xonhi cosa jianha sinttatjanji ra. Ndoa, espiritua ra anto rinao sintte jian, pero cuerpoa ra sojiha.

³⁹ Cottimeja cjan Jesús sacjoi para joinchetsenhe ñao Dios iná, co ndaço xajeho. ⁴⁰ Co are cjan jói ngain na jehe na otatejoa na iná ixin icoixinha con na de anto cottaçhin. Co are xingamehe na ni inoencoia na quehe rrondaço na ngain Jesús. ⁴¹ Cottimeja ninxin nttiha Jesús sacjoi para joinchetsenhe ñao Dios iná, co are cjan ngain na, ndaço:

—Janché dintteçhin ra co nchejogaha ra ixin onchao; hora ojoi are janha, tti Xí que joixin de ngajni, chonda que tsonchian ngá rá chojni jianha. ⁴² Dingattjen ra, nttimé jói tti ndaço quexén para rrotse na na janha.

Are tse na Jesús

(Mt. 26.47-56; Lc. 22.47-53; Jn. 18.2-11)

⁴³ Are Jesús ʒa jinichja ngain tti ní chojni mé, joí Judas, ná de tti tteyo chojni que vacao Jesús, co joicao Judas anto tsje xí que tteyá espada co nttá. Xidána que vaquetonha ngain icha xidána, ximaestroe ley co xittetonha ngain nihngo, xí mé rroanha xa cain chojni mé. ⁴⁴ Judas, tti joindačo queʒén para tse na Jesús, odindačo ngain na ixin quexehe señal sinchehe ngain Jesús para jehe na nohe na quensen Jesús, co ndačo:

—Tti janha tsetoxin para rrochjaha joajna, jehe mé. Tse ra co sattjiho ra co ttjiho ra cuidado jian que satsingaha.

⁴⁵ Co are ojoí, jehe conchienne ngain Jesús co ndačo:

—Maestro, Maestro.

Co coetoxin Jesús. ⁴⁶ Cottimeja tse na Jesús para sajoicao na.

⁴⁷ Pero ná de tti vintte nttiha joantsje espadé co conchinjihi na ndatsoen ná xinchehe ʒé xidána icha importante. ⁴⁸ Cottimeja Jesús ndačo ngain cain chojni que joí:

—¿Quedonda jaha ra joihi ra conixin espada co nttá para rrotse ni ra janha como si janha rrocji ná tti chehe? ⁴⁹ Anto tsje nchanho joarihi janha ngayaha ra ngain nihngo icha importante para jointtacoanha ra, co ʒonhi tiempo tse ni ra. Pero janhi tsonhe, para tsonhe inchin jitaxin ngain Palabré Dios.

⁵⁰ Cottimeja cain chojni que vacao Jesús cointtohe na jeho, co jehe na sacoinga na.

Ná xanxí que sacoinga

⁵¹ Co cai nttiha ná xanxí vetsá xan jeho ná lontto roa. Co tse na xan.

⁵² Pero vačjenga xan lontto mé co sacoinga xan ttolocho xan.

Jesús ngain juzgadoe nihngo

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Cottimeja sajoicao na Jesús ngain xidána icha importante. Co ʒatte cainxin xidána que vaquetonha ngain icha xidána co cain xittetonha ngain nihngo, co cain ximaestroe ley. ⁵⁴ Co Pedro ta tti cjin jirroexin hasta joihi ngain patioe nchiandoha xidána icha importante, co nttiha tavehe xiʒohe ngain ʒohi, jehe conixin xipolicié nihngo icha importante.

⁵⁵ Cain xidána que vaquetonha ngain icha xidána, co cain xí que vechonda joachaxin ngain juzgadoe nihngo, cain xí mé cjoé xa queʒén sinchecaxin xa Jesús para nasoenxon xa Jesús. Pero čhoha vittjehe xa Jesús ni ná cosa jianha. ⁵⁶ Co tsje na joinchecaxin na Jesús, pero ʒonhi chojni nichja ʒajeho inchin nichja iná chojni para joinchesegurá chó na. ⁵⁷ Cottimeja canxion na vingattjen na co joinchecaxin na Jesús co ndačo na:

⁵⁸ —Janha na coian na ndačo xí yá ixin jehe tsonxantte nihngo icha importante jiji que dinchechjian chojni, co nincoa nchanho jehe xa sinchechjian xa iná nihngo que jeha chojni nchechjian.

⁵⁹ Pero masqui ndačo na jańá, ʒa nichjaha na mero ʒajeho.

⁶⁰ Cottimeja xidána icha importante vingattjen xa ngayé cainxin na, co joanchiangui xa ngain Jesús co ndačo xa:

—¿Aʒonhi rrondačo jaha? ¿Quehe rročo cain tti jinichja chojni tehe de ixin jaha?

⁶¹ Pero Jesús ʒonhi nichja. Co jehe xa cjan xa joanchianguihi xa iná co ndačo xa:

—¿Ajaha tti Cristo, Xenhe Dios que anto jian?

62 Co Jesús ndaço:

—Ján, janha. Co sicon ni ra janha, tti Xí que joixin de ngajni, sarihi ngain lado jian de Dios, tti chonda cainxin joachaxin. Co cai sicon ni ra are rrocjan na sihi ngacjan ttjoi.

63 Cottimeja jehe xidána icha importante mé goñao xa. Mexinxin coinchje xa lonttoe xa, co ndaço xa:

—¿Quedonda tsjé na icha chojni de testigo? 64 Jaha ra ocoihni ra queñén nichja xa jianha de ixin Dios. ¿Quehe ðaxaon ra?

Co cainxin na ndaço na ixin Jesús jiquininxin ndasenne.

65 Cottimeja canxion na coexinhi na cointtjitte na nttatté na, co coejehe na con Jesús, co ðanguí na manazo, co ndache na:

—Si jaha ná profeta, ndaço quexehe tti goen.

Co cain xipolicié nihngo icha importante cai xanguí xa Jesús manazo.

Pedro ndaço ixin jehe chonxinha Jesús

(Mt. 26.69-75; Lc. 22.56-62; Jn. 18.15-18, 25-27)

66 Are Pedro tají nontte ngain patioe nchiandoha xidána icha importante, vatto ná nñhimozé xidána mé. 67 Co are vicon nña Pedro tajixiñohe ngandehe ðohi, jehe nña tavengattjen nña, tsjehe nña co ndaço nña ngain:

—Jaha cai vacjiho Jesús, tti joixin de Nazaret.

68 Co Pedro ndaço ixin ndoaha ngain nña co ndaço:

—Janha chonxinha xí yá, ni nonaha de quehe rrinichja jaha.

Cottimeja sacjoi para ngain puerté patio mé. Co rato mé tsje ná conttaxichia. 69 Co nñhimoza mé cjan nña vicon nña iná, co coexinhi ndaço nña ngain nite nttiha:

—Xí jiha ná xivacao Jesús.

70 Pero Pedro cjan ndaço ixin ndoaha. Cottimeja icanxin nite nttiha ndaço na ngain Pedro:

—Jaha seguro ná chojni que vacao Jesús, ixin jaha cai joixin regioen Galilea. Co inchin nichja chojni de Galilea, jamé nichja jaha.

71 Cottimeja Pedro jehó joanchia ná castigo ngain Dios para ixin jehe ixin joinchejurá ngain Dios co ndaço:

—Janha chonxinha xí yá que jaha ra tendachjenji ni ra.

72 Co rato mé tsje conttaxichia yoxin nttiha. Cottimeja Pedro ðaxaon tti ndaço Jesús: “Icha saho que conttaxichia rrotsje va yoxin nttiha, jaha orrondaço ninxin nttiha ixin chonxinha na janha.” Co are jehe ðaxaon yá, jehe vehe tsjanga.

15

Jesús ngain Pilato

(Mt. 27.1-2, 11-14; Lc. 23.1-5; Jn. 18.28-38)

1 Co are vingasán, ðatte cain xidána que vaquetonha ngain icha xidána, co cain xittetonha ngain nihngo, co cain ximaestroé ley, co cain xivechonda joachaxin ngain juzgadoé nihngo. Co cainxin chojni mé coia na Jesús co joicao na ngain xigobernador Pilato. 2 Cottimeja Pilato joanchianguihi Jesús, co ndaço:

—¿Ajaha tti Rey de chojni judío?

Co Jesús ndaço:

—Ján, jañá inchin jaha ndaço.

³ Co cain xidána que vaquetonha ngain icha dána cjoanguihi xa Jesús anto tsje cosa. ⁴ Cottimeja Pilato cjan joanchianguihi Jesús iná, co ndačo:

—¿Quedonda xonhi nichja jaha? Tsjexin quejanhi cosa tjanguiha na.

⁵ Pero Jesús xonhi ndačo. Co Pilato inoeha quehe rrořaxaon de ixin jehe Jesús.

Are ndačo na ixin Jesús chonda que ndasenhe
(Mt. 27.15-31; Lc. 23.13-25; Jn. 18.38—19.16)

⁶ Co ngain cada quiai pascua, Pilato vechonda costumbre de vacančjanda ná de tti teaxinhi. Quexeho de tti chojni que vaquinchiehe jehe na, Pilato vacančjanda vagačhje. ⁷ Co tiempo mé, veaxinhi ná tti vinhi Barrabás. Jehe co icanxin na vintteaxinhi ixin goen na canxion chojni are vaquetocaho na gobierno romano. ⁸ Co tsje chojni xatte co ndache na Pilato ixin tsančjanda ná de tti teaxinhi, inchin vanchehe na cada quiai mé. ⁹ Co Pilato ndačo ngain na:

—¿Arinao ra tsančjanda tti jaha ra ncheguini ra Rey de chojni judío?

¹⁰ Jaña čho ixin jehe ovenohe ixin xidána que vaquetonha ngain icha xidána conchjoehe xa ngain Jesús ixin jehe cainxin cosa jian vanchehe. Mexinxin joinchechienxin xa Jesús nttiha. ¹¹ Pero cain jehe xa ndache xa cain chojni ixin icha jian rrondačo na ixin sačhje Barrabás. ¹² Cottimeja Pilato ndačo ngain na:

—¿Quehe rinao ra sinttaha janha ngain tti jaha ra ncheguini ra Rey de chojni judío?

¹³ Cottimeja cain jehe na coyao na, co ndačo na:

—¡Nchecrucificá!

¹⁴ Co Pilato ndačo ngain na:

—Pero ¿quedonda? ¿Quexeha cosa jianha joinchehe?

Pero cainxin na cjan na ndačo na sén:

—¡Nchecrucificá!

¹⁵ Co ixin Pilato joinao vittohe jian ngain chojni, mexinxin coančjanda Barrabás saçoi. Co are joexin coetonha para vicaon Jesús, cottimeja coančjanda xisoldado para joinchecrucificá xa.

¹⁶ Cottimeja xisoldado sajoicao xa Jesús ngain patioe nchiandoha Pilato co nttiha vayé xa cainxin icha xisoldado cai. ¹⁷ Co coentsá xa Jesús ná lontto morado inchin lonttoe rey, co joinchecjinga xa Jesús ná corona de joxon nchaha. ¹⁸ Cottimeja coexinhi xa cjoanoa xa Jesús, co ndačo xa sén:

—¡Viva tti Rey de chojni judío!

¹⁹ Co xanguí xa nttá já Jesús, co cjoatjo xa nttatté xa, co vettoxin nttajochjihi xa ngain Jesús inchin rrojinchesayehe xa. ²⁰ Co are joexin joinchehe xa cain yá para cjoanoa xa Jesús, cottimeja joantsjehe xa tti lontto morado coentsá xa, co cjan xa joinchengá xa lonttoe Jesús. Cottimeja sajoicao xa Jesús para joinchecrucificá xa.

Are joinchecrucificá na Jesús
(Mt. 27.32-44; Lc. 23.26-43; Jn. 19.17-27)

²¹ Ná xí que vinhi Simón joixin ngain ciudad de Cirene. Co xí mé cjoindodé Alejandro co Rufo. Co are vatto nttiha, xisoldado joinchecame xa crué Jesús.

²² Joicao xa Jesús ngain ná lugar dinhi Gólgota, que mé rrocho Lugué Nttalorojá Chojni. ²³ Co joanjo xa ngain Jesús vino que jittecyan dé ná ca dinhi mirra ixin rroguihi. Pero Jesús viha vino mé. ²⁴ Cottimeja joinchecrucificá na Jesús, co joantsje na suerte para chjejehe na lonttoe Jesús.

²⁵ Las nueve ndoyo joinchecrucificá na Jesús. ²⁶ Co coentaxin na ná xón ixin quedonda joinchecrucificá na, co xón mé vetaxin: “Tti Rey de chojni judío.” Co coenganito na xón mé já cruz. ²⁷ Co joinchecrucificá na yó tti chehe ngaca Jesús, ná vehe lado jian Jesús, co iná vehe lado cjon Jesús. ²⁸ Jañá conhe inchin jitaxin ngain Palabré Dios tti ndacho: “Nasoenxon na jehe inchin nadoenxon na chojni jianha.”

²⁹ Co cain nijoitsjehe ixin quexén jí Jesús nganito cruz coenttjoinga rroha na co cjoanoa na Jesús co ndacho na ngain:

—Jaha ndacho ixin sinchexante nihngo icha importante co nincoa nchanho otsjaha sinchexjian nihngo mé iná. ³⁰ Mexinxin jaxon dani-axin de nganito cruz yá jaho para senha.

³¹ Cai canxion xidána que vaquetonha ngain icha xidána, co ximaestroe ley cjoanoa xa Jesús, co ndache chó jecho xa:

—Jehe nchao cjoengujna icha chojni, pero čhoha tsjengujna cuerpoe jehe mismo. ³² Si jehe tti Cristo, Rey de chojni Israel, socon na saniaxin jaxon de nganito cruz, cottimeja, ján, sotticaon na.

Co hasta cayoi tti xite nganito cruz nttiha cjoanoa xa Jesús.

Are ndavenhe Jesús

(Mt. 27.45-56; Lc. 23.44-49; Jn. 19.28-30)

³³ Are ngosine nchanho, ndaconaxin xehe ngoixin región mé, co conchjenhe tti naxin xehe mé hasta ní hora tsocjin. ³⁴ Co hora mé Jesús coyao soji, co ndacho:

—Eloi, Eloi, ¿lama sabactani? —que rrocho: Diona, Diona, ¿quedonda ndacointtona na janha?

³⁵ Co canxion nite nttiha coinhi na nichja Jesús pero coinxinha na quehe ndacho Jesús, co ndache chó na:

—Ttinhí ra, jidayé Elías.

³⁶ Cottimeja ná de jehe na coinga co coá ná cosa dinhi esponja. (Cosa mé datse jinda inchin chjon algodón.) Co jehe joinchetjao cosa mé conixin vino que anto san. Co coincjin ná nttá co tsín noi nganito cruz para Jesús rrocajindoe, co chojni mé ndacho ngain ni icha:

—Chonhe ra. Socon na aco tsí Elías para sinchegania.

³⁷ Cottimeja Jesús coyao soji, co ndavenhe. ³⁸ Co rato mé tti manta vettoa ngaxinhi nihngo icha importante vichjenga manta de noi hasta nontte. ³⁹ Co are xicapitán que jingattjen nttiha ngain Jesús vicon xa quexén coyao Jesús co quexén ndavenhe, ndacho xa:

—Seguro xí jiji Xenhe Dios.

⁴⁰ Co cai tsjehe canxion nchí masqui de cjin. Co ngacjén cain nchí mé, nttiha vehe Salomé co María Magdalena, co iná María tti cjoí janné José co Jacobo tti icha nchín. ⁴¹ Icha saho are Jesús vehe ngain nonttehe Galilea, canio nchí mé vangaria conixin jehe co vagayaconhe ncha Jesús. Cai icha nchí joí conixin Jesús ngain Jerusalén. Co are jehe nganito cruz, nttiha vintte cainxin nchí mé cai.

*Are Jesús xavá**(Mt. 27.57-61; Lc. 23.50-56; Jn. 19.38-42)*

⁴² Omerocoa naxin xehe, co ixin nchanho mé víspera de tti nchanho para joinchejogaha na ngain quiai pascua, rrocho ixin nchanho are ndavenhe Jesús nchanho para joinchekhjian na cain tti joine na ndoexin are joinchejogaha na; ⁴³ mexinxin jaicoa jói ná tattíta vinhi José de rajna Arimatea. Jehe vechonda tsje joachaxin ngain juzgadoe nihngo Israel. Cai jehe anto joinao jói tti tiempo que Dios ttetonha. Co tattíta mé xañha joixinhi tti jí Pilato co joanchiehe cuerpoe Jesús. ⁴⁴ Pilato anto goan admirado ixin ondavenhe Jesús co rroanha xicapitán para joanchianguihi xa. ⁴⁵ Co are xicapitán ndacho xa ixin ndoa ondavenhe Jesús, Pilato joanjo joachaxin para sajoicao José cuerpoe Jesús. ⁴⁶ Cottimeja José coehna ná manta fino, roa manta, co joinchegania cuerpoe Jesús co coensiha manta mé. Cottimeja coín cuerpoe Jesús ngain ná cueva naroaxin que odingue na ngadoho ná ttjao nttiha, co coejé conixin ná xo jie. ⁴⁷ María Magdalena co María janné José vicon na ttinó vittohe cuerpoe Jesús.

16*Are xechon Jesús**(Mt. 28.1-10; Lc. 24.1-12; Jn. 20.1-10)*

¹ Co are vatto nchanho para joinchejogaha na, Salomé co María Magdalena, co iná María janné Jacobo sajoicao na ná xoon que diquehna na co anto çhjoin xajni xoon mé inchin perfume para rrochjé na cuerpoe Jesús. ² Co are çhinhi nchanho domingo, tti saho nchanho de semana, sacjoi na ngain tti vittohe cuerpoe Jesús. ³ Co ndache chó na ngatja nttiha: —¿Pero quensen tsoxinca xo jie que jijé cueva yá?

⁴ Pero are joiji na nttiha vicon na ixin tti xo jie que vijé cueva icoha xo nttiha, ojé jí xo. ⁵ Co joixinhi na ngaxinhi cueva mé. Co nttiha vicon na ná xanxí tají xan lado jian, co lonttoe xan roa lontto, co hasta tti nontte jicaxin lontto. Co jehe na xoon na. ⁶ Co jehe xanxí mé ndacho xan ngain na:

—Xañha ra. Onona ixin ttjé ra Jesús de Nazaret, tti joinchecrucificá na. Pero jehe oxechon co icoha nttihi. Tsjexin ra tti coín na cuerpoe. ⁷ Mexinxin ttji ra ngain chojni que vacao Jesús, co ngain Pedro cai, co ndache ra na: “Jesús icha saho tsji Galilea que jaha ra. Co nttiha siconxin ra jehe inchin jehe ndattjo ra.”

⁸ Cottimeja canio nchí mé coinga ncha vaçhjexin ncha de cueva mé co vintteçanga ncha ixin anto vintteçoon ncha. Co xonhi chojni ndache ncha ixin vintteçooncoa ncha.

*Are Jesús xago ngain María Magdalena**(Jn. 20.11-18)*

⁹ Co después que Jesús xechon ngain saho nchanho de semana, jehe xago ngain María Magdalena, tti vechonda yáto espíritu jianha hasta que Jesús joinchexingamehe sé tiempo icha saho. ¹⁰ Cottimeja jehe María mé sacjoi joindache cain nivacao Jesús ixin Jesús xechon. Jehe nivacao Jesús anto vinttechín na co vatsjanga na are mé ixin Jesús ndavenhe. ¹¹ Co are coinhi na tti ndacho María vitticaonha na palabré jehe.

*Jesús xago ngain yó chojni que vacao**(Lc. 24.13-35)*

¹² Co después de jiji, Jesús xago ngain yó de tti chojni que vacao are satettji na ngatja nttiha. Co cayoi chojni mé vicon na Jesús inchin ojé chojni. ¹³ Cottimeja are cayoi chojni mé vatsoan ixin jehe mé Jesús, cjan na co ndache na tti icha chojni que vacao Jesús, pero jehe na, ni icha, xa vitticaonha na.

Tti coetonhe Jesús nirepresentanté jehe
(Mt. 28.16-20; Lc. 24.36-49; Jn. 20.19-23)

¹⁴ Co icha después Jesús xago ngain cainxin tti ttejngo chojni que vacao are tatene na. Co joinchesattehe na ixin vitticaonha na co ixin cha ansén na ixin vitticaonha na tti ndačo chojni que vicon Jesús dixechon. ¹⁵ Cottimeja ndačo Jesús ngain na:

—Ttji ra ngoixin mundo co ndache ra cainxin chojni tti joajna que danjo iná vida naroaxin. ¹⁶ Chojni que sitticaon co siguitte, rrochonda iná vida naroaxin. Pero chojni que sitticaonha, mé Dios sinchecondená chojni mé. ¹⁷ Co janhi sinchehe chojni que sitticaon na janha: Jehe sinchegonda joachaxin de nombrena para senguixin espíritu jianha, co rronichja ojé idioma que ni jehe tsinxinha. ¹⁸ Si rrotse ná conché, xonhi tsonhe masqui conché mé sinehe va jehe. Co si sihi ná cosa que ndadoen chojni, pero jehe xonhi tsonhe. Co saquehe rá ngataha chojni nihi co sinchetsenhe ñao Dios conixin joachaxin de nombrena co jehe tti nihi rroxingamehe.

Are Jesús saccoajín para ngajni
(Lc. 24.50-53)

¹⁹ Co are Jesús, tti chonda cain joachaxin, joexin ndačo cain cosa yá ngain na, jehe saccoajín para ngajni, co joiguehe ngain Dios lado jian. ²⁰ Co chojni Jesús sacjoi na cainxin lugar co ndache na chojni joajna que danjo iná vida naroaxin. Co jehe Jesús vacjenguijna na ngoixin tti vacji na. Co cai jehe vanchesegurá cain tti vandačo na ixin chjé na joachaxin para vanchehe na señal de milagro. Amén.

Tti Jian Joajné Jesucristo Que Dicjin Lucas

Quedonda Lucas dicjin joajna jiji

¹ Tsje chojni cjin historié Jesucristo inchin jehe conhe co jehe joinchehe ngataha nontte jiji. ² Jehe na cjin na inchin joinchecoanna na tti chojni que vicon cain tti joinchehe Jesús desde are nacoexinxon co cjoenguijna na Jesús para ndache na chojni tti jian joajna que joixin de ngain Dios. ³ Janha cai joanchiangui jian de ixin cain tti joinchehe Jesús desde coexinxin xé, co janha xaxanho que jian jí para que janha roccjin na cain cosa jiji inchin conhe para ixin jaha Teófilo, ixin jaha tti compañerona que anto jian, ⁴ para que jaha jian rrochonxin tti ndoa que jointtacoanha jehe na.

Ná ángel de Dios joindačo ixin tsoncjiji Juan, tti vancheguitte chojni

⁵ Are Herodes vehe rey de ngain Judea, are mé vehe ná xidána que vinhi Zacarías. Jehe vehe ngain grupoe xidána que vinhi Abías. Co čhihi Zacarías vinhi nča Elisabet. Co cayoi jehe na cjoí na de razé Aarón, tti cjoí saho xidána. ⁶ Jehe Zacarías conixin čhihi, Dios ndačo ixin jian na co jehe na vaguitticaon na cain tti coetonna Dios co jańá xonhi chojni vanichja que ixin jehe na jianha vanchehe na. ⁷ Pero jehe na xonhi chjan vinttechonda na, ixin Elisabet deporsín xonhi chjan vancheconcjiji, co cayoi jehe na anto ojonchjan vintte na.

⁸ Ngain ná tiempo grupoe Zacarías joinchehe tocado joinchehe xa de dána ngaxinhi ningoe Dios, ⁹ ixin jamé costumbre vinttechonda cain xidána ngain tiempo mé, mexinxin ngain sorteo vittotaon Zacarías para que jehe joixinhi ngaxinhi ningoe Dios para joicjaga tsjoca. ¹⁰ Ngoi rato que jiche tsjoca ngaxinhi nihngo, ndoja cain chojni joinchecoanxinhi na Dios. ¹¹ Co ngain rato mé Zacarías vicon ná ángel de Dios tajngattjen lado jian de ngain altar tti jichexin tsjoca. ¹² Are jehe vicon ángel mé, jehe ni inoeha quehe sinchehe ixin anto xaon. ¹³ Pero ángel mé ndačo ngain Zacarías:

—Zacarías xaonha, ixin Dios coinhi tti jaha joinchetsenhe ñao, mexinxin čhiha Elisabet sincheconcjiji ná chjan que jaha sincheguini xan Juan. ¹⁴ Co jaha anto rrochaha co anto čhjoin sarihi ngain vidá, co tsje chojni rroché na ixin tsoncjiji chjan mé. ¹⁵ Ixin xanha mé sehe xan xí importante para ixin Dios. Chjan mé siha xan vino ni cosa que coanxin chojni, co rrochonda xan anto tsje joachaxín Espíritu Santo desde icha saho que tsoncjiji xan. ¹⁶ Co de ixin tti jehe xan sinchehe xan, tsje chojni de ngain nación Israel roccjan na sinchesayehe na Dios de jehe na tti chonda cain joachaxin. ¹⁷ Jehe Juan jiji tti saho tsí que Cristo, co rrochonda xajeho espíritu co xajeho joachaxin que vechonda profeta Elías, para rrondache chojni quexén jehe na sinao na xenhe na, co para que tti chojni que ditticaonha Dios tsanguí na sitticaon na Dios. Jamé para que chojni nchao sayé na Cristo are jehe tsí.

¹⁸ Zacarías joanchiangui ngain ángel mé co ndačo:

—¿Quexén rrochondaxin seguro janha de ixin jiji? Ixin janha atto dačí na co cai čihna.

¹⁹ Ángel mé ndačo:

—Janha Gabriel na, co rrinttaha cain tti ttetonha Dios. Jehe tti cotonna para joindattjo tti jian joajna jihi. ²⁰ Pero jai ixin jaha vitticaonha tti janha ndattjo, jaha tsottapo; čhoħa rronichja hasta que tsoncjija xanha. Co jihi siconhe ngain mero tiempoe.

²¹ Co ngoi rato mé, cain chojni ntthi techonhe na jehe Zacarías ndoja, co vinttegoan na admirado ixin Zacarías anto cončhjenhe ngaxinhi nihngo. ²² Co are jehe vachje, ičhoħa nichja ngain na; cottimeja řaxaon na que Dios cjoagoe ná cosa ngaxinhi ningoe Dios. Co jehe nichja ngain na conixin joxon seña ixin ndacottapo.

²³ Are joexin cain nchanho de řé Zacarías ngain nihngo icha importante, Zacarías sacjoi para nchiandoha. ²⁴ Después de cain yá, čihi jehe Zacarías oveyá nčha chjan, co de jamé vehe nčha, ivachjexinha nčha de nchiandoha nčha naho conittjao, co řaxaon nčha: ²⁵ “Dios joanjo joachaxin para que janha rriyá chjan jai para que chojni itsjanoha na na.”

Ná ángel joindačho ixin tsoncjiji Jesús

²⁶ Vittjaxon incjaon conittjao, Dios rroanha jehe ángel Gabriel ngain region Galilea ngain ná rajna que dinhi Nazaret, ²⁷ para joitsjehe ná xannčí que vinhi María. Xannčí mé virgen xan co ovechonda xan compromiso de rrocottehe xan ná xí que vinhi José, razé rey David. ²⁸ Angel mé joixinhi tti nchia que jixinhi xannčí mé, co ndačho ngain xan:

—Janha joichjaha joajna jaha ixin Dios anto rinao jaha! Dios jí nganji jaha; Dios icha jointtanchaon jaha de cainxin nčí.

²⁹ Pero are xannčí mé vicon xan jehe ángel mé co coinhi xan tti nichja ángel mé, jehe xan goan xan admirado co inoeha xan ixin quedonda jamé ndačho ángel ngain xan. ³⁰ Cottimeja ángel mé ndačho:

—María, řaonha, ixin Dios anto rinao jaha. ³¹ Jai jaha sariyaha ná chjan co are osincheconcjiji xan, jaha sincheguinihi xan JESÚS. ³² Chjan mé anto importante sehe xan ngain Dios, co sinhi xan Xenhe Dios que ttjen ngajni, co jehe Dios rrochjé xan joachaxin de sehe xan rey inchin ndogoelitoe xan řančjen que vinhi David are saho. ³³ Jamé para que jehe xan tsetonha xan ngain nación Israel para cainxin tiempo, co tti jehe xan tsetonha xan řonhi tiempo tsjexin.

³⁴ Cottimeja María joanchiangui ngain ángel mé co ndačho:

—¿Queřen tsonhe jihi, ixin janha řonhi xí rriquinha?

³⁵ Angel ndačho ngain María:

—Espíritu Santo tsí nganji jaha co joachaxín Dios que ttjen ngajni sisiandanji jaha inchin ná ttjoi. Mexinxin tti chjan que jaha sincheconcjiji, sehe xan jian ngattoxon con Dios co sinhi xan Xenhe Dios. ³⁶ Cai nčhiprimá, Elisabet, sincheconcjiji nčha ná chjan cai masqui onačhichjan nčha, mexinxin tti nčí que ndačho chojni que čhoħa ncheconcjiji chjan, jai jehe nčha ochonda nčha incjaon conittjao que jiyá nčha xenhe nčha. ³⁷ Para ixin Dios řonhi cosa tangui.

³⁸ Cottimeja María ndačho:

—Janha ditticanho cainxin tti ttetonha Dios; co mexinxin Dios nchao sinchehe nganji na janha inchin jaha ndachjenji na.

Conixin jehó yá, ángel mé sacjoi.

María cjoi joitsjehe Elisabet

³⁹ Ngain tiempo mé María toin cjoí joitsjehe jehe Elisabet que vehe ngain ná rajna ngagaha jna ngain nonttehe Judea. ⁴⁰ Co are María joiji nttiha jehe joixinhi nchiandoha Zacarías co chjé joajna jehe Elisabet. ⁴¹ Are Elisabet coinhi joajné María, chjan que veyá Elisabet coingui xan ngaxinhi tsehe, co ngain rato mé Espíritu Santo joí conixin anto tsje joachaxin ngain jehe Elisabet. ⁴² Cottimeja Elisabet ndačho sén ngain María:

—Dios jointtanchaon jaha icha que cainxin nčhí, co joinchenciaon xanha que rriyaha. ⁴³ ¿Quensen na janha para que joitsjena jaha janné tti Dios que chonda cain joachaxin nganji na janha? ⁴⁴ Ixin are janha coian joajná jaha, xanhna que rriyá, coingui xan ngaxinhi tsehe na ixin ché xan. ⁴⁵ Anto čhjoin para ixin jaha ixin vitticaon ixin siconha inchin ndačho Dios.

⁴⁶ Cottimeja ndačho María:

Almana nchecoanxinhi Dios.

⁴⁷ Co ansenna ché ngain Dios, tti chjana vida naroaxin.

⁴⁸ Ixin Dios xaxaon de ixin janha, tti rrihi inchin ná ninchehe xa para ixin jehe,

co jai pa ndaha chojni rrondačho na ixin anto čhjoin vidana.

⁴⁹ Ixin Dios, tti chonda cain joachaxin, jian nganji na janha; tsosayehe nombré jehe.

⁵⁰ Jehe cainxin tiempo tsiaconoehé cain chojni que xaon ngain jehe.

⁵¹ Jehe joinchehe cosa anto importante;

co joacha ngain tti chojni que tonohe orgulloso ngain ansén.

⁵² Tti chojni que chonda tsje joachaxin jehe joinchenontte de ngain joachaxin,

co tti chojni que xonhi joachaxin chonda, jehe Dios chjé na importancia.

⁵³ Tti chojni noa jehe chjé na cosa jian,

co tti chojni rico jehe cointtohe na texoaxon rá na.

⁵⁴ Jehe cjoenguijna nación Israel ixin mé ninchehe xé jehe;

jehe tjañeha de ttiaconoehé chojni mé,

⁵⁵ ixin jamé ndačho jehe ngain ndoguelitoa na xančhjen Abraham conixin cain xenhe ndo para cainxin tiempo.

⁵⁶ Co nttiha tavehe María ngain Elisabet inchin ní conittjao, cottimeja sacjan para nchiandoha.

Are concjiji Juan, tti vancheguitte chojni

⁵⁷ Después ovittja tiempo que Elisabet chonda que joincheconcjiji chjan, co jehe joincheconcjiji ná xanxí. ⁵⁸ Cain nivecinoe co nifamilié cjoí na joichjé na joajna ixin conohe na que Dios anto jian ngain Elisabet. ⁵⁹ Vittja jni nchanho, joichjé na xanxichjan mé tti xohe que dinhi circuncisión, co joinao na rroguinhi xan Zacarías inchin vinhi ndodé xan.

⁶⁰ Pero janné xan ndačho jan:

—Nahi. Xanhna chonda que sinhi xan Juan.

⁶¹ Co jehe na ndačhao na ngain Elisabet:

—¿Quedonda? xonhi nindoí dinhi jañá.

⁶² Cottimeja joanchiangui na conixin seña ngain ndodé xanxichjan mé para conohe na quexén rinao jehe ndo sinhi xan. ⁶³ Jehe ndodé xan joanchia ndo rioho tabla para coentaxin ndo, co nttiha jehe ndo cjin ndo: “Jehe xan sinhi xan Juan.” Co cainxin nite nttiha vinttegoan na admirado de ixin nombre yá. ⁶⁴ Ngain rato mé Zacarías cjan nichja iná, co coexinhi

joinchecoanxinhi Dios. ⁶⁵ Conixin jiji, cain nivecinoe vinttegoan na admirado, co ngoixin región mé de ngagaha jna de Judea vaquequin chojni de ixin quehe conhe. ⁶⁶ Cain chojni que vaconohe jiji, vařaxaon na ixin quedonda jańá conhe co vajanchianguihi chó na co vandačo na:

—¿Quehe siguehe chjan yá?

Ixin ndoa Dios joinchenchaon xan.

Tti joinchecoanxin Zacarías

⁶⁷ Espíritu Santo joí conixin joachaxin ngain Zacarías, ndodé xanxichjan mé, co Zacarías nichja tti palabra que Dios joanjo ngain co ndačo:

⁶⁸ Cainxin chojni jiquininxin sinchecoanxinhi na Dios de Israel, tti chonda cain joachaxin,

ixin jehe joí nganji na ján na řo chojni jehe co joichjá na iná vida naraa.

⁶⁹ Jehe chjá na ná chojni que chonda tsje joachaxin que danjo iná vida naraa,

co chojni jiji joixin de ngayé razé David, tti cjoí jian ninchehe řa para ixin Dios.

⁷⁰ Ixin Dios jehe jańá ndačo ngain profeta, co jehe profeta joindačo nganji ján na, desde ngain tiempo are saho:

⁷¹ que ixin Dios tsjenguijna na para ngain chojni que ningacoan na co ngain chojni que rinaoha na,

⁷² co joindačo profeta cai ixin Dios coiaconohe nindogoelitoa na řančjen,

co ixin jehe Dios řonhi tiempo rrotjańehe tti trato jian que jehe joinchechjian ngain na.

⁷³ Janhi tti ndačo Dios conixin juramento que sinchehe ngain ndogoelitoa na řančjen Abraham:

⁷⁴ que ixin jehe tsančjandaha na ján na para ngain tti chojni que ningacoan na,

para que rrořaonha na sinttosayehe na jehe,

⁷⁵ co sontte na chojni jian para sontte na chojni Dios cainxin nchanho que ján na sonttechon na.

⁷⁶ Co jaha, xanxichjanhna, jaha sinhi profeté Dios que ttjen ngajni,

ixin jaha tti tsji icha saho que Cristo para rrondache chojni queřén tsentoxinhi na vidé na, jamé jaha sinchechjian ná nttiha nao para ixin Cristo.

⁷⁷ Co jaha tti sinchenohe chojni Israel que tti jianha que jehe na tenchehe na nchao sitjańehe na,

co jamé Dios nchao rrochjé na iná vida naraa.

⁷⁸ Ixin Dios de ján na, jehe anto rinao na co anto ttiaconoá na,

co jehe rroanha tti joadingasán de ngajni para sinchegasenhe cain chojni;

⁷⁹ para que sinchengasenhe tti chojni que te ngain tti naxin xehe ixin chojni mé rročo que jehe na ondavenhe na,

co para que tsjagoa na queřén sonao na cain chojni.

⁸⁰ Co xanxichjan mé vangui xan co cada nchanho icha cosoji xan de ngain Espíritu Santo. Co cainxin tiempo mé jehe xan vehe xan ngagaha jna tti řonhi chojni jí hasta que jehe xan coexinhi xan joinchecoenhe xan chojni Israel.

2

Are concjihi Jesús (Mt. 1.18-25)

¹ Chiaon tiempo are concjihi Juan, xiempéador vinhi Augusto César, co jehe xa coetonha xa que cjoinhi ná censo para vinttetaxin cainxin chojni de ngoixin nonttehe chojni romano. ² Jihi tti saho censo que cjoinhi are Cirenio vehe gobernador ngain Siria. ³ Cainxin chojni que vintteha ngain rajné chonda que cjoí na ngain rajné na para vinttetaxin na. ⁴ Mexinxin José vaçhjexin de rajna Nazaret ngain regioen Galilea, co sacjoi para ngain regioen Judea ngain rajna Belén, tti diconcjixin David, ixin José razé David. ⁵ José cjoí para Belén para joiguetaxin jehe conixin María, tti ovehe de novia ngain José para tsottehe. Co are mé María oveyá chjan. ⁶ Co are jehe na nttiha ngain Belén, ovittja tiempo que María sincheconcjihí chjan mé. ⁷ Nttiha joincheconcjixin María tti saho xenhe, co jehe coensiha xan lonttochjenhe xan, co coenjoa xan nttiha ngá tti cajón que jinea coxintá ixin xonhi cuarto vittja na ngain ni ná mesón nttiha.

Are ángel joinchenohe tti tettingaria coleco

⁸ Nttiha chian rajna Belén canxion xí que vaquingaria coleco vittoeco-aho xa colecoe xa nttiha ngataon jngui ngain ttie mé. ⁹ Co de repente jehe xa vicon xa jóí ná ángel de Dios ngain xa, co chíxo de Dios que jehe joiaho joinchengasán ngoixin ngandanji xa; co jehe xa anto vinttexaon xa. ¹⁰ Pero ángel mé ndaço ngain xa:

—Xaonha ra ixin janha joiquian ná jian joajna nganji ra, que are tsinhi icha chojni anto rroché na cainxin na. ¹¹ Co mé rroço ixin jai ngain rajné David concjihi ná tti rrochjá ra iná vida naroaxin, co jehe mé CRISTO, tti chonda cainxin joachaxin. ¹² Co jihi ná señal para que jaha ra sigatsoan ra chjan mé: jaha ra sinchí ra chjan jihi jisía xan lonttochjenhe xan co tajjioa xan ngá cajón tti jinea coxintá.

¹³ Co ngain rato mé, nttiha ngaca ángel mé cononxin anto tsje icha ángel que joixin de ngajni, co tenchecoanxinhi Dios tendaço:

¹⁴ ¡Nttosayehe na Dios que ttjen ngajni,
co ngataha nontte cain tti chojni que jehe Dios coinchiehe, que jehe na
sinao chó na!

¹⁵ Cottimeja are cain ángel mé sacjoi para ngajni, jehe nitettingaria coleco ndache chó na:

—Chjin na para Belén, ditsjehe na tti conhe jihi, tti joindattjo na Dios.

¹⁶ Toin vintteçji na ndoa co nttiha vittjaxin na María co José, co vintteguicon na xannchinchjan tajjioa xa ngá cajón tti jinea coxintá. ¹⁷ Are jehe na vintteguicon na xannchinchjan, jehe na coequin na cain tti ndaço ángel ngain na de ixin jehe chjan mé. ¹⁸ Co cainxin chojni que coinhi tti jehe na ndaço na vinttegoan chojni mé admirado. ¹⁹ Pero María cain cosa jihi coenchjinha ngain ansén, co anto vaçaxaon de ixin cain cosa jihi. ²⁰ Jehe nitettingaria coleco sacjan na tti cointtohe na coe na, co joinchecoanxinhi na co joinchesayehe na Dios de ixin tti coinhi na de ngain ángel co ixin vicon na xannchinchjan jamé inchin ndaço ángel ngain na.

Are María co José joinchechienhe na Jesús ngain nihngo icha importante

²¹ Are vittja Jesús jni nchanho de concjihi, chjé na tti xöhe que dinhi circuncisión co joincheguinhí na JESÚS, jamé inchin coetonha ángel ngain María icha saho que rrogueyá chjan mé.

²² Co are xette nchanho para María cosoji inchin ttetonha ley que vaye Moisés, jehe co José sajoicao na xanxichjan mé ngain nihngo icha importante que jí ngain ciudad de Jerusalén para coequinixin na xan ngain Dios. ²³ Jehe na joinchehe na jañá ixin ngain ley de Dios jitaxin: “Xanxí que saho sincheconcjihi ná nchí, xan mé para ixin Dios.” ²⁴ Mexinxin María co José vinttecji na ngain nihngo icha importante para joicán na ngain altar inchin ttetonha ley de Dios; nntaohe yó coquín o yó coxentta.

²⁵ Ngain tiempo mé nttiha Jerusalén vehe ná xí que vinhi Simeón. Mé vehe ná xí anto jian de ngain ansén, co jehe vanchesayehe Dios, co vachonhe tti nchanho are Dios tsjenguijna chojni ngain nación Israel sachá na ngain chojni romano. Espíritu Santo vehe ngain Simeón, ²⁶ co Espíritu Santo mé joinchenohe que jehe Simeón senha hasta que jehe sicon Cristo tsí, tti rrorroanha Dios. ²⁷ Jehe Simeón jihi cjoí ngain nihngo mé ixin jamé coetonha Espíritu Santo. Co are María co José joijicaho na Jesús nttiha para joinchehe na inchin ttetonha ley de Dios, ²⁸ are mé Simeón cjóa xanxichjan Jesús ngá rá co joinchecoanxinhi Dios co ndačo: ²⁹ Janché, soixin onchao tančhanda na senhe na, ixin janché ovicon janha tti soixin ndachjenji na.

³⁰ Janha oviconxin con tti joí para tsjenguijna na janha na,

³¹ que soixin rroanha ngattoxon con cain chojni.

³² Jehe chojni jihi tti joadingasán que sinchengasenhe chojni de icha nación,

co de ixin jehe tsoyayexin chojni Israel, chojnia soixin.

³³ José co María, janné Jesús, vinttegoan na admirado de ixin tti ndačo Simeón de ixin jehe Jesús. ³⁴ Cottimeja Simeón joinchetsenhe ñao Dios que sinchenchaon Jesús conixin María co José co ndačo ngain María, janné Jesús:

—Tsjexinxin, de ixin xanxichjan jihi Dios sinchecastigá tsje chojni Israel co icha na Dios rrochjé na iná vida naroaxin de ixin tti sinchehe xan. Co jehe xan ná señal que joixin de ngain Dios que anto tsje chojni sitticaonha na jehe xan. ³⁵ Co jamé rrořago tti řaxaon cada chojni ngain ansén na. Pero para jaha, cain jihi inchin ná espada que sattodoho almá, ixin anto joachjaon rrochonda.

³⁶ Nttiha vehe ná nchí cai que vagayé ncha joajna de ngain Dios, co vinhi ncha Ana. Co mé nchichjehe ná tti vinhi Fanuel, de ngain grupoe Aser de chojni Israel. Nchí mé atto onachichjan vehe ncha are mé. Co atto řa chjan ncha are dicottehe ncha, co vecao ncha xixihi ncha jeho yáto nano. ³⁷ Co are ngain tiempo mé ovechonda ochenta y cuatro nano de ndavenhe xixihi ncha. Jehe ncha vagachjexinha ncha de ngaxinhi nihngo mé, ixin de ttie co de nchanho vanchesayehe ncha Dios; vaguecjaño ncha co vanchecoanxinhi ncha Dios. ³⁸ Co ngain rato mé conchienne jehe Ana co después de joanjo gracias ngain Dios de ixin Jesús, coexinhi ndache cain chojni de ixin Jesús, tti chojni que techonhe tti nchanho are Dios tsjenguijna chojni Israel para sachá na ngain chojni romano.

Are María co José sacjancaho na Jesús para Nazaret

³⁹ Are joexin joinchehe na cain tti tte-tonha ley de Dios, cjan na ngain Nazaret, rajné na, ngain regioen Galilea. ⁴⁰ Co Jesús icha vangui, co icha cosoji, co icha venohe jian, co Dios anto joinchenchaon.

Are Jesús cjoí ngaxinhi nihngo icha importante

⁴¹ José co María, janné Jesús, cain nano vacji na ngain ciudad Jerusalén para ixin tti quiai dinhi pascua. ⁴² Are Jesús joinchexette tteyó nano, jehe co José, co María, janné, canio na cjoí na Jerusalén inchin costumbré na ngain quiai mé. ⁴³ Co are ojoexin quiai mé, jehe na sacjan na co Jesús ndadiguittohe nntiha Jerusalén, co José co María venoeha na. ⁴⁴ Jehe na xaxaon na que puede Jesús nntiha joí ngayé chojni, co jamé sacjoí na ngoixin nchanho mé. Pero are ondaconaxin xehe, jehe na cjoé na Jesús ngayé icha ni ichó co niamigoe na, ⁴⁵ co vittjaha na Jesús. Cottimeja sacjan na para Jerusalén iná para cjoé na Jesús nntiha.

⁴⁶ Vatto ní nchanho, cottimeja vittja na Jesús tají ngaxinhi nihngo icha importante, ngayé ximaestroey ley tajittinhi tti tendácho xa co jehe danchiangui ngain xa icha cosa de Dios. ⁴⁷ Cain chojni que coinhi tti ndácho jehe vinttegoan na admirado ixin tti nichja jehe jian jí, co de cain pregunta que joanchiangui xa ngain, jehe nchao ndácho cain. ⁴⁸ Are José co María vícon na mé, vinttegoan na admirado, co janné ndácho jan ngain jehe:

—Hijo, ¿quedonda jañá joinchehe nganji na janha na? Ndodá conixin janha tettjé ra jaha co anto xáon na.

⁴⁹ Cottimeja Jesús ndácho:

—¿Quedonda ttjé ni ra? ¿Anoaha ra que janha chonda que sarihi ngain nihngo para ixin asunto de Ndodana?

⁵⁰ Pero jehe na coinxinha na tti ndácho Jesús ngain na.

⁵¹ Cottimeja Jesús conixin José co María sacjan na para Nazaret, co Jesús anto vanchehe sigue vaguitticaon ngain cayoi na. Co María, janné Jesús, cain jihi coenchjinha jan ngain ansén jan. ⁵² Co de cain tiempo mé Jesús icha vangui de ngain cuerpoey co de ngain joarrixaoen, co Dios, conixin cain chojni que chonxin jehe Jesús anto joinao na jehe.

3

Are Juan ndache chojni ngagaha jna joajné Dios

(Mt. 3.1-12; Mr. 1.1-8; Jn. 1.19-28)

¹ Vittjaxon quince nanó de jittetonha xiemperador Tiberio César, are mé Poncio Pilato vehe gobernador ngain Judea, co Herodes vehe gobernador ngain Galilea, co xanchó Herodes que vinhi Felipe vehe gobernador ngain región que dinhi Iturea co ngain región que dinhi Traconite, co Lisania vehe gobernador ngain regioen Abilinia. ² Co are mé ná tti vinhi Anás co iná tti vinhi Caifás nimé ni vintte xidána icha importante. Ngain tiempo mé, de ngagaha jna tti xonhi chojni te, Dios nichja ngain Juan, xenhe Zacarías, ³ co Juan vaçhje cjoí ngain cain lugar de ngandehe río Jordán para ndache chojni ixin chonda na que tsentoxinhi na vidé na co siguítte na, para que cainxin tti jianha que nchehe na Dios sinchetjañehe na. ⁴ Cain jihi conhe inchin diquentaxin profeta Isaías janhi:

Tsinhi na ná tté chojni que tsoyaoxin de ngagaha jna co rrondaçho:

“Nchechjian ra nntiha para ixin jehe tti chonda cain joachaxin; danttjehe ra ná nntiha nao.

⁵ Cain tsaga singattea tsaga,
co cain jna co jnanchjan tsonataonxin;
cain nttiha que jeha nao, tsonao nttiha,
co cain nttiha que jeha nataonxin, tsonataonxin nttiha.

⁶ Cottimeja cainxin chojni sicon na tti rroanha Dios para tsjenguijna jehe na.”

⁷ Are chojni vaconchienne na para que Juan rrojincheguite na, jehe vandačo ngain na:

—¡Jaha ra xenhe conché ra! ¿Quensen jointtanoha jaha ra ixin nchao setanha ra tti castigo anto soji que jitonchian? ⁸ Saho nchehe ra jian para que jamé sicon icha chojni que ján ndoa coentoxinhi ra vidá ra co ndacheha chó ra: “Ján na razé Abraham na; mexinxin Dios tsjenguijna na”, ixin janha rrondattjo ra que hasta xo jihi Dios nchao sinchechjian xo chojni de razé Abraham. ⁹ Ojí listo hacha para tsončhinji nttá, co cain nttá que danjoha jian ttochjoin rročhinji nttá co rroche nttá ngain xohi.

¹⁰ Cottimeja cain chojni mé joanchiangui na ngain Juan co ndačo na:

—Mexinxin, ¿quehe chonda na que sinttaha na remé?

¹¹ Juan ndačo ngain na:

—Xo chonda ra yó camisa chonda ra que sanjo ra ná camisa ngain tti chondaha ni ná camisa. Co xo chonda ra tti jintte ra, jinttecoho ra tti chojni que chondaha.

¹² Nttiha vinteconchienne canxion xicobrador de impuesto cai para que joiguite xa, co joanchiangui xa ngain Juan co ndačo xa:

—Maestro, ¿quehe chonda na que sinttaha na janha na?

¹³ Co Juan ndačo ngain xa:

—Ncheha ra cobro icha de tti ttetonha ley.

¹⁴ Cai canxion xisoldado joanchianguihi xa Juan co ndačo xa:

—Co janha na, ¿quehe chonda na que sinttaha na?

Juan ndačo ngain xa:

—Dantsjeha ra tomí chojni afuerza, ni tjanguiha ra cosa que jehe na xonhi joinchehe na; jaha ra dintte ra contento conixin tti tomi que jaha ra tedacha ra.

¹⁵ Cain chojni mé anto joinao na conohe na ixin quensen Juan ixin xaxaon na que puede Juan jehe mé tti Cristo. ¹⁶ Pero Juan ndache cainxin na:

—Janha ndoa ntaguittexin chojni conixin jinda, pero toin tsí iná xí que sinttaguittexin ra conixin Espíritu Santo co Espíritu mé tsiaho xá xohi para sincheroa almá ra xá tonhe oro toroaxin ngain xohi. Co xí mé chonda xa anto icha tsje joachaxin que janha, ixin janha ni jiquininxinha na ni tsonxindangá corrié catté xa. ¹⁷ Xí mé ojijá xa palé xa, para tsjendoaxin xa trigo, co para sačhehe trigo paja. Sasicao xa cain trigo ngain nchianoha xa, pero cain paja tsjaga xa ngain ná xohi que xonhi tiempo danga xoi.

¹⁸ Conixin jihi, co icanxin consejo, vandachexin Juan chojni tti jian joajna. ¹⁹ Co después, Juan joinchesattehe xigobernador Herodes ixin vecao xa jeho nchicoñadé xa que vinhi Herodías, mé cjoí čihi Felipe, xichó jehe Herodes, co jehe Juan joinchesattehe Herodes de ixin icha cosa jianha cai que joinchehe Herodes. ²⁰ Pero Herodes vitticaonha. Co en lugar de rroguitticaon, joinchehe iná cosa jianha ixin jehe coiaxinhi Juan ngain cárcel.

*Are joiguitte Jesús**(Mt. 3.13-17; Mr. 1.9-11)*

²¹ Saho de viaxinhi Juan, ngain ná nchanho are Juan jincheguitte anto tsje chojni, cai Jesús cjoí para que Juan joincheguitte jehe. Co después que joiguitte Jesús, are jehe joinchecoanxinhi Dios, ngajni xiré ²² co Espiritu Santo xincanji xá ná conttoanajni ngataha Jesús co vicon na, co coinhi na tté Dios de ngajni que ndačo:

—Jaha tti Xanhna que janha anto rinaho, co de ixin jaha janha anto chahna.

*Cain nindogoelito xančhjen de Jesús**(Mt. 1.1-17)*

²³ Jesús vechonda inchin treinta nano are jehe coexinhi ndache chojni de ixin Dios. Cain chojni xaxaon na ixin jehe cjoí xenhe José. Jehe José mé cjoí chjan de Elí, ²⁴ co Elí cjoí chjan de Matat, co Matat cjoí chjan de Leví, co Leví cjoí chjan de Melqui, co Melqui cjoí chjan de Jana, co Jana cjoí chjan de José. ²⁵ José cjoí chjan de Matatías, co Matatías cjoí chjan de Amós, co Amós cjoí chjan de Nahum, co Nahum cjoí chjan de Esli, co Esli cjoí chjan de Nagai, ²⁶ Nagai cjoí chjan de Maat, co Maat cjoí chjan de Matatías, co Matatías cjoí chjan de Semei, co Semei cjoí chjan de José, co José cjoí chjan de Judá. ²⁷ Judá cjoí chjan de Joana, co Joana cjoí chjan de Resa, co Resa cjoí chjan de Zorobabel, co Zorobabel cjoí chjan de Salatiel, co Salatiel cjoí chjan de Neri. ²⁸ Neri cjoí chjan de Melqui, co Melqui cjoí chjan de Adi, co Adi cjoí chjan de Cosam, co Cosam cjoí chjan de Elmodam, co Elmodam cjoí chjan de Er. ²⁹ Er cjoí chjan de Josué, co Josué cjoí chjan de Eliezer, co Eliezer cjoí chjan de Jorim, co Jorim cjoí chjan de Matat. ³⁰ Matat cjoí chjan de Leví, co Leví cjoí chjan de Simeón, co Simeón cjoí chjan de Judá, co Judá cjoí chjan de José, co José cjoí chjan de Jonán, co Jonán cjoí chjan de Eliaquim. ³¹ Eliaquim cjoí chjan de Melea, co Melea cjoí chjan de Mainán, co Mainán cjoí chjan de Matata, co Matata cjoí chjan de Natán. ³² Natán cjoí chjan de David, co David cjoí chjan de Isaí, co Isaí cjoí chjan de Obed, co Obed cjoí chjan de Booz, co Booz cjoí chjan de Salmón, co Salmón cjoí chjan de Naasón. ³³ Naasón cjoí chjan de Aminadab, co Aminadab cjoí chjan de Aram, co Aram cjoí chjan de Esrom, co Esrom cjoí chjan de Fares, co Fares cjoí chjan de Judá. ³⁴ Judá cjoí chjan de Jacob, co Jacob cjoí chjan de Isaac, co Isaac cjoí chjan de Abraham, co Abraham cjoí chjan de Taré, co Taré cjoí chjan de Nacor. ³⁵ Nacor cjoí chjan de Serug, co Serug cjoí chjan de Ragau, co Ragau cjoí chjan de Peleg, co Peleg cjoí chjan de Heber, co Heber cjoí chjan de Sala. ³⁶ Sala cjoí chjan de Cainán, co Cainán cjoí chjan de Arfaxad, co Arfaxad cjoí chjan de Sem, co Sem cjoí chjan de Noé, co Noé cjoí chjan de Lamec. ³⁷ Lamec cjoí chjan de Matusalén, co Matusalén cjoí chjan de Enoc, co Enoc cjoí chjan de Jared, co Jared cjoí chjan de Mahalaleel, co Mahalaleel cjoí chjan de Cainán. ³⁸ Cainán cjoí chjan de Enós, co Enós cjoí chjan de Set, co Set cjoí chjan de Adán, co Adán cjoí chjan de Dios.

4*Are inchínji joinao rrojincheyehé Jesús**(Mt. 4.1-11; Mr. 1.12-13)*

¹ Espiritu Santo vittohe ngain Jesús, co joinchegayé Jesús anto tsje joachaxin. Are jehe cjanxin de rio Jordán Espiritu mé joicao Jesús para

ngagaha jna tti xonhi chojni te. ² Nttiha vehe Jesús cuarenta nchanho, co inchínji joaquehe prueba ngain Jesús. Jesús xonhi joine de cainxin nchanho mé, co después Jesús venhe jinta. ³ Cottimeja inchínji ndacho ngain Jesús:

—Si ndoa jaha Xenhe Dios, ttetonha que xo tehe rrocjan xo niottja.

⁴ Jesús ndacho:

—Ngain tti jitaxin Palabré Dios ndacho: “Chojni techonxin jeoha de tti jine na sino que cai de cain palabra que Dios ndacho.”

⁵ Cottimeja inchínji sajoicao Jesús ngataha ná jna anto noi. Co de nttiha anto daca cjoagoexin inchínji Jesús cainxin nación que jí ngoixin mundo.

⁶ Co inchínji ndacho ngain Jesús:

—Janha rrochjaha jaha cainxin joachaxin de tsetonhe cain nación yá, co cainxin cosa chjoin que jí ngain nación yá. Ixin janha vayá cainxin yá, co janha rrochjaha cain yá tti chojni que janha rinaho rrochjaha. ⁷ Si jaha sarittoxin nttajochjiha co sinchesayana janha, cain yá cosá jaha.

⁸ Pero Jesús ndacho ngain inchínji:

—Sattjixin de nganji na janha, Satanás, ixin ndacho ngain tti jitaxin Palabré Dios: “Nchesayehe jeha Dios tti chonda joachaxin para ixin jaha co jeha jehe tti ditticaon jaha.”

⁹ Cottimeja jehe inchínji sajoicao Jesús para ngain ciudad de Jerusalén co nttiha inchínji joinchecani Jesús para ngataha techoe nihngo icha importante. Co ndacho ngain Jesús:

—Si ndoa jaha Xenhe Dios, daritsingaxin de nttihi hasta tti nontte;

¹⁰ ixin ngain tti jitaxin Palabré Dios ndacho:

Dios tsetonhe ángel de jehe para senda jaha.

¹¹ Cain ángel mé rrocaha conixin rá, para que xonhi tti tsonihi rottea de ixin xo.

¹² Jesús ndacho ngain inchínji:

—Cai ndacho ngain tti jitaxin Palabré Dios: “Daqueha prueba ngain Dios tti chonda joachaxin para ixin jaha.”

¹³ Co jañá are inchínji choha joincheyehe Jesús, jehe sacjoixin de ngain Jesús para ná tiempo.

Jesús coexinxin xé ngain Galilea

(Mt. 4.12-17; Mr. 1.14-15)

¹⁴ Jesús cjan para Galilea conixin anto tsje joachaxin Espíritu Santo, co cainxin chojni de ngain región mé vanichja na de ixin tti jian que vanchehe Jesús. ¹⁵ Jehe vanchecoenhe chojni de ixin Dios ngain cain nihngo de cain lugar nttiha, co cainxin chojni nttiha joinchesayehe na Jesús.

Jesús ngain Nazaret

(Mt. 13.53-58; Mr. 6.1-6)

¹⁶ Cottimeja, Jesús cjoí para Nazaret, tti rajna vanguixin jehe. Ngain nchanho que nchejogaha ni, Jesús cjoí ngaxinhi nihngo nttiha inchin costumbré jehe, co nttiha vingattjen para tsjehe tti xón que jitaxin Palabré Dios. ¹⁷ Jehe na chjé na Jesús tti libro que dicjin profeta Isaías, co are jehe conxiré libro mé vittja tti jitaxin janhi:

¹⁸ Espíritu Santo de Dios jí nganji na janha, ixin Dios chjana xa de ndachjan tti jian joajna ngain chojni que inchin ondadiguenhe espiritue;

Dios rroanha na janha para sinttaxingamá tti chojni que tedetan tangui ngain ansén,

co para rrochjaha libertad tti chojni que teaxinhi,

co para rrochjaha jmacon tti chojni que diconha;

co para de ixin janha tti chojni que detan tangui ngain icha chojni isetanha na tangui mé;

¹⁹ co para que rrondattjan chojni que ojoí tiempo que Dios tsjenguijna na.

²⁰ Cottimeja Jesús coejé libro mé, co joanjo libro ngain tti vacjenguijna chojni ngain servicio, co jehe tavehe. Co ixin cainxin chojni nttiha anto xóan na de ixin Jesús, ²¹ jehe coexinhi nichja co ndaço:

—Jai mismo joiconhe ngattoxon con ra tti jitaxin jihi.

²² Cain chojni nttiha nichja na jian de ixin Jesús, co vinttegoan na admirado de ixin tti palabra çhjoin que ndaço Jesús ngain na. Co jeha na joanchianguihi chó na co ndaço na:

—¿Ajeha jihi tti xitsihi José?

²³ Jesús ndaço ngain na:

—Seguro que jaha ra rrondachjenji ni ra janhi: “Jaha que danjo xóan, toxoanha jaho”; co rrondachjenji ni ra cai: “Tti coian na joinchehe jaha ngain rajna Capernaum, nchehe nttihi ngain rajná cai para sicon na janha na.”

²⁴ Cottimeja joinchehe sigue nichja, co ndaço:

—Rrondattjo ra ndoa que ni ná profeta sitticaonha chojni de ngain rajné. ²⁵ Janha rrindattjo ra seguro que vintte tsje nçhiganha ngain nacioen Israel ngain tiempoe profeta Elías, are joiha çhin ní nano co rioho co anto vehe jintta ngoixin nación. ²⁶ Pero Dios rroanha Elías para joicjenguijna ni ná nçhiganha que vintte Israel, sino que jehe cjoí para joicjenguijna ná nçhiganha que vehe ngain Sarepta, chiaon ciudad de Sidón. ²⁷ Cai vintte ngain Israel tsje chojni que vintteninxin chin lepra ngain tiempoe profeta Eliseo. Pero Eliseo joinchexingameha ni ná de jehe na, sino que jehe joinchexingamehe Naamán de ngain nonttehe Siria.

²⁸ Cain nite ngaxinhi nihngo nttiha are vinttequinhi na cain cosa yá, anto vinttegoñao na. ²⁹ Vingattjen na co vantsjexin na Jesús de nttiha, co joicao na hasta tti con jna nttiha, ngain tti jna diconchjian ciudad mé, para rrocjixin na Jesús desde nttiha. ³⁰ Pero are orrocja na Jesús, jehe jion vatto ngayehe na co sacjoi.

Ná xí que vechonda espíritu jianha

(Mr. 1.21-28)

³¹ Cottimeja Jesús cjan para Capernaum, ngain nonttehe Galilea co nttiha cada nchanho que nchejogaha ni, jehe vacji ngain nihngo nttiha para vandache chojni de ixin Dios. ³² Chojni nttiha vaguinttegoan na admirado de ixin tti vandaço Jesús ixin vanichja conixin palabra de joachaxin.

³³ Ná nchanho ngain nihngo nttiha dicji ná xí que vechonda xa espíritu jianha ngaxinhi cuerpoe xa, co espíritu mé coyao co ndaço:

³⁴ —Sattjixin de nganji na jaha Jesús de Nazaret. ¿Ajoihi jaha para santsjena ra joachaxin que chonda na? Janha chonxin jaha co nona que jaha tti icha jian de ngain Dios.

³⁵ Jesús ndaço ngain espíritu jianha mé:

—¡Tencoá, co sattjixin de ngain xí yá!

Cottimeja jehe espíritu jianha joanca tti xí mé ngataha nontte ngat-toxon con jehe na, co vačhjexin de ngaxinhi cuerpoe xí mé, co xonhi tti conihi cuerpoe xa. ³⁶ Cainxin chojni que vicon nttiha xao na, co vinttendache chó na:

—¿Quehe chonda palabré xí jiji? Ixin ttetonha xa conixin anto joachaxin ngain espíritu jianha que jehe satsji co espíritu mé jamé sattji.

³⁷ Co cain rajna de ngoixin region mé conohe chojni tti jian que vanchehe Jesús.

Jesús joinchexingamehe jannché Simón Pedro

(Mt. 8.14-15; Mr. 1.29-31)

³⁸ Cottimeja Jesús vačhjexin de nihngo nttiha co sacjoi para nchian-doha Simón Pedro. Are mé jannché Pedro jinihi jan ixin ná soa anto soji, mexinxin joinchetsenhe na ñao Jesús para joinchexingamehe naníta mé.

³⁹ Jesús joisé para ngain naníta mé, co nichjayé soa mé, co ngain rato mé ndavačhje soa mé, co naníta mé jaicoa vingattjen co joincheatendehe na.

Jesús joinchexingamehe tsje ninihi

(Mt. 8.16-17; Mr. 1.32-34)

⁴⁰ Are viataon nchanho mé, cain chojni que vinttechonda ninihi que vintteninxin de tsje chin, joiaho na cain chojni mé para ngain Jesús; co jehe coin rá ngataha cada na, co jamé Jesús joinchexingamehe cain na.

⁴¹ Tsje de jehe ninihi mé vinttechonda na espíritu jianha co are vačhjexin espíritu mé de ngaxinhi cuerpoe na, coyao co ndačo:

—Jaha tti Xenhe Dios.

Pero Jesús joinchesattehe espíritu jianha mé co Jesús coančhjandaha espíritu mé para nichja espíritu icha ixin vinttenohe que Jesús jehe tti Cristo.

Jesús nichjé chojni ngain Galilea de ixin Dios

(Mr. 1.35-39)

⁴² Are ovingasán ngain nchanho iná, Jesús vačhjexin de ngain ciudad co sacjoi ngain ná lugar tti xonhi chojni te. Pero chojni cjoé na Jesús hasta que vittja na tti jí, co joinchetsenhe na ñao Jesús ixin tarroguehe nttiha Capernaum ngain na. ⁴³ Pero jehe ndačo ngain na:

—Janha chonda que sindattjan chojni ngain icanxin lugar ixin ojoí tiempo are Dios tsetonha ngain ansén na ixin para mé rroanxin na Dios janha.

⁴⁴ Co jańá vacji Jesús ngain cain nihngo ngoixin regioen Galilea para vandache chojni de ixin Dios.

5

Are Jesús joinchehe milagro para que jehe na tse na copescado

(Mt. 4.18-22; Mr. 1.16-20)

¹ Ná nttiha, Jesús tají ngandehe lago que dinhi Genesaret, co nttiha xatte anto tsje chojni que hasta conttedoguehe Jesús ixin cain na joinao na coinhi na joajné Dios. ² Co Jesús vicon nttiha tate yó barco ngandehe jinda que xonhi chojni teringa rato mé ixin xí que tse copescado ovania xa de barco mé co tatettjén xa nonchaha. ³ Cottimeja Jesús joixinhi ná de tti yó barco mé, co barco mé barcoe Simón Pedro, co Jesús ndačo ngain Pedro que sinchengaxinton barco de ngandehe nda. Cottimeja nttiha

tavetaha Jesús ngataha barco co de nttiha ndachexin Jesús cain chojni que te ngandehe jinda de ixin Dios. ⁴ Are joexin nichja Jesús, jehe ndačo ngain Simón Pedro:

—Ttjiho barco ngain jinda tti icha nihnga, co nttiha dancahngui ra nonchá ra para rrotse ra copescado.

⁵ Pedro ndačo ngain Jesús:

—Maestro, ngoixin ttie jointtaha na xa co xonhi copescado tse na; pero jaxon soixin rrittetonna, mexinxin janha sigancahngui nonchaha iná ngain jinda.

⁶ Are jamé joinchehe na, ndoa anto tsje copescado tse na que hasta ocoexinhi čhintaon nonchaha. ⁷ Cottimeja joinchehe na seña xicompañeroe na que teringa ngain barco jngo para que joinchecienhe na barco mé para cjoenguijna chó na. Co cayoi barco joinchecaon na de copescado que hasta joinao sarroxincajngui barco jinda. ⁸ Are vicon Simón Pedro jihí, jehe vettoxin nttajochjihí ngain Jesús co ndačo:

—Nttatsanha ñao sattjixin soixin de nganji na janha ixin janha anto tsje cosa jianha jointtaha.

⁹ Simón Pedro ndačo jañá ixin jehe anto xaon conixin cain chojni que te ngain, ixin anto tsje copescado tse na. ¹⁰ Cai Jacobo co Juan, cayoi xenhe Zebedeo, tti xicompañeroe Pedro, anto vinttexaon xa cai. Pero Jesús ndačo ngain Pedro:

—Xaonha jaha ixin jai pa ndaha en lugar de copescado, jaha satse chojni para ixin Dios.

¹¹ Cottimeja are joinchecienhe na barco ngandehe ndachaon, vintteganía na co nttiha cointtohe na cainxin cosé na co savinttecji na conixin Jesús.

Jesús joinchexingamehe ná tti vechonda lepra

(Mt. 8.1-4; Mr. 1.40-45)

¹² Are Jesús vehe ngain ná rajna nttiha, conchienen ná xí ngain Jesús. Xí mé vechonda xa chin lepra. Co are vicon xa Jesús, jehe xa vettoxin nttajochjihí xa co visé xa hasta tti ngataha nontte co joinchetsenhe xa ñao Jesús co ndačo xa:

—Si soixin rinao, nchao sinchexingamana de chin que rrichonda.

¹³ Cottimeja Jesús catte xí mé co ndačo ngain xa:

—Ján rinaho; xingamaha.

Co ngain rato mé ndavitján tti chin lepra que vechonda xí mé. ¹⁴ Cottimeja Jesús coetonhe xí mé que xonhi chojni rrondate xa. Jesús ndačo ngain xí mé:

—Jeho ttji ngain xidána para que jehe xa sicon xa que jaha ixonhi chin chonda co danjo cosa ngain Dios inchin ttetonha ley que vayé Moisés para que cainxin chojni tsonohe na ixin jaha ixonhi chin chonda.

¹⁵ Pero nchanho co nchanho icha tsje chojni vaconohe de ixin tti jian que vanchehe Jesús. Co anto tsje chojni vařatte ngain para vaquinhi na de ixin Dios, co para que Jesús vanchexingamehe na de quexeho chin que vinttechonda na. ¹⁶ Pero Jesús tsje nttiha vagačhenda savacji ngain lugar tti xonhi chojni te, co nttiha jehe vanchecoanxinhi Dios.

Jesús joinchexingamehe ná tti čhoha vacji

(Mt. 9.1-8; Mr. 2.1-12)

17 Ná nchanho Jesús tajindache tsje chojni de ixin Dios, co no nttiha tate canxion xifariseo co canxion ximaestroe ley que vinttequixin de cainxin rajna de ngain regioen Galilea co de ngain regioen Judea co de ngain ciudad de Jerusalén. Co are mé Jesús cjoago que joachaxín Dios jí ngain jehe ixin joinchexingamehe tsje chojni nihi. 18 Are mé, vinttequí canxion xí que vinttequiaoxin xa camilla ná tti čhoha vacji, co joinao chojni mé rrožanxinhi na jehe tti nihi mé ngaxinhi nchia tti jí Jesús co rroquín na nttiha ngattoxon con Jesús. 19 Pero čhoha vixinhi na ixin anto tsje chojni te ngandanguí nchia mé. Cottimeja coani na ngataha techoe nchia co vinttjian na canxion teja, para que nttiha joinchexincanjinxin na tti nihi conixin camilla ngayehe chojni para vehe ngattoxon con Jesús. 20 Are Jesús vicon que cain xí mé chonda xa seguro que Jesús sinchexingamehe jehe tti nihi mé, Jesús ndačo ngain tti nihi:

—Cain tti jianha que jaha joinchehe, janha ojointtatjañaha.

21 Cottimeja cain ximaestroe ley que te nttiha, co xifariseo vintteřaxaon xa: “¿Quensen xí jihi, que nchaoha jinichja xa para ixin Dios? řonhi chojni nchao sinchetjañehe iná chojni tti jianha que nchehe na, jehó Dios tti nchao sinchehe mé.”

22 Pero Jesús ovenohe tti teřaxaon xa co ndačo ngain xa:

—¿Quedonda řaxaon ra jañá? 23 ¿Quexehe tti icha tanguiha rrondattjan ná tti nihi: “Tti jianha que jaha joinchehe janha ojointtatjañaha”, o rrondattjan: “Dingattjen co sattji”? 24 Nchao jí remé, janha tsjagoha jaha ra que janha, tti Xí que joixin de ngajni, chonda joachaxin nttihi ngataha nontte para nttatjañá chojni tti jianha que nchehe na.

Cottimeja Jesús cjan ngain tti nihi mé co ndačo:

—Janha rrindattjo jaha que dingattjen, co tsinhi camillá co sattji para nchiandoi.

25 Ngain rato mé jehe tti čhoha vacji mé vingattjen ngattoxon con cain chojni nttiha, co tsín camillé tti vetsingataha co sacjoi para nchiandoha. Co ngoixin sacjoi jehe joinchecoanxinhi Dios. 26 Cain chojni que te nttiha vinttegoan na admirado co cain na joinchecoanxinhi na Dios cai, co hasta teřaon na ndačo na:

—Jai gocon na cosa čhjoin que ni ná nchanho goconha na jihi.

Jesús nichjé Levi

(Mt. 9.9-13; Mr. 2.13-17)

27 Después de cain jihi Jesús vačhjexin de nttiha, co jehe vicon ná xicobrador de impuesto que vinhi Leví. Jehe xí mé tají xa ngain mesa tti xengaxin hna impuesto, co Jesús ndačo ngain xí mé:

—Řacoi čhjin na.

28 Cottimeja jehe Leví, ngain rato mé vingattjen co nttiha cointtohe cain, co sarroé Jesús.

29 Después Leví coín ná fiesta jie ngain nchiandoha para ixin Jesús, co nttiha joinecaho na tsje xicobrador de impuesto ngain nacoa mesa co icha chojni cai. 30 Pero tsje xifariseo co ximaestroe ley coexinhi xa nichja xa feo ngain tti chojni que vacao Jesús, ndačo xa ngain na:

—¿Quedonda jinttecoho ra co dicoho ra xicobrador de impuesto co icha chojni que nchehe jianha?

31 Jesús ndačo ngain xa:

—Chojni que niha, chojni mé rrogondeha xincheřoan, jehó tti chojni nihi, mé tti rrogondehe xincheřoan. 32 Janha joiha para joinichjá tti

chojni que tenchehe jian, sino que chojni que tenchehe jianha para que jehe na tsentoxinhi na vidé na para isincheha na cosa jianha.

Are joanchianguihi na Jesús ixin quedonda chojni jehe dinttecjaño na (Mt. 9.14-17; Mr. 2.18-22)

³³ Cottimeja jehe xa joanchianguihi xa Jesús co ndačo xa:

—¿Quedonda chojni que xicao Juan co chojni xifariseo anto dinttecjaño na co anto nchecoanxinhi na Dios, pero chojni que čhjiho jaha cainxin nchanho jine na co dihi na?

³⁴ Jesús ndačo ngain xa:

—¿Apoco jaha ra nchao sinchecjaño ra tti chojni que rrondache ra siji ngain ná vandango tti tottehe na are xinovio xa jí xa ngain na? ³⁵ Pero tsí rato que chojni sasicao na xinovio, cottimeja jehe na sinttecjaño na.

³⁶ Cai ndačo Jesús ejemplo jiji ngain xa:

—Xonhi chojni ttinchje rioho lontto nara para tteyehe lontto nttaxichjan. Si ná chojni sinchehe jamé, jehe ndasinchetján lontto nara; co deporsín rioho lontto nara čhjoinha dicon ni ngain lontto nttaxichjan.

³⁷ Cai čhoja siquia ná xan que jidatsoxinhi ngá roanxan nttaxí, ixin si jamé tsonhe, tti xan que jidatsoxinhi tsončhintaon xan roanxan, co xan co roanxan cayoixin ndasitján. ³⁸ Mexinxin xan que jidatsoxinhi chonda que siquia xan ngá roanxan naraixin, co jamé cayoí cosa xonhi tsonhe. ³⁹ Co xonhi chojni que dihi xantsja, cottimeja sinchexoxinhi sihi xan que dica tsjen, ixin ndačo na: “xantsja, xan mé tti icha jian.” Jańá tti costumbre que jaha ra chonda ra jiha de acuerdo ngain tti janha rrindattjo ra.

6

Chojni que vacao Jesús cončhinji na trigo ngain nchanho que nchejogaha ni

(Mt. 12.1-8; Mr. 2.23-28)

¹ Ná nchanho que nchejogaha ni, Jesús co tti chojni que vacao vatto na canxion jngui que diguinga trigo, co chojni que vacao Jesús cončhinji na canxion ninchjan de trigo, co ngá rá na joincheroaxin na trigo co joine na noanchjan. ² Co canxion xifariseo joanchiangui xa ngain na co ndačo xa:

—¿Quedonda jaha ra nchehe ra ná xa que jiquininxinha sinchehe ni ngain tti nchanho que nchejogaha ni?

³ Cottimeja Jesús ndačo ngain xa:

—¿Adiconha jaha ra tti jitaxin ngain Palabré Dios de ixin quexén joinchehe David, jehe conixin cain xicompañeroe ngain ná nchanho are anto vintteguenhe na jintta? ⁴ David conixin cain xicompañeroe joixinhi na nihngo icha importante co David cóá tti niottja que joixin ngataha alté Dios co joine nio, co joanjo nio ngain cain xicompañeroe que joicao. Co niottja mé jeho xidána jiquininxin vane xa nio.

⁵ Cai ndačo Jesús ngain xa:

—Janha, tti Xí que joixin de ngajni, chonda joachaxin cai para tti nchanho que nchejogaha ni.

Tti xí que ndadixemadoho ná rá (Mt. 12.9-14; Mr. 3.1-6)

⁶ Iná nchanho que nchejogaha ni, Jesús joixinhi iná nihngo co coexinhi joinchecoehne chojni de ixin Dios. Co nttiha tají ná xí que ndadixemadoho ná rá xa, ra jian. ⁷ Co ximaestroe ley, co xifariseo tatetsayehe xa Jesús para sicon xa asinchexingamehe xí mé ngain nchanho que nchejogaha ni, para jamé rrochonda xa quehe rrocanguixin xa Jesús. ⁸ Pero Jesús ovenohe quehe teᵗaxaon ximaestroe ley co xifariseo, co jehe ndache tti xí que ndadixemadoho ná rá:

—Dingattjen co darihi ngosine.

Tti xí vingattjen co cjoí vengattjen ngosine. ⁹ Cottimeja Jesús ndaᵗho ngain ximaestroe ley co xifariseo:

—Janha sanchianguiha ra ná cosa: ¿Quehe jiquininxin sinchehe ni ngain nchanho que nchejogaha ni; asinchehe ni jian, o asinchehe ni tti jianha? ¿Atsanchjandaha ni chojni ndasenehe, o ani nasoexon ni?

¹⁰ Cottimeja Jesús tsjehe ngain nite ngandanji jehe, co ndaᵗho ngain tti xí mé:

—Ttinxé rá.

Co tti xí coinxé rá, co ngain rato mé iᵗonhi chin vechonda rá tti xí mé; ondaxingamehe. ¹¹ Pero xicanxin anto vinttegoñao xa co coexinhi xa joanchianguihi chó xa ixin quehe sinchehe xa ngain Jesús.

Jesús coinchiehe tti tteyó chojni que vacao

(Mt. 10.1-4; Mr. 3.13-19)

¹² Ná nchanho ngain tiempo mé Jesús sacjoí ngagaha ná jna para joinchecoanxinhi Dios, co ngoixin ttié mé Jesús joinchecoanxinhi Dios. ¹³ Are vingasán, jehe vayé cain chojni que vacao, co coinchiehe tteyó de jehe na, tti ni jehe joincheguinihi representanté jehe. ¹⁴ Co nombré na cada na janhi: “Simón, tti jehe Jesús joincheguinihi Pedro; Andrés xanchó Simón; Jacobo co Juan, Felipe co Bartolomé, ¹⁵ Mateo co Tomás, Jacobo, tti xenhe Alfeo; Simón jehe ná de tti partidoe chojni politico que vaquetocaho chojni romano; ¹⁶ Judas tti xanchó Jacobo; co Judas Iscariot tti joiindaᵗho para tse na Jesús.

Are Jesús cjoagoe tsje chojni de ixin Dios

(Mt. 4.23-25)

¹⁷ Jesús xincanjinxin de ngagaha jna conixin tti tteyó chojni co tavintte na ngataon ná jngui, jehe conixin chojni. Co ᵗatte anto tsje chojni de ngoi región de Judea co de ciudad de Jerusalén co de ngoixin ngandehe ndachaon ngain regioen ciudad de Tiro co Sidón. Cain chojni mé conchiennehe na para joiquinhi na tti nichja Jesús de ixin Dios co para joixingamehe na de ixin quexeho chin que techonda na. ¹⁸ Tti nivinttechonda espíritu jianha ngaxinhi cuerpoe, cai xingamehe na. ¹⁹ Cain chojni joiñaᵗo na catte na Jesús, ixin jehe vanchexingamehe cain chojni conixin joachaxín Dios que jehe chonda.

Quensen tti ᵗhjoin sehe ngain vidé co quensen tangui tsonhe

(Mt. 5.1-12)

²⁰ Cottimeja Jesús tsjehe tti chojni que vacao co ndaᵗho ngain na:

—Anto ᵗhjoin para ixin jaha ra ᵗo noa ra ixin jiquininxin ra ngajni tti ttetonha Dios.

²¹ Anto ᵗhjoin para ixin jaha ra ᵗo denhe ra jintta jai, ixin después jaha ra tsojaha ra.

Anto ᵗhjoin para ixin jaha ra ᵗo tsjanga ra jai, ixin después jaha ra tsjano ra.

²² 'Anto ĉjoin para ixin jaha ra are chojni tsoñao nganji ra co are sengui ra na, co are rronichja na feo nganji ra, co are rronichja na jianha de ixin jaha ra ixin jaha ra chojnina janha, tti Xí que joixin de ngajni. ²³ Are tsonha ra jamé jaha ra chaha ra co anto ĉjoin tonoha ra, ixin ngajni rrochonda ra ná cosa anto jian, ixin cain chojni que sinchehe jamé nganji ra, jamé joinchehe nigoelitoe na xanĉjen ngain cain profeta que joí are saho.

²⁴ 'Pero anto tangui tsonha jaha ra xó chonda ra tsje, ixin jaha ra ochaha ra nntihi ngataha nontte.

²⁵ 'Anto tangui tsonha jaha ra xó jai chonda ra tsje para sintte ra, ixin después jaha ra senhe ra jintta.

'Anto tangui tsonha jaha ra xó tjano ra jai, ixin después jaha ra rrotsjanga ra de joachjaon.

²⁶ 'Anto tangui tsonha jaha ra are caín chojni rronichja na jian de ixin jaha ra ixin jañá cain nigoelitoe na xanĉjen vanchesayehe na tti chojni que jeha ndoa profeté Dios.

Jesús ndaĉho chonda que sinao ni chojni que ningaconhe ni

(Mt. 5.38-48; 7.12)

²⁷ 'Nganji ra xó tettinna ra janha rrondattjo ra: Rinao ra tti chojni que ningaconha ra, nchehe ra jian ngain tti chojni que toñao nganji ra, ²⁸ nchetsenhe ra ñao Dios ixin jehe sinchenchaon tti chojni que nichja jianha de ixin jaha ra, co nchetsenhe ra ñao Dios para ixin tti chojni que nichja feo nganji ra. ²⁹ Si ĉhonja chojni rroĉanguiha ná manazo ngá con, dittoaxin que rroĉanguiha iná manazo. Si ĉhonja tti santsjaha chamarrá, danjo cai hasta camisá. ³⁰ Co quexeho chojni que sanchiaha ná cosa jaha chjehe; co are santsjaha na cosá, idanchieha na cosa mé iná. ³¹ Nchehe ra ngain chojni inchin jaha ra rinao ra sinchehe jehe na nganji ra.

³² 'Si jaha ra rinao ra jeho tti chojni que rinao jaha ra, ¿quehe jian tenchehe ra? Ixin hasta tti chojni que nchehe jianha, jehe na nchehe na jañá cai. ³³ Co si jeho nchehe ra jian ngain tti chojni que nchehe jian nganji ra, cai ¿quehe jian tenchehe ra? Ixin cai tti chojni que nchehe jianha nchehe na jamé cai. ³⁴ O si nhecjen ra tomi jeho tti chojni que nchao tsjengaha ra hna, cai jeha jian tenchehe ra, ixin hasta tti chojni que nchehe jianha nhecjen tomi ngain icha chojni que nchehe jianha, ixin chonda na seguro que tsjenguehe chó na hna. ³⁵ Jaha ra chonda ra que rinao ra chojni que ningaconha ra, co chonda ra que sinchehe ra jian ngain na, co nhecjen ra na cosá ra, co xaxaonha ra ixin sacha ra ĉhonja cosa. Co jamé ngajni nntiha rroxengaxin ra hna icha jian, co jaha ra sintte ra xenhe Dios que ttjen ngajni, ixin Dios jehe cai danjo cain cosa ngain tti chojni jianha co tti ni xonhi tiempo chjé gracias. ³⁶ Ttiaconoehe ra icha chojni, jañá inchin Ndodá na que ttjen ngajni ttiaconoehe Ndo cain chojni.

Ncheha ra juzgado iná chojni

(Mt. 7.1-5)

³⁷ 'Ncheha ra juzgado iná chojni, para que Dios sincheha juzgado nganji ra. Ncheha ra condenado iná chojni para que Dios sinttaha ra condenado jaha ra. Nchetjañehe ra cain chojni, para que jamé Dios sinttatjañaha jaha ra cai. ³⁸ Chjehe ra tti chojni que rrogondehe, co Dios rrochjá ra tti rrogondaha ra. Dios rrochjá ra ngain bolsá ra ná medida

jian, que tsonttedo jian, tsontsjenga ra jian co rrocaon jian. Ixin inchin medida que jaha ra dattechoaxin ra, Dios jamé sattechoha ra cai.

³⁹ Jesús ndačo ejemplo jiji ngain na:

—¿Apoco ná tti chejo nchao sicao noxon nntiha iná tti chejo? Seguro que cayoxin chojni mé sinttjian ngain ná ttoe. ⁴⁰ Ni ná tti jítangui jeha icha nohe que ximaestro, masqui are tsjexin tsangui jehe sehe inchin ximaestro.

⁴¹ ¿Quedonda ttijho cuidado de ixin tti anto nchín caxineno que jingangui jmacon iná chojni co ttjioha cuidado de ixin tti nttá jie que jingangui jmacon jaha? ⁴² Si jaha diconha tti nttá jie que jingangui jmacon, ¿quedonda ndačo ngain iná chojni ixin jehe sittoexin para que jaha santsjenguihi caxineno nchín que jingangui jmacon jehe? ¡Jaha ná chojni jianha que ncheyaxon! Saho dantsjengui tti nttá jie que jingangui jmacon para que jamé nchao sicon jian para santsjengui caxineno nchín que jingangui jmacon iná chojni.

Nttattochjoin datsoan ni ntta de ixin ttochjoin ntta

(Mt. 7.17-20; 12.33-35)

⁴³ ¿Xonhi nttattochjoin jian que sinchechjian ntta ttochjoin que xonhi xé, ni nttattochjoin que xonhi xé sinchechjian ntta ttochjoin jian. ⁴⁴ Naná nttattochjoin datsoan ni ntta de ixin ttochjoin que nchechjian ntta. Nttanchaha nchechjianha ntta higo, ni canchaha nchechjianha ca uva. ⁴⁵ Tti chojni jian, jehe nichja cosa jian ixin tti jian jí ngain ansén; co tti chojni jianha, jehe nichja cosa jianha ixin tti jianha jí ngain ansén. Mexinxin cain tti jí ngain ansén chojni, mé tti nichja rroha.

Tti nchia que jingattjen ngataha ttjao co tti nchia que jingattjen ngataha jinchexonda

(Mt. 7.24-27)

⁴⁶ Jaha ra, ¿quedonda ndačo ra ixin janha ttetonha nganji ra co ncheha ra tti janha ndattjo ra? ⁴⁷ Tti chojni que tsí nganji janha, co jehe na tsinhi na tti rrandattjan na co sitticaon na, ⁴⁸ chojni mé inchin ná xí que ngue anto nihnga para que cjoenga xa basé nchiandoha xa ngataha ná ttjao. Are coyé jinda ngain río, soji vinqué nda nchia mé, pero čhoha coingui nchia mé ixin soji jixenga nchia ngataha ttjao. ⁴⁹ Pero tti chojni que ttinhi tti janha ndačhjan co ditticaonha na na, chojni mé inchin tti joinchechjian nchiandoha ngatacoa jinchexonda ni cjoavaha ttjarioho. Co are coyé jinda ngain río, soji vinqué nda nchia mé, co ndacjamangui nchia. Jamé ndaxante ngoixin nchia mé.

7

Jesús joinchexingamehe ná xinchehe xé ná xicapitán romano

(Mt. 8.5-13)

¹ Are Jesús joexin ndache chojni cain jiji, jehe sacjan para rajna Capernaum. ² Nntiha vehe ná xicapitán romano vechonda xa ná tti nchehe xé xa que jehe xa anto vajinao xa, co jehe tti nchehe xa mé ondajidenhe. ³ Are xicapitán mé coinhi xa de ixin Jesús, jehe xa rroanha xa canxion nijudío que vinttechonda joachaxin ngain ningoe na para joinchetsenhe na ñao Jesús para que jehe rrocji rroinchechxingamehe tti nchehe xé xa mé. ⁴ Cain nimé conchienen na ngain Jesús co coexinhi na anto joinchetsenhe na ñao co vinttendačo na ngain:

—Xicapitán jiji jiquininxin que soixin tsjenguijna xa, ⁵ ixin jehe xa anto rinao na xa ján na xo judío na, co jehe xa mismo cjoenga xa hna para conchjian ná ningona na.

⁶ Cottimeja joicao na Jesús. Pero are ochian joiji na ngain nchiandoha xicapitán mé, jehe xa coetonhe xa canxion xiamigoe xa para joindačo xa ngain Jesús:

—Idoanha molestado soixin, ixin xicapitán ndačo xa que jehe xa jiquininxinha xa para soixin sixinhi nchiandoha xa. ⁷ Mexinxin jehe xa ní joiha xa para joichoanxin xa ngatja nttiha. Jehe xa rinao xa que jecho ttetonha soixin para tti nchehe xé xa orroxingamehe. ⁸ Jehe xa nohe xa jamé ixin jehe xa mismo chonda que ditticaon xa ngain tti icha ttetonha de jehe xa, cai jehe xa chonda xa joachaxin de ttetonha xa ngain cain xisoldadoe xa. Are jehe xa ttetonhe xa ná de jehe xisoldado que tsji xa quexeho parte, jehe xa tti xa. Co are jehe xa ttetonha xa que tsí xa, jehe xa tti xa. Co are ttetonhe xinchehe xé xa que sinchehe xa quexeho xa jehe xa nchehe xa xa.

⁹ Are Jesús coinhi jiji, jehe goan admirado de ixin jehe xa co ngaria tsjehe ngain chojni que terroé, co ndačo ngain na:

—Ndoa, ni de ngacjan cainxin chojni judío viconha janha ná chojni que anto ditticaon inchin xicapitán jiji.

¹⁰ Are cain xiamigoe xicapitán mé cjan xa nchia, vintteguicon xa jehe tti nchehe xa mé odixingamehe; ixonhi chin jichonda.

Jesús joinchexechon xanxichjenhe ná nchiganha

¹¹ Después de cain jiji, Jesús sacjoi para ngain ná rajna dinhi Naín conixin chojni que vacao co tsje icha chojni cai. ¹² Are ojoiji na chian ngain rajna mé, jehe vicon que tedicjavá na ná chojni ndadiguenhe que mé tti nacoaxinxon xanxichjenhe naníta janné xan, co jehe naníta mé, ganha. Anto tsje chojni de ngain rajna mé tedicao jehe naníta para tedicjavá na xenhe. ¹³ Are Jesús vicon naníta, jehe coiaconoehe co ndačo ngain:

—Itsjangaha.

¹⁴ Cottimeja Jesús conchienenhe co cate cajón, co tti chojni que tedicao cajón tavinttengattjen na. Co Jesús ndache tti ndadiguenhe:

—Janha rroundattjo jaha: ¡Dingattjen!

¹⁵ Cottimeja jehe tti ndadiguenhe xendoa vengá chinttihi co ocoexinhi nichja, co jamé Jesús joanjo xanxi mé ngain janné xan. ¹⁶ Are chojni vicon na jiji, cainxin na anto xaon na co coexinhi na joinchecoanxinhi na Dios co ndačo na:

—Ná profeta anto importante ngattoxon con Dios cononxin ngayá na.

Cai ndačo na:

—Dios joí para joicjenguijna chojni jehe.

¹⁷ Co ngoixin regioen Judea co icha región que te ngandanji regioen Judea conohe chojni ixin quehe joinchehe Jesús.

Tti chojni que rroanha Juan

(Mt. 11.2-19)

¹⁸ Juan, tti vancheguitte chojni, conohe cain jiji ixin chojni que vacao coequín na jehe. Cottimeja jehe vayé yó de jehe na, ¹⁹ co jehe rroanha na para ngain Jesús para joiganchianguihi na Jesús si ndoa jehe tti Cristo tti chonda que tsí, o ni chonda que rrochonhe na iná. ²⁰ Tti chojni que rroanha Juan vintteconchienenhe na ngain Jesús, co ndačo na ngain:

—Juan coetonna na para joiganchiangui na nganji jaha si ndoa jaha tti Cristo tti chonda que tsí, o ni xa chonda na que rrochoan na iná.

²¹ Ngain rato que jehe na joiji na, Jesús joinchexingamehe anto tsje chojni que vinttechonda ojeje chin, co tti vinttechonda espíritu jianha, co cai chje jmacon tsje chojni chejo. ²² Mexinxin Jesús ndačo ngain chojni que roanha Juan:

—Ttji ra co dindache ra Juan tti jaha ra vicon ra co tti jaha ra coinhi ra. Ttequinhi ra ixin tti chojni chejo, jai onchao dicon na, co tti chojni rrengo, jai onchao čhji na, co tti chojni que vinttechonda chin lepra, jai ixonhi chin mé techonda na, co tti chojni que vaquinha, jai onchao ttinhi na, co tti chojni que ondavenhe, jai xechon na, co tti chojni que inchin ndadiguenhe de ngain espiritue, jai ocoinhi na ixin Dios rrochje na iná vida naroxin. ²³ Co anto čhjoin para ixin tti chojni que sitticaon nganji na janha cain tiempo.

²⁴ Are savinttecji tti chojni que roanha Juan, Jesús coexinhi ndache cain chojni que vittohe nttiha de ixin Juan, co ndačo:

—Are cjoí ra ngagaha jna tti xonhi chojni te para joitsjehe ra Juan, ¿quehe xaxaon ra rroguicon ra ngain jehe? ¿Axaxaon ra ixin joarrixaoen seguroha inchin ná nttaxiji que nchequingui čhintto? ²⁵ Si jeha jamé, ¿quehe xaxaon ra rroguicon ra? ¿Aná xí que jingá lonnto anto rentte? ¡Nahi, jeha jamé! Jaha ra chonxin ra ixin tti chojni que tengá lonnto rentte, mé te ngain nchiandoha rey, chojni mé teha ngagaha jna. ²⁶ Mexinxin ¿quehe tipo de chojni xaxaon ra rroguicon ra? ¿Ani ná profeta de Dios? ¡ján ndoa, co xí mé icha rentte que ná profeta! ²⁷ Juan, mé tti jindačhoxin ngain tti jitaxin Palabré Dios:

Icha saho que jaha tsji, janha rrorroanha ná tti sicao joajnana, para que jehe mé sinchechjian nttiha para ixin jaha.

²⁸ Janha rrindattjo ra que de cainxin chojni xonhi iná profeta icha importante joí que jeha Juan tti ncheguitte chojni; pero masqui jamé, tti chojni que icha importanteha ngain tti parte que ttetonha Dios ngain ansén chojni, mé tti icha importante que Juan.

²⁹ Are coinhi na jiji, cain chojni co cain xicobrador de impuesto que joiguitte ngain Juan joatsoan na que Dios nchehe cain cosa inchin jiquininxin. ³⁰ Pero xifariseo co ximaestroe ley que čhoha xa para que Juan rrojincheguitte xa, joinaoha xa tti jian que ndačo Dios rrojinchehe ngain xa. ³¹ Co Jesús ndačo:

—¿Quehe sinttacaninxin chojni de ngain tiempo jiji? ¿Quexén te joarrixaoen na? ³² Joarrixaoen na te inchin joarrixaoen xannchinnchinchjan que dintte xan tsontaon xan ngain ndásin, co toyaotte xan icha xan amigoe xan co ndačo xan: “Janha na jointtachjian na són conixin ná nntačo pero jaha ra tteha ra, mexinxin janha na tsje na canto que ttiaho joachjaon pero jaha ra tsjangaha ra.” ³³ Ixin Juan, tti ncheguitte chojni joí, co jehe jineha tsje ni diha vino, co jaha ra ndačo ra ixin jehe chonda ná espíritu jianha. ³⁴ Cottimeja joihi janha, tti Xí que joixin de ngajni, que jine co dihi vino, pero jaha ra ndačo ra ixin janha anto jine co anto dihi hasta coan na co ixin janha amigoe cain chojni que nchehe jianha, co cain xicobrador de impuesto. ³⁵ Pero tti nohe Dios, mé jian ixin chojni que Dios nchequinxin nchehe na jian.

Are Jesús ngain nchiandoha Simón, tti cjoí ná xifariseo

³⁶ Ná de xifariseo ndache xa Jesús ixin joiijine ngain nchiandoha xa co jehe Jesús cjoí ngain nchiandoha xa, co are onttiha, jehe vehe ngain mesa. ³⁷ Co nttiha ngain rajna mé vehe ná nchí que vanchehe ncha jianha; co are conohe ncha ixin Jesús cjoí joiijine ngain nchiandoha xifariseo mé, jehe ncha cjoí ncha conixin ná xoꝑao de marmol jíche de aceite ꝑajni. ³⁸ Co jói ncha toenxin rotté Jesús, vettoxin nttajochjihí ncha co tsjanga ncha. Mexinxin vinttjitte ndacon ncha rotté Jesús. Cottimeja jehe ncha joinchexemanxin ncha rotté Jesús conixin ꝑajá ncha co coetoxin ncha rotté Jesús. Cottimeja coinga ncha aceite ꝑajni rotté Jesús. ³⁹ Are xifariseo mé vicon xa cain jihí, jehe xa ꝑaxaon xa: “Si xí jihí rrocji xa ná profeta ndoa, jehe xa rroconohe xa quensen jicatte xa, co quehe clase de nchí yá; rroconohe xa ixin nchí yá anto tsje cosa jianha nchehe ncha.” ⁴⁰ Cottimeja Jesús ndaꝑho ngain xifariseo mé:

—Simón, janha chonda ná cosa que rrondattjo jaha.

Xifariseo mé ndaꝑho xa:

—Ndachjenji na, Maestro.

⁴¹ Jesús ndaꝑho:

—Vehe yó tti xí vintteca tomi ngain ná tti vacjadoa tomi. Ná de tti xí mé veca naho ciento de tomi, co tti iná veca cincuenta. ⁴² Pero ixin ꝑonhi tomi vinttechonda cayoi tti xí mé, jehe tti cjoadoa tomi, joinchetjañehe cayoi tti xí mé tti tomi que jehe vintteca. Jai ndachjenji na jaha, ¿quexehe de cayoi tti xí mé icha sinao jehe tti vanjo tomi mé?

⁴³ Simón mé ndaꝑho ngain Jesús:

—Janha ꝑaxanho que tti xí que vitjañehe icha tsje tomi.

Jesús ndaꝑho:

—Ndoa tti ndaꝑho.

⁴⁴ Cottimeja Jesús tsjehe ngain nchí mé co ndaꝑho ngain Simón:

—¿Adicon jaha nchí jihí? Janha joixinhi nchiandoi, co jaha chjanaha jinda para cjoenxin rottena; pero nchí jihí cjoenna ncha rottena conixin ndacon ncha, co joinchexemanxin ncha conixin ꝑajá ncha. ⁴⁵ Jaha coetoxinha na de joajna, pero jehe ncha, desde que janha joixinhi nchiandoi coexinhí ncha coetoxin ncha rottena hasta jaxon. ⁴⁶ Jaha coingaha na aceite ngataha jana; pero jehe ncha cointtjitte ncha aceite ꝑajni ngain rottena. ⁴⁷ Mexinxin janha ndattjo que ixin jehe ncha anto rinao na ncha janha, co mé ꝑago que tti anto tsje jianha que jehe ncha joinchehe ncha jai ovitjañehe ncha; pero tti chojni que tsjeha jianha vitjañehe, cai tjago que antoha rinao na janha.

⁴⁸ Cottimeja ndaꝑho Jesús ngain tti nchí mé:

—Cain tti jianha que joinchehe ovitjañaha.

⁴⁹ Co cain chojni que te ngain mesa nttiha conixin Jesús coexinhí na ndache chó na:

—¿Quensen xí jihí, que hasta nchao nchetjañehe xa tti jianha que nchehe chojni?

⁵⁰ Pero Jesús ndaꝑho ngain tti nchí:

—Jaha ochonda vida naroaxin ixin vitticaon na janha; mexinxin sattji contenta.

8

Cain nchí que vacjenguijna Jesús

¹ Después de cain jihí, Jesús vangaria ngain tsje rajna conixin tsje rajnanchjan para joindache chojni de ixin Dios co ixin Dios otsetonha

ngain ansén na. Co vacao tti tteyó nirepresentanté jehe. ² Co nttiha vacao canxion nchí cai que jehe venguixin espíritu jianha de ngaxinhi cuerpoe ncha co vinttjian cain chin que vinttechonda cada ncha. Co de cain nchí mé, nttiha vehe María Magdalena tti vačhexin yáto espíritu jianha de ngain cuerpoe. ³ Co cai nttiha vehe Juana, nchíchihi ná tattíta vinhi Chuza tti vaquetonha ngain nchiandoha Herodes; co cai nttiha vehe Susana co icha nchí que vacjenguijna ncha Jesús conixin tti jehe ncha vachonda ncha, jehe conixin tti chojni que vacao.

Ejemploe tti joiquenga trigo ngataon jngui
(Mt. 13.1-9; Mr. 4.1-9)

⁴ Tsje chojni de ngain tsje rajna cjoí na para joitsjehe na Jesús, co are oʒatte tsje chojni ngain Jesús, jehe nichjé na de ixin ejemplo; co ndačo ngain na:

⁵ —Ná xí cjoí xa joiquenga xa trigo ngataon jngui. Are jehe xa coexinhi xa cjoa xa trigo ngataon jngui, canxion noanchjan de trigo vinttji ngá nttiha, co are vatto chojni, ngachje na trigo mé. Co cai conttoa vittja va trigo mé co ndajoine va noanchjan mé. ⁶ Co ittoha noanchjan de trigo vinttji ngataha tti jí ttjao, co are trigo mé čhinhi, anto daca ndaxema ixin xonhi tjao vechonda ttjao. ⁷ Co ittoha noanchjan de trigo vinttji ngacjan canchaha co canchaha čhinhi ca co icha daca vangui ca; icoančjandaha ca trigo vangui trigo. ⁸ Pero icha noanchjan de trigo vinttji noa tti jí jian jinche. Co are vangui trigo mé joanjo jian cosecha, ixin de ná noanchjan de trigo que vetsinga joinchechjian hasta cien noanchjan.

Are Jesús jindačo cain jihi, jehe nichja soji ngain na, co ndačo:
—Si jaha ra ttinxin ra, ttinhi ra jian.

Quedonda Jesús joinchegonda tsje ejemplo
(Mt. 13.10-17; Mr. 4.10-12)

⁹ Cottimeja tti chojni que vacao Jesús joanchianguihi na Jesús ixin quehe rročo ejemplo jihi. ¹⁰ Jehe ndačo ngain na:

—Jaha ra, Dios nntanoha ra tti jima de ixin quexén Dios tsetonha ngain ansén chojni; pero are janha nichjá icha chojni, nichjá na de ixin ejemplo para que are sicon na, sittohe na inchin rroguiconha na, co are tsinhi na, jehe na tsinxinha na.

Jesús ndačo quehe rročo ejemploe tti joiquenga trigo
(Mt. 13.18-23; Mr. 4.13-20)

¹¹ Jihi tti rročo ejemploe tti joiquenga trigo: Tti trigo rročo joajné Dios; ¹² co tti trigo que vinttji ngá nttiha, mé rročo tti chojni que ttinhi joajné Dios, pero tti inchínji co ndanchetjanji na de ngain ansén na tti joajna que coinhi na para que sitticaonha na co rrochondaha na iná vida naroaxin. ¹³ Co tti trigo que vinttji ngataha tti jí ttjao, mé rročo tti chojni que are ttinhi na joajné Dios, jehe na anto čhjoin tonohé na dayé na joajna mé, pero ixin palabra mé techondaha na tsje noehe ngain ansén na, ditticaon na jeho nchion, co are Dios daquehe prueba ngain na, jehe na incheha na tti ttonha Dios. ¹⁴ Co tti trigo que vinttji ngagaha canchaha, mé rročo tti chojni que ttinhi na joajné Dios, pero jehe na ncheha na caso. Jehe na nchehe na sigue inchin te na ngain vidé na, co icha xaxaon na ngain problémé na, co ngain cosé na, co ngain cosa čhjoin que jí nttihi ngataha nontte. Cain cosa jihi tančjandaha na para ditticaon na joajné Dios, co jamé chojni mé idanguiha na de ngain

espiritue na. ¹⁵ Pero tti trigo que vinttji ngain jinche jian, mé tti chojni jian de ngain ansén, co anto rinao na ttinhi na co nchehe na caso joajné Dios. Co jamé ditticaon na cainxin tiempo, co jehe na anto dangui na de ngain espiritue na ixin ttenchjinha na palabré Dios.

Ejemploe lámpara

(Mr. 4.21-25)

¹⁶ 'Xonhi chojni sinchegacaon ná lámpara cottimeja jehe tsjanotaon lámpara o rroxangui lámpara ngangui saoen, sino que chojni mé chonda que saquehe lámpara ngataha ná cosa noi para que cain chojni que sixinhi nchia mé nchao sicon na joadingasán. ¹⁷ 'Xonhi cosa jima que tsononxinha, co 'xonhi cosa jima que texaxaon ni ngain ansén ni que chojni tsonoeha; cain cosa chonda que tsononxin cosa.

¹⁸ 'Mexinxin jaha ra ttinhi ra jian; ixin tti chojni que chonda, Dios tsjenguijna para que rrochonda icha, pero tti chojni que 'xonhi chonda, Dios santsjehe hasta tti jehe 'xaxaon que ochonda.

Janné Jesús co xanchó

(Mt. 12.46-50; Mr. 3.31-35)

¹⁹ Cottimeja janné Jesús conixin canxion xanchó Jesús joiiji na tti jí Jesús, pero čhoha conchienne na hasta tti ngaca Jesús ixin anto tsje chojni te nttiha. ²⁰ Cottimeja ná chojni viquetonhe Jesús:

—Janná conixin xanchó nttimé ndoja te na, co rinao na rronichjaha na jaha.

²¹ Pero Jesús ndačo:

—Cain tti chojni que ttinhi quehe ndačo joajné Dios co nchehe na inchin ndačo joajna jihi, cain chojni mé inchin jannana co xanchian.

Jesús tajoaquehe čhintto conixin olé lago

(Mt. 8.23-27; Mr. 4.35-41)

²² Ná nchanho Jesús conixin tti chojni que vacao joixinhi na ngaxinhi ná barco, co nttiha jehe ndačo ngain na:

—Sachjin na toenxin lago jihi.

Co sajcoi na. ²³ Co are jehe na tatetaonhe na jinda, Jesús tavejoa ngaxinhi barco. Co are de repente cjoa ná čhintto anto soji, que hasta ocoexinhi viquia jinda ngá barco, co ojoinao sarroxincanjingui barco jinda.

²⁴ Cottimeja vinttecji tti chojni que vacao Jesús para joinchexingamehe na Jesús, co ndačo na ngain:

—¡Maestro! ¡Maestro! ¡Ndatexincanjingui na jinda!

Cottimeja vingattjen Jesús co jehe coetonhe čhintto co olé lago que tasehe, co cayoi cosa mé jaicoa tavehe; icjoaha čhintto co icjoinha olé lago. ²⁵ Cottimeja jehe ndačo ngain tti chojni que vacao:

—¿Quedonda jaha ra chondaha ra confianza nganji na?

Pero jehe na anto vinttexaon na, co vinttegoan na admirado, co vintteganchianguihi chó na, naná na, co ndačo na:

—¿Quensen xí jihi, que jehe xa ttetonhe xa čhintto co jinda, co tonhe inchin jehe xa ndačo xa?

Tti xí de ngain nontte Gadara que vechonda espíritu jianha

(Mt. 8.28-34; Mr. 5.1-20)

²⁶ Cottimeja joiiji na ngain nontte Gadara que jí toenxin lago mé, čhica Galilea. ²⁷ Are Jesús vanianxin de barco mé conchienne ngain jehe ná xí de ngain ná rajna de ngain nontte Gadara. Anto sé xí jihi

chonda xa tsje espíritu jianha. Xonhi lontto vengá xa, ni jeha ngain ná nchia vehe xa, sino que jehe xa vehe xa nganguinihi tti vacjavá chó chojni que ndavaguenhe. ²⁸ Are jehe xí mé vicon xa Jesús, jehe xa vettoxin nttajochjihí xa ngain Jesús co espíritu jianha joinchecoyao xa co joinchenichja xa co ndaço xa:

—¿Quedonda dixintte nganji na, jaha Jesús, Xenhe Dios que ttjen ngajni? Nttatsanha ñao que ncheguetanha na tangui janha.

²⁹ Jehe xí mé ndaço xa jañá ixin Jesús ojittetonhe espíritu jianha que sachjexin de ngain xí mé. Otsje nttiha espíritu jianha tse xa. Co masqui chojni vaquiaxin na xa conixin cadena de rá xa co de rotté xa para vagueçhoa xa; pero are espíritu jianha vatse xa, jehe xa vaconçhintaon xa cadena co espíritu jianha savanchequinga xa para ngá tsaga o ngagaha jna tti xonhi chojni te. ³⁰ Jesús joanchianguihi xí mé:

—¿Queñén dinhi jaha?

Co jehe xa ndaço xa:

—Janha dinhi na Legión.

Jehe xa ndaço xa jañá ixin anto tsje espíritu jianha vehe ngaxinhi cuerpoe xa. ³¹ Co cain espíritu mé ndache Jesús ixin rinaoha tsji infierno co joinchetsenhe ñao Jesús que jehe rrorroanha para ngain infierno. ³² Co ixin nttiha chian tene tsje cocochi ngain ná jnanchjan, cain espíritu jianha mé joinchetsenhe ñao Jesús ixin jehe tsançhjanda cain espíritu mé sixinhi ngaxinhi cain cocochi mé. Co Jesús joanjo joachaxin. ³³ Cottimeja cain espíritu jianha mé vaçhjexin de ngaxinhi cuerpoe xí jihí co savintteguixinhi ngaxinhi cocochi. Co cain cocochi jihí savinttecanttjenhngui va jinda, co nttiha ndavintteguenxin cainxin va ixin vintteçjonhe va jinda.

³⁴ Cain tti chojni que vaquingaria cocochi, are jehe na vicon na cocochi tecjonhe va jinda, jehe na anto xaoon na co coinga na joindache na chojni ngain rajna co cai nite nchiandoha ngataon jngui. ³⁵ Co cain chojni mé cjoí na joitsjehe na quehe conhe nttiha. Co are joiji na tti jí Jesús, vicon na nttiha tají tti xí que vaçhjexin cain espíritu jianha de ngaxinhi cuerpoe; tají xa çhica rotté Jesús, co ojingá xa lonttoe xa, co joarrixaoen xa ondacoa jí; co cain chojni mé vintteçaoon na. ³⁶ Co cain chojni que vicon quehe conhe nttiha ndaço na queñén xingamehe tti xí que vechonda espíritu jianha. ³⁷ Mexinxin cainxin chojni de ngain regioen Gadara joinchetsenhe na ñao Jesús ixin jehe satsjixin de nttiha, ixin jehe na anto vintteçaoon na. Mexinxin Jesús coani barco co sacjoi. ³⁸ Tti xí que vaçhjexin cain espíritu jianha de ngain cuerpoe joinchetsenhe xa ñao Jesús para que Jesús rroganjo joachaxin sarrojicao xa ngain jehe, pero Jesús coetonhe xí mé que sittohe xa, co ndaço ngain xa:

³⁹ —Cjan para nchiandoi, co ttequinhi cain chojni cain tti joinchehe Dios nganji.

Co tti xí mé sacjoi co coequín cain chojni ngoixin rajna tti joinchehe Jesús ngain jehe.

Are xingamehe xannçhichjenhe Jairo, conixin ná nçhí que catte lonttoe Jesús

(Mt. 9.18-26; Mr. 5.21-43)

⁴⁰ Are Jesús cjan para toenxin lago mé, cain chojni que te nttiha anto ché na ixin joiji Jesús, ixin cainxin na techonhe na Jesús. ⁴¹ Cottimeja joí ná xí que vinhi Jairo, xí mé vaquetonha xa ngain nihngo nttiha. Xí

jíhi vettoxin nttajochjíhi xa ngain Jesús co joinchetsenhe xa ñao ixin jehe rrocji nchiandoha xa ⁴² ixin jehe xí mé vechonda xa nacoaxinxon xannchichjenhe xa que vechonda xan tteyó nano. Co are mé ondajindenhe xannchichjenhe xa. Are Jesús sacjoi nchiandoha Jairo conixin jehe Jairo, rroé anto tsje chojni que hasta anto conttedo na ngaca Jesús.

⁴³ Co de ngacjén cain chojni mé nttiha conchienenhe ná nchí que venihi ncha tteyó nano. Jehe ncha veguenguihi ncha jni, co jehe nchí mé ojehe ncha joinchexinhi ncha de ngain xincheñoan cainxin tti vechonda ncha, pero ni ná xincheñoan čoha joinchexingameha xa ncha. ⁴⁴ Jehe nchí mé conchienenhe ncha ngaca Jesús notonxin co catte ncha rioho ngandehelonttoe Jesús que jitsá. Co rato mé tavehe tti jni que venguihi ncha.

⁴⁵ Cottimeja Jesús joanchiangui co ndačo:

—¿Quensen catte ná?

Pero ixin cain chojni ndačo na xonhi quensen, mexinxin Pedro conixin cain xicompañeroe ndačo xa:

—Maestro, cain chojni tonttedo na ngaca soixin, co tonxinca na de ná lado co iná lado, mexinxin ¿quedonda soixin xa danchiangui quensen catte?

⁴⁶ Pero Jesús ndačo:

—Jí ná chojni que catte na, ixin janha conona que jointtaxingamá ná chojni conixin joachaxin que janha chonda.

⁴⁷ Nchí mé are conohe ncha ixin conohe Jesús, jehe ncha conchienenhe ncha jíxanga ncha de joaxaon, co vettoxin nttajochjíhi ncha ngaca rotté Jesús. Co ngattoxon con cain chojni nttiha ndačo ncha ngain Jesús ixin quedonda jehe ncha catte ncha co quexén ngain rato mé ndacoñoenhe ncha. ⁴⁸ Cottimeja Jesús ndačo ngain ncha:

—Jaha coñoanha ixin vitticaon na. Jai sattji contenta.

⁴⁹ Xa jinichja Jesús yá, are ojoí ná chojni de ngain nchiandoha Jairo, tti vaquetonha ngain nihngo nttiha; co ndačo chojni mé ngain Jairo:

—Xannchichjanha ondavene xan; inchemolestaha ximaestro.

⁵⁰ Pero are Jesús coinhi yá, jehe ndačo ngain Jairo:

—Jaha xaonha; jeho ditticaon na janha, co xanha rroxingamehe xan.

⁵¹ Are joihi na nchiandoha Jairo, Jesús coanchjandaha vixinhi ni ná chojni, jeho jehe, Pedro, Jacobo, Juan, co jehe ndodé xannchichjan conixin janné xan. ⁵² Cain chojni que te nttiha tetsjanga na co tetaxin na xan joachjaon. Pero Jesús ndačo ngain na:

—Tsjangaha ra; xannchichjan ndadiguenha xan; sino que tajjioa xan.

⁵³ Pero jehe na cjoanoa na Jesús ixin ndačo jañá, ixin cain na venohe na que xannchichjan ondavenhe xan. ⁵⁴ Cottimeja Jesús tsehe rachjenhe xannchichjan co ndačo sén ngain xan:

—Jaha xannchichjan, dingattjen.

⁵⁵ Co jehe xannchichjan xechon xan iná, co ngain rato mé jehe xan vingattjen xan. Co Jesús coetonha rrochjé na xan sine xan. ⁵⁶ Nindoha xannchichjan anto vinttegoan na admirado, pero Jesús coetonhe na ixin xonhi chojni rroundache na tti joinchehe jehe.

9

*Are Jesús rroanha tti tteyó chojni que vacao
(Mt. 10.5-15; Mr. 6.7-13)*

¹ Jesús nichjé tti tteyó chojni que vacao, co jehe joanjo joachaxin ngain na para que jehe na nchao senguixin na cain clase de espíritu jianha de ngaxinhi cuerpoe chojni, co para sinchexingamehe na chojni nihi de ixin chin que chonda. ² Jehe rroanha na para joindache na chojni ixin Dios osiquetonha ngain ansén na, co para joinchexingamehe na chojni nihi. ³ Jehe ndačo ngain na:

—Xonhi ttjiho ra de tti sondaha ra ngatja nttiha, ni nttacotto, ni bolsa ni niottja, ni tomi. Ttjiho ra jehó nacoa camisa que tengaha ra co ttjioha ra yó camisa. ⁴ Cada rajna que saso ra dittoha ra jehó nacoa nchia hasta que satsjixin ra de ngain rajna mé. ⁵ Si chonja rajna sinaoha na tsinhi na tti jian joajna que jaha ra tsjiho ra jaha ra sattjixin ra de nttiha, co tontsjenga ra jinche que yá rottea ra, mé ná señal que vitticaonha na jaha ra.

⁶ Jamé sacjoi cain chojni mé, cjoi na ná co ná rajna, joindache na chojni tti jian joajna co joinchexingamehe na chojni nihi.

Are ndavenhe Juan, tti vancheguitte chojni

(Mt. 14.1-12; Mr. 6.14-29)

⁷ Are xigobernador Herodes conohe xa cain tti jian que vanchehe Jesús, jehe xa anto xaon xa, ni inoeha xa quehe xaxaon xa ixin canxion chojni ndačo na que mé Juan, tti vancheguitte chojni, co jai xechon. ⁸ Icanxin na vandačo na ixin Jesús, jehe tti profeta Elías que cononxin iná, co icanxin na vandačo na que ixin Jesús ná de tti profeta que joí are icha saho co jai xechon. ⁹ Pero Herodes ndačo:

—Janha mismo coetonha chinji já Juan, tti vancheguitte chojni. Mexinxin ¿quensen xí jihi que chojni ttequin na anto tsje cosa jian que jehe xa rridinchehe xa?

Co Herodes anto cjoé quexén para que jehe rroguicon Jesús.

Are Jesús joanjo joine naho mil xí

(Mt. 14.13-21; Mr. 6.30-44; Jn. 6.1-14)

¹⁰ Are tti tteyó chojni que rroanha Jesús cjanxin na de tti joindačo na tti jian joajna, jehe na ndačo na ngain Jesús tti jehe na joinchehe na. Cottimeja Jesús sajoicao na ngain ná lugar tti xonhi chojni te, chian ngain rajna Betsaida. ¹¹ Pero are conohe icha chojni ixin ttinó sacjoi Jesús, jehe na rroé na co jehe nichjé cain na, co ndačo ngain na ixin quexén siquetonha Dios ngain ansén na, co joinchexingamehe cain ninihi.

¹² Co are ondacotsocjin, conchienne tti tteyó chojni que vacao Jesús, co ndačo na ngain:

—Ndache cain chojni que satsji na, para sasinchejogaha na co siquehna na tti sine na ngain rajna o nchia que te chian, ixin nttihi tti te na xonhi jí.

¹³ Pero Jesús ndačo ngain na:

—Jaha ra danjo ra tti sine na.

Jehe na vinttendačo na:

—Janha na xonhi chonda na, jehó naho niottja co yó copescado, o çapoco janha na siquehna na tti sine cainxin chojni jihi?

¹⁴ Ixin cain chojni mé, jehó xí inchin naho mil xa. Pero Jesús ndačo ngain tti chojni que vacao:

—Ndache ra na tasinte na de cincuenta na cada grupochjan.

¹⁵ Co jamé joinchehe na; tavintte na cainxin na. ¹⁶ Cottimeja Jesús coá tti naho niottja mé co tti yó copescado. Co jehe tsjehe para ngajni,

joanjo gracias ngain Dios de ixin niottja mé conixin copescado, co después de váña niottja, jehe joanjo nio ngain tti chojni que vacao, para que jehe na conchjejehe na cainxin chojni mé jehe niottja conixin copescado. ¹⁷ Cainxin chojni mé joine na co cojehe na jian, co después xa joincheaon na tteyó ntaña de ixin tti niottja rioho que xexin joine na.

Pedro ndačo que ixin Jesús, mé tti Cristo

(Mt. 16.13-19; Mr. 8.27-29)

¹⁸ Ná nchanho are Jesús jincheoanxinhi Dios, co jeha tti chojni que vacao nttiha tate na ngain, jehe joanchiangui ngain na co ndačo:

—¿Quehe ndačo chojni ixin quensen na janha?

¹⁹ Jehe na vinttendačo na:

—Canxin na ndačo na que ixin soixin Juan, tti vancheguitte chojni; icanxin na ndačo na que ixin soixin tti profeta Elías; co icanxin na ndačo na que ixin soixin ná de tti profeta que vacji are saho.

²⁰ Cottimeja Jesús joanchiangui ngain jehe na, co ndačo:

—Co jaha ra ¿quehe ndačo ra ixin quensen na janha?

Co Pedro ndačo ngain Jesús:

—Soixin tti Cristo que joixin de ngain Dios.

Are Jesús ndačo ixin jehe ndasenhe

(Mt. 16.20-28; Mr. 8.30—9.1)

²¹ Pero Jesús anto coetonhe na ixin xonhi chojni rrondache na.

²² Cottimeja Jesús ndačo ngain tti chojni que vacao:

—Janha, tti Xí que joixin de ngajni, chonda que anto tsje cosa tangui tsonna, co cain xittetonha ngain nihngo, co cain xidána que ttetonha ngain icha xidána, conixin cain ximaestroe ley Israel, sinaoha na xa. Co nasoenxon na xa, pero ngain nchanho ninxin janha rroxechon na.

²³ Después jehe ndačo ngain cain chojni que te nttiha:

—Si čhonja chojni rinao sitticaon na janha, pero chonda que rrotjañehe tti jehe icha rinao para sitticaon na janha cainxin nchanho, masqui tangui tsonhe co hasta puede nasenxon de ixin causananxin janha. ²⁴ Ixin tti chojni que rinao xonhi tsonhe vidé, mé ndasinchetján vidé; pero tti chojni que sinchetján vidé de ixin causananxin janha, chojni mé rrochonda iná vida naroaxin. ²⁵ Ixin xonhi xé que ná chojni sachá cainxin cosa que jí ngain mundo jiji co ndasitján jehe mismo. ²⁶ Ixin tti chojni que tosoé de ixin janha co de ixin palabrana, cai janha, tti Xí que joixin de ngajni, tsosoahna de ixin jehe chojni mé are janha sihi inchin ná Rey conixin cain gloria que chonda Ndodana co que chonda cain ángel que te ngain Ndo. ²⁷ Atto seguro tti rrindattjo ra, que čhonja de jaha ra xo te ra nttihi jai, xa senha ra hasta que siconja ra que Dios siquetonha ngain ansén chojni.

Are vicon na Jesús anto ojé

(Mt. 17.1-8; Mr. 9.2-8)

²⁸ Inchin jni nchanho después de Jesús ndačo cain jiji, jehe coani ná jna para joincheoanxinhi Dios co joicao Pedro, Jacobo co Juan. ²⁹ Co are Jesús jincheoanxinhi Dios, ngá con Jesús ndavitoxinhi co lonttoe ndacjan lontto anto roa co hasta jidaquima lontto. ³⁰ Cottimeja cononxin yó xí que tatetjao xa Jesús, co cayoi xí mé, ná Moisés co iná Elías. ³¹ Co ngoixin ngandanji na vehe ná joadingasán anto čhjoin. Co cjoao na ixin quexén ndasenhe Jesús ngain Jerusalén, co ixin anto tangui ndasenhe.

³² Masqui Pedro co tti cayoi xicompañeroe anto chjé na cottačhin, pero jehe na tavinttetsjehe na co vicon na gloria que chonda Jesús, co vicon na tti yó xí canxin que jói ngain Jesús. ³³ Are cayoi xí mé saconcjin xa de ngain Jesús, cottimeja Pedro ndačo ngain Jesús:

—Maestro, atto nchao ixin te na janha na nttihi, janha na sinttachjian na ní nchiachjan; ná para ixin soixin, ná para ixin Moisés, co iná nchiachjan para ixin Elías.

Pero Pedro noeha quehe ndačo ngain rato mé. ³⁴ Co Pedro xa jinichja jañá are jói ná ttjoi ngain na co jehe na ndavittohe na ngacjan ttjoi mé. Pedro co cayoi xicompañeroe vinttexaon ixin ndavittohe na ngacjan ttjoi mé. ³⁵ Cottimeja de ngacjan ttjoi mé coinxin na tté Dios que ndačo:

—Yá tti Xanhna que anto rinaho. Ditticaon ra tti rrondattjo ra Xan.

³⁶ Después que nichja Dios jañá, vicon na que Jesús jecho tají nttiha. Jehe na vinttetenco na, co xonhi chojni coequín na tti jehe na vicon na.

Jesús joinchexingamehe ná xanxichjan que vechonda espíritu jianha
(Mt. 17.14-21; Mr. 9.14-29)

³⁷ Ndoexin are vanianxin na de ngain jna mé, anto tsje chojni joi-choenxin na Jesús ngatja nttiha. ³⁸ De ngayé cain chojni mé, ná xí nichja xa sén co ndačo xa ngain Jesús:

—Maestro, nttatsanha ñao, tsjehe xanxichjanhna ixin jecho xan jihi chonda. ³⁹ Ná espíritu jianha tse xan co nchecoyao xan, co tadetsinga xan xá ndadenhe xan co hasta ttočhjo ttixin rroha xan. Anto ncheguetan xan tangui co xonhi rato tačhanda xan para tadehe xan čhjoin. ⁴⁰ Janha ojointtatsán ñao chojnia que čhjiho ixin rrogantsje na espíritu jianha yá, pero coixinha na.

⁴¹ Jesús ndačo:

—¡Jaha ra xo chojni que ditticaonha ra co jianha ra! ¿Hasta tti quesa chonda que sarihi nganji ra co tsixinna nganji ra? Sicozna xanha nttihi.

⁴² Pero are jehe xanxichjan mé jitonchienhe xan ngain Jesús, espíritu jianha mé joincheguenda xan, co joanca xan ngataha nontte. Pero Jesús joinchesattehe espíritu jianha mé, co jehe joinchexingamehe xanxichjan co joanjo xan ngain ndodé xan. ⁴³ Co cainxin chojni que te nttiha anto vinttegoan na admirado de ixin tti anto tsje joachaxin que chonda Dios.

Jesús ndačo iná ixin jehe ndasenhe
(Mt. 17.22-23; Mr. 9.30-32)

Are cain chojni mé xa teaxaon na de ixin tti jian que joinchehe Jesús, jehe ndačo ngain tti chojni que vacao:

⁴⁴ —Ttinhí ra jian tti janha rrondattjo ra, co tjañaha ra que janha, tti Xí que joixin de ngajni, sinchechienhe na na ngain xí jianha.

⁴⁵ Pero tti chojni que vacao vaquinxinha na tti jehe vandačo ngain na, ixin xa xonhi joachaxin vinttechonda na para coinxin na. Co jehe na xaoncoa na para joanchianguihi na Jesús ixin quehe rročo tti jehe ndačo.

¿Quensen tti icha importante?
(Mt. 18.1-5; Mr. 9.33-37)

⁴⁶ Cottimeja tti chojni que vacao Jesús, coexinhi na cjoao chó na ixin quensen de jehe na tti icha importante, ⁴⁷ pero Jesús conohe quehe tendache chó na. Cottimeja jehe cjóa ná xanxichjan co joaquehe xan ngaca jehe, ⁴⁸ co ndačo ngain jehe na:

—Tti chojni que sayé ná chjan inchin xanxichjan jihi conixin nombrena ixin ditticaon na janha; chojni mé sayehna janha cai. Co tti chojni que sayehna janha, cai sayé tti rroanha na janha. ¿Arinao ra tsonoha ra quensen icha importante? Tti rrocjan icha importanteha ngayaha ra, mé tti sehe icha importante ngattoxon con na janha.

Tti chojni que ningacoanha na, chojni mé jí nganji na
(Mr. 9.38-40)

⁴⁹ Cottimeja Juan ndačo ngain Jesús:

—Maestro, janha na vicon na ná tti jidengui espíritu jianha conixin joachaxín nombrea; co janha na ndattjan na que isincheha jamé, ixin jehe čhjiha nganji na.

⁵⁰ Pero Jesús ndačo:

—Cayacoenha ra chojni mé, ixin tti chojni que ningacoanha na, jehe jí nganji na.

Jesús joinchesattehe Jacobo co Juan

⁵¹ Are ojoiconchiaon tiempo que Jesús sacojín para ngajni, jehe xaoanha para sacjoi ngain Jerusalén. ⁵² Jehe rroanha canxion chojni que joicao joajné icha saho, co chojni mé cjoí na ngain ná rajna ngain regioen Samaria para joicjé na ná nchia tti sintte jehe na conixin Jesús. ⁵³ Pero chojni samaritano mé čhoha na joanjo na joachaxin nttiha ixin chonxin na que chojní Jesús conixin jehe satettji na para Jerusalén. ⁵⁴ Are Jacobo co Juan conohe que ixin nisamaritano čhoha na danjo na joachaxin, jehe ndačo ngain Jesús:

—¿Arinao soixin que tsetonha na janha na que rroxincanji xohi de ngajni, para soen cain chojni yá inchin joinchehe profeta Elías?

⁵⁵ Cottimeja Jesús ngaria tsjehe na, co joinchesattehe na, ndačo:

—Jaha ra noaha ra quehe clase de espíritu chonda ra. ⁵⁶ Ixin janha, tti Xí que joixin de ngajni, joiha para nasoenxon chojni, sino que para rrochjaha na vida naroaxin.

Cottimeja sacjoi na para ngain iná rajna.

Tti chojni que joinao rrogacao Jesús
(Mt. 8.19-22)

⁵⁷ Are tettji na ngatja nttiha, ná xí ndačo xa ngain Jesús:

—Janha rinaho sacjin na cain lugar tti soixin sacji.

⁵⁸ Jesús ndačo ngain tti xí mé:

—Cain condanixa chonda va cuevé va, co cain conttoa chonda va caqué va, pero janha, tti Xí que joixin de ngajni, chondaha ni tinó sarichin.

⁵⁹ Jesús ndačo ngain iná tti xí:

—Jaha chjin na.

Pero tti xí mé ndačo:

—Nttatsanha ñao, chonna na saho ndasenja ndodana para que janha tsjavá ndo.

⁶⁰ Jesús ndačo:

—Tančhjanda tti chojni que chondaha vida naroaxin tsjavá chó na; pero jaha ttji co dindache chojni ixin Dios osiquetonha ngain ansén na.

⁶¹ Cottimeja iná tti xí ndačo ngain Jesús:

—Janha rinaho satsjin na, pero saho chonna na tsji sinttanoa ninchia-

nia.
⁶² Pero Jesús ndačo:

—Tti jitse ningue, cottimeja tsjehe para noton, chojni mé xonhi xé para ngain tti ttetonha Dios.

10

Are Jesús rroanha tti setenta chojni

¹ Después de cain jiji, Jesús coinciehe isetenta chojni, co jehe saho rroanha de yó na co yó na ngain cain rajna co icha lugar chian nttiha tti jehe chonda que cjoí después. ² Co ndačo ngain na:

—Atto seguro tti rrondattjo ra, que coseché Dios atto tsje, pero ninchehe xa tsjehe na. Mexinxin nchetsenhe ra ñao Xinajni para que jehe rrorroanha icha ninchehe xa para tsjejo na cain cosecha jiji. ³ Ttji ra jai jaha ra co xaxaon ra que janha rroanha ra inchin coleco ngayé condanixa. ⁴ Ttjioha ra bolsa, ni tomi, ni icha catte que jecho tti ca jaha ra techjanga ra. Co tadinttengattjenha ra para chjehe ra chojni joajna ngatja nttiha, ixin jamé sinchetjangui ra tiempo. ⁵ Are saso ra ngain ná nchia, saho danjo ra joajna co ndačo ra: “Que chojni de ngain nchia jiji tsonohe chjoin ngain ansén.” ⁶ Co si ngain nchia mé te chojni jian, ján, chojni mé tequininxin tti joajna que jaha ra sanjo ra; pero si nahi, joajná ra mé sarrocjan nganji ra. ⁷ Are saso ra ngain ná rajna, dittoha ra jecho ngain nacoa nchia co jintte ra co dihi ra tti rrochjá ra na de ngain nchia mé. Ixin tti nchehe xa jiquininxin rroxenguehe hna. Chondaha ra que sittoha ra ojejé nchia. ⁸ Are saso ra ngain ná rajna tti chojni ján sayaha ra, jintte ra cain tti rrochjá ra na. ⁹ Nchexingamehe ra chojni nihi que te ngain rajna mé, co ndache ra na: “Ochian joí tiempo para Dios siquetonha ngain ansean ra.” ¹⁰ Pero si saso ra ngain ná rajna tti rrochoha chojni sayaha ra na, jaha ra dachje ra para ngá nttiha co ndačo ra: ¹¹ “Hasta tti jinche de ngain rajná ra jiji que tse rottena na, tsontsjenga na para ná señal que jaha ra vitticaonha ra joajna que joiquianha ra. Pero xaxaon ra que tti ttetonha Dios ochian joí nganji ra.” ¹² Janha rrindattjo ra seguro, que para ngain nchanho que Dios sinchejuzguehe cainxin chojni, are mé chojni de ngain rajna que vitticaonha na joajné Dios icha soji castigo sayé na que tti castigo que vayé chojni de ngain ciudad de Sodoma.

Rajna que vintteguitticaonha

(Mt. 11.20-24)

¹³ ¡Anto tangui tsonha jaha ra chojni de ngain rajna Corazín! ¡Co anto tangui tsonha jaha ra, chojni de ngain rajna Betsaida! Ixin si cain milagro que jointtaha ngayaha ra rroconhe ngayé chojni de ngain ciudad de Tiro co Sidón, seguro que chojni mé osé rroquentoxinhi na vidé na de tti jianha que vanchehe na. Co para rrocjago na ixin jehe na orroquentoxinhi na vidé na, rroquinttengá na lontto ttie co rroguinga na ntesoguihi. ¹⁴ Pero ngain tti nchanho que Dios sinchejuzguehe cainxin chojni, are mé jaha ra sayehe ra castigo icha soji que chojni de ngain Tiro co Sidón. ¹⁵ Co jaha ra de ngain rajna Capernaum, ¿Axaxaon ra que jaha ra tsji ra para ngajni? Nahi, jeha jamé, ixin jaha ra tsjixin já ra ngain infierno.

¹⁶ Jesús xa ndačo ngain chojni:

—Tti chojni que sitticaon tti rrondačo jaha ra, cai sitticaon na na janha. Co tti chojni que sitticaonha tti rrondačo ra, cai chojni mé

sitticaonha na na janha. Co tti chojni que sitticaonha na janha, cai sitticaonha na tti rroanha na janha.

Are cjan tti setenta chojni

¹⁷ Cottimeja sacjoi tti setenta chojni co después cjan na anto contento, co ndačo na:

—Hasta cain espíritu jianha vitticaon joinchehe tti ndačhjan na are nichja na conixin joachaxín nombrea soixin.

¹⁸ Jesús ndačo ngain na:

—Ján, ixin janha vicon quežén vetsingaxin Satanás de ngajni inchin ná rayo. ¹⁹ Janha chjaha ra joachaxin para tsingachje ra conché conixin conttanchia, co para tsixinha ra ngain tti jianha, co xonhi tsonha ra. ²⁰ Pero tonoaaha ra čhjoin ixin espíritu jianha ditticaon co nchehe tti ndačo ra, sino que ixin nombrea ra ojitaxin ngajni.

Ndodaha conixin Xenhe Ndo

(Mt. 11.25-27; 13.16-17)

²¹ Ngain rato mé, Jesús anto ché de ixin Espíritu Santo, co jehe ndačo:

—Janha rrinttacoanxinha soixin, que joinchechjian nontte co joinchechjian ngajni, ixin tti chojni que chonda confianza nganji soixin inchin nchinnchinchjan chonda confianza ngain ndodé, soixin cjoagohe chojni mé tti soixin coemehe tti chojni que anto nohe co tti chojni que anto ttinxin. Ján, Padre, jańá joinchehe soixin ixin jańá rinao.

²² 'Ndodana Ndo chjana joachaxin para ttetonha cainxin cosa. xonhi chojni nohe quensen tti Xenhe jehe Ndo, sino que jehe Ndo mismo nohe Ndo quensen mé. Co xonhi chojni nohe quensen jehe Ndo, sino que jehe Xenhe Ndo, tti Xan nohe, conixin cain tti chojni que jehe Xan sinao Xan sinchegatsoan Xan jehe Ndo.

²³ Cottimeja Jesús tsjehe ngain chojni que vacao co ndačo ngain jehona:

—Anto čhjoin para ixin tti chojni que tedicon tti jaha ra tedicon ra jai, ²⁴ ixin tsje profeta co tsje rey joinao na rroguicon na jiji, tti jaha ra tedicon ra, pero jehe na viconha na. Co jehe na joinao na rroquinhina na tti jaha ra ttettinhina ra jai, pero coinha na.

Ejemplo ná chojni jian de ngain Samaria

²⁵ Cottimeja ná ximaestroey ley Israel cjoi xa joitsjehe xa Jesús jehona para joincheyehe xa Jesús, co joanchiangui xa ngain co ndačo xa:

—Maestro, ¿quehe sinttaha janha para rrochonda iná vida naroaxin?

²⁶ Jesús ndačo ngain xa:

—¿Quehe jitaxin ngain ley que vayé Moisés? ¿Quežén čho ley mé?

²⁷ Jehe ximaestroey ley mé ndačo xa:

—Ngain ley mé jindačo: “Rinao Dios conixin ngoi ansean, conixin ngain almá, conixin ngoi fuerzá, conixin ngoi joarrixaoan; co rinao cainxin nivecinao inchin rinao cuerpoa jaha.”

²⁸ Cottimeja Jesús ndačo ngain xa:

—Nchao jí tti jaha ndačo. Si jaha sinchehe cain yá, ján rrochonda iná vida naroaxin.

²⁹ Pero ximaestroey ley mé joinao xa rroguittohe xa jian ngattoxon con Jesús de ixin tti ndačo xa, mexinxin joanchiangui xa ngain Jesús con ndačo xa:

—Pero, ¿quensen vecinona?

³⁰ Cottimeja ndačo Jesús ngain xa:

—Ná xí joixin xa de Jerusalén para sajittji xa ngain rajna Jericó, co ngatja nttiha cayacoen xa canxion xichehe, co cain xichehe mé coehe xa jehe tti xí mé cainxin tomí co hasta lonttoe que jingá, co anto goen xa jehe tti xí mé, hasta merocoa narrogoenxon xa. Cottimeja savinttecji xa. ³¹ Co nchion después nttiha vatto ná xidána judío, pero are jehe xa vicon xa que nttiha tajitsinga tti xí mé, jehe xidána mé vatto ojé lado. ³² Cai nonttiha vatto ná chojni razé Leví, pero are jehe vicon tti xí que tajitsinga nttiha, cai vatto ojé lado. ³³ Pero nchion después nttiha vatto ná xí samaritano, co are jehe xa vicon xa tti xí judío que tajitsinga ngandehe nttiha mé, jehe xa coiaconoehé xa. ³⁴ Cottimeja jehe xa conchiennehe xa ngaca tti xí mé, co joincheñoenhe xa cain tti diconihi ngain cuerpoe conixin aceite co vino, co coensia xa jian. Cottimeja jehe xa joinchetaha xa colochöhe xa co sajoicao xa ngain ná nchia, co nttiha jehe xa venda xa. ³⁵ Co ndoexin are jehe xí mé sacjoi xa, joantsje xa yó tomí que anto rentte co joanjo xa ngain tti nchiandoha mé, co ndačo xa ngain: “Darinda xí jihi, co si jaha sinchexinhi icha tomí ixin jehe xa, janha tsjengaha hna are rrocjan na.” ³⁶ Mexinxin ndachjenji na ¿quexehe de tti ní xí mé tti joinchehe inchin ná nivecinoe tti xí que nihi?

³⁷ Ximaestroe ley ndačo xa:

—Tti xí que coiaconoehé jehe tti nihi mé.

Cottimeja Jesús ndačo ngain xa:

—Janché, jaha cai ttji co nchehe jamé.

Are Jesús ngain nchiandoha Marta co María

³⁸ Jesús joinchehe sigue sacjoi, co joihi ngain ná rajna nchín, co nttiha ná nchí que vinhi Marta joanjo ncha nchiandoha ncha tti vittohe Jesús. ³⁹ Jehe Marta vechonda ná xanchó que vinhi María, co are mé, jehe María tavehe čhica rotté Jesús para que coinhi quehe ndačo Jesús. ⁴⁰ Pero Marta anto jidoan purado de jinchechjian comida, ixin jehó jinchehe xa, mexinxin conchiennehe co ndačo ngain Jesús:

—¿Aħaxaonha que ixin xanchian ttinttona xan janho rrinttaha cain xa jihi? Ndache xan que tsjenguijna na xan.

⁴¹ Pero Jesús ndačo ngain Marta:

—Marta, Marta, jaha anto ħaxaon de ixin cain cosa yá, ⁴² pero jí jehó nacoa cosa que anto importante. Co María ocoinchiehe tti cosa icha importante mé, co ħonhi chojni santsjehe cosa mé.

11

Are Jesús cjoago quexén sinchecoanxinhi ni Dios

(Mt. 6.9-15; 7.7-11)

¹ Ná nchanho Jesús jinchecoanxinhi Dios ngain ná lugar, co are joexin joinchecoanxinhi Dios, ná de tti chojni que vacao ndačo ngain:

—Nchecoanna ni ra sinttacoanxian na Dios, jańá inchin Juan, tti vanheguitte chojni, joinchecoenhe chojni que vacao.

² Jesús ndačo:

—Are sinchecoanxinhi ra Dios, ndačo ra:

Padre soixin que ttjen ngajni,
nombrea soixin jiquininxin tsosayehe.

Siquetonha nttihi soixin.

Co tsonhe inchin soixin rinao nttihi ngataha nontte, jańá inchin tonhe nttiha ngajni.

³ Chjana ra jai tti sine na que rrogondana na.

⁴ Nchetjañana ni ra tti jianha que jointtaha na, ixin janha na cai nttatjañá na tti chojni que nchehe jianha nganji na.

Nchegattoha ni ra tangui: tančhjangaha ni ra ngain tti jianha.

⁵ Cai ndačo Jesús ngain na:

—Tsín na ná ejemplo, que ná de jaha ra chonda ra ná xiamigoa ra, co ngosine ttie siji xa nchiandoi ra co rrondattjo ra xa: “Amigo, nhecjen na ní niottja, ⁶ ixin ná xiamigona nandá joixin xa viaje, co joiji xa nchiania co janha xonhi chonda que rrochjaha xa.” ⁷ Co si jaha ra rrondačo ra desde ngaxinhi nchiandoi ra: “Nchemolestaha na; ocoejá puerta co otarričhinquinha xanhna ngataha cama; čhoha singattjen para rrochjaha tti jaha rinao.” ⁸ Pero si xiamigoa ra mé sinchehe xa sigue rronichjaha ra xa jaha ra singattjen ra co rrochjehe ra xa tti jehe xa rinao xa pero ijeha ixin amigo ra, sino que jaha ra sanjo ra mé para que isincheha xa sigue sinttamolestá ra xa icha. ⁹ Mexinxin janha rrindattjo ra: Danchia ra co Dios rrochjá ra; ttjé ra co sinčí ra; dinga ra puerta, co puerta mé rroxiré puerta. ¹⁰ Ixin tti danchia, jehe dayé; co tti ttjé, jehe dittja; co tti dinga puerta, puerta xiré puerta para ixin jehe.

¹¹ ¿Apoco čhonja de jaha ra que ochonda ra xanha ra anchao rrochjehe ra xan ná xo are sanchiaha ra xan niottja? ¿O arrochjehe ra xan nntaohe conché are jehe xan sanchia ra xan nntaohe copescado? ¹² ¿O arrochjehe ra xan ná conttanchia are sanchiaha ra xan joja? ¹³ Mexinxin si jaha ra masqui chojni jianha ra pero noha ra danjo ra cosa jian ngain xanha ra, ¡mé Ndodá na que ttjen ngajni xijanjoha Ndo Espiritu Santo ngain tti chojni que sanchia ngain Ndo!

*Are ndačo chojni ixin Jesús chonda joachaxín inchínji
(Mt. 12.22-30; Mr. 3.19-27)*

¹⁴ Ná nchanho Jesús vengui ná espíritu jianha de ngaxinhi cuerpoe ná xí que ndadicottapo xa de ixin jehe espíritu mé; co are espíritu jianha ovačhjexin de ngaxinhi cuerpoe xa, jehe xa onchao nichja xa. Tsje chojni que te nttiha vintteogan na admirado de ixin tti joinchehe Jesús. ¹⁵ Pero icanxin na ndačo na:

—Xí jihi dengui xa espíritu jianha de ixin joachaxín Satanás, tti cai dinhi Beelzebú, tti ttetonha ngain cain espíritu jianha.

¹⁶ Co icanxin na para rrojincheyehe na Jesús, joanchiehe na que ixin jehe rrojinchehe ná milagro que ttixin de ngajni. ¹⁷ Pero jehe ovenohe quehe teřaxaon na, co jehe ndačo ngain na:

—Quexeho gobierno que chjéa para ttetocaho chó, gobierno mé toin ndattjexin, co si ná nindoha ngain ná nchia, si atto tteto na, cai toin ndachjequé na. ¹⁸ Jañá cai, si Satanás tseto jeho, ¿queřen tsončhenhe joachaxín que jehe chonda? Jihi ndačhjan janha, ixin jaha ra ndačo ra que janha dehngui espíritu jianha de ixin joachaxín Satanás. ¹⁹ Pero si janha jamé na, ¿quensen chjé chojnia ra joachaxin para dengui na espíritu jianha? Mexinxin jeho na tjago na que ndoaha tti teřaxaon ra. ²⁰ Pero janha dehngui espíritu jianha de ixin joachaxín Dios, co jihi ročo que tti ttetonha Dios ochian jói nganji ra.

²¹ Are ná xí tsanga jinda xa nchiandoha xa conixin tsje espada co lanza, are mé cain cosé xa que jichonda xa jí seguro. ²² Pero si tsí iná xí icha tsanga que jehe xa co tsixinha xa ngain xí mé, ndasantsjehe xa cain

espadé xa co lanzé xa que chonda xa, cottimeja nchao sasicao xa cosé xí mé que jichjian.

²³ Tti chojni que rinaoha na janha, chojni mé ningaonna janha; co tti chojni que ttenchjianha tti janha rrindačhjan, chojni mé ttingo na palabrana inchin chojni que ttingo caxineno.

Tti espíritu jianha que cjan
(Mt. 12.43-45)

²⁴ Are ná espíritu jianha dačhjexin de ngain cuerpoe ná chojni, espíritu jiji sattji ngain lugar xema dicjé ná lugar tti jehe sinchejogaha. Co are idiraha lugar mé, jehe xaxaon: “Janha sarrocjan na ngain nchiania tti vačhjexin.” ²⁵ Are espíritu mé cjan, jehe dittja cuerpoe chojni mé inchin ná nchia que diganjo na čhjoin, co čhjoin diconchjian ngaxinhi nchia mé. ²⁶ Cottimeja espíritu jianha mé dirroé iyáto espíritu icha jianha que jehe espíritu mé, co cain espíritu mé sadixinhi ngaxinhi cuerpoe chojni mé para tadintte cai. Co después, chojni mé icha tangui tonhe que are saho.

Quensen tonohé čhjoin ngain vidé

²⁷ Are Jesús jindačo cain cosa jiji, ná nčí nttiha ngayé chojni ndačo nča sén:

—¡Anto čhjoin para ixin tti nčí que jointtaconcjiha co jointtagangui!

²⁸ Pero Jesús ndačo:

—¡Icha čhjoin para ixin tti chojni que ttinhi tti ndačo Dios co ditticaon na!

Are chojni jianha joanchia na ná milagro
(Mt. 12.38-42; Mr. 8.12)

²⁹ Chojni joinchehe na sigue xatte na ngandanji Jesús, co jehe coexinhi nichja co ndačo:

—Cain chojni ngain tiempo jiji, jehe na jianha na co danchia na sicon na ná señal de milagro; pero xonhi icha señal sicon na que jecho tti señal que vattohe profeta Jonás. ³⁰ Ixin jañá inchin Jonás cjoí ná señal para ixin chojni que vintte ngain ciudad de Nínive, jamé janha cai, tti Xí que joixin de ngajni, janha ná señal para ixin chojni de ngain tiempo que te na jai. ³¹ Are chojni de tiempo jiji soenhe na juzgado, tti reina que joixin de ngain nontte Sabá icha sur singattjen co jehe reina mé rročo jie para ixin chojni jiji ixin jehe reina mé joixin anto cjin para joiquinhi tti venohe Salomón, co nttihi jí nganji ra ná tti icha importante que Salomón pero xonhi chojni nchehe caso. ³² Co chojni que vintte ngain ciudad de Nínive singattjen na ngain tti nchanho que Dios sinchejuzguehe cain chojni, para rročo na jie para ixin chojni de tiempo jiji ixin cain chojni de ngain Nínive coentoxinhi na vidé na are Jonás joindache na joajné Dios, co nttihi jí ná tti icha importante que Jonás pero xonhi chojni nchehe caso.

Jmacon ni, mé tti lamparé cuerpoe ni
(Mt. 5.15; 6.22-23)

³³ Xonhi chojni nchengasán ná lámpara para ttema lámpara ni para daquehe ngaxinhi ná cajón, sino que dehe lámpara noi para que cain chojni que dixinhi nchia dingasenhe na. ³⁴ Jmacon ni inchin ná lámpara para ngain cuerpoe ni. Mexinxin si jmacon jaha jian, cai ngoixin cuerpoea chonda joadingasán. Rročo si joadingasán que Dios rroanha jí ngain

ansean, jaha chojni jian. Pero si jmacon jianha, cai ngoixin cuerpoa jí ngain tti naxin xehe. ³⁵ Ttjiho cuidado para que tti joadingasán que rrichonda rrocjanha inchin tti naxin xehe. ³⁶ Ixin si ngoixin cuerpoa jichonda joadingasán, ni rioho de ngain cuerpoa jichondaha ni rioho tti naxin xehe; cain cosa jaha sicon jian xajeho inchin are ná lámpara jinttangasañaha conixin xoi.

Are Jesús joinchesattehe xifariseo co ximaestroe ley

(Mt. 23.1-36; Mr. 12.38-40; Lc. 20.45-47)

³⁷ Are Jesús joexin ndaño cain yá, ná xifariseo ndache xa Jesús ixin sinecaho xa ngain nchiandoha xa. Jesús cjoí nchiandoha xa co joixinhi vehe ngain mesa. ³⁸ Jehe xifariseo mé goan xa admirado ixin vicon xa que Jesús vehe joine co conttiha jinda tsje nttiha inchin costumbré icha chojni judío. ³⁹ Pero Jesús ndaño ngain xa:

—Jaha ra xifariseo ra inchin vaso co láto que chojni ncheroa de ngama, pero de ngaxinhi ansean ra tecaon ra de cain cosa jianha ixin ttehe ra cosé chojni co nchehe ra icha cosa jianha. ⁴⁰ ¡Jaha ra tonto ra! ¿Añoaha ra que Dios tti joinchexjian ngama ra, cai joinchexjian ngaxinxin ra? ⁴¹ Are danjo ra tomi ngain chojni noa, cai danjo ra de ngain ansean ra, co jamé tsoroa almá ra.

⁴² ¡Anto tangui tsonha ra jaha ra xifariseo! Ixin jaha ra danjo ra ngain Dios tti ttexin parte de ca que dinhi menta, co de caruda, co de icha clase de ca, pero ncheha ra caso de tti jian que nchehe ra ngain vidá ra co rinaoha ra Dios. Co jiji tti chonda ra que sinchehe ra co cai nchehe ra sigue danjo ra tti ttexin parte de cain ca mé.

⁴³ ¡Anto tangui tsonha ra, jaha ra xifariseo! Jaha ra ntaaxoxinha ra dayehe ra ntaxintaon icha importante ngaxinhi nihngo, co ntaaxoxinha ra dayehe ra joajna conixin anto respeto are ngatja nttiha.

⁴⁴ ¡Anto tangui tsonha ra jaha ra ximaestroe ley co jaha ra xifariseo, xó ncheha ra inchin ndaño ra! Ixin jaha ra te ra xá sepultura que idiconha ni co chojni datto na ngataha nttiha pero noeha na ixin nttiha jíxavá cosa dirrenga.

⁴⁵ Cottimeja ná ximaestroe ley, ndaño xa ngain Jesús:

—Maestro, are soixin ndaño yá, rrinichja feo de ixin janha na cai.

⁴⁶ Pero Jesús ndaño:

—¡Cai jaha ra anto tangui tsonha ra jaha ra xó maestroe ley! Ixin jaha ra tti ttetonhe ra icha chojni que sinchehe na para ixin Dios cosa anto tangui, co mé ná carga anto ye para ixin jehe na ixin ttixinha na nchehe na cain mé, co jaha ra ttjenguijnaha ra na para sinchehe na cain tti jaha ra ttetonha ra.

⁴⁷ ¡Anto tangui tsonha ra jaha ra! Ixin jaha ra nchexjian ra monumento anto chjoin ngataha tti tejavá cuerpoe cain profeta que nindogoelitoa ra xanchjen nagoenxon na are saho. ⁴⁸ Conixin yá jaha ra tjago ra, que ntaaxoxinha ra tti joinchehe nindogoelitoa ra xanchjen, ixin jehe na vinttegoen na profeta are saho co jaha ra nchexjian ra chjoin ngataha tti tejavá cuerpoe profeta.

⁴⁹ Mexinxin Dios ixin jehe anto jian nohe, mexinxin ndaño: “Rror-roanha ra profetana co representantena nganji ra, co jaha ra nasoenxon ra chonja de jehe na co ittoha na feo sinchehe ra ngain na.” ⁵⁰ Mexinxin chojni de ngain tiempo jiji jehe na niteca vidé cain profeta que vintteguenhe desde are nontte conchjian hasta jai; ⁵¹ rrocho desde are

ndavenhe Abel hasta are joiguenhe Zacarías, tti goenxin na ngain lugar entre altar co lugar santísimo. Yá tti rrindattjoxin ra janha, que chojni de ngain tiempo jiji tti teca na cain yá.

⁵² ¡Anto tangui tsonha ra jaha ra, xo maestroe ley! Ixin jaha ra chonda ra tti xón que jitaxin cain tti ttonha Dios. Pero jaha ra mismo rinaoha ra ttinxin ra, ni tančjandaha ra icha chojni que rinao tsinxin xón mé.

⁵³ Are Jesús ndačo cain cosa jiji ngain xa, ximaestroe ley co xifariseo anto vinttegoñao xa ngain Jesús, cottimeja joanchianguihi xa Jesús anto tsje pregunta, ⁵⁴ para que rroguiconxin xa si jehe rronichja ná cosa ndoaha, para que jehe xa nchao rrocjanguihi xa Jesús.

12

Jesús cjoagoe chojni ixin cainxin cosa, masqui jimao, pero tsononxin

¹ Ngain rato mé, xatte anto tsje miles de chojni nttiha que hasta conxınca chó na soji. Co Jesús coexinhi ndačo saho ngain tti chojni que vacao:

—Ttjho ra cuidado de ixin levaduré xifariseo, rročo tti jeha ndoa que jehe xa ndačo xa. ² Ixin xonhi ná cosa que ttema chojni que tsononxinha, co xonhi ná cosa jimao que tsononxinha. ³ Mexinxin, cain tti jaha ra nichja ra are naxin xehe, tsononxin are osingasán; co cain tti jaha ra nichja ra jimao are puerté nchia tajijé, pero cai tsononxinxin desde noi ngataha nchiandoi ra.

Quensen jiquininxin rroxagoen ni

(Mt. 10.28-31)

⁴ Nganji jaha ra, xiamigona ra, janha rrindattjo ra que chondaha ra que rroxagonhe ra tti chojni que natjayaxon ngain cuerpoe ni, ixin chojni mé čhoha nasoexon almé ni. ⁵ Pero janha rrondattjo ra quensen tti chonda que rroxagonhe ra: xagonhe ra jeho Dios, ixin jeho jehe tti nchao nasoexon cuerpoa ra co rrorroanha almá ra para ngain infierno. Ján seguro que xagonhe ra jehe Dios.

⁶ ¿Quejanhi rentte naho contoachjan? Jeho yó tomichjan que anto rentteha. Pero Dios tjañeha ni ná de jehe va. ⁷ Ixin Dios, jehe nohe hasta quejanhi xajá ra chonda ra. Mexinxin jaha ra xaoanha ra, ixin jaha ra icha rentte ra que tsje contoachjan.

Tti chojni que ndačo ngattoxon con icha chojni ixin Jesús jian

(Mt. 10.32-33; 12.32; 10.19-20)

⁸ Janha rrondattjo ra que quexeho chojni que rrondačo nttihi ngataha nontte ixin amigoe na janha, cai jahna, tti Xí que joixin de ngajni, rrondačjan ngattoxon con cain ángel de Dios que ixin jehe na amigona na cai. ⁹ Pero tti chojni que rrondačo ngattoxon con icha chojni que ixin jehe chonxinha de ixin janha, cai janha rrondačjan ngattoxon con cain ángel de Dios que ixin chonxinha jehe mé.

¹⁰ Co quexeho chojni rronichja jianha de ixin janha, tti Xí que joixin de ngajni, nchao sitjañehe chojni mé; pero tti chojni que rronichja jianha de ixin Espíritu Santo, xonhi tiempo sitjañehe chojni mé.

¹¹ Are tsjiho ra na ngain nihngo, o ngain xijuez, o ngain icha xitte-tonha, taha ra joachjaon de ixin quexén rrondačo ra ngain xa de ixin tti joinchehe ra, co taha ra joachjaon de ixin quexén rronichja ra, ¹² ixin are sinqué momento que jaha ra rronichja ra, Espíritu Santo tti sinttaxaxaon ra quehe rrondačo ra.

Tti rico que xaxaon cosa que xonhi xé

¹³ De ngayé cain chojni nttiha, ná chojni ndačo ngain Jesús:

—Maestro, ndache xanchian que rrochjana xan tti partena que jiquin-
inxin na de herencia.

¹⁴ Pero Jesús ndačo:

—¿Quensen coín na janha de juez ngain cosa yá?

¹⁵ Cai ndačo Jesús:

—Ttjiho ra cuidado que antoha sinao ra tomi, ixin vidé chojni tsixinha
de ixin tti tsje tomi que rrochonda ni.

¹⁶ Cottimeja Jesús ndache na ejemplo jiji:

—Vehe ná xí rico, co ngoixin jnguihi xa anto goan noa. ¹⁷ Cottimeja
tti rico mé vehe xaxaon: “¿Quexén sinttaha janha? Chondaha ttinó
tsenchjianxin cain cosechana.” ¹⁸ Ngain rato mé jehe xaxaon: “Onona
quexén sinttaha. Sinttaxante granerona que chonda para sinttachjian
iná granero icha jie, co nttiha tsenchjinha cainxin cosechana, co cainxin
cosa que janha chonda. ¹⁹ Cottimeja rrondattjan almana: Alma, jaha
ochonda anto tsje cosa jichjian para anto tsje nano. Jai nchejogaha, jinte
co dihi, co chaha.” ²⁰ Pero Dios ndačo ngain xí mé: “Jaha tonto. Ngain
ttie jiji senhe jaha; co cain tti coenchjinha, ¿para ixin quensen?” ²¹ Jañá
tonhe tti chojni que anto datse tomi co icha cosa que jehe dondehe, pero
que xonhi chonda para ngain Dios.

Dios jinda cain xenhe

(Mt. 6.25-34)

²² Despues ndačo Jesús ngain chojni que vacao:

—Janha rrondattjo ra que taha ra joachjaon de ixin tti sintte ra para
sinttechonxin ra, ni de ixin lontto que sinttetsí ra. ²³ Vidé ni icha rentte
que tti jine ni, co cuerpoe ni icha rentte que lonttoe ni. ²⁴ Tsjehe ra
conttaha, que co mé ni xonhi ttenga va, ni xonhi cosecha datsín va, ni
chondaha va graneroe va, pero ixinha mé, Dios chjé va tti jine va. ¡Co
para ixin Dios jaha ra icha rentte ra que conttoa! ²⁵ Co ¿Apoco ná de jaha
ra, ixin anto ta ra joachjaon, anchao sahngui ra irioho metro icha de tti
jininxin ra? ²⁶ Mexinxin si čhoha nchehe ra cosa tanguiha ¿quedonda ta
ra joachjaon de ngain cosa tanguí?

²⁷ Xaxaon ra jian quexén dangui cain tsjo ngataon jngui, cain tsjo mé
ncheha tsjo xa ni tajinha tsjo chjon. Co janha rrondattjo ra que ni rey
Salomón, que jehe anto čhjoin vaguitsá, pero xonhi tiempo vetsá inchin
ná de jehe tsjo jiji. ²⁸ Si Dios jañá nchetsá cain ca que jeha jai jí ngataon
jngui co ndoe ondarroche ca ngain xohi, ¡mé jaha ra xichjaha ra Dios cain
tti rrogondaha ra, masqui jaha ra xa antoha jian ditticaon ra ngain Dios!
²⁹ Mexinxin, taha ra joachjaon de ixin quehe sintte ra ni de quehe sihi
ra. ³⁰ Ixin chojni de ngain mundo jiji ta na joachjaon de ixin cain cosa
yá; pero jaha ra chonda ra ná Ndo dá ra ngajni, que jehe Ndo onohé Ndo
que jaha ra rrogondaha ra cain cosa yá. ³¹ Pero cain tiempo ditticaon ra
cain tti ttetonha Ndo, co jamé sayehe ra cain cosa jiji.

Cosa rentte que rrochonda na ngajni

(Mt. 6.19-21)

³² Xaonha ra jaha ra xo inchin colecona, ixin masqui tsjehe ra pero
Ndo dá na que ttjen ngajni, jehe Ndo rinao Ndo rrochjá ra Ndo tti jehe
Ndo ttetonha Ndo ngajni. ³³ Nhecji ra cain cosa que chonda ra co

ttjenguijna ra tti chojni que rrongondehe; jañá nchechjian ra bolsé tomi que xonhi tiempo sichje, rrocho que ngajni rrochonda ra cosa icha rentte co cosa mé xonhi tiempo tsjexin, ixin nttiha xichehe sijiha xa ni cochí sinchexantteha. ³⁴ Ixin ngain lugar tti jaha ra rrochonda ra cosá ra icha importante para ixin jaha ra, cai nttiha sehe ansean ra.

Chonda que sontte na listo

³⁵ Dintte ra listo, co ttjiho ra cuidado que lampará ra que sacaon cain tiempo. ³⁶ Dintte ra inchin ninchehe xa que techonhe na xinajni na tsixin xa de ngain tti cotehe. Ixin ninchehe xa mé dintte na listo para tsonxiré na puerté nchia are singa xa puerta. ³⁷ Anto chjoin para ixin tti ninchehe xa que are tsí xinajni na, jehe na tatetsjehe na; atto seguro tti janha rrindattjo ra, que mismo xinajni mé tsaouxin xa cinturoen xa jian co tsintte xa na ngain mesa. Co jehe xa tsequia xa comida que sine na. ³⁸ Masqui jehe xinajni mé tsí xa ngosine ttie o are ndoyo, co ninchehe xé xa tatetsjehe na, anto chjoin para ixin ninchehe xa mé. ³⁹ Xaxaon ra cosa jihi, que si xinajni ná nchia rroconohe xa quehe hora rroquí xichehe are ttie, xinajni mé rrogejoaha xa para rrocanchjandaha xa xichehe rroguixinhi xa rroqué xa. ⁴⁰ Jaha ra cai dintte ra listo; ixin janha, tti Xí que joixin de ngajni, sihi iná are jaha ra ni rroxaxaonha ra ixin sihi.

Ná tti ninchehe xa jian, co ná tti ninchehe xa janha

(Mt. 24.45-51)

⁴¹ Cottimeja Pedro joanchiangui ngain Jesús co ndacho:

—¿Acoín ejemplo jihi para ixin janho na, ani para ixin cainxin chojni?

⁴² Jesús ndacho:

—Xaxaon ra quensen tti nchehe xa que ditticaon jian co ttinxin jian tti jiquininxin sinchehe. Mé tti nchehe xa que xinajni rrochjé xa xa de rrochjé tti sine cain ninchehe xé xinajni mé. ⁴³ Anto chjoin para ixin tti nchehe xa que are tsí xinajni, jehe jinchehe inchin vitonhe. ⁴⁴ Ndoa tti rrondattjo ra que xinajni mé rrondacho xa ngain tti nchehe xa mé que jehe senda cain cosa que chonda xa. ⁴⁵ Pero si tti nchehe xa mé sinchesattehe xinchehe xé xinajni mé conixin nchimozé xa, co sehe sine co sihi co rrocoan; ⁴⁶ cottimeja xinajni tsí xa ngain ná nchanho co ngain ná hora que ni jehe noeha, co sinchecastigá xa anto soji inchin tti castigo que sayé cain chojni que ditticaonha Dios.

⁴⁷ Tti nchehe xa que onohé quehe rinao xinajni, pero rinaoha nchehe mé co ncheha inchin tti ttetonha xa, tti nchehe xa mé anto soji sicaon.

⁴⁸ Pero tti nchehe xa que noeha quehe rinao xinajni, co nchehe cosa que jiquininxin castigo, nchehe xa mé icha sojiha sicaon. Tti chojni que dayé icha tsje, rroxanchiehe icha tsje, ixin jehe chonda icha responsabilidad.

Causexin Jesús chjeyaxin chojni

(Mt. 10.34-36)

⁴⁹ Janha joihi inchin ná xohi ngataha nontte para sinttaxante tti xonhi xé co sinttajian tti jian para ixin Dios. ¡Co janha rrojinaho que orrogacaon xohi mé! ⁵⁰ Chonda que atto tangui tsonna, co mé inchin janha siguittexin na ngain cosa tangui. Co janha anto feo tonona hasta tsoenja cain jihi. ⁵¹ Jaha ra puede xaxaon ra que ixin janha joihi para que chojni sicon chó na contenido ngataha nontte jihi. Janha rrindattjo ra que nahí, ixin chojni toñaohé chó na jai ixin joihi janha. ⁵² De jai pa ndaha naho chojni ngain ná nchia rrochjeya na de ixin causananxin janha; ní

na sitticaon na na janha, co yó na sitticaonha na na; o yó na sitticaon na na janha, co ní na sitticaonha na na. ⁵³ Ixin de causananxin janha, ná ndodaha rroningaonhe ndo xenhe ndo, co ná chjan rroningaonhe xan ndodé xan. Ná jannaha rroningaonhe jan n̄chichjehe jan, co xannchí rroningaonhe xan janné xan. Ná jannchaha rroningaonhe jan n̄chideindehe jan, co n̄chideinda rroningaonhe n̄cha jannché n̄cha.

Quexén jí tiempo

(Mt. 16.1-4; Mr. 8.11-13)

⁵⁴ Cai ndačo Jesús ngain chojni:

—Are jaha ra dicon ra que ttjoi čhinxin ttjoi tti diataonxin nchanho, jaha ra ndačo ra que ixin otsí čhin, co jamé ndoa tonhe. ⁵⁵ Co are tjaxin čhintto no sur, jaha ra ndačo ra que sania soa, co ndoa jamé tonhe. ⁵⁶ ¡Jaha ra ncheha ra tti ndačo ra! Jaha ra noha ra datsoenhe ra quehe tsonhe de ngajni co ngataha nontte, ¿co quedonda čhoha datsoan ra tti tsonhe ngain tiempo que te ra jai?

Tsjehe ra quexén nchehe ra para itsoñaoaha ra ngain tti chojni que ningaonha ra

(Mt. 5.25-26)

⁵⁷ ¿Quedonda ttinchieha ra jaha ra mismo cain cosa jian? ⁵⁸ Si ná chojni sičo jie para ixin jaha co tsjiho jaha ngain xijuez, icha jian de ngatjao nttiha tjao chó ra de ixin quexén tsonhe para que jehe itsjioha ngain xijuez. Ixin si nahi, xijuez rrondache xa xipolicía para tsiaxinha xa. ⁵⁹ Co janha rrindattjo que čhoha sačhjexin de nttiha hasta que jaha tsengaja hna cainxin tomi que jaha rrica.

13

Chonda ra que tsentoxinhi ra vidá ra

¹ Ngain rato mé nttiha vintteconchienne canxion chojni ngain Jesús co coequín na ixin Pilato nagoenxon canxion xí de ngain regioen Galilea mero ngain rato que jehe xa tedoen xa coxigo para tedanjo xa ngain Dios. Co nttiha vinttji jní xí mé, tti vinttji jní coxígo. ² Co Jesús ndačo ngain tti chojni que tettequín mé:

—¿Ašaxaon jaha ra que jamé vintteconhe xí tehe ixin icha jianha jehe xa que cain chojni ngain nacioen xa? ³ Janha rrindattjo ra que jaha jamé. Co si jaha ra tsentoxinha ra vidá ra, cain ra ndasitján almá ra. ⁴ ¿O ani šaxaon jaha ra que tti dieciocho chojni que ndavenhe are vetsingatja na tti torre de Siloé, ani nimé icha jianha na que cain chojni que vintte Jerusalén? ⁵ Janha rrindattjo ra que jaha jamé. Co si jaha ra tsentoxinha ra vidá ra, cainxin ra ndasitján almá ra.

Ejemplo tti nttahigo que danjoha ttochjoin

⁶ Cottimeja Jesús coín na ejemplo jiji:

—Ná xí vechonda xa ná nttahigo ngataon jnguihi xa co cjoí xa joitsjehe xa si vanjo ntta ttochjoin, pero šonhi ttochjoin vittja xa ngagaha ntta. ⁷ Cottimeja ndačo xa ngain tti xí que jinda jngui mé: “Tsjexinxin, janha oní nano ttjiji dicjé ttochjoin ngain nttá jiji, co ni ná nttiha dittjaha ttochjoin ngain ntta. Tončhinji ntta: ¿quedonda ša sehe ntta ngataha jnguihna co šonhi ttochjoin danjo ntta?” ⁸ Pero tti xí que jinda jngui mé ndačo: “Soixin, ša ttinttohe ntta iná nano jiji. Janha sinttandanguia

ntta jinche co tsingonguia nnta abono. ⁹ Conixin jamé puede osanjo nnta ttochjoin, pero si nahi, cottimeja tončhinji nnta.”

Are Jesús joinchexingamehe ná nčí ngain tti nchanho que nchejogaha ni

¹⁰ Ná nntiha, ngain tti nchanho que nchejogaha ni, Jesús tajincheoenhe chojni de ixin Dios ngain ná nihngo. ¹¹ Co nntiha vehe ná nčí que venihi ncha ovechonda dieciocho nano. Ná espíritu jianha ndadinchechatto ncha, co jehe ncha ichoha vaxendoa ncha. ¹² Co are Jesús vicon nčí jihi, jehe ndačo ngain ncha:

—Jaha oxingamaha de ixin tti chin que joarichonda.

¹³ Cottimeja jehe coín rá ngataha nčí mé, co ngain rato mé jehe ncha xendoa ncha co coexinhi ncha joinchecoanxinhi ncha Dios. ¹⁴ Pero xittetonha ngain nihngo mé coñao xa ixin Jesús joinchexingamehe nčí mé mero ngain tti nchanho que nchejogaha ni. Mexinxin jehe xí mé ndačo xa ngain cain chojni que te nntiha:

—Semana chonda incjaon nchanho tti jiquininxin doan xa; ngain nchanho mé sihi ra para que tsoxoanha ra co nahi ngain nchanho que nchejogaha ni.

¹⁵ Cottimeja Jesús ndačo ngain xí mé:

—Jaha ra ncheha ra tti ndačo ra, ixin čhonja de jaha ra, ¿atonxindanguheha ra coxinttaha ra o colochoha ra para ttjiho ra va diguihi va jinda nchanho que nchejogaha ni? ¹⁶ Co nčí jihi que jehe ncha razé Abraham ncha, co Satanás diguia ncha conixin chin jihi ochonda dieciocho nano, ¿apoco janha chondaha que tsonxindangá ncha de ixin chin yá ngain nchanho que nchejogaha ni?

¹⁷ Are Jesús ndačo jihi, cainxin chojni que ningaconhe anto cosoé na; co icha chojni anto ché na are vaguicon na milagro anto importante que Jesús vanchehe.

Ejemploe ná tsé que dinhi mostaza

(Mt. 13.31-32; Mr. 4.30-32)

¹⁸ Cottimeja ndačo Jesús:

—¿Quehe cosa nchao sinttacaninxin tti ttetonha Dios? ¹⁹ Mé inchin tsehe ná ca que dinhi mostaza que ttenga ná xí ngain jnguihi xa. Co ca mé dangui ca inchin ná nntá jie, que hasta conttoa que tjanganga nchechjian va caqué va ngagaha rama.

Ejemploe levadura

(Mt. 13.33)

²⁰ Cai ndačo Jesús:

—¿Quehe cosa nchao sinttacaninxin tti ttetonha Dios? ²¹ Mé inchin levadura que ta ngain hariné niottja co nchehe xa hasta nchegatjoe nchoho.

Tti puerta jno

(Mt. 7.13-14, 21-23)

²² Are sacjan Jesús para Jerusalén, jehe joinchecoenhe chojni de ixin Dios ngain rajna co ngain rajnanchjan que vatto. ²³ Co vehe ná chojni que joanchiangui ngain Jesús co ndačo:

—¿Ajeho nchion chojni tti rrochonda iná vida naroaxin?

Co Jesús ndačo:

²⁴ —Nchehe ra de que dixinxin ra ngain puerta jno, ixin rrindattjo ra que tsje chojni sinao na sixinxin na nttiha pero čhoha. ²⁵ Co are tti nchiandoha singattjen co tsejé puerta, cottimeja jaha ra ʒo sittoha ra ndoja, singa ra puerta co rrondačo ra: “Soixin, danttjena ni ra puerta.” Pero jehe rrondačo: “Janha nonaha quettinó joixin jaha ra.” ²⁶ Cottimeja jaha ra tsexinhi ra rrondačo ra: “Janha na tti joine na co vihi na nganji soixin, co soixin tti joinchecoanna ra de ixin Dios ngá nttiha de ngain rajnana na.” ²⁷ Pero jehe rrondačo nganji ra: “Janha otendattjo ra que nonaha ttinó joixin ra. Sattjixin ra de nganji na, ʒo nchehe ra jianha.” ²⁸ Nttiha jaha ra rrotsjanga ra co sinttetaon neno ra are sicon ra que Abraham, Isaac, Jacob, conixin cain profeta tate na ngajni tti ttonha Dios, co jaha ra Dios tsančjandaha ra para sintte ra nttiha. ²⁹ Ixin are mé tsixin chojni de cainxin parte de nontte; de ngain tti čhinxin nchanho, co de ngain tti diataonxin nchanho, co de ngain norte co de ngain sur para sintte na sine na ngain mesa de ngain lugar que ttonha Dios. ³⁰ Are mé tsje chojni que jai jaha importante na, pero are mé jehe na nisintte icha importante; co cain chojni que jai tonohé na ixin anto importante, are mé jehe na jaha importante na.

Jesús tsjanga por ixin Jerusalén
(Mt. 23.37-39)

³¹ Ngain nchanho mé vintteci canxion xifariseo co vinttendačo xa ngain Jesús:

—Sattjixin de nttihi, ixin rey Herodes rinao nasoenxon soixin.

³² Pero Jesús ndačo ngain xa:

—Ttji ra co ndache ra xí mañoso mé, que jai co ndoe sinttaha sigue senguixin espíritu jianha de ngaxinhi cuerpoe chojni, co sinttaxingamá chojni nihi, co rejngui otsjena ʒana. ³³ Pero janha chonda que sinttaha sigue nttiana jai co ndoe co rejngui, ixin cain profeta denxin de ngain Jerusalén.

³⁴ ¡Jaha ciudad de Jerusalén, jaha tti nadoenxon cain profeta co taxin ʒo tti chojni que ttiaho joajné Dios que jehe rroanha nganji! ¡Janha anto tsje nttiha joinaho rrogatse chojnia inchin cochia datse va xenhe va ngangui nenehe va, pero jaha čhoha! ³⁵ Mexinxin tsjexin ra; nchiandoi ra ndasittohe nchia; co rrondattjo ra que irrocjanha ra sicon ni ra hasta que tsjija nchanho que are jaha ra rrondačo ra: “Anto jian tti joí de ngain nombré Dios.”

14

Are Jesús joinchexingamehe ná xí que veninxin chicjan

¹ Ná nchanho que nchejogaha ni, Jesús cjoí joijine ngain nchiandoha ná xittetonha ngain xifariseo, co are mé icha xifariseo tatetsayehe xa Jesús. ² Cai ngattoxon con Jesús tají ná xí que veninxin xa de chicjan. ³ Cottimeja Jesús joanchiangui ngain ximaestroe ley conixin ngain xifariseo:

—¿Ají joachaxin sinchexingamehe ni ná chojni nihi ngain nchanho que nchejogaha ni o ani nahi?

⁴ Pero jehe xa tavinttetencoá xa. Cottimeja Jesús catte tti nihi mé, joinchexingamehe co ndačo ngain ixin satsji jehe tti nihi mé. ⁵ Co ndačo Jesús ngain xifariseo:

—¿Quexehe de jaha ra, si ná colochoha ra o ná coxinttaha ra setsingá va ná pozo, asantsjeha ra va rato mé masqui nchanho que nchejogaha ni?

⁶ Co cain jehe xa čhoha ndačo xa ni ná palabra ngain Jesús.

Chojni que ttji tti tottehe na

⁷ Are vicon Jesús ixin cainxin chojni que cjoí ngain tti cottehe na puro ttinchieho na nttaxintaon icha importante ngain mesa, jehe ndache na janhi:

⁸ —Are ná chojni rrondattjo que tsji ngain ná quiai tti tsottehe na, dariha ngain lugar importante, ixin puede siji iná chojni icha importante que jaha. ⁹ Co tti ndattjo para cjoí jaha conixin jehe tti icha importante mé, nchao siji co rrondattjo jaha: “Danjo lugar que rrichonda ngain iná chojni jihi.” Cottimeja jaha chonda que satsjixin de nttiha conixin joasoaxin para sigarihi ngain tti nttaxintaon icha importanteha. ¹⁰ Mexinxin, are ná chojni rrondattjo que jaha tsji ná quiai, jaha darihi tti lugar icha importanteha, para que are tsí tti ndattjo ixin jaha cjoí ngain quiai mé, jehe nchao rrondattjo: “Amigo, jaha datto ngain iná lugar icha importante.” Jamé jaha tsosayaha ngattoxon con cain chojni que te ngain mesa nttiha. ¹¹ Ixin tti chojni que xaxaon ixin jehe anto importante, chojni mé tsonohe ixin jehe xonhi rentte; co tti chojni que xaxaon ixin jehe xonhi rentte, chojni mé icha tsorentte.

¹² Cai ndačo Jesús ngain tti xí que coetonhe Jesús para que Jesús cjoí ngain quiai mé:

—Jaha are tsín ná vandango ttetoenha jeha xiamigoa, ni jeoha xanchó, ni jeoha niparientea, ni jeoha nivecinoa que chonda tsje tomi, ixin cain chojni jihi nchao tsín na iná vandangoe na co tsetonha na jaha para que tsji sinttecoho na co jamé jehe na otsoncjañaha na tti jehe na joine na ngain vandangoa. ¹³ Mexinxin are jaha tsín ná vandango, cai ttetonhe chojni noa, co tti chojni que čhoha ttingui, co tti chojni rrengo, co tti chojni chejo. ¹⁴ Co jamé Dios sinttanchaon jaha, ixin are rroxechon cain chojni que joinchehe jian, Dios tsjengaha hna jaha ixin jaha joanjo joine tti chojni que čhoha tsjengaha hna jaha.

Ejemploe tti sena que Dios sanjo ngajni

¹⁵ Are vinttequinhi na jihi ná de tti nite ngain mesa ndačo ngain Jesús: —Anto čhjoin para ixin tti chojni que sine niottja nttiha ngain lugar tti ttetonha Dios.

¹⁶ Cottimeja Jesús ndačo ngain chojni mé:

—Ná xí coín xa ná vandango anto jie, co coetonha xa para joiguitonhe anto tsje chojni para rrocji na rrojine na. ¹⁷ Co are ocainxin vehe listo, xí mé rroanha xa ná tti nchehe xé xa para joiquetonhe cain chojni mé ixin onchao jí cain cosa, onchao tsí na para sijine na. ¹⁸ Pero cain chojni mé coexinhi na ndačo na ixin čhoha tsji na. Tti saho ndačo: “Najoexincoa coehna ná nontte, co chonda que tsji sitsjá nontte mé; janha nttatsanha ñao que nchetjañana na ixin tsjinha na.” ¹⁹ Iná ndačo: “Janha ocoehna naho yunta de coxinttá, co tsji para sicon si nchao tsaon va; mexinxin nttatsanha ñao nchetjañana na ixin tsjinha na.” ²⁰ Co iná ndačo: “Janha najoexincoa cottena, co mexinxin čhoha tsjin na.” ²¹ Are tti nchehe xa mé cjan, ndačo cain jihi ngain xinajní. Cottimeja jehe xinajni mé coñao xa co ndačo xa ngain jehe tti nchehe xa mé: “Jaicoa ttji ngain cain nttiha yeye co ngain nttiha nchinnchin de ngain ciudad jihi co

sicohna nttihi chojni noa co tti čhoha ttingui, co tti rrengo, co tti chejo.”²² Nchion después jehe tti nchehe xa mé ndačo: “Ojointtaha inchin soixin coetonna, co ján xa jí icha lugar.”²³ Jehe xinajni mé ndačo xa ngain tti nchehe xé xa: “Ttji ngá nttiha yeje co ngain nttiha nchinnchin de ngandehe ciudad jihi co ndache icha chojni que tsí na, para que rrocaon nchiania.”²⁴ Ixin janha rinaoha sixinhi ní ná de tti chojni que janha coetooan rroquí icha saho para rrojine na.”

Tti tangui que tonhe ni are ditticaon ni Jesucristo

²⁵ Anto tsje chojni rroé na Jesús; co jehe ngaria co ndačo ngain na:

²⁶ —Si čhonja ra rinao ra sitticaon ni ra janha para cainxin tiempo, chonda ra que icha sinao ni ra janha que ndodá ra, o jánná ra, o číha ra, o xanha ra, o xanchó ra, co cai hasta icha que vidá ra. Tti chojni que sincheha jamé čhoha sehe chojnina.²⁷ Jañá tti chojni que sanjoha vidé de ixin causananxin janha, chojni mé čhoha sehe chojnina.²⁸ Si čhonja de jaha ra sinao ra sinchechjian ra ná nchia anto noi, ¿apoco jeha saho rrožaxaon ra quejanhi tomi tsonchjianxin nchia mé, para que tsonoha ra achonda ra cain tomi para tsjexinxin tsonchjian nchia mé?²⁹ Ixin si nahi, puede jeha coín ra base co ndajoexin tomia ra co ijoexinha joinchechjian ra nchia mé. Cottimeja cain chojni que sicon tsexinhi na tsjanao ra na jaha ra,³⁰ co jehe ní mé rrondacho: “Xí jiha coexinxin xa joinchechjian xa nchia co joeha xa.”³¹ O si čhonja rey chonda que rrožanguí guerra ngain iná rey, ¿apoco jeha saho rrožaxaon si nchao conixin tte mil soldado rrochoenxin tti iná rey que tsiaho veinte mil soldado?³² Co si rey mé tsonohe que tsixinha, jehe rrorroanha canxion chojni para que sicao na joajna ngain tti iná rey are jehe jói xa icjion para que itsetoha.³³ Jañá, cai si čhonja de jaha ra tsinttoeha ra cain tti chonda ra, čhoha sintte ra chojnina.

Are xijntta ndarroccjan simple

(Mt. 5.13; Mr. 9.50)

³⁴ Xijntta jehe jian, pero si ndarroccjan simple, ¿quežén rrocjan sonda iná?³⁵ Mé ixonhi xé ní para jinche ní para ngain montoe abono, sino que mé dingo jañao. Jaha ra xo ttinxin ra, ttinhi ra jian.

15

Ejemploe tti coleco que diguitján

(Mt. 18.10-14)

¹ Cain xicobrador de impuesto co xí que nchehe cosa jianha vintteconchienne xa ngaca Jesús para vinttequinhi xa tti jindačo Jesús,² co mexinxin xifariseo co ximaestroey ley feo nichja xa de ixin Jesús, co ndačo xa:

—Xí jihi nchehe xa caso cain chojni que ncheha jian co jinecaho xa na.

³ Cottimeja Jesús coinhi xa ejemplo jihi:

⁴ —¿Quexehe de jaha ra, si chonda ra cien coleco, co sinchetján ra ná va, atsinttoeha ra tti noventa y nueve va ngataon jngui co tsji ra sicjé ra tti co ndavitján, hasta que sinchija ra va?⁵ Co are dinchí ra va, jaha ra chaha ra co tame ra va ngataha nttachán ra⁶ co are daso ra nchiandoi ra, datse ra xiamigoa ra co nivecinoa ra co ndache ra na: “Jai sontte na contento ixin ovittja tti coleco que jointtján.”⁷ Janha rrindattjó ra, que xajeho jañá ngajni cai, Dios conixin cain ángel icha ché ngain ná chojni que jinchehe

jianha are jehe ttentoxinhi vidé, que ngain tti noventa y nueve chojni jian que chojni mé rrongondeha na tsentoxinhi na vidé na.

Ejemploe tti tomi que ditján

⁸Co cai iná ejemplo. Ná nchí chonda tte tomi de plata co joinchetján ncha ná tomi mé. ¿Quehe nchehe ncha? Jehe ncha nchegacaon ncha ná lámpara para ttjexin ncha tomi mé ngoixin ngaxinhi nchia co danjo ncha ngoixin ngaxinhi nchia hasta que dittja ncha tomi mé. ⁹Co are dittja ncha tomi mé, jehe ncha dirroé ncha cain nchiamigué ncha conixin cain nchiveciné ncha co ndacho ncha ngain cain nchí mé: “Janché sontte na contento ixin janha ovittja tti tomi que jointtatján.” ¹⁰Janha rrindattjo ra que xajeho jamé ngajni cai ixin ché cain ángel de Dios are ná chojni que jinchehe jianha tetonxinhi vidé.

Ejemploe tti ná chjan que sacjoixin de ngain nindoha

¹¹Jesús ndacho cai:

—Ná xí vechonda xa yó xenhe xa xanxí, ¹²co tti xan icha nchín ndacho xan ngain ndodé xan: “Padre, chjana tti herencia que jiquininxin na janha.” Cottimeja jehe ndo conchjeyehe ndo cayoi chjan mé herencié xan. ¹³Tsjeha nchanho después, jehe tti xan icha nchín mé joinchecji xan tti nontte que vittoehe xan. Cottimeja conixin tomi mé sacjoixin xan cjin ngain iná nación; nntiha joinchexinxin xan cain tomí xan de ngain nchí co de ngain icha cosa jianha. ¹⁴Co are ondajoehe xan cain tomi mé, anto ndacochjonga tti joine na ngain nación mé, co jehe xan anto vaguenhe xan jintta. ¹⁵Cottimeja sajoiganchia xan xa ngain ná xinajni de ngain nación mé, co xinajni mé joanjo xa xa. Coetonhe xa jehe xan sajoiquingaria xan cocochi ngataon jnguihi xa. ¹⁶Co jehe xan anto vaguenhe xan jintta, hasta que jehe xan joinao xan rrojine xan ná tipo de raja que dinhi algarroba que vajine cocochi, pero xonhi chojni vachjé xan cosa mé. ¹⁷Cottimeja xaxaon xan co ndacho xan: “¡Anto tsje ninchehe xa chonda ndodana! ¡Co jehe na chonda na tti jine na hasta xehe, co nntihi janha ndasenxin na jintta! ¹⁸Icha jian janha sarrocjan na tti jí ndodana co rrondattjan ndo: Padre, janha jianha jointtaha ngain Dios co nganji soixin. ¹⁹Janha ijiquininxinha na sinhi na xanha soixin; jeha dayehna na inchin ná de ninchehe xá.” ²⁰Co jamé joinchehe xan; coá xan nntiha para sacjan xan ngain nchiandoha ndodé xan.

‘Xa icjion joiji xan vicon ndodé xan que jitonchienhe xan, jehe ndo coiaconoehe ndo xan. Co coinga ndo cjoí ndo vichoenxin ndo xan ngatja nntiha co cjóa ndo xan co coetoxin ndo xan. ²¹Cottimeja jehe xan ndacho xan ngain ndodé xan: “Padre, janha jianha jointtaha ngain Dios co nganji soixin; janha ijiquininxinha na sinhi na xanha soixin.” ²²Pero jehe ndodé xan ndacho ndo ngain ninchehe xé ndo: “Jaca sicohna ra tti lonto icha jian co ttentoxinna ra xanhna jihi; co cai ttengaha ra ná cochianingo dedoe xan, co nchecjanga ra xan jian tteroa. ²³Sicó ra tti coxinttachjan que jointtanttao co doenhe ra va. ¡Sontte na co sontte na contento! ²⁴Ixin xanhna jihi ondavenhe xan de ngattoxon con na, co jai cjan xechon xan. Ondavitján xan co xa cjan na jonttó na xan.” Co coexinhi na joinchecjhan na comida para joine na.

²⁵Co are mé tti xansaho ngataon jngui jí xan. Co are ocjan xan co joí xan chiaon nchia, coinhi xan són co coinhi xan ixin tette na. ²⁶Cottimeja vayé xan ná de tti ninchehe xa que te nntiha para joanchianguihi xan

quehe jí nttiha. ²⁷ Jehe tti nchehe x̄a mé ndācho: “Joí xanchó, co ndodá coetonha ndo venhe tti coxinttachjan que cjonttao ixin joí xanchó co x̄onhi tti nihi xan.” ²⁸ Pero tti xansaho mé coñao xan, co ixin çhoaha xan vixinhi xan nchia, jehe ndodé xan chonda ndo que vaçhe ndo para joinchetsenhe ndo ñao xan ixin rroguixinhi xan nchia. ²⁹ Co jehe xan ndācho xan ngain ndodé xan: “Soixin noha quejanhi nano janha rrinttaha x̄a nganji, co cainxin tiempo janha vitticanho cain tti ttetonna na, pero soixin x̄onhi tiempo chjaha ni ná cochivatochjan para rrogonhe rrojinequinha xiamigona. ³⁰ Pero jai joí xanha jihi, que joinchexincoa xan tomia de ngain nchí que nhecji cuerpoe, co jai soixin gonhe para ixin jehe xan tti coxinttachjan jitjonttao.” ³¹ Cottimeja ndodaha mé ndācho ndo ngain xan: “Hijo, jaha cainxin tiempo rrihi nganji na, co cainxin cosa que chonda janha, mé cosá jaha. ³² Pero jai atto jiquinixin tsín ná vandango co sontte na contento, ixin xanchó que inchin ondavenhe xan, pero para ixin ján na jai cjan xechon xan. Co jehe xan ondavitján xan, pero para ixin ján na jai jonttó na xan.”

16

Ejemploe ná xivaquetonha ngain ná rancho

¹ Jesús ndācho cai ngain tti chojni que vacao:

—Vehe ná xí rico que vechonda xa ná xivaquetonha ngain ranchoe xa pero cjoí na joindache na xinajni mé que ixin xinchehe x̄a mé jinhexincoa xa tomí xinajni. ² Cottimeja xinajni mé vayé xa jehe tti nchehe x̄a mé co ndache xa: “¿Aco ndoa tti joindachjenji na chojni de ixin jaha que ixin rrittena na? Ndachjenji na quexén jí cuenta co quejanhi x̄a jaha joexin, ixin jaha isincheha sigue tsetonha ngain x̄ana.” ³ Cottimeja tti vaquetonha mé x̄axaon: “¿Quexén sinttaha jai ixin xinajnina irrochjanaha xa x̄a sinttaha? Janha itsangaha na para sinttaha x̄a ngataon jnguí, co chjana joasoaxin para sanchiagaha. ⁴ Onona quexén sinttaha para rrochonda amigo tti sayehna ngain nchiandoha are janha ix̄onhi x̄a rrochonda.” ⁵ Cottimeja tti vaquetonha mé vayé cada chojni que teca ngain xinajni. Ngain tti saho joanchianguihi: “¿Jaha, quejanhi rrica ngain xinajnina?” ⁶ Co jehe ndācho: “Janha rrica ngain xa cien barril de aceite de oliva.” Jehe tti vaquetonha mé ndācho: “Nttihi jí nota tti jitaxin. Ttinchje co jaca nchechjian iná nota jeho de cincuenta barril.” ⁷ Después, jehe tti vaquetonha mé joanchiangui ngain iná de tti jica ngain xinajni mé: “Co jaha, ¿quejanhi rrica ngain xinajnina?” Co jehe ndācho: “Cien medida de trigo.” Cottimeja jehe tti vaquetonha mé ndācho: “Nttihi jí nota tti jitaxin. Jaha ttinchje co jaca nchechjian iná nota que setaxin jeho ochenta medida.” ⁸ Co jehe xinajni mé joatsoan xa que jehe tti vaquetonha ngain x̄é xa mé atto listo vehe para x̄axaon quexén joinchehe. Ixin chojni que ditticaonha ngain Dios icha daca para nchehe na cosa jianha, co chojni que ditticaon ngain Dios icha yao para nchehe na cosa jian.

⁹ Janha rrittetonha ra, que ttjenguijna ra icha chojni conixin tomia ra para que chojni mé sintte amigoa ra. Co are ondatsjexin tomia ra nttihi ngataha nontte sehe quensen sayaha ra nttiha ngajni.

¹⁰ Tti chojni que dicao cuidado are tsjeha chonda, cai sicao cuidado are rrochonda tsje; co tti chojni que dicaoha cuidado are tsjeha chonda, cai sicaoha cuidado are rrochonda tsje. ¹¹ Mexinxin si jaha ra ttjioha

ra cuidado ngain tti tomi que jaha ra chonda ra ngataha nontte jianha jihi, ¿quensen rrochonda confianza nganji ra para sayehe ra tti icha rentte que jí ngajni? ¹² Si jaha ra ttjioha ra cuidado ngain cosé iná chojni, Dios rochjaha ra cosa que jiquininxin ra.

¹³ Xõhni ncinchehe xã nchao sinchehe xé yó xinajni ngain nacoa tiempo, ixin icha sinao ná xinajni co rroningaconhe iná xinajni, o icha sitticaon ngain ná xinajni co ngain iná xa isincheha caso. Jañá cai çhoaha sinao ni tomi co sinao ni Dios ngain nacoa tiempo.

¹⁴ Xifariseo anto vaquiaconhe xa tomi, co jehe xa tatettinhi xa cain jihi, co cjoanoa xa Jesús. ¹⁵ Cottimeja Jesús ndaço ngain xa:

—Jaha ra para ngattoxon con chojni nchehe ra que ixin atto jian ra, pero Dios chonxin ngain ansean ra. Ixin tti tonohé chojni que anto importante cosa que jehe chonda, Dios ncheha caso ngain cosa mé.

Ley que vayé Moisés co tti ttetonha Dios

¹⁶ Hasta ngain tiempo que Juan, tti vancheguitte chojni, joiddache chojni de ixin Dios, ley que vayé Moisés conixin cain tti dindaço cain profeté Dios vechonda joachaxin para vaquetonhe chojni. Desde ngain tiempo mé para ndahi nchenohe na chojni tti jian joajna de ixin queçén ttetonha Dios ngain ansén chojni. Co tsje chojni anto rinao na rrochonda na parte ngain tti ttetonha Dios.

¹⁷ Pero masqui jamé icha tanguiha sitján ngajni co nontte, que tsoenha inchin jitaxin cainxin ngain ley mé.

Jesús ndaço de ixin xí que dachjendehe çhihi

(Mt. 19.1-12; Mr. 10.1-12)

¹⁸ Si ná xí saçhjendehe xa nçhiçhihi xa co secoa xa iná nçhi, xí mé jianha sinchehe xa ixin xí mé inchin xí que jicao ná nçhi que jaha nçhiçhihi xa. Co tti xí que después decao ná nçhi que digachjendehe nça xixihi nça, xí mé cai jianha nchehe xa ixin jehe inchin xí que joantsjehe iná xí nçhiçhihi xa.

Tti xí rico conixin Lázaro

¹⁹ Vehe ná xí rico que vaguengá xa joxon lontto rentte, co cain nchanho vaquín xa jie vandango. ²⁰ Cai vehe ná xí noa que vinhi Lázaro que vechonda xa anto tton ngain cuerpoe xa co tavaguehe xa ngandangú nchiandoha jehe xirrico mé, ²¹ ixin jehe xinoa jihi joihao xa rrojine xa tti vaxexin vane jehe xirrico mé. Co hasta conia vaconchienne para vagoni va tton que vechonda xa ngain cuerpoe xa. ²² Ná nchanho tti xinoa mé ndavenhe co ángel de Dios sajoicoa para joiguehe ngain tti jí Abraham ngain tti lugar tti ttji cain chojni jian. Cai tti rico mé ndavenhe co cjoavá na. ²³ Co are tti rico mé vetan tangui ngain infierno, jehe tsjehe para noi, co de cjin viconxin Abraham conixin Lázaro. ²⁴ Cottimeja jehe tti rico mé coyao co ndaço: “Padre Abraham, nttatsanha ñao ttiacoanoa na janha, co rroanha Lázaro para que sinchetjao masqui jehõ con dedoe conixin jinda, co tsí sinchetjao neje na janha, ixin anto tangui tonna ngatte xõhi jihi.” ²⁵ Pero Abraham ndaço ngain tti rico mé: “Hijo, xaxaon que jaha anto jian joarihi ngoi tiempo que jaha joarichon ngataha nontte, co Lázaro anto tangui conhe are jehe vechon ntiiha. Jai jehe dayé consuelo nntihi co jaha rridetan tangui jaxon. ²⁶ Co cai jí ná tsaga anto nihnga ngayá na janha na co jaha ra. Mexinxin tti chojni que te nntihi que rinao siji para tti te ra, çhoaha siji; co tti chojni

que te yá çhoha tsí na nttihi tti te janha na.”²⁷ Cottimeja ndaço tti rico mé: “Mexinxin padre Abraham, nttatsanha ñao que rroanha Lázaro para ngain nchiandoha ndodana²⁸ tti te naho xanchian xanxí, para que sinchenohe xan queñén sinchehe xan para que jamé jehe xan tsiha xan nttihi ngain lugar jiji tti detan ni tangui.”²⁹ Pero Abraham ndaço ngain tti rico mé: “Xanchó chonda xan tti xón tti jitaxin tti dicjin Moisés co tti dicjin cain profeta. Si jehe xan sinchehe xan caso tti ndaço xón mé, jehe xan sijiha xa yá tti rrihi jaha.”³⁰ Jehe tti rico mé ndaço: “Ján, padre Abraham, pero si ná chojni que ondavenhe co rrocjan tsji siquetonhe xan, ján jehe xan tsentoxinhi xan vidé xan.”³¹ Pero Abraham ndaço ngain: “Si rinaoha xan sinchehe xan caso tti diquetonha Moisés, co tti dindaço cain profeta, cai sitticaonha xan are sicon xan ná tti ondavenhe roxechon iná.”

17

Tti sinchenchehe ni cosa jianha

(Mt. 18.6-7, 21-22; Mr. 9.42)

¹ Jesús ndaço ngain tti chojni que vacao:

—Ngataha nontte jiji cain tiempo sehe cosa que sinchenchehe chojni tti jianha, pero janto tangui tsonhe tti chojni que sincheyehe iná chojni para sinchehe jamé!² Icha jian si chojni mé rroqueçhianito ná xoçhin ttosin co rroguetsingangui ndachaon, que sinchecanttjen chojni tehe ngain cosa jianha.³ Tjiho ra cuidado jaha ra.

’Si ná chojni que ditticaon nganji na janha sinchehe jianha nganji jaha, nchesattehe; co si tsentoxinhi vidé, nchetjañehe.⁴ Masqui chojni mé yáto nttiha sinchehe jianha nganji jaha ngain nacoa nchanho, co yáto nttiha tsí sindattjo: “Irrocjanha na sinttaha jamé”, jaha chonda que sinchetjañehe.

Tti joachaxin que chonda chojni que ditticaon Dios

⁵ Co cain representanté Jesucristo ndaço na ngain Jesús:

—Ttjenguijna ni ra para que sitticanho na icha nganji.

⁶ Cottimeja Jesús ndaço ngain na:

—Si tti ditticaon ra jiexin rroquehe inchin ná tsehe ca dinhi mostaza, jaha ra nchao rrondache ra nttasicómoro jiha: “Jaha daçhjenguixin de yá, co sadixenga ngangui ndachaon”, co nttá yá rrojinchehe nta jamé.

Tti jiquinixin nchehe ná tti nchehe xa

⁷ Si ná de jaha ra chonda ra ná tti nchehe xa co ttixin de ngataon jngui después de joigueca yunta o joiquingaria coleco ngoixin nchanho, çapoco ndache ra: “xacoí darihi jintte”?⁸ Nahi, jaha ra ndaçocho ra jamé, sino que ndache ra tti nchehe xa mé: “Nchechjianna tti sine, co darihi listo sicohna cain tti sinaho are janha rrine co rridihi. Cottimeja jaha nchao sintte co sihi.”⁹ ¿Co apoco jaha ra ndaço ra ngain tti nchehe xa mé: “Dio rrotsjengaha hna”? Nahi, ixin jehe jehó joinchehe tti jaha coetonhe jehe.¹⁰ Jamé jaha ra cai, are tsjexin sinchehe ra cain tti ttetonha Dios, chonda ra que rrondaço ra: “Ján na ninchehe xa que xonhi rentte, ixin jointtoho na jehó tti jiquinixin sonttoho na.”

Are Jesús joinchexingamehe tte chojni que vinttechonda lepra

¹¹ Are Jesús joinchehe sigue viajé para Jerusalén, jehe vatto ngain regioen Samaria co Galilea.¹² Are joiji na chiaon ngain ná rajna,

ngandehe rajna mé te tte xí que teninxin chin lepra co joichoexin xa Jesús ngatja nttiha pero xa icjin de jehe tavinttengattjen xa ¹³ co vinttendačo xa sén:

—Jesús, Maestro, ttiaconoana ni ra janha na!

¹⁴ Are Jesús vicon cain xí mé jehe ndačo ngain xa:

—Sattji ra co dicjagohe ra xidána que ixonhi chin chonda ra.

Co are satettji xí mé, chinhi xa ndavitján chin. ¹⁵ Cottimeja ná de jehe xa are vicon xa que ixonhi chin jichonda xa, sacjan xa co coyao xa co joinchecoanxinhi xa Dios. ¹⁶ Co vettoxin nttajochjihi xa ngain Jesús, co visé xa hasta tti ngataha nontte, para que joanjo xa gracias ngain Jesús. Co xí mé Samaria nonttehe xa. ¹⁷ Cottimeja ndačo Jesús:

—¿Apoco jeha tte xí que xingamehe xa de ixin chinhi xa? ¿Quettinó te tti icha xí? ¹⁸ ¿Ajeha xí jihi que joixin iná nontte tti cjan para joinchecoanxinhi Dios?

¹⁹ Cottimeja ndačo Jesús ngain xí mé:

—Dingattjen co sattji; jaha ondaxingamaha ixin vitticaonna.

Quehe tsonhe icha saho que tsí tti Xí que joixin de ngajni

(Mt. 24.23-28, 36-41)

²⁰ Cain xifariseo joanchiangui xa ngain Jesús ixin quesa tsí tti ttetonha Dios, co Jesús ndačo ngain xa:

—Are tsí tti ttetonha Dios, mé jeha cosa que nchao sicon ni. ²¹ čhoha rrondačo ni: “Nttihi jí”, o “Nojiha jí”, ixin tti ttetonha Dios ojí ngayaha ra.

²² Cottimeja ndačo ngain tti chojni que vacao:

—Tsí tiempo are jaha ra sinao ra que janha, tti Xí que joixin de ngajni, sarihi nganji ra masqui nacoa nchanho, pero janha íčhoha sarihi nganji ra. ²³ Co masqui rrondattjo ra chojni que nttihi rrihi janha o nojiha rrihi, pero jaha ra ditticaonha ra tti jehe na rrondačo na, ni ttjiha ra tti jehe na rrondačo na. ²⁴ Ixin jañá inchin dicon ni xoí rayo de ná lado hasta iná lado de ngajni, jamé tsonhe ngain mero nchanho que janha, tti Xí que joixin de ngajni, sihi iná. ²⁵ Pero saho chonda que anto tangui tsonna co chojni de ngain tiempo jihi rrondačo na ixin janha xonhi rentte na. ²⁶ Inchin conhe ngain tiempo que vechon Noé, jamé tsonhe cai are janha, tti Xí que joixin de ngajni, sihi iná. ²⁷ Ngain tiempo que Noé vechon, xonhi chojni vitticaon ixin toin ndasitján mundo, mexinxin vanchehe na sigue vane na co vaguihi na co vacottehe na co vaganjo na xenhe na xannčí para vacottehe xan hasta ngain tti nchanho que Noé vixinhi arca co jói jinda para ndagoen cainxin chojni. ²⁸ Jamé conhe cai ngain tiempoe Lot. Are mé cain chojni vanchehe na sigue vajine na co vaguihi na, vaquehna na co vanchecji na, vanchehe na xa ngataon jngui co vanchecjian na nchia. ²⁹ Pero are Lot vačhjexin de ngain ciudad de Sodoma, vingoxin xohi co azufre de ngajni, co ndagoen cainxin chojni nttiha. ³⁰ Jamé sinchehe chojni sigue de rrořaxaonha na de ixin Dios are janha, tti Xí que joixin de ngajni, sihi iná.

³¹ Ngain nchanho mé si čhonja chojni sintte ngataha nchia noi, co chonda cosé ngaxinhi nchia mé, ni rrochjeha tiempo para sania sicá cosé. Co si čhonja chojni sintte ngataon jngui, rrochjeha na tiempo para rrocjan na nchiandoha na. ³² řaxaon ra quehe conhe čihi Lot. ³³ Tti chojni que rinao xonhi tsonhe vidé, mé ndasinchetján vidé, pero tti chojni que sinchetján vidé, mé rrochonda iná vida naroa.

³⁴ Janha rrindattjo ra, que ngain ttie mé, si yó chojni tejoa ngataha nacoa saon, ná rrochonda iná vida naroaxin co ná nahi. ³⁵ Co ngain rato mé, si yó nčí tedaho ncha, ná ncha sayá ncha co iná ncha nahi. ³⁶ Co si yó xí tenchehe xa xa ngataon jngui, ná xa ján sayá xa co iná xa nahi.

³⁷ Are chojni coinhi jihi, joanchiangui na ngain Jesús co ndačo na:

—¿Quettinó tsoenxin cain jihi?

Co Jesús ndačo:

—Tti sarihi janha, nttiha rrožatte chojnina.

18

Ejemploe tti ná nchiganha co ná xijuez jianha

¹ Jesús ndache tti chojni que vacao ná ejemplo para joinchecoene na ixin chonda na que sinchetsenhe na ñao Dios cain tiempo co chondaha na que soan na desanimado. ² Jehe ndačo ngain na:

—Ngain ná rajna vehe ná xijuez que vechondaha xa respeto ngain Dios, ni ndosenha xa de icha chojni. ³ Ngain rajna mé vehe ná nchiganha cai que vacji ncha ngain xijuez jihi para vaganchia ncha jie para ixin tti chojni que vaquetocaho ncha. ⁴ Anto sé co xijuez jihi čhoja xa joinchehe xa jie ngain nčí mé, pero después xaxaon xa: “Masqui janha chondaha respeto ngain Dios ni ndosennaha de icha chojni, ⁵ pero ixin nchiganha jihi nchehe ncha sigue nchemolestá na ncha, janha tsjenguijna ncha para que isincheha ncha sigue tsí ncha co ndatsjehe ncha pacienciana.”

⁶ Co Jesús ndačo:

—Jihi tti ndačo xijuez jianha. ⁷ Co ¿apoco Dios tsjenguijnaha cain tti chojni que jehe coinchiehe que nchetsenhe na ñao jehe de nchanho co de ttie? ¿Apoco jehe tsončjenhe para tsjenguijna na? ⁸ Janha rrindattjo ra ixin jehe tsončjenha de tsjenguijna cain chojni mé. Pero are janha, tti Xí que joixin de ngajni, sihi iná, ¿axa sittja chojni que ditticaon na janha nttihi ngataha nontte?

Ejemploe xifariseo co xicobrador de impuesto

⁹ Jesús ndačo iná ejemplo para ixin tti chojni que tonoho ixin jeho tti anto jian, co xaxaon na ixin icha chojni xonhi rentte. Jesús ndačo:

¹⁰ —Yó xí cjoí xa ngain nihngo icha importante para joinchecoanxinhi xa Dios. Ná xa fariseo xa, co iná xa cobrador de impuesto xa. ¹¹ Xifariseo mé tavengattjen xa joinchecoanxinhi xa Dios, co ndačo xa janhi: “Oh Dios, janha chjaha gracias ixin janha jeha inchin canxion chojni que jehe na chehe na, co nchehe na icha cosa jianha, co chonda na tsje nčí, co janha ni jeha inchin xicobrador de impuesto jihi. ¹² Janha tocjáño na yó nttiha ngain semana, co janha danjo para ixin soixin ná tti ttxin parte de cain tti janha dacha.” ¹³ Pero xicobrador de impuesto vittohe xa cjinxin, co jehe xa ninchin tsinha con xa para rrotsjehe xa ngajni, sino que xanguí xa tton pechoe xa co ndačo xa: “¡Oh Dios, nttatsanha ñao ttiacoana na ixin janha anto jianha jointtaha!”

¹⁴ Cottimeja Jesús ndačo:

—Janha rrindattjo ra que are xicobrador de impuesto jihi sacjan xa nchiandoha xa, Dios ojoinchetjañehe xa cain tti jianha que jehe xa joinchehe xa, pero xifariseo nahi. Ixin tti chojni que tonoho que jeho tti icha jian, pero ngain tti nchanho que Dios sinchejuzguehe cain chojni,

chojni mé xonhi rentte na, co tti chojni que jai tonohé que jehe xonhi rentte, are mé Dios sinchesayehe chojni mé.

Jesús joinchenchaon xannchinnchinchjan

(Mt. 19.13-15; Mr. 10.13-16)

¹⁵ Cai tsje chojni vaquiaho na xannchinnchinchjenhe na ngain Jesús para que vacatte xan, pero are tti chojni que vacao Jesús vicon na jiji, coexinhi na joinchesattehe na tti chojni que vaquiaho xannchinnchinchjan mé. ¹⁶ Pero Jesús ndache xannchinnchinchjan mé ixin icha tsonchienhe xan ngain co Jesús ndačo ngain chojni que vacao:

—Tančhjana ra que xannchinnchinchjan tsí xan nganji na janha, co cayacoenha ra xan ixin tti ttetonha Dios, mé para ixin tti chojni inchin jehe xannchinnchinchjan. ¹⁷ Atto ndoa tti rrindattjo ra que tti chojni que sitticaonha tti ttetonha Dios inchin ná xannchinchjan ditticaon xan tti ttetonhe xan nindoha xan, chojni mé xonhi tiempo rrochonda parte ngain tti ttetonha Dios.

Ná xí rico cjoao xa Jesús

(Mt. 19.16-30; Mr. 10.17-31)

¹⁸ Ná xí importante para ngain chojni judío joanchiangui xa ngain Jesús co ndačo xa:

—Maestro, soixin que anto jian, ¿quehe icha sinttaha janha para rrochonda iná vida naroaxin que xonhi tiempo tsjexin?

¹⁹ Jesús ndačo ngain xa:

—¿Quedonda ndačo jaha que janha jian na? xonhi iná tti jian, jeho nacoaxinxon, co mé Dios. ²⁰ Jaha onoha cain mandamiento de Dios que ndačo: “Ncheyeha čihi iná chojni, dantsjeha vidé iná chojni, tteha cosé iná chojni, nichjaha cosa ndoaha de iná chojni, co ttijho respeto ngain ndodá co ngain janná.”

²¹ Jehe tti xí mé ndačo:

—Cain yá janha rrinttaha desde are xa nchín na.

²² Are coinhi Jesús jiji, jehe ndačo ngain xa:

—Jaha xa nchetján sinchehe nacoa cosa. Nhecji cain tti chonda co tonchjeyehé chojni noa tomi; jamé ngajni jaha rrochonda cosa icha rentte. Cottimeja sihi para sacjin na tti janha sacji.

²³ Pero are xí mé coinhi xa jiji, anto vechín xa ixin anto rico vehe xa. ²⁴ Are vicon Jesús ixin anto vechín xa jehe ndačo:

—¡Atto tangui para que chojni rico rrochonda na parte ngain tti ttetonha Dios! ²⁵ Icha tanguiha para ixin ná cocamello sattoxinhi va ttoechjenhe ná nttachiehe manta que para chojni rico rrochonda na parte ngain tti ttetonha Dios.

²⁶ Co cain tti nicoinhi jiji ndačo na:

—Mexinxin, ¿quensen nchao rrochonda iná vida naroaxin remé?

²⁷ Jesús ndačo ngain na:

—Tti čoha sinchehe chojni, Dios nchao sinchehe.

²⁸ Pedro ndačo ngain Jesús:

—Janha na cointtoa na cain tti joichonda na para que jai čhjin na soixin.

²⁹ Cottimeja Jesús ndačo:

—Atto ndoa tti rrindattjo ra que quexeho chojni que ttinttohe nchian-doha, o ndodé, o janné, o xanchó, o čihi, o xenhe para sindache icha

chojni de ixin quežén ttetonha Dios ngain ansén ni, ³⁰ chojni mé ngataha nontte nttihi sayé na anto icha tsje cosa, co ngain mundo que tsí sayé na vida naroaxin que xonhi tiempo tsjexin.

Jesús cjan ndačo iná ixin jehe ndasenhe

(Mt. 20.17-19; Mr. 10.32-34)

³¹ Jesús joantsjenda tti tteyó chojni que vacao co ndačo ngain na:

—Jai jaha ra onoha ra que satettjin na para Jerusalén. Nttiha tti tsoenxin cainxin tti dindačo cain profeta de ixin janha, tti Xí que joixin de ngajni. ³² Chojni nttiha sanjo na na janha ngain chojni que jeha judío co jehe na tsjanoa na na, co feo rronichja na de ixin janha, co tsjatjo na na nttatté na. ³³ Sicaon na janha co después nasoenxon na na. Pero ngain nchanho ninxin janha rroxechon na.

³⁴ Jehe tti tteyó chojni que vacao Jesús xonhi coinxin na de ixin jihi, ni venoeha na de ixin tti ndačo Jesús, ixin para ixin jehe na jihi ná cosa que čhoha coinxin na.

Are Jesús joinchexingamehe ná tti xí que čhoha vaguicon de ngain Jericó

(Mt. 20.29-34; Mr. 10.46-52)

³⁵ Are Jesús conixin tti chojni que vacao ochiaon tediji na ciudad de Jericó, ná tti xí que čhoha vaguicon tají ngandehe nttiha jidanchiagaha.

³⁶ Are jehe xa coinhi xa que nttiha tedatto tsje chojni, joanchiangui xa ixin quehe conhe. ³⁷ Icha chojni ndache xa na que ixin Jesús de Nazaret jidatto nonttiha. ³⁸ Cottimeja jehe xa ndačo xa sén:

—Jesús, tti razé David, co tti chonda joachaxin que vechonda rey David, ttiaconoana na janha!

³⁹ Tti chojni que tetaon nttiha joinchesattehe xa para que rrotencoaxa, pero jehe xa ndačo xa icha sén:

—jSoixin, tti razé David, co tti chonda joachaxin que vechonda rey David, ttiaconoana na janha!

⁴⁰ Cottimeja Jesús tavengattjen co coetonha para que joiaho na ngain Jesús jehe tti vaguiconha mé. Co are ojoí ngaca Jesús, jehe Jesús joanchiangui ngain jehe tti vaguiconha mé co ndačo:

⁴¹ —¿Quehe rinao sinttaha janha nganji?

Jehe tti vaguiconha mé ndačo:

—Janha rinaho que nchao sicon.

⁴² Jesús ndačo:

—jJán, jaha onchao dicen! Jaha oxingamaha ixin vitticaon na janha.

⁴³ Ngain rato mé jehe tti vaguiconha mé onchao vicon, co sarroé tti sacjoi Jesús, co joinchecoanxinhi Dios. Co cain chojni que vicon jihi cai joinchecoanxinhi na Dios.

19

Are Jesús vetan Zaqueo

¹ Cottimeja Jesús conixin chojni que vacao ojoigaha na ciudad de Jericó co vattogaha na ciudad mé. ² Co nttiha vehe ná xí rico vinhi Zaqueo. Xí mé vaquetonha ngain cain xicobrador de impuesto, ³ co jehe Zaqueo joinao joatsoan Jesús. Pero čhoha vicon Zaqueo Jesús ixin anto tsje chojni tettji ngaca Jesús co Zaqueo atto nchín vehe. ⁴ Cottimeja jehe Zaqueo coinga vitaon nttiha, co para que nchao vicon Jesús, jehe Zaqueo coani

ngagaha ná nttá dinhi sicómoro chiaon de tti vatto Jesús. ⁵ Are Jesús vatto nonttiha, jehe tsjehe para noi tti jí Zaqueo co ndaço:

—Zaqueo, jaicoa danianxin de yá ixin jai janha chonda que sittona nchiandoi.

⁶ Cottimeja Zaqueo jaicoa vanianxin de nttiha co anto ché ixin Jesús cjoí nchiandoha. ⁷ Are icha chojni vicon na jiji, cain na coexinhi na nichja na feo de ixin Jesús, co ndaço na que ixin Jesús cjoí joiguittohe ngain nchiandoha ná xí que jinchehe jianha. ⁸ Cottimeja Zaqueo vingatjen co ndaço ngain Jesús:

—Tsjexinxin, soixin, janha rrochjaha chojni noa ngosinenxin de cainxin cosa que janha rrichonda. Co si çhonia chojni jointtayá para coehe tomí, janha tsoncjañá chojni mé nó nttiha icha tsje que tti janha coehe.

⁹ Jesús ndaço ngain Zaqueo:

—Jai Dios rroanha iná vida naroa ngain xí de nchia jiji. Co jehe xa razé Abraham xa cai. ¹⁰ Ixin janha, tti Xí que joixin de ngajni, joihi para joicjé co joichjaha vida naroa tti chojni que ondavitján de ngain cosa jianha.

Ejemploe tti tte tomí que anto rentte

¹¹ Are chojni ça tettinhi na Jesús jindaço cain cosa jiji, jehe ndaço ná ejemplo ngain na ixin jehe ochiaon jidiji ngain Jerusalén, co jehe na çaxata na que are Jesús siji nttiha, Dios rroquexinhi rroquetonha nttihi ngataha nontte de ixin jehe Jesús. ¹² Mexinxin jehe ndaço ngain na:

—Vehe ná xí importante que sacjoi xa cjin ngain iná nación para joigayé xa joachaxin de sehe xa rey ngain nonttehe xa, co después cjan xa ngain nonttehe xa. ¹³ Saho de sacjoixin xa de ngain nonttehe xa jehe xa vayé xa tte de ninchehe çé xa para joanjo xa ngain cada na naná tomí que anto rentte, co ndaço xa ngain na: “Nchehe ra negocio conixin tomí jiji hasta que janha rrocjan na sihi.” ¹⁴ Pero chojni de ngain nonttehe xa nttiha vacoñao na ngain xa, co rroanha na chojni para joicao na joajna jiji: “Rinaoha na que xí jiji sehe xa rey para ixin janha na.” ¹⁵ Pero jehe xa vayé xa joachaxin de vehe xa rey, co cjan xa para nonttehe xa. Co are jehe xa ongain nonttehe xa, vayé xa tti tte chojni que joinchegayé xa tomí para conohe xa quejanhi joacha na cada na. ¹⁶ Tti saho conchienne co ndaço: “Tti ná tomia que soixin çjana joacha tomí, itte tomí.” ¹⁷ Jehe rey mé ndaço: “Atto nchao jí; jaha atto jian ná ninchehe ça. Jaha cjoí jian ninchehe ça de ngain tti tomí que çjaha masqui tsjehe, mexinxin jai janha rrochjaha joachaxin de tsetonhe tte rajna.” ¹⁸ Cottimeja conchienne iná co ndaço: “Tti ná tomia que soixin çjana joacha tomí, inaho tomí.” ¹⁹ Cai ngain chojni jiji ndaço rey mé: “Jaha tsetonhe naho rajna.” ²⁰ Cottimeja conchienne iná co ndaço: “Nttihi jí tomia que çjana soixin. Janha coenchjinha tomí ngá ná paníto ²¹ ixin janha çagonha soixin ixin soixin ná xí que atto soji de ngain ansén, que dantsjehe chojni tti soixin danjoha, co jamé tsinhi cosecha de tti soixin ttengaha.” ²² Cottimeja rey mé ndaço: “Jaha jianha ninchehe ça ixin jaho ndaço que ixin janha soji ansenna. Si onoha que janha soji na de ngain ansenna, co ixin dantsjá chojni tti janha danjoha co jamé janha ttjejo cosecha de tti janha ttengaha, ²³ mexinxin çquedonda joicanha jaha tomina ngain ná banco para que janha rrogayá tomina conixin tti rrogacha tomí are janha rrocjan na nchiania?” ²⁴ Co ndaço rey mé ngain tti chojni que te nttiha: “Dantsjehe ra xa tomí co danjo ra

tomi ngain xí que chonda tte tomi.” ²⁵ Co jehe na ndačo na: “Pero chojni mé ochonda tti tte tomi.” ²⁶ Rey mé ndačo: “Janha rroundattjo ra que tti chojni que ochonda, sayé icha, pero tti chojni que xonhi chonda sačheje hasta tti nchion que chonda. ²⁷ Co cain tti chojni que ningaconna, que mé joinaoha na para que janha rrogarihi rey ngain na, sicohna ra na nttihi co nadoenxon ra na ngattoxon con janha.”

Are Jesús joigaha ciudad de Jerusalén
(Mt. 21.1-11; Mr. 11.1-11; Jn. 12.12-19)

²⁸ Después de ndačo Jesús cain jihi, jehe joinchehe sigue sacjoi para Jerusalén. ²⁹ Are ochian joihi na ngain rajna Betfagé co Betania, chiaon ngain tti jnanchjan que dinhi Nttaolivo, Jesús rroanha yó de tti chojni que vacao, ³⁰ co jehe ndačo ngain tti yó chojni mé:

—Ttji ra ngain rajnanchjan que jí chiaon jihi, co are saso ra nttiha sinchí ra ná colochochjan jičhoa va nttiha que xa xonhi chojni digu-inttetaha va. Tonxindanguehe ra va co sicó ra va. ³¹ Co si čhonja chojni sanchianguiha ra ixin quedonda tetonxindanguehe ra va, jaha ra ndačo ra que janha, tti chonda cain joachaxin, rrogondana va.

³² Jamé, savinttecji cayoi chojni mé, co jamé conhe inchin ndačo Jesús. ³³ Co are otetonxindanguehe na colochochjan mé, nicolochohe joanchianguiha na co ndačo na:

—¿Quedonda tetonxindanguehe ra colochochjan yá?

³⁴ Tti yó chojni mé ndačo na:

—Ixin ximaestrone na sondehe xa va.

³⁵ Jamé sajoicao na va hasta tti ngain Jesús, co nttiha jehe na cjoajinhi na va tti manta que tetsá na co joinchetaha na Jesús jehe colochochjan mé. ³⁶ Are Jesús conchian para ngagaha ciudad de Jerusalén, chojni coingo na tti manta que tetsá na para coingachjetaha colochochjan mé. ³⁷ Co are ochian tediji na para sania na tti jnanchjan de Nttaolivo, cain chojni que terróe nttiha que vitticaon na Jesús, coexinhi na coyao na ixin anto ché na co joinchecoanxinhi na Dios de ixin anto tsje milagro vicon na joinchehe Jesús. ³⁸ Co ndačo na:

—¡Anto jian tti Rey que jói conixin nombré Dios! ¡Anto čhjoin tonohé cain ángel ngajni! ¡Gloria ngain Dios!

³⁹ Cottimeja canxion xifariseo que te nttiha ngayé chojni mé vinttendačo xa ngain Jesús:

—Maestro, nchesattehe chojnia tehe.

⁴⁰ Pero Jesús ndačo ngain xa:

—Janha rroundattjo ra que si chojni tehe rrotencoá na, xo tsoyao xo.

⁴¹ Are Jesús joihi chiaon de Jerusalén, are jehe vicon ciudad mé jehe tsjangaxin ciudad mé, ⁴² co ndačo ngain:

—¡Si chojni de nganji jaha rroquinxin na jai jehe tti joichjaha na tti čhjoin de ngain ansén na! Pero jai, mé tavema, co čhoha tsinxin na. ⁴³ Tsí nchanho anto tangui para ixin chojnia. Are mé chojni que ningaconhe na sinchechjian na ttjarioho ngoixin ngandanji jaha, ciudad Jerusalén, co ngoixin ngandanji jaha sinttendanji na, co cain lado sixinttixin na ngain chojnia para soen na na. ⁴⁴ Co chojni que ningaconhe chojnia sachá ngain chojnia. Nasoenxon na cain chojni que te nganji, co tsinttoeha na nganji jaha ni ná xo ngataha iná xo. Jamé tsonhe ixin chojnia joincheha na caso tti rato que Dios jói joitsjehe na.

Are Jesús joincheroa nihngo icha importante

(Mt. 21.12-17; Mr. 11.15-19; Jn. 2.13-22)

⁴⁵ Cottimeja joixinhi Jesús nihngo icha importante co venguixin de nttiha cain chojni que tenchejci co tettehna. ⁴⁶ Co ndačo ngain na:

—Ngain tti jitaxin Palabré Dios ndačo: “Nchiania para sinchecoanx-inhi na Dios.” Pero jaha ra ndadinchechjian ra nchia cueva tti xatte tti chehe.

⁴⁷ Cain nchanho que Jesús vehe ngain Jerusalén, ngaxinhi nihngo mé vanchecoexin chojni de ixin Dios. Pero cain xidána que vaquetonha ngain icha xidána, co cain ximaestroe ley, co cain xivaquetonha ngain ciudad mé cjoé xa quexén sinchehe xa para nasoenxon xa Jesús. ⁴⁸ Pero čoha joinchehe xa jamé ixin cainxin chojni tatettinhi na tti jinichja Jesús.

20

Tti joachaxin que chonda Jesús

(Mt. 21.23-27; Mr. 11.27-33)

¹ Ná nchanho Jesús taji ngaxinhi nihngo icha importante para jincheconhe chojni de ixin Dios, co jindache na tti jian joajna are vintteguiji canxion xidána que vaquetonha ngain icha xidána, canxion ximaestroe ley, co canxion xí que chonda joachaxin ngain nihngo mé.

² Co vinttendačo xa ngain Jesús:

—Ndachjenji ni ra quehe joachaxin chonda jaha para nchehe cain cosa jiji. ¿Quensen chjá joachaxin jiji?

³ Cottimeja ndačo Jesús ngain xa:

—Janha cai sanchianguiha ra ná cosa. Co rrondachjenji ni ra:

⁴ ¿Quensen rroanha Juan para joincheguitte chojni? ¿A Dios o aní chojni?

⁵ Pero coexinhi xa joanchianguihi chó xa co ndačo xa:

—¿Quehe rrondačo na? Si rrondačo na que Dios tti rroanha Juan, jehe rrondattjo na: “¿Quedonda vitticaonha ra remé?” ⁶ Co si rrondačo na que chojni tti rroanha Juan, cainxin chojni nasoenxon na ján na de ixin xo ixin jehe na chonda na seguro que Juan vanichja joajna que vagayé de ngain Dios.

⁷ Co jehe xa vinttendačo xa ixin noeha xa quensen rroanha Juan para joincheguitte chojni. ⁸ Cottimeja ndačo Jesús ngain xa:

—Cai janha rrondattjoha ra quehe joachaxin nttaxin janha cain cosa jiji.

Ejemploe ninchehe xa jianha

(Mt. 21.33-44; Mr. 12.1-11)

⁹ Cottimeja coexinhi Jesús nichjé chojni, co ndačo ngain na ejemplo jiji:

—Vehe ná xí que cjoenga xa ná jngui de nttauva co después joanjo xa nttattochjoin media ngain canxion tti nchehe xa co jehe xa sacjoixin xa de nttiha para tsje tiempo. ¹⁰ Co are ojoí tiempo de cosecha, jehe xa rroanha xa ná tti nchehe xé xa para joiganchia tti parte de cosecha que jiquininxin sayé tti xinajni mé. Pero jehe tti nicoá nttattochjoin media mé coaxin na tti nchehe xa mé nttá co vengui na co xonhi chjé na. ¹¹ Cottimeja xinajni mé rroanha xa iná tti nchehe xé xa pero cai tti nicoá nttattochjoin media nichja na feo ngain tti nchehe xa mé co coaxin na nttá co vengui na co xonhi chjé na. ¹² Xinajni mé cjan xa rroanha xa

iná tti nchehe x̄a, pero cai joinchenihi na tti nchehe x̄a mé co vengui na co x̄onhi chjé na.

¹³ 'Cottimeja xinajni mé ndačo xa: “¿Quehe sinttaha? Janha rror-roanha tti xanhna que janha anto rinaho. Are jehe na sicon na xanhna jihi puede rrochonda na respeto ngain xan.” ¹⁴ Pero are jehe na vicon na xan, ndache chó na: “Xan jihi xan sayé ngoi nontte jihi inchin herencia, mexinxin nasoenxon na xan para que ján na sittoá na cain.” ¹⁵ Cottimeja joantsjegaxin na xan de nttauva mé co nagoenxon na xan.

Cottimeja joanchiangui Jesús ngain chojni co ndačo:

—¿Quehe sinchehe xinajni mé ngain tti chojni que vittoehe jnguihi xa? ¹⁶ Jehe xa tsí xa co nasoenxon xa chojni mé co sanjo xa jnguihi xa ngain ojé chojni.

Are vinttequinhi chojni jihi, vinttendačo na:

—¡Que Dios sanjoha joachaxin yá!

¹⁷ Pero Jesús tsjehe ngain jehe na co ndačo:

—Mexinxin, ¿quehe rročo tti jitaxin ngain Palabré Dios? Nttiha ndačo:

Tti x̄o que joinchegondaha xittette nchia, x̄o mé tti x̄o joiguehe icha importante.

¹⁸ Quexeho chojni que tsontenguixin x̄o jihi, tsonchjian pedazo cuerpoe na. Co si x̄o jihi setsinga x̄o ngataha ná chojni, chojni mé rrocjan cuerpoe polvo.

Tti rroxenga hna ngain impuesto

(Mt. 21.45-46; 22.15-22; Mr. 12.12-17)

¹⁹ Cainxin xidána que vaquetonha ngain icha xidána co ximaestro ley nttiha joinao xa rrotse xa Jesús ngain rato mé ixin coinxin xa que ixin ejemplo jihi rročo de ixin jehe xa. Pero x̄agoen xa cain chojni.

²⁰ Mexinxin roanha xa canxion xí que tsaya ngain Jesús co xí mé vanchehe xa que ixin jehe xa anto jian xa para que rojinchénichja xa Jesús ná cosa nchaoha para nchao rrocjanguihi xa Jesús ngain xigobernador. ²¹ Mexinxin joanchiangui xa ngain Jesús co ndačo xa:

—Maestro, janha na nona na que soixin nichja co nchecoehne chojni tti ndoa, co ncheha juzgado chojni rico ojé que chojni noa, sino que soixin ndoa nchecoehne na de ixin tti rinao Dios. ²² Ndachjenji ni ra: ¿Anchao jí tsjenga na hna impuesto ngain xiemperador, o ani nahi?

²³ Pero Jesús oconohe de tti jianha que jehe xa te x̄axaon xa de ixin jehe, co jehe ndačo ngain xa:

—¿Quedonda rinao ra sincheyana ni ra? ²⁴ Tjagohna ni ra ná tomi. ¿Quensen con jinganito jihi, co quensen nombré jitaxin jihi?

Jehe xa vinttendačo xa:

—Con xiemperador co nombré xa.

²⁵ Cottimeja ndačo Jesús ngain xa:

—Mexinxin chjehe ra xiemperador tti jiquininxin xa, co danjo ra ngain Dios tti jiquininxin sayé jehe.

²⁶ Co jamé chóha joinchenichja xa Jesús ni ná cosa nchaoha; sino que vinttegoan xa admirado de ixin tti ndačo jehe co jamé ndavinttetencoaxa.

Canxion chojni joanchiangui quexén rroxechon ni

(Mt. 22.23-33; Mr. 12.18-27)

27 Después de cain jiji canxion xisaduceo vinttecji xa ngain Jesús. Xisaduceo vaguitticaon xa que chojni que ndadenhe irroxechonha na; mexinxin ndačo xa ngain Jesús:

28 —Maestro, ley que vayé Moisés jitaxin que si ná xí ndadenhe xa co sittohe čihi xa co si xonhi chjan joichonda na, xichó xindavenhe chonda xa que secao xa jehe nchiganha mé co rrochonda na chjan para que chjan mé sehe xan inchin xenhe tti ndavenhe. 29 Nchao remé; vintte yáto xí, chó xa. Xisaho vecao xa nchičihi xa pero ndavenhe xa co xonhi chjan cointtohe xa. 30 Xiyoxin vecao xa jehe nchiganha mé, pero cai ndavenhe xa co xonhi chjan cointtohe xa ngain nchiganha mé. 31 Cottimeja xinixin vecao xa jehe nchiganha mé pero xajeho jamé conhe xa. Co jamé hasta tti yatoxin xa ndavenhe xa cai co xonhi chjan cointtohe xa ngain nchiganha mé. 32 Co después ndavenhe nchiganha mé cai. 33 Mexinxin are rroxechon na, ¿Quexehe de tti yáto xí mé sehe mero xixihi jehe nchí mé, ixin cain xa vinttecao xa nchí mé?

34 Cottimeja ndačo Jesús ngain xa:

—Ngain mundo jiji, xí co nchí tottehe na. 35 Pero tti chojni que tequinixin tsji para ngain co rroxechonxin na de tti ndavenhe na, nttiha ni tsotteha na, ni sanjoha na xenhe na para tsottehe xa 36 ixin nttiha ichoha ndasenhe na. Are mé sintte na inchin ángel de Dios co sintte na xenhe Dios ixin Dios tti sinchexechon na. 37 Hasta ngain tti parte que coentaxin Moisés ixin vicon xohi ngagaha canchaha, jehe mismo jointtanoa na que ixin chojni que ndadenhe rroxechon na. Nttiha ndačo que Dios, Dios de Abraham, co Isaac, co Jacob. 38 Pero Dios jeha Dios de nindadiguenhe, sino que Dios de tti nitechon. Co mé rročo que para ixin Dios cain chojni techon na.

39 Cottimeja cainxin ximaestroe ley vinttendačo xa:

—Nchao ndačo, Maestro.

40 Co icjanha xa joanchiangui xa icha ngain Jesús.

Tti dindačo David de ixin Jesucristo

(Mt. 22.41-46; Mr. 12.35-37)

41 Jesús ndačo ngain na:

—¿Quexén ndačoxin chojni que ixin Cristo ná xanntí David? 42 Ixin David mismo dindačo janhi ngain libroe Salmo:

Tti Ttetonha cainxin cosa ndačo ngain tti Ttetonna janha:

“Darihi ngain lado jian na,

43 hasta que janha sinttagacha jaha de ngain cain tti ningaconha.”

44 ¿Pero quexén que Cristo jehe ná xanntí David, si David mismo ndačo ixin Cristo tti Ttetonha ngain jehe?

Are Jesús joinchesattehe ximaestroe ley

(Mt. 23.1-36; Mr. 12.38-40; Lc. 11.37-54)

45 Cainxin chojni nttiha tatettinhi na are Jesús ndačo janhi ngain tti chojni que vacao:

46 —Ttjiho ra cuidado de ncheha ra inchin nchehe ximaestroe ley ixin jehe xa nchexoxinhi xa čihi xa conixin lontto icha jinjini, co rinao xa que chojni sanjo na joajna ngain xa conixin anto tsje respeto are ngain ndásin, co are ngaxinhi nihngo jehe xa ttje xa tti ntaxintaon icha importante para dinttetaha xa, co are ttji xa dijine xa jehe xa rinao xa tti icha jian lugar ngain mesa. 47 Cai dantsjehe xa nchiganha nchiandoha

ncha ixin ittixinha ncha ttjenga ncha hna contribución, co para xonhi chojni rrořaxaon tti jianha que nchehe xa, jehe xa nchecoanxinhi xa Dios anto sé. Cain jehe xa xisayé icha soji castigo.

21

Tomi que joanjo ná nchiganha noa

(Mr. 12.41-44)

¹ Ngain nihngo icha importante nttiha vicon Jesús quexén tettinttohe cain chojni rico tomi ngá cajé alcancia. ² Cai vicon Jesús ná nchiganha noa que vancá ncha nttiha yó centavochjan. ³ Co ndačo Jesús:

—Janha ndoa tti rrondattjo ra que nchiganha noa jihi joanjo ncha icha tsje que cain chojni. ⁴ Ixin cain chojni danjo na tti xehe na, pero jehe ncha, masqui noa ncha, joanjo ncha cainxin tomi que jehe ncha jichonda ncha.

Jesús ndačo que rroxantte nihngo icha importante

(Mt. 24.1-2; Mr. 13.1-2)

⁵ Canxion de tti chojni que vacao Jesús tetjao na de ixin nihngo icha importante co ixin anto chjoin xo que diconchjian nihngo mé co de icha cosa que chojni diganjo na para ixin nihngo. Cottimeja Jesús ndačo ngain na:

⁶—Tsí nchanho que cain tti jaha ra tedicon ra yá rroxantte, co ni ná xo sittoeha ngataha iná xo.

Tti tsonhe icha saho que mundo ndatsjexin

(Mt. 24.3-28; Mr. 13.3-23)

⁷ Cottimeja joanchianguihi na Jesús co ndačo na:

—Maestro, ¿quesa siconhe jihi? ¿Quehe señal rrořago ixin cain cosa jihi osiconhe?

⁸ Jesús ndačo:

—Ttjiho ra cuidado que xonhi chojni sinttayaha ra. Ixin atto tsje chojni tsí co sinchegonda na nombrena rrondačo na: “Janha tti Cristo na”, co “Jai mero tiempo que mundo ndatsjexin.” Pero jaha ra ditticaonha ra mé. ⁹ Co are tsinhi ra ixin jí guerra co ixin tettetocaho chojni gobiernoe na, jaha ra řaonha ra ixin jihi chonda que tsonhe saho, pero řa jaha tiempo para ondatsjexin mundo.

¹⁰ Jesús joinchehe sigue ndačo ngain na:

—Ná nación tsetocaho iná nación, co ná región tsetocaho iná región.

¹¹ Tsje parte tsingui nontte anto soji, co sehe jintta co chin ngain tsje parte, co ngajni sicon ni cosa que sincheřaon ni, co anto tsje señal importante sicon ni.

¹² Pero saho de cain jihi, chojni rrotse ra na jaha ra co feo sinchehe na nganji ra. Tsjiho ra na para que soan ra juzgado ngain nihngo, co tsiaxinha ra na ngain cárcel co tsjiho ra na ngain rey co ngain xigobernador de ixin causananxin janha. ¹³ Cain jihi rrochondaxin ra oportunidad de rronichja ra de ixin janha. ¹⁴ Co are tsonha ra mé, řaxaonha ra icha saho de ixin quexén rrondačo ra ngain cain tti tsjiho ra na. ¹⁵ Ixin janha tti rrochjaha ra palabra jian que rrondačo ra co sinttanoha ra jian, para que ni ná chojni que ningaonha ra tsixinha na nganji ra, sino que jehe na sitticaon na tti jaha ra rrondačo ra. ¹⁶ Pero jaha ra hasta jehó ndodá ra, xanchó ra, niparientea ra, co xiamigoa ra; chojni mé sinttachianha ra na ngá rá niningaonha ra. Co nasoenxon na

čhonja de jaha ra, ¹⁷ co ngoixin mundo rroningaconha ra chojni de ixin causananxin janha. ¹⁸ Pero masqui jamé, sitjanha ni ná xajá ra ixin vidá ra sehe seguro ngain Dios. ¹⁹ Si cainxin tiempo jaha ra seguro sitticaon ni ra, rrochonda ra iná vida nroaxin.

²⁰ 'Are sicon ra que ciudad de Jerusalén ngoixin sixindanji xisoldado, jaha ra onoha ra que are mé orroxantte. ²¹ Mexinxin are mé tti chojni que te Judea rrochonda na que satsinga na para ngagaha jna. Co tti nite ngain ciudad de Jerusalén rrochonda na que satsingaxin na de nttiha. Co tti nisintte ngataon jngui are mé, rrochjeha na tiempo para rrocjan na ngain ciudad mé. ²² Ixin nchanho mé nchanho de castigo, are tsonhe cain tti jitaxin ngain Palabré Dios. ²³ ¡Anto tangui para ixin tti nchí que sintteyá chjan ngain nchanho mé o tti rrochonda chjan que xa tetai xan! Ixin are mé atto tangui tsonhe chojni nttihi ngataha nontte, co mé ná castigo anto soji para ixin nación Israel jihi. ²⁴ Are mé čhonja chojni nasoenxon na ngain guerra co icha de chojni mé rrotse na na co tsia na na co jamé sacao na na ngoixin región. Co chojni de iná nación sinchehe na inchin sinoa na ngain ciudad de Jerusalén hasta que tsjexin tti tiempo que sayé na joachaxin de sinchehe na jamé.

Quexén tsí tti Xí que joixin de ngajni

(Mt. 24.29-35, 42-44; Mr. 13.24-37)

²⁵ 'Cottimeja sehe señal ngain nchanho co ngain conittjao co ngain conotse. Co nttihi ngataha nontte cainxin chojni rroxaon na ixin anto soji saxoín ndachaon ixin anto soji rrocjamanguiataon chó nda. ²⁶ Chojni ndatsonttiehe na de ixin joaxaon are rroaxaon na ixin quehe siconhe ngain mundo jihi, ixin hasta cainxin cosa que jí ngajni rroxaanga. ²⁷ Cottimeja sicon na na janha, tti Xí que joixin de ngajni, sihi are mé ngacjan ná ttjoi conixin joachaxin co gloria. ²⁸ Are tsexinhi tsonhe cain cosa jihi, jaha ra xo xa sinttechon ra, doan ra animado co tsjehe ra para ngajni ixin are mé janha atto toin sihi para tsjenguijna ra co isetanha ra cain cosa tangui mé.

²⁹ Cai ndačo Jesús ngain na ejemplo jihi:

—Xaxaon ra ngain nttahigo, o quexeho nttá. ³⁰ Are sicon ra que očhinhi cachjenhe nttá, jaha ra mismo onoha ra que ojoiconchian tiempoe čhin. ³¹ Jamé cai are sicon ra que tsonhe cain cosa jihi, jaha ra onoha ra que osiconchian tiempo are siquetonha Dios nttihi ngataha nontte.

³² 'Janha ndoa tti rrindattjo ra que cain jihi tsonhe saho que ndasenhe chojni de ngain generación jihi. ³³ Masqui ngajni co nontte ndatsjexin, pero tti janha ndačhjan chonda que tsonhe.

³⁴ 'Ttjiho ra cuidado que tsosojiha ansean ra de ixin vicio, inchin tti rocoan ra co cain problema de ngain vida jihi, para que ngain nchanho mé rroxaonha ra ³⁵ inchin are coxigo xaon va are ngain trampa que anto daca dijé, ixin jañá tsí nchanho mé ngain cainxin chojni ngoixin mundo. ³⁶ Mexinxin jaha ra dintte ra listo, co cainxin tiempo nchecoanxinhi ra Dios para que xonhi tsonha ra de ngain cain cosa que siconhe, co para que are mé nchao tsonchienhe ra nganji na janha, tti Xí que joixin de ngajni.

³⁷ Ngain tiempo jihi, are nchanho, Jesús vanchecoenhe chojni de ixin Dios ngain nihngo icha importante, co are ttie jehe savacji para vaguittohe ngagaha ti jnanchjan que dinhi Nttaolivo. ³⁸ Co cada nchanho

ndoyo vaconchienne chojni ngain nihngo mé para vaquinhí na tti vandačo Jesús.

22

Are cjoao na quexén sinchehe na para rrotse na Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

¹ Co are Jesús xa tají nttiha ngain Jerusalén, ochiaon joí tti quiai que jine na niottja que chondaha levadura, co mé tti quiai que dinhi pascua. ² Ngain tiempo mé merocoa cain chojni anto vancheoxoxinhi na tti vandačo Jesús. Mexinxin cain xidána que vaquetonha ngain icha xidána, co cain ximaestroe ley vaçaon xa ngain cain chojni mé para que jehe xa nasoenxon xa Jesús; mexinxin jehe xa vacjé xa quexén sinchehe xa para tsjaya xa co chojni tsoñaoha na.

³ Cottimeja Satanás joixinhi ngain ansén Judas Iscariote, jehe ná de tti tteyó chojni que vacao Jesús. ⁴ Co Judas jihi cjoí joitsjehe xidána que vaquetonha ngain icha xidána, co xipolicié nihngo icha importante, para cjoao xa de ixin quexén jehe tsjago ttinó jí Jesús para sitse xa. ⁵ Cain jehe xa anto vintteché xa co ndačo xa ixin sanjo xa tomi ngain jehe Judas. ⁶ Co Judas vittoexin co ocoexinhi xaxaon ixin quexén sinchehe para que sinchechienne Jesús ngá rá xa are xonhi chojni sintte ngain Jesús.

Are joinecaho Jesús tti tteyó chojni que vacao
(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Are joí tti nchanho de quiai que dinhi pascua are vagoen na coleco para vaganjo na ngain Dios. ⁸ Ngain nchanho mé Jesús rroanha Pedro co Juan co jehe ndačo ngain na:

—Ttji ra dinchechjian ra tti sontte na ngain quiai pascua jihi.

⁹ Jehe na ndačo na ngain Jesús:

—¿Ttinó rinao sinttachjianxin na?

¹⁰ Jesús ndačo ngain na:

—Are jaha ra sigaha ra ciudad jihi, setan ra ná xí que jidicao ná nchíxa de jinda. Roehe ra xí mé hasta tti ngain nchia que jehe xa sixinhi xa ¹¹ co ndache ra tti nchiandoha nttiha: “Ximaestro ndačo xa nganji: ¿Quettinó jí tti cuarto que jehe xa sinexin xa ngain quiai pascua conixin tti tteyó chojni que xicao xa? ¹² Cottimeja jehe tti ndoha mé tsjagoha ra ná cuarto jie ngain piso yoxin que ojí listo. Nttiha nchechjianxin ra tti sontte na.

¹³ Cayoi chojni mé savinttecji na co vittja na cain inchin ndačo Jesús. Co nttiha joinchechjianxin na tti joinecaho na Jesús ngain quiai pascua.

¹⁴ Are ovittja hora para joine na, Jesús conixin tti tteyó representanté vintte na ngain mesa. ¹⁵ Cottimeja Jesús ndačo ngain na:

—Janha anto joinaho joine conixin jaha ra ngain quiai pascua jihi saho que janha ndasenne na! ¹⁶ Janha rrindattjo ra seguro que rrocjanha na sinttasayá quiai pascua hasta que cain tti rročo quiai jihi tsoenja ngain tti ttetonha Dios.

¹⁷ Cottimeja coá ná vaso de vino co joanjo gracias ngain Dios, co ndačo ngain na:

—Dihí ra jihi co tonchjejehe chó ra, ¹⁸ ixin janha irrocjanha na sihi vino hasta que tsija tti ttetonha Dios.

¹⁹ Después coá niottja co joanjo gracias ngain Dios, cottimeja váña nio co joanjo nio ngain jehe na co ndačo:

—Jihi rroçho cuerpona janha que rrožanjo para ndasenne para tsjenguijna ra. Cain tiempo nchehe ra janhi para rrožaxaonxin ni ra.

²⁰ Cai jamé joinchehe conixin vaso de vino are ojoexin joine na co ndaço:

—Vaso jihi rroçho tti trato naroaxin que jnina sinchese gurá. Co jnina mé singo jni para que tsjenguijna ra.

²¹ 'Pero jaxon rá tti xí que rrondache chojni quežén para rrotse na na janha, rá xí mé nttihi jí ngataha mesa conixin rana janha. ²² Janha chonda que senhe na inchin jiquininxin, pero janto tanguí tsonhe tti rrondache chojni quežén para rrotse na na!

²³ Cottimeja tti tteyó chojni que vacao Jesús coexinhi na joanchianguihi chó na ixin quexehe tti rrondache chojni quežén para rrotse na Jesús.

Are joinchediscutí na ixin quensen sehe icha importante

²⁴ Cottimeja joinchediscutí na ixin quexehe de jehe na tti sehe icha importante ngain tti tteonha Dios. ²⁵ Pero Jesús ndaço ngain na:

—Ngain mundo jihi, cain rey de cain nación, jehe tteonha inchin jehe rinao, co cain xí que chonda cargo de ngain cain nación, dinhi xa xí que nchehe jian. ²⁶ Pero jaha ra chondaha ra que sintte ra jamé, ixin tti sehe icha importante ngayaha ra, pero mé chonda que sehe inchin tti icha nchín. Co tti tsetonha ngayaha ra, mé tti chonda que icha tsjenguijna ra. ²⁷ Ndachjenji ni ra, ¿quensen icha importante, a tti dehe jine ngain mesa, o ani tti nchehe xa que diquenne jehe tti jine ngain mesa? Seguro jehe tti jí ngain mesa, mé tti icha importante. Pero janha rrihi nttihi ngayaha ra inchin ná tti nchehe xa.

²⁸ Jaha ra tti vintte ra cainxin tiempo nganji na janha are janha vetan tanguí. ²⁹ Mexinxin janha rrichjaha ra ná joachaxin para que jaha ra tsetonha ra, jañá inchin joachaxin que chjana Ndodana janha, ³⁰ para que sintte ra co sihi ra ngain mesana nttiha tti janha tteonha, co sintte ra ngain lugar de joachaxin para sinchejuzguehe ra tti tteyó grupoe chojni Israel.

Jesús ndaço que Pedro rrondaço ixin jehe chonxinha Jesús

(Mt. 26.31-35; Mr. 14.27-31; Jn. 13.36-38)

³¹ Ndaço Jesús cai:

—Simón, Simón, tsjenxin; Satanás danchia joachaxin para que tsontsjenga ra jaha ra como si rocji ra trigo. ³² Pero janha rrinttatsán ñao Dios para ixin jaha, para que xonhi tiempo rrotjañaha tti jaha ditticaon. Co jaha are saçhjaha joaxaon, ttjenguijna icha chojni que ditticaon para que sitticaon na jian cainxin tiempo.

³³ Simón Pedro ndaço ngain Jesús:

—Janha rinaho tsji cain lugar conixin soixin, masqui siaxinna conixin soixin o hasta tti senxin soixin cai janha nttiha senxin na.

³⁴ Jesús ndaço ngain Pedro:

—Pedro, janha rrindattjo que jai mismo icha saho que rrotsje conttaxi- chia, jaha orrondaço ninxin nttiha que chonxinha na.

Are ojoí tiempo que Jesús tanguí conhe

³⁵ Cottimeja Jesús joanchiangui ngain tti chojni que vacao co ndaço:

—Are janha coetonha ra para joindache ra chojni de ixin Dios, co ixin cjoioha ra ni bolsa, ni tomi, ni catte, açhonja gondaha ra?

Jehe na ndačo na:

—Nahi, xonhi.

³⁶ Cottimeja ndačo Jesús ngain na:

—Co jai jeha jamé, xó chonda ra bolsa, ttjiho ra, co cai tomi; co xó chondaha ra espada nchecji ra chamarrá ra para ttenanxin ra espada.

³⁷ Ixin janha rrindattjo ra que chonda que siconna janha inchin jitaxin Palabré Dios: “Jehe venhe inchin chojni que nchehe jianha.” Ixin cain tti jitaxin de ixin janha chonda que tsonhe.

³⁸ Cottimeja jehe na vinttendačo na:

—Nttihi jí yó espada.

Co Jesús ndačo:

—Conixin yao.

Are Jesús joinchetsenhe ñao Dios ngain Getsemaní

(Mt. 26.36-46; Mr. 14.32-42)

³⁹ Cottimeja vačhje Jesús co inchin costumbre que jehe vanchehe, jehe sacjoi para ngagaha tti jnanchjan de Nttaolivo, co rroé tti chojni que vacao. ⁴⁰ Co are ojoiji na nttiha, jehe ndačo ngain na:

—Nchetsenhe ra ñao Dios para que sitaha ra de sinchehe ra cosa jianha.

⁴¹ Cottimeja Jesús sacjoi nchion cjin de ngain na, inchin cjinxin ttxinhi ni de tja ni ná xó, co nttiha vettoxin nttajochjihi para joinchetsenhe ñao Dios. ⁴² Co jehe ndačo:

—Padre, si rinao, tančhjandaha na para que janha sattoha ngain tti anto tangui que tsonna, pero tsoenha inchin janha rinaho, sino que tsonhe inchin soixin rinao.

⁴³ Cottimeja joicononxin ná ángel de Dios ngain Jesús para que joinch-esoji espiritue Jesús. ⁴⁴ Co ixin jehe icha tangui conohe ngain ansén, jehe icha jian joinchetsenhe ñao Dios co ndachjín cjan inchin jni, co yeye gota vinttji ngataha nontte.

⁴⁵ Co are joexin joinchetsenhe ñao Dios, vingattjen co cjoí ngain tti chojni que vacao; co jehe na otatejoa na ixin icoixinha na de joachjaon.

⁴⁶ Cottimeja jehe ndačo ngain na:

—¿Quedonda tatečhin ra? Dingattjen ra, co nchetsenhe ra ñao Dios para que sitaha ra de sinchehe ra cosa jianha.

Are tse na Jesús

(Mt. 26.47-56; Mr. 14.43-50; Jn. 18.2-11)

⁴⁷ Jesús xa jinichja jańá are ojoí anto tsje chojni. Tti vinhi Judas, jehe ná de tti tteyó chojni que vacao Jesús, jehe mé tti jitaon nttiha de cainxin chojni mé, co are ojoí, jehe conchienhe ngaca Jesús para coetoxin. ⁴⁸ Cottimeja Jesús ndačo ngain Judas:

—Judas ¿acoetoxin na para cjoago ixin janha tti Xí que joixin de ngajni?

⁴⁹ Co tti icha chojni que vacao Jesús, are vicon na jihi, ndačo na ngain Jesús:

—¿Atsjaya na conixin espada?

⁵⁰ Co ná de chojni mé joinchenihi ná xinchehe xé xidána icha importante, ixin cončhinjihi ná ndatsjoen xa lado jian xa. ⁵¹ Pero Jesús ndačo ngain tti chojni que vacao:

—Tančhjanda ra xa; conixin yao.

Cottimeja Jesús catte ndatsjoen xí mé co ndatsexin. ⁵² Cottimeja ndačo Jesús ngain cain xidána que vaquetonha ngain icha xidána, conixin ngain xipolicié nihngo icha importante, co ngain cain xittetonha ngain nihngo mé, tti xicjoi para sajoicao xa Jesús:

—¿Ajoihí ra joirroehna ni ra conixin espada co nttá inchin janha rrocji ná tti chehe? ⁵³ Cain nchanho are janha joarihi nganji ra ngain nihngo icha importante, jaha ra xonhi tiempo joinao ra rrotse ni ra. Pero jai hora jihí tti mero hora para sinchehe ra jihí, ixin Satanás tti jichonda joachaxin jaxon.

Pedro ndačo ixin jehe chonxinha Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Cottimeja tse na Jesús, co sajoicao na para ngain nchiandoha xidána icha importante. Co Pedro cjinxin jirroexin. ⁵⁵ Nttiha ngain patioe nchia mé cjoaga na ná xohi co nttiha tavinttendanji na xohi mé para xižohe na. Co cai Pedro nttiha tavehe ngayé na. ⁵⁶ Cottimeja ná nchimozé xidána mé, are vicon ncha que Pedro tajixižohe ngandehe xohi nttiha tavetsjehe ncha jian co ndačo ncha:

—Cai xí jihí vacao xa Jesús.

⁵⁷ Pero Pedro čhoha ndačo ndoa, co jehe ndačo:

—Janha chonxinha xí mé.

⁵⁸ Nchion después vicon ná xí, co xí mé ndačo xa ngain:

—Jaha cai ná de chojní Jesús.

Pero Pedro ndačo:

—Nahi, janha jeha chojní jehe.

⁵⁹ Inchin ná hora después iná xí xa cjan xa ndačo xa:

—Ján ndoa xí jihí vacao xa Jesús, ixin jehe xa cai Galilea regioen xa.

⁶⁰ Cottimeja Pedro ndačo:

—Janha nonaha de quehe rrinichja jaha.

Ngain rato mé are Pedro xa jinichja jamé, otsje ná conttaxichia. ⁶¹ Cottimeja Jesús ngaria co tsjehe ngain Pedro, cottimeja Pedro xaxaon ixin Jesús ondačo: “Saho que conttaxichia rrotsje va jai, jaha or-rondačo ninxin nttiha que chonxinha na janha.” ⁶² Cottimeja Pedro vačhjexin de nttiha co anto tsjanga.

Are cjoanoa xa Jesús

(Mt. 26.67-68; Mr. 14.65)

⁶³ Xisoldado que tenda Jesús cjoanoa xa co xanguí xa nttá. ⁶⁴ Jehe xa coejehe xa con Jesús co xanguí xa tton ngá con co ndačo xa ngain:

—¡Datsoenhe quensen goen!

⁶⁵ Co ndačo xa icha cosa feo ngain.

Are Jesús ngain juzgadoe nihngo

(Mt. 26.59-66; Mr. 14.55-64; Jn. 18.19-24)

⁶⁶ Co are ovingasán xatte cain xittetonha ngain nihngo, cain xidána que vaquetonha ngain icha xidána, co cain ximaestroey ley para sajoicao xa Jesús ngain juzgadoe nihngo. Nttiha joanchianguixin xa Jesús, co ndačo xa:

⁶⁷ —Nttihi ndachjenji ni ra, ¿ajaha tti Cristo?

Jehe ndačo ngain xa:

—Si rrondatto ra que ján, sitticaonnaha ra. ⁶⁸ Co si sanchianguiha ra ná cosa, jaha ra rrondachjenjiha ni ra, ni tsanchjandaha ni ra satsji.

⁶⁹ Pero desde jai, janha, tti Xí que joixin de ngajni, osarihi ngain lado jian de Dios que chonda cainxin joachaxin.

⁷⁰ Cottimeja cainxin xa joanchianguihi xa Jesús co ndaço xa:

—Mexinxin, ¿ajaha tti Xenhe Dios?

Jesús ndaço:

—Ján, janha inchin ndaço jaha ra mismo.

⁷¹ Cottimeja vinttendaço xa:

—¿Quedonda tsjé na icha chojni de testigo? Ján na mismo coinhi na tti jianha que ndaço xí jiji.

23

Jesús ngain Pilato

(Mt. 27.1-2, 11-14; Mr. 15.1-5; Jn. 18.28-38)

¹ Cottimeja cainxin xa vingattjen xa co sajoicao xa Jesús ngain Pilato.

² Nttiha coexinhi xa nichja xa tti jeha ndoa de ixin Jesús, co ndaço xa:

—Janha na vicon na que xí jiji jinchequeto xa chojnina na. Co ndaço xa que janha na chondaha na que tsjenga na hna impuesto ngain xiemperador romano, co cai ndaço xa que jehe xa tti Cristo, co mé rroço que jehe xa ná rey.

³ Cottimeja Pilato joanchiangui ngain Jesús:

—¿Ajaha tti Rey de chojni judío?

Jesús ndaço:

—Ján janha, jañá inchin jaha ndaço.

⁴ Cottimeja Pilato ndaço ngain xidána que vaquetonha ngain icha xidána, co ngain cain chojni que joinchechienhe Jesús nttiha:

—Janha ñonhi cosa jianha dittjá xí jiji.

⁵ Pero cain jehe xa icha coyao xa co ndaço xa:

—Jehe xa joincheyehe xa chojni ngoixin Judea de ixin tti jehe xa nichja xa. Coexinxin xa ngain Galilea, co jai ontiti jinchehe xa jamé.

Jesús ngain Herodes

⁶ Are Pilato coinhi jiji, jehe joanchiangui ngain xa si Jesús joixin de ngain Galilea. ⁷ Co are vinttendaço xa que ján, Pilato sarroanha Jesús para ngain Herodes ixin mé tti vehe gobernador de ngain Galilea tiempo mé, co ngain conittjao mé nttiha vehe Herodes ngain ciudad de Jerusalén. ⁸ Are Herodes vicon Jesús, jehe anto ché ixin anto sé jehe jiñaxaon sicon Jesús ixin jehe coinhi vanichja chojni de ixin tti jian que vanchehe Jesús. Co jehe Herodes joinao rroguicon ná milagro que rojinchehe Jesús. ⁹ Herodes anto tsje joanchiangui ngain Jesús pero Jesús ñonhi ndaço. ¹⁰ Cai nttiha conchienenhe tsje xidána que vaquetonha ngain icha xidána co tsje ximaestroey ley para ndaço xa tsje cosa ndoaha de ixin Jesús ixin anto coñao xa. ¹¹ Cottimeja Herodes conixin cain xisoldadoe ñaxaon xa que Jesús ñonhi rentte, co para cjoanoa xa Jesús, joinchengá xa lonto çhjoin inchin lontoey rey. Cottimeja Herodes rroanha Jesús para ngain Pilato iná. ¹² Ngain nchanho mé Pilato co Herodes vinttegoan amigo. Icha saho jehe na vaningaconhe chó na.

Are ndaço na ixin Jesús chonda que ndasenhe
(Mt. 27.15-26; Mr. 15.6-15; Jn. 18.39—19.16)

¹³ Cottimeja Pilato vayé cain xidána que vaquetonha ngain icha xidána co cain xí que vechonda joachaxin ngain chojni judío, conixin icha chojni, ¹⁴ co ndačo ngain na:

—Jaha ra joicohna ra xí jihi, co ndačo ra ixin jinchequeto xa chojni, pero janha joanchianguia xa ngattoxon con ra, co ovicon ra que janha xonhi vittjá xa que ixin jehe xa jinchehe xa ná cosa jianha inchin jaha ra tjanguihi ra xa. ¹⁵ Cai Herodes sarroanna xí jihi iná, ixin jehe xa xonhi cosa jianha jica xa. Ovicon ra que xí jihi xonhi jianha dinchehe xa para que sequininxin ndasenne xa. ¹⁶ Janha tsetonha soan xa castigado, cottimeja tsančhanda xa satsji xa.

¹⁷ Ngain quiai mé, Pilato vechonda costumbre de tančhanda ná de tti tteaxinhi para sattji para que chojni judío icha vaché na. ¹⁸ Pero cainxin na coexinhi na coyao na co ndačo na:

—¡Dantsje xí yá para siguenhe xa co tančhanda Barrabás satsji!

¹⁹ Co Barrabás jihi coiaxinhi na ngain cárcel ixin jehe joinchequeto chojni ngain ciudad de Jerusalén co ixin jehe nagoenxon chojni. ²⁰ Pilato joinao rrocanchanda Jesús, mexinxin jehe cjan ndačo ngain na iná, ²¹ pero jehe na icha vinttecoyao na sén co ndačo na:

—¡Nchecrucificá xa! ¡Nchecrucificá xa!

²² Ninxin nntiha ndačo Pilato ngain na:

—Mexinxin, ¿quehe cosa jianha joinchehe xí jihi? Janha xonhi cosa jianha dittjá xa para que sequininxin senhe xa. Janha tsetonha que soan xa castigado, cottimeja tsančhanda xa satsji xa.

²³ Pero jehe na vittoexinha na, co icha coyao na co joanchia na que ixin Pilato sinchecrucificá Jesús. Co anto vinttecoyao na jehe na conixin cain xidána que vaquetonha ngain icha xidána hasta que conhe inchin tti jehe na joinao na. ²⁴ Pilato joinchehe inchin jehe na joinao na, ²⁵ co jamé jehe coachanda sacjoi jehe tti vehe ngaxinhi cárcel ixin joinchequeto chojni co nagoenxon chojni. Co jehe Pilato joanjo Jesús ngain na para que jehe na joinchehe na inchin joinao na ngain Jesús.

Are joinchecrucificá na Jesús

(Mt. 27.32-44; Mr. 15.21-32; Jn. 19.17-27)

²⁶ Are osatedicao xisoldado romano Jesús para joinchecrucificá xa, vetan xa ná xí de Cirene que vinhi Simón. Jehe Simón rato mé joigaha ciudad de Jerusalén. Co jehe xa tse xa Simón mé co joincheca xa crue Jesús co joincherroé xa Jesús.

²⁷ Co terroé anto tsje chojni, co tsje nchí que tetsjanga ncha co tetoyao ncha de ixin joachjaoen Jesús. ²⁸ Pero Jesús tsjehe ngain cain nchí mé co ndačo:

—Jaha ra xo nchí ra de ngain Jerusalén, tsjangaxinha ni ra janha, sino que de ixin jaha ra misma, co de ixin xanha ra. ²⁹ Ixin ojitonchiaon nchanho que chojni rrondačo na: “Anto čhjoin para ixin tti nchí que čhoha rrochonda ncha chjan, tti nchí que xonhi chjan joincheconcjihí, ni joinchecai.” ³⁰ Co are mé chojni tsexinhi na rrondačo na ngain tsje jna: “Dinttji ra ngataha janha na”; co rrondačo na ngain tsje jnanchjan: “Ttema ni ra.” ³¹ Ixin si janha inchin ná nttá que jichon co janhi nchehe na nganji na janha, ¿mé quehe sinchehe na nganji jaha ra, que jaha ra inchin tti ntaxema?

³² Cai nntiha tedicao xa yó xichehe para joigoen xa xichehe mé conixin Jesús. ³³ Are ojoiji na ngain tti lugar que dinhi Nttalorojá Chojni, nntiha

joinchecrucificá xa Jesús conixin jehe tti yó xichehe: ná xa ngain lado jian de Jesús, co iná xa ngain lado cjon. ³⁴ Co are otenchecrucificá xa Jesús jehe ndaço:

—Padre, nchetjañehe xí tehe ixin noeha xa quehe tenchehe xa.

Co cain xisoldado mé joantsje xa suerte para chjevehe xa lonttoe Jesús. ³⁵ Co tsje chojni cjoí na nttiha para vicon na, co cai cjoí tsje xí que vinttechonda joachaxin ngain chojni judío; cain xí mé cjoanoa xa Jesús co ndaço xa:

—Jehe nchao cjoenguijna icha chojni, pero jai si ndoa jehe tti Cristo tti Dios coinchiehe, socon na sanianxin de nganito cruz yá.

³⁶ Cai cain xisoldado nttiha cjoanoa xa Jesús; vintteconchienhe xa ngain cruz co joanjo xa vino san para vihi Jesús, ³⁷ co ndaço xa ngain:

—Si jaha tti Rey de chojni judío, danianxin de nganito cruz jaho.

³⁸ Co nttiha já cruz que venganito Jesús vehe ná xón que vetaxin ixin nguigoa griego, latín, co hebreo que ndaço: “Xí jihi tti Rey de chojni judío.”

³⁹ Ná de tti xichehe que tenganito cruz nttiha, ndaço xa feo ngain Jesús:

—Si jaha tti Cristo, danianxin de nganito cruz co nchegania ni ra janha na cai.

⁴⁰ Pero tti xí iná joinchesattehe xa xicompañeroe xa co ndaço xa:

—¿Açagoenha Dios, jaha que rridatto ngain çajeho castigo? ⁴¹ Ján na jí razón que tedotan na tangui jihi ixin tettjenga na hna tti jianha que jointtoho na, pero xí jihi xonhi cosa jianha joinchehe xa.

⁴² Cottimeja ndaço xí mé ngain Jesús:

—Jesús, çaxaon na janha are soixin tsexinhi tsetonha.

⁴³ Jesús ndaço:

—Janha seguro rrindattjo que desde jai jaha osarihi conixin janha nttiha ngajni.

Are ndavenhe Jesús

(Mt. 27.45-56; Mr. 15.33-41; Jn. 19.28-30)

⁴⁴ Are inchin ngosine nchanho, cottimeja ndaconaxin xehe ngoixin ngataha nontte nttiha, co mé conçhenhe hasta ní hora tsoçjin.

⁴⁵ Nchanho ndaconaxin xehe, co tti manta que vettoa ngaxinhi tti nihngo icha importante ndavichjenga ngosinenxin manta. ⁴⁶ Cottimeja Jesús coyao co ndaço:

—Padre, ngá rá tsín espirítuna.

Co are jehe joexin ndaço jihi, jehe ndavenhe.

⁴⁷ Are vicon xicapitán romano ixin queçén conhe, jehe xa çaon xa ngain Dios co ndaço xa:

—Ján, ndoa xí jihi xonhi jianha jica xa ngattoxon con Dios.

⁴⁸ Cain chojni que te nttiha, are vicon na cain mé, savinttecji na co çanguí na pechoe na tton ixin anto coá na joachjaon. ⁴⁹ Co cain niamigoe Jesús, co cain nçhí que joixin desde Galilea para vacao nçha, cjinxin tavintte na para vicon na cain cosa jihi.

Are xavá Jesús

(Mt. 27.57-61; Mr. 15.42-47; Jn. 19.38-42)

⁵⁰ Vehe ná xí jian de ngain ansén xa que vinhi xa José, co rajné xa Arimatea ngain regioen Judea. Xí mé ná xijuez ngain juzgadoe nihngo.

⁵¹ José jihu cai jichonhe tiempo are Dios siquetonha ngataha nontte. Co jehe coñao de ixin tti joinchehe icha xijuez ngain Jesús. ⁵² Mexinxin jehe cjoí joitsjehe Pilato para joiganchiehe joachaxin ixin jehe sasicao cuerpoe Jesús. ⁵³ Co después de joinchegianxin cuerpoe Jesús de nganito cruz, jehe coensiha cuerpoe Jesús ná manta roa co joiquín cuerpo ngain ná cueva que odingue na ngadoho ná ttjao tti xa xonhi chojni dixavá. ⁵⁴ Mé cjoí tsocjin víspera de ngain tti nchanho que nchejogaha na.

⁵⁵ Tti cain nchí que joixin desde Galilea conixin Jesús cjoí ncha vintteguitsjehe ncha cueva mé, para vicon ncha quexén vittohe cuerpoe Jesús. ⁵⁶ Co are sacjan ncha para nchiandoha ncha, joinchechjian ncha perfume co pomada para cuerpoe Jesús; cottimeja ngain tti nchanho que nchejogaha na, jehe ncha vinttenchejogaha ncha cai inchin ttetonha ley que vayé Moisés.

24

Are xechon Jesús

(Mt. 28.1-10; Mr. 16.1-8; Jn. 20.1-10)

¹ Domingo, saho nchanho de semana, ndoyo, cain nchí mé cjan ncha ngain sepultura joicao ncha tti cain perfume que cointtecjan ncha, co icha nchí joicao chó ncha. ² Are vintteguiji ncha nttiha, vicon ncha tti xo que vejé sepultura mé ijihá xo nttiha. ³ Co jehe ncha vintteguixinhi ncha sepultura mé pero ivittjaha ncha cuerpoe Jesús. ⁴ Anto vinttexaon ncha co ni inoeha ncha quehe sinchehe ncha, are vicon ncha yó xí tatengattjen xa ngaca ncha tengá xa lonto tedaquima. ⁵ Co ixin jehe ncha anto vinttexaon ncha vintteguisé ncha hasta tti ngataha nontte, co jehe cayoi xí mé vinttendacho xa ngain ncha:

—¿Quedonda jaha ra tettjé ra ngain sepultura tti jichon jai? ⁶ Jehe icoha nttihi ixin jehe xechon. Xaxaon ra quexén ndattjo ra are jehe xa vehe ngain Galilea. ⁷ Jehe ndacho que jehe, tti Xí que joixin de ngajni, chonda que sinchecienhe na ngá rá chojni jianha, co jehe na sinchecrucificá na, pero ngain nchanho ninxin jehe rroxechon.

⁸ Cottimeja xaxaon cain nchí mé tti ndacho Jesús, ⁹ co después de cjanxin ncha de ngain sepultura, coequin ncha cain jihu ngain tti ttejngo chojni que vacao Jesús, co ngain icha chojni cai. ¹⁰ Co tti cain nchí que joicao joajna jihu ngain tti ttejngo chojni que vacao Jesús, cjoí María Magdalena, co Juana co iná María, janné Jacobo, co icanxin nchí. ¹¹ Pero tti chojni que vacao Jesús vitticaonha na tti ndacho cain nchí mé.

¹² Pero masqui jamé xaxaon cain na, Pedro vaçhje co coinga cjoí ngain sepultura. Co are jehe tsjehe ngaxinhi sepultura, jehe vicon tti manta roa que vesia cuerpoe Jesús tají manta ná lado. Cottimeja sacjan para tti nchia co anto goan admirado de ixin quehe diconhe.

Tti conhe are ngatja nttiha para Emaús

(Mr. 16.12-13)

¹³ Ngain xajeho nchanho mé, yó de chojni que vitticaon Jesús satettji na ngain ná rajna dinhi Emaús, inchin ttejngo kilometro cjinxin de Jerusalén. ¹⁴ Tetjao na de ixin cain tti conhe Jesús. ¹⁵ Co are jehe na tetjao na mé, Jesús mismo conchienhe ngaca na co sacjoí conixin jehe na. ¹⁶ Pero masqui vicon na que nttiha jittji Jesús, jehe na joatsoanha na,

ixin inchin ná cosa cayacoen jmacon na para joatsoanha na Jesús daca.
 17 Cottimeja Jesús joanchiangui ngain na co ndaço:

—¿Quehe tetjao ra jaxon que satettji ra ngain nttiha jiji? ¿Quedonda techinhi ra?

18 Ná de jehe na que vinhi Cleofas ndaço:

—Ngoixin mundo nohe chojni tti coexin Jerusalén ngain nchanho tehe. ¿Apoco jaha masqui joixin nttiha noaha quehe conhe?

19 Cottimeja Jesús ndaço:

—¿Quehe conhe?

Co jehe na ndaço na:

—De ixin tti conhe Jesús de Nazaret, que jehe cjoí ná profeta jian ngattoxon con Dios co ngattoxon con cainxin chojni. Co jehe joichonda anto tsje joachaxin de ngain tti vanchehe co de ngain tti jehe vanichja.

20 Co de ixin quexén cain xidána que ttetonhe icha xidána co cain xittonha nganji na joinchechienhe xa ngain chojni romano para goexin na nganito cruz. 21 Janha na vaaxanho na que jehe tti rrochjé libertad chojni de ngain nación Israel. Co jai ochonda ní nchanho que jehe ndavenhe. 22 Masqui canxion nchí que cai vacao jehe conixin janha na, nchí mé joinchexaon na ncha ixin vintteci ncha ndoyo ngain sepulture jehe, 23 co ixin vittjaha ncha cuerpoe Jesús, cjan ncha ngain tti nchia que vintte na co ndachjenji na ncha que ixin vintteguicon ncha yó ángel que ndaço ngain ncha que ixin Jesús jichon jai. 24 Cottimeja canxion de nicompañerona na cjoí na ngain sepultura co vicon na nttiha jamé inchin ndaço nchí que vintteci saho, pero Jesús viconha na.

25 Cottimeja Jesús ndaço ngain cayoi xí mé:

—¡Atto ttinxinha ra jaha ra, co anto tetonchjanha ra para sitticaon ra cain tti dindaço profeta! 26 ¿Apoco Cristo chondaha que rroconhe cain tti tangui jiji icha saho que vayé cain joachaxin que jiquininxin?

27 Cottimeja jehe coexinhi ndache na quehe rrocho cain texto de ngain tti jitaxin Palabré Dios tti jinichja de ixin jehe Jesús; coexinxin de ngain libroe Moisés, co joinchehe sigue ngain libro que dicjin cain profeta.

28 Are joiji na ngain tti rajna que tettji na, Jesús joinchehe que jehe rrojinchehe sigue nttié. 29 Pero jehe na joinchetsenhe na ñao que sittohe ngain na, co ndaço na:

—Dittoha nttihi nganji na, ixin ondajitonaxin xehe.

Cottimeja Jesús joixinhi nchia mé para vittohe nttiha ngain na. 30 Co are jehe otavehe ngain na ngain mesa coá niottja co joanjo gracias ngain Dios, cottimeja jehe conchinji nio co joanjo nio ngain na. 31 Ngain rato mé, Dios vinttjian tti tecayacoen jmacon na, co jehe na joatsoan na que jehe Jesús; pero jehe anto daca ndavitján de ngattoxon con na. 32 Co ndache chó na:

—¿Ajeha conohe ansean na anto chjoin are jehe nichja nganji na ngatja nttiha co jindattjo na de ixin tti jitaxin Palabré Dios?

33 Cottimeja jehe na ixonhi chonhe na, sino que jaicoa coá na nttiha co sacjan na para Jerusalén. Nttiha vittjaxin na tti ttejngo chojni que vacao Jesús tate na cain na conixin icha nicompañeroe na. 34 Co jehe na ndaço na ngain tti yó xí que joí:

—Ján, ndoa dixechon Jesús, ixin Pedro vicon.

35 Cottimeja tti yó xí que nandá joí ndaço xa tti conhe ngatja nttiha, co quexén joatsoan xa Jesús are jehe conchinji niottja.

*Are Jesús xago ngain chojni que vacao
(Mt. 28.16-20; Mr. 16.14-18; Jn. 20.19-23)*

³⁶ Xa tetjao na de ixin jihi, are xago Jesús, joiguengattjen ngayé na co joanjo joajna ngain na co ndaço:

—Dayehe ra tti çhjoin que tsonohe ansean ra.

³⁷ Jehe na anto vinttexaon na co xaxaon na ngain rato mé que jehe na tedicon na espirítue ná nindadiguenhe. ³⁸ Pero Jesús ndaço ngain na:

—¿Quedonda anto texaon ra? ¿Quedonda xa chondaha ra seguro ngain ansean ra de ixin janha? ³⁹ Tsjexin ra ngain rana co ngain rotena tti joinchenina na. Catte ni ra si rinao ra, co sicon ra que ján, janha. Ná espíritu chondaha nntao ni nntaloro inchin jaha ra tedicon ra que janha rrichonda jaxon.

⁴⁰ Are jehe ndaço jihi, jehe cjoago ngain na rá co rotté tti dijidoho clavo are ngainito cruz. ⁴¹ Pero ixin anto ché na co cai xaon na hasta jehe na xa çhoha vitticaon na ixin jehe mero nntiha, mexinxin Jesús ndaço ngain na:

—¿Achonda ra nntihi tti sine ni?

⁴² Cottimeja jehe na chjé na Jesús rioho copescado dichjan co rioho niottja de tsjén cormena. ⁴³ Co jehe tse mé co joine nntiha ngattoxon con na. ⁴⁴ Cottimeja ndaço ngain na:

—Tti janha conna, mé tti joindattjo ra are janha xa joarihi nganji ra, que chonda que joiconhe cain tti jitaxin de ixin janha ngain ley que vayé Moisés co ngain cain libro que dicjin cain profeta co ngain salmo.

⁴⁵ Cottimeja jehe joinchequinxin na tti jitaxin ngain Palabré Dios, ⁴⁶ co ndaço ngain na:

—Janhi jitaxin ngain Palabré Dios que Cristo chonda que ndasenhe, co nchanho ninxin jehe chonda que rroxechon. ⁴⁷ Co de ixin nombré jehe icha chojni chonda que sinchenohe na chojni de cainxin nación ixin chonda na que tsentoxinhi na vidé na para que cain tti jianha que tenchehe na nchao sitjañehe na. Co tsexinxin tsonohe chojni jamé desde ngain Jerusalén. ⁴⁸ Jaha ra tti testigo ra de cain cosa jihi. ⁴⁹ Co tsjexin ra, janha rrorroanha nganji ra Espíritu Santo tti ndaço Ndodana sanjo Ndo nganji ra. Pero tadintte ra nntihi ngain ciudad de Jerusalén hasta que sayeja ra tti joachaxin mé que tsixin de noi.

*Are Jesús sacojín para ngajni
(Mr. 16.19-20)*

⁵⁰ Cottimeja Jesús savathjecaoxin na de ngagaha ciudad co sacjoi na hasta rajna Betania, co nntiha jehe tsín rá noi para joinchenaon na.

⁵¹ Co are jehe mero jinchenchaon na, jehe sacjoixin de ngayé na, co sacojín para ngajni. ⁵² Jehe na, después de joinchecoanxinhi na Jesús, sacjan na para Jerusalén, co anto ché na. ⁵³ Co cainxin tiempo jehe na vintte na ngain nihngo icha importante para vanchecoanxinhi na Dios. Amén.

Tti Jian Joajné Jesucristo Que Dicjin Juan

Tti Palabra que Dios nichja conchjian ná xí

¹ Are cainxin coexinhi vehe, ovehe Xenhe Dios tti dinhi Palabra que Dios nichja, co jehe mé vehe ngain Dios, co jehe ján Dios. ² Are mé jehe ovehe ngain Dios. ³ Co de ixin jehe mé, Dios joinchechjian cainxin cosa; xonhi cosa que jí que jeha Dios joinchechjian de ixin jehe mé. ⁴ Co jehe mé tti danjo vida, co are chojni ditticaon ngain jehe mé, vida jiji inchin joadingasán para ixin cain chojni. ⁵ Co joadingasán jiji jinchengasán ngain tti jí naxin xehe, co tti naxin xehe ttixinha ncheganga jehe joadingasán mé.

⁶ Co Dios coinchiehe ná xí que vinhi Juan. ⁷ Co xí mé vehe xa ná testigo para nichja xa de ixin jehe joadingasán mé para que cain chojni rroguitticaon na de ixin jehe tti nichja xí mé. ⁸ Juan jeha jehe tti joadingasán, jehe jeha ná testigo que joí para nichja ndoa de ixin joadingasán mé. ⁹ Tti mero joadingasán que nchengasenhe cain chojni, ojítí ngataha nontte ngain tiempo mé.

¹⁰ Co jehe Xenhe Dios, tti dinhi Palabra que Dios nichja, vehe ngataha nontte, co masqui jehe joinchechjian nontte, chojni ngataha nontte joatsoanha na jehe. ¹¹ Jehe joí ngain nacioen pero chojni de nacioen vayeha na. ¹² Pero ixinha mé, icanxin chojni vayé na jehe co vitticaon na. Co ngain chojni jiji jehe joanjo joachaxin de dinhi na xenhe Dios. ¹³ Co jehe na jeha inchin xenhe ná ndodaha de ngataha nontte nttihi que doan inchin cain chojni, co jeha ixin ná xí joinao ná nchí, o ixin ná xí joinao concjiji xenhe; jehe na jeha jamé na, jehe na mero xenhe Dios ixin Dios ndačo jañá.

¹⁴ Co jehe Xenhe Dios, tti dinhi Palabra que Dios nichja, conchjian ná xí co vehe ngayá na, co jehe anto rinao cainxin chojni, co jehe chonxin cainxin tti ndoa. Co janha na vicon na tti joachaxin que jehe chonda ixin jehe tti nacoaxinxon Xenhe Ndodá na que ttjen ngajni. ¹⁵ Juan nichja jian de ixin jehe xí mé, co ndačo:

—Xí jiji tti janha vandačhjan are ndačhjan que jehe tti tsí después de janha, mé tti icha importante que janha ixin ovehe icha saho que janha.

¹⁶ Jehe chonda cainxin tti jian co cain ján na dayé na tti jian mé cada nchanho ixin jehe nttanchaon na. ¹⁷ Tti ley de Dios vayé na de ixin Moisés, pero tti rinao na cain chojni co tti ndoa, cayoi mé ttixin de ngain Jesucristo. ¹⁸ Xonhi tiempo ná chojni vicon Dios. Pero tti nacoaxinxon Xenhe Dios que jí ngain jehe chonxin Xan jian ngain jehe, co Xan mé Xan jointtagatsoan na de ixin Dios.

Tti ndačo Juan que vancheguitte chojni

(Mt. 3.11-12; Mr. 1.7-8; Lc. 3.15-17)

¹⁹ Chojni judío que vinttechonda joachaxin ngain Jerusalén rroanha na canxion dána co canxion xí que vinttechonda xa xa ngain nihngo icha importante. Rroanha na chojni mé ngain Juan, tti vancheguitte chojni, para joanchianguihi na ixin quensen jehe. ²⁰ Co jehe ndačo claro:

—Janha jeha Cristo na tti Dios rroanha.

²¹ Cottimeja cjan na joanchianguihi na:

—¿Quensen jaha remé? ¿Ajaha tti profeté Dios dinhi Elías?

Co Juan ndačo:

—Nahi, jeha janha.

Cottimeja joanchianguihi na:

—¿Queñén remé? ¿Ajaha tti profeté Dios que Moisés ndačo que tsí?

Co Juan ndačo:

—Nahi.

²² Cottimeja ndache na:

—¿Quensen jaha remé? Ixin chonda na que rronhattjan na tti chojni que rroanha na nttihi tti rrondačo jaha. ¿Quehe rrondachjenji ni ra ixin quensen jaha remé?

²³ Juan ndačo:

—Profeta Isaías nichja de ixin janha are jehe ndačo que tsinhi ra tté ná chojni que toyaoxin de ngagaha jna que rrondačo: “Danttjehe ra ná nttiha nao para ixin jehe tti chonda cain joachaxin.”

²⁴ Co chojni mé xifariseo rroanha na para joanchianguihi na Juan cain mé. ²⁵ Co jehe na ndačo na ngain:

—Mexinxin, si jeha jaha tti Cristo que Dios rrorroanha, ni jeha Elías, ni jeha tti profeté Dios, ¿quedonda ncheguitte chojni?

²⁶ Juan ndačo:

—Janha nttaguitte chojni conixin jinda, pero de ngayá ján na xo judío na jí ná chojni que chonxinha ra. ²⁷ Chojni mé tsí después de janha masqui jehe icha importante que janha. Co janha jiquininxinha na ni siquiera tsonxindangá corrié catté.

²⁸ Cain jihi conhe ngain tti lugar que dinhi Betábara, que jí lado çhinxin nchanho de río Jordán, tti vanheguittexin Juan chojni.

Jesús çjoi inchin coleco para ixin Dios

²⁹ Ndoexin Juan vicon Jesús jitonchienne ngain jehe, co Juan ndačo:

—Tsjenxin ra, xí jihi inchin tti coleco que çanjo para ngain Dios ixin jehe xa sanjo xa cuerpoe xa inchin ná coleco para tsjenga xa hna cain cosa jianha que nchehe chojni ngataha nontte. ³⁰ Janha nichja de ixin jehe xa are ndačhjan: “Después de janha, tsí iná xí co jehe xa icha importante xa que janha ixin ovehe xa icha saho que janha.” ³¹ Janha mismo venonaha quexehe xí mé, pero janha joihi para jointtaguitte chojni conixin jinda para que chojni judío satsoan na jehe xí jihi.

³² Cai ndačo Juan:

—Janha vicon Espíritu Santo xincanjinxin de ngajni inchin ná contoanajni, co vittohe ngataha jehe xí jihi. ³³ Hasta ngain nchanho mé, janha ça venonaha quensen jehe xa, pero Dios, tti coetonna para jointtaguitte chojni conixin jinda, jehe ndachjenji na: “Are sicon Espíritu Santo rroxincanji co sittohe ngataha ná xí, xí mé tti sincheguittexin chojni conixin Espíritu Santo.” ³⁴ Janha ovicon xí mé, co janha ná testigo na de ixin jehe xí mé que jehe xa ndoa tti Xenhe Dios.

Tti saho chojni que vacao Jesús

³⁵ Ndoexin nttiha vehe Juan iná conixin yó xí que vacao. ³⁶ Co are vicon Juan vatto Jesús, ndačo Juan:

—Tsjenxin ra, yá tti inchin coleco que çanjo para ngain Dios.

³⁷ Tti yó xí que vacao Juan coinhi xa tti ndačo, co sarroé xa Jesús.
³⁸ Cottimeja Jesús tsjehe tti joixin, co vicon ixin terroé cayoi xí mé, co ndačo ngain xa:

—¿Quehe tettjé ra?

Jehe xa vinttendačo xa:

—Maestro, ¿quettinó rrihi?

³⁹ Jesús ndačo:

—Ķacoi ra sitsjehe ra.

Cottimeja vinttecji cayoi xí mé para vintteguicon xa quettinó vehe Jesús co ngoixin rato mé nttiha tavintte xa ngain Jesús hasta ndajoexin nchanho mé ixin hora mé cjoí inchin nó hora tsocjin.

⁴⁰ Ná de jehe tti yó xí que vinttequinhi tti ndačo Juan co sarroé xa Jesús, ná de jehe xa vinhi xa Andrés, co mé cjoí xanchó Simón Pedro.

⁴¹ Andrés ixonhi chonhe, jehe sacjoi joicjé Simón, xanchó jehe Andrés, co ndačo ngain Simón:

—Vittja na tti Mesías.

Co Mesías rročo Cristo tti Dios rroanha.

⁴² Cottimeja Andrés joicao Simón tti jí Jesús, co are Jesús vicon Simón, ndačo ngain:

—Jaha dinhi Simón, xitsihi Jonás, pero jai jaha sinhi Cefas.

Co Cefas rročo řajeho Pedro ixin nguigoa griego; co cayoi nombre yá rročo řo.

Jesús vayé Felipe co Natanael

⁴³ Ndoexin Jesús řaxaon para que jehe cjoí ngain nonttehe Galilea, pero icha saho jehe vetan Felipe, co ndačo Jesús ngain:

—Ķacoi chjin na.

⁴⁴ Co Felipe mé joixin de ngain rajna Betsaida, řajeho rajné Andrés co Pedro. ⁴⁵ Cottimeja cjoí Felipe joicjé Natanael, co ndačo ngain:

—Janha na vicon na tti xí que dicjin Moisés de ixin xí mé ngain libroe ley, co dicjin cainxin profeta de ixin xí mé cai. Jehe Jesús, xitsihi José, rajné Nazaret.

⁴⁶ Ndačo Natanael:

—¿Apoco nchao sachjexin ná xí jian de ngain Nazaret?

Felipe ndačo:

—Ķacoi sitsjehe.

⁴⁷ Are Jesús vicon que Natanael jitonchienhe, Jesús ndačo:

—Nttihi joí ná xí mero chojni Israel co xí jihi řonhi chojni ncheyehe xa.

⁴⁸ Cottimeja Natanael joanchiangui co ndačo:

—¿Queřen chonxinxin na?

Co Jesús ndačo:

—Janha vicon jaha are jaha tarrihi ngangui nttahigo icha saho que Felipe rrogayaha.

⁴⁹ Cottimeja Natanael ndačo:

—Maestro, jaha tti Xenhe Dios; jaha tti Rey de Israel.

⁵⁰ Jesús ndačo:

—¿Avitticaon na jeho ixin ndattjo vicon jaha tarringahngui nttahigo? Jaha sicon cosa icha jian que jihi.

⁵¹ Cai ndačo Jesús:

—Rrindattjo ra ndoa que jaha ra sicon ra ngajni jixangué co ángel de Dios tsajinhi co rroxincanji ngataha na janha, tti Xí que joixin de ngajni.

2

Are cottehe yó chojni ngain Caná de Galilea

¹ Ní nchanho después vehe ná quiai para yó chojni que cottehe ngain rajna Caná ngain regioen Galilea. Janné Jesús nttiha vehe jan, ² co ndache na Jesús ixin jehe cjoí ngain quiai mé, jehe conixin chojni que vacao. ³ Co are jehe na te nttiha, ndajoexin vino, mexinxin janné Jesús ndačo jan ngain:

—Ichondaha na vino.

⁴ Pero Jesús ndačo:

—Soixin, ¿quedonda ndachjenji na janha yá? Tiempo xa ttiha para janha tsjenguijna chojni.

⁵ Pero jehe janné Jesús ndačo jan ngain chojni que tedanjo jehe vino mé:

—Nchehe ra cain tti jehe rrondattjo ra.

⁶ Nttiha vintte incjaon nchíxa de xo, tti vanchegonda chojni judío para vaconttixin na jinda rá na tsje nttiha inchin costumbré jehe na. Co cada nchíxa mé vaguiquia inchin ochenta o cien litro de jinda. ⁷ Jesús ndačo ngain chojni que tettequia vino:

—Ncheche ra cain nchíxa tehe de jinda.

Co jehe na hasta joinchečetaonca na cain nchíxa mé, ⁸ cottimeja Jesús ndačo ngain na:

—Janché, dantsje ra nchin nda co ttjiohe ra niencargado.

Co jamé joinchehe na. ⁹ Co jinda mé ondadicjan nda vino co jehe noeha ttinó joixin vino mé, jehó cain chojni que cointtjecjan vino mé vinttenohe na ixin jehe na joantsje na jehó jinda. Co tti encargado vayé xinovio ¹⁰ co ndačo ngain xa:

—Cainxin chojni saho danjo na tti vino icha jian, co are cain chojni que dihi, atto ovihí na, cottimeja dihi na tti vino corriente. ¡Pero jaha diquenchjinha tti vino icha jian hasta jaxon!

¹¹ Jihi tti joinchehe Jesús ngain Caná de Galilea co jihi tti saho milagro que jehe joinchehe co milagro mé xagoxin ixin jehe Jesús chonda anto tsje joachaxin. Co cain chojni que vacao Jesús vitticaon na ngain jehe.

¹² Después de jihi, jehe Jesús co janné, co xanchó conixin cain chojni que vacao jehe Jesús sacjoi na para ngain rajna Capernaum, co nttiha vintte na canxion nchanho.

Jesús joincheroa nihngo icha importante

(Mt. 21.12-13; Mr. 11.15-18; Lc. 19.45-46)

¹³ Ixin ojoiconchian tti quiai dinhi pascua para ixin cain chojni judío, Jesús sacjoi para ngain ciudad de Jerusalén. ¹⁴ Nttiha ngain patioe nihngo icha importante vittja Jesús chojni que tenchecji coxinttá, coleco, co conttoa, co chojni que tate ngain puestoe tti dasinguinxin na tomí para chojni vachonda na suelto. ¹⁵ Are Jesús vicon jihi, joinchechjian ná cuarta de jino, co joantsjexin cain chojni mé de nttiha, jehe na conixin coleco na, co coxinttehe na. Co tti chojni que tedasinguixin tomí, joanqué tomí na ngataha nontte co cjoa mesa ndaha. ¹⁶ Co Jesús nichja ngain cain chojni que tenchecji conttoa co ndačo:

—¡Dantsjexin ra cain jiji de ntthi! ¡Nchechjianha ra ngain nchiandoha Nnodana ná ndásin!

¹⁷ Cottimeja tti chojni que vacao Jesús xaxaon na ixin ndačo ngain tti jitaxin Palabré Dios: “Janha anto toñaonxin nchiandoi.”

¹⁸ Cottimeja chojni judío que vinttechonda joachaxin joanchiangui na ngain Jesús co ndačo na:

—¿Quehe señal tsjagohna ni ra para que janha na rrochonxin na seguro que jaha chonda joachaxín Dios para nchehe jiji?

¹⁹ Jesús ndačo:

—Tonxante ra nihngo ichta importante jiji, co nincoa nchanho janha sinttachjian nihngo iná.

²⁰ Cottimeja chojni mé ndačo na:

—Cuarenta y seis nano conchjenhe chojni para joinchechjianxin na nihngo ichta importante jiji. ¿Co apoco jaha nchao sinchechjian nihngo nincoa nchanho?

²¹ Pero tti nihngo que Jesús nichja, nichja de ixin mero cuerpoe jehe.

²² Mexinxin are Jesús xechon de tti jehe ndavenhe, cain chojni que vacao jehe xaxaon na de ixin jiji tti jehe ndačo, co vitticaon na tti ndačo ngain tti jitaxin Palabré Dios, co cai vitticaon na tti ndačo Jesús ngain na.

Jesús chonxin quehe xaxaon cain chojni

²³ Are Jesús vehe ngain Jerusalén ngain quiai que dinhi pascua, atto tsje chojni vitticaon na jehe are vicon na tsje milagro que jehe joinchehe.

²⁴ Pero Jesús vechondaha confianza ngain na ixin jehe ovechonxin ngain ansén cain na. ²⁵ Jehe gondeha ni ná chojni que rrondache de ixin ichta chojni ixin jehe mismo venohe quehe xaxaon cain chojni.

3

Are Jesús nichja ngain Nicodemo

¹ Vehe ná xifariseo vinhi Nicodemo, mé cjoí ná xí importante ngayé chojni judío. ² Nicodemo jiji ná ttie cjoí para joitsjehe Jesús co ndačo:

—Maestro, nona na que Dios rroanha jaha para sinchecoanna ni ra, ixin xonhi chojni nchao sinchehe tsje cosa inchin jaha rrinchehe si Dios coha ngain chojni mé.

³ Cottimeja ndačo Jesús:

—Janha rrindattjo ndoa, que xonhi chojni nchao rrochonda parte ngain tti ttetonha Dios si jehe tsoncjiha iná.

⁴ Nicodemo ndačo:

—Pero ¿queén ná xí ojje rrocjan tsoncjihi iná? ¿Apoco nchao rrocjan xa ngaxinhi tsehe janné xa para rrocjan xa tsoncjihi xa iná?

⁵ Co Jesús ndačo:

—Janha rrindattjo ndoa, que tti chojni que tsoncjixinha de ixin jinda co de ixin Espíritu Santo čhoha sehe ngain parte tti ttetonha Dios. ⁶ Tti toncjixin de ngain chojni, jehe jichjon jeho de ngain cuerpoe, co tti otoncjihi de ixin Espíritu Santo, jehe ojichjon de ngain espiritue. ⁷ Xaonha que rrindattjo: “Cainxin chojni chonda na que tsoncjihi na iná.” ⁸ Čhintto danotte ttinó jehe rinao, co jaha ttinhi ruido que nchechjian čhintto, pero noaha de ttinó ttixin čhintto co ni ttinó sattji čhintto. Jańá cai chojni čhoha ttinxin na quežén chojni toncjihi de ixin Espíritu Santo.

⁹ Cottimeja, Nicodemo cjan joanchiangui iná:

—¿Queñén nchao tsonhe jiji?

¹⁰ Jesús ndaño:

—Jaha, que ná jian maestroe ley de Dios para chojni Israel, ¿aãa noaha cain cosa jiji? ¹¹ Janha rrindattjo ndoa, que janha na nichja na de lo que tti nona na co janha na nichja na de lo que tti vicon na, pero jaha ra ditticaonha ra tti ndattjo ra janha na. ¹² Si ditticaonna na ni ra are rrinichjaha ra de ixin cosa ngataha nontte jiji, ¿queñén sitticaon ra si rronichjaha ra de ixin cosa que jí ngajni?

¹³ Xõnhi chojni coajinhi para ngajni, sino janha, tti Xí que joixin de ngajni, co janha rrihi nttiha. ¹⁴ Co jañá inchin Moisés joinchehjian ná conché de chia co coenganito conché mé nttá ngagaha jna, cai janha, tti Xí que joixin de ngajni, chonda que saringanito ná nttá ¹⁵ para que cainxin chojni que ditticaon nganji na janha, chojni mé tsjiha na ngain infierno, sino que rrochonda na iná vida naroaxin que xõnhi tiempo tsjexin.

Queñén Dios rinao cainxin chojni

¹⁶ Dios anto rinao cainxin chojni ngataha nontte, mexinxin joanjo tti nacoaxinxon Xenhe para que cainxin chojni que ditticaon ngain jehe Xan tsjiha na ngain infierno, sino que rrochonda na iná vida naroaxin que xõnhi tiempo tsjexin. ¹⁷ Dios jeha rroanha Xenhe ngataha nontte para sinchecastigá Xan chojni; Dios rroanha Xenhe para tsjenguijna Xan cain chojni para rrochondaha na castigo de cainxin cosa jianha que nchehe na.

¹⁸ Tti chojni que ditticaon ngain Xenhe Dios, chojni mé rrochondaha na castigo, pero tti chojni que ditticaonha, mé Dios ondaño ixin sinchecastigá na ixin ditticaonha na tti nacoaxinxon Xenhe Dios. ¹⁹ Dios sinchecastigá tti chojni que ditticaonha Jesucristo ixin are Jesucristo jói ngataha nontte, jehe jói inchin joadingasán, co jehe na icha joincheoxinhi na tti naxin xehe ixin vanchehe na cosa jianha. ²⁰ Cain chojni que nchehe jianha ningaconhe na joadingasán co tonchienha na ngain tti jí joadingasán para que tsononxinha tti jianha que tenchehe na. ²¹ Pero chojni que tenchehe jian, chojni mé tonchienhe na ngain tti jí joadingasán para que sicon icha chojni que jehe na tenchehe na inchin rinao Dios.

Juan, tti vanheguitte chojni, cjan nichja de ixin Jesús

²² Después de cain jiji, Jesús cjo conixin tti chojni que vacao para ngain nonttehe Judea, co vintte na canxion tiempo nttiha. Co joincheguitte na chojni nttiha. ²³ Cai tiempo mé, Juan joincheguitte chojni ngain ná rajna que dinhi Enón, chian ngain rajna Salim ixin nttiha vehe atto yé jinda co chojni vaquí na co vajiguitte na. ²⁴ Jiji conhe icha saho que are Juan coiaxinhi na ngain cárcel.

²⁵ Cottimeja canxion chojni que vacao Juan joinchediscutí na ngain canxion chojni judío de ixin queñén icha jian ncheguitte na chojni para toroaxin na de tti jianha que nchehe na. ²⁶ Mexinxin cjo na co joindache na Juan:

—Maestro, ¿aãaxaon tti vehe nganji are jaha joarihi lado çinxin nchanho de río Jordán, tti jaha ndachjenji ni ra? Jai jehe mé jinheguitte chojni co cainxin na teditticaon na jehe.

²⁷ Cottimeja Juan ndaño:

—Ni ná chojni čhoha rrochonda joachaxin si Dios rrochjeha. ²⁸ Jaha ra mismo coinna ra are ndačhjan claro que janha jeha tti Cristo que Dios rroanha, pero janha tti chojni que joihi icha saho de jehe. ²⁹ Are chojni tottehe na, tti chonda xannovia, mé tti novio, co tti amigo xinovio jí nttiha co atto ché are ttinhi nichja xinovio. Jañá janha jai cai anto chahna are chojni cjoí na ngain Jesús. ³⁰ Jehe chonda que icha co icha importante sehe, co janha chonda que saríhi icha co icha menos importante.

Juan nichja de ixin tti ttixin de ngajni

³¹ Juan ndačo cai:

—Tti ttixin de ngajni chonda icha tsje joachaxin de cainxin. Co tti ttixin de ngataha nontte jehe de ngataha nontte, co nichja de ixin cosa de ngataha nontte. Pero tti ttixin de ngajni, jehe chonda joachaxin ngain cainxin cosa, ³² co nichja de ixin tti jehe vicon co tti jehe coinhi, pero xonhi chojni ditticaon tti jehe ndačo. ³³ Pero si čhoan ni ditticaon, jañá xago ixin jehe ditticaon que Dios ndačo tti ndoa. ³⁴ Jehe tti Dios rroanha nichja palabré Dios, ixin Dios danjo Espíritu Santo ngain jehe hasta tti ichoha. ³⁵ Ndodé rinao Ndo jehe, co chjé Ndo cainxin joachaxin. ³⁶ Chojni que ditticaon Xenhe Ndo chonda na iná vida naroaxin que xonhi tiempo tsjexin. Pero tti rinaoha ditticaon Xenhe Ndo, rrochondaha vida mé, co sayé tti anto soji castigoe Dios.

4

Tti ndačo Jesús ngain ná nčhí de Samaria

¹ Cottimeja xifariseo coinhi na que Jesús vechonda icha tsje chojni que vaguitticaon co icha tsje chojni vancheguitte que Juan. ² Pero jeha Jesús tti vancheguitte chojni; jeha tti chojni que vacao Jesús tti vancheguitte na. ³ Co are Jesús conohe jihi, jehe vačhjexin de Judea para sacjan ngain Galilea.

⁴ Co ngain viajé chonda que vatto ngain regioen Samaria. ⁵ Co nttiha joihi ngain ná rajna que vinhi Sicar, chian ngain nontte que Jacob joanjo ngain xenhe, xan vinhi José, anto tsje nano icha saho. ⁶ Co nttiha vehe tti pozo que vancheguini na pozoe Jacob. Jesús ocončhjen jói, mexinxin tavetanda ngandehe pozo nttiha. Co hora mé inchin ngosine nchanho. ⁷⁻⁸ Co cain chojni que vacao Jesús savintteci na ngain rajna para joiqehna na cosa que sine na. Co hora mé ná nčhí de Samaria jói nčha ngain pozo mé para joica nčha jinda, co Jesús ndačo ngain nčha:

—Chjana nchin jinda sihi.

⁹ Cottimeja jehe tti nčhí samaritana mé ndačo nčha ngain Jesús:

—Jaha ná chojni judío, ¿quedonda danchiana jinda janha, que janha samaritana na?

(Jehe nčha ndačo nčha jamé ixin chojni judío čhoha na nichjé na chojni samaritano.) ¹⁰ Cottimeja Jesús ndačo:

—Si rroconoha jaha tti danjo Dios co quensen tti jidanchiaha jinda, seguro que jaha rroganchiana jinda janha, co janha rrochjaha jaha jinda que danjo vida.

¹¹ Tti nčhí mé ndačo:

—Soixin, ni chondaha tti santsjexin jinda co pozo atto nihnga. ¿De ttinó rrochjananxin jinda que danjo vida? ¹² Ndogoelitona na xančhjen que vinhi Jacob cointtoena na pozo jihi, tti jehe ndo mismo vaguihi ndo jinda

nttihi, co nttihi vaguihi cain xenhe ndo jinda co cain coxigoe ndo. ¿Apoco jaha icha que jehe ndo?

¹³ Jesús ndačo:

—Cain chojni que dihi jinda jiji rrocjan rrondačo sihi na jinda iná; ¹⁴pero tti chojni que sihi tti jinda que janha danjo, ixonhi tiempo rrocjan rrondačo sihi na jinda mé iná, ixin tti jinda que janha danjo rročinhi jinda mé inchin ná manantial ngaxinhi cuerpoe chojni que sihi nda para sanjo nda iná vida naroaxin que xonhi tiempo tsjexin ngain chojni que dihi jinda mé.

¹⁵ Cottimeja ndačo jehe tti nčí mé:

—Soixin, chjana jinda yá janha, para que janha irrocjanha rrondačo sihi jinda iná, ni irrochondaha que sihi nttihi ngain pozo jiji para sigantsje jinda.

¹⁶ Jesús ndačo:

—Ttji digayehe xixiha, cottimeja sihi nttihi iná.

¹⁷ Jehe tti nčí ndačo:

—Janha chondaha xixihna.

Cottimeja ndačo Jesús:

—Jaha chonda razón ixin ndačo que chondaha xixiha ¹⁸ ixin jaha ojoaricoho naho xí, co tti naho xí mé cjoí mero xixiha, pero tti xí que chonda jai jaha xixiha. Mexinxin jaha ndačo tti ndoa de ixin jiji.

¹⁹ Tti nčí mé are coinhi jiji ndačo:

—Soixin, janha ttianxin que soixin ná profeté Dios. ²⁰ Nigoelitona na xančhjen samaritano joinchesayehe na Dios ngataha jna jiha, pero jaha ra xo chojni judío ndačo ra que ngain Jerusalén, nttiha tti jiquinixin sinttasayaxin na Dios.

²¹ Jesús ndačo:

—Ditticaon tti rrindattjo, que tsí nchanho que jaha ra sinchesayehe ra Ndodá na pero irrochondaha ra que tsji ra ngain jna yá ni ngain Jerusalén. ²² Jaha ra xo samaritano ra noaha ra de ixin quensen nchesayehe ra, pero janha na nona na de ixin quensen nttasayá na ixin tti chojni que tsjenguijna icha chojni para rrochondaha na castigo de cain cosa jianha que nchehe na, jehe chojni mé joixin de ngain chojni judío. ²³ Pero tsí nchanho para que tti chojni que ndoa nchesayehe na Ndodá na pero sinchehe na conixin ansén na jian co inchin jehe Ndo rinao Ndo, co jai ojoí nchanho mé. Ixin Ndodá na rinao Ndo que jañá sinchehe tti chojni que nchesayehe Ndo. ²⁴ Dios jehe espíritu, co tti chojni que nchesayehe Ndo chonda na que sinchehe na conixin ansén na jian co inchin jehe Ndo rinao Ndo.

²⁵ Tti nčí mé ndačo:

—Janha nona que tsí tti Cristo que Dios rroanha, co are jehe tsí, jehe rrondachjenji na cainxin.

²⁶ Jesús ndačo:

—Janha tti Cristo na, tti jinichja nganji jaha.

²⁷ Co rato mé vinttequí tti chojni que vacao Jesús, co jehe na vinttegoan na admirado ixin Jesús tajitjao ná nčí. Pero ni ná na joinaoha na joanchianguihi na Jesús ixin quehe rinao nčí mé o de quehe jitjao Jesús ncha. ²⁸ Cottimeja tti nčí mé nttiha cointtohe nchi xehe co sacjoi para ngagaha rajna para joindache chojni:

29 —*X*acoi ra sitsjehe ra ná xí que ndachjenji na janha cainxin tti janha jointtaha. *¿*Ajeha jehe xí jiji tti Cristo que Dios rroanha?

30 Cottimeja tsje chojni vinttegačhjexin na de rajna mé para vinttecji na tti jí Jesús. 31 Co are nčí mé jindache ncha chojni ngain rajné ncha, chojni que vacao Jesús joinchetsenhe na ñao jehe Jesús co ndačo na:

—Maestro, jintte.

32 Pero Jesús ndačo:

—Janha chonda tti jine que jaha ra chonxinha ra.

33 Co tti chojni que vacao Jesús coexinhi na joanchianguihi chó na jeho na co ndačo na:

—*¿*Ani čhoan chojni joiaohe tti joine?

34 Pero Jesús ndačo:

—Are janha nttaha inchin rinao jehe tti rroanha na, co tsjena xé jehe, jiji inchin tti jine janha. 35 Jaha ra ndačo ra: “*xa* ditján nó conittjao para cosecha”, pero janha ndattjo ra: tsjehe ra; tsje chojni ttí nganji na. Co cain nimé inchin trigo que odicha co onchao jí para tsjejo ni. 36 Tti nchehe *xa* que ttjejo chojni mé, jehe inchin ninchehe *xana* ngain cosechana que datse chojni para rrochonda na iná vida naroxin que *xonhi* tiempo tsjexin. Mexinxin tti ttenga co tti tsín cosecha ché na nataonxin. 37 Ixin ndoa tti ndačo dicho: “Jé tti ttenga co jé tti tsín cosecha.” 38 Janha rroanha jaha ra para joitsinhi ra cosecha tti *xonhi xa* joinchehe ra jaha ra. Jañá jé ni joinchehe *xa*, co jaha ra tsjejo ra cosecha.

39 Tsje chojni ngain jehe rajna mé de ngain Samaria vitticaon na Jesús, jeho ixin tti ndačo tti nčí jiha are ndačo ncha: “Jehe ndachjenji na cainxin tti jointtaha janha.” 40 Mexinxin are joí tsje chojni samaritano, jehe na joinchetsenhe na ñao Jesús ixin tarrogehe ngain na. Co Jesús vittohe ngain na nttiha yó nchanho, 41 co icha tsje na vitticaon na are coinhi na tti ndačo Jesús. 42 Cottimeja jehe na ndache na jehe tti nčí mé:

—Jai ditticanho na, co jeoha ixin tti jaha ndachjenji ni ra, cai ixin janha na mismo coian na tti nichja jehe, co nona na que ndoa jehe tti Cristo que Dios rroanha para que tsjenguijna cain chojni ngoixin mundo para rrochondaha na castigo de cain cosa jianha que nchehe na.

Jesús joinchexingamehe ná xenhe ná xiempleadoe gobierno

43 Yó nchanho vatto, cottimeja Jesús vačhjexin de jehe rajna ngain regioen Samaria co joinchehe sigue viajé para ngain nonttehe Galilea. 44 Co ndačo Jesús: “Chojni nchesayeha na ná profeté Dios que joixin de ngain *xajeho* rajné na.” 45 Are joiji Jesús ngain Galilea, chojni nttiha vayé na Jesús jian ixin cai dinttecji na tti quiai dinhi pascua ngain Jerusalén co nttiha vintteguicon na cain tti joinchehe Jesús ngain quiai mé.

46 Cottimeja Jesús cjan para ngain rajna Caná ngain Galilea, tti cjoncjamanxaxin Jesús jinda vino. Co nttiha vehe ná xí vechonda jie joachaxin ngain gobiernoe rey. Co xí mé vechonda *xa* ná xenhe *xa* que venihi ngain rajna Capernaum. 47 Co are xí mé conohe *xa* que Jesús ojoixin de Judea co joí ngain Galilea, xí mé cjoí *xa*, joitsjehe *xa*, co joinchetsenhe *xa* ñao Jesús ixin tsji ngain nchiandoha *xa* para sinchexingamehe xenhe *xa* de čin que chonda *xa* ixin ovehe de ndarroguenhe xan. 48 Cottimeja Jesús ndačo ngain xí mé:

—Jaha ra ditticaonha ra si diconha ra canxion señal co milagro.

49 Pero tti xí mé ndačo:

—Soixin, daca žacoi, ante que ndasene xanhna.

⁵⁰ Cottimeja ndačo Jesús:

—Sacjan ngain nchiandai; xanha oxingamehe xan.

Tti xí mé vitticaon tti ndačo Jesús, co sacjoi xa. ⁵¹ Co are ochian jidiji xa nchiandoha xa, vačhe ninchehe žé xa para joichoexin na xa ngatja nttiha, co ndačo na ngain xa:

—Xanha oxingamehe xan.

⁵² Cottimeja jehe xa joanchiangui xa ngain na ixin quehe hora coexinhi xingamehe xenhe xa de ixin tti chin que veyá xan, co jehe na ndačo na:

—Jna, ná hora después de ngosine nchanho ndavačhehe xan soa.

⁵³ Cottimeja jehe xa žaxaon xa que hora mé ndačo Jesús ngain xa: “Xanha oxingamehe xan”; co jehe xa conixin cain nindoha xa vitticaon na Jesús.

⁵⁴ Jihi tti yoxin milagro que joinchehe Jesús are jehe cjanxin de ngain Judea para jói ngain Galilea.

5

Jesús joinchexingamehe ná xí que čhoha vacji ngain rajna Betesda

¹ Después de jiji, chojni judío joinchexian na ná quiai; co Jesús cjan ngain ciudad de Jerusalén. ² Ngain ciudad mé, chian ngain tti puerta que dinhi “Puerté Coleco” nttiha jí ná ttoe que jiria jinda que ngain nguigoa hebreo dinhi ttoe mé Betesda. Co ngain ttoe mé jí naho portal. ³ Nttiha tetsinga tsje chojni nihi ngataha nontte. Nttiha te chojni tti čhoha dicon, co tti čhoha tji, co tti čhoha ttingui; co cain chojni mé techonhe na nttiha hasta que jinda mé tsinguitjen nda. ⁴ Ixin te rato que nttiha vaxincanji ná ángel ngain ttoe mé co vanchenguitjen jinda, co tti nihi que saho vajingui jinda mé, jehe ndavaxingamehe de quexeho chin que jehe vechonda. ⁵ Co nttiha vehe ná xí que ovechonda treinta y ocho nano de venihi xa. ⁶ Are Jesús vicon que xí mé tajitsinga xa nttiha, jehe ovenohe ixin anto sé venihi xa. Mexinxin ndačo ngain xa:

—¿Arinao rroxingamaha?

⁷ Co jehe tti nihi mé ndačo:

—Soixin, janha chondaha quensen rrožangui na jinda are tsinguitjen nda. Cada nttiha que janha rinaho sihngui nda, oje ni dingui nda icha saho.

⁸ Jesús ndačo:

—Dingattjen, co tsinhi caniaha co sattjixin de nttihi.

⁹ Co rato mé jehe xí mé ndaxingamehe xa co tsín xa caniehe xa co coexinhi xa sacjoixin rotté xa. Pero ixin nchanho mé, mero nchanho para vanchexogaha na, ¹⁰ chojni judío que vinttechonda joachaxin ndačo na ngain jehe tti xí que xingamehe:

—Jai nchanho que ncheha ni ža, mexinxin jianha para que jaha tsame caniaha.

¹¹ Tti xí mé ndačo:

—Tti joinchexingamana ndachjenji na: “Tsinhi caniaha co sattji.”

¹² Cottimeja joanchiangui jehe na co ndačo na:

—¿Quexehhe tti ndattjo: “Tsinhi caniaha co sattji”?

¹³ Pero tti xí mé venoeha quensen joinchexingamehe ixin Jesús sacjoi ngayehe tti anto tsje chojni que te nttiha. ¹⁴ Después Jesús vetanxin tti xí mé ngain nihngo icha importante, co ndačo Jesús ngain xa:

—Tsjenxin, jai jaha oxingamaha, mexinxin cjanha nchehe cosa jianha para que rrocjanha tsonha icha tangui.

¹⁵ Cottimeja tti xí mé sacjoi co joindačo ngain chojni judío que vinttechonda joachaxin ixin Jesús tti joinchexingamehe jehe. ¹⁶ Mexinxin chojni mé joiningaconhe na Jesús co joinao na narrogoenxon na are maho ixin vanchehe Jesús jańá ngain nchanho que jiquininxinha nchehe ni ǵa. ¹⁷ Pero Jesús ndačo ngain na:

—Ndodana cainxin tiempo jinchehe Ndo ǵa, co janha cai rrinttaha ǵajeho ǵa mé.

¹⁸ Mexinxin chojni mé icha joinao na narrogoenxon na Jesús, jeoha ixin vancheha Jesús caso ley tti nchanho que jiquininxinha nchehe ni ǵa, cai joinao na narrogoenxon na Jesús ixin jehe vandačo ixin jehe inchin Dios are jehe ndačo ixin Dios tti Ndo dé jehe.

Tti joachaxin que chonda Xenhe Dios

¹⁹ Cottimeja Jesús ndačo ngain na:

—Ndoa tti rrindattjo ra que janha, tti Xenhe Dios, čoha sinttaha ni ná cosa inchin janho sinaho, jeho nttaha tti dicon nchehe Ndodana. Cainxin tti nchehe Ndodana, cai janha, tti Xenhe Ndo, sinttaha. ²⁰ Ndodana rinao na Ndo co tǵagohna Ndo cain tti jehe Ndo nchehe Ndo; co tsjago Ndo nganji na cosa que chonda icha joachaxin que hasta jaha ra soan ra admirado. ²¹ Co jańá inchin Ndodana nchexingamehe Ndo chojni que ondavenhe co chjé Ndo vida, cai janha, tti Xenhe Ndo, danjo vida ngain chojni que rinaho sayé vida mé. ²² Co Ndodana ǵonhi chojni nchejuzguehe Ndo, ixin chjana Ndo janha, tti Xenhe Ndo, cainxin joachaxin para que janha sinttajuzgá cain chojni, ²³ para que cainxin chojni sinchesayana na janha, tti Xenhe Ndo, inchin nchesayehe na jehe Ndo. Tti chojni que nchesayanaha janha, tti Xenhe Ndo, cai nchesayeha na jehe Ndodana que rroanha na janha.

²⁴ Janha rrindattjo ra ndoa: Tti chojni que nchehe caso tti janha rrindačhjan, co ditticaon chojni mé ngain jehe tti rroanha na janha, chojni mé chonda na iná vida naroaxin que ǵonhi tiempo tsjexin, co jehe na rrochondaha na castigo ixin ovattohe na tti ndadenhe ni co te na ngain tti techon ni. ²⁵ Janha rrindattjo ra ndoa que tsí nchanho are chojni que inchin ondavenhe tsinhi na ttana janha, tti Xenhe Dios, co chojni que sitticaon tti ndačhjan rrochonda na iná vida naroaxin, co jehe nchanho mé ojoí nchaon jai. ²⁶ Ndodana chonda Ndo joachaxin para danjo Ndo iná vida naroaxin jehe Ndo mismo, co cai chjana Ndo joachaxin mé janha, tti Xenhe Ndo, para que janha cai sanjo vida mé. ²⁷ Co chjana Ndo joachaxin para que janha sinttajuzgá chojni ixin janha tti Xí que joixin de ngajni. ²⁸ Jaha ra doanha ra admirado de ixin jiji ixin tsí nchanho que cain chojni que ondavenhe tsinhi na ttana, ²⁹ co sačjenguixin na de tti teǵavá na. Co tti nijoinchehe jian rroxechon na para rrochonda na iná vida naroaxin, pero tti nijoinchehe jianha rroxechon na para rrochonda na castigo.

QueXén chojni nchao rrochonxin ixin Jesús tti Xenhe Dios

³⁰ Janha čoha sinttaha ni ná cosa inchin janho rinaho. Janha nttaha juzgado inchin ttetonna Ndodana co cain tti nttaha, mé jian ixin ǵaxaonha sinttaha inchin janha rinaho, sino que janha nttaha joxon inchin rinao Ndodana que rroanha na. ³¹ Si janho rrondačhjan ixin

janha anto jian na, palabra mé xonhi xé si coha icha chojni tti rrondaço jian de ixin janha. ³² Pero Ndodana cai nohe Ndo jian tti janha nttaha, co janha nona que tti ndaço Ndo de ixin janha, ján rentte. ³³ Co jaha ra rroanha ra chojni para joanchianguihi na Juan co ndoa tti jehe ndattjo ra de ixin janha. ³⁴ Pero janha gondanaha para que chojni rronichja jian de ixin janha; janha jeho ndaçhjan jihi para que jaha ra nchao sitticaon ra tti ndaçhjan para rrochonda ra iná vida naroaxin. ³⁵ Juan, jehe vehe inchin ná lámpara que vanchengasán. Co jaha ra joinao ra co chaha ra de ixin jehe joadingasán mé, pero seha. ³⁶ Juan vanichja jian de ixin janha, pero jai cain tti rinao Ndodana, mé tti janha rrinttaha ngayaha ra co mé tti tjagoha ra icha jian ixin ndoa que Ndodana tti rroanha na. ³⁷ Cai Ndodana que rroanha na janha, jehe Ndo ndaço Ndo que cain tti ndaçhjan ndoa. Pero jaha ra xonhi tiempo coinhi ra tté Ndo ni diconha ra Ndo. ³⁸ Co joajné Ndo joixinha ngain ansean ra ixin ditticaonha ra nganji na, tti jehe Ndo mismo rroanha Ndo. ³⁹ Jaha ra tetangui ra tti libro que jitaxin Palabré Ndo conixin anto tsje ciudadano, ixin rinao ra sinchí ra nttiha quexén rrochonda ra iná vida naroaxin que xonhi tiempo tsjexin, co jehe libro mé tti nichja de ixin janha. ⁴⁰ Pero jaha ra rinaoha ra ditticaon na nganji na para que sayehe ra vida mé.

⁴¹ 'Janha rinaoha que chojni sinchesayana. ⁴² Janha chonxin jaha ra co nona que jaha ra rinaoha ra Dios. ⁴³ Janha joihi ixin Ndodana rroanha na co jaha ra rinaoha ni ra, pero si jecoa iná chojni rroquí para rrojindattjo ra tti jeho xaxaon, chojni mé, nchoe, rrojinao ra. ⁴⁴ Jaha ra çhoha ditticaon ra nganji na ixin jaha ra johu rinao ra icha chojni sinttasayaha ra co rinaoha ra sinttasayaha ra tti nacoaxinxon Dios. ⁴⁵ Jaha ra xaxaonha ra ixin janha tsjanguilha ra ngattoxon con Ndodana. Janha nahi, ixin ley que vayé Moisés, mé tti tsjanguilha ra masqui jaha ra xaxaon ra ixin ley mé sinttaroa ra ngattoxon con Dios. ⁴⁶ Ixin si jaha ra rroguitticaon ra tti ndaço Moisés, cai rroguitticaon ni ra janha ixin Moisés dicjin de ixin janha. ⁴⁷ Pero jaha ra ditticaonha ra tti jehe dicjin, mexinxin ¿quexén sitticaon ra tti janha rrindattjo ra?

6

*Are Jesús joanjo tti joine naho mil xí
(Mt. 14.13-21; Mr. 6.30-44; Lc. 9.10-17)*

¹ Después de cain jihi, Jesús sacjoi para toenixin lago de Galilea, que xajeho lago mé tti dinhi Tiberias. ² Anto tsje chojni varroé Jesús ixin vaguicon na que Jesús vanchehe tsje milagro are vaguicon na que Jesús vanchexingamehe chojni nihi. ³ Cottimeja Jesús co cain tti chojni que vacao coani na ná jna co tavintte na nttiha nchion. ⁴ Co jamé conhe chian ngain tiempoe tti quiai dinhi pascua. ⁵ Co are Jesús vicon ixin anto tsje chojni terroé, Jesús ndaço ngain Felipe:

—¿Quettinó siquehna na tti sine cainxin chojni jihi?

⁶ Pero jehe ndaço jaña para viconxin quehe rrondaço Felipe ixin Jesús ovenohe jian quehe sinchehe. ⁷ Cottimeja Felipe ndaço:

—Cain tomi que dacha ná tti nchehe xa yáto conittjao xa sittjaha tomi mé para sinanxin cain niottja que sine cain chojni yá.

⁸ Cottimeja Andrés, xanchó Simón Pedro co cai jehe ná de tti chojni que vacao Jesús; jehe Andrés ndaço ngain Jesús:

⁹ —Nttihi jí ná xanxichjan que chonda naho niottja de cebada co yó copescado, pero ¿queén sittjaxin jihi para cainxin chojni yá?

¹⁰ Cottimeja ndačo Jesús:

—Ndache ra cainxin na que tasintte na ngataha nontte.

Anto cachji vehe ngain lugar mé, co tavintte cain nimé. Co jeho xí vintte naho mil xa. ¹¹ Cottimeja Jesús coá tti naho niottja mé ngain rá, co joanjo gracias ngain Dios. Cottimeja Jesús joanjo niottja mé ngain tti chojni que vacao, co jehe chojni mé conchjea na niottja mé ngain chojni que tate nttiha. Co cai jamé joinchehe Jesús ngain copescado co chojni que vacao Jesús conchjea na ngain chojni cain tti joinao na. ¹² Co are ojoexin joine na co ndacojehe na, Jesús ndačo ngain chojni que vacao:

—Datse ra cain pedazo de niottja que xehe para que xonhi sitján.

¹³ Jehe na joatse na nio rioho mé, co joincheaon na tteyó nttaxa de ixin tti pedazo que xexin joine na de tti naho niottja de cebada. ¹⁴ Cottimeja cain chojni mé are vicon na tti milagro jihi que Jesús joinchehe ndačo na:

—Ndoa jehe jihi tti profeté Dios que chonda que tsí ngataha nontte.

¹⁵ Pero Jesús conohe ixin cain chojni mé joinao na sarrojicao na Jesús masqui jehe rroçhoha para que jehe na rrojincheguinhi na Jesús rey de jehe na. Mexinxin sacjoi Jesús hasta tti con jna para que nchao tavehe jeho.

Jesús cjoixin rotté ngataonhe jinda

(Mt. 14.22-27; Mr. 6.45-52)

¹⁶ Co are ondaconttie cain tti chojni que vacao Jesús xincanji na para ngain lago, ¹⁷ co joixinhi na ngain ná barco co coexinhi na coattoa na lago mé para joiji na ngain Capernaum. Co rato mé ondaconaxin xehe co Jesús xa cjanha. ¹⁸ Cottimeja coexinhi cjoa ná çhintto soji, co jinda anto soji cjamanguitaon chó nda. ¹⁹ Co are osacjoi na inchin naho o incjaon kilómetro de ngandehe nda, jehe na vicon na que Jesús jitonchienhe ngain barco mé; conixin rotté jittjaxin ngataonhe nda, co cain jehe na vintteçxaon na. ²⁰ Pero jehe ndačo ngain na:

—Janha joihi, çxaonha ra!

²¹ Cottimeja jehe na içaonha na co chonhe na Jesús para que jehe coani barco cai. Co rato mé ojoiji na ngain tti nontte que jehe na tettji na.

Are chojni cjoé na Jesús

²² Ndoexin tti chojni que ndavittohe toenxin ndachaon tti sacjoixin Jesús conixin tti chojni que vacao, vintteguicon na que cain chojni que vacao Jesús savicao na jeho tti nacoa barco que vehe nttiha, co vintteguicon na que Jesús cjoiha ngain chojni mé. ²³ Pero de cain yá, icanxin barco joixin de ngain ciudad de Tiberias co cjoi chiaon ngain lugar tti joinenxin na niottja después que Jesús joanjo gracias. ²⁴ Mexinxin are vintteguicon cain chojni mé ixin iveha Jesús nttiha ni cain chojni que vacao jehe icoha na nttiha, cain chojni mé vixinhi na barco mé co sacjoi na para rajna Capernaum para joicjé na Jesús.

Jesús tti niottja que danjo vida que xonhi tiempo tsjexin

²⁵ Are cain chojni mé vintteguiji na toenxin lago mé, nttiha viconxin na Jesús iná co joanchianguihi na co ndačo na:

—Maestro, ¿quesa joihi nttihi?

²⁶ Pero Jesús ndačo ngain na:

—Janha rrindattjo ra ndoa que jaha ra ttjé ni ra ixin jointte ra hasta cojaha ra co jaha ixin jaha ra coinxin ra quehe rrocho tti milagro que janha jointtaha. ²⁷ Ncheha ra xa para ixin comida que ndattjexin, nchehe ra xa para ixin tti comida que ttjexinha co rochjá ra iná vida naroaxin que xonhi tiempo tsjexin. Co janha, tti Xí que joixin de ngajni, rochjaha ra tti comida mé ixin Dios Ndodana chjana joachaxin mé.

²⁸ Cottimeja jehe na joanchiangui na co ndacho na:

—¿Quehe chonda na que sinttaha na para que sinttaha na inchin Dios rinao?

²⁹ Co Jesús ndacho:

—Dios rinao que jaha ra ditticaon ra nganji na janha, tti jehe rroanha.

³⁰ Cottimeja jehe na joanchianguihi na Jesús co ndacho na ngain:

—¿Quehe señal nchao sinchehe jaha para que janha na sicon na co sitticanho na jaha? ¿Quehe cosa nchehe jaha? ³¹ Nindogoeleitona na xanchjen joine na maná ngagaha jna inchin ndacho tti libro que jitaxin Palabré Dios: “Dios joanjo niottja de ngajni para joine na.”

³² Jesús ndacho:

—Janha rrindattjo ra ndoa que jaha Moisés tti joanjo niottja de ngajni ngain jehe na; Ndodana danjo tti mero nio que ndoa joixin de ngajni. ³³ Ixin tti niottja que Dios danjo, mé tti jehe joinchexincanjninxin de ngajni para danjo ngain chojni iná vida naroaxin que xonhi tiempo tsjexin.

³⁴ Cottimeja vinttendacho jehe na:

—Soixin, chjana ra niottja yá cainxin nchanho.

³⁵ Co Jesús ndacho ngain na:

—Janha tti niottja que danjo vida. Tti chojni que tsí nganji co sitticaon nganji na janha, chojni mé xonhi tiempo senhe na jinta ni senhe na jinda. ³⁶ Pero inchin ondattjo ra, jaha ra ditticaonha ra masqui ovicon ni ra. ³⁷ Cainxin chojni que chjana Ndodana, tsí na nganji na janha, co cain chojni que sattí nganji na, janha sayá na, ³⁸ ixin janha joixin de ngajni pero jaha para sinttaha inchin janho rinaho, sino para sinttaha inchin rinao jehe tti rroanha na nttihi. ³⁹ Co janhi rinao Ndodana que rroanha na janha nttihi; que janha sinttatjanha ni ná chojni que jehe Ndo chjana Ndo, sino que janha sinttaxechon chojni mé de ngain tti ndadenhe ni ngain tti nchanho are ndatsjexin mundo. ⁴⁰ Co Ndodana que rroanha na rinao Ndo que cain chojni que dicon na janha, tti Xenhe Dios, co ditticaon nganji na, nimé chonda na iná vida naroaxin que xonhi tiempo tsjexin. Co janha sinttaxechon na ngain tti nchanho are tsjexin mundo.

⁴¹ Are Jesús joexin nichja jañá, chojni judío coexinhi na nichja na feo de ixin jehe Jesús ixin jehe ndacho: “Janha tti niottja que joixin de ngajni.”

⁴² Co ndacho na:

—¿Ajeha jihí Jesús, tti xitsihi José? Ján na chonxin na ndodé co janné. ¿Quexén jehe nchao ndacho ixin jehe joixin de ngajni?

⁴³ Cottimeja Jesús ndacho ngain na:

—Nichjaha ra feo. ⁴⁴ xonhi chojni nchao tsí nganji na si tsiaoha na Ndodana que rroanha na, co janha sinttaxechon chojni mé ngain tti nchanho are ndatsjexin mundo. ⁴⁵ Ngain libroe profeté Dios ndacho janhi: “Dios sinchecoehne cain chojni.” Jañá cain chojni que coinhi tti ndacho Ndodana co coanguí na tti ndacho Ndo, chojni mé tsí nganji na janha.

⁴⁶ 'Jeha ixin çhonja chojni vicon Ndodana; çonhi chojni vicon Ndo; tti vicon Ndo, mé jeho tti joixin de ngain Ndo. ⁴⁷ Janha rrindattjo ra ndoa que tti chojni que ditticaon nganji na, chojni mé chonda iná vida naroaxin que çonhi tiempo tsjexin. ⁴⁸ Janha tti niottja que danjo iná vida naroaxin. ⁴⁹ Nindogoelitoa ra çançhjen joine na maná ngagaha jna, pero masqui joine na mé, jehe na ndavenhe na; ⁵⁰ pero janha nichja de ixin tti niottja que joixin de ngajni que are ná chojni jine niottja jihi, chojni mé senha almé. ⁵¹ Janha mismo jehe tti niottja que danjo vida que joixin de ngajni. Tti chojni que jine nio, chojni mé rrochonda iná vida naroaxin que çonhi tiempo tsjexin. Tti niottja que janha sanjo, mé rroçho cuerpona. Janha sanjo cuerpona para que cainxin chojni ngoixin mundo rrochonda na iná vida naroaxin que çonhi tiempo tsjexin.

⁵² Cottimeja chojni judío coexinhi vitticaoenha chó na co vinttendaçho na:

—¿Queçén nchao chojni jihi rroçhá na cuerpoe sontte na?

⁵³ Jesús ndaço ngain na:

—Janha rrindattjo ra ndoa que si jaha ra sintteha ra cuerpona janha, tti Xí que joixin de ngajni, co siha ra jnina, jaha ra rrochondaha ra iná vida naroaxin que çonhi tiempo tsjexin. ⁵⁴ Tti chojni que sine cuerpona co sihi jnina, chojni mé chonda iná vida naroaxin que çonhi tiempo tsjexin, co janha sinttaxechon chojni mé ngain tti nchanho are ndatsjexin mundo. ⁵⁵ Cuerpona, mé tti ndoa comida; co jnina, mé tti ndoa jinda que dihi na. ⁵⁶ Tti chojni que jine cuerpona co dihi jnina, chojni mé jí nganji na co janha rrihi ngain jehe. ⁵⁷ Ndodana que rroanha na chonda Ndo vida, co janha rrichon de ixin jehe Ndo, mexinxin tti chojni que sine na janha sechon de ixin janha. ⁵⁸ Janha nichja de ixin tti niottja que joixin de ngajni. Co niottja jihi jeha inchin tti maná que joine nindogoelitoa ra çançhjen, que masqui joine na mé, jehe na vintteguenhe na, ixin tti chojni que sine tti niottja que janha ndaçhjan, chojni mé rrochonda iná vida naroaxin que çonhi tiempo tsjexin.

⁵⁹ Jesús joinchecoenhe na cain cosa jihi ngain servicio ngain ninhgo ngain rajna Capernaum.

Are Jesús nichja de ixin tti iná vida naroaxin

⁶⁰ Are coinhi na cain tti ndaço Jesús jihi, tsje chojni que varroé Jesús ndaço na:

—Tti ndaço xí jihi atto tangui para que rrondaço na ján; ¿quensen nchao sinchehe caso tti ndaço xí jihi?

⁶¹ Cottimeja Jesús conohe tti tendaço chojni mé, co jehe joanchiangui ngain na co ndaço:

—¿Afeo tonoha ra de ixin tti janha rrindaçhjan? ⁶² ¿Quehe rroçaxaon jaha ra si rroguicon ni ra janha, tti Xí que joixin de ngajni, sarrocajín tti joarihi are saho? ⁶³ Espíritu Santo, mé tti danjo iná vida naroaxin que çonhi tiempo tsjexin; cuerpoe ni çoha danjo vida mé. Co cain palabra que janha ndattjo ra, mé de ixin Espíritu co danjo iná vida naroaxin que çonhi tiempo tsjexin. ⁶⁴ Pero ça te canxion jaha ra que ça ditticaonha ra.

Jamé ndaço Jesús ixin are nacoexinxon çé jehe ovenohe quecá chojni que vaguitticaonha, co quensen tsjago ttinó sehe jehe para rrotse nningaonhe. ⁶⁵ Co Jesús ndaço:

—Mexinxin janha ndattjo ra que çonhi chojni nchao tsí nganji na si Ndodana tsiaoha.

⁶⁶ Desde are maho, tsje chojni que varroé Jesús ndacointtohe na jehe, co ivagacaoha na. ⁶⁷ Cottimeja Jesús joanchianguihi tti tteyó chojni que vacao co ndačo:

—¿Acai jaha ra rinao ra satsji ra?

⁶⁸ Pero Simón Pedro ndačo:

—Soixin, ¿quensen ngain nchao satsji na? Palabrá soixin palabra que danjo iná vida naroaxin que xonhi tiempo tsjexin. ⁶⁹ Janha na ovitticanho na, co nona na que soixin tti Cristo tti Dios rroanha co tti Xenhe Dios que jichon.

⁷⁰ Jesús ndačo:

—Janha coinchiá tti tteyó jaha ra. Co ixinha jamé, ná de jaha ra ná chojni inchínji.

⁷¹ Are ndačo Jesús jihi, Jesús nichja de ixin Judas Iscariote, xitsihi iná Simón, ixin jehe Judas tti joindačo para tse na Jesús masqui jehe Judas ná de tti tteyó chojni que vacao Jesús.

7

Xanchó Jesús vaguitticaonha xan ngain

¹ Después de cain jihi, Jesús vangaria ngain regioen Galilea. Jehe joinaoha cjoí ngain Judea ixin nttiha chojni judío que vinttechonda joachaxin joinao na narrogoenxon na. ² Pero ixin tiempo mé joiconchian tti nchanho que chojni judío vanchechjian tti quiai de chozas, mé ná de tti quiai que chojni Israel chonda, ³ mexinxin cain xanchó Jesús ndačo xan ngain:

—Tadariha nttihi; ttji para Judea para que cain chojni que te nttiha, tti nite de acuerdo de ixin tti ndačo jaha, cai sicon na tti nchehe jaha. ⁴ Ixin si ná ni que rinao ni tsje chojni satsoan ni, jehe ni ncheha ni cain cosa jimao. Si jaha nchao nchehe cain cosa inchin cain cosa jihi, jaha nchehe ngattoxon con cainxin chojni ngoixin mundo.

⁵ Xanchó Jesús vinttendačo xan jañá ixin vaguitticaonha xan ngain jehe. ⁶ Cottimeja Jesús ndačo:

—Xa ttiha nchanho para que janha tsononxin na ngattoxon con chojni que nchehe tti jianha, pero para ixin jaha ra quexeho nchanho nchao tsononxin ra ngattoxon con chojni mé. ⁷ Chojni que joxon nchexoxinhi cosa ngataha nontte čhoħa rroningaconha ra na, pero janha ningaconna na ixin janha ndattjan na claro ixin tti jehe na tenchehe na jianha jí. ⁸ Sattji jaha ra ngain quiai; janha tsjiha ixin nchanho xa ttiha para que janha tsji.

⁹ Co después que Jesús ndache xanchó jihi, jehe vittohe ngain Galilea nchion nchanho.

Are Jesús cjoí ngain tti quiai de chozas

¹⁰ Pero después de que savinttecji xanchó Jesús, jehe Jesús cai sacjoi ngain quiai mé, masqui xonhi chojni conohe ixin jehe cjoí jimao. ¹¹ Chojni judío que vinttechonda joachaxin vinttecje na Jesús ngain quiai mé, co ndačo na:

—¿Quettinó jí xí jiħa?

¹² Co de ngayé cainxin chojni ngain quiai, nttiha tsje ni tenichja de ixin jehe Jesús. Canxion na ndačo na: “Jehe ná xí jian”; pero icanxin na ndačo na: “Jeha jian ixin ncheyehe chojni.”

¹³ Pero ðonhi chojni cjoao chó sn para icha chojni rroquinhi na de ixin Jess ixin ðaon na ngain chojni judío que vinttechonda joachaxin.

¹⁴ Ojidiiji inchin ngosinenxin quiai are Jess joixinhi ngaxinhi nihngo icha importante co coexinhi joinchecoenhe chojni. ¹⁵ Co chojni judío que vinttechonda joachaxin goan na admirado co ndache chó na:

—¿Quen noenxin xi jihi anto tsje cosa co jehe xa ðonhi tiempo coangui xa Palabr Dios inchin jn na?

¹⁶ Jess ndaho ngain na:

—Tti janha nttacoanha ra jeha jeha tti nona janha, sino cosa que nohe tti rroanha na janha nttihi. ¹⁷ Si honja chojni rinao sinchehe tti rinao Dios, chojni m satsoan si tti rrinttacoanha joixin de ngain Dios o ani jeha cosa que janha rinaho. ¹⁸ Tti chojni que ndaho inchin jeha rinao, chojni m nchehe para que icha chojni sinchesayehe na jehe; pero tti chojni que nchehe que tsosayehe tti rroanha jehe, chojni m nichja tti ndoa co ðonhi tti ndoaha nichja chojni m.

¹⁹ 'Moiss chj ra ley, co ni n de jaha ra ditticaon ley m. ¿Quedonda rinao ra nasoenxon ni ra?

²⁰ Chojni m ndaho na ngain Jess:

—Jaha chonda n espritu jianha, mexinxin jaho tti ðaxaon que ixin janha na rinaho na nasoenxon ra jaha, pero janha na ðaxaonha na jam.

²¹ Jess ndaho ngain na:

—De ixin nacoaxinxon cosa que janha jointtaha ngain nchanho que nchejogaha ni, cain jaha ra doan ra admirado. ²² Pero Moiss chj jaha ra costumbre para chjehe ra cada xanxichjan letsjochjan tti ohe que dinhi circuncisin, (masqui coexinxin ngain nindogoelitoa ra ðanhjen que cjo icha saho que Moiss.) Co mexinxin jaha ra chjehe ra nan xanxichjan letsjo ohe m masqui ngain nchanho que nchejogaha ni. ²³ Nchao j rem, si para sinchehe ni inchin ttetonha ley que vay Moiss jaha ra chjehe ra n xanxichjan letsjo ohe masqui ngain nchanho que nchejogaha ni, ¿quedonda doao ra nganji na ixin jointtaxingam ngoixin cuerpoe n xi ngain nchanho que nchejogaha ni? ²⁴ Ncheha jaha ra juzgado jeha inchin ðaxaon ra; nchehe ra inchin jiquininxin.

Jess ndaho ttin joixin jehe

²⁵ Cottimeja canxion chojni que vintte Jerusaln coexinhi na joanchi-anguihi chó na co ndaho na:

—¿Ajeha xi jihi tti rrittj na ixin nasoenxon na? ²⁶ Co y jinichja xa co cain chojni tettinhi, co ni n chojni ðonhi ndache xa. ¿O ani cain chojni que chonda joachaxin ngain autoridad ðaxaon que ixin xi jihi tti Cristo que Dios rroanha? ²⁷ Pero jn na noa na ttin joixin xi jihi, co are ts Cristo, tti Dios rrorroanha, ðonhi chojni tsonohe ttin tsixin.

²⁸ Jehe Jess tajinchecoenhe chojni ngaxinhi nihngo icha importante, co are coinhi Jess cain jihi, jehe ndaho sn:

—¿Ajam ixin chonxin ni ra co noha ra ttin joixin janha? Pero janha joiha inchin janho rinaho, janha joihi ixin tti rroanha na janha jehe anto jian co jehe m tti jaha ra ditticaonha ra. ²⁹ Janha ditticanho jehe ixin joixin de ngain jehe, co jehe rroanha na.

³⁰ Cottimeja joinao na rrotse na Jess para rroquixinhi na ngain crcel, pero ni n na joincheha na ixin a jeha nchanho para que jehe siaxinhi. ³¹ Pero tsje chojni vitticaon na jehe, co ndaho na:

—Are ts Cristo, ¿apoco sinchehe icha tsje milagro que xi jihi?

Xifariseo joinao xa rroquixinhi xa Jesús

³² Xifariseo vinttequinhi xa tti vandačo chojni de ixin Jesús, co jehe xa co canxion xidána que vaquetonha ngain icha xidána, cain xí mé rroanha xa xipolicié nihngo icha importante para rrotse xa Jesús. ³³ Cottimeja Jesús ndačo:

—Janha sarihi nganji ra pero seha, cottimeja sarrocjan na ngain tti rroanha na. ³⁴ Jaha ra tsjé ni ra pero sinchiha ni ra ixin jaha ra čhoha tsji ra ngain tti janha sarihi.

³⁵ Cottimeja chojni judío que vinttechonda joachaxin coexinhi na vintteganchianguihi chó na:

—¿Ttinó satsji xí jihi que ján na čhoha sonttó na xa? ¿Apoco satsji xa ngain icha chojni judío que te ngayé chojni griego que te ngain nontte icha cjin para sinchecoenhe xa chojni griego? ³⁶ ¿Quehe rročo ya tti ndattjo na xa: “Tsjé ni ra pero sinchiha ni ra ixin jaha ra čhoha tsji ra ngain tti janha sarihi”?

Jesús inchin jinda que danjo vida naroaxin

³⁷ Tti último nchanho de quiai, nchanho mé nchanho icha importante. Co nchanho mé Jesús vingattjen co ndačo sén:

—Si čhonja chojni venhe jinda, tsí nganji na co sihi jinda. ³⁸ Inchin ndačo ngain tti jitaxin Palabré Dios; de ngain ansén tti chojni que sitticaon na janha, nttiha rročinxin vida naroaxin inchin jinda čhinxin de ngain ná manantial.

³⁹ Conixin yao, Jesús joinao ndačo que cain chojni que sitticaon jehe sayé na Espíritu Santo; ixin tiempo mé xa joiha Espíritu mé ixin Jesús xa saccoajinha para ngajni.

Quexén ndachjea chojni

⁴⁰ Canxion na ngayé chojni nttiha, are coinhi na jihi, ndačo na:

—Ndoa xí jihi tti profeté Dios que ján na chonhe na.

⁴¹ Icanxin na ndačo na:

—Xí jihi tti Cristo que Dios rroanha.

Pero icanxin na ndačo na:

—¿Quexén tsixin Cristo ngain regioen Galilea? ⁴² Tti jitaxin Palabré Dios ndačo que Cristo chonda que tsixin de ngain ná chojni rey David, co chojni mé tsixin de Belén, xajeho rajné David.

⁴³ Jañá que chojni ndachjea na de ixin Jesús.

⁴⁴ Co canxion na joinao na rrotse na Jesús para rroquixinhi na, pero xonhi ni tse.

Chojni que ttetonha ngain juzgado vitticaonha na Jesús

⁴⁵ Xipolicié nihngo icha importante savinttecjan xa para ngain tti te xifariseo co xidána que vaquetonha ngain icha xidána, co cain xí jihi joanchiangui xa ngain xipolicia co ndačo xa:

—¿Quedonda joicoha ra xa?

⁴⁶ Co xipolicia vinttendačo xa:

—iXonhi tiempo ná chojni nichja jian inchin nichja xí yá!

⁴⁷ Cottimeja jehe xifariseo vinttendačo xa ngain xipolicia mé:

—¿Acai jaha ra jointtayaha ra xí mé? ⁴⁸ ¿Apoco canxion xittetoan na ján na o xí que ttetonhe xifariseo vintteguitticaon xa de ixin jehe xí mé? ⁴⁹ Pero chojni que ditticaon jehe xí mé chonxinha na ley que vayé Moisés, co Dios sinchecastigá na.

⁵⁰ Co nttiha jí Nicodemo, jehe cai ná de jehe xifariseo, tti cjoí para joitsjehe Jesús are ná ttie; co mé ndačo ngain icha xifariseo:

⁵¹—Pero leya na ttetonha ixin ján na čhoha sonttoho na jie ngain ná xí si řa ttinha na saho palabré xa para jamé tsonoa na quehe joinchehe xa.

⁵² Cottimeja vinttendačo xa ngain jehe Nicodemo:

—¿Ajaha cai joixin de Galilea? Tsjehe ngain tti jitaxin Palabré Dios, co sicon que ni ná profeta joixinha de Galilea.

Nchí que deoacaho iná xí

⁵³ Cottimeja cada xa savinttecji xa para nchiandoha xa.

8

¹ Pero Jesús sacjoi para ngagaha tti jna dinhi Nttaolivo, ² co ndoexin are ovingasán, Jesús sacjan para ngain nihngo icha importante iná. Cainxin chojni conchienne na ngain Jesús, co jehe tavehe co coexinhi joinchecoene na. ³ Cottimeja ximaestroey ley co xifariseo vinttequiaho xa ná nchí que dintteguittja xa mero tajjioacaho ncha iná xí. Coín xa nchí mé ngosine cainxin chojni que te nttiha, ⁴ co vinttendačo xa ngain Jesús:

—Maestro, nchí jihu vittja na ncha mero tajjioacaho ncha iná xí. ⁵ Co ley que vayé Moisés ttetonna na que nasoenxon na conixin řo cain nchí que nchehe janhi. ¿Jaha, quehe čho?

⁶ Jehe xa vinttendačo xa jihu para joaquehe xa prueba ngain Jesús co jamé rroconohe xa de quehe rrocjanguixin xa Jesús. Cottimeja Jesús visé co coexinhi cjin ngataha nontte conixin dedoe. ⁷ Pero jehe xa joinchehe xa sigue joanchianguihi xa. Cottimeja Jesús xendoa co ndačo ngain xa:

—Quexeho jaha ra que řonhi cosa jianha joinchehe ra ttedoehe ra ncha saho řo.

⁸ Co jehe cjan visé co joinchehe sigue cjin ngataha nontte. ⁹ Pero cain jehe xa co cain chojni que te nttiha are vinttequinhi na jihu jehe na feo conohe na ixin řaxaon na que jehe na cai joinchehe na cosa jianha. Co vinttegačje ná na co ná na, saho vinttegačje ni icha nttantaxí, cottimeja vinttegačje tti ni icha chjan hasta cainxin na vinttegačje na co vittohe jeho Jesús conixin jehe nchí mé. ¹⁰ Cottimeja xendoa Jesús, iřonhi icha chojni vicon, jeho jehe nchí mé. Co Jesús ndačo ngain ncha:

—¿Ttinó te chojni que cjoanguiha? ¿Ani ná na goenha na?

¹¹ Jehe ncha ndačo ncha ngain Jesús:

—Nahi, ni ná na.

Cottimeja Jesús ndačo ngain ncha:

—Pues ni janha čhoha sonhe. Jaxon sattji, co icjanha nchehe cosa jianha yá.

Jesús jehe tti joadingasán de ngoixin mundo

¹² Jesús nichjé chojni iná, co ndačo ngain na:

—Janha tti joadingasán de ngoixin mundo. Tti chojni que sitticaon na janha rrochonda na jehe tti joadingasán mé que sanjo iná vida naroxin ngain na, co řonhi tiempo sacji na ngain tti naxin xehe.

¹³ Cottimeja cain xifariseo ndačo xa ngain Jesús:

—Jaho rrinichja jian de ixin jaho, co ixin jaho rrinichja yá řonhi rentte.

¹⁴ Jesús ndačo ngain xa:

—Tti janha rrindačhan ján rentte, masqui janho rrindačhan de ixin janha, ixin janha nona ttinó joixin co ttinó satsji. Pero jaha ra noaha ra ttinó joixin janha ni noaha ra ttinó satsji. ¹⁵ Jaha ra nchejuzgá ra inchin

nohe chojni nttihi ngataha nontte. Janha nttaha juzgado ni ná chojni; ¹⁶ pero si janha rrojinttaha juzgado, janha sinttaha inchin jiquininxin, ixin jaonha tti nttaha juzgado, sino Nnodana que rroanha na, Ndo mé Ndo nchehe juzgado conixin janha. ¹⁷ Ngain ley que chonda ra jitaxin que are yó chojni testigo rrondačo xajeho, chonda que sitticaon ni chojni mé. ¹⁸ Pues, nchao remé, janha mismo ná testigo na de ixin janho ixin ndačhjan que janha jian na, co Nnodana que rroanha na, jehe Ndo iná testigo ixin ndačo Ndo xajeho de ixin janha.

¹⁹ Cottimeja vintteganchianguihi xa Jesús co ndačo xa:

—¿Quettinó jí Nnodá?

Jesús ndačo ngain xa:

—Jaha ra ttinxinha ra tti janha rrinttaha, jamé cai tsonoaha ra de ixin Nnodana. Si rroquinxin ra tti janha rrinttaha, cai rroconoha ra de ixin Nnodana.

²⁰ Jesús ndačo cain cosa jihi are jehe jitjagoe chojni ngaxinhi nihngo icha importante, mero ngain lugar tti te cajé tomí alcancía. Pero xonhi chojni tse Jesús para rroquixinhi na Jesús ixin xa jeha tiempo para que jehe rroguixinhi.

Jesús ndache chojni ixin jehe na čoha tsji na ngain lugar tti jehe tsji

²¹ Jesús cjan ndačo ngain na iná:

—Janha satsji co jaha ra tsjé ni ra, co are ndasenhe ra xa sintteca ra tti jianha que nchehe ra, mexinxin tti janha satsji, jaha ra čoha tsji ra.

²² Cottimeja chojni judío que vinttechonda joachaxin ndačo na:

—¿Apoco sasiguenhe jeha, mexinxin ndačo que ján na čoha tsjin na tti satsji jehe?

²³ Cottimeja Jesús ndačo ngain na:

—Jaha ra de nttihi ngain mundo ra, pero janha de noi na: jaha ra de ngain mundo jihi ra, pero janha jeha de ngataha nontte jihi na.

²⁴ Mexinxin ndattjo ra que are senhe ra xa sintteca ra tti jianha que nchehe ra ixin si ditticaonha ra que janha mero inchin janha ndačhjan, senhe ra co xa sintteca ra tti jianha que nchehe ra.

²⁵ Cottimeja jehe na joanchianguihi na Jesús co ndačo na:

—¿Quensen jaha?

Co Jesús ndačo ngain na:

—Ondattjo ra de are saho. ²⁶ Janha chonda atto tsje que rrondačhjan de ixin jaha ra co sinttajuzgá ra. Co tti rroanha na janha, jehe nichja tti ndoa, co janha ndačhjan ngain chojni de mundo jihi jeha tti coian nichja jehe tti roanha na.

²⁷ Pero jehe na coinxinha na ixin ndačo jehe de ixin Dios Nnodé. ²⁸ Mexinxin Jesús ndačo ngain na:

—Are jaha ra rrotsinhi ni ra noi janha, tti Xí que joixin de ngajni, cottimeja tsonoaha ra que janha ndoa inchin janha ndačhjan, co ixin xonhi ndačhjan inchin janho rinaho, sino que janha jeha ndačhjan tti cjoagohna Nnodana. ²⁹ Ixin Nnodana que rroanha na janha, jehe Ndo jí Ndo nganji na; co jehe Ndo ttinttonaha Ndo janho, ixin janha cainxin tiempo nttaha inchin jehe Ndo rinao Ndo.

³⁰ Are Jesús ndačo jihi tsje na vitticaon na ngain jehe.

Jesús ndačo quexehe tti chojni xenhe Dios co quexehe tti chojni inčúnji

³¹ Cottimeja Jesús ndache chojni judío que vitticaon ngain jehe:

—Si jaha ra sitticaon ra cainxin tiempo tti janha ndattjo ra, jaha ra ndoa sinhi ra chojnina. ³² Co rrochonxin ra tti ndoa, co tti ndoa rrochjá ra libertad.

³³ Jehe na ndačo na ngain Jesús:

—Janha na nirazé Abraham na co xonhi tiempo cjoí na esclavo de ni ná chojni. ¿Que xén ndačoxin jaha ixin rrochonda na libertad?

³⁴ Jesús ndačo ngain na:

—Janha rrindattjo ra ndoa que cainxin chojni que nchehe jianha, chojni mé tti te inchin esclavo de ngain cosa jianha. ³⁵ Ná esclavo tadeha ngain nchiandoha xinajní para cainxin tiempo; pero ná xenhe xinajni tadehe xan ngain nchiandoha ndodé xan para cainxin tiempo. ³⁶ Jamé janha, tti Xenhe Dios, rrittjenguijna ra para que isintteha ra esclavo de ngain cosa jianha, para que jaha ra ndoa sintte ra inchin chojni que chonda libertad. ³⁷ Onona que jaha ra razé Abraham, pero rinao ra nasoexon ni ra janha ixin rinaoha ra tti janha ndattjo ra. ³⁸ Janha nichja tti cjoagohna Ndodana co jaha ra nchehe ra tti dindattjo ra ndodá ra.

³⁹ Jehe na vinttendačo na ngain Jesús:

—Ndodana na jehe Abraham.

Pero Jesús ndačo ngain na:

—Si jaha ra rrocji ra ndoa razé Abraham, jaha ra rrojinchehe ra tti jehe joinchehe. ⁴⁰ Co ixinha jamé, masqui ndattjo ra tti ndoa que Dios cjoagohna, jaha ra rinao ra nasoexon ni ra. ¡Co Abraham xonhi tiempo joinchehe jañá! ⁴¹ Jaha ra nchehe ra xajeho tti nchehe ndodá ra.

Cottimeja jehe na ndačo na ngain Jesús:

—Janha na jeha chjan na que digoama ixin janha na chonda na nacoaxinxon Ndodana na que mé jehe Dios.

⁴² Cottimeja Jesús ndačo ngain na:

—Si ndoa Dios rrocji Ndodá ra, jaha ra rrojinao ni ra janha ixin janha joixin de ngain Dios co nntihi rrihi. Joiha janha inchin janho joinaho, Dios tti rroanha na. ⁴³ ¿Quedonda čhoja jaha ra ttinxin ra tti janha ndattjo ra? Mé ixin jaha ra rinaoha ra ttinhi ra joajnana. ⁴⁴ Tti ndodá jaha ra, mé tti inchínji; jaha ra chojní jehe mé, co rinao ra sinchehe ra tti jehe rinao. Inchínji jehe tti nadoexon chojni desde are saho. Co jehe xonhi tiempo jí ngain tti ndoa co xonhi tiempo nichja tti ndoa. Are jehe nichja tti ndoaha, jehe nichja de ixin jehe mismo ixin jehe puro ndoaha co jehe tti ndodé cainxin chojni que nichja ndoaha. ⁴⁵ Pero ixin janha nichja tti ndoa, mexinxin jaha ra ditticaonha ni ra. ⁴⁶ ¿Quensen de jaha ra nchao rrondačo que janha jointtaha jianha? Pero si janha ndačhjan tti ndoa, ¿quedonda ditticaonnaha ra? ⁴⁷ Tti chojní Dios, jehe na ttinhi na palabré Dios, pero ixin jaha ra jeha chojní Dios ra, mexinxin rinaoha ra ttinhi ra.

Cristo ovehe icha saho que Abraham

⁴⁸ Cottimeja jehe tti chojni judío que vinttechonda joachaxin ndačo na ngain Jesús:

—Janha na chonda na razón are ndačhjan na que jaha ná chojni de ngain nonttehe Samaria co chonda ná espíritu jianha.

⁴⁹ Jesús ndačo ngain na:

—Janha chondaha ni ná espíritu jianha. Tti janha nttaha mé para nttasayá Ndodana, co jaha ra nichja ra feo de ixin janha. ⁵⁰ Janha taha joachjaon si sinchesayana ra o ni nahi, pero masqui jamé, jí ná tti rinao que tsosayana, co jehe nchehe juzgado ixin atenchesayana ra o ni nahi.

⁵¹ Janha rrindattjo ra ndoa que tti chojni que nchehe caso tti ndačhjan, chojni mé xonhi tiempo ndasenne.

⁵² Cottimeja jehe chojni judío mé vinttendačo na ngain Jesús:

—Jaxon seguro chonxin na que jaha chonda ná espíritu jianha. Abraham co cain profeté Dios ndavintteguenne na, co jaha ndačo: “Tti chojni que sinchehe caso tti janha ndačhjan, xonhi tiempo ndasenne na.” ⁵³ ¿Apoco jaha icha jian que ndodana na Abraham? Jehe ndo mé venhe ndo co cain profeté Dios cai ndavintteguenne na. ¿Quensen toenao jaha?

⁵⁴ Jesús ndačo ngain na:

—Si janha jitosayana janho, tti janha rrinttaha xonhi rentte. Pero tti nchesayana janha mé Ndodana, co jehe Ndo mé mero tti ndačo jaha ra que jehe mé tti Dios de jaha ra. ⁵⁵ Pero jaha ra chonxinha ra de ixin jehe Ndo, janha nchoe ján chonxin Ndo. Si janha rrondačhjan que chonxinha Ndo, janha rronichja ndoaha inchin jaha ra cai. Pero janha ndoa chonxin Ndo, co ján nttaha caso tti jehe Ndo ndačo Ndo. ⁵⁶ Abraham, tti ndogoelitoa ra xančhjen, anto ché ixin jehe venohe que janha sihi ngataha nontte; co jehe vicon co anto ché.

⁵⁷ Cottimeja chojni judío mé vinttendačo na ngain Jesús:

—Xa chondaha jaha ni cincuenta nano, ¿quexén ndačhoxin ixin vicon Abraham?

⁵⁸ Jesús ndačo ngain na:

—Janha rrindattjo ra ndoa que icha saho que Abraham vehe, janha ojoarihi.

⁵⁹ Cottimeja vinttecé na xo para rroxanguí na Jesús, pero jehe tavema ngayehe ni icha, cottimeja jimao vačhjeixin de ngayehe na co de ngaxinhi nihngo icha importante para sacjoi.

9

Jesús joinchexingamehe ná xí que čhoha vaguicon

¹ Are jidatto Jesús ngain ná lugar, jehe vicon ná xí que desde are diconcjihi xa čhoha vaguicon xa. ² Co cain chojni que vacao Jesús joanchiangui na ngain jehe co ndačo na:

—Maestro, ¿quedonda diconcjihi xí yá jańá ixin čhoha dicon xa? ¿Puede de ixin tti jianha que joinchehe ndodé xa o janné xa, o ni de ixin tti jianha que jehe xa joinchehe xa?

³ Jesús ndačo:

—Jeha de ixin tti jianha que jehe xí yá joinchehe xa ni jeha de ixin tti jianha que joinchehe nindoha xa. Jańá jí xí yá para que de ngain xa rroxago tti nchao nchehe Dios. ⁴ Jai que nchanho janha chonda que sinttaha xé tti rroanha na nttihi ixin otsí ttie que ni ná chojni čhoha sinchehe xa. ⁵ Jai que janha xa rrihi nttihi ngataha nontte jihi, janha inchin tti joadingasán de ngoixin ngataha nontte jihi.

⁶ Are joexin ndačo Jesús cain jihi, jehe cointtji nttatté ngataha nontte co joinchechjian nchion nchetjaho conixin nttatté, co coinga nche nganito con tti xí que vaguiconha. ⁷ Cottimeja ndačo Jesús ngain tti xí mé:

—Janché, ttji diconnti jinda ngain estanque de Siloé.

Co Siloé rročo Tti Joí.

Tti vaguiconha mé cjoy co joicontti jinda, co are jehe cjan, onchao vicon. ⁸ Cottimeja cain nivecinoe, co cain tti nivicon are saho ixin jehe vaguiconha, vinttendačo na:

—¿Ajeha xí jihi xí que vaganchiagaha?

⁹ Canxion na ndačo na:

—Ján, jehe xa.

Icanxin na ndačo na:

—Nahi, jeha xa, pero inchin jitsjehe xí mé jitsjehe xí jihi.

Pero jehe xí que vaguiconha mé ndačo xa:

—Ján, janha.

¹⁰ Cottimeja vintteganchianguihi na xí mé co vinttendačo na:

—¿Queñén conhe ixin jaha onchao dicon?

¹¹ Jehe xa ndačo xa:

—Tti xí jiha que dinhi Jesús joinchechjian xa nchetjaho, co coinga xa nche nganito con co ndachjenji na xa: “Janché, ttji ngain estanque de Siloé co tontti jinda.” Mexinxin janha cjoy, co are contti jinda, janha onchao vicon.

¹² Cottimeja jehe na joanchiangui na co ndačo na:

—¿Quettinó jí xí mé?

Co jehe tti vaguiconha ndačo:

—Janha nonaha.

Xifariseo joanchianguihi tti xí que vaguiconha

¹³ Cottimeja joicao na jehe tti vaguiconha mé ngain xifariseo. ¹⁴ Co tti nchanho que Jesús joinchechjian nchetjaho co joinchexingamehe con jehe tti xí que vaguiconha, nchanho mé nchanho para nchejogaha ni. ¹⁵ Mexinxin chojni fariseo cai joanchianguihi na jehe tti xí que vaguiconha ixin queñén jehe onchao dicon. Co jehe ndačo:

—Xí mé coinga xa nchetjaho nganito con, co contti jinda; co jai onchao dicon.

¹⁶ Cottimeja canxion xifariseo vinttendačo xa:

—Tti xí que joinchehe jihi jeha chojni Dios ixin chondaha xa respeto ngain nchanho que nchejogaha ni.

Pero icanxin xa vinttendačo xa:

—¿Queñén ná xí que nchehe jianha nchao sinchehe xa ná milagro?

Co mexinxin jehe xa ndachjea xa yó grupo. ¹⁷ Co cjan xa iná joanchianguihi xa jehe tti vaguiconha mé, co ndačo xa:

—¿Co jaha quehe ndačo de ixin tti xí que chjá con?

Co jehe ndačo:

—Janha ndačhjan que xí mé ná profeté Dios.

¹⁸ Pero chojni judío que vinttechonda joachaxin joinaoha na rroguíticaon na que ixin xí mé vaguiconha xa co are mé onchao vaguicon xa hasta que vayeja na ndodé xa co janné xa, ¹⁹ co joanchianguihi na na co ndačo na:

—¿Ajiji tti xitsiha ra, que jaha ra ndačo ra que de concjiho xa vaguiconha xa? ¿Queñén jai onchao dicon xa?

²⁰ Ndodé co janné xí mé ndačo na:

—Nona na que jihi xitsihna na co vaguiconha xa de concjiho xa, ²¹ pero nonaha na queñén jai jehe xa onchao dicon xa, ni nonaha na quensen joinchexingamehe jmacon xa. Danchianguihi ra xa, ochonda xa tsje nano, co jehe xa nchao rrochjá ra xa razón.

²² Nindoha jehe tti vaguiconha ndačo na jiji ixin řaon na ixin chojni judío que vinttechonda joachaxin ocjoao chó na ixin quexeho chojni que rrondačo ixin Jesús jehe mé tti Cristo que Dios rroanha, chojni que rrondačo jiji senguixin na de ngaxinhi ningoe na. ²³ Mexinxin nindoha jehe tti vaguiconha ndačo na: “Danchianguihi ra xa, otsje nano chonda xa.”

²⁴ Cottimeja cain chojni judío cjan na vayé na jehe tti xí que vaguiconha, co ndačo na ngain:

—Ndachjenji ni ra tti ndoa ngattoxon con Dios queřén conha ixin janha na nona na que xí yá nchehe xa jianha.

²⁵ Cottimeja jehe tti xí que vaguiconha ndačo ngain na:

—Janha nonaha si jianha xa ani nahi. Janha jehonaha na que janha vaguiconha co jai odicon.

²⁶ Co jehe na cjan na joanchianguihi na iná co ndačo na:

—¿Quehe joinchehe xa nganji? ¿Queřén joinchehe xa para joinchechjian xa jmacon?

²⁷ Jehe tti vaguiconha ndačo:

—Ondattjo ra, co ncheha ni ra caso, mexinxin ¿quedonda rinao ra que janha rrocjan na rrondattjo ra iná? ¿Asoixin ra cai rinao ra sitticaon ra xí mé?

²⁸ Cottimeja jehe na nichja na feo ngain jehe tti vaguiconha mé, co ndačo na ngain:

—Jaha ditticaon xí mé, pero janha na ditticanho na Moisés. ²⁹ Janha na nona na que Dios nichja ngain Moisés; pero xí yá ni nonaha na ttinó joixin xa.

³⁰ Tti xí que vaguiconha ndačo ngain na:

—Janha ttianxinha queřén řaxaon ra de ixin xí yá. Soixin ra noaha ra quettinó joixin xa, pero janha nona que ngain Dios joixin xa ixin joinchechjian xa jmacon na. ³¹ Ján na noa na jian que Dios ttinha tti ndačo chojni que nchehe jianha, jehonaha ttinhi ngain chojni que nch-esayehe jehe co nchehe na tti rinao jehe. ³² řonhi tiempo coinhi ni que ná chojni joinchechjian jmacon ná chojni que desde concjijo diconha. ³³ Si xí jiji jeha ngain Dios rroquixin xa, jehe xa řhoha rrojinchehe xa jiji.

³⁴ Cottimeja chojni judío ndačo na:

—Jaha anto jianha desde concjija ¿co jai arinao sinchecoanna ni ra de ixin Dios?

Co venguixin na de ngaxinhi nihngo.

Tti chojni que ditticaonha Cristo te na inchin tti chojni que diconha

³⁵ Jesús conohe ixin venguí na jehe tti vaguiconha mé, co are vetan Jesús, Jesús ndačo ngain:

—¿Aditticaon jaha ngain Xenhe Dios?

³⁶ Co jehe tti vaguiconha mé ndačo:

—Ndachjenji na soixin, quensen mé, para que janha sitticanho ngain.

³⁷ Jesús ndačo:

—Jaha ovicon; mé janha tti jaha rritjao jaxon.

³⁸ Cottimeja jehe tti vaguiconha mé vettoxin nttajochjiji ngain Jesús, co ndačo:

—Ján, ditticanho, soixin.

³⁹ Cottimeja ndačo Jesús:

—Janha joihi ngataha nontte jihi para que janha sinttajuzgá chojni para que tti chojni que te inchin tti diconha, rrocho ixin jehe na chonxinha na de ixin Dios, para que jai chojni mé nchao sintte na inchin tti dicon ixin sitticaon na nganji na janha. Co para que tti chojni que te inchin tti dicon, rrocho ixin jehe na ndacho na que anto chonxin na de ixin Dios, chojni mé sintte na inchin tti diconha ixin sitticaonha na nganji na janha.

⁴⁰ Cottimeja canxion xifariseo que te ngain Jesús nttiha vinttequinhí xa jihi, co vintteganchianguíhi xa Jesús co ndacho xa:

—¿Apoco janha na cai diconha na?

⁴¹ Jesús ndacho ngain xa:

—Si jaha ra rroguintte ra inchin tti diconha, xonhi rroguintteca ra de ixin tti jianha que nchehe ra. Pero ixin jaha ra ndacho ra que dicon ra, mexinxin tecaxin ra tti jianha que nchehe ra.

10

Ejemploe corré coleco

¹ Janha rrindattjo ra ndoa que tti chojni que dixinxinha de ngain puerté corré coleco, co dixinxin ojé lado, chojni mé chehe ixin tté coleco.

² Pero tti chojni que dixinxin de ngain puerta, chojni mé tti ttingaria jehe coleco co dicao cuidado de ixin jehe va. ³ Tti jinda puerta jehe danttjé puerta para dixinhi jehe tti ttingaria coleco, co jehe va datsoan va tté jehe. Co jehe dayé va de ixin nombré va co dantsjexin va de corra.

⁴ Co are ottjexin dantsje cainxin coe, jehe ditaonhe va nttiha co jehe va rroé va ixin datsoan va tté jehe. ⁵ Co jehe va rroeha va iná chojni que chonxinha va, sino que sattinga va de ngain ixin chonxinha va tté chojni mé.

⁶ Jesús ndache xifariseo ejemplo jihi, pero jehe xa coinxinha xa quehe rrocho tti ndacho Jesús.

Jesús tti chojni que jian ttingaria coleco

⁷ Cottimeja Jesús cjan ndache xa:

—Janha rrindattjo ra ndoa que janha tti puerta na tti dixinxin coleco.

⁸ Cainxin chojni que joí icha saho que janha, tti nindacho que jehe na joixin na de ngain Dios, chojni mé tti chehe, pero coleco joincheha va caso. ⁹ Janha tti puerta na; co tti chojni que sixinhi de ixin janha, chojni mé janha tsjenguijna para rrochondaha na castigo de cain cosa jianha que nchehe. Co sehe inchin ná coleco que dixinhi co dachje de ngain corra co dittja va cachji que jine va.

¹⁰ Tti chehe jecho ttí para tté co para nadoenxon chojni, co para nchexantte, pero janha joihi para rrochonda ra iná vida naroaxin, co cai para que janha rrochjaha ra ngain vida mé tsje tti jian que danjo Dios. ¹¹ Janha tti chojni que jian ttingaria coleco. Tti jian ttingaria coleco jehe danjo vidé para ixin jehe va, ¹² pero tti nchehe xa jecho para sacha tomi, are jehe dicon ttí condanixa, jehe ttintohe coleco co jehe sattinga ixin jehe jaha tti mero ttingaria coleco co ixin coleco jeha coe jehe. Co condanixa tonchjequé va coleco co tse va va. ¹³ Xí jihi sattinga xa ixin nchehe xa xa jecho para dacha xa tomi, co jehe xa ndosenha xa coleco.

¹⁴⁻¹⁵ Janha tti chojni que jian ttingaria coleco. Jañá inchin Ndodana chonxin Ndo jian ngain ansenna, jamé janha cai chonxin jian ngain ansén jehe Ndo; co xajeho jamé janha chonxin jian ngain ansén cain

colecona, co jehe va cai chonxin va jian ngain ansenna. Co janha sanjo vidana para ixin jehe cona. ¹⁶ Cai janha chonda icanxin coleco que jeha de ngain corra jihi, co chonda que siquinha va cai. Jehe va sitticaon na va janha, co sehe nacoaxinxon tájo co nacoaxinxon tti tsingaria va.

¹⁷ 'Ndodana rinao na Ndo janha ixin janha sanjo vidana para nchao rrocjan na sayá vida iná. ¹⁸ Xonhi chojni santsjena vidana, janho tti sanjo vidana ixin janha jañá rinaho. Janha chonda joachaxin para sanjo vidana, co cai chonda joachaxin para rrocjan na sayá vidana iná. Jehe jihi tti coetonna Ndodana.

¹⁹ Are chojni judío coinhi na cain palabra jihi, jehe na cjan na chjea na yó grupo iná. ²⁰ Tsje jehe na ndačo na:

—¿Quedonda nchehe ra caso xí yá? Jehe xa chonda xa ná espíritu jianha co ndadixenga xa.

²¹ Pero icanxin na ndačo na:

—Xonhi chojni que chonda espíritu jianha nchao rronichja jañá. ¿Apoco ná espíritu jianha nchao rrochjé jmacon chojni que diconha?

Chojni judío vayeha na Jesús

²² Co ngain tiempo mé mero tiempoe quin, co ngain ciudad de Jerusalén chojni judío mero techonda na tti quiai para xaxaonxin na tti nchanho are joexin conchjian tti nihngo icha importante. ²³ Co are mé, Jesús tarridehe ngain nihngo mé ngain lugar que vinhi portal de Salomón. ²⁴ Co chojni judío vixindanji na Jesús co ndačo na ngain:

—¿Hasta tti quesa sinchenona ni ra jaha? Si jaha tti Cristo, ndačo ndacoa nao jaxon.

²⁵ Jesús ndačo ngain na:

—Janha ondačhjan co jaha ra vitticaonnaha ra. Cain cosa que janha nttaha, nttaha ixin Ndodana ttetonna. Co tti nttaha janha jamé xago claro quensen janha, ²⁶ pero jaha ra ditticaonha ra ixin jaha ra jeha colecona ra inchin ondattjo ra are saho. ²⁷ Colecona datsoan va ttana janha co janha chonxin jehe va co jehe va rroehna va. ²⁸ Janha rrochjaha va iná vida naroaxin que xonhi tiempo tsjexin co xonhi tiempo ndasitján va, ni xonhi chojni santsjenanxin va de ngá rana. ²⁹ Ndodana chjana Ndo va co jehe Ndo chonda Ndo joachaxin de cainxin cosa, co xonhi chojni santsjehe Ndo va de ngá rá Ndo. ³⁰ Janha co Ndodana jeho nacoa na.

³¹ Cottimeja chojni judío cjan na coá na xo para rrožanguí na Jesús. ³² Co Jesús ndačo ngain na:

—Janha jointtaha tsje cosa jian ngattoxon con ra conixin joachaxín Ndodana; ¿quexehe de cain cosa jihi rinao ra rrožanguinaxin ra xo?

³³ Jehe chojni judío ndačo na:

—Janha na rrožanguiaha ra xo de ni ná cosa jian que jaha joinchehe; janha na rinaho na rrožanguiha ra xo ixin jaha chondaha respeto ngain Dios de ixin tti jaha ndačo. Jaha jeho ná xí, pero jaha rridoan Dios.

³⁴ Cottimeja Jesús ndačo ngain na:

—Ngain ley que chonda ra jitaxin que Dios ndačo: “Jaha ra dios ra.” ³⁵ Noa na que čoha rrondačo na nahi de ixin tti ndačo ngain tti jitaxin Palabré Dios, co Dios joincheguinhi chojni dios, tti nivayé joajné jehe. ³⁶ Co si Dios joantsjenda na janha co rroanha na ngataha nontte ntthi, ¿quexén nchao ndačo ra que janha chondaha respeto ngain Dios ixin ndačhjan que janha Xenhe Dios? ³⁷ Si janha čoha nttaha cain

cosa que nchehe Ndodana, ditticaonha ni ra janha. ³⁸ Pero si janha já nnttaha, masqui ditticaonha ra nganji na, ditticaon ra ngain cosa que janha nttaha para que tsonoha ra que Ndodana jí Ndo nganji na co janha rrihi ngain jehe Ndo.

³⁹ Jehe na joinao na rrotse na Jesús iná, pero Jesús sacinguehe na.

⁴⁰ Cottimeja Jesús sacjan para lado čhinxin nchanho de río Jordán co nnttiha vittohe ngain tti lugar que vancheguittexin Juan chojni are icha saho. ⁴¹ Tsje chojni cjoí na joitsjehe na Jesús co ndačo na:

—Ján ndoa, masqui Juan xonhi milagro joinchehe, pero cainxin tti jehe ndačo de ixin xí jihi já nndoa.

⁴² Co tsje chojni vitticaon na Jesús ngain lugar mé.

11

Are ndavenhe Lázaro

¹ Vehe ná xí venihi que vinhi Lázaro, xí mé Betania rajné xa, xajeho rajné María co xanchó María xanMarta. ² Jehe María jihi, nčhichó jehe Lázaro, tti venihi, co María jihi tti cointjtjtte aceite que anto xajni ngataha rotté Jesús co joinchexemanxin conixin xajá. ³ Jańá cayoi nčhí mé rroanha nča joajna ngain Jesús co ndačo nča:

—Xiamigoa soixin nihi xa.

⁴ Are Jesús coinhi jihi, ndačo:

—Chin yá nasoenxinhao chin Lázaro, jeho para rrořagoxin joachaxín Dios co para de ixin chin yá cai rrořagoxin joachaxín Xenhe Dios.

⁵ Masqui Jesús anto jinoao jehe Marta, conixin cayoi xanchó Marta, María co Lázaro, ⁶ are ndache na Jesús ixin Lázaro venihi, Jesús xa vittohe iyó nchanho nnttiha ngain tti lugar que vehe. ⁷ Después ndačo ngain tti chojni que vacao:

—Chjin na iná para ngain Judea.

⁸ Co tti chojni que vacao ndačo na:

—Maestro, xa seha chojni judío que techonda joachaxin de ngain lugar mé jinoao na narrogoenxon na jaha ixin xo, ¿co xa rinao tsji nnttiha iná?

⁹ Jesús ndačo:

—¿Ajeha ndoa que nchanho chonda tteyó hora? Co si ná ni čhji ni de nchanho, tonttenguixinha ni ixin dicon ni joadingasán que jí ngataha nontte jihi, ¹⁰ pero si ná ni čhji ni de ttie, tonttenguixin ni ixin diconha ni joadingasán.

¹¹ Cottimeja ndačo Jesús ngain tti chojni que vacao:

—Xiamigoa na Lázaro tajjioa xa, pero sinttaxingamá xa.

¹² Cottimeja tti chojni que vacao Jesús ndačo na:

—Soixin, si tajjioa, rročo orroxengańao.

¹³ Pero tti ndačo Jesús rročo que Lázaro ondavenhe. Co cain tti chojni que vacao Jesús xaxaon na que ndoa tti ndačo Jesús ixin tavejoa Lázaro.

¹⁴ Cottimeja Jesús ndačo ngain na claro:

—Lázaro ondavenhe. ¹⁵ Janha chahna ixin joariha nnttiha; icha jian jańá para ixin jaha ra sitticaon ra. Pero chjin na sitsjehe na Lázaro.

¹⁶ Cottimeja Tomás, tti vancheguinha na Xancoata, ndačo ngain tti icha chojni que vacao Jesús:

—Chjin na já nna cai para senhe na conixin Jesús.

Jesús ndačo ixin jehe tti rroxechonxin chojni co jehe tti danjo iná vida naraoxin

¹⁷ Are jehe na joiji na nttiha, chojni nttiha joinchenohe na Jesús que Lázaro ovechonda nó nchanho que jižavá. ¹⁸ Rajna Betania vehe chiaon Jerusalén, inchin yoto kilómetro co rioho tecaixin chó rajna mé. ¹⁹ Co tsje chojni judío joitsjehe jehe Marta co María para joantsjehe na joachjaon ansén cayoi nčí mé de ixin xanchó ncha que ndavenhe. ²⁰ Are Marta conohe que Jesús ojoiji nttiha, jehe Marta vachjexin de nchia co joichoexin Jesús ngatja nttiha, pero María ndavittohe ngaxinhi nchia. ²¹ Co Marta ndačo ngain Jesús:

—Si soixin rrogarihi nttihi, rrogenha xanchian. ²² Pero janha nona que Dios rrochjá cain tti sanchiehe.

²³ Jesús ndačo:

—Xanchó rrocjan xan sechon xan.

²⁴ Marta ndačo ngain Jesús:

—Ján, janha nona que rrocjan xan sechon xan are rroxechon cainxin nindadenhe ngain nchanho are ndatsjexin mundo.

²⁵ Cottimeja Jesús ndačo:

—Janha tti rroxechonxin cainxin chojni, co janha tti danjo iná vida naroaxin. Tti chojni que ditticaon na janha, masqui jehe senhe, pero rrochonda iná vida naroaxin. ²⁶ Co cainxin chojni que xa techon co ditticaon na, chojni mé žonhi tiempo sinchetján na almé na ixin ochonda na vida mé. ¿Aditticaon jaha jihi?

²⁷ Marta ndačo:

—Ján, janha ditticanho que soixin tti Cristo, tti Xenhe Dios, tti van-dačo profeta que sihi ngataha nontte jihi.

Jesús tsjanga ngaca tti vežavá Lázaro

²⁸ Are Marta joexin ndačo jihi, cottimeja cjoí joigayé María, jehe xanchó, co ndačo Marta jimao ngain María:

—Tti Maestro nttihi jí co dayaha jaha.

²⁹ Are María coinhi jihi, jehe jaicoa vingattjen co cjoí joitsjehe Jesús.

³⁰ Jesús xa joigaha rajna rato mé; ixin jehe xa vittohe ngain tti lugar vetanxin Marta. ³¹ Are ni icha vicon na que María jaicoa vingattjen co vachje, tti chojni judío que te nttiha ngain nchiandoha María ixin tedantsjehe na joachjaon ansén, jehe na rroé na María ixin jehe na žaxaon na que María sarrocji ngain tti jižavá xanchó para rrotsjangaxin nttiha.

³² Cottimeja María, are joiji tti jí Jesús, María vettoxin nntajochjihi ngaca rotté Jesús, co ndačo:

—Si soixin rrogarihi nttihi, xanchian rrogenha xan.

³³ Are Jesús vicon que María jitsjanga co cain chojni judío que joicao María tetsjanga na cai, Jesús vechín co anto soji ná joachjaon conohe ngain ansén. ³⁴ Cottimeja Jesús joanchiangui co ndačo:

—¿Ttinó cjoavá ra Lázaro?

Co jehe na ndačo na:

—Žacoi soixin, sitsjehe.

³⁵ Co Jesús tsjanga. ³⁶ Cottimeja chojni judío ndačo na:

—Tsjenxin ra, anto joinao xí jihi Lázaro.

³⁷ Pero icanxin de jehe na ndačo na:

—Xí jihi tti chjé jmacon tti xí que vaguiconha, ¿co jai, ažonhi ná cosa nchao rrojinchehe xa para que Lázaro rrogenha?

Are xechon Lázaro

³⁸ Jesús cjan conohe iná joachjaon anto soji, co jehe conchienne ngain tti jiřavá Lázaro ngain ná cueva, co jijé ná řo tti dixinxin na. ³⁹ Jesús ndařo:

—Dinttjian ra řo.

Marta, nřhichó jehe tti ndavenhe, ndařo nřha ngain Jesús:

—Pero puede atto řa ixin ochonda nó nchanho que ndavenhe.

⁴⁰ Pero Jesús ndařo:

—¿Andattjoha que si sitticaon nganji na janha, jaha sicon joachaxín Dios?

⁴¹ Cottimeja vinttjian na řo mé. Co Jesús tsjehe para ngajni co ndařo:

—Padre soixin, chjaha gracias ixin coinhi tti janha ndařhjan. ⁴² Janha nona que cainxin tiempo ttinhi tti janha ndařhjan, pero jai janha rrindařhjan jihi para que chojni tehe sicon na que soixin ttinhi tti janha ndařhjan nganji, co para que sitticaon na que soixin rroanha na janha.

⁴³ Are joexin ndařo Jesús jihi, jehe ndařo sén:

—¡Lázaro, dařhjexin de yá!

⁴⁴ Co jehe tti ndavenhe mé vařhje. Ngoixin cuerpoe jisiandanji ná tira de manta que jiřhixin de rá co de rotté, co ngá con jisía iná manta. Jesús ndařo:

—Tonxindanguehe ra co tanřhjanda ra satsji.

Queřén řaxaon na para rrotse na Jesús

(Mt. 26.1-5; Mr. 14.1-2; Lc. 22.1-2)

⁴⁵ Conixin jihi, tsje chojni judío vitticaon na Jesús, tti nijoicao María co vicon na tti joinchehe Jesús. ⁴⁶ Pero icanxin de jehe na cjoí na ngain xifariseo joitsjehe na xa co coequín na xa tti joinchehe Jesús. ⁴⁷ Cottimeja tsje xifariseo, co tsje xidána que vaquetonha ngain icha xidána co cain xí que vechonda joachaxin ngain juzgadoe nihngo řatte xa co vinttendařo xa:

—¿Quehe sinttoho na? Xí jihi atto tsje milagro jinchehe xa. ⁴⁸ Si tsanřhjanda na xa jařá, cainxin chojni sitticaon na jehe xa, co tsí autoridad romano co sinchexantte ningoa na icha importante conixin nacioan na.

⁴⁹ Pero ná de jehe xa, que vinhi Caifás que jehe mé xidána icha importante tiempo mé, jehe mé ndařo ngain xa:

—Jaha ra řonhi noha ra, ⁵⁰ řanoaha ra que icha jian para ixin ján na que senhe jehó nacoaxinxon xí para ixin ngoixin nación, que rroxantte ngoixin nación?

⁵¹ Pero Caifás ndařohoa jihi por ixin jehó, pero ixin jehe vehe xidána icha importante tiempo mé, mexinxin Dios ndařo ngain jehe para que jehe ndařo jařá ixin Jesús ndasenne para ixin ngoixin nación judía, ⁵² co jeha para ixin jehó nación mé, cai para ixin cainxin chojni que ditticaon Dios ngoixin mundo sinchesayehe na jehó nacoaxinxon Dios. ⁵³ Co de ngain nchanho mé chojni judío que vechonda joachaxin ořaxaon na para nasoenson na Jesús.

⁵⁴ Mexinxin Jesús ívařagoha ni ivacjilha ngayé chojni judío, mexinxin jehe vařhjexin de ngain regioen Judea co sacjoí ngain ná lugar chian ngagaha jna, ngain ná rajna que dinhi Efraín. Nttiha vittohe jehe conixin cain tti chojni que vacao.

⁵⁵ Tsjeha nchanho vitján para tti quiai que dinhi pascua para ixin chojni judío. Co mexinxin tsje chojni ngain tsje rajna sacjoí na para

Jerusalén para joicoroa na saho de quiai mé inchin costumbré jehe na.
⁵⁶ Saho de rroquintteguixinhi na nihngo jehe na cjoé na Jesús, co are ovinttexinhi na nihngo joanchianguihi chó ná na co iná na:

—¿Quehe ðaxaon ra? ¿Atsí Jesús ngain quiai jiji ani nahí?

⁵⁷ Xifariseo co cain xidána que vaquetonha ngain icha xidána ocoetonha xa que ixin quexeho chojni nohe quettinó vehe Jesús, que rrondaço chojni mé para que nchao sitse xa Jesús co tsiaxinhi xa.

12

Ná nǎhí que coinga Jesús aceite

(Mt. 26.6-13; Mr. 14.3-9)

¹ Incjaon nchanho saho de tti quiai dinhi pascua, Jesús cjoí ngain Betania, tti rajna vehe Lázaro, tti Jesús joinchexechon de ndavenhe.

² Co nttiha nindoha Lázaro joinchexhian na ná comida para ixin Jesús. Marta joanjo tti joine na co Lázaro vehe ngain mesa para joinecaño Jesús conixin tti chojni que vacao. ³ Cottimeja María joiaho inchin rioho litro de aceite diconchjian joxon ca que dinhi nardo, co aceite mé anto ðajni co anto rentte, co María coinga aceite mé rotté Jesús. Cottimeja joinchexemanxin conixin ðajá. Ngoixin ngaxinhi nchia concaðajni aceite mé. ⁴ Cottimeja nichja Judas Iscariote, xitsihi ná tti vinhi Simón. Judas mé ná de tti tteyó chojni que vacao Jesús co jehe mé tti joindaço para tse na Jesús. Co Judas mé ndaço:

⁵ —¿Quedonda cochjia aceite jiji? Ixin rentte inchin tsjexin dacha ná tti nchehe ða ngoixin ná nano. Co nchao rrocjenguijnaxin na chojni noa.

⁶ Pero Judas ndaçoaha jiji ixin jehe ndoa rojinchenihi chojni noa, jehe ndaço jañá ixin jehe chehe. Co ixin jehe vehe tesorero de tomí cain tti tteyó chojni que vacao Jesús, mexinxin jehe vaqué ttoha tomi que vaganjo na nttiha. ⁷ Mexinxin Jesús ndaço:

—Tançhjanda nǎhí jiji ixin jehe ncha ojoinchehe ncha jiji para ngain nchanho que janha rroðavá na. ⁸ Jaha ra cainxin tiempo sintte chojni noa ngayaha ra, pero janha cainxinha tiempo sarihi ngayaha ra.

Are ðaxaon na para narrogoenxon na Lázaro

⁹ Tsje chojni judío conohe na ixin Jesús vehe ngain rajna Betania, co jehe na vinttecji na nttiha, pero jeoha Jesús joitsjehe na nttiha, cjoí na para joitsjehe na Lázaro cai, tti joinchexechon Jesús are ndavenhe.

¹⁰ Cottimeja canxion xidána que vaquetonha ngain icha xidána cjoao chó xa para queðén sinttenchehe xa para narrogoenxon xa Lázaro cai,

¹¹ ixin causexin jehe tsje chojni judío vaçhjeyexin de ngain chojni xa para vitticaon na Jesús.

Are Jesús joigaha ciudad de Jerusalén

(Mt. 21.1-11; Mr. 11.1-11; Lc. 19.28-40)

¹² Tsje chojni odicji Jerusalén para tti quiai que dinhi pascua, co para ndoexin conohe na ixin Jesús siji ngain ciudad mé.

¹³ Mexinxin conçhinji na cajne co joichoexin na Jesús ngatja nttiha, co ndaço na soji:

—¡Gloria para ixin Dios! ¡Anto jian jehe tti joí conixin nombré Dios, co anto jian jehe tti Rey de chojni Israel!

¹⁴ Jesús vittja ná colochó co jehe vetaha va, inchin ðho ngain tti jitaxin Palabré Dios:

¹⁵ ʒaonha jaha, ciudad de Sión; tsjenxin que joí tti Rey de jaha jítaha ná colochó.

¹⁶ Ngain momento jiji cain chojni que vacao Jesús coinxinha na cosa jiji, pero después, are Jesús ndavenhe co xechon, cottimeja ʒaxaon na que cain jiji jítaxin de ixin Jesús, co jañá conhe.

¹⁷ Cain chojni que vintte ngain Jesús are jehe vayé Lázaro de ngain tti veʒavá co joinchexechon are ndavenhe, cain chojni mé coequin na tti jehe na vicon na. ¹⁸ Mexinxin tsje chojni vačhje na para joiguetanxin na Jesús ngatja nttiha ixin venohe na tti joinchehe Jesús ngain Lázaro. ¹⁹ Cottimeja xifariseo ndache chó xa:

—Tsjenxin ra, chojni ditticaonha na na ján na: cainxin na sattji na ngain jehe.

Canxion chojni griego cjoé na Jesús

²⁰ De ngayehe cainxin chojni que cjoí Jerusalén para joinchesayehe na quiai nttiha, vintte canxion chojni griego que cai vitticaon inchin chojni judío. ²¹ Chojni griego jiji conchienne na ngain Felipe, tti rajné Betsaida ngain Galilea, co joinchetsenhe na ñao ndačho na:

—Rinaho na que soixin tsjagohna ra Jesús ixin rinaho na rronichjá na.

²² Felipe joindache Andrés, co cayoi na joindache na Jesús. ²³ Cottimeja Jesús ndačho:

—Ojoí tiempo que janha, tti Xí que joixin de ngajni, tsosayana. ²⁴ Janha rrindattjo ra ndoa que si ná noanchjan de trigo detsingaha ngataha jinche co ndadenha, jehe noanchjan mé ʒajeho nacoa noanchjan, pero si noanchjan mé ndasenhe, cjan soan anto tsje noanchjan iná. ²⁵ Tti chojni que anto rinao vidé, chojni mé ndasinchetján vida mé, pero tti chojni que rinaoha vidé ngain mundo jiji, chojni mé tsenchjinha vidé para ngain vida naroaxin que ʒonhi tiempo tsjexin. ²⁶ Si čhonja chojni rinao sinchehe ʒana janha, pero jehe chonda que sitticaon palabrana; co tti janha sarihi, nttiha sehe jehe cai. Tti chojni que sinchehe ʒana janha, Nnodana sinchesayehe Ndo chojni mé.

Jesús ndačho ixin jehe ndasenhe

²⁷ Janha jai atto soji joachjaon tonoho ansenna; ¿quehe rrondačhjan janha? Janha rrondačhjanha: “Padre, tančhjandaha na janha ngain tti tsonna jai.” Ixin para mé joixin janha. ²⁸ Mexinxin janha rrondačhjan: “Padre, nttatsanha ñao, nchehe de que cain chojni sinttasayaha.”

Cottimeja coinhi na tté Dios de ngajni que ndačho:

—Janha ojointtaha jamé, co ʒa sinttaha iná.

²⁹ Co canxion chojni que coinhi nttiha ndačho na que joatte, co icanxin na ndačho na:

—Ná ángel nichjé.

³⁰ Cottimeja Jesús ndačho ngain na:

—Tti jaha ra coinhi ra, yá para ixin jaha ra co nahi para ixin janha.

³¹ Jai joí nchanho que Dios sinchejuzgá mundo jiji, co jai Dios senguixin de ngain mundo jiji tti ttetonha ngain mundo jai. ³² Co are chojni rrotsín na na janha noi nganito cruz, chojni de cain nación sinao na sitticaon na na janha.

³³ Jesús ndačho jiji para que coinxin jehe na queʒén senxin jehe. ³⁴ Co chojni ndačho na ngain Jesús:

—Janha na coian tti jitaxin ley que Cristo, tti Dios rrorroanha, chonda que sechon para cainxin tiempo. ¿Queéén ndačhoxin jaha que tti Xí que joixin de ngajni chonda que rrotsín na noi nganito cruz? ¿Quensen yá tti Xí que joixin de ngajni?

³⁵ Cottimeja Jesús ndačo ngain na:

—Jai que janha ھا rrihi ngayaha jaha ra rročo que ھا chonda ra joadingasán jihi, pero jeho para nchion tiempo. Dacji ra jaxon que ھا chonda ra joadingasán jihi para que sinttaھاonha ra tti naxin xehe ixin tti chojni que čhji ngain tti naxin xehe noeha na ttinó rridintte na. ³⁶ Ditticaon ni ra janha que janha inchin tti joadingasán jaxon que janha rrihi nganji ra, para que sintte ra chojni joadingasán.

Co are joexin ndačo Jesús cosa jihi, jehe sacjoi co tavemehe na.

Quedonda chojni judío vaguitticaonha na Jesús

³⁷ Masqui Jesús joinchehe anto tsje milagro, co masqui joinchehe milagro mé ngattoxon con jehe na, jehe na vaguitticaonha na jehe ³⁸ ixin chonda que joiconhe jamé ixin profeta Isaías dicjin janhi:

¿Quensen vitticaon joajnana na?

¿Quensen vicon tti joachaxin jie que chonda Dios?

³⁹ Jańá mexinxin čhoaha vitticaon na, co cai dicjin Isaías janhi:

⁴⁰ Dios joinchechjian jehe na de chejo na ngain joarrixaoen na co de cha ansén na,

para que siconxinha na conixin joarrixaoen na,

ni tsinxinha na jian de ixin cosa jihi,

ni tsiha na nganji na para que janha sinttaxingamá na.

⁴¹ Isaías ndačo cain jihi ixin jehe vicon anto tsje joachaxin que Jesús chonda, co mexinxin jehe vanichja jańá de ixin Jesús.

⁴² Masqui jańá jitaxin, pero tsje chojni judío vitticaon na Jesús hasta icanxin de jehe na tti ni icha vaquetonha. Pero jehe na vandacheha na icha chojni ixin vitticaon na Jesús ixin vaھاon na que xifariseo senguixin na ھا de ngain nihngo. ⁴³ Jehe na icha joinao na tti jian que nichja chojni de ixin jehe na pero ھاھاonha na de queéén sinchehe na para que Dios rroھاھاon jian de ixin jehe na.

Palabré Jesús sinchejuzgá ngain chojni

⁴⁴ Jesús nichja sén co ndačo:

—Tti chojni que ditticaon na janha, jeoha nganji na ditticaon, cai ditticaon ngain Nnodana que rroanha na. ⁴⁵ Co tti chojni que dicon na janha, cai chojni mé inchin jehe rroguicon tti rroanha na janha. ⁴⁶ Janha que inchin tti joadingasán joihi ngataha nontte para que cain chojni que ditticaon na janha sittoeha na ngain tti naxin xehe. ⁴⁷ Pero si canxion na ttinhi na palabrana co ncheha na caso, jeha janha tti sinttacastigá na ixin janha joiha para sinttacastigá chojni ngain mundo jihi; janha joihi para que tsjenguijna na para que rrochondaha na castigo de cain cosa jianha que nchehe na. ⁴⁸ Are ndatsjexin mundo tti ndoa que janha ndačhjan, mé tti sinchecastigá tti chojni que rinaoha na janha co ncheha caso palabrana. ⁴⁹ Jamé ixin janha nichjaha inchin janho rinaho; Nnodana que rroanha na, Ndo mé Ndo ttetonna tti janha rrondačhjan co tti janha tsjagoa chojni. ⁵⁰ Co nona que tti ttetonha Nnodana, mé para vida nroaxin que ھاonhi tiempo tsjexin. Jańá mexinxin tti janha ndačhjan, ndačhjan inchin Nnodana coetonna.

13

Jesús joinchetsinda rotté cain chojni que vacao

¹ Ná nchanho saho de tti quiai dinhi pascua Jesús ovenohe que oji-tonchian tiempo que jehe satsjixin de ngataha nontte nttihi co satsji para ngain Ndodé. Jehe cainxin tiempo joinao chojni jehe nttihi ngataha nontte, co nchanho mé jehe cjoagoe na que jehe anto rinao na.

²⁻⁴ Inchínji joinchexaxaon Judas Iscariote, xitsihi ná tti vinhi Simón, para que jehe xaxaon quexén sinchehe para sicjagoe chojni que ninga-conhe Jesús ttinó jí Jesús para rrotse na. Jesús ovenohe que jehe joixin de ngain Dios, co ixin rrocjan satsji ngain Dios iná, co venohe que jehe Ndodé joanjo Ndo cainxin joachaxin; mexinxin are tejine na, Jesús vingattjen de ngain mesa, co joantsje lonttoe jingá, tti lontto jidattexin co coi axin nttachajnoe conixin ná toalla. ⁵ Cottimeja coequia jinda ná chiavandejachjan co coexinhi joinchetsinda rotté cain chojni que vacao jehe, co joinchexemanxin rotté na conixin tti toalla que jidicaoxin ngain nttachajnoe.

⁶ Co are jehe coexinhi joinchetsinda rotté Simón Pedro, jehe jiji ndačo:

—¿Asoixin sinchetsinda rotena?

⁷ Jesús ndačo:

—Jai jaha ttinxinha tti rrinttaha janha, pero después jaha tsinxin.

⁸ Pero Pedro ndačo ngain:

—Janha xonhi tiempo rrochjaha joachaxin para sinchetsinda rotena. Jesús ndačo ngain:

—Si janha sinttatsindaha rottea, jaha jaha chojnina.

⁹ Simón Pedro ndačo:

—Jeoha rotena sinchetsinda na remé; cai sinchetsinda rana co jana.

¹⁰ Pero Jesús ndačo ngain:

—Tti chojni que nandá ditsinda irrogondaha rrotsinda icha, jeho rotté ixin ngoixin cuerpoe oroa. Jaha ra oroa ansean ra masqui jeha cainxin ra.

¹¹ Jehe ndačo: “Jeha cainxin ra roa ra”, ixin jehe ovenohe quexehe tti rrondate chojni quexén para rrotse na Jesús.

¹² Are joexin joinchetsinda rotté cain na, jehe cjan vengá lonttoe, tti lontto jidattexin, co tavehe ngain mesa iná co ndačo ngain na:

—¿Attinxin jaha ra tti jointtaha janha nganji ra? ¹³ Jaha ra ncheguinhini ra janha Maestro co tti chonda cain joachaxin para ixin jaha ra, co nchao ndačo ra jañá ixin janha ndoa jañá na. ¹⁴ Janha Maestro na co chonda joachaxin para ixin jaha ra, pero masqui jamé janha jointtatsinda rottea ra, mexinxin cai jaha ra xaxaonha ra ixin anto importante ra; chonda ra que sinchetsindehe chó rottea ra naná ra.

¹⁵ Janha jointtaha jiji para chjaha jaha ra ná ejemplo para que jaha ra sinchehe ra xajeho tti janha jointtaha. ¹⁶ Janha rrindattjo ra ndoa que ni ná tti nchehe xa čhoha rrochonda icha joachaxin que xinajní, co ni ná tti dicao ná joajna čhoha rrochonda icha joachaxin que jehe tti rroanha joajna mé. ¹⁷ Si ttinxin ra cosa jiji, co jañá sinchehe ra, jaha ra atto čhjoin sintte ra.

¹⁸ Janha rrinichjaha de cainxin jaha ra ixin janha nona quecá ra xó coinchiaha ra. Pero chonda que tsonhe inchin jitaxin Palabré Dios: “Tti chojni que jinequinha, mé tti rroningaonna.” ¹⁹ Janha ndattjo jaha ra jiji jai para que are siconhe, jaha ra sitticaon ni ra janha que janha ndoa

titi Cristo na inchin ndačhjan. ²⁰ Janha rrindattjo ra ndoa que tti chojni que sayé quexeho chojni que janha rrorroanha, cai chojni mé sayé na janha; co tti chojni que sayé na janha, cai sayé na tti rroanha na.

Jesús ndačo ixin Judas tsjago quexén rrotse na Jesús

(Mt. 26.20-25; Mr. 14.17-21; Lc. 22.21-23)

²¹ Are joexin ndačo Jesús jihi, jehe conohe ngain ansén ná joachjao anto soji, co ndačo claro:

—Janha rrindattjo ra ndoa que ná de jaha ra tti rrondache chojni quexén para rrotse na na janha.

²² Cottimeja cain chojni que vacao Jesús coexinhi na tsjehe chó na pero noeha na quexehe de jehe na tti ndačo Jesús. ²³ Ná de tti tteyó chojni que vacao Jesús, tti Jesús anto joinao, jehe mé tajine ngaca Jesús, ²⁴ co Simón Pedro joinchehe seña ngain mé para que jehe mé sanchiangui ngain Jesús de ixin quensen tti ndačo Jesús. ²⁵ Cottimeja jehe mé icha conchienne ngain Jesús para joanchiangui co ndačo:

—Ndachjenji na soixin quensen mé.

²⁶ Jesús ndačo:

—Janha sinttatjao rioho niottja, co tti rrochjaha nio, jehe mé.

Jamé, joinchetjao rioho niottja co joanjo nio ngain Judas Iscariote, tti xitsihi ná tti vinhi Simón. ²⁷ Co are vayé Judas niottja mé, inchínji joixinhi ngain ansén. Cottimeja Jesús ndačo ngain:

—Tti sinchehe, jaicoa nchehe.

²⁸ Pero ni ná de tti nitejine ngain mesa nttiha coinxinha na ixin quedonda ndačo Jesús yá ngain Judas. ²⁹ Judas tti vehe tesoreroe tti chojni que vacao Jesús, mexinxin canxion na xaxaon na que Jesús ndache yá para que Judas rroquehna choan cosa que rrogonda para ngain quiai, o rroganjo nchin tomi ngain chojni noa. ³⁰ Are joexin vayé Judas niottja mé, jehe vačhjexin de nttiha. Co rato mé ottie.

Cosa naroaxin que Jesús coetonha

³¹ Are Judas ovačhje, Jesús ndačo:

—Jai rrořago tti joachaxin que chonda janha, tti Xí que joixin de ngajni, co joachaxin Dios rrořagoxin de nganji na, ³² ixin si janha, tti Xí que joixin de ngajni, tjago joachaxin Dios, cai Dios tsjago que janha chonda joachaxin, co jehe otoi sinchehe. ³³ Jaha ra inchin xannchinnchinchjanhna co janha ndattjo ra ixin isariha tsje tiempo nganji ra. Jaha ra tsjé ni ra, pero řajeho inchin ndattjan chojni judío rrondattjo jaha ra jai: Jaha ra čhoħa tsji ra tti satsji janha. ³⁴ Janha rritetonħa jaha ra ná cosa naroaxin jihi: rinao chó ra. Janhi inchin janha rinao jaha ra, jaha ra chonda ra que sinao chó ra. ³⁵ Si sinao chó ra, cainxin chojni ngoixin nontte tsonohe na que jaha ra ndoa ditticaon ni ra janha.

Jesús ndačo que Pedro rrondačo ixin jehe chonxinha Jesús

(Mt. 26.31-35; Mr. 14.27-31; Lc. 22.31-34)

³⁶ Simón Pedro joanchianguihi Jesús co ndačo:

—¿Quettinó satsji soixin?

Co Jesús ndačo ngain:

—Tti janha satsji, jaha ičhoħa rrorroehna jai, pero rrorroehna después.

³⁷ Cottimeja ndačo Pedro ngain:

—¿Quedonda čhoha rrorroaha soixin jai? Janha nchao sanjo vidana para ixin soixin.

³⁸ Jesús ndačo ngain:

—¿Aco ndoa jaha sanjo vidá para ixin janha? Janha rrindattjo ndoa que saho de rrotsje conttaxichia, jaha orrondačo ninxin nttiha que chonxinha na janha.

14

Jesús ndačo ixin jehe tti nttiha para ngain Ndodé

¹ Taha ra joachjaon. Ditticaon ra ngain Dios co ditticaon ni ra janha cai. ² Ngain lugar tti jí Ndodana jí tsje lugar para sintte ni. Co si rrocjija jamé, janha orrondattjo ra. Mexinxin janha tsji para siguinchiá ná lugar tti sintte ra. ³ Co are onchao sehe cain cosa, janha sihi iná para sirroaha ra co satsjin na nttiha para que sintte ra řajeho lugar tti janha sarihi. ⁴ Jaha ra chonxin ra ttinó satsji janha co cai ochonxin ra quexehe nttiha.

⁵ Tomás ndačo ngain Jesús:

—Chonxinha na quettinó satsji soixin, mexinxin ¿quexén rrochonxin na nttiha?

⁶ Jesús ndačo ngain:

—Janha tti nttiha na, co janha tti tjago tti ndoa, co janha tti danjo iná vida naroaxin. Jeho de ixin janha nchao sijixin cain chojni ngain Ndodana. ⁷ Si jaha ra ochonxin ni ra janha, cai ochonxin ra Ndodana. Co ochonxin ra Ndo desde jai ixin jaha ra ovicon ra Ndo.

⁸ Cottimeja Felipe ndačo ngain Jesús:

—Chjana ra joachaxin sicon na Ndodá na; conixin maho janha na anto rrochahna na.

⁹ Jesús ndačo ngain:

—Felipe, ochonda anto tsje tiempo que janha rrihi nganji ra, ¿aco řa chonxinha na? Tti chojni que dicon na janha, cai jehe dicon Ndodana. ¿Quedonda ndachjenji na ixin rrochjaha joachaxin para sicon Ndodá na?

¹⁰ ¿Aditticaonha que janha rrihi ngain Ndodá na co jehe Ndo jí Ndo nganji na? Cain cosa que rrindattjo ra, rrindattjoha ra inchin janho rinaho; Ndodana que jí nganji, jehe Ndo nchehe Ndo tti jehe Ndo rinao Ndo.

¹¹ Ditticaon ni ra que janha rrihi ngain Ndodana co jehe Ndo jí Ndo nganji na, pero si nahi, jeho ditticaon ni ra ixin janha nttaha tsje cosa jian.

¹² Janha rrindattjo ra ndoa que tti chojni que ditticaon nganji na janha, cai sinchehe cain cosa que janha nttaha, co sinchehe cosa icha jian ixin janha satsji tti jí Ndodana. ¹³ Co cain tti joatotsenhe ñao ra que jaha ra sanchia ra conixin joachaxín nombrena, janha rrochjaha ra para que Ndodana tsosayehe Ndo de ixin janha tti Xenhe Ndo. ¹⁴ Janha sinttaha quexeho cosa que jaha ra sanchia ra conixin joachaxín nombrena.

Jesús ndačo ixin jehe rrorroanha Espíritu Santo

¹⁵ Si jaha ra rinao ni ra janha, ditticaon ra tti janha rritetonha ra. ¹⁶ Co janha sinttatsán ñao Ndodana que rrorroanha ra Ndo iná tti tsjenguijna ra co sehe para cainxin tiempo nganji ra: ¹⁷ mé tti Espíritu Santo que tsjagoha ra tti ndoa de ixin Dios. Tti chojni que icha ncheřoxinhi cosa de ngataha nontte jihi, chojni mé čhoha sayé Espíritu jihi ixin ni diconha na co ni chonxinha na de ixin Espíritu jihi. Pero jaha ra chonxin ra de ixin Espíritu jihi ixin jehe Espíritu jihi jí nganji ra, co sittohe ngaxinhi jaha ra para cainxin tiempo. ¹⁸ Janha tsinttoaha ra jaho ra, rrocjan na para

sarihi nganji ra. ¹⁹ Iseha para que cain chojni isiconha na na janha, pero jaha ra sicon ni ra janha. Co jaha ra sinttechon ra ixin janha rrichon. ²⁰ Ngain nchanho mé jaha ra tsonoha ra que janha rrihi ngain Ndodana, co jaha ra te ra nganji janha, co janha rrihi nganji ra. ²¹ Tti chojni que nohe co ditticaon tti janha ttetonha, jehe tjago que ndoa rinao na. Co Ndodana sinao Ndo tti chojni que sinao na janha, co cai janha sinaho jehe na co rrožago na ngain na.

²² Iná Judas, jeha tti Iscariote, jehe mé ndačho:

—¿Quedonda rrožago nganji janha na co nahi ngain chojni que icha nchežoxinhi cosa de ngataha nontte?

²³ Jesús ndačho ngain:

—Tti chojni que rinao na janha, jehe nchehe caso tti ndačhjan janha, co Ndodana sinao Ndo jehe, co Ndodana co janha sihi na sintte na ngain jehe chojni mé. ²⁴ Tti chojni que rinaoha na janha, jehe ncheha caso tti janha ndačhjan. Tti joajna que jaha ra tettinhi ra jeha joajnana janha, mé joajné Ndodana que rroanha na.

²⁵ Janha rrindattjo ra cain jihi jaxon que ža rrihi nganji ra, ²⁶ pero janha rrondattjan Ndodana co jehe Ndo rrorroanha Ndo Espíritu Santo para que tsjenguijna jaha ra co santsjaha ra joachjaon. Jehe mé tti tsjagoħa ra cain tti ndoa, co sinttažaxaon ra cainxin tti janha ndattjo ra.

²⁷ Jai que chiaon tiempo para janha satsjixin de nganji jaha ra, janha danjo nganji ra tti čhjoin que tsonohe ansean ra. Pero mé jeha inchin tonohé ansén chojni que nchežoxinhi cosa jianha de ngataha mundo jihi. Mexinxin taha ra joachjaon ni žaonha ra. ²⁸ Jaha ra ocoinna ra tti ndačhjan que janha satsji, co rrocjan na sihi para sarihi nganji ra iná. Si ndoa rinao ni ra, chonda que chaha ra are conoha ra que janha satsji ngain Ndodana ixin jehe Ndo chonda Ndo icha joachaxin que janha. ²⁹ Janha rrindattjo ra jihi jaxon para que are siconhe, cottimeja sitticaon ra.

³⁰ Ironichjaha icha nganji ra ixin ojoí tti ttetonhe cain chojni que icha nchežoxinhi cosa de ngataha nontte jihi. Masqui jehe chondaha ni ná joachaxin para ixin janha. ³¹ Pero tti tsonhe jihi chonda que tsonhe para que chojni ngoixin mundo tsonohe na que janha rinaho Ndodana co janha nttaha cainxin tti jehe Ndo coettonna Ndo. Dingattjen ra co sachjinxin na de nttihi.

15

Jesús inchin nttauva

¹ Janha inchin tti mero maté nttauva, co Ndodana inchin tti jinda nnta. ² Cainxin chojni que ditticaon na janha, jehe inchin rama que danjo ttochjoin. Pero tti chojni que ncheha inchin rinao Ndodana, chojni mé inchin tti rama que danjoha ttochjoin. Mexinxin Ndodana dantsjenda Ndo chojni mé inchin nchehe tti jinda nttauva tončhinji rama que danjoha ttochjoin. Pero cain chojnina que nchehe inchin rinao Ndodana, jehe Ndo dinttjian Ndo cain cosa jianha de ngain chojni mé inchin nchehe tti jinda nttauva damehe co ncheroa cain rama que danjo ttochjoin para que sanjo rama mé icha ttochjoin. ³ Jaha ra oroa ra de ixin tti janha jointtacoanha ra. ⁴ Cainxin ra dintte ra nganji na inchin janha rrihi nganji jaha ra. Žajeho inchin ná ramé nttá čhoha sinchechjian rama mé ttochjoin si jehe rama mé jitsexinha ngain mero nttá jieto, jamé

jaha ra cai çhoha sitticaon ra tti janha ttetonha ra si jaha ra sintteha ra nganji na.

⁵Janha tti nttattochjoin na, co jaha ra rama ra. Tti sehe nganji janha co janha sarihi ngain jehe, jehe sanjo atto tsje ttochjoin, pero jaha ra çonhi sinchehe ra si janha coha na nganji ra. ⁶Tti seha nganji na, mé inchin cain nttarama çonhi xé que dinttji co ndaxema. Co ttjejo na rama mé co tsjaga na ngain çohi.

⁷Si jaha ra sinchehe ra sigue sintte ra nganji na, co rrotjañaha ra tti janha jointtacoanha ra, danchia ra tti sinao ra, co sayehe ra. ⁸Ndodana tsosayehe Ndo are jaha ra sinchehe ra jian co mé inchin tti anto tsje ttochjoin que sanjo ra, co jañá sintte ra chojni que ndoa ditticaon na janha. ⁹Janha rinaho jaha ra, jañá inchin Ndodana rinao na janha; jañá nchehe ra sigue cosa jian para que janha sinaho ra. ¹⁰Si ditticaon ra tti janha ttetonha ra, janha sinttaha sigue sinaho ra, jañá inchin janha ditticanho tti ttetonha Ndodana co jehe Ndo nchehe Ndo sigue rinao na Ndo.

¹¹Janha nichja nganji ra jañá para que rrochaha ra jaha ra inchin janha chahna co jañá cainxin ra anto rrochaha ra. ¹²Tti janha ttetonha ra janhi sinchehe ra: que sinao chó ra inchin janha rinaho jaha ra. ¹³Çonhi iná cosa icha jie sinchehe ni para tsjagoxin ni que ndoa rinao chó ni. Jeho hasta jehe ni sanjo ni cuerpoe ni para ndasenhe para ixin xiamigoe ni. ¹⁴Jaha ra tti xiamigona si sinchehe ra sigue ngain tti janha ttetonha ra. ¹⁵Isinttaguinha ra ninchehe çana ixin tti nchehe ça noeha quehe nchehe xinajní. Jaha ra ntaguinhi ra amigona ixin jointtagatsoan ra cainxin tti ndachjenji na Ndodana. ¹⁶Jeha jaha ra coinchiena ni ra janha, sino que janha tti coinchiaha jaha ra, co coetonha ra que ttji ra co ndache ra tsje chojni palabrana, co cain chojni que sitticaon palabrana, mé tti tsje ttochjoin que jaha ra sanjo ra, co cain ttochjoin mé tsonçhenhe tto. Co jamé Ndodana rrochjá ra Ndo cain tti sanchiehe ra Ndo conixin joachaxín nombrena. ¹⁷Janha rritetonha ra que nchehe ra sigue rinao chó ra.

Chojni ningaconhe na Jesús conixin chojni jehe

¹⁸Si chojni que icha ncheçoxinhi cosa de ngataha nontte rroningaconha jaha ra, noha ra que janha tti saho joiningaonna na. ¹⁹Si jaha ra rroçji ra inchin jehe na co rrojintaçoxinha ra cosa inchin jehe na ncheçoxinhi na, jehe nimé rrojinao ra na inchin jehe na rinao na chojni na. Pero janha coinchiaha jaha ra de ngayé chojni mé, co mexinxin chojni mé ningaconha ra na ixin jaha ra incheha ra inchin jehe na. ²⁰Çaxaon ra janha ndattjo ra: “Ni ná tti nchehe ça çhoha chonda icha joachaxin que xinajní.” Si janha ningaonna tsje chojni, cai jaha ra rroningaconha ra na. Co si jehe na vitticaon na tti janha jointtacoán na, cai sitticaon na tti jaha ra sincheconhe ra na. ²¹Cain jihi sinchehe na nganji ra ixin causananxin janha ixin jehe na chonxinha na de ixin tti roanha na janha.

²²Si janha rrojiha rronichjá na, jehe na rroquinttecaha na cosa jianha que nchehe na. Pero jai jehe na teca na cainxin tti jianha que nchehe na, ²³ixin tti chojni que ningaonna, cai ningaconhe na Ndodana. ²⁴Si janha çonhi tiempo rrojinttaha ngayé na lo que ni iná chojni çhoha nchehe, jehe na rroquinttecaha na cosa jianha que nchehe na. Pero jehe na ovicon na cain cosa jihi, co masqui jointtaha cain jihi, jehe na

ningaconna na co ningaconhe na Ndodana cai. ²⁵ Pero jihi conhe ixin chonda que conhe palabra que jitaxin ngain ley que jehe na chonda na. Co ley jitaxin janhi: “Jehe na joiningaconna na co janha xonhi jianha jointtaha.”

²⁶ Pero tsí tti ttjenguijna ni. Co jehe mé tti Espíritu Santo que joixin de ngain Ndodana co jehe mé tti janha rrorroanha nganji ra. Co jehe Espíritu mé nichja joxon cosa ndoa co jehe rronichja de ixin janha. ²⁷ Co cai jaha ra rronichja ra de ixin janha ixin vintte ra nganji na desde are nacoexianxon ndattjan chojni de ixin quehe rinao Ndodana.

16

¹ Janha rrindattjo ra cain cosa jihi para que are anto tangui tsonha ra, jaha ra tsinttoeha ra de sitticaon ni ra. ² Jehe na senguixin ra na de ngain nihngo. Co sinqué momento de que quexeho de jehe na nasoexon ra na co jehe na rrořaxaon na que jamé jiquinixin para ixin Dios. ³ Jehe jihi sinchehe na ixin jehe na xonhi tiempo ditticaon na ni Ndodana ni janha. ⁴ Janha rrindattjo ra cain jihi para que are tsí rato mé, jaha ra rrořaxaon ra que janha ondattjo ra.

Tti nchehe Espíritu Santo

⁵ Janha ndattjoha ra cain jihi desde are saho ixin janha joarihi nganji ra. ⁵ Pero jai janha satsji sigarihi ngain tti rroanha na, co ni ná de jaha ra tedanchianguinaha ra ixin ttinó satsji. ⁶ Puede ixin anto vinttechinhi ra ixin ndattjo ra cain cosa jihi. ⁷ Pero rrindattjo ra ndoa que icha jian para ixin jaha ra janha satsji. Ixin si janha satsjiha, tsiha Espíritu Santo para sehe nganji ra, mé tti tsjenguijna ra co santsjehe joachjaon ansean ra. Pero si janha satsji, janha rrorroanha jehe mé. ⁸ Are jehe tsí, jehe sincheguitticaon chojni de ngataha nontte jihi que jehe na nchehe na jianha, co jehe sinchenohe chojni ixin jehe na chonda que sinchehe na jian, co jehe sinchenohe na que ixin Dios sinchejuzguehe na. ⁹ Jehe sincheguitticaon na que nchehe na jianha ixin ditticaonha na na janha. ¹⁰ Jehe sinchenohe na ixin chonda na que sinchehe na jian ixin janha satsji tti jí Ndodana, co jaha ra isiconha ni ra. ¹¹ Co jehe sinchenohe na ixin Dios sinchejuzguehe na ixin ogoan condenado tti ttetonha ngain cain cosa jianha de mundo jihi.

¹² Janha chonda atto tsje que rinaho rrondattjo ra, pero jaha ra čhoha tsinxin ra jai. ¹³ Are tsí Espíritu Santo, tti nichja ndoa, jehe tsjagoha ra cainxin tti ndoa ixin jehe rronichjaha inchin jeho rinao, jehe rrondačo cainxin tti jehe ttinhi ngain Ndodana, co jehe sinttanoha ra cosa que siconhe. ¹⁴ Jehe sinchesayana janha ixin jehe sayé tti ndoa de ixin janha co jehe sintagatsoan ra. ¹⁵ Cainxin tti chonda Ndodana cai para ixin janha, mexinxin janha ndačhjan que Espíritu Santo sayé tti ndoa de ixin janha co jehe sinttagatsoan ra.

Jesús ndačo ixin jehe na tsa na joachjaon pero seha

¹⁶ Iseha, jaha ra isiconha ni ra, pero nchion icha después jaha ra rrocjan ra sicon ni ra. Co después janha satsji tti jí Ndodana.

¹⁷ Cottimeja canxion de tti chojni que vacao Jesús joanchianguihi chó na co ndačo na:

—¿Quehe rročo jihi? Jehe ndattjo na que iseha ján na isoconha na jehe, co nchion icha después rrocjan socon na jehe iná, co ixin después jehe

satsji tti jí Ndodé. ¹⁸ ¿Quehe rrocho yá “iseha”? Ján na ttinxinha na quehe rrocho tti jehe ndacho.

¹⁹ Jesús conohe que jehe na rinao na sanchiangui na ngain jehe, co jehe ndacho ngain na:

—Janha ndattjo ra que iseha jaha ra isiconha ni ra, co nchion icha de-spués jaha ra rrocjan ra sicon ni ra iná. ¿Ajehe jiji tti tedanchianguihi chó ra? ²⁰ Janha rrindattjo ra ndoa que jaha ra rrotsjanga ra co sinttechinhi ra, pero chojni de ngataha nontte que ditticaonha na janha, jehe nimé rroché na. Pero masqui jamé, co masqui jaha ra sinttechinhi ra, pero jaha ra rrocjan rrochaha ra iná. ²¹ Are ná nchí sincheconcjiji xenhe, jehe ncha ta ncha joachjaon ixin ojoí hora de que anto tsín ncha, pero are ojoexin toncjiji xenhe ncha, ni iŕaxaonha ncha de ixin anto coín ncha ixin anto ché ncha ixin joincheconcjiji ncha ná chjan. ²² Jañá jaha ra cai, ta ra joachjaon jai, pero janha rrocjan na sicon ni ra, cottimeja ansean ra anto rroché co iŕonhi iná chojni nchao santsjaha ra tti rroché ansean ra.

²³ Ngain nchanho mé iŕonhi joatotsenhe ñao saqué ra nganji na. Janha rrindattjo ra ndoa que Ndodana rrochjá ra Ndo cainxin tti jaha ra sanchiehe ra Ndo conixin joachaxín nombrena. ²⁴ Hasta jaxon jaha ra xa ŕonhi danchia ra conixin joachaxín nombrena; danchia ra co sayehe ra para que anto rroché ansean ra.

Jesucristo coixinhi ngain cain cosa jianha de ngataha nontte

²⁵ Janha ndattjo ra cain cosa jiji conixin ejemplo, pero tsí hora que janha irroundattjoha ra conixin ejemplo, janha rrindattjo ra claro de ixin Ndodana. ²⁶ Ngain nchanho mé jaha ra sinchetsenhe ra ñao Ndo conixin joachaxín nombrena, co janha rrindačhjanha ixin janha tti sinttatsán ñao Ndo para ixin jaha ra ²⁷ ixin jehe Ndo mero rinao ra Ndo. Jehe Ndo rinao ra Ndo ixin jaha ra rinao ni ra janha, co ditticaon ra ixin janha joixin de ngain jehe Ndo. ²⁸ Janha vachjexin de ngattoxon con jehe Ndo para que janha joihi ngataha nontte jiji, pero jai tsinttoa nontte jiji para sarrocjan na ngain Ndo.

²⁹ Cottimeja cain chojni que vacao Jesús ndacho na:

—Janché, soixin rrinichja claro, co irrinchegondaha ni ná ejemplo. ³⁰ Janché, ttianxin na que soixin noha cainxin cosa, co rrogondaha para iná chojni sanchiangui nganji soixin ixin soixin chonxin quehe rronichja ni icha saho que jehe ni rronichja ni. De ixin jiji janha na ditticanho na que soixin joixin de ngain Dios.

³¹ Jesús ndacho ngain na:

—Jai ditticaon ra. ³² Jai ojoí tiempo co ŕajeho jai jaha ra rrochjequehe ra. Co satsji ra tti jaha ra sinao ra, co tsinttona ra janho. Pero jaonha rrihi ixin jehe Ndo ttjen Ndo nganji na. ³³ Janha rrindattjo ra cain jiji para que čhjoin tsonohe ansean ra ixin te ra nganji na. Ngataha nontte jiji chonda que anto tangui tsonha ra, pero xaonha ra ixin janha coixinna ngain cainxin cosa de ngataha nontte jiji.

17

Jesús joinchetsenhe ñao Dios para ixin chojni que ditticaon

¹ Are joexin ndacho Jesús cain cosa jiji, jehe tsjehe para ngajni co ndacho:

—Padre, horana ojoí hora. Nchesayehe Xanha para que jehe Xan cai sinttasayaha Xan soixin. ² Soixin chjehe Xanha joachaxin para ngain

cain chojni, para que jehe Xan joanjo Xan iná vida naroaxin ngain tti chojni que soixin joanjo ngain Xan. ³ Co vida mé rrocho que jehe na rrochonxin na de ixin soixin, tti nacoaxinxon Dios ndoa, conixin Jesucristo, tti soixin rroanha.

⁴ Janha jointtasayaha soixin nntihi ngataha nontte, co ojoena jointtaha tti soixin coetonna. ⁵ Co jai soixin nchesayana ngattoxon con soixin xajeho inchin joinchesayana icha saho de que nontte vehe.

⁶ Tti chojni que soixin coinchiehe de ngayehe icha chojni ngataha nontte para chjana na janha, janha jointtanoa na quensen soixin. Chojni mé chojnia soixin, co soixin chjana na janha, co jehe na vitticaon na joajná soixin. ⁷ Co jai jehe na nohe na que cainxin tti chjana soixin joixin de nganji soixin. ⁸ Janha chjaha na tti joajna que soixin chjana, co jehe na vayé na joajna mé. Jehe na conohe na ndoa que janha joixin de nganji soixin, co vitticaon na que soixin rroanha na.

⁹ Janha nttatsanha ñao para ixin jehe na; janha jeha nttatsanha ñao para ixin tti chojni que icha ncheoxinhi cosa de ngataha nontte, janha nttatsanha ñao para ixin tti chojni que soixin chjana ixin chojni mé chojnia soixin. ¹⁰ Cainxin chojni que janha chonda, mé chojnia soixin, co cain chojni que soixin chonda, mé chojnina, co joachaxinna tononxin de ngain jehe na.

¹¹ Janha isittonaha nntihi ngataha nontte ixin janha sasaso para sarihi nganji soixin, pero jehe na sittohe na nntihi ngataha nontte. Soixin que anto jian, darinda conixin joachaxian tti chojni que soixin chjana na para que jehe na ngoixin tiempo sintte na unido inchin soixin co janha. ¹² Are janha joarihi ngain jehe na ngataha nontte jiji, janha joarinda cain tti chojni que soixin chjana conixin joachaxian soixin, co joarinda na jian. Ni ná de jehe na vitjanha na, jeha vitján tti jiquininxin vitján para que tsonhe tti ndacho ngain tti jitaxin Palabrá soixin.

¹³ Jai janha osaso tti ttjen soixin. Co rrindačhjan cain cosa jiji jaxon que xa rrihi ngataha nontte jiji para que jehe na xajeho rroché na inchin janha chahna. ¹⁴ Janha chjaha na joajná soixin, pero chojni que icha rinao jeha cosa de ngataha nontte toñao na ngain chojnina ixin chojnina rinaoha na jeha cosa de ngataha nontte inchin janha cai rinaoha jeha cosa de ngataha nontte. ¹⁵ Janha jeha rrinttatsanha ñao soixin que santsjexin jehe na de ngataha nontte jiji, jeha rrinttatsanha ñao ixin tančhjandaha jehe na ngain inchínji. ¹⁶ Jañá inchin janha rinaoha jeha cosa ngataha nontte, jamé jehe na cai rinaoha na jeha cosa de ngataha nontte. ¹⁷ Dantsjenda jehe na de ngain cain cosa jianha co nchecoene na tti ndoa; tti joajná soixin, mé tti ndoa. ¹⁸ Inchin rroanha na janha ngayé tti chojni de ngataha nontte, jamé janha cai rrorroanha jehe na ngayé tti chojni de ngataha nontte. ¹⁹ Janha rrinttaha jeha inchin soixin rinao para que jehe na cai sinchehe na jeha inchin soixin rinao, co sinchehe na mé ixin chonxin na tti ndoa.

²⁰ Pero joatotsenhe ñao jiji jeha para jeha jehe na, cai para ixin cain chojni que sitticaon na después, are chojni mé tsinhi na tti joajna que chojni tehe sicao. ²¹ Janha danchia nganji soixin que cainxin jehe na sintte na inchin nacoa chojni, inchin soixin ttjen nganji na co janha rrihi nganji soixin, que jehe na sintte na nganji ján na para que tti chojni de ngataha nontte sitticaon na que soixin rroanha na janha. ²² Janha jointtasayá jehe na inchin soixin nchesayana janha para que jehe na

sintte na inchin nacoa chojni, jañá inchin soixin co janha xajeho nacoa na. ²³ Janha ngain jehe na, co soixin nganji na para que jehe na sintte na mero ndoa nacoaxinxon na, co jamé chojni de ngataha nontte tsonohe na que soixin rroanha na janha, co soixin anto rinao jehe na inchin rinao na janha.

²⁴ 'Padre, soixin tti chjana jehe na co rinaho que jehe na sintte na nganji na tti janha sarihi para que jehe na sicon na quexén soixin nchesayana janha ixin soixin joinao na desde icha saho que vehe nontte. ²⁵ Padre soixin que anto jian, tti chojni que icha ncheoxinhi cosa de ngataha nontte chonxinha na de ngain ansean soixin, pero janha chonxin, co chojni tehe onoho na que soixin rroanha na janha. ²⁶ Janha jointtagatsoan jehe na quensen soixin, co xa sinttaha sigue sinttagatsoan jehe na de ixin soixin para que jehe na rrochonxin na ixin soixin rinao na jehe na xajeho inchin rinao na janha, co para que janha mero sarihi ngain jehe na.

18

Are tse na Jesús

(Mt. 26.47-56; Mr. 14.43-50; Lc. 22.47-53)

¹ Are joexin ndaço Jesús cain cosa jihi, jehe conixin chojni que vacao vaçhjexin na de nttiha para sacjoi na toenxin ná tsaga que dinhi Cedrón. Nttiha vehe ná huerta, tti joigaha Jesús conixin chojni que vacao. ² Cai Judas, tti joindaço para tse na Jesús, jehe vechonxin ngain lugar mé ixin tsje nttiha Jesús conixin jehe cjoí na ngain lugar mé conixin cain icha chojni que vacao Jesús. ³ Co Judas cjoí nttiha conixin anto tsje xisoldado conixin icanxin xipolicie nihngo icha importante que vintterroanha xifariseo co xidána que vaquetonha ngain icha xidána. Cjoí na nttiha conixin nttá co joicao na canxion cosa inchin candil para joinchengasanxin na, co icanxin na joicao na jeho nttá conixin mecha ngain con nttá. ⁴⁻⁵ Co Judas, tti joindaço para tse na Jesús, nttiha jóí ngayehe na cai. Pero Jesús ovenohe cain tti jehe tsonhe, mexinxin jehe vaçhjeýé co ndaço ngain na:

—¿Quensen tettjé ra?

Jehe na ndaço na ngain:

—Jesús de Nazaret.

Jesús ndaço ngain na:

—Mé, janha.

⁶ Co are Jesús ndaço: “Mé, janha”, jehe na vintteguixinto na co hasta vintteguinttji na ngataha nontte. ⁷ Cottimeja Jesús cjan joanchianguihi na ndaço:

—¿Quensen tettjé ra?

Co jehe na ndaço na:

—Jesús de Nazaret.

⁸ Cottimeja Jesús ndaço ngain na:

—Ondattjo ra que janha. Si tettjé ni ra janha, tançhjanda ra chojni tehe satsji na.

⁹ Jihi joiconhe inchin ndaço Jesús: “De tti chojni que jehe Ndo chjana Ndo, ni ná na vitjanha na.” ¹⁰ Cottimeja Simón Pedro vechonda ná espada, co jehe joantsje espada mé co conçhinjihi ndatsjoen lado jian ná

tti vinhi Malco, mé ná tti nchehe xé xidána icha importante. ¹¹ Pero Jesús ndačo ngain Pedro:

—Cjan ttín espada lugué espada. Si Nnodana ndačo Ndo que janha anto tangui tsonna jaxon, mexinxin janha chonda que tsonna.

Jesús ngain Anás

(Mt. 26.57-58; Mr. 14.53-54; Lc. 22.54)

¹² Cottimeja cain xisoldado que cjoí conixin xicomandanté xa co xipolicie chojni judío, cain nimé tse na Jesús co coia na. ¹³ Cottimeja sajoicao na Jesús para ngain nchiandoha Anás. Anás mé icha saho cjoí tti dána icha importante, co mé ndonché Caifás, tti dána icha importante tiempo mé. ¹⁴ Caifás jihi tti ndačo ngain chojni judío que icha jian para ixin jehe na si senhe nacoa xí para ngoixin nación.

Pedro ndačo ixin jehe chonxinha Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro co iná de tti chojni que vacao Jesús terroé na Jesús. Co jehe Anás, tti cjoí dána icha importante are icha saho, jehe mé vechonxin tti iná chojni que joicao Simón Pedro. Mexinxin joixinhi jehe chojni mé conixin Jesús ngain patioe nchiandoha jehe Anás. ¹⁶ Pero Pedro ndavittohe ndojaxin de puerté patio mé. Mexinxin vačhje tti iná chojni mé co nichjé tti nčhí que jinda puerta nttiha para xanxinhi nča Pedro. ¹⁷ Cottimeja jehe tti nčhí mé joanchianguihi nča Pedro, co ndačo nča:

—¿Ajeha jaha ná de tti chojni que xicao xí jiha?

Pedro ndačo:

—Nahi, jeha janha.

¹⁸ Ixin rato mé anto quin, mexinxin canxion xinchehe xé Anás co xipolicie nihngo dicjaga xa xohi, co nttiha tatengattjen xa texixöhe xa. Pedro cai nttiha jixixöhe ngayé xa ngaca xohi mé.

Anás joanchianguihi Jesús

(Mt. 26.59-66; Mr. 14.55-64; Lc. 22.66-71)

¹⁹ Jehe Anás coexinhi joanchianguihi Jesús ixin quecá chojni vacao Jesús co quehe vanchecoenhe Jesús chojni. ²⁰ Jesús ndačo:

—Janha ndačhjan ngayé chojni ngoixin mundo. Janha cainxin tiempo jointtacoán chojni ngain icha nihngo co ngain nihngo icha importante, tti xatte cainxin chojni judío, jañá janha jeha jimao ndačhjan.

²¹ ¿Quedonda danchianguina janha? Danchianguihi cain tti chojni que coinhi tti janha ndačhjan, co jehe na rrondačo na de ixin quehe ndattjan na. Jehe na nohe na tti janha ndačhjan.

²² Are Jesús ndačo jihi, ná de tti xipolicie nihngo icha importante que te nttiha xanguí xa Jesús ná manazo rroha Jesús co ndačo xa ngain:

—¿Ajañá ndache tti dána icha importante?

²³ Jesús ndačo ngain xa:

—Si ndačhjan ná cosa que jí jianha, jaha ndačo que xenxin jixin jianha; pero si tti ndačhjan janha jí jian, ¿quedonda donhe na?

²⁴ Cottimeja Anás rroanha Jesús ngain Caifás, tti dána icha importante tiempo mé. Co xa vechia Jesús.

Pedro ndačo iná ixin jehe chonxinha Jesús

(Mt. 26.71-75; Mr. 14.66-72; Lc. 22.58-62)

²⁵ De cainxin mé, Pedro xa tajingattjen jixixöhe ngandehe xohi, co joanchianguihi na co ndačo na ngain:

—¿Ajeha jaha ná de tti chojni que xicao xí jiha?

Co Pedro ndačho na ixin ján, jehe ndačo:

—Nahi, jaha janha.

²⁶ Cottimeja ná de tti nchehe xé Anás, jehe tti nchehe xa mé xa ichó tti xí que Pedro cončinjihí ndatsjoen, jehe tti nchehe xa mé ndačo ngain Pedro:

—¿Apoco viconha janha jaha conixin jehe xí yá are ngagaha nttat-tochjoin?

²⁷ Pedro ndačo iná ixin nahi, co rato mé tsje ná conttaxichia.

Jesús ngain Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Cottimeja sajoicaoxin na Jesús de nchiandoha Caifás para ngain palacioe xigobrador. Co rato mé ocoexinhi vingasán, pero chojni judío joixinha na palacio. Si jehe na rrojixinhi na palacio mé, jehe na rroguinte na roaha inchin costumbre que vinttechonda na co čhoha rrojine na ngain tti quiai pascua. ²⁹ Mexinxin Pilato vačhe para nichjé na, co ndačo ngain na:

—¿De quehe tjanguihi ra xí jihí?

³⁰ Jehe na ndačo na:

—Si jehe xa jaha ná chojni que nchehe tsje cosa jianha, janha na rrojiquianha na xa nganji.

³¹ Cottimeja Pilato ndačo ngain na:

—Sattjiho ra xa jaha ra, co jaha ra nchejuzguehe ra inchin ttetonha ley que chonda ra.

Chojni judío ndačo na:

—Pero janha na chojni judío na, co chondaha na joachaxin para nasoenxon na ni ná chojni.

³² Jańá joiconhe inchin ndačo Jesús de ixin quexén jehe chonda que senhe. ³³ Pilato cjan joixinhi palacio, co jehe vayé Jesús co joanchianguihi co ndačo:

—¿Ajaha tti Rey de chojni judío?

³⁴ Jesús ndačo ngain:

—¿Ajaho xaxaon danchiangui jihí, ni ixin iná chojni ndattjo de ixin jamé na janha?

³⁵ Pilato ndačo:

—¿Apoco janha judío na? Chojni nacioan jaha co xidána que vaquetonha ngain icha xidána, nimé ni joicocho nttihi. ¿Quehe joinchehe?

³⁶ Cottimeja Jesús ndačo:

—Tti janha ttetonha jaha nttihi ngataha nontte. Si rrocji de nttihi, cottimeja cain chojni que vitticaon na janha rroguittoexinha na para que janha rrotse na chojni judío. Pero tti janha ttetonha jaha nttihi.

³⁷ Cottimeja Pilato ndačo:

—¿Ajaha tti rey remé?

Jesús ndačo:

—Ján, janha rey na inchin jaha ndačo. Janha concjina co joihi ngataha nontte jihí para ndačhjan tti ndoa. Cainxin chojni que ditticaon tti ndoa, jehe na ttihi na tti ndačhjan.

³⁸ Pilato ndačo ngain Jesús:

—¿Quexehe tti ndoa mé?

Are ndacho na ixin Jesús chonda que ndasene

(Mt. 27.15-31; Mr. 15.6-20; Lc. 23.13-25)

Are joexin joanchiangui Pilato jihi, jehe vachje iná para nichjé chojni judío co ndacho ngain na:

—Janha xonhi jianha dittjá xí jihi. ³⁹ Pero jaha ra chonda ra costumbre que ttonna ra ngain quiai pascua para que janha tančhanda quexeho ná de tti teaxinhi. Mexinxin çarinao ra que janha tsančhanda satsji tti Rey de ngain chojni judío?

⁴⁰ Cottimeja cainxin na cjan coyao na co ndacho na:

—¡Mé nahi! ¡Icha jian tančhanda Barrabás!

Co Barrabás jihi jehe ná tti chehe.

19

¹ Cottimeja Pilato coetonha para vicaon Jesús. ² Mexinxin xisoldado coentaha xa já Jesús ná corona de nchaha, co joinchengá xa Jesús ná lonto morado inchin lonttoe ná rey. ³ Cottimeja vintteconchienne xa ngaca Jesús co cjoanoa xa ndache xa:

—¡Viva tti Rey de chojni judío!

Co xanguí xa manazo ngá con Jesús.

⁴ Cottimeja Pilato cjan vachje iná, co ndacho ngain na:

—Tsjenxin ra, janha santsje xa nntihi para que sicon ra que janha ni ná cosa jianha dittjaha ngain xa.

⁵ Co vachje Jesús conixin tti corona de nchaha ngataha já co jingá jehe tti lonto morado. Cottimeja Pilato ndacho ngain na:

—Nntihi jí xa.

⁶ Are vicon xipolicié nihngo icha importante co xidána que vaquetonha ngain icha xidána, vinttecoyao xa co ndacho xa:

—¡Nchecrucificá xa! ¡Nchecrucificá xa!

Pilato ndacho ngain na:

—Sattjiho ra xa co jaha ra nchecrucificá ra xa ixin janha dittjaha ni ná cosa jianha ngain xa.

⁷ Pero chojni judío ndacho na:

—Janha na chonda na ná ley co jitaxin ngain ley mé ixin xí yá chonda que senhe xa ixin ndacho xa que jehe xa Xenhe Dios.

⁸ Are coinhi Pilato jihi, jehe icha xaon. ⁹ Jehe cjan joixinhi palacio, co joanchianguihi Jesús co ndacho:

—¿Queén dinhi rajná jaha?

Pero Jesús ixonhi ndacho.

¹⁰ Cottimeja Pilato ndacho ngain:

—¿Quedonda tencoa jaha nganji na? ¿Anoaha que janha chonda joachaxin para sinttacrucificá jaha, co janha chonda joachaxin cai para que tsančhanda satsji jaha?

¹¹ Jesús ndacho ngain Pilato:

—Jaha rrochondaha ni ná joachaxin para ixin janha si Dios rrochjaha joachaxin mé. Mexinxin tti chojni que joiquinha nganji jaha, nimé ni icha tsje jianha teca que tti.

¹² Ngain rato mé Pilato cjoé quexén rrojinchehe para rrocanchjanda Jesús sarroci, pero chojni judío coyaoite na co ndacho na:

—¡Si tsančhanda Jesús satsji, jaha jeha amigoe xiemperador César que tteonha ngain tsje nación! ¡Quexeho chojni que doan rey, chojni mé jeha amigoe xiemperador!

¹³ Cottimeja Pilato are coinhi jiji, jeha vačhjecaho Jesús para ndoja co jeha Pilato vetaha tti lugar que vinhi tribunal, co ngain nguigoa hebreo lugar mé vinhi Gabata, co rrocho lugar que diguittexin xo. ¹⁴ Nchanho mé cjoí víspera de ngain tti nchanho que nchejogaha na are ngain tti quiai pascua. Co mé conhe inchin ngosine nchanho. Cottimeja ndačo Pilato ngain chojni judío:

—¡Ntiti chonda ra tti rey de jaha ra!

¹⁵ Pero jeha na coyao na co ndačo na:

—¡Jeha chonda que ndasenne! ¡Jeha chonda que ndasenne! ¡Nchecrucificá!

Pilato ndačo ngain na:

—¿Apoco janha sinttacrucificá tti rey de jaha ra?

Pero xidána que vaquetonha ngain icha xidána vinttendačo xa:

—Janha na chondaha na icha rey que jeha xiemperador César que tteonha ngain tsje nación.

¹⁶ Conixin jeha jiji, Pilato joanjo Jesús ngain jeha na para goan crucificado, co jeha na sajoicaoxin na Jesús de nttiha.

Are Jesús goan crucificado

(Mt. 27.32-44; Mr. 15.21-32; Lc. 23.26-43)

¹⁷ Co Jesús de nttiha vačhjexin coame crué para sajoicao na ngain tti lugar que vancheguini na Nttalorojá Chojni, co ngain nguigoa hebreo vinhi Gólgota. ¹⁸ Nttiha joinchecrucificaxin na Jesús, co are joinchecrucificá na Jesús, joinchecrucificá na iyó xí cai, naná xa cada lado, co Jesús vehe ngosine. ¹⁹ Pilato coetonha vehe nganito cruz ná letra que ndačo: “Jesús de Nazaret, Rey de chojni judío.” ²⁰ Co tsje chojni judío tsjehe na letra mé ixin tti lugar que joinchecrucificaxin na Jesús vehe chian ngaca ciudad de Jerusalén co letra mé vetaxin ngain nguigoehe hebreo, co griego, co latín. ²¹ Mexinxin xidána que vaquetonha ngain icha xidána de chojni judío vinttendache xa Pilato:

—Ttentaxinha “Rey de chojni judío”; icha jian ttentaxin, “Tti ndačo ixin jeha Rey de chojni judío.”

²² Pero Pilato ndačo ngain xa:

—Tti janha coentaxin, jańá sittohe.

²³ Are xisoldado joexin joinchecrucificá xa Jesús, cottimeja canoi xa chjeyehe xa lonttoe Jesús. Cottimeja coá xa camisé Jesús, co camisa mé xonhi tti ditsexinxin chó manta, jeha nacoa pieza camisa mé.

²⁴ Mexinxin xisoldado ndache chó xa:

—Tsinchjeha na camisa, icha jian dantsje na suerte de ixin jeha camisa para socon na quensen sittoehe camisa.

Jańá joiconhe tti jitaxin ngain Palabré Dios que ndačo: “Chjeyehe na lonttona, co joantsje na suerte de ixin jeha lontto.” Jeha jiji tti joinchehe xisoldado.

²⁵ Ngaca crué Jesús nttiha vehe janné, co nčhichó janné, co María, tti cjoí čhihi Cleofas, co María Magdalena. ²⁶ Are Jesús vicon janné tajingattjen jan nttiha, co ngaca jan tajingattjen tti chojni que vacao Jesús que jeha anto joinao, Jesús ndačo ngain janné:

—Yá rrichonda xitsiha.

27 Cottimeja ndaĉho Jesús ngain chojni mé:

—Yá chonda janná.

Co rato mé jehe chojni mé vayé jehe janné Jesús inchin janné jehe, co jamé vayaconhe jehe janné Jesús.

Are ndavenhe Jesús

(Mt. 27.45-56; Mr. 15.33-41; Lc. 23.44-49)

28 Después de cain jihi, are Jesús conohe que cainxin oconhe, co para xettexin conhe tti jitaxin ngain Palabré Dios, Jesús ndaĉho:

—Venhe na jinda.

29 Nttiha vehe ná chi que veĉhe de vino que dicjan inchin vinagre; cottimeja nttiha xanguí ná de xisoldado ná cosa que dinhi esponja, co cosa mé tse jinda inchin chjon algodón, co coencjin xa cosa mé con ná ntté nttahisopo co tsín xa hasta ngain rroha Jesús. 30 Jesús vihi jehe vino san mé, cottimeja ndaĉho:

—Cainxin oconhe.

Cottimeja joinchesé já co ndavenhe.

Ná xisoldado conxiré xa nttanttacoín Jesús conixin lanzé xa

31 Nchanho mé cjoí víspere de tti quíai pascua, co chojni judío joinaoha na para canio cuerpo mé rroguíttohe nganito cruz ngain nchanho que vanchejogaha na ixin jehe nchanho que vanchejogaha na, mé nchanho anto santo. Mexinxin ndache na Pilato que jehe tsetonhe xisoldadoe ixin tsondai xa rotté tti chojni que te crucificado para que chojni mé ndasene icha daca, co sinttjianxin xa cuerpoe de nttiha. 32 Cottimeja xisoldado vintteçji xa co condai xa rotté tti saho, co cai rotté tti iná, cay-oixin tti vintte crucificado conixin Jesús. 33 Pero are vintteconchienne xa ngain Jesús, vicon xa que jehe ondadiguenhe, co mexinxin icondaiha xa rotté Jesús.

34 Pero masqui jehe ondavenhe, ná de tti xisoldado mé conxirehe xa nttanttacoín Jesús conixin ná lanza, co rato mé vaĉhjedohe jni co jinda. 35 Janha tti çjin na jihi co vicon cain jihi co ndaĉhjan tti ndoa. Co janha chonda seguro que ndaĉhjan tti ndoa para que jaha ra cai sitticaon ra. 36 Ixin cain cosa jihi conhe para joiconhe inchin jitaxin ngain Palabré Dios que ndaĉho: “Condaiha na ni ná nttaloro.” 37 Co jí iná parte que ndaĉho: “Sicon na tti joinchenihi na.”

Are Xavá Jesús

(Mt. 27.57-61; Mr. 15.42-47; Lc. 23.50-56)

38 Después de cain jihi, José, tti joixin rajna Arimatea, joanchiehe joachaxin Pilato para sajoícao cuerpoe Jesús. José mé cjoí ná chojni que vitticaon Jesús, pero jehe joinaoha para conohe icha chojni que jehe vitticaon ixin vaĉagoen José chojni judío que vinttechonda joachaxin. Pilato çhjé José joachaxin, mexinxin jehe cjoí co sajoícao cuerpoe Jesús. 39 Cai Nicodemo, tti joinichjé Jesús ngain ná ttie, jehe mé cjoí conixin ná cantte kilo de mirra co áloes, cayoi mé diguítteçjan. 40 Co José co Nicodemo coensiha na cuerpoe Jesús conixin venda que anto çhjoin çajni de ixin tti cayoi cosa que joícao Nicodemo. Co coensiha na cuerpoe Jesús inchin vanchehe chojni judío are vacjavá na chojni que ndavaguenhe. 41 Ngain lugar tti joinchecrucificaxin na Jesús nttiha vehe ná huerta de nttatochjoun, co ngain huerta mé vehe ná cueva nroaxin que xa çonhi cuerpo diguenhe diçanxinhi na nttiha. 42 Nttiha coín na

cuerpoe Jesús ixin cueva mé chiaon vehe co ixin otsexinhi tti nchanho que nchejogaha chojni judío.

20

Are xechon Jesús

(Mt. 28.1-10; Mr. 16.1-8; Lc. 24.1-12)

¹ Ngain nchanho domingo María Magdalena cjoy ngain cueva mé atto ndoyo are xa naxion xehe, co vicon que icoha tti xo que vejé cueva mé.

² Cottimeja coinga sacjoy tti vehe Simón Pedro co iná de tti chojni que vacao Jesús, tti chojni que Jesús anto joinao, co ndačo ngain na:

—Sadijicaoxin na de ngain cueva cuerpoe Jesús, co noaha na ttinó coín na cuerpo.

³ Cottimeja Simón Pedro co tti iná chojni vachje na co cjoy na ngain cueva mé. ⁴ Cayoixin na tettinga na nataonxin, pero tti iná icha coinga que Pedro, co jehe mé tti icha saho joiyi ngain cueva mé. ⁵ Visé tsjehe co vicon jeho venda tate nttiha, pero jehe joixinha. ⁶ Cottimeja joiyi Simón Pedro, co jehe vixinhi cueva mé. Jehe cai vicon jeho venda tate nttiha, ⁷ co cai vicon tti manta que gonda para vesia já Jesús, ijilha manta conixin venda, jehe manta dixea manta co ndaha jí manta. ⁸ Cottimeja vixinhi tti iná chojni cai, tti joiyi icha saho ngain cueva mé, co vicon tti diconhe, co jehe vitticaon, ⁹ masqui jehe na xa coinxinha na tti jitaxin Palabré Dios que Jesús chonda que rroxechon de ngayehe nindadiguenhe. ¹⁰ Cottimeja cayoi chojni mé sacjan na para nchiandoha na.

Are Jesús xago ngain María Magdalena

(Mr. 16.9-11)

¹¹ Pero María Magdalena nttiha vittohe ndoja ngaca cueva mé, co jitsjanga. Co are jitsjanga visé para tsjehe ngaxinhi cueva mé, ¹² co jehe vicon yó ángel que tengá lonto roa co tate tti vehe cuerpoe Jesús. Ná de jehe tají tti vehe já Jesús co iná tají tti vehe rotté Jesús. ¹³ Co cayoi ángel mé joanchianguihi María co ndačo:

—¿Quedonda rritsjanga?

Jehe María ndačo:

—Ixin sajoicao na cuerpoe Jesús, co nonaha ttinó coín na.

¹⁴ Are joexin ndačo yá, cjoendoa já co vicon Jesús que nttiha tají pero jehe venoeha ixin jehe Jesús. ¹⁵ Cottimeja Jesús joanchianguihi:

—¿Quedonda rritsjanga? ¿Quensen rrittjé?

Jehe María xaxaon que puede xí mé tti jinda nttattochjoin nttiha co ndačo ngain:

—Si soixin sacjoiho cuerpo que vehe nttihi, ndachjenji na ttinó cointtohe cuerpo para que janha sirroá cuerpo co satsjinha cuerpo mé.

¹⁶ Cottimeja ndačo Jesús ngain:

—¡María!

Co jehe María cjan, co ndačo ixin nguigoa hebreo ngain Jesús:

—¡Raboni!

Co raboni rročo Maestro.

¹⁷ Jesús ndačo:

—Tančjanda na ixin xa tajinha ngain tti jí Ndodana. Pero ttji co ndache cain chojni que vacjinha que janha tsajín ngain tti ttjen Ndodana co Ndodá jaha ra cai, tti Dios de janha co Dios de jaha ra.

¹⁸ Cottimeja María Magdalena joiquetonhe cain chojni que vacao Jesús ixin jehe María vicon Jesús, co ixin jehe Jesús ndache María para ixin rrondačo ngain na.

Jesús xago ngain chojni que vacao

(Mt. 28.16-20; Mr. 16.14-18; Lc. 24.36-49)

¹⁹ Ngain xajeho nchanho mé, tti nchanho domingo, are otie, canxion chojni que vacao Jesús tate na ngain ná nchia co jian diquejé na puerté nchia mé ixin vařagoen na chojni judío. Co rato mé Jesús xago ngayé na, co jehe joanjo joajna ngain na, co ndačo:

—Dayehe ra tti čhjoin que tsonohe ansean ra.

²⁰ Co are joexin ndačo jihi, jehe cjoago ngain na rá jehe co nttantta-coin tti conihí. Co jehe na ché na ixin vicon na Jesús iná. ²¹ Cottimeja Jesús cjan ndačo ngain na:

—Dayehe ra tti čhjoin que tsonohe ansean ra. Inchin rroanha na Nnodana, jamé janha rrorroanha jaha ra cai.

²² Cottimeja Jesús vanottetaon na co ndačo ngain na:

—Dayehe ra Espiritu Santo. ²³ Cain chojni que jaha ra sinchetjañehe ra tti jianha que jehe joinchehe, jamé ndasitjañehe ixin cai Dios ndasinchet-jañehe chojni mé; co cain chojni que jaha ra sinchetjañeha ra, jamé xa sitjañeha chojni mé ni de ngain Dios.

Tomás vicon ixin Jesús dixechon

²⁴ Pero Tomás, mé ná de tti tteyó chojni que vacao Jesús, tti vanheguinhi na Xancoata, jehe mé coha ngain na are cjoí Jesús. ²⁵ Pero tti icanxin chojni que vacao Jesús ndačo na ngain:

—Janha na vicon na Jesús.

Pero jehe Tomás ndačo ngain na:

—Si siconha janha ngá rá tti joidoho clavo, co rrořanxinha dedona nttiha, co rrořanxinha rana ngain nttantta-coin, janha čhoħa sitticanho.

²⁶ Vatto jni nchanho de mé co cain chojni que vacao Jesús cjan na ngain nchia iná, co are mé nttiha vehe Tomás ngain na cai. Co masqui cain puerta tatejé jian, Jesús joixinhi, joiguehe ngayé na co joanjo joajna ngain na co ndačo:

—Dayehe ra tti čhjoin que tsonohe ansean ra.

²⁷ Cottimeja ndačo ngain Tomás:

—Tsjenxin rana, co řanxinhi dedoa nttihi; co řanxinhi rá ngain nttantta-coin na. Iřaxaonha ixin ndoaha, pero ditticaon nganji na.

²⁸ Cottimeja Tomás ndačo:

—¡Soixin tti chonda cain joachaxin, co soixin tti Dios de janha!

²⁹ Jesús ndačo ngain:

—Tomás, janché ditticaon ixin vicon na. Icha čhjoin vidé tti chojni que diconha na janha co masqui jamé jehe na ditticaon na.

Quedonda Juan dicjin libro jihi

³⁰ Jesús joinchehe anto tsje señal que vicon chojni que vacao jehe, pero cainxinha señal mé jitaxin ngain libro jihi. ³¹ Pero cain jihi jitaxin para que jaha ra sitticaon ra que Jesús mé tti Cristo que Dios rroanha, co jehe mé Xenhe Dios, co para que rrochonda ra iná vida naroaxin que řonhi tiempo tsjexin are sitticaon ra jehe.

21

Jesús xago ngain yáto chojni que vacao

¹ Después de cain jiji, Jesús cjan xago iná ngain chojni que vacao are ngandehe lago que dinhi Tiberias. Janhi conhe: ² tate yáto na, Simón Pedro; Tomás, tti Xancoata; Natanael, tti joixin rajna Caná de Galilea; co cayoi xitsihi Zebedeo; co iyó chojni que vacao Jesús. ³ Simón Pedro ndačo ngain na:

—Janha sitse copescado.

Cain jehe na ndačo na ngain:

—Janha na cai tsjin na.

Jaña savinttecji na coani na ná barco, pero ttie mé xonhi copescado tse na. ⁴ Co are ocoexinhi vingasán, Jesús xago ngandehe jinda, pero cain chojni mé venoeha na ixin jehe Jesús. ⁵ Cottimeja Jesús ndačo ngain na:

—¿Axa xonhi copescado tse ra?

Co jehe na ndačo na:

—Xa xonhi va.

⁶ Cottimeja Jesús ndačo ngain na:

—Dancahngui ra nonchaha lado jian de barco, co rrotse ra va.

Co jamé joinchehe na, cottimeja ndoa hasta ni ichoha dantsjengui na nonchaha de ngangui jinda ixin anto tsje copescado vingachjian nonchaha. ⁷ Cottimeja tti chojni que Jesús anto joinao, mé ndačo ngain Pedro:

—¡Jehe Jesús!

Nandá coinhi Simón Pedro yá que ixin jehe Jesús, jehe Pedro jaicoa vingá lonttoe, lontto jidattexin ixin jehe joantsje lontto, co coataonhe jinda. ⁸ Co rato mé tti icha chojni que vacao Jesús xa vittohe na inchin cien metro cjinxin de ngandehe jinda. Cottimeja jehe na joí na ngandehe jinda conixin barco que jittiangangi nonchaha jicaontja copescado. ⁹ Are ojoí na ngandehe nda ngataha jinche, vittja na ná montochjan de xoittja conixin ná copescado ngataha xohi, co niottja. ¹⁰ Jesús ndačo ngain na:

—Sicoho ra canxion copescado que tse ra jaxon.

¹¹ Simón Pedro cjan ngain barco para joica nonchaha que jiringa copescado co jehe coianganji nonchaha mé hasta tti ngandehe lago co nttiha jiringa de joxon copescado yeye hasta ciento cincuenta y tres va. Co masqui anto tsje va, vichjeha nonchaha. ¹² Cottimeja Jesús ndačo ngain na:

—Xacoi ra jintte ra.

Co ni ná de jehe nimé xaxaonha na para joanchianguihi na Jesús ixin quensen jehe ixin venohe na que jehe Jesús. ¹³ Cottimeja Jesús conchienne, co jehe coá niottja co joanjo nio ngain jehe na, co cai copescado.

¹⁴ Jiji ninxin nttiha que xago Jesús ngain chojni que vacao después de xechon.

Jesús nichja ngain Pedro

¹⁵ Are joexin joine na, Jesús joanchianguihi Simón Pedro co ndačo:

—Simón, xitsihi Jonás, ¿arinao na janha icha que nitehe?

Pedro ndačo:

—Ján, soixin noha que ján rinaho.

Jesús ndačo:

—Mexinxin jaha darinda chojnina, jañá inchin tti ttingaria coleco dicao cuidado de ixin jehe va.

¹⁶ Yoxin nttiha, Jesús joanchianguihi iná co ndačo:

—Simón, xitsihi Jonás, ¿arinao na janha?

Pedro ndačo ngain:

—Ján, soixin noha que ján rinaho.

Jesús ndačo:

—Mexinxin jaha darinda chojnina, jañá inchin tti ttingaria coleco dicao ciudadano de ixin jehe va.

¹⁷ Ninxin nttiha joanchianguihi Jesús co ndačo:

—Simón, xitsihi Jonás, ¿arinao na?

Pedro tavechín ixin Jesús joanchianguihi ninxin nttiha ixin arinao jehe Pedro Jesús. Co Pedro ndačo ngain Jesús:

—Soixin noha cainxin. Soixin noha que janha ján rinaho soixin.

Jesús ndačo ngain:

—Mexinxin darinda chojnina, jañá inchin tti ttingaria coleco dicao ciudadano de ixin jehe va. ¹⁸ Janha rrindattjo ndoa que jaha are xa joarihi icha chjan, jaha vaguitoxinha co savacji tti jaha vajinao, pero are otsonttaxí, jaha tsinxe rá co ojé ni sinttangá lonttoa, co tsjiho na tti jaha sinaoha tsji.

¹⁹ Are Jesús ndačo jiji, jehe jinchequinxin na ixin quexén senhe Pedro, co ixin jehe Pedro jañá sinchesayehe Dios. Cottimeja ndačo Jesús ngain Pedro:

—¡Jaha nchehe sigue ditticaon na!

Tti chojni que Jesús anto joinao

²⁰ Are Pedro ngaria, jehe vicon que nttiha jirroé tti chojni que Jesús anto joinao, xajeho tti vehe ngaca Jesús are joine na ngain quiai pascua co joanchiangui ngain Jesús co ndačo: “Soixin, ¿quexehe tti tsjagoe chojni que ningaonha ttinó ttjen soixin?” ²¹ Co are Pedro vicon jehe mé, jehe Pedro joanchianguihi Jesús co ndačo:

—Xí jiji, ¿quexén tsonhe xa?

²² Jesús ndačo ngain Pedro:

—Si janha rinaho que jehe xa sechon xa hasta que are janha rrocjan na sihi iná, ¿jaha quehe ndosán? Jaha nchehe sigue ditticaon na janha.

²³ Mexinxin xaxaon icha chojni que vacao Jesús que ixin jehe mé rroguenha. Pero Jesús ndačhoja ngain Pedro ixin chojni mé rroguenha, Jesús jeha ndačo que: “Si janha rinaho que jehe xa sechon xa hasta que are janha rrocjan na sihi iná, ¿jaha quehe ndosán?”

²⁴ Jehe chojni mé, mé tti janha, co janha tti vicon cain cosa jiji, co cjin na cain jiji. Co noa na que ndačhjan ndoa.

²⁵ Cai jí icha cosa que Jesús joinchehe, pero si rroguetaxin ná co ná cosa mé, janha xaxanho que ngoixin mundo rroguittjaha rroguingachjian cain libro que rroguetaxin cain cosa mé. Amén.

Tti Joinchehe Nirepresentanté Jesucristo

Are Jesús ndacho ixin tsí Espíritu Santo

¹ Ngain saho librona janha cjin na para ixin jaha, Teófilo, cainxin tti joinchehe Jesús co cainxin tti cjoago Jesús desde nchanho are jehe coexinhi cjoago ² hasta nchanho que jehe sacjoi para ngajni. Co antes que Jesús sarrocji ngajni, jehe coinchié co coetonhe nirepresentanté jehe conixin joachaxin que chonda Espíritu Santo. Jehe Jesús coetonhe na de ixin quexén sinchehe na. ³ Co después de ndavenhe co xechon, jehe xago ngain cain chojni jehe. Co ngoixin cuarenta nchanho Jesús joinchehe tsje cosa para que chojni mé vintte na seguro que ixin jehe cjan jichon iná. Co vandacho ngain na de ixin quexén ttetonha Dios.

⁴ Co Jesús, are xa vehe ngain na, coetonhe na ixin rrochonhe na ngain ciudad de Jerusalén. Co ndacho ngain na:

—Chonhe ra hasta tsoenja tti ndacho Ndodana icha saho, inchin janha ondačhan nganji ra cai. ⁵ Ndoa que Juan joincheguite chojni conixin jinda, pero ntthi quejanhi nchanho jaha ra siguite ra conixin Espíritu Santo.

Are Jesús sacojín para ngajni

⁶ Co are Jesús xa vehe ngain na, jehe na joanchianguihi na co ndacho na:

—Soixin, zarato jihi, rrochjehe chojni Israel joachaxin para tsetonha ngain nonttehe iná?

⁷ Co Jesús ndacho ngain na:

—Jaha ra xonhi joachaxin chonda ra para rrochonxin ra quesa o quehe hora Ndodá na sinchehe Ndo cosa jihi ixin jehó jehe Ndo chonda Ndo joachaxin para sinchehe Ndo cosa jihi. ⁸ Pero are tsí Espíritu Santo nganji ra, jaha ra rrochonda ra joachaxin Dios co mexinxin sachjexin ra de ntthi co rronichja ra de ixin janha. Co jaha ra rronichja ra ntthi ngoixin Jerusalén, cottimeja satsji ra ngain ngoixin nonttehe Judea, co ngoixin nonttehe Samaria, co hasta cain lugar que jí icha cjin de ntthi ngataha nontte.

⁹ Co are Jesús joexin ndacho cain yá, cain representanté jehe tatetsjehe na quexén sacojín Jesús are sacjoi para ngajni. Co are onoi joiji, joí ná ttjoi cjoanotaon co iviconha na. ¹⁰ Xa tatetsjehe na para ngajni ixin ttinó sacojín Jesús are cononxin ngaca na yó xí tengá lonto roa ¹¹ co ndacho cayoi xí mé ngain na:

—Jaha ra chojni Galilea, ¿quedonda tatetsjehe ra para ngajni? xajeho Jesús que sacjoixin de nganji ra rrocjan tsí iná inchin are jaha ra vicon ra sacjoi.

Are coinchiehe na Matías para vehe ngain lugar de Judas

¹² Cottimeja cain nirepresentanté Jesús sacjoixin de ngagaha tti jnanchjan que dinhi Jné Nttaolivo, co sacjan na para ciudad de Jerusalén. Co jna mé anto chiaon jí jna de ngain Jerusalén inchin ley Israel tajanda chojni para sattji ngain nchanho que nchejogaha ni. ¹³ Co are joiji na ngain nchia tti vintte na ngain ciudad mé, jehe na coani na yoxin piso tti jehe na vintte na. Co de cain na vehe Pedro, Jacobo, Juan, Andrés, Felipe, Tomás, Bartolomé, Mateo, iná Jacobo xenhe Alfeo, Simón tti vaquetocaho

gobierno romano, co Judas xenhe Jacobo. ¹⁴ Cain chojni mé vaʒatte na para vanchecoanxinhi na Dios conixin cain xanchó Jesús xanxí, co María, janné Jesús, co icha nanita cai.

¹⁵ Ná nchanho tiempo mé nttiha vintte inchin ciento veinte chojni co Pedro vingattjen ngayé na co ndačo ngain na:

¹⁶ —Tsjexin ra hermanos, chonda que joiconhe tti joindačo Espíritu Santo ngain David co jehe dicjin ngain tti jitaxin Palabré Dios. Ndačo nttiha de ixin Judas tti ndačo para queʒén tse na Jesús co sajoicao na.

¹⁷ Judas vacji nganji na janha na, ixin jehe vechonda ʒajeho ʒa que janha na techonda na. ¹⁸ Pero conixin tti tomi que cjoenguehe na hna para ixin tti jianha que jehe joinchehe ngain Jesús, coehna ná nontte. Co nttiha Judas cjoí co cjoixin já ngataha nontte mé co ʒhintaon cuerpoe co vačhe cain tti jiringa. ¹⁹ Co are cain chojni que vintte ngain ciudad de Jerusalén conohe na ixin jamé conhe, jehe na joincheguinhí na nontte mé Acéldama, ixin nguigoehé hebreo, pero rročo ʒajeho Jnguihi Jni.

²⁰ Ixin ngain libroe Salmo David ndačo janhi: Chonda que sittohe nchiandoha jeho nchia, co ʒonhi chojni sintte ngaxinhi nchia.

Co ndačo cai: Iná chojni rrochonda tti ʒa que jehe vechonda.

²¹ 'Co nttihi ngayá na te xí que vacjinho na cainxin tiempo are Jesús vehe nttihi nganji na ²² desde nchanho que Juan joincheguitte Jesús co hasta nchanho are Jesús sacoján para ngajni. Mexinxin chonda que ná de xí mé sehe nganji na para rrondache icha chojni ixin jehe seguro vicon ixin Jesús xechon después de ndavenhe.

²³ Cottimeja coinchiehe na yó xí de nivacao na ngain cain nchanho mé. Ná vinhi José co cai vaguinhi Justo co Barsabás. Co yoxin tattita vinhi Matías. ²⁴ Co are joexin coinchiehe na cayoi xí mé, joinchecoanxinhi na Dios co ndačo na:

—Soixin que chonxin ansén cainxin chojni, tjagohna na ra quexehe de cayoi xí tehe soixin ocoinchiehe ²⁵ para sinchehe ʒá soixin inchin ʒa que vanchehe Judas. Pero jehe joinchetján ʒa mé ixin joinchehe jianha co jaxon jí ngain lugar tti jiquinixin sehe.

²⁶ Cottimeja vantsje na suerte co suerte mé vittotaon tattita vinhi Matías. Co rato mé jehe Matías vehe conixin ittejngo representanté Jesús.

2

Are Espíritu Santo joí ngain chojni que vaguitticaon Jesús

¹ Co are joí quiai dinhi Pentecostés, cainxin chojni que vaguitticaon Jesús tate na ngain nacoa lugar. ² Co rato mé coinhi na ná ruido anto soji que joixin de ngajni, inchin are tja ʒhintto soji. Jamé vaʒoin ngoixin ngaxinhi nchia tti texinhi na. ³ Cottimeja vicon na tsje neje ʒohi, co joí naná neje ʒohi mé ngataha cada na. ⁴ Co Espíritu Santo joixinhi cuerpoe cain na conixin joachaxin. Co jehe na coexinhi na nichja na ojé nguigoa inchin Espíritu Santo joinchenichja na.

⁵ Co tiempo mé nttiha vintte tsje chojni judío ngain Jerusalén que joixin de tsje nación ngoixin mundo. Co chojni mé anto vaguitticaon ley Israel co cjoí ngain Jerusalén para joinchesayexin Dios inchin ndačo ley mé.

⁶ Co are coinhi na ruido ngain nchia mé, anto tsje chojni mé ʒatte nttiha. Co ni inoencoá na quehe rroʒaxaon na ixin naná na coinhi na nguigoehé

na tenichja entre cain chojni que vaguitticaon Jesús. ⁷ Co tavinttetsjecoa chó na co vinttegoan na admirado. Co ndache chó na:

—Pero cain chojni que tenichja janhi; ¿jehe na ajeha de nttihi nonttehe Galilea na na? ⁸ ¿Quehe jitonhe? Cain ján na tettinhi na tenichja na ojejé nguigoaha na cada na. ⁹ Nttihi ngayá na te chojni que joixin de Partia, Media, Elam, Mesopotamia, Judea, Capadocia, Ponto, co de ngain nonttehe Asia, ¹⁰ de Frigia, Panfilia, Egipto, co cai te chojni que joixin de lugar ngain Africa que jí icha ndaha de ciudad de Cirene. Cai tsje chojni romano te nttihi. Co de cain chojni romano, canxion na goan na chojni judío, co icanxin na goanha na de razé chojni judío pero ditticaon na religioen chojni judío. ¹¹ Cai jí chojni que joixin de Creta, co Arabia. Pero cainxin na ján na tettinxin na tti ndačo jehe na ixin nichja na de ixin tsje cosa jian que Dios nchehe co nichja na cain ojejé nguigoaha na ján na.

¹² Co vinttegoan admirado cain chojni mé co noeha na quehe xaxaon na co joanchianguihi chó na, co ndačo na:

—¿Quehe rročo cain jiji?

¹³ Pero icanxin na cjoanoa na na co ndačo na:

—Ixin diguinttecoan chojni yá, mexinxin jañá tečo.

Tti nichja Pedro ngain chojni

¹⁴ Cottimeja Pedro conixin ittejingo representanté Jesús vingattjen co Pedro nichja sén co ndačo:

—Chojni de nonttehe Judea co cainxin chojni que te ngain ciudad de Jerusalén, tonoha ra co ttinhi ra jian tti rrondattjo ra. ¹⁵ Xí tehe dicoanha xa inchin jaha ra xaxaon ra, ixin jaxon xa ndoyo; nandá las nueve. ¹⁶ Tti jaha ra vicon ra jaxon, jiji tti ondačo profeta Joel are nichja co ndačo: ¹⁷ Dios ndačo: ngain tiempo are ochiaon ndatsjexin mundo, rrorroanha Espíritu Santo ngain cainxin chojni.

Co chjan sayé joajnana para rrondache xan icha chojni de ixin janha, co janha sinttaguicon xanxí co xannchí tsje cosa xá are toxinxin xan. Co cain chojni que ojonchjan tsoxinxin tsje cosa de ixin janha.

¹⁸ Rrorroanha Espíritu Santo nchanho mé ngain cain ninchehe xana.

Co jehe na sayé na joajnana para rrondache na icha chojni de ixin janha.

¹⁹ Co de ngajni noi tsjagoa na tsje cosa que vaguiconha chojni are saho.

Co ngataha nontte tsjagoaxin na tsje señal.

Tsjagoa na jni, xohi co ttjoi de joxon jihinchin.

²⁰ Are mé nchanho isinchengasanha co ndatsonttie,

co conittjao ndarroçjan va inchin jni.

Cain yá tsonhe saho; cottimeja tsí nchanho are Jesús rrocjan tsí ngataha nontte,

co tsjago ngain cain chojni joachaxin que jehe chonda.

²¹ Co cainxin chojni que nichja jian de ixin Jesús, tti chonda cain joachaxin, ngain cain chojni mé jehe sanjo iná vida naroa.

²² Cai Pedro ndačo:

—Ttinhi ra xó jaha ra chojni Israel, tti rrondaçhjan: Janha nichja de ixin Jesús tti joixin rajna Nazaret. Dios cjoagoha ra ixin jehe coinchiehe Jesús are chjé jehe jie joachaxin para joinchehe tsje cosa jian co para joinchehe tsje milagro, co para joinchehe tsje señal inchin jaha ra onoha ra. ²³ Co anto icha saho Dios ochonxin ixin jaha ra sinchehe ra nchaoha ngain Xenhe. Co ndoa, jaha ra tse ra Jesús co joinchechienhe ra ngá rá

chojni jianha. Co jehe na joinchecrucificá na Jesús ixin jaha ra joinao ra. ²⁴ Pero Dios joinchexecheon Jesús. Dios vantsje jehe de ngain tti nindadiguenhe ixin Jesús çhoha sittohe ngayé nindadiguenhe. ²⁵ Jañá conhe ixin Jesús joinchenichja rey David co ndaço:

Janha cainxin nchanho chonxin ixin Dios jí nganji janha.

Jí ngain lado jian na para que çonhi cosa sincheçaon na.

²⁶ Mexinxin ansenna anto çhjoin tonohe, co neje na nichjaxin palabra jian ixin anto chahna.

Mexinxin masqui cuerpona ndasenne, pero janha çonhi rroçagoan

²⁷ ixin soixin tsinttoeha almana ngain lugué chojni ndadenhe, ni sanjoha joachaxin para rroxantte cuerpona janha tti nttaha çá soixin ixin soixin anto rinao na.

²⁸ Cjoagohna na nttiha que danjo iná vida naroa.

Co anto rrochahna are janha sicon soixin.

²⁹ Co Pedro joinchehe sigue nichjé chojni co ndaço:

—Janha ndattjo ra ndoa ixin David ndogoolitoa na ndavenhe co çavá. Co lugar tti jehe çavá, mé ça jí jai. ³⁰ Pero David cjoí ná profeté Dios co nichja lo que Dios cjoagoe, co venohe ixin Dios ndaço ngain jehe ixin ná de xannti çançhen rrojiguehe xan rey inchin David co jehe rey mé Cristo. ³¹ Mexinxin osé tiempo vatto David chonxin quehe siconhe ngain Cristo. Co jehe nichja ixin queçén rroxechon Cristo. Co ndaço ixin almé rroguittoeha nttiha tti dittohe cain nindadiguenhe ni cuerpoe rroxantteha. ³² Co ján Dios joinchexecheon jehe Jesús, co cain janha na vicon na que Jesús ndoa xechon. ³³ Co jehe saccoajín para ngajni co jí ngain lado jian de Dios. Co jehe Ndo çhjé Ndo Jesús joachaxin para rroanha Espíritu Santo inchin jehe Ndo ndaço Ndo. Co Jesús rroanha Espíritu Santo nttihi, co Espíritu Santo mé tti nchehe cosa jhi que jaha ra dicon ra co ttinhi ra. ³⁴ Ixin jeha David tti sacjoi para ngajni. Ixin David ndaço:

Tti Ttetonna ndaço ngain tti Ttetonna:

“Darihi ngaca lado jian na,

³⁵ hasta que janha sinttagacha jaha de ngain cainxin tti ningaonha.”

³⁶ Mexinxin cainxin chojni ngain nación Israel chonda que tsonohe na seguro ixin Jesús, tti jaha ra coenganito ra cruz, Dios ndaço ixin jehe Jesús chonda cain joachaxin para ixin ján na, co jehe mé Cristo.

³⁷ Co are jehe na coinhi na cain tti ndaço Pedro, anto coá na joachjaon co joanchianguihi na Pedro co icha representanté Jesús co ndaço na:

—¿Quehe nchao sinttaha na?

³⁸ Cottimeja Pedro ndaço ngain na:

—Ttentoxinhi ra vidá ra ngattoxon con Dios, co diguite ra cada ra de ngain nombré Jesucristo para que sitjañaha ra cain tti jianha que joinchehe ra. Co jamé Dios rrorroanha Espíritu Santo nganji ra, ³⁹ ixin Espíritu Santo jí para ixin jaha ra, co para ixin xanha ra, co cai para cainxin chojni que te cjin, rroçho para cain chojni que sinao sayé Dios.

⁴⁰ Conixin palabra jhi, co icainxin icha palabra, Pedro nichjexin na, co ndaço ngain na:

—Ncheha ra inchin tenchehe cain chojni jianha que sinchetján almé na, co nchehe ra cosa jian para que rrochonda ra iná vida naroaxin.

⁴¹ Co cain chojni que vitticaon tti ndaço Pedro, jehe na joiguite na. Co nchanho mé inchin ní mil chojni coexinhi vitticaon Jesús co joiguite na.

⁴² Co cain chojni mé vaguitticaon na jian co vanchehe na inchin vacjago nirepresentaté Jesús. Co vaguitticaon chó ná, co vanchecoanxinhi na Dios co vaʒatte na cain na para vajine na tti niottja que dinhi Santa Cena.

Vidé chojni que vitticaon Cristo tiempo mé

⁴³ Conixin joachaxin que Dios chonda, nirepresentaté Jesús joinchehe na tsje milagro co tsje señal, co cainxin chojni goan na admirado. ⁴⁴ Co cainxin chojni que vaguitticaon Jesús anto vagoan na unido co vacjenguijna chó na ʒhjoin. ⁴⁵ Co coexinhi joinchejeji na cosé na co vaconchjea na tomi ngain nivagondehe. ⁴⁶ Nchanho co nchanho vaʒatte na ngain nihngo icha importante. Co ngain nchiandoha na vanecaho chó na. Co cain na anto vaché na co ni ná na conoeha na orgulloso. ⁴⁷ Jehe na vanchecoanxinhi na Dios. Co cainxin icha chojni ngain rajna vechonda respeto ngain cain na. Co cada nchanho Jesús, tti chonda cain joachaxin, vancheguitticaon icha co icha chojni.

3

Ná tti rrengo xingamehe

¹ Ná nchanho, Pedro co Juan sacjoi na nihngo icha importante ní hora tsocjin ixin hora mé hora para vanchecoanxinhi na Dios. ² Co cainxin nchanho are mé, nttiha icanxin chojni vaguicao na ná tti xí rrengo desde que digoan. Cainxin nchanho vagaquehe na tti rrengo mé ngain puerté nihngo mé que dinhi Puerta que ʒhjoin Jí, para vaganchiagaha tomi ngain chojni que vaguixinhi nttiha. ³ Co are tti rrengo mé vicon Pedro co Juan tedixinhi na nihngo, jehe joanchiagaha tomi ngain na. ⁴ Cottimeja Pedro co Juan tsjehe na jian jehe tti rrengo mé, co Pedro ndaʒho ngain:

—Tsjehe nganji janha na.

⁵ Co tti rrengo mé tsjehe jian ngain na, ixin ʒaxaon puede rrochjé na ʒhoan cosa. ⁶ Pero Pedro ndaʒho ngain:

—Janha chondaha tomi para rrochjaha, pero lo que janha chonda rrochjaha jaha: ngain nombré co de ixin joachaxín Jesucristo, dingattjen co ttjixin rottea.

⁷ Cottimeja Pedro tsehe rá tti xí mé lado jian co joinchengattjen, co rato mé cosoji cayoi rotté. ⁸ Co tti rrengo mé ʒhinca co vingattjenxin rotté, co ocoexinhi sacjoixin rotté. Co sajoixincaho cayoi na ngaxinhi nihngo. Jehe jittjixin rotté co jíchınca co jinichja jian de ixin Dios. ⁹ Cainxin chojni vicon na sacjoixin rotté co nichja jian de ixin Dios. ¹⁰ Co cain chojni mé anto ʒaon na ixin queʒén conhe ixin cain jehe na chonxin na jehe tti xí mé co nohe na que jehe tti vaguehe ngandanguí tti puerté nihngo que dinhi Puerta ʒhjoin Jí para vaganchiagaha tomi.

Tti nichja Pedro ngain Portal de Salomón

¹¹ Co jehe tti rrengo que ndaxingamehe vacataonxin Pedro co Juan. Co jehe sacjoi conixin Pedro co Juan ngain parté nihngo icha importante que dinhi Portal de Salomón. Co cainxin chojni goan na admirado co ttinga na cjoji na tti te canio nicanxion. ¹² Pedro are vicon cain chojni nttiha, ndaʒho ngain na:

—Chojni de Israel, ʒquedonda doan ra admirado jaha ra? ʒQuedonda tsjena ni ra janha na, inchin janha na mero rrojinttaxingamá na xí jihí conixin joachaxin que janha na chonda na, o ixin janha na anto chonda na respeto ngain Dios? Jeha de ixin janha na, ¹³ sino que Dios

de ndogelitoa na xančhjen Abraham, Isaac, co Jacob, Dios mé tti chjé icha tsje joachaxin ngain Xenhe que dinhi Jesús. Co Jesús mé tti jaha ra cjoio ra ngain Pilato. Co masqui Pilato joinao rrocanchjanda Jesús, jaha ra joinaoha ra. ¹⁴ Co jaha ra ndačho ra para rrocanchjanda na Jesús, tti Dios coinchiehe co tti joxon jian vanchehe. Sino que ndačo ra ixin icha jian para coanchjanda na ná chojni que vagoen icha chojni. ¹⁵ Co jamé ndagonhe ra chojni que danjo vida. Pero Dios joinchexechon chojni mé. Co janha na vicon na cain yá. ¹⁶ Co nombré jehe Jesús, o icha jian ndačhjan, tti confianza que janha na chonda na ngain jehe, mé tti joinchexingamehe xí jihi que jaha ra dicon ra co chonxin ra. Ján, seguro que ixin confianza mé tti joinchexingamehe jian xí jihi inchin jaha ra nchao dicon ra.

¹⁷ Co janha onona are jaha ra conixin cain xittetonha ra gonhe ra Jesús, noaha ra quehe joinchehe ra. ¹⁸ Pero Dios joinchehe jañá, inchin ondačo are icha saho ngain profeté que nichja lo que tti jehe Dios cjoagoe. Co jehe ndačo ixin Cristo chonda que rrojiguenhe. ¹⁹ Mexinxin tentoxinhi ra vidá ra, co ditticaon ra Dios, para sitjañaha ra cain cosa jianha que nchehe ra. Cottimeja Dios nchao tsjenguijna ra para que jaha ra anto rroché ansean ra. ²⁰ Co cai Dios rrorroanha Jesús, tti Cristo, ixin Dios coinchiehe jehe icha saho para que jehe tsjenguijna jaha ra. ²¹ Masqui jai Jesucristo chonda que tasehe ngajni hasta que tsí nchanho para Dios sinchechjian jian cain cosa, inchin ndačo osé tiempo vatto ngain cain xón que dicjin profeté Dios ngain tiempo mé. ²² Moisés ndačo janhi ngain nindogelitoa na xančhjen: “Dios, tti chonda cain joachaxin, rrorroanha nganji ra ná profeta que sačhjin de ngayaha ra, inchin jehe Dios rroaha na janha. Ditticaon ra cainxin tti rrondattjo ra jehe mé. ²³ Co cainxin chojni que sitticaonha, profeta mé sintteha na ngain chojni Dios co ndasitján na.”

²⁴ Jañá cain profeté Dios desde Samuel co icha profeta que jói después, nichja de ixin quexén conhe tiempo jai. ²⁵ Co jaha ra xannti xančhjen de cain chojni mé. Mexinxin cain tti cjoagoe Dios cain profeta, mé para ixin jaha ra. Co para tsjenguijna jaha ra, Dios joinchechjiancaho ná trato ndogelitoa na xančhjen are Dios ndačo ngain Abraham: “Co de ixin chojnia, janha sinttanchaon cainxin chojni ngataha nontte jihi.” ²⁶ Are Dios joinchexechon Xenhe, rroanha Xan saho nganji ra. Jañá Dios jointtanchaon ra para que tsinttohe ra cada ra tti jianha que nchehe ra.

4

Are nittetonha ngain nihngo tse na Pedro co Juan

¹ Pedro co Juan xa tenichja na ngain chojni are jói canxion xidána conixin tti xittetonhe cain xisoldadoe nihngo icha importante conixin icanxin xisaduceo. ² Tedaño xa ixin Pedro co Juan vacjagoe na chojni co vandačo na ixin chojni que ndadenhe rroxechon na inchin Jesús oxechon. ³ Cottimeja jehe xa tse xa Pedro co Juan para saviquixinhi xa na hasta tti ndoexin ixin nchanho mé otsocjin. ⁴ Pero tsje chojni que coinhi tti ndačo cayoi jehe na, vitticaon na Jesús. Co de cain chojni que coexinhi vitticaon Jesús nchanho mé, jehó xí ovittja chiaon naho mil xa.

⁵ Co nchanho yoxin xatte nttiha ngain Jerusalén canxion xivaquetonha ngain chojni judío, conixin canxion nivachonda joachaxin ngain nihngo co canxion ximaestro ley Israel. ⁶ Co nttiha cai vehe ná xí vinhi Anás,

mé xidána icha importante. Co nttiha cai vehe Caifás, Juan, Alejandro, co vintte cainxin ni ichó xidána icha importante. ⁷ Cottimeja rroanha na joajna para joiŕacoa Pedro co Juan. Co coín na Pedro co Juan ngosine para joanchianguihi na, co ndačo na:

—¿Quehe joachaxin chonda ra, o quensen chjá ra joachaxin para jaha ra nchehe ra cain jihi?

⁸ Cottimeja Pedro, conixin joachaxín Espíritu Santo, ndačo ngain na:

—Soixin ra ŕo ttetonha ra ngain chojni Israel, co soixin ra ŕo chonda ra joachaxin ngain nihngo icha importante: ⁹ jai soixin ra danchianguihi na ra ixin queŕén cjoenguihi na ná tti rrengo co queŕén jointtaxingamá na. ¹⁰ Rrondačhjan na ngattoxon con ra, para que tsonohe cainxin chojni Israel ixin xí jihi que jí ngattoxon con ra, jehe xa xingamehe xa pero de ixin nombré co joachaxín Jesucristo tti joixin de rajna Nazaret. Co Jesucristo mé ŕajeho tti soixin ra joinchecrucificá ra. Co Dios joinchexechon jehe. ¹¹ Inchin ndačo ngain tti jitaxin Palabré Dios de ixin Jesús: “Jehe mé tti ŕo que soixin ra, ŕo ttette ra nchia, joinaoha ra. Pero jehe goan tti ŕo icha importante de ngain nchia.” ¹² Ni ná chojni nchao rrochjá na ján na iná vida naroa, ixin Dios ndačo que ŕonhi iná chojni ngataha nontte jihi chonda joachaxin mé; jehó Jesús.

¹³ Are cainxin nivaquetonha coinhi na tti nichja Pedro co Juan, jehe na goan na admirado ixin venohe na que Pedro co Juan venoeha ŕón jian, co ixin cayoi jehe na inchin chojni que ŕonhi chonxin. Pero masqui jamé, ŕaonha na para nichja na. Cottimeja vintteगतsoan na ixin cayoi nimé vacao na Jesús. ¹⁴ Co tti xí que joinchexingamehe Pedro co Juan nttiha tajingattjen ngayé na, mexinxin čhoha joinchecaxin na Pedro co Juan ni ná cosa. ¹⁵ Cottimeja coetonhe na Pedro co Juan vačhjejeyxin de ngain na co jehó na vittohe na nttiha para cjoao na ixin queŕén sinchehe na. ¹⁶ Co ndačo na:

—¿Quehe sonttoho na ngain cayoi xí tehe? Cainxin chojni que te nttihi Jerusalén nohe na ixin cayoi xí tehe joinchehe milagro jihi. Co ján na čhoha rrondačo na ixin ndoaha. ¹⁷ Pero para tsonoeha icha chojni ixin quehe joinchehe cayoi xí tehe, ján na sonttoŕaon na de soen na para que iŕonhi chojni rronichjexin conixin nombré co joachaxín Jesús.

¹⁸ Cottimeja vayé na Pedro co Juan para coetonhe na ixin čhoha rrondačo na ni tsjago na conixin nombré co joachaxín Jesús. ¹⁹ Pero Pedro co Juan ndačo ngain na:

—ŕaxaon ra, soixin ra, ¿andačo Dios ixin icha jian jí si sitticanho na tti rrondačo ra soixin ra co sitticaonha na tti ndačo Dios, o ani nahi? ²⁰ Janha na čhoha tsinttoa na de rronichja na cain cosa que vicon na co coian na.

²¹ Cottimeja cain xittetonha nichja xa icha para joincheŕaon xa na, pero coančhanda xa Pedro co Juan para sacjoi, ixin ŕonhi razón vittja xa para rroquiaxinhi xa icha, ixin cainxin chojni nichja jian de ixin Dios are vicon na tti joinchehe Pedro co Juan. ²² Co tti xí que xingamehe de ixin joachaxín Dios vechonda icha que cuarenta nano.

Nirepresentanté Jesucristo joanchiehe na Dios para que rrochjé na icha confianza

²³ Are Pedro co Juan ocoančhanda na, cayoi jehe na sacjoi na para tti vintte tti icha nirepresentanté Jesús co ndache na cain tti ndačo cain xidána que vaquetonha ngain icha xidána, co cain nichonda joachaxin

ngain nihngo. ²⁴ Co are tti icha nirepresentanté Jesús coinhi cain yá, cain na joinchecoanxinhi na Dios, co ndačo na:

—Ndodana na, soixin tti Dios, tti joinchekhjian ngajni, co nontte, co ndachaon, co cainxin cosa que jí. ²⁵ Co soixin tti ndačo ngain Espíritu Santo para jehe joinchenichja xinchehe xá David. Mexinxin David ndačo:

¿Quedonda cain nación toñao nganji?

¿Quedonda cain chojni xaxaon cosa que xonhi xé?

²⁶ Cainxin xirey ngataha nontte co cainxin xittetonha coato chó xa para tsetocaho xa Dios co para tsetocaho xa Cristo tti coinchiehe Dios para rey, jañá čo David.

²⁷ Co ndoa, ngain ciudad jiji Herodes, Poncio Pilato co chojni que joixin ojé nación, co chojni Israel coato chó na para coetocaho na Jesús, tti Xanha jian, tti soixin rroanha para ttjenguijna na. ²⁸ Jañá joinchehe na cainxin tti soixin ndačo are icha saho que chonda que rroguiconhe. ²⁹ Co jai tsjexin, jehe na toñao na nganji na janha na co rinao na sinchexaon na na. Mexinxin ttjenguijna ni ra para rroxaonha na are rronichja na joajná soixin. ³⁰ Co nttatsán na ñao soixin, conixin joachaxian ttjenguijna ni ra para sinttaxingamá na chojni nihi co para sinttaha na icha milagro de ngain nombré Jesús, tti Xanha icha jian.

³¹ Co are joexin nichja na jañá ngain Dios, lugar tti te na ntthiha coingui, co cain na chonda na tsje joachaxin de Espíritu Santo. Co joinchehe na sigue nichja na de ixin Palabré Dios sin joaxaon.

Cainxin cosa que vechonda ná na, cai cosé cain ni icha

³² Inchin xaxaon ná chojni que vaguitticaon Jesús xaxaon cain na, co xajeho conohe ngain ansén cain na. Ni ná na ndačoha na ixin cosé na jeha para ixin jehe na, pero cain na ndačo na ixin cosé ná na cai cosé cainxin ni icha. ³³ Co nirepresentanté Jesús joinchehe na sigue ndache na icha chojni ixin Jesús xechon. Co Dios vaganjo ngain na anto tsje joachaxin are vanichja na, co vanchenchaon cain na. ³⁴ Co xonhi chojni que vaguitticaon Jesús vanchehe falta ná cosa ixin chojni que vechonda nonttehe o nchiandoha vanchecji na cosa que vechonda na co vaquiaho na tomi ³⁵ co vaganjo na tomi ngain nirepresentanté Jesús. Co jehe na vaconchjeya na tomi mé inchin vagondehe ni icha para choan cosa. ³⁶ Jañá joinchehe ná xí vinhi José co ndogelitoe xančhen vinhi Leví. Jehe joixin de ngain ná nontte ngosine ndachaon dinhi Chipre. Co nirepresentanté Jesús joincheguini na Bernabé. Nombre yá rročo tti nchegavanguehe ñao chojni. ³⁷ Xí mé joinchecji xa ná nonttehe xa co joiaho xa tomi co joanjo xa tomi ngain nirepresentanté Jesús para ixin jehe na sanjo na tomi mé ngain chojni noa que vaguitticaon Jesús.

5

Cosa jianha que joinchehe Ananías co Safira

¹ Pero vehe iná xí que vinhi Ananías, co Safira vinhi čihi xa. Xí mé co čihi xa joinchecji na ná nonttehe na cai. ² Pero xí mé vittoehe xa ná tanto de tomi co jeha ttoha tomi joicao xa ngain nirepresentanté Jesús, pero ndačo xa ixin joicao xa cainxin tomi ngain na. Co čihi xa venohe cainxin. ³ Cottimeja Pedro ndačo ngain xa:

—Ananías, ¿quedonda jaha coančhjanda Satanás para coetonha nganji jaha para joincheyehe Espíritu Santo, co vittoaha ttoha tomi que cjoen-gaxin na hna de ixin nontteha? ⁴ Nontte que jaha joinchecji nontteha. Co are ojoinchecji nontte mé, cainxin tomi tomia, para que jaha nchao sinchehe inchin jaha rinao conixin tomi mé. Nchao para jaha danjo cain tomi mé, ni danjo joho ttoha tomi. Pero jaha nchehe jianha ixin ndačo que ixin rridanjo cain tomi nontteha co ndoaha. Jaha chojni tti jaha rrittemehe tti ndoa, sino Dios tti jaha rinao tsemehe tti ndoa.

⁵ Are Ananías coinhi cain yá, jehe vetsinga co ndavenhe. Co cainxin chojni que conohe na yá anto x̄aon na. ⁶ Rato mé joí canxion xanxí. Co jehe xan mé coensiha xan cuerpoe Ananías co sajoicao xan para cjoavá xan.

⁷ Vatto inchin ní hora, cottimeja cjoí n̄híchihí Ananías cai. Co venoeha n̄ha ixin quehe conhe xixihí n̄ha. ⁸ Co Pedro joanchianguihi n̄ha co ndačo Pedro:

—Ndachjenji na, ¿ajoinchecjixin ra nontte inchin precio que jaha ra ndačo ra?

Co jehe n̄ha ndačo n̄ha:

—Ján, precio mé.

⁹ Cottimeja Pedro ndačo ngain n̄ha:

—¿Quedonda ndache chó ra para ttema ra tti ndoa ngain Espíritu Santo? Nttimé ndoja joí n̄joičjavá xixihí. Co jai tsjiho na jaha cai.

¹⁰ Co rato mé vetsinga n̄ha ngaca Pedro co ndavenhe n̄ha cai. Co are vinttequí xanxí que joicjavá xixihí n̄ha, vittja xan jehe n̄ha cai ondadiguenhe n̄ha. Cottimeja joantsje xan n̄ha co sajoicjavá xan n̄ha ngaca tti x̄avá xixihí n̄ha. ¹¹ Co cainxin chojni que vaguitticaon Jesús n̄tiha, conixin cain icha chojni que conohe cosa j̄ihí anto x̄aon na.

Tsje milagro co señal joinchehe nirepresentanté Jesucristo

¹² Co tiempo mé nirepresentanté Jesús vanchehe na anto tsje señal co milagro. Co cain chojni que vaguitticaon Jesús vaʒatte na ngain parté nihngo icha importante que dinhi Portal de Salomón. Co n̄tiha vechondaxin na servicioe na. ¹³ Co icha chojni anto vechonda respeto ngain chojni que vaguitticaon Jesús pero vaʒaon na vacji na servicioe na. ¹⁴ Pero masqui jamé, icha tsje chojni, xí co n̄hí vitticaon Jesús, tti chonda cain joachaxin. ¹⁵ Co hasta cainxin chojni que vechonda ninihi vagantsje na tti nihi ngandehe n̄tiha ngataha cania o ngataha saon. Ixin vajinao na que are vagatto Pedro masqui cara jehó saoen vagattotaon jehe ninihi mé para vanchexingamehe na. ¹⁶ Cai tsje chojni vaquixin de icha rajna que vinte chiaon Jerusalén co vaquiaho na tsje chojni nihi co tsje chojni que veninxin espíritu jianha. Co cainxin chojni mé vaxingamehe na.

Nittetonha ngain nihngo joiningaonhe na Pedro co Juan

¹⁷ Cottimeja xidána icha importante co cain xicompañeroe xa que dinhi xisaduceo anto vintteconchjoehe xa ngain nirepresentanté Jesús, ¹⁸ co tse xa chojni mé co coiaxinhí xa na ngaxinhí cárcel tti jí tsje chojni que joinchehe tsje cosa jianha. ¹⁹ Pero ná ángel de Dios conxiré puerté cárcel are t̄tie co joantsje cain nirepresentante mé co ndačo ngain na:

²⁰—Sattji ra ngain nihngo icha importante. Co n̄tiha ttequinhi ra cain chojni cainxin de ixin tti vida n̄roaxin que danjo Jesucristo.

²¹ Co cain chojní Jesús vitticaon tti ndačo ángel. Co are vingasán joxinhi na nihngo icha importante co coexinhi na joinchecoehne na chojni.

Co rato mé xidána icha importante co xicompañeroe xa coetonhe xa cain nivechonda joachaxin ngain juzgadoe na para xatte na. Cottimeja rroanha na xipolicía ngain cárcel para joiñacoa nirepresentanté Jesús. ²² Pero are xipolicía joiñi xa ngain cárcel, ivittjaha xa nirepresentanté Jesús. Co sacjan xa para joiquetonhe xa xidána. ²³ Co vinttendačo xa:

—Vittja na puerté cárcel jijé jian co cain xisoldado tatenda xa nttiha. Pero are conxirá na puerta, ixonhi chojni te ngaxinhi nttiha.

²⁴ Are xicapitén xisoldadoe nihngo icha importante co cain xidána que vaquetonha ngain icha xidána coinhi xa cain yá, anto joanchianguihi chó xa ixin quehe conhe, co quehe rročo cain jiji. ²⁵ Co rato mé joí ná xí co ndačo xa ngain na:

—Cain tti xí que jaha ra coiaxinhi ra, te xa ngain nihngo icha importante co tenchecoehne xa chojni.

²⁶ Cottimeja tti xicapitén xipolicía cjoí xa conixin canxion xipolicía para joiaho xa cain nirepresentanté Jesús. Pero xonhi joinchehe xa ngain chojni mé ixin xaoon xa que puede cain chojni que te nttiha ngain nirepresentanté Jesús rrocaxin na xa xo. ²⁷ Co are ojoiaho xa cain nirepresentanté Jesús ngain juzgado tti te xi icha, nttiha coengattjen xa cain na. Co xidána icha importante ndačo xa ngain na:

²⁸—Janha na coetonha ra ixin itsjagoeha ra chojni conixin nombré co joachaxín Jesús. ¿Co quehe joinchehe ra? Ngoixin ciudad de Jerusalén joexin joinchecoehne ra chojni tti jaha ra noha ra, co jaha ra nchecaxin ni ra ixin janha na gonhe na xí yá co rinao ra que chojni sitticaon na jamé.

²⁹ Cottimeja Pedro co cain icha nirepresentanté Jesús ndačo na:

—Janha na chonda que sitticanho na Dios saho que chojni. ³⁰ Tti Dios de nindogoelitoa na xančhjen joinchexechon Jesús, tti soixin ra coeriahnda ra nganito ná cruz co nagoenxon ra. ³¹ Co Dios joinchecajinhi para ngajni. Co nttiha Dios coín ngain lado jian co chjé joachaxin para que jehe ttonha cain chojni co para jehe danjo ngain na iná vida naroaxin. Co cai Dios chjé Jesús joachaxin para ttjenguijna chojni Israel tsentoxinhi vidé na co para ixin Jesús sinchetjañehe na cain cosa jianha que nchehe na. ³² Co cain yá janha na vicon na, co cai Espiritu Santo tjago ixin ndoa conhe. Co Dios rroanha Espiritu mé ngain cain chojni que ditticaon ngain jehe Dios.

³³ Co are coinhi na cain yá, coñao na co joinao na narrogoenxon na na. ³⁴ Pero ngagué cain chojni que vechonda joachaxin nttiha vehe ná xifariseo vinhi Gamaliel, co xí mé vanchecoehne xa icha chojni quehe vaquetonha ngain ley Israel. Co cain chojni vařaxaon na anto jian de ixin xí mé. Co vingattjen xa co coetonha xa vantsjeyexin na nchion rato cain chojni Jesús. ³⁵ Cottimeja ndačo xí mé ngain cain icha chojni nttiha:

—Cain jaha ra xo xí Israel ra, ttjiho ra cuidado tti sinchehe ra ngain xí tehe. ³⁶ řaxaon ra que ná tiempo vatto, joí ná xí vinhi Teudas, co ndačo xa ixin jehe xa anto importante xa. Co inchin nó ciento xí vaguitticaon co vacao jehe Teudas. Pero icha chojni vitticaonha co ndagoen Teudas, co cain chojni que vacao ndachjequé na, co ndajoexin cainxin. ³⁷ Co cai icha después, are cjoinhi ná censo para vinttetaxin cain chojni, are mé joí ná xí de nonttehe Galilea que vinhi Judas. Cai ndačo xa ixin jehe

xa anto importante xa, co tsje chojni vacao xa cai. Pero cai icha chojni vitticaonha co ndagoen xa, co cain chojni que vacao xa ndachjequé na cai. ³⁸ Mexinxin jaha ra icha jian tančhanda ra cain xí tehe co dixinteha ra ngain xa. Ixin si cain cosa yá jeha xa tenchehe xa, chonda que ndatsjexin toin, ³⁹ pero si Dios ndačo cain cosa yá, jaha ra čhoha rrondačo ra ixin ndatsjexin. Mexinxin tančhanda ra cain na para jaha ra tsetocoha ra Dios.

⁴⁰ Co cainxin na vitticaon na tti ndačo Gamaliel. Cottimeja vayé na cain nirepresentanté Jesús, vintja na na ixin nttá, cottimeja coetonhe na cain chojni mé ixin irronichjaha na conixin nombré co joachaxín Jesús. Cottimeja coančhanda na na sacjoi na. ⁴¹ Co are cain chojni Jesús sacjoixin de ngain cain chojni ngain juzgado, anto ché na ixin Dios coančhanda na para vetan na tangui de ixin nombré Jesús. ⁴² Co vaguinttoeha na de vacjagoe na chojni, ixin cainxin nchanho vanichja na de ixin Jesús ngain nihngo icha importante co ngain nchiandoha tsje chojni cai.

6

Are coinchiehe na yáto xí para cjoenguijna nirepresentanté Jesús

¹ Co tiempo mé, anto cotsje chojni que vaguitticaon Jesús. Pero chojni que vaguitticaon Jesús que vanichja griego nchion coñao na ngain chojni que vaguitticaon Jesús que vanichja hebreo. Ixin nimé ni vinttendačo na ixin cain nčhiganha que vanichja griego que vintte ngain na vacaha nča jian vane nča are vaconchjea na cada nchanho tti vane cain chojni que vaguitticaon ngain Jesús. ² Cottimeja tti tteýo nirepresentanté Jesús joatse cainxin chojni co ndačo ngain na:

—Nchaoha jí si janha na tsinttoa na de rronichja na joajné Dios ngain icha chojni jeha por ixin rrochjaha na tti sine na. ³ Mexinxin icha jian ttinchiehe ra yáto xí de ngacjan jaha ra, pero xí que ditticaon jian ngain Jesucristo, co chonda joachaxin de Espíritu Santo, co chonxin quehe rinao Dios. Co tti yáto xí mé ndache ra xa para sinchehe xa xa jhi. ⁴ Co janha na rrocjan na sinttacoanxian na Dios, co sinttacoán na icha chojni joajné Dios.

⁵ Co cainxin na vitticaon na tti ndačo nirepresentanté Jesús, co coinchiehe na yáto xí. Saho coinchiehe na Esteban, tti anto vaguitticaon Jesús co tti chonda tsje joachaxin de Espíritu Santo. Co xí icha vinhi xa Felipe, Prócoro, Nicanor, Timón, Parmenas, co yatoxin xí vinhi Nicolás. Co jehe xa joixin xa de ciudad dinhi Antioquía, co icha saho xí mé coexinhi xa vaguitticaon xa religioen chojni judío. ⁶ Cottimeja joiaho na tti yáto xí mé para ngain nirepresentanté Jesús. Co jehe na joinchecoanxinhi na Dios co coín rá na ngataha já tti yáto xí mé para ná señal que cain xí mé coexinhi xa joinchehe xa xa para ixin Dios.

⁷ Co ttinga icha tsje chojni coinhi joajné Dios ngain Jerusalén. Co icha cotsje chojni que vitticaon Jesús, hasta tsje xidána de ngain religioen chojni judío cai vitticaon xa ngain Jesucristo.

Are coiaxinhi na Esteban

⁸ Esteban vachonda anto tsje joachaxin de Espíritu Santo co Dios anto vanchenchaon jehe Esteban. Co jehe Esteban vanchehe tsje milagro co señal ngattoxon con chojni. ⁹ Cottimeja joí canxion chojni de ná nihngo Israel que vinhi los Esclavos Libertados. Co cai icanxin chojni joixin de

ngain ná rajna dinhi Cirene, co de ciudad de Alejandría. Co jói icha chojni cai que joixin na ná nación que dinhi Cilicia co icha chojni que joixin na nonttehe Asia. Cainxin chojni mé coexinhi na joinchediscutí na ngain Esteban. ¹⁰ Pero coixinha na ngain ixin Espíritu Santo anto cjoenguijna Esteban co cjoagoe jehe queñen nichja ngain chojni mé. ¹¹ Mexinxin chojni mé cjoenguehe na hna icanxin chojni para ndačho ixin jehe na coinhi na nichja Esteban jianha de ixin Moisés co de ixin Dios. ¹² Co jañá joinchehe na para joincheguitticaon na cain chojni, co cain nivechonda joachaxin ngain nihngo Israel, co cain ximaestroe ley Israel. Cottimeja cain na cofiaoe na Esteban co tse na co joicao na ngain juzgadoe nihngo Israel. ¹³ Co cai cjoé na icanxin chojni que ndačho ixin Esteban nichja jianha, masqui ndoaha tti ndačho na. Co chojni mé ndačho:

—Jan, ndoa, xí yá anto nichja xa jianha de ixin nihngo icha importante co de ixin ley Israel. ¹⁴ Coian na ndačho xa ixin Jesús que joixin Nazaret sinchexante nihngo icha importante jihi co tsentoxinhi cain cosa que coetoo na Moisés sonttoho na.

¹⁵ Cottimeja cain chojni nttiha tsjehe na Esteban. Co vicon na ixin jidaquín ngá con Esteban inchin ngá con ná ángel.

7

Tti ndačho Esteban

¹ Cottimeja xidána icha importante joanchianguihi xa Esteban co ndačho xa:

—¿Andoa cain tti ndačho chojni jihi?

² Co Esteban ndačho:

—Soixin ra, ttinna ni ra tti rrondačhjan. Dios de ján na anto jian co řago ngain ndogoelitoa na Abraham are vehe ndo ngain nonttehe Mesopotamia antes que jehe ndo sacjoi ndo Harán. ³ Co Dios ndačho ngain ndo: “Ttintohe nontteha co cain ni řa ichó, co sattji ngain nontte que janha tsjagoha.” ⁴ Cottimeja ndogoelitoa na Abraham vačhjexin ndo de ngain nonttehe Caldea co sacjoi ndo ngain nonttehe Harán. Co vehe ndo nttiha Harán. Cottimeja ndavenhe ndodé ndogoelitoa na Abraham, co Dios rroanha ndogoelitoa na Abraham ngain nontte jihi, tti ján na te na jai. ⁵ Pero Dios řa joanjoha ni rioho nontte nttihi ngain ndogoelitoa na Abraham. Pero Dios ndačho ixin sanjo nontte mé ngain xenhe ndogoelitoa na Abraham masqui řa vechondaha ndo chjan tiempo mé. ⁶ Co masqui jamé, pero Dios ndačho ngain ndogoelitoa na Abraham ixin xanntí ndo řančhjen sintte xan ojé nontte que jeha nonttehe xan co ngain nontte mé tsochji xan ngain řa co icha chojni sinchehe feo ngain xan para nó ciento nano. ⁷ Pero cai Dios ndačho ngain ndogoelitoa na Abraham: “Janha rrochjaha castigo tti chojni que sinchehe feo ngain xannttia. Cottimeja jehe xan satsjixin xan de nttiha para sinchesayana xan ngain lugar jihi.” ⁸ Co are Dios joinchexian trato mé ngain ndogoelitoa na Abraham, Dios coetonhe ndo para chjá na ndo ná řohe que dinhi circuncisión. Mé rročho ixin cain chojni que chonda řohe mé, chonda parte ngain trato mé. Mexinxin are concjiji xenhe Abraham, xanIsaac, co vatto jni nchanho de concjiji xan, Abraham chjé xan řohe mé. Co řajeho jamé joinchehe Isaac después ngain Jacob, xenhe jehe Isaac. Co řajeho jamé joinchehe Jacob después ngain cain tti tteyó xenhe, tti xancjoi ndogoelitoe tti tteyó grupoe chojni Israel.

9'Co cain xenhe Jacob mé, tti cjoí ndogoelitoa na xançhjen, conchjoehe na ngain José tti xanchó na icha nchín. Co jehe na joinchecji na xan ngain chojni que sacjoi ngain nonttehe Egipto. Pero Dios cjoenguijna José, ¹⁰ co masqui tsje cosa tangui conhe José nntiha Egipto, después Dios coançhjandaha José ngain cain cosa mé. Co Dios çhjé jehe jian joarrixaon, co cjoenguijna José para que Faraón joinao jehe José. Faraón tti rey ngain Egipto co jehe rey mé çhjé José anto tsje joachaxin para vehe gobernador de Egipto co vaquetonha ngain nchiandoha rey mé.

¹¹ 'Cottimeja vehe jintta ngain nonttehe Egipto co ngain nonttehe Canaán. Mexinxin anto tangui vehe para cain chojni ngoixin nontte mé. Co cain nindogoelitoa na xançhjen ivaguittjaha na tti vane na. ¹² Pero are Jacob conohe ixin vehe trigo ngain Egipto, rroanha nntiha canxion xenhe, tti xancjoi ndogoelitoa na xançhjen. Co mé tti saho nntiha que cjoí xan nntiha. ¹³ Co hasta tti yoxin nntiha que joiquehna xan trigo nntiha Egipto, José ndaço ngain xanchó ixin quensen jehe. Co are mé tti rey ngain Egipto conohe cai quensen nichó José. ¹⁴ Cottimeja José ndaço para joí ndodé José, ndoJacob, conixin cainxin nichó. Co cain jehe na vittja setenta y cinco chojni. ¹⁵ Jañá conhe para Jacob sacjoi Egipto, co nntiha vehe hasta ndavenhe, co cai nntiha venxin cain ndogoelitoa na xançhjen. ¹⁶ Co después xenhe sajoicao xan nntalroe na ngain nonttehe Siquem para xavá nnta ngain cueva tti coenanxin Abraham conixin tomi ngain xenhe Hamor nntiha Siquem.

¹⁷ 'Co are ochiaon joí tti tiempo para tsonhe tti ndaço Dios ngain Abraham, cainxin chojni Israel anto cotsje na ngain Egipto. ¹⁸ Cottimeja iná rey coexinhi coetonhe na nntiha. Rey mé vechonxinha José. ¹⁹ Co rey mé joincheyehe nindogoelitoa na xançhjen co anto feo joinchehe ngain na. Co jehe rey mé coetonhe nindogoelitoa na xançhjen que tsinttohe na xenhe na que nandá vagoan para ndasenhe xan. ²⁰ Co ngain tiempo mé concjihi Moisés. Dios anto joincheçoxinhi çhjan mé. Co nindoha Moisés joincheganguixin na ngain nchiandoha na, ní conittjao. ²¹ Cottimeja chonda que cointtohe na para ndarroguenhe. Co nchanho mé ná nçhichjehe rey vittja Moisés co sajoicao nçha para nchiandoha nçha co joinchegangui nçha Moisés inchin ná xenhe nçha. ²² Mexinxin Moisés coangui cain tti venohe chojni Egipto co jehe anto vechonxin para vanichja co cain tti vanchehe jehe, vanchehe jian.

²³ 'Are jehe ovechonda cuarenta nano, jehe xaxaon joitsjehe cain nirajné, tti chojni Israel. ²⁴ Co nntiha vicon Moisés ná chojni Egipto jittjáya ngain ná chojni Israel. Co Moisés para cjoenguijna chojni Israel que jidicaon, Moisés nagoenxon chojni Egipto que jittjáya. ²⁵ Jañá joinchehe Moisés ixin xaxaon que cain chojni Israel xajeho nirajné jehe. Co xaxaon ixin jehe na venohe na que Dios rroanha Moisés para santsjexin na de nntiha. Pero jehe na venoeha na mé. ²⁶ Co nchanho yoxin, Moisés vetan yó chojni Israel que tetteto co jehe joinao ixin irroquetoha na. Mexinxin ndaço ngain na: "Jaha ra de xajeho rajna ra, ¿quedonda tedonhe chó ra jaho ra?" ²⁷ Cottimeja tti jidoen xicompañeroe conxinca Moisés co ndaço ngain: "¿Quensen coín jaha de juez co xinajni para tsetonha nganji na? ²⁸ ¿Arinao nasoenxon na janha cai inchin nagoenxon ná chojni Egipto jna?" ²⁹ Co are coinhi Moisés yá, sacoingaxin de nntiha co sacjoi ngain nonttehe Madián. Masqui jehe vechon nntiha, pero nntiha jeha nonttehe. Co nntiha vechonda yó xenhe xanxí.

³⁰ Vatto cuarenta nano. Cottimeja ngain rotté ná jna dinhi Sinaí, viconxin Moisés ná ángel de Dios ngacjan ná xohi. Co xohi mé jiche ngagaha ná canchaha. ³¹ Moisés medio xaon ixin tti jehe vicon, co are conchienne ngain canchaha para vicon icha jian, coinhi ndačo Dios janhi: ³² “Janha tti Dios de nindogoelitoa xančhjen, janha tti Dios de Abraham, de Isaac, co de Jacob.” Cottimeja Moisés coexinhi xanga de joaxaon, co ni čhoha tsjehe icha ixin anto xaon. ³³ Co Dios ndačo ngain: “Dantsjenga cattea de rottea ixin tti lugar que rrittingachje yá ná lugar santo. ³⁴ Janha vicon que anto tettín chojnina ngain Egipto, janha coian que tedetan na tangui, co janha xincanji na para itsoenha na jańá. Tsjexin, janha rrorroanha jaha ngain Egipto.”

³⁵ Mexinxin masqui jehe na cjoanoa na Moisés co ndačo na ngain: “¿Quensen coín jaha para ixin tsetonha co sarihi juez?”, pero Dios rroanha Moisés mé inchin ná tti ttetonha co para coančhandaha na conhe na icha feo nttiha. Co rroanha tti ángel que Moisés viconxin ngacjan xoi canchaha para ndache jehe cain yá. ³⁶ Co Moisés tti joantsjexin nindogoelitoa na xančhjen de ngain Egipto, jehe tti joinchehe tsje milagro co tsje seńal. Jehe joinchehe cosa mé ngain nonttehe Egipto co ngain ndachaon que dinhi Mar Rojo co ngagaha jna tti vacji na ngoixin cuarenta nano. ³⁷ Co Moisés mé tti ndačo ngain cain chojni Israel: “Dios rrorroanha ra ná chojni que sačhjexin de nganji ra que rronichja tti jehe Dios tsjagoe, inchin rroanha na janha. Nchehe ra caso ngain.” ³⁸ Co Moisés mé tti vehe ngagué cain chojni are ngagaha jna. Co cai jehe vehe conixin tti ángel que nichjixin ngataha jna Sinaí. Co cai Moisés nichjixin ngain cain nindogoelitoa na xančhjen. Co jehe mé tti vayé palabré Dios que danjo vida, co jehe dicjin palabra mé para que ján na jai chonda na palabra cai.

³⁹ Pero nindogoelitoa na xančhjen čhoha na vitticaon na, co cońaohé na co joinao na sarrocjan na para Egipto. ⁴⁰ Co are Moisés xa vehe ngataha jna Sinaí cain na nichja na ngain Aarón, tti dána icha importante, co ndache na Aarón: “Rinaho na que sinchechjianna ni ra canxion dio que sitaonna na nttiha. Ixin nonaha na quehe conhe Moisés tti joantsjexin na de ngain nonttehe Egipto.” ⁴¹ Cottimeja joinchechjian na ná coxinttachjan co goen na tsje coxigo para coín na ngain dio mé. Co anto ché na ngain tti jehe na joinchechjianxin na rá na. ⁴² Cottimeja Dios sacjoixin de ngain na. Co coančhanda na para jehe na joinchesayehe na cosa que dicon ni ngajni. Co janhi jitaxin ngain libro que dicjin profeté Dios:

Jaha ra chojni Israel, ¿agonhe ra coxigo para vachjana ra va janha ngoixin cuarenta nano ngagaha jna?

⁴³ Nahi, vachjanaha ra va tiempo mé. Sino que jaha ra vacjiho ra tti dio dinhi Moloc,
co tti cosa inchin ná conotse que jaha ra ndačo ra ixin dio co ncheguinho ra Renfán.

Cain retrato yá jaho ra joinchechjian ra para joinchesayehe ra. Mexinxin janha santsjexin ra de ngain nacioan ra co rrorroanha ra icha ndaha de Babilonia.

⁴⁴ Ndačo Esteban cai:

—Ngagaha jna nindogoelitoa na xančhjen joinchechjian ná nchia de joxon manta para ixin Dios, co nttiha vaquenchjinha na tabla que jitaxin ley de Dios. Co jehe na joinchechjian na nchia mé inchin coetonha Dios

ngain Moisés, ixin Dios cjoagoe Moisés co ndačo: “Nchechjian nchia inchin nchia jaha vicon.” ⁴⁵ Co are Moisés ndavenhe, Dios coinchiehe Josué para coetonhe chojni Israel, co jehe sajoicao nchia mé are vantsje nindogoelitoa na xančhen de ngagaha jna co are savacao na ngain nontte que Dios vanjo ngain na. Pero tiempo mé icha chojni vintte nntiha. Pero Dios cjoenguijna nindogoelitoa na xančhen para vantsjexin na chojni mé de nonttehe. Co jańá cjoi hasta que David joiguehe rey. ⁴⁶ Dios anto joinao rey David. Co David joinao rrojinchechjian ná nchia para ixin Dios de ndogoelitoa na Jacob. ⁴⁷ Pero Salomón tti joinchechjian nchia mé para ixin Dios. ⁴⁸ Jańá joinchehe Salomón masqui Dios que jí noi seha ngaxinhi nchia que nchechjian chojni. Ixin profeté Dios ndačo janhi:

⁴⁹ Janha Dios na co ngajni inchin nntaxintaonna co ngataha nontte inchin tti ttingachje rottena. Mexinxin, ¿quehe nchia sinchechjian ra para ixin janha? ¿O ngain quexehe nchia nchao sinttajogaha?

⁵⁰ ¿Ajeha janha conixin rana tti jointtachjianxin cain cosa yá? čho Dios.

⁵¹ Pero Esteban joinchehe sigue ndačo:

—Pero soixin ra cainxin tiempo atto cha ansean ra co vittoaxinha ra vitticaon ra. Co soixin ra inchin cain tti chonxinha Dios ixin rinaoha ra sitticaon ra Dios co ttinxinha ra Palabré Dios. Cainxin tiempo ningaconhe ra Espíritu Santo inchin vanchehe cain ndogoelitoa ra xančhen. ⁵² Nindogoelitoa ra xančhen joinchehe na feo ngain cainxin niprofeté Dios. Co jehe na goen na cainxin chojni mé que ondačo are icha saho de ixin quexén tsí Cristo tti anto jian. Co are ojoí Cristo, soixin ra joinchechienhe ra ngain chojni romano co nagoenxon ra. ⁵³ Co masqui ángel ndache nindogoelitoa ra xančhen ley de Dios, pero soixin ra ditticaonha ra.

Are Esteban ndavenhe

⁵⁴ Co are cain na coinhi na cain cosa yá, icha co icha cońao na ngain Esteban co hasta joinetaon neno na ixin anto cońao na ngain. ⁵⁵ Pero Esteban anto vechonda joachaxin de Espíritu Santo hasta jehe nchao tsjehe ngajni co vicon chíxo tti jí Dios co cai vicon Jesús tajingattjen ngain Dios lado jian. ⁵⁶ Cottimeja ndačo:

—¡Tsjexin ra, janha dicon ngajni jixangué co tti Xí que joixin de ngajni tajingattjen Xa ngain Dios lado jian!

⁵⁷ Pero jehe na coejé na ndatsjoen na conixin rá na co coyao na soji. Co cainxin na tse na Esteban. ⁵⁸ Joantsjexin na de ciudad mé co coaxin na Esteban xo. Co chojni que coaxin xo joantsje na lonttoe na que tetsá na co cointtohe na lontto nntiha ngain ná xanxí que vinhi Saulo. ⁵⁹ Co are tetaxin na Esteban xo, jehe joinchecoanxinhi Dios co ndačo:

—Jesús, soixin tti chonda cain joachaxin, dayehe espirituna.

⁶⁰ Cottimeja vettoxin co ndačo sén:

—Soixin tti chonda cain joachaxin, nchetjańehe na tti jianha que jehe na tenchehe na jaxon.

Co are joexin ndačo yá, jehe ndavenhe.

8

Saulo vaningaonhe chojni que vaguitticaon Jesús

¹ Co Saulo cai anto ché ixin Esteban ndavenhe.

Co xajeho nchanho que Esteban ndavenhe anto tsje chojni coexinhi joinchehe feo ngain chojni que vaguitticaon Jesús ngain Jerusalén. Co cainxin na chjequé na sacjoi na ngain ngoixin nonttehe Judea co nonttehe Samaria. Joho nirepresentanté Jesús sacjoixinha na de Jerusalén. ² Co canxion xí que anto jian vaguitticaon xa ngain Jesús cjoavá xa cuerpoe Esteban co anto tsjangaxin xa Esteban. ³ Co tiempo mé Saulo anto feo vanchehe ngain chojni que vaguitticaon ngain Jesús, hasta vaguixinhi nchiandoha na para vagantsje xí co nchí co vaquianganji na co vaquiaxinhi na ngain cárcel.

Are chojni Jesús nichja tti jian joajna ngain nonttehe Samaria

⁴ Pero chojni que vachjexin de Jerusalén, ngoixin tti vacji na, vandache na icha chojni tti joajna que danjo iná vida naroa. ⁵ Ná de jehe na que vachjexin de Jerusalén vinhi Felipe, co jehe cjoí ngain ná rajna nonttehe Samaria co coexinhi ndache chojni nttiha de ixin Cristo. ⁶ Co chojni nttiha vaquinhi na jian tti vandaço Felipe. Co jehe na vaguicon na cain milagro que jehe vanchehe conixin joachaxín Dios, ⁷ ixin tsje chojni que vechonda espíritu jianha vagaçhjehe na cain tti jianha mé, co espíritu jianha mé vacoyao are vagaçhjehe de ngain na. Co tsje chojni que çhoha vaquingui co chojni que çhoha vacji cai vacoçoenhe na. ⁸ Mexinxin ngain rajna mé chojni anto vaché na.

⁹ Pero nttiha cai vehe ná xí que vinhi Simón. Icha saho jehe xa vehe xa ná ttoso ngain rajna mé, co jehe xa vancheyehe xa co vanchexaon xa chojni nttiha ngain nonttehe Samaria. Co vandaço xa ixin jehe xa ná chojni anto importante. ¹⁰ Niyeye co ninchinnchin, cainxin na anto jian vaquinhi na tti vandaço xí mé co vandaço na:

—Xí yá tti chonda jie joachaxín Dios.

¹¹ Co cain na anto vaquinhi na tti vandaço xí mé ixin jehe xa vancheyehe xa na conixin joattosohe xa anto sé tiempo. ¹² Pero are Felipe ndache na tti jian joajna de ixin queçén Dios ttetonha co de ixin nombré Jesucristo, are jehe nichja jañá, anto tsje chojni, xí co nchí vitticaon na co joiguite na. ¹³ Co cai Simón vitticaon co joiguite. Cottimeja jehe vacao Felipe. Co anto vagoan admirado are vicon tsje milagro co señal que vanchehe chojni Jesucristo.

¹⁴ Are mé cain nirepresentanté Jesús xa vintte na Jerusalén. Co are jehe na conohe na ixin chojni Samaria vitticaon na joajné Dios, roanha na Pedro co Juan nttiha. ¹⁵ Co are cayoi nimé joiiji na nttiha, joinchetsenhe na ñao Dios que jehe rrorroanha Espíritu Santo ngain chojni que vitticaon Jesús nttiha Samaria ¹⁶ ixin xa joiha Espíritu Santo conixin joachaxin ngain ni ná na, ixin jeha joiguite na de ngain nombré Jesús. ¹⁷ Cottimeja Pedro co Juan coín rá ngataha já na co jañá joí Espíritu Santo ngain na conixin joachaxin.

¹⁸ Co are Simón vicon ixin Espíritu Santo ttí ngain chojni are nirepresentanté Jesús vaquín rá na ngataha já na, jehe joinchentoxinhi na tomi ¹⁹ co ndaço:

—Chjana ra janha joachaxin yá cai, para que are janha cai tsín rana ngataha já quexeho chojni, Espíritu Santo tsí ngain jehe na conixin joachaxin.

²⁰ Cottimeja Pedro ndaço ngain:

—Dios sinttatján jaha conixin tomia cai ixin jaha xaxaon que tti danjo Dios nchao sina conixin tomi. ²¹ Jaha jiquininxinha sinchehe xa jihi

ixin ansean jeha jian ngain Dios. ²² Ttendoenhe ñao cosa jianha jihi, co nchetsenhe ñao Dios para ver si jañá sinttatjañaha tti jaha xaxaon ngain ansean. ²³ Janha chonxin ixin jaha anto tonchjoaha co ansean jianha, co cain cosa jianha yá tti tančhjandaha jaha para ttinxin tti jian.

²⁴ Cottimeja Simón ndačo:

—Nchetsenhe ra ñao Dios para ixin janha para xonhi tsonna de ixin tti jaha ra ndachjenji ni ra.

²⁵ Cottimeja Pedro co Juan ndache chojni nttiha quehe joinchehe Jesús are vacao na. Co cai jehe na nichja na palabré Dios. Cottimeja sacjan na para Jerusalén, co are ngatja nttiha, nichja na tti jian joajné Jesucristo ngain tsje rajna ngain nonttehe Samaria.

Felipe co ná xí de Etiopía

²⁶ Are joexin cain yá, ná ángél Dios, tti chonda cain joachaxin, ndačo ngain Felipe:

—Dingattjen co sadingajin ngain nttiha que xincajinxin de Jerusalén para Gaza.

Nttiha mé datto nttia lugar tti xonhi chojni te. ²⁷ Felipe vingattjen co sacjoi. Co ngatja nttiha mé vetanxin ná xí de nación que dinhi Etiopía. Xí mé vechonda xa tsje joachaxin ngain nchí que vaquetonhe nación mé. Co nchí mé vinhi ncha Candace. Xí mé tti venda cain tomí co cosé nchí mé. Co jehe xa cjoí ná xí eunuco ixin xonhi chjan vechonda ni xonhi nchí vcaoa xa. Dicji xa ngain Jerusalén para joinchesayehe xa Dios. ²⁸ Co nchanho mé sajicjan xa para ngain nonttehe xa jingá xa carro que ttinganji conxin co jitjao xa xón que dicjin profeta Isaías. ²⁹ Cottimeja Espiritu Santo ndačo ngain Felipe:

—Tonchienhe tti jí carro jiha co tato tti jidicao carro.

³⁰ Co are Felipe conchienhe nttiha, coinhi ixin xí mé jitjao xa xón que dicjin Isaías. Felipe joanchiangui ngain xa co ndačo:

—¿Attinxin quehe rročo xón que rritjao?

³¹ Co xí mé ndačo xa:

—¿Quexén janha tsianxin, si xonhi quensen ndachjenji na quehe rročo?

Cottimeja joinchetsenhe xa ñao Felipe ixin tsani carro mé co sehe ngaca xa.

³² Co tti parte de tti jitaxin Palabré Dios que jitjao xa, mé ndačo: Joicao na joigoen na inchin are doen na ná coleco, jamé savicao na jehe. Co jamé inchin corregochjan tencoa va are cjinhi na va, jamé jehe cai conxireha rroha.

³³ Icha chojni cjoanoa na jehe co anto feo joinchehe na ngain masqui xonhi tiempo jehe joinchehe cosa jianha.

Co de chojni jehe, ¿quensen nchao rronichja?

Ixin jehe na nagoenxon na are jehe vehe ngataha nontte jihi.

³⁴ Co xí mé joanchianguihi xa Felipe co ndačo xa:

—Ndachjenji na nttatsanha ñao, ¿de ixin quensen ndačo Isaías? ¿Ade ixin jehe o de ixin iná chojni?

³⁵ Cottimeja Felipe coexinxin nichja de ixin lugar de Palabré Dios tti jitjao xí mé. Cottimeja jehe ndačo ngain xa tti jian joajné Jesús. ³⁶ Co are jidattocaho xa ngain ná lugar tti jí jinda, ndačo xa ngain Felipe:

—Nttihi jí jinda. ¿Achoha siguittexin na nttihi?

³⁷ Felipe ndačo ngain xa:

—Si ndoa ditticaon jaha, nchao.

Co jehe xa ndačo xa:

—Ditticanho que Jesucristo ján Xenhe Dios.

³⁸ Cottimeja xí mé coetonha xa ixin coengattjen na carro mé, co cay-
oixin na vania na co sacjoi na para ngain jinda; co Felipe joincheguite xí
mé. ³⁹ Co are vačjenguixin na de jinda, Espíritu Santo que Jesús rroanha
sajoicao Felipe. Co xí mé icjanha xa vicon xa Felipe, pero sacjoi xa noxon
nttiha jiyá xa co anto ché xa. ⁴⁰ Co rato mé Felipe xago ngain rajna que
dinhi Azoto, co sacjoi de rajna co rajna para ndache chojni tti jian joajna
hasta joiji ngain ciudad de Cesarea.

9

*Quexén Saulo coexinhi vitticaon ngain Jesús
(Hechos 22.6-16; 26.12-18)*

¹ Co tiempo mé Saulo xa anto feo vanchehe ngain chojni que va-
guitticaon Jesús, tti chonda cain joachaxin. Co jehe vanchexaon de
narrogoenxon cain na. Mexinxin joitsjehe xidána icha importante ² para
joanchiehe xa carta que chjé jehe joachaxin para rrocjixin ngain ningoe
ciudad de Damasco para rrocjé cainxin chojni que vaguitticaon tti jian
joajné Jesús co para rrotse na co sarrojicao na cain na, xí co nchí para
ngain Jerusalén. ³ Pero are ngatja nttiha, ochiaon ngain ciudad de
Damasco, vingasantte ná xohi que joixin de ngajni ngá nttiha tti jittji.

⁴ Cottimeja Saulo vetsinga ngataha nontte co coinhi tté Jesús que ndačo:

—Saulo, Saulo, ¿quedonda ningaconna co feo nchena?

⁵ Cottimeja Saulo joanchiangui co ndačo:

—¿Quensen soixin?

Co tté mé ndačo:

—Janha Jesús tti jaha ningaconhe co feo nchehe ngain. Pero jaho
rritoniha ixin jaha inchin coxinttá are xantoe va con garrocha.

⁶ Cottimeja Saulo jixanga de joaxaon co ndačo:

—¿Quehe rinao soixin que janha sinttaha?

Co Jesús ndačo:

—Dingattjen co ttji ciudad de Damasco, co nttiha jí chojni que rrrondat-
tjo quehe chonda que sinchehe jaha.

⁷ Co cain xí que joicao Saulo tavinttetsjecoa xa ixin coinhi xa tti jinichja
pero xonhi quensen vintteguicon xa. ⁸ Cottimeja vingattjen Saulo de
ngataha nontte, pero are conxiré jmacon ichoha vicon ixin ndacochejo.
Mexinxin tsehe na rá co sajoicao na ngain ciudad de Damasco. ⁹ Are joiji
na Damasco, Saulo viconha ngoixin ní nchanho, co ngoixin nchanho mé
xonhi joine ni xonhi vihi.

¹⁰ Co ngain Damasco vehe ná xí vinhi Ananías co xí mé vaguitticaon xa
Jesús. Co jehe xí mé cononxinhi xa Jesús, co Jesús ndačo:

—¡Ananías!

Co jehe ndačo:

—Nttihi rrihi. ¿Quehe rinao, soixin?

¹¹ Cottimeja Jesús ndačo:

—Dingattjen co sattji ngain tti nttiha dinhi Nao. Co are saso ngain nchi-
andoha Judas, danchiangui de ixin ná xí que joixin Tarso, dinhi Saulo.
Co xí mé jinchecoanxinna xa janha jaxon. ¹² Co jehe xa cononxinhi xa co

vicon xa ná xí dinhi Ananías jitonchienne ngain xa co ttín rá ngataha já xa para nchao rrocjan xa sicon xa.

¹³ Are Ananías coinhi cain yá, ndačo:

—Soixin, tsje chojni ndachjenji na de ixin xí yá co de ixin cainxin cosa jianha que joinchehe xa ngain chojni que ditticaon soixin ngain ciudad de Jerusalén. ¹⁴ Co jai jói xa nntihi conixin joachaxín xidána que ttetonha ngain icha xidána para rrotse xa cain chojni nntihi que nichja jian de ixin soixin.

¹⁵ Pero Jesús ndačo ngain:

—Sattji ixin janha coinchiá xí mé para rronichja xa de ixin janha ngain chojni de icha nación co ngain cain rey de cain nación co ngain chojni Israel cai. ¹⁶ Janha tsjagoa xa cain cosa tangui que chonda que tsonhe xa ixin jehe xa sitticaon na xa janha.

¹⁷ Cottimeja Ananías sacjoi para ngain nchia tti vehe Saulo. Co are jehe joixinhi nchia mé, jehe coín rá ngataha já Saulo, co ndačo ngain:

—Hermano Saulo, Jesús, tti chonda cain joachaxin, tti nichjaha jaha ngatja nntiha, mé tti coetonna para joihi nntihi para que jaha nchao sicon iná co para que Espíritu Santo tsí nganji jaha conixin tsje joachaxin.

¹⁸ Co rato mé vinttjixin de ngain jmacon Saulo nchin cosa inchin jochochjenhe copescado, co Saulo onchao vicon iná. Cottimeja Saulo vingattjen co joiguite. ¹⁹ Cottimeja joine co cjan vechonda fuerza iná. Co nntiha vehe ngain ciudad de Damasco canxion nchanho ngain chojni que vaguitticaon Jesús nntiha.

Are Saulo nichjé chojni ngain ciudad de Damasco de ixin Cristo

²⁰ Saulo toin coexinhi nichja ngain cain ningoe chojni judío co ndačo ixin Jesús ján tti Xenhe Dios. ²¹ Cain chojni que vaquinhi tti vandačo Saulo vagoan na admirado, co vandačo na:

—¿Ajeha xí jihi tti vanchehe feo ngain chojni ngain ciudad de Jerusalén que vaguitticaon Jesús? Co ¿ajeha xí jihi tti jói nntihi cai para ixin rrotse xa cain chojni que ditticaon Jesús co para ixin sasicao xa na para sinchechienne xa na ngain xidána que ttetonha ngain icha xidána?

²² Pero Saulo icha vañaonha para vanichja, co cjoagoe na conixin tti xón que jitaxin Palabré Dios que ixin Jesús jehe tti Cristo, hasta chojni judío que vintte ciudad de Damasco vinttegoan na admirado ixin Saulo oditticaon ngain Cristo.

Are Saulo saccoinguehe chojni judío

²³ Cottimeja vatto tsje nchanho, co chojni judío vinttendache chó na para rrogoen na Saulo. ²⁴ Pero Saulo conohe que cjoao chó na ixin rrogoen na co ixin nchanho co ttie vachonhe na Saulo ngain cain lugar tti dačhjexin chojni de ngain ciudad ixin rrogoen na. ²⁵ Pero chojni que vaguitticaon Jesús, chojni mé ngá ná nntača jie coengaha na Saulo co ná ttie vantsje na ngadoxin ná ventané ttjariho co joinchegania na Saulo para nontte. Ttjariho mé vehe ttjario ngoixin ngandehe ciudad mé, co jamé jehe nchao saccoinga.

Are Saulo vehe ngain Jerusalén

²⁶ Are Saulo joihi Jerusalén, jinao coato chojni que vaguitticaon Jesús, pero cainxin na vařagoen na ixin jehe na vitticaonha na ixin Saulo ovitticaon Jesús. ²⁷ Masqui jamé, Bernabé joicao jehe ngain nirepresentanté Jesús. Co Bernabé ndache na ixin ngatja nntiha Saulo vicon Jesús, tti

chonda cain joachaxin, co ixin Jesús nichja ngain, co ixin después de mé Saulo nichja sin joaxaon ngain ciudad de Damasco conixin nombré co joachaxín Jesús. ²⁸ Co Saulo vittohe canxion nchanho ngain Jerusalén co vacao nirepresentanté Jesús. ²⁹ Jehé vaxaonha para vanichja conixin nombré co joachaxín Jesús, tti chonda cain joachaxin, co cjoao chojni judío que vanichja na nguigoa griego. Pero chojni mé joinao na rrogoen na Saulo. ³⁰ Co are chojni que vaguitticaon Jesús coinhi na cainxin mé, savicao na Saulo ngain ciudad de Cesarea. Co de nttiha rroanha na ngain ciudad de Tarso.

³¹ Cottimeja cain chojni Jesús vajinao chó na, co vaquetocaoha chó na ngain ngoixin nonttehe Judea, nonttehe Galilea, co ngoi nonttehe Samaria. Co coangui na icha co icha de ixin Dios. Cainxin na vanchehe na cainxin cosa inchin joinao Jesús, tti chonda cain joachaxin. Co Espiritu Santo cjoenguijna na para que xatte icha tsje chojni.

Are Eneas coxoenhe

³² Pedro ngaria rajna co rajna para vaguitsjehe chojni que vaguitticaon Jesús. Co ná de nchanho mé sajoitsjehe nivintte rajna Lida. ³³ Nttiha vetan ná xí vinhi Eneas que venihi co vetsinga jni nano vaquinguiha. ³⁴ Co Pedro ndache:

—Eneas, Jesucristo sinttaxoanha. Dingattjen co datsín caniaha.

Co rato mé vingattjen Eneas. ³⁵ Co cainxin chojni que vintte ngain rajna Lida co ngain nontte Sarón vicon na quehe conhe tti Eneas. Co cainxin chojni mé coentoxinhi na vidé na co vitticaon na Jesús, tti chonda cain joachaxin.

Are xechon nanita vinhi Dorcas

³⁶ Co tiempo mé vehe ngain ciudad de Jope ná nanita vinhi Tabita que vaguitticaon Jesús. Co ngain nguigoa griego nanita mé vinhi Dorcas. Ngoixin vidé jehe vanchehe cosa jian co vacjenguijna chojni noa. ³⁷ Co are Pedro vehe ngain rajna Lida, conihi nanita mé co ndavenhe. Cottimeja joinchetsinda na cuerpoe co vaquehe na ngain ná cuarto noi. ³⁸ Jope vehe chiaon rajna Lida, co chojni que vaguitticaon Jesús ngain Jope conohe na ixin Pedro vehe ngain rajna Lida. Mexinxin rroanha na yó xí ngain Pedro co xí mé ndačo xa ngain:

—Chjin na toin para rajnana na.

³⁹ Cottimeja Pedro sacjoi ngain na. Co are joiiji na nchiandoha nanita, savicao na Pedro ngain cuarto tti jí cuerpoe. Co cainxin nchiganha víxin ndaji na co tsjanga ncha co cjoago ncha lonto que Dorcas vanchechjian are vechon. ⁴⁰ Cottimeja Pedro vantsje cain na. Co jehe vettoxin nttajochjihi co joinchecoanxinhi Dios. Cottimeja tsjehe nanita ndadiguenhe, co ndache:

—Tabita, dingattjen.

Cottimeja jehe nanita mé conxiré jmacon. Co are vicon nanita mé Pedro, xendoa co tavehe. ⁴¹ Cottimeja Pedro tsehe rá co joinchengattjen. Vayé cainxin chojni que vaguitticaon Jesús, conixin nchiganha cai, co cjoagoe na nanita jichon nanita. ⁴² Cosa jihi conohe na ngoixin ciudad de Jope co tsje chojni vitticaon na ngain Jesús, tti chonda cain joachaxin. ⁴³ Co Pedro vittohe canxion nchanho ngain ciudad mé ngain nchiandoha ná tti vinhi Simón que vagatse roé coxigo.

10

Pedro co Cornelio

¹ Co tiempo mé vehe ná xí vinhi Cornelio ngain ciudad de Cesarea. Co xí mé vehe xa capitán ngain ná grupo de cien xisoldado. Co grupo mé vinhi Italiano. ² Cornelio jeha judío, pero masqui jamé, jehe conixin nindoha anto vanchesayehe na Dios, co vanchehe na inchin joinao Dios. Co cai, jehe vaganjo tsje tomi ngain chojni judío noa. Co cainxin nchanho vanchecoanxinhi Dios. ³ Co ná nchanho inchin ní hora tsocjin jehe Cornelio vicononxinhi jian ná ángel Dios. Co ángel mé joí tti jí Cornelio co ndache:

—¡Cornelio!

⁴ Jehe Cornelio tavetsjecoa tti ángel co anto x̄aon. Cottimeja joanchiangui co ndačo:

—¿Quehe rinao soixin?

Cottimeja ángel mé ndache:

—Dios ján joinchehe caso tti jaha nchecoanxinhi nanao co ixin tti jaha ttjenguijna cain ninoa. ⁵ Mexinxin rroanha jaha canxion xí ngain ciudad de Jope para tsiaho na ná xí dinhi Simón co xí mé dinhi xa Pedro cai. ⁶ Jehe xa jí xa ngain nchiandoha iná tti xí dinhi Simón, pero mé datse roé co, co nchiandoha jí nchia chiaon čica ndachaon. Co Simón Pedro rrondattjo quehe chonda que sinchehe.

⁷ Cottimeja sacjoi tti ángel nichjé, co Cornelio vayé yó ninchehe xé co ná xisoldadoe que vaguitticaon Dios cai. Co Cornelio vechondehe xisoldado mé confianza. ⁸ Co coequín na cainxin tti conhe. Cottimeja Cornelio rroanha na para Jope.

⁹ Nchanho yoxin are satettji ninchehe xé co xisoldadoe Cornelio co are ochiao ciudad de Jope, Pedro cjoí ngataha nchia tti vehe inchin ngosine nchanho para joinchecoanxinhi Dios. ¹⁰ Co anto venhe jintta co joinao rrojine. Ngoixin tenchechjian na tti rrojine, jehe Pedro vicononxinhi tsje cosa que cjoagoe Dios. ¹¹ Vicon ngajni xiré co xincanji ná cosa inchin ná manta jie jitte canoi esquiné. ¹² Ngá manta mé vehe cain coxigo que chonda nó rotté, conché, co conttoa. ¹³ Cottimeja coinhi tté Dios que ndačo:

—Pedro, dingattjen, donhe quexeho co rinao co jintte va.

¹⁴ Pero Pedro ndačo:

—Nahi, soixin, x̄onhi tiempo janha joine cosa ttjoaha co ley Israel jitaxin ixin coxigo mé ttjoaha va.

¹⁵ Cottimeja Dios nichjé iná co ndačo:

—Cosa que Dios joincheroa, jaha čhoha rrondačo ixin ttjoaha.

¹⁶ Jihi conhe ní nttiha, cottimeja sacjan manta mé para ngajni. ¹⁷ Are Pedro jičaxaon ixin quehe rročo tti vicon, ninchehe xé co xisoldadoe Cornelio ttinga tedanchiangui na ixin ttinó jí nchiandoha Simón co ojoiji na ngain puerté nchia. ¹⁸ Cottimeja joanchiangui na sén ixin anttiha jí ná tti dinhi Simón co cai dinhi Pedro. ¹⁹ Co Pedro x̄a jičaxaon ixin tti vicon are Espíritu Santo ndache:

—Tsjexin, ní xí tedanchiangui xa ixin jaha. ²⁰ Dingattjen co dania co nchedudaha de sattjiho xa ixin janha rroanha chojni yá.

²¹ Cottimeja Pedro vania tti te chojni rroanha Cornelio, co Pedro ndache na:

—Janha tti tettjé ra. ¿Quehe rinao ra?

²² Jehe na ndačo na:

—Coetonna na ná xicapitán dinhi Cornelio. Jehe ná xí jian que ditticaon Dios co cainxin chojni judío chondehe na respeto co rinao na xa. Mé ná ángel de Dios joí co ndaĉho ngain xa ixin rrorroanha xa joajna para que soixin tsji ndoha xa co jehe xa tsinhi xa tti soixin rrondate xa.

²³ Cottimeja Pedro ndache na para vixinhi na nchia. Co ttie mé vittöhe na nttiha. Nchanho yoxin Pedro sajoicao na conixin icanxin chojni que vaguitticaon Jesús que vintte ciudad de Jope.

²⁴ Ndoexin joihi na ciudad de Cesarea. Nttiha Cornelio joichonhe conixin nindoha co chojni que navacaoxon, cain nimé vayé Cornelio para que chonhe na nijoirroé Pedro. ²⁵ Are Pedro joihi nchiandoha, Cornelio vaĉhje para chjé joajna co vettoxin nttajochjiji para rrojinch-eseyehe. ²⁶ Pero Pedro joinchengattjen co ndache:

—Dingattjen. Caixon janha ná xí na inchin jaha.

²⁷ Co are jehe na nichjé chó na, joixincaho chó na nchia, co nttiha dixejo tsje chojni. ²⁸ Cottimeja Pedro ndache na:

—Jaha ra noha ra ixin chojni judío ĉhoha ĉatte ngain chojni jé ni dixinha nchiandoha na. Pero Dios cjoagohna janha ixin irrondaĉhjanha ixin ĉonhi chojni o cosa ttoaha. ²⁹ Mexinxin are joihi chojni que jaha ra rroanha ra, toin sajoihi co ĉonhi joanchianguia na. Mexinxin, jaxon rinaho tsonona quedonda vayahna ni ra.

³⁰ Cottimeja Cornelio joattehe:

—Jai vittja nó nchanho janha nttihi nchiania jointtacoanxian Dios are otsocjin, co hora mé ĉa joineha ixin jointtasayá Dios. Are mé vicon ná xí que jingá ná lonto jidaquín. ³¹ Co xí mé ndachjenji na xa: “Cornelio, Dios coinhi ixin jaha nichjehe co ĉaxaon tti nchehe jaha para ttjenguijna cain chojni noa. ³² Mexinxin rroanha jaha joajna ciudad de Jope para tsí Simón, tti xí que dinhi Pedro cai. Xí mé jí xa ndoha iná tti dinhi Simón, pero mé datse roé co, co nchiandoha jí nchia chiaon ĉhica ndachaon. Are tsí Simón Pedro, jehe rronichjaha jaha.” ³³ Co jañá janha rroanha joajna jaicoa para joicjé na co anto nchao ixin jaha joihi daca. Dios jitsjehe ixin cain na te na nttihi co rinaho na tsian na cainxin cosa que jehe coetonha jaha para rrondachjenji ni ra.

Tti ndaĉho Pedro ngaxinhi nchiandoha Cornelio

³⁴ Cottimeja Pedro coexinhi nichja co ndaĉho:

—Jai ttianxin que ndoa Dios rinao cainxin chojni, masqui ojé chojni, pero para ixin jehe cainxin na ĉajeho na. ³⁵ Dios ĉhoha sinchejé chojni que joixin iná nontte, sino que Dios rinao cainxin chojni que nchesayehe jehe co nchehe jian. ³⁶ Dios rroanha Jesucristo ngagué chojni Israel para que Jesucristo, tti chonda joachaxin para cainxin chojni, nichja tti jian joajna que ndaĉho ixin Dios itoñaoha ngain chojni. ³⁷ Co jaha ra anto jian noha ra quehe joinchehe Jesucristo ngain nonttehe chojni judío. Co jehe coexinhi joinchehe ĉé ngain regioen Galilea después de que Juan joexin nichjé co joincheguitte chojni. ³⁸ Co noha ra queĉén Dios joanjo joachaxín Espíritu Santo ngain Jesús que joixin rajna Nazaret co queĉén Jesús vangaria co joinchehe jian co joinchexingamehe cainxin chojni que vaguetan tanguí de ixin tti jianha que vanchehe inchínji ngain. Jañá vanchehe Jesús ixin Dios jí ngain. ³⁹ Co janha na vicon na cainxin tti vanchehe Jesús ngain nonttehe Judea co ngain ciudad de Jerusalén. Cottimeja goen na are coenganito na nttacruz. ⁴⁰ Pero

nchanho ninxin Dios joinchexechon Jesús co Dios cjoagohna na ixin ján xechon Jesús. ⁴¹ Cainxinha chojni vicon Jesús, jeha janha na vicon na ixin Dios coinciehna na desde are saho para ixin rronichja na ngain icha chojni. Janha na joinequinha na Jesús co viquinha na Jesús después de xechon. ⁴² Co Jesús coetonna na que rroundattjan na icha chojni ixin Dios coinciehe Jesús para sehe Juez ngain chojni techon co ngain chojni ndavintteguenhe. ⁴³ Co anto saho que Jesús joí ngataha nontte jihi, cainxin profeté Dios vandačo ixin cainxin chojni que ditticaon Jesús, Dios nchetjañehe na cainxin cosa jianha que nchehe na conixin nombré co joachaxín Jesús.

Are Espíritu Santo joí ngain chojni que jeha judío

⁴⁴ xa jinichja Pedro are joí Espíritu Santo ngain cainxin chojni que jittinhi joajné Pedro. ⁴⁵ Co chojni judío que vaguitticaon Jesús co joixin ciudad de Jope conixin Pedro vintegoan na admirado ixin Espíritu Santo joí cai ngain chojni que jeha judío. ⁴⁶ Ixin coinhi na ojé nguigoa jinichja chojni mé co cai joinchesayehe na Dios. ⁴⁷ Cottimeja Pedro ndačo:

—Espíritu Santo joí ngain na conixin joachaxin inchin joí nganji na janha na. Mexinxin, ¿ají ná chojni que rročoha ixin jehe na siguitte na?

⁴⁸ Co Pedro coetonha ixin joiguitte na ngain nombré Jesucristo. Cottimeja chojni de Cesarea joinchetsenhe na ñao Pedro ixin sittohe ngain na icanxin nchanho.

11

Tti joinchenohe Pedro cain chojni que vaguitticaon Jesús ngain Jerusalén

¹ Nirepresentanté Jesús conixin icha chojni que vaguitticaon Jesús que vintte na nonttehe Judea, chojni mé coinhi ixin chojni que jeha judío cai vitticaon joajné Dios. ² Co are Pedro joí ngain ciudad de Jerusalén, chojni que vandačo ixin cai chojni que jeha judío chonda na que sitticaon na ngain circuncisión co ngain icha costumbré chojni judío are ditticaon na ngain Jesucristo, chojni que vandačo jañá nichja na feo de ixin Pedro. ³ Co joanchianguihi na Pedro co ndačo na:

—¿Quedonda joitsjehe co jointtecoho chojni que jeha judío?

⁴ Cottimeja Pedro coequín na cainxin lo que conhe co ndačo:

⁵ —Are janha tarríhi ciudad de Jope co are rrinttacoanxian Dios, vicononxinna ná cosa inchin ná manta jie que xincanjinxin de ngajni co jitte canoi esquiné co joí hasta tti janha rrihi. ⁶ Co are janha vicon jian ngaxinhi manta mé, vicon anto tsje coxigo que chonda nó rotté, coxigo čhintto, conché, co conttoa. ⁷ Co coian tté Dios que ndachjenji na: “Pedro, dingattjen, donhe va co jintte va.” ⁸ Pero janha ndachjan: “Nahi, soixin. xonhi tiempo janha joine cosa ttjoaha, co ley Israel jitaxin ixin coxigo yá ttjoaha va.” ⁹ Cottimeja tté Dios nichjahna iná co ndachjenji na: “Cosa que Dios joincheroa, jaha čhoča rroundačo ixin ttjoaha.” ¹⁰ Jihi conhe ní nttiha, cottimeja sacjan cainxin mé para ngajni. ¹¹ Rato mé joiji ní xí ngain tti nchia joarihi. Vinttequixin xa ciudad de Cesarea ixin joicjé na xa. ¹² Co Espíritu Santo coetonna ixin sacjoinha xa co nchao jointtaha para sacjoinha xa. Cai cjoinha incjaon nitehe tti niditticaon Jesús. Co cain na joixinhi na nchiandoha Cornelio. ¹³ Xí mé coequinna na xa ixin quexén vicon xa ná ángel tajingattjen ngaxinhi nchiandoha

xa co ndache xa: “Rroanha joajna ngain ciudad de Jope ixin tsí Simón tti dinhi Pedro cai. ¹⁴ Co jehe rronhattjo queñén jaha co cainxin nindoi nchao rrochonda ra iná vida naroa que ñonhi tiempo tsjexin.” ¹⁵ Co are janha coexian nichjá na, Espíritu Santo ojoí ngain na conixin tsje joachaxin inchin are joí nganji na ján na are saho. ¹⁶ Cottimeja ñaxanho tti ndachjenji na Jesús, tti chonda cain joachaxin; jehe ndaño: “Ndoa que Juan joincheguittexin ni conixin jinda, pero jaha ra siguittexin ra conixin Espíritu Santo.” ¹⁷ Jañá Dios rroanha Espíritu Santo ngain jehe na inchin rroanha nganji ján na are coexinhi na votticaon na Jesucristo, tti chonda cain joachaxin. Mexinxin si Dios joinchehe jamé, janha çhoaha ndačhan nahi.

¹⁸ Cottimeja are chojni que vaguitticaon Jesús que vintte na ciudad de Jerusalén coinhi na yá, inichjaha na feo de ixin Pedro, co vitticaon na ixin Dios anto jian co ndaño na:

—¡Caixon Dios chjé chojni que jeha judío joachaxin para ttentoxinhi na vidé na co para rrochonda na iná vida naroa que ñonhi tiempo tsjexin!

Chojni que vaguitticaon Jesús ngain ciudad de Antioquía

¹⁹ Are saho are nagoenxon na Esteban, are mé, coexinhi na anto feo joinchehe na ngain icha chojni que vaguitticaon Jesús. Co tsje chojni que vaguitticaon Jesús chonda que sacoiinga na hasta tti ngain nonttehe Fenicia co ngain nontte ngosine ndachaon dinhi Chipre co cai ngain ciudad de Antioquía. Nttiha nichja na tti jian joajna pero jeha ngain chojni judío co ngain icha chojni nahi. ²⁰ Pero canxion nivaguitticaon Jesús que joixin nontte ngosine ndachaon dinhi Chipre co rajna Cirene, chojni mé joiiji na ciudad de Antioquía co ndache na chojni que jeha judío tti jian joajna de ixin Jesús, tti chonda cain joachaxin. ²¹ Chonda na joachaxín jehe Jesús co jañá tsje chojni coentoxinhi na vidé na co vitticaon na Jesús, tti chonda cain joachaxin.

²² Are chojni que vaguitticaon Jesús ngain ciudad de Jerusalén, conohe cain mé, rroanha na Bernabé ngain ciudad de Antioquía. ²³ Are Bernabé joiiji, jehe vicon ixin queñén Dios joinchenciaon chojni nttiha, co are vicon mé, anto ché. Jehe ndache cain na co ndaño:

—Conixin ansean ra ditticaon ra Jesús, tti chonda cain joachaxin.

²⁴ Co Bernabé ná chojni jian, co Espíritu Santo anto vaquetonha ngain co jehe anto vaguitticaon Jesús. Co jañá icha tsje chojni vitticaon Jesús por ixin Bernabé.

²⁵ Cottimeja Bernabé sacjoi para ciudad de Tarso para ixin joicjé Saulo. Co are vetan Bernabé Saulo, joicao ngain ciudad de Antioquía. ²⁶ Co vintte na nttiha ngagué chojni que vaguitticaon Jesús ngoixin ná nano co joinchecoenhe na tsje chojni. Nttiha ngain ciudad de Antioquía tti saho lugar que chojni coexinhi na joincheguinh na chojni que vaguitticaon Jesús, cristiano.

²⁷ Co tiempo mé canxion chojni que vanichja tti vagayé de ngain Dios joixin na de ngain Jerusalén co sacjoi na ngain ciudad de Antioquía. ²⁸ Co ná de chojni mé vinhi Agabo vingattjen ngagué chojni que vaguitticaon Jesús. Co Espíritu Santo cjoenguijna para conohe quehe nichja jehe co ndaño ixin tsí tiempo que ngoixin mundo seha tti sine chojni. Co jañá joiconhe después, are Claudio vehe emperador. ²⁹ Cottimeja chojni que vaguitticaon Jesús ngain ciudad de Antioquía ndache chó na ixin

cjoenguijna na chojni que vaguitticaon Jesús, nite nonttehe Judea. Co naná na joanjo na según inchin chonda na. ³⁰ Co jañá joinchehe na co rroanha na Bernabé co Saulo para joicahe na tti xí que vaquetonhe chojni que vaguitticaon Jesús que vinte nonttehe Judea cain tti joatse na.

12

Are ndavenhe Jacobo co are coiaxinhi na Pedro

¹ Co tiempo mé rey Herodes coexinhi vanchehe feo ngain nivaguiticaon Jesús. ² Jehé coetonha ixin nagoenxon na Jacobo, xanchó Juan, conixin espada. ³ Co are jehe vicon ixin chojni judío joincheoxinhi yá, jehe coetonha ixin tse na Pedro. Cosa jihi conhe ngain quiai pascua are jine na niottja que chondaha levadura. ⁴ Are tse na Pedro, coiaxinhi na ngain cárcel. Co nttiha jí nó grupo xisoldado jinda cárcel mé co cada grupo chonda nó xisoldado. Herodes xaxaon ixin are tsjexin quiai pascua, rrogantsjexin Pedro de ngain cárcel para ixin rroguicon chojni are Pedro ngain juzgado co are ndarroguenhe. ⁵ Co jañá Pedro tajiixinhi co tsje xisoldado jinda. Pero chojni que vaguitticaon Jesús nchanho co ttie vanchetsenhe na ñao Dios para ixin Pedro.

Dios vantsjexin Pedro de ngain cárcel

⁶ Ttie mé co ndoexin Herodes rrogantsjexin Pedro de ngain cárcel para rrojinchejuzguehe, co ttie mé Pedro tajihoa ngagué yó xisoldado co tajiçhiixin yó cadena co icanxin xisoldado tenda xa cárcel ndojaxin. ⁷ Co rato mé jói ná ángel Dios co ngoixin ngaxinhi cárcel anto vingasán xohi. Angel mé catte nttachén Pedro co joinchexingamehe co ndache Pedro:

—Dingattjen jaicoa.

Cottimeja cadena tti jiçhiixin rá Pedro vinttji cadena ngataha nontte.

⁸ Co ángel mé ndache:

—Nchenttedo cinturoan co tjanga cattea.

Co are Pedro joinchehe cain yá, ángel mé ndaçho ngain:

—Daritsí noxá co chjin na.

⁹ Co Pedro rroé ángel co sacjoi, masqui noeha andoa ni nahi tti jitsjehe. xaxaon ixin jitsjehe inchin are toxinxin ni. ¹⁰ Pero vatto na tti te xisoldado saho co xisoldado yoxin, co are joiji na ngain puerta chia que jixin nongaxin nttiha, xiré puerta jeho puerta. Co vachje na, co cjoi na inchin ná esquina. Cottimeja ángel cointohe jeho Pedro. ¹¹ Cottimeja Pedro coinxin co ndaçho:

—Janché onona ixin Jesús, tti chonda cain joachaxin, rroanha ná ángel co vantsjexin na de ngá rá Herodes co de ngain cainxin tti rrojinchena chojni judío.

¹² Co are Pedro xa jiçaxaon de ixin cain yá, sacjoi nchiandoha María, janné Juan que cai vinhi Marcos. Co nttiha anto tsje chojni tenchetsenhe na ñao Dios. ¹³ Co are Pedro vinga puerta, vachje ná xannçhí vinhi Rode para joitsjehe xan quensen jói. ¹⁴ Co are coinhi xan tté Pedro, anto ché xan co xa conxireha xan puerta. Sacjan xan ttinga xan joiquetonha xan ngaxinhi ixin Pedro ngain puerta tají. ¹⁵ Cottimeja ndaçho cainxin na:

—¡Ndadixenga jaha!

Co jehe xan anto ndaçho xan ixin ndoa. Pero masqui jamé, jehe na ndaçho na:

—Jeha jehe Pedro. Yá tti ángel que jinda Pedro.

16 Co ngoi rato mé ndoja Pedro ʒa jidinga puerta. Co are conxiré na puerta co vicon na Pedro, cainxin na ʒaon na. 17 Pero jehe joinchehe seña conixin rá para que jehe na tencoa na co coequinhi na queʒén Jesús vantsjexin de ngaxinhi cárcel co ndache na:

—Ttequinhi ra cain yá Jacobo co ni icha que ditticaon Jesús.

Cottimeja vaʒhe co sacjoi ojé lugar.

18 Co are vingasán xisoldado anto ʒaon ʒa ixin noeha ʒa quehe conhe conixin Pedro. 19 Herodes coetonha joicjé na pero ʒhoha vittja na. Cottimeja Herodes joanchianguihi xisoldado ixin queʒén Pedro sacjoi, co coetonha nagoenxon na cainxin xisoldado mé. Cottimeja Herodes sacjoixin de nonttehe Judea co sacjoi ngain ciudad de Cesarea. Co nttiha vehe tsje nchanho.

Are ndavenhe Herodes

20 Icha saho Herodes vaganjo tti vane chojni ciudad de Tiro co Sidón. Cottimeja Herodes coñao ngain chojni mé. Co jehe na cjoao chó na ixin joitsjehe na Herodes. Co jehe na joincheconvensé na Blasto, ná xinchehe ʒé Herodes que chonda ʒa tsje joachaxin, ixin ndache ʒa Herodes ixin itsoñaoha ngain cayoi ciudad mé. 21 Co Herodes coín ná nchanho para ixin coinhi tti ndaʒho na. Co nchanho mé vengá lonttoe rey co tavetaha nttaxintaoen tti dehe are ttetonha, co coexinhi nichja ngain cain chojni. 22 Cottimeja cainxin chojni coexinhi coyao na co ndaʒho na:

—¡Jeha ná xí tti jinichja! ¡Jihi ná dios!

23 Co rato mé ná ángel Jesús, tti chonda cain joachaxin, joinchehe que tse ná chin co joxon cotsindo coexinhi joine cuerpoe hasta ndavenhe jehe Herodes. Jañá conhe Herodes ixin joinao que chojni joincheguinh na dios jehe.

24 Pero icha co icha tsje chojni coinhi joajné Dios co jamé icha co icha tsje lugar chojni vitticaon na Jesús.

25 Co are Bernabé co Saulo joexin joinchehe na ʒé na, cjanxin na de ngain ciudad de Jerusalén co joicao na Juan que vinhi Marcos cai.

13

Are Bernabé co Saulo coexinhi nichja joajné Dios ngain icha lugar

1 Ngagué chojni que vaguitticaon Jesús ngain ciudad de Antioquía vinte canxion chojni que vagayé joajna de ngain Dios co cai vinte canxion tti joinchecoenhe chojni de ixin Dios. Chojni mé vinhi Bernabé, Simón (que vinhi cai tti Ttie), Lucio de ciudad de Cirene, Manaén (que vanguicaho Herodes tti vaquetonha ngain nonttehe Galilea), co Saulo. 2 Ná nchanho are tecjáño na co tenchecoanxinhi na Jesús, tti chonda cain joachaxin, Espíritu Santo ndaʒho ngain na:

—Rroanha ra Bernabé co Saulo ngain tti ʒa que janha ochjaha na.

3 Cottimeja cjáño na co joinchecoanxinhi na Dios icha, co después coín rá ni icha ngataha já cayoi na. Cottimeja rroanha na na savinttecji na.

Bernabé co Saulo ngain nontte ngosine ndachaon dinhi Chipre

4 Cottimeja Bernabé co Saulo sacjoi ngain ciudad de Seleucia inchin coetonha Espíritu Santo. Co nttiha coaxin na barco que sajoicao na ngain nontte ngosine ndachaon dinhi Chipre. 5 Co are joihi na ciudad de Salamina, tti dengattjen barco, coexinhi na nichja na joajné Dios ngaxinhi cainxin ningoe chojni judío. Co cai joicao na Juan Marcos ixin

cjoenguijna na. ⁶ Joingaria na ngoixin nontte mé hasta joihi na ciudad de Pafos. Nttiha vetan na ná chojni judío que vinhi Barjesús. Co xí mé ttoso xa. Co jehe xa joincheyehe xa chojni ixin ndačo xa que nichja xa para ixin Dios. ⁷ Xittoso mé anto xiamigoe xa xigobernador que vinhi Sergio Paulo. Xigobernador mé vechonda xa jian joarrixaon. Co xí mé rroanha xa joajna ixin jói Bernabé co Saulo ixin joinao xa coinhi xa joajné Dios. ⁸ Co xittoso mé, que cai vinhi xa Elimas, čhoha xa co joinaoha xa ixin xigobernador rroguitticaonxin xa tti nichja na. ⁹ Cottimeja Saulo, que cai vinhi Pablo, tavetsjehe xittoso mé jian. Co Pablo anto tsje joachaxin Espiritu Santo chonda. ¹⁰ Co jehe ndache xa:

—Jaha tti ncheyehe chojni, co jaha nchehe jianha; jaha xenhe inchínji co jaha tti ningaonhe cainxin tti jian. ¿Quedonda toncjamangui palabré Jesús, tti chonda cain joachaxin, para que chojni sitticaonha na jehe? ¹¹ Janché, jehe Jesús sinttacastigá jaha co tsejé jmacon co jaha siconha canxin nchanho.

Co rato mé ndaconaxinhi xa xehe. Cottimeja cjoé xa ná tti rrotse rá xa ixin idiconha xa. ¹² Co are xigobernador vicon quehe conhe jehe xittoso mé, vitticaon xa Jesús ixin jehe xa tavetsjecoa xa ixin tti cjoagoe na xa de ixin Jesús, tti chonda cain joachaxin.

Pablo co Bernabé ngain ciudad de Antioquía que jí nonttehe Pisidia

¹³ Pablo co xijoicao ngain ciudad de Pafos nttiha coaxin na barco co sacjoi na ngain ciudad de Perge ngain nonttehe Panfilia. Pero Juan Marcos cointtohe na co sacjan ngain ciudad de Jerusalén. ¹⁴ Cottimeja jehe na sacjoixin na de ngain ciudad de Perge co sacjoi na ciudad de Antioquía que jí ngain nonttehe Pisidia. Co nttiha are nchanho que nchejogaha na, joixinhi na ningoe chojni judío co tavintte na. ¹⁵ Cottimeja are xivaquetonhe nihngo mé joexin tsjehe xa xón que jitaxin ley que vayé Moisés co xón que jitaxin tti dicjin profeté Dios, xí mé rroanha xa joajna ngain na co ndačo xa:

—Si jaha ra noha ra čhoan palabra jian para ixin chojni nttihi, nchao nichja ra jaxon.

¹⁶ Cottimeja Pablo vingattjen co joatsín rá para ixin chojni rrotencoia na co ndačo:

—Tsjexin ra jaha ra chojni Israel co jaha ra que xagonhe ra Dios. ¹⁷ Dios de chojni Israel coinchiehe ndogoelitoa na xančhjen co jehe cjoenguijna na para anto cotsje na are ča vintte na nonttehe Egipto. Co después Dios vantsjexin na de nttiha conixin joachaxín. ¹⁸ Co Dios anto venda cainxin chojni mé ngoixin cuarenta nano ngagaha jna, masqui jehe na antoha jian vaguitticaon na ngain Dios. ¹⁹ Cottimeja Dios conxantte yáto nación que vintte ngain nonttehe Canaán. Co cainxin nontte mé joanjo Dios ngain ndogoelitoa na xančhjen para inchin cuatrocientos cincuenta nano. ²⁰ Co ngoixin tiempo mé Dios coinchiehe tsje xijuez para coetonhe chojni mé hasta are jói profeta que vinhi Samuel. ²¹ Cottimeja chojni Israel joinchetsenhe na ñao Dios para que ná xirey rroquetonha ngain na. Mexinxin Dios joanjo ná xí vinhi Saúl, xenhe Cis, co mé ná xanntí ndogoelitoa na xančhjen que vinhi Benjamín. Co xí mé vehe rey ngoixin cuarenta nano. ²² Cottimeja Dios joantsjehe Saúl joachaxin de rey, co chjé David joachaxin de rey. Co Dios ndačo de ixin David: “David, tti xenhe Isaí, ná xí que janha anto nchešoxinna co jehe sinchehe cainxin tti janha rinaho.” ²³ Jesús vehe ná xannti xančhjen de David mé co

Dios rroanha Jesús para danjo chojni Israel iná vida naroa que xonhi tiempo tsjexin, inchin jehe ndaço are saho. ²⁴ Icha saho que Jesús jói, Juan vanichjé cainxin chojni Israel co ndache na ixin chonda na que tsentoxinhi na vidé na co siguite na. ²⁵ Co are Juan chiaon jittjexin vidé, ndaço: “Janha jeha tti jaha ra xaxaon ra. Co después de janha, tsí ná tti rrochonda anto tsje joachaxin co janha jiquinxinha na ni para sisehe tsonxindangá corrié catté.”

²⁶ Hermanos, joajné Dios tti danjo iná vida naroaxin, mé para ixin jaha ra xo xanntti xanchjen de Abraham co jaha ra xo xagonhe ra Dios. ²⁷ Chojni que vintte ciudad de Jerusalén co xivaquetonhe chojni joinoeha na quensen Jesús co ni vaquinxinha na tti vacjin profeté Dios masqui vatsjehe na xón mé ngaxinhi ningoe na cada nchanho que nchejogaha na. Pero masqui jamé, are ndache chó na ixin nagoenxon na Jesús, jañá joinchehe na inchin ondaço profeté Dios icha saho. ²⁸ Co masqui chondaha na razón para nasoenxon na Jesús, pero joinchetsenhe na ñao Pilato ixin rrorroanha xisoldado para nasoenxon xa Jesús. ²⁹ Mexinxin are joexin goen xa Jesús inchin jitaxin ngain Palabré Dios, chojni jehe joinchegania na de nganito cruz co cjoavá na. ³⁰ Pero Dios joinchexechon jehe Jesús. ³¹ Co para tsje nchanho Jesús xago ngain chojni que vacao are joixin nonttehe Galilea co sacjoi ngain ciudad de Jerusalén. Co chojni mé tti ndache icha chojni de ixin Jesús jai.

³² Co jañá janha na tenichja na tti jian joajna de ixin tti ndaço Dios ngain nindogoelitoa na xanchjen are saho. ³³ Co ján na xanntí xanchjen na de nindogoelitoa na. Mexinxin jai Dios ojoinchexechon Jesús. Co jehe Dios joinchehe mé para ixin ján na inchin jehe ndaço ngain yoxin Salmo sé tiempo vatto. Co Salmo mé ndaço: “Jaha Xanhna. Co janha chjaha vida jai.” ³⁴ Co cai are saho Dios cjoago ixin rrojinchexechon Jesús para que rrorrengaha cuerpo are ndaço ngain Palabré Dios: “Janha sinttanchaon jaha ra inchin ndattjan David.” ³⁵ Mexinxin cai ndaço ngain iná Salmo: “Co soixin sanjoha joachaxin para rrorrenga cuerpona janha tti nttaha xá soixin ixin soixin anto rinao na.” ³⁶ Co, ndoa, David joinchehe xé Dios ngagué chojni que vintte are tiempo David inchin coetonha Dios. Pero cottimeja ndavenhe co xavá çhica nindoha co cuerpo ndarrenga. ³⁷ Pero cuerpo Jesús que Dios joinchexechon, xonhi conhe. ³⁸ Mexinxin cain jaha ra chonda que tsonoha ra ixin Jesús nchao nchetjañehe chojni cain tti jianha que nchehe na. ³⁹ Ley que vayé Moisés çhoha nchetjañehe cain tti jianha que nchehe chojni, pero conixin Jesús cainxin chojni que ditticaon Jesús, ditjañehe cain tti jianha que nchehe na. ⁴⁰ Mexinxin ttijho ra cuidado ixin tsoenha nganji ra inchin dicjin profeté Dios ngain tti jitaxin Palabré Dios are ndaço na:

⁴¹ Tsjexin ra, jaha ra xo tjanoa ra, tadinttetsjecoa ra co ndasenhe ra ixin janha Dios na. Co janha sinttaha ná cosa ngain tiempoa ra co cosa mé sitticaonha ra masqui chojni rrondattjo ra.

⁴² Cottimeja are Pablo co xijoicao vachjexin na de ningoe chojni judío, chojni que jeha judío joinchetsenhe na ñao Pablo ixin are sinchejogaha na iná nttiha ijni nchanho, tsinhi na xajeho tti nichja Pablo. ⁴³ Are cainxin chojni vachjexin nihngo, tsje chojni judío co canxion chojni que jeha judío pero que vaguitticaon na inchin chojni judío, cain nimé rroé na Pablo co Bernabé. Co Pablo co Bernabé ndache na ixin jehe na tsinttoeha na de sinao na Dios.

⁴⁴ Are joí nchanho que nchejogaha chojni judío iná, merocoa ngoixin ciudad xatte ngain ningoe chojni judío ixin tsinhi na joajné Dios. ⁴⁵ Pero are chojni judío vicon ixin joí anto tsje chojni, coexinhi na conchjoehe na co coexinhi na nichja na ojé que Pablo jinichja co nichja na jianha de ixin Pablo. ⁴⁶ Cottimeja Pablo co Bernabé xaonha are nichja co ndache na:

—Chonda que nichja na joajné Dios nganji ra saho ixin jaha ra judío ra. Pero jaha ra rinaoha ra tsinhi ra co jaha ra xaxaonha ra ixin jian para rrochonda ra iná vida naroaxin que xonhi tiempo tsjexin. Mexinxin jaxon janha na rronichja na ngain chojni que jeha judío. ⁴⁷ Ixin jañá coetonna na Dios, tti chonda cain joachaxin, ixin ndačo:

Janha joaqué jaha inchin ná xohi para ixin cainxin nación.

Co para rronichjehe chojni ngoixin mundo que nchao rrochonda na iná vida nara que xonhi tiempo tsjexin.

⁴⁸ Are coinhi chojni que jeha judío, anto ché na co coexinhi na ndačo na ixin joajné Jesucristo, tti chonda cain joachaxin, atto jian. Co cainxin nicoinchiehe Dios ixin chonda na iná vida naroaxin que xonhi tiempo tsjexin, cainxin nimé vitticaon na Jesús. ⁴⁹ Co jañá coexinhi na nichja na ngoixin nonttehe Pisidia joajné Jesús, tti chonda cain joachaxin. ⁵⁰ Pero chojni judío nichja ngain canxion nanita que anto jian vaguitticaon inchin chojni judío, co ngain tattita que vinttechonda joachaxin ngain ciudad mé. Co ndache na cain nimé ixin ningaconhe na Pablo co Bernabé. Co hasta vantsjexin na na de ngain nontte mé. ⁵¹ Cottimeja Pablo co Bernabé contsjenga na rotté na para ixin vinttji jinche co jamé joinchehe na señal ixin chojni nttiha vitticaonha na joajné Jesucristo. Cottimeja sacjoi na ngain ciudad de Iconio. ⁵² Co chojni que vaguitticaon Jesús anto ché na co anto vacančjanda na Espíritu Santo para vaquetonhe na.

14

Are Pablo co Bernabé ngain ciudad de Iconio

¹ Ngain ciudad de Iconio Pablo co Bernabé joixinhi ningoe chojni judío co nichja na jian. Jañá tsje chojni judío co tsje chojni que jeha judío vitticaon na ngain Jesús. ² Pero chojni judío que vitticaonha Jesús ndache chojni que jeha judío para ningaconhe na co xaxaon na jianha de ixin chojni que vaguitticaon Jesús. ³ Mexinxin Pablo co Bernabé vittohe na nttiha sé co nichja na co xaonha na co chonda na confianza ngain Jesús, tti chonda cain joachaxin. Co Jesús joinchese gurá tti jehe na ndačo na de ixin quexén Dios rinao cain chojni ixin joanjo joachaxin para joinchehe na tsje milagro. ⁴ Co nchion chojni de ciudad mé xaxaon na inchin chojni judío, co nchion na xaxaon na inchin nirepresentanté Jesús. ⁵ Mexinxin chojni judío co chojni que jeha judío nichjé na xinchíxin co cjoao chó na ixin rrocyaotte na na co rrocaxin na na xo. ⁶ Are Pablo co Bernabé conohe mé, sacojinga na co sacjoi na ngain rajna Listra co ngain rajna Derbe, co ngain nontte te chiaon, co cayoi rajna mé te nonttehe Licaonia. ⁷ Co nttiha cai nichja na tti jian joajné Jesús.

Are coaxin na xo Pablo ngain rajna Listra

⁸ Nttiha rajna Listra vehe ná xí que čho ha vacji desde are goan. ⁹ Xí mé tajittinhí xa tti ndačo Pablo, co Pablo tsjehe xa jian co conohe ixin xí mé vitticaon xa co vechonda xa fe de que ixin nchao rroxingamehe xa. ¹⁰ Cottimeja Pablo ndache xa sén:

—Daringattjen jian conixin rottea.

Co xí mé chinca xa vingattjen xa co coexinhi xa cjoí xa. ¹¹ Co are chojni vicon tti joinchehe Pablo, coexinhi na coyao na ixin nguigoehe nonttehe Licaonia co ndačo na:

—Joí yó dios nganji na inchin xí.

¹² Co nimé ndačo na ixin Bernabé ná dios vinhi Júpiter co Pablo ná dios vinhi Mercurio ixin jehe tti nichja. ¹³ Co ngandehe rajna vehe ná nihngo tti vanchecoanxinhi na Júpiter. Co ná xidané Júpiter joiaho coxintá jittea va tsjo. Co xidána co chojni mé joinao na rrogoen na coxintta para rrojinchesayehe na Pablo co Bernabé. ¹⁴ Pero are Bernabé co Pablo, yó de tti representanté Jesús, conohe na yá coinchje na lonttoe na co coinga na cjoí na ngain tti jí tsje chojni co ndačo na sén:

¹⁵ —¿Quedonda jańá tenchehe ra? Janha na xí na inchin jaha ra. Co janha na joihi na para ixin rrondattjo ra ixin chonda ra que tsinttohe ra cosa jihu que xonhi xé co sitticaon ra Dios tti jichon. Dios mé tti joinchechjian ngajni, nontte, ndachaon co cainxin cosa que jí. ¹⁶ Are icha saho Dios coančhanda chojni joinchehe na inchin joinao na. ¹⁷ Co masqui jamé, cainxin tiempo jehe nchehe jian ngain chojni co jamé tjago ixin jehe Dios. Jehe nchegania chin co danjo jian cosecha, co chjá na cain tti jontte na co cai chjá na icha cosa para que ján na anto chá na.

¹⁸ Pero masqui ndačo na cain yá, jehe na anto tangui cayacoenxin na chojni ixin goenha na coxintá rrocosayexin na.

¹⁹ Cottimeja canxion chojni judío que vitticaonha Jesucristo joixin de ngain ciudad de Antioquía co Iconio co jehe na ndache na chojni rajna Listra ixin coaxin na Pablo xo. Co are joexin coaxin na xo, jehe na xaxaon na ixin ondavenhe Pablo co coinganji na hasta tti ngandehe rajna. ²⁰ Pero are chojni que vaguitticaon Jesús xatte na ngandaji Pablo, jehe vingattjen co sacjan ngaxinhi rajna iná. Co nchanho yoxin sajoicao Bernabé ngain rajna Derbe.

²¹ Ngain rajna Derbe nichja na tti jian joajné Jesucristo, co jańá tsje chojni vitticaon Jesús. Cottimeja cjan na iná ngain rajna Listra co ngain ciudad de Iconio co ngain ciudad de Antioquía. ²² Co ngain cainxin lugar mé Pablo co Bernabé ndache chojni que joinchehe sigue jian vaguitticaon Jesús. Co ndache na na ixin cain chojni chonda que tsixinhi na are anto tangui tsonhe na, co jamé rrochonda na parte ngain tti ttetonha Dios. ²³ Co coinchiehe na canxion xí ngain cada lugar para vaquetonhe chojni que vaguitticaon Jesús nttiha. Co are joexin joinchecoanxinhi na Dios co are xa vinttecjáño na, jehe na joinchetsenhe na ñao Jesús, tti chonda cain joachaxin, ixin cjoenguijna cain chojni mé que vaguitticaon ngain jehe Jesús.

Pablo co Bernabé sacjan ngain ciudad de Antioquía nonttehe Siria

²⁴ Cottimeja vatto na ngain nonttehe Pisidia co joihi na ngain nonttehe Panfilia. ²⁵ Co nichja na tti jian joajné Jesucristo nttiha ngain ciudad de Perge. Cottimeja sacjoi na ngain rajna Atalia. ²⁶ Nttiha coaxin na barco co sacjoi na ngain ciudad de Antioquía, tti ciudad joixin na are coexinhi na sacjoi na are chojni que vaguitticaon Jesús nttiha joinchetsenhe na ñao Dios ixin cjoenguijna na ngain xa, co jaxon Pablo co Bernabé sacjan na ixin ojehe na xa mé. ²⁷ Co are joihi na ciudad de Antioquía joatse na cain chojni que vaguitticaon Jesús co coequinhi na na cainxin tti joinchehe Dios ngain na co quexén Dios coančhanda vitticaon chojni

que jeha judío. ²⁸ Co Pablo co Bernabé vittohe sé nttiha ngain chojni que vaguitticaon Jesús.

15

Are xatte na ngain Jerusalén

¹ Co tiempo mé canxion xí que sacjoixin xa de nonttehe Judea para ngain ciudad de Antioquía coexinhi xa joinchecoeha xa chojni ixin cain chojni que rinao sayé iná vida nroa chonda que tsa na xöhe que dinhi circuncisión inchin coetonha Moisés. ² Pero Pablo co Bernabé vitticaon na ixin chojni que ditticaon Jesús chonda que tsa na xöhe. Mexinxin anto joinchediscutí chó na. Cottimeja chojni que vaguitticaon Jesús nttiha Antioquía coinchiehe Pablo co Bernabé co icha xí para tsji sicjao representanté Jesús co tti vaquetonhe nivaguitticaon Jesús que jí ngain Jerusalén. Jeha na tsji na sicjao na na quexén tsonhe, ¿atsa na xöhe ani nahi?

³ Chojni que vaguitticaon Jesús ngain ciudad de Antioquía rroanha na. Sacjoi na co vatto na ngain nonttehe Fenicia co nonttehe Samaria. Co ndache na chojni nttiha ixin tsje chojni que jeha judío jai ovitticaon na ngain Dios. Co cainxin chojni que vaguitticaon Jesús nttiha anto ché na are coinhi na yá.

⁴ Are Pablo co Bernabé joiiji na ngain ciudad de Jerusalén, cain chojni que vaguitticaon Jesús conixin cain representanté Jesús co cain xí que vaquetonhe chojni que vaguitticaon Jesús, cain nimé vayé na Pablo co Bernabé. Co coequinhi na na cainxin tti joinchehe Dios ngain na. ⁵ Pero canxion xifariseo que vaguitticaon Jesús vingattjen xa co vinttendačo xa:

—Chojni que jeha judío chonda que sayé na xöhe que dinhi circuncisión are sitticaon na Jesús, co chonda que sinchehe na cainxin tti ttetonha ley que vayé Moisés.

⁶ Cottimeja nirepresentanté Jesús co cain xí que vaquetonhe chojni que vaguitticaon Jesús, nimé niŕatte ixin cjoao na de ixin cosa mé. ⁷ Anto cjoao chó na. Cottimeja Pedro vingattjen co ndache na:

—Jaha ra noha ra ixin icha saho Dios coinchiehna janha de ngayaha ra para que rroundattjan chojni que jeha judío tti jian joajna que danjo iná vida nroaxin, jamé para que jehe na sitticaon na ngain Jesús. ⁸ Co Dios, tti chonxin cainxin ansén na, cjoago ixin jehe vayé chojni mé ixin jehe rroanha Espíritu Santo ngain jehe na inchin rroanha nganji ján na. ⁹ Dios ndačo ixin jehe na co ján na xajeho na ngattoxon con jehe ixin jehe joincheroa ansén na por ixin confianza que chonda na ngain Jesucristo inchin joinchehe nganji ján na. ¹⁰ Jai, ¿quedonda ditticaonha ra tti joinchehe Dios? Nindogoelitoa na xančhjen čhoja joinchehe ndo cain tti ndačo ley que vayé Moisés. Mexinxin čhoja tsetonhe ra chojni que ditticaon Jesús que jeha judío ixin sinchehe na tsje ley que ni ján na čhoja jointtoho na co ni ndogoelitoa na xančhjen čhoja joinchehe ndo. ¹¹ Ncheha ra jamé. Noa na ixin Dios vanjo iná vida nroa co xonhi joinchecobrá ixin Jesús, tti chonda cain joachaxin, rinao na ján na co cai jehe na.

¹² Cottimeja cainxin jehe na tencoa na co coinhi na are Bernabé co Pablo coequinhi na quecá señal co milagro joinchehe Dios ngagué chojni que jeha judío. ¹³ Are joexin nichja na, Jacobo ndačo:

—Hermano, ttinna ni ra: ¹⁴ Simón Pedro coequinna na queñén Dios cjoago ixin anto rinao chojni que jeha judío co coinciehe chojni mé cai para soan chojni Dios. ¹⁵ Cainxin yá inchin tti ocjin profeté Dios ngain tti jitaxin Palabré Dios. Co Palabra mé ndaço:

¹⁶ Cottimeja janha rrocjan na sihi iná co inchin ná tti tette nchia que oxantte, jañá janha sinttaha para ixin chojni sinchesayana na inchin joinchesayana na are tiempoe David;

janha sinttaha para ixin chojni sinchecoanxinna co sinchehe inchin janha rrondaçhjan,

¹⁷ jañá sinttaha para que chojni ngoixin mundo sinao sitticaon na, co para ngain cainxin nación sintte chojnina.

¹⁸ Jañá çho Dios, tti chonda cain joachaxin, que joinchenona na cainxin jihi desde osé.

¹⁹ Mexinxin janha ndaçhjan ixin inttogetanha na tangui chojni que ditticaon Dios que jeha judío. ²⁰ Jeho rrocjinhi na na ixin isineha na tti joaquehe na ngain ídolo. Co ixin sinttejoacaoha na nçhi que jeha nçhiçhihi na o xí que jeha xixihi na, co ixin sineha na nntaohe coxigo digusinguehe na ttosin ixin coxigo mé dinttjinguiha va jni, co sineha na jní va cai. ²¹ Ixin ngain cada rajna co para tsje nano te chojni que nchecoenhe chojni ley que vayé Moisés, co ley mé tsjehe na ngain ningoe chojni judío cada nchanho que nchejogaha na.

²² Cottimeja nirepresentanté Jesús co tti xí que vaquetonhe chojni que vaguitticaon Jesús, conixin cainxin chojni que vaguitticaon Jesús nntiha Jerusalén, cain nimé cjoao chó na ixin coinciehe na canxion chojni de ngagué na para rroanha na na conixin Pablo co Bernabé ngain ciudad de Antioquía. Coinchiehe na Judas que cai vinhi Barsabás co iná xí vinhi Silas. Co chojni que vaguitticaon Jesús anto vechonda respeto ngain cayoi xí mé. ²³ Co chojni que coinciehe na joinchechjian ná carta, co Judas co Silas joicao carta mé para ngain ciudad de Antioquía. Co carta mé ndaço carta:

“Janha na ço representante na de Jesús co ço ttetonhe chojni que ditticaon Jesús conixin cain icha chojni que ditticaon Jesús nntihi chjaha ra joajna jaha ra ço jeha judío ra pero ditticaon ra Jesús, jaha ra ço te ra ngain Antioquía co ngain nonttehe Siria co ngain nonttehe Cilicia.

²⁴ Janha na coian na ixin canxion chojni cjoixin de nntihi co jointtaguetanha ra na tangui conixin tti ndaço na. Mexinxin jaha ra noaha ra quehe nchao sinchehe ra ixin jehe na ndattjo ra na ixin chonda que tsa ra çohe co sitticaon ra tti ttetonha ley que vayé Moisés. Pero çonhi tiempo janha na chjaha na na joachaxin para nichja na jañá. ²⁵ Mexinxin cjoao chian na co çaxanho na ixin anto nchao jí ixin coinchiá na canxion chojni ngaguehna na ixin tsi na sitsjaha ra na conixin Bernabé co Pablo, tti ján na rinao na co tti ditticaon Jesús inchin cain na. ²⁶ Co jehe na coín vidé na en peligro de ixin causexin Jesucristo, tti chonda cain joachaxin para ixin ján na. ²⁷ Mexinxin rroanha na Judas co Silas nganji ra co jehe na rrondattjo ra na cainxin tti cjoao chian na. ²⁸ Espíritu Santo cjoenguijna na, mexinxin çaxanho na ixin nchao jí ixin itsetoanha ra na sitticaon ra tsje ley que anto tangui para ixin chojni sinchehe. Jeho ley tehi chonda que sitticaon ra: ²⁹ sintteha ra nntaohe coxigo que joaquehe na ngain ídolo, co cai sintteha ra jní va co ni sintteha ra nntaohe coxigo

que diguinguehe na ttosin, co sinttečicoha ra nčí que jeha nčíchiha ra, ni xí que jeha xixiha ra. Co si sitticaon ra cain jihí, sinchehe ra jian. Dios senda ra tti te ra.” Jańá jitaxin carta.

³⁰ Cottimeja orroanha na na co sacjoi na ngain ciudad de Antioquía. Co nttiha joatse na cainxin chojni que vaguitticaon Jesús co joanjo na carta que joicao na. ³¹ Co are chojni que vaguitticaon Jesús tsjehe na carta mé, anto ché na ixin tti jitaxin ngá xón vantsjehe na joachjaon chonda ansén na. ³² Co ixin Judas co Silas cai chonda joachaxin de ndache chojni joajna que vayé na de ngain Dios, mexinxin jehe na anto joincheconsolá na co joincheanimá na chojni nttiha conixin tti ndache na na. ³³ Co Judas co Silas vittohe canxion nchanho nttiha. Cottimeja are sacjan na ngain tti nirroanha na, chojni que vaguitticaon Jesús chjé na na joajna are sacjoi na. ³⁴ Pero Silas ndačo ixin sittohe nttiha nchion icha. ³⁵ Co cai Pablo co Bernabé vittohe nttiha ngain ciudad de Antioquía. Cayoi nimé co icha tsje chojni nichja na co joinchecoenhe na na joajné Jesucristo, tti chonda cain joachaxin.

Are Pablo sacjoi nttiha yoxin para ixin nichja joajné Dios

³⁶ Are ovatto nchion tiempo, Pablo ndache Bernabé:

—Chjin na iná ngain cainxin rajna tti nichja na joajné Jesucristo, tti chonda cain joachaxin. Sitsjehe na cain nihermano para tsonoa na si ẁa tenchehe na sigue ditticaon na jian ngain Jesús o aní nahi.

³⁷ Bernabé joinao rrojicaio Juan Marcos cai, ³⁸ pero Pablo joinaoha rrojicaio na Juan Marcos iná ixin are saho coixinha joinchehe ẁa conixin jehe na, ixin are jehe na ngain regioen Panfilia, Juan Marcos cointtohe na co sacjoi Jerusalén. ³⁹ Anto joinchediscutí na hasta vačhjenjehe chó na. Bernabé sajoicaio Marcos, co coá na barco co sacjoi na nontte ngosine ndachaon dinhi Chipre. ⁴⁰ Pero Pablo coinchiehe Silas. Co chojni que vaguitticaon Jesús joinchetsenhe na ñao Dios ixin jehe senda na. Cottimeja Pablo co Silas sacjoi na. ⁴¹ Co vatto na ngain nonttehe Siria co ngain nonttehe Cilicia. Nttiha joincheanimá na chojni que vaguitticaon Jesús.

16

Pablo co Silas joicao na Timoteo

¹ Pablo co Silas joiĵi na rajna Derbe co rajna Listra. Nttiha Listra jí ná xí tti vaguitticaon Jesús que vinhi Timoteo. Janné ẁa ná judía que vaguitticaon jan Jesús, co ndodé ẁa ná chojni griego. ² Chojni que vaguitticaon Jesús que te na ngain rajna Listra co ngain ciudad de Iconio nichja na jian de ixin jehe ẁa. ³ Co Pablo joinao joicaio Timoteo, mexinxin chjé ẁohe que dinhi circuncisión para que tsońaoha chojni judío que vintte nttiha, ixin cain chojni mé nohe na ixin ndodé ẁa ná chojni griego co chojni griego ndačo ixin chondaha que tsa ni ẁohe mé. ⁴ Co ngain cainxin rajna vatto na ndache na chojni que vaguitticaon Jesús cainxin tti cjoao chó nirepresentanté Jesús conixin tti xí que vaquetonhe chojni que vaguitticaon Jesús ngain ciudad de Jerusalén. ⁵ Co jańá chojni anto jian vaguitticaon Jesús co cada nchanho icha tsje chojni coexinhi vitticaon Jesús.

Pablo vicononxinhi ná xí de nonttehe Macedonia

⁶ Espíritu Santo coančhlandaha na nichja na joajné Dios ngain nonttehe Asia. Mexinxin vangaria na nonttehe Frigia co nonttehe Galacia. ⁷ Co joiji na ngandehe nonttehe Misia. Cottimeja xaxaon na rrogatto na ngain nonttehe Bitinia. Pero Espíritu Santo que Jesús rroanha coančhlandaha na. ⁸ Mexinxin jehe na vatto na nonttehe Misia hasta joiji na ciudad de Troas jí ngandehe ndachaon. ⁹ Co nntiha are ttie, Pablo vicononxinhi ná xí que joixin xa de nonttehe Macedonia. Co xí mé tajingattjen xa co jinchetsenhe xa ñao Pablo co ndačo xa: “Datto sihi nntihi nonttehe Macedonia co ttjenguijna ni ra.” ¹⁰ Co ixin Pablo vicon cain yá, janha na jointtachjian na tti cjoinha na are sacjoi na nonttehe Macedonia. Co conona na ixin Dios rroanha na ixin nichja na tti jian joajna ngain chojni que te nntiha.

Pablo co Silas ngain Filipos

¹¹ Ngain ciudad de Troas janha na coaxin na barco co sacjoi na nao ngain nonttehe Samotracia que jí ngosine ndachaon. Co nchanho yoxin sacjoixin na nonttehe Samotracia co joaso na ngain rajna Neápolis. ¹² De nntiha cjoí na ngain ciudad de Filipos. Ciudad mé ná ciudé chojni romano. Co ciudad mé icha importante que vehe lado čhinxin nchanho ngain nonttehe Macedonia. Nntiha vintte na janha na canxion nchanho. ¹³ Ná nchanho que nchejogaha chojni judío janha na vačhjexin na de ngain ciudad mé co sacjoi na ngandehe ndarío tti vačatte chojni judío para vanchecoanxinhi na Dios. Joaso na tavintte na nntiha co nichja na joajné Dios ngain ninčí dixatte nntiha. ¹⁴ Ná de tti nčí mé vinhi Lidia co nčí mé joixin ncha de ngain ciudad de Tiatira. Co jehe ncha vanchecji ncha manta morado anto fino. Co nčí mé anto vanchecoanxinhi ncha Dios inchin chojni judío. Co are janha na nichja na, jehe ncha tajittinhi ncha, co Dios, tti chonda cain joachaxin, cjoenguijna ncha vitticaon ncha tti jindačo Pablo. ¹⁵ Cottimeja joiguitte ncha, jehe ncha conixin nindoha ncha. Cottimeja joinchetsenna na ncha ñaho na co ndačo ncha:

—Si jaha ra ditticaon ra que janha ndoa ditticanho Jesús, tti chonda cain joachaxin, chjin na nchiania sintte ra.

Co jañá joinchetsenna na ncha ñaho na co sacjoinha na ncha.

¹⁶ Ná nchanho are janha na sacjoi na tti nchecoanxinjin na Dios, ngatja nntiha vetan na ná xannčí que vechonda xan ná espíritu jianha. Co espíritu mé vanchenichja xan cosa de quehe tsonhe. Co jañá vagacha xan tsje tomi para ixin ninajni xan. ¹⁷ Xannčí mé coexinhi xan rroehna na xan Pablo co janha na. Co jehe xan jitoyao xan, co ndačo xan:

—Xí tehe xinchehe xé Dios tti ttjen ngajni. Co ndattjo ra xa quexén rrochonda ra iná vida naraa.

¹⁸ Jañá joinchehe xannčí mé tsje nchanho. Mexinxin Pablo coñao co ngaria co ndache espíritu jianha ngaxinhi xan:

—Conixin nombré co joachaxín Jesucristo janha ttetonha dačhjexin de ngain xannčí yá.

Co rato mé espíritu jianha vačhjexin de ngain xan.

¹⁹ Pero are cain xinajni xan vicon xa que ichoha sachaxin xa xan icha tomi, tse xa Pablo co Silas co joicao xa ngain centroe ciudad tti jí xipolicía. ²⁰ Cottimeja joinchechienhe xa ngain xijuez romano co ndačo xa:

—Xí tehe judío, co ncheñao xa chojni ngain ciudád na. ²¹ Jehe xa nchecoehne xa chojni costumbré xa co ján na čhoha sinttoho na ni čhoha sotticaon na ixin ján na romano na.

²² Cottimeja chojni ngain ciudad ningaconhe na na. Co coetonha xijuez ixin vantsjehe na na lontto co goenxin na na nttá. ²³ Co are joexin anto goen na na, xanxinhi na na ngaxinhi cárcel co coetonhe na tti jinda cárcel ixin jian venda. ²⁴ Co are tti jinda cárcel coinhi mé, xanxinhi Pablo co Silas cuarto jí icha ngaxinhi cárcel mé co joaquehe rotté na ngagué yó nttá.

²⁵ Co are inchin ngosine ttie, Pablo co Silas tenchecoanxinhi na Dios co tetsje na himno ngain Dios, co icha chojni teaxinhi coinhi na mé. ²⁶ Co rato mé coingui nontte anto soji hasta contsjenga xo tenganguihi cárcel mé. Co rato mé xiré cainxin puerté cárcel co xindanguehe cainxin cadena tethoaxin tti teaxinhi. ²⁷ Co are mé tti jinda cárcel xingamehe. Co are vicon ixin taji xangué cainxin puerté cárcel, vantsje espadé para rrogoenxin cuerpoe ixin xaxaon que niteaxinhi osacoinga na. ²⁸ Pero Pablo coyaotte co ndache:

—Nahi, jañaha nchehe. Cain janha na te na nttihi.

²⁹ Cottimeja tti jinda cárcel joanchia ná xohi co coinga joixinhi co jixanga ixin joaxaon co cjoí vettoxin nttajochjihi thica rotté Pablo co Silas. ³⁰ Cottimeja joantsje na co joanchianguihi na co ndacho ngain na:

—Soixin ra, ¿quehe chonda que sinttaha para sayá iná vida naroa?

³¹ Co jehe na ndacho na:

—Ditticaon ngain Jesucristo, tti chonda cain joachaxin, co jamé jaha conixin cain nindoí rrochonda ra iná vida naroa.

³² Cottimeja Pablo co Silas ndacho na joajné Jesús Cristo ngain jehe tti jinda cárcel co ngain cain nindoha. ³³ Co are xa ttie, jehe tti jinda cárcel joinche xo enhe tti conihi Pablo co Silas ixin vicaon na. Cottimeja jehe co cain nindoha joiguite na. ³⁴ Co tti jinda cárcel sajoicao na nchiandoha co chjé na joine na. Co jehe conixin nindoha anto ché na ixin vitticaon na Dios.

³⁵ Co are ndoexin xijuez rroanha xa xipolicía ngain tti jinda cárcel ixin rrogantsje Pablo co Silas. ³⁶ Cottimeja tti jinda cárcel ndache Pablo:

—Xijuez coetonna ixin santsje jaha ra. Mexinxin nchao satsji ra. Dio sitaonha ra nttiha.

³⁷ Pero Pablo ndache xipolicía:

—Janha na chojni romano na. Co cjoiha na ngain juzgado para chojni rrondacho ajian o jianha na. Pero masqui jamé, goen na na co tsje chojni tatetsjehe. Cottimeja coiaxinna na na ngaxinhi cárcel. Co jaxon rinao na santsje na na jimao. ¡Jañá nahi! Ndache ra jehe na ixin tsí na jehe na mismo para santsje na na.

³⁸ Xipolicía coequinhi xa cain yá xijuez romano, co xijuez xaon xa are conohe xa ixin Pablo co Silas chojni romano. ³⁹ Cottimeja sacjoi xa ngain Pablo co Silas co joinchetsenhe xa ñao na ixin sinchetjañehe na xa. Cottimeja joantsje na xa de ngain cárcel co joinchetsenhe xa ñao na ixin satsjixin na de ngain ciudad mé. ⁴⁰ Are va chjexin na de ngain cárcel, sacjoi na nchiandoha Lidia. Cottimeja joitsjehe na chojni que vaguitticaon Jesús co joincheanimá na. Cottimeja sacjoi na.

17

Are chojni ngain Tesalónica coñao

¹ Co are sacjoi Pablo co Silas, vatto na ciudad de Anfípólís co ciudad de Apolonía. Cottimeja joihi na ciudad de Tesalónica. Co nttiha vehe ná ningoe chojni judío. ² Vittohe na nttiha Tesalónica ní semana, co cada

nchanho que joinchejogaha na, Pablo cjoí ningoe chojni judío co nichjé nite nttiha, inchin costumbre que chonda Pablo ngain cainxin rajna. ³ Jehe ndache na ixin ngain tti jitaxin Palabré Dios ndačo ixin Cristo chonda que vetan tangui co después que ndavenhe chonda que cjan xechon. Co ndache na:

—Tti Jesús que janha rrindattjo ra, jehe mé tti Cristo.

⁴ Cottimeja canxion chojni judío vitticaon ngain Jesús co vacao na Pablo co Silas. Co cai tsje chojni griego que vaguitticaon Dios inchin chojni judío coexinhi na vitticaon na Jesús. Co cai tsje nčí importante vitticaon ncha Jesús. ⁵ Pero chojni judío que vitticaonha conchjoehe na co joatte na canxion xí que nchehe jianha rridinttecoa ngá nttiha. Co cain nimé joinchequinga na chojni ngain ciudad. Co afuerza joixinhi na nchiandoha Jasón ixin tettjé na Pablo co Silas ixin rrogantsjexin na de nttiha co rrojicao na ngain chojni. ⁶ Pero ixin vittjaha na Pablo co Silas nttiha, mexinxin coinganjincoa na Jasón co icanxin chojni que vaguitticaon Jesús, co joicao na ngain xinchíxin co xipolicia de ciudad mé. Co ndačo na sén:

—Xí tehe ngoixin mundo joinchexenga xa chojni co cai nttihi joí xa.

⁷ Co Jasón vayé xa nchiandoha co cainxin jehe xa ningaconhe xa ley de rey romano ixin ndačo xa que jí iná rey que chonda icha tsje joachaxin que dinhi Jesús.

⁸ Are chojni co autoridad de ngain ciudad mé coinhi na cain yá, anto coñao na. ⁹ Pero Jasón co icha nihermano que tse autoridad joanjo na tomi co mexinxin coančjanda na na.

Are Pablo co Silas vinttecji rajna Berea

¹⁰ Co are naxin xehe ttie mé, chojni que vaguitticaon Jesús chjé na na joajna, co Pablo co Silas sacjoi na para rajna Berea. Co are joiji na nttiha, sacjoi na ningoe chojni judío. ¹¹ Chojni judío que te nttiha icha joinao na coinhi na joajné Dios que nite ciudad Tesalónica. Anto coinhi na joajna mé co cada nchanho vacjé na tti jitaxin Palabré Dios para sicon na andoa tti tendache na na ni nahi. ¹² Co jañá tsje chojni judío vitticaon ngain Jesús co cai ngagué chojni griego tsje nčí importante co tsje xí vitticaon na Jesús. ¹³ Cottimeja are chojni judío que te ciudad de Tesalónica conohe na ixin Pablo jinichja joajné Dios ngain rajna Berea cai, cjoí na nttiha para joincheñao na chojni ngain Pablo co Silas. ¹⁴ Pero chojni que vaguitticaon ngain Jesús toin rroanha na Pablo ngandehe ndachaon. Pero Silas co Timoteo vintteguittohe ngain rajna Berea. ¹⁵ Pablo sacjoi co cai canxion chojni sajoicao hasta tti ngain ciudad de Atenas. Co nttiha are sacjan na Berea, Pablo coetonhe na ixin ndache na Silas co Timoteo toin satsji na ngain Pablo.

Are Pablo cjoí Atenas

¹⁶ Are Pablo jichonhe Silas co Timoteo ngain ciudad de Atenas, jehe čjjoinha conohe ixin vicon nttiha anto tsje retratoe ídolo. ¹⁷ Mexinxin cjoí ngain ningoe chojni judío para nichjé jehe na conixin icha nivaguitticaon Dios inchin chojni judío. Co cai cada nchanho nichja ngain nivaguetan ngain ndásin. ¹⁸ Cottimeja canxion chojni coexinhi na nichja na ngain Pablo. Canxion chojni mé vacangui na tti řaxaon canxion xí vinhi epicúreos, co icanxin na vacangui na tti řaxaon canxion xí vinhi estoicos. Canxion de jehe na ndačo na:

—¿Quehe jindačo xí yá que anto nichja xa?

Co icanxin na ndačo na:

—Jehe rinao sinchecoenhe chojni de ixin icanxin dios.

Jańá ndačo na ixin Pablo jinichjé na tti jian joajna de ixin Jesús co ndache na ixin cain chojni nchao rroxechon. ¹⁹ Cottimeja savicao na Pablo ngain ná jna vinhi Areópago, tti vařatte autoridad de ngain ciudad mé. Co nttiha jehe na ndačo na:

—Rinaho na tsonona na tti jaha rrinchecoenhe chojni. ²⁰ Ixin tti rrinichja ojé para ixin janha na. Co rinaho na tsonona na quehe rročo cain yá.

²¹ Jańá ndačo na ixin cainxin chojni que te ngain Atenas co cai chojni que joixin cjin que te na nttiha, cain nimé anto vancheřoxinhi na vaquinh na co vanichja na de ixin quexeho joajna naroaxin.

²² Cottimeja Pablo vingattjen ngagué chojni mé nttiha Areópago co ndačo:

—Janha vicon ixin jaha ra řo te ra nttihi Atenas anto nchesayehe ra tsje dios. ²³ Ixin are janha ngaria ngagaha rajná ra tsjá quecá tti nchesayexin ra dios. Are mé vittja ná tti dinchetsonji ra co nttiha jitaxin: “Jihi para ixin dios que chonxinha na.” Co jaxon janha rrinichja nganji ra de ixin Dios mé que jaha ra nchecoanxinhi ra masqui chonxinha ra.

²⁴ “Tti Dios que joinchekhjian mundo co cainxin cosa que jí, jehe tti chonda cain joachaxin ngajni co nttihi ngataha nontte. Jehe dittoeha ngaxinhi nihngo que chojni nchekhjian. ²⁵ Co jehe rrogondeha tti nchekhjian chojni para ixin jehe ixin jehe mismo tti chjá na vidá na co řhinto co cainxin tti dondá na cainxin na.

²⁶ Cainxin chojni que jí ngataha nontte joixin de tti nacoa chojni que joinchekhjian Dios are saho. Co Dios coetonhe na ixin sintte na ngoixin ngataha nontte, co jehe coetonha quesa co quettinó sintte na. ²⁷ Jamé joinchehe Dios ixin rinao que chojni tsjé na jehe co sitticaon na jehe ixin jehe cjinha jí de nganji naná ján na. ²⁸ Ixin jí Dios, mexinxin techonxin na, tettingui na co nttoho na cain. Cai inchin coentaxin canxion tattita que dicjin řón nttihi nontteha ra are osé, co dicjin na jańá: “Ján na chojni Dios na.” ²⁹ Mexinxin ixin ndoa que ján na chojni Dios na, řaxaonha na ixin Dios inchin ná cosa de oro ni de plata ni de řo que chojni joinchekhjian conixin rá inchin řaxaon na. ³⁰ Dios chjeha castigo ixin tti jianha que vanchehe chojni anto osé, ixin chojni mé vechonxinha jehe. Pero jaí Dios ttetoan na cainxin na ngoixin mundo ixin tsentoxinhi na vidá na ³¹ ixin Dios ocoinchiehe ná nchanho are jehe sinchejuzguehe cainxin chojni ngoixin mundo. Co Dios coinchiehe ná xí para juez. Co jehe Dios cjoago ixin jahi seguro are joinchexechon xí mé.

³² Are coinhi na ixin jí ná chojni que oxechon, canxion na cjoanoa na co icanxin na ndačo na:

—Otsian na icha are jaha rronichja iná.

³³ Cottimeja Pablo cointtohe na co sacjoi. ³⁴ Pero canxion chojni vitticaon na ngain Jesús co savicao na Pablo. Ngagué chojni mé vehe ná xí vinhi Dionisio. Co xí mé vehe xa ná juez nttiha Areópago. Co cai ngagué chojni que vitticaon ngain Jesús vehe ná nanita vinhi Dámaris co icha chojni.

¹ Cottimeja Pablo vačhjexin de ciudad de Atenas co sacjoi ngain ciudad de Corinto. ² Co nttiha vetan ná judío que vinhi Aquila. Xí mé goanxin xa nonttehe Ponto. Nchion icha saho Aquila co čihi que vinhi Priscila joixin na nonttehe Italia ixin tiempo mé Claudio vehe emperador nttiha Roma, capitál de nonttehe Italia, co coetonha ixin cainxin chojni judío chonda que sačhjexin na de Roma. Cottimeja Pablo cjoi joitsjehe na ngain ciudad de Corinto. ³ Pablo joinohe xajeho xa que jehe na, ixin canio na joinohe na vanchechjian na nchia de ixin manta. Mexinxin Pablo vittohe ngain na para ixin sinchehe na xa mé. ⁴ Co cada nchanho que nchejogaha chojni judío, Pablo sacjoi ngain ningoe na co nttiha nichja de ixin Dios co cjoao chojni judío conixin chojni que jeha judío para que vitticaon na ngain Jesucristo.

⁵ Co are Silas co Timoteo joixin na nonttehe Macedonia, Pablo ijoinchechjianha nchia de ixin manta, sino que nichja tti jian joajna nchanho co nchanho, co joinchecoenhe chojni judío ixin Jesús ndoa tti Cristo que jehe na techonhe na. ⁶ Pero chojni mé ningaconhe na co nichja na jianha de ixin jehe Pablo. Mexinxin Pablo contsenga lonttoe para ixin cain jinche cointtji nche ngataha nontte inchin ná señal que jehe satsji, co ndache na:

—Are ndasenhe ra sinchetján ra co jaho ra setsingataha ra co janha idancataha ni ra. Jaxon satsji janha para ixin rronichja tti jian joajna ngain chojni que jeha judío.

⁷ Cottimeja vačhjexin ningoe chojni judío co sacjoi nchiandoha ná xí vinhi Justo. Xí mé jeha ná judío, pero vaguitticaon xa Dios inchin chojni judío. Co nchiandoha xí mé vehe nchia čhica ningoe chojni judío. ⁸ Co ná xí vinhi Crispo vaquetonha ngain nihngo mé. Co jehe xa conixin cainxin nindoha xa vaguitticaon na ngain Jesús, tti chonda cain joachaxin. Co cai anto tsje chojni nttiha ngain ciudad de Corinto coinhi na joajné Dios co vitticaon na ngain Jesús co joiguitte na. ⁹ Cottimeja ná ttie Pablo vicononxinhi Jesús. Co jehe ndache Pablo:

—Xaonha, sino que nchehe sigue ndache chojni joajnana, co tencoaha ¹⁰ ixin janha rrihi nganji para ixin ttjenguijna co xonhi chojni nchao sinttaniha jaha. Mexinxin xaonha ixin tsje chojni ngain ciudad jihi, mé chojnina janha.

¹¹ Mexinxin Pablo vittohe ná nano co rioho nttiha Corinto para cjoagoe na joajné Dios.

¹² Pero are Galión vehe xigobernador ngain nonttehe Acaya, chojni judío xatte na para ixin tse na Pablo. Co joicao na ngain juzgado, ¹³ co ndache na xigobernador:

—Xí jihi jittingaria jitjagoe chojni ixin ojé sinchecoanxinhi na Dios co jeha inchin jitaxin ley que janha na chonda na.

¹⁴ Co Pablo rrojinichja are Galión ndache chojni judío:

—Si xí jihi rrojinchehe xa jianha inchin rrocacoa xa cosé na o rrogoen xa chojni, janha rroquian tti tendačo ra, jaha ra xo judío ra. ¹⁵ Pero jeha jamé. Jaha ra toňao ra jeha ixin jehe xa ojé jitjagoe xa chojni quehe jitaxin ngain leya jaha ra. Janché jaho ra tjao chó ra de ixin cosa jihi ixin janha rinaoha rroxanttexin rana.

¹⁶ Co jehe vantsjexin na de nttiha. ¹⁷ Cottimeja chojni Galión tse na Sóstenes, tti vaquetonha ngain ningoe chojni judío. Co vintja na jehe

Sóstenes nttiha ngattoxon con xigobernador. Pero masqui Galión vicon cain yá, jehe xonhi joinchehe ixin cosa mé ndosenha jehe.

Are Pablo cjan Antioquía co coexinhi nttiha ninxin para joinichja joajné Dios icanxin rajna

¹⁸ Pablo xa vittohe tsje nchanho nttiha Corinto. Cottimeja jehe chjé joajna chojni que vaguitticaon Jesús ixin satsji jehe conixin Aquila co Priscila. Co are joiiji na rajna Cencrea, Pablo cjinhi já inchin ná señal que jehe ojoinchecumplí ná promesa ngain Dios. Cottimeja canio na cjoí na coá na ná barco ixin satsji na ngain nonttehe Siria. ¹⁹ Are joiiji na ciudad de Efeso, Pablo cointtohe Priscila co sacjoi ngain ningoe chojni judío co cjoao chó chojni judío que vaʒatte nttiha. ²⁰ Co joinchetsenhe na ñao Pablo ixin rroguittohe icha sé nttiha, pero jehe čhoaha. ²¹ Cottimeja chjé na joajna co ndačo:

—Chonda que sarihi ngain ciudad de Jerusalén are tsexinhi quiai que jitonchiaon. Pero si Dios rinao, rrocjan na janha sihi iná sitsjaha ra.

Cottimeja coá barco co sacjoixin de ngain Efeso. ²² Co are joiiji ciudad de Cesarea Pablo vaniaxin de barco co sacjoi ngain ciudad de Jerusalén para ixin chjé joajna ngain chojni que vaguitticaon Jesús nttiha. Cottimeja sacjoi ngain ciudad de Antioquía. ²³ Co vittohe canxion nchanho nttiha Antioquía. Cottimeja sacjoi iná co ngaria cainxin rajna ngain nonttehe Galacia co nonttehe Frigia co nttiha joincheanimá cainxin chojni que vaguitticaon Jesús.

Are Apolos vanichja de ixin Dios ngain Efeso

²⁴ Co are mé joiiji ná xí judío ngain ciudad de Efeso, co xí mé vinhi xa Apolos co jehe xa diquixin xa de ciudad de Alejandría. Jehe xa anto jian nichja xa de ixin Dios co anto nohe xa tti jitaxin Palabré Dios. ²⁵ Jehe xa ochonxin xa tsje de ixin quexén Jesucristo, tti chonda cain joachaxin, rinao sinchehe chojni. Co jehe xa anto vaché xa ixin vanichja xa de ixin Jesús, co jian vancheoenhe xa chojni de ixin Jesús. Pero jehe xa jehó vechonxin xa de tti vancheguite Juan chojni. ²⁶ Co jehe Apolos xaonha co anto nichja ngain ningoe chojni judío. Co are coinhi Priscila co Aquila tti ndačo Apolos, joicaon na ngain nchiandoha na co joincheoenhe na icha jian de ixin quexén Dios rinao sinchehe chojni. ²⁷ Cottimeja are Apolos ndačo ixin satto ngain nonttehe Acaya, chojni que vaguitticaon Jesús nttiha Efeso cjoenguijna jehe ixin rroanha na ná carta ngain chojni que vaguitticaon Jesús nttiha Acaya ixin sayé na jian. Co are Apolos joiiji ngain nonttehe Acaya, anto cjoenguijna tsje chojni que Dios chjé joachaxin ixin vitticaon na Jesús. ²⁸ Apolos co chojni judío anto cjoao chó na co Apolos cjoagoe cainxin chojni ixin tti vaʒaxaon chojni judío nchaoha jí, co tti vandačo Apolos jehe na čhoaha vandačo na ixin nchaoha jí cai porque jehe vacjagoe na conixin tti jitaxin Palabré Dios ixin Jesús ndoa tti Cristo, tti Dios coinchiehe co tti jehe na techonhe na.

19

Are Pablo ngain Efeso

¹ Are Apolos xa vehe ngain ciudad de Corinto, Pablo vatto ngain cainxin rajna que vintte ngagaha jna. Co jañaxon hasta joiiji ngain ciudad de Efeso, tti vetan canxion chojni que vaguitticaon Jesús. ² Co joanchianguihi na co ndačo ngain na:

—¿Ajoí Espíritu Santo nganji ra conixin joachaxin are vitticaon ra?

Co jehe na joattehe na:

—Janha na xonhi tiempo ttian na ixin jí Espíritu Santo.

³ Cottimeja Pablo joanchianguihi na:

—Mexinxin ¿quexén joiguitte ra?

Jehe na joattehe na:

—Inchin Juan ndačo para joiguitte na.

⁴ Pablo ndache na:

—Ndoa, Juan joincheguitte chojni que coentoxinhi vidé. Pero cai jehe ndache chojni ixin chonda na que sitticaon na ná tti tsí después de jehe. Co jehe mé ojoí, co jehe mé Jesús tti Cristo.

⁵ Co are coinhi na jamé, cain na joiguitte na para goan na chojni Jesús, tti chonda cain joachaxin. ⁶ Co are Pablo joaquehe rá ngataha já na, Espíritu Santo joí ngain na conixin joachaxin co jehe na coexinhi na nichja na ojejé nguigoa co nichja na joajna que vayé na de ngain Dios.

⁷ Co cain nivitticaon inchin tteyó xí.

⁸ Pablo vittohe nttiha ciudad de Efeso ní conittjao co vacji ningoe chojni judío tsje nttiha. Nttiha vanichja ngain chojni conixin confianza, co cjoao na para cjoagoe na de ixin quexén Dios ttetonha. ⁹ Pero canxion chojni joiha na vitticaon na tti ndačo Pablo. Co nimé johu nichja na jianha de ixin tti jian joajné Jesucristo ngatte con icha chojni. Cottimeja Pablo vačhjendehe jehe na co savicao chojni que vaguitticaon Jesús ngain ná escuelé ná ximaestro vinhi Tiranno. Co nttiha vanichja cainxin nchanho. ¹⁰ Co jañá vanchehe ngoixin yó nano. Mexinxin cainxin chojni que vintte ngain nonttehe Asia coinhi na joajné Jesús, tti chonda cain joachaxin. Chojni judío co cai chojni que jeha judío coinhi na mé. ¹¹ Co Dios joanjo joachaxin ngain Pablo para ixin jehe joinchehe tsje milagro. ¹² Anto tsje joachaxin joanjo Dios hasta chojni joiha mantachjan co joiha lonto que joincheguindatte na cuerpoe Pablo. Co are vajicao na cosa mé ngain chojni tenihi, chojni mé vaxingamehe na co tti espíritu jianha vagačhjexin de ngaxinhi na.

¹³ Pero vehe cai canxion chojni judío que vangaria co vagantsje espíritu jianha de ngain chojni. Co chojni mé joiha rrojinchegonda na nombré co joachaxin Jesús, tti chonda cain joachaxin, para ixin rrogantsjexin na espíritu jianha de ngain chojni. Co ndache na espíritu mé:

—Conixin nombré Jesús, tti nombre que Pablo nichja, janha na tte-tonha ra ixin dačhjexin ra de ngain chojni.

¹⁴ Jañá joinchehe tti yáto xenhe ná chojni judío vinhi Esceva. Co jehe xí mé vehe xa ná xidána que vaquetonha ngain icha xidána. ¹⁵ Pero are ndačo xan yá, tti espíritu jianha joattehe xan:

—Janha nona quensen Jesús co nona quensen Pablo, pero jaha ra, ¿quensen jaha ra?

¹⁶ Cottimeja tti xí que vechonda espíritu jianha čhinca xatja jehe nimé co anto cjoaya xa ngain na hasta que jehe na ttolocho na co conihi na sacingaxin na de nchia mé. ¹⁷ Cainxin chojni que vintte ngain ciudad de Efeso, chojni judío co cai chojni que jeha judío conohe na cain mé co anto xao na, co ndačo na anto tsje cosa jian de ixin Jesús, tti chonda cain joachaxin.

¹⁸ Cai tsje chojni que vaguitticaon ngain Jesús xatte na co ndačo na ngattoxon con icha chojni cosa jianha que joinchehe na icha saho. ¹⁹ Co

tsje chojni ttoso joiaho xón de ixin joattosohe co xón mé cjoaga na xon co tatetsjehe cainxin chojni. Co are coequin na quejanhi rroguitte cain xón mé, vittja inchin cincuenta mil tomi de plata. ²⁰ Jañá icha co icha chojni vitticaon na joajné Jesucristo co vicon na ixin joajna mé chonda tsje joachaxin.

²¹ Cottimeja Pablo xaxaon satsji ngain tsje rajna nonttehe Macedonia co nonttehe Acaya. Cottimeja satsji ngain ciudad de Jerusalén. Co cai ndačo ixin are satsjixin de ngain Jerusalén cai chonda que satsji ngain ciudad de Roma. ²² Cottimeja Timoteo co Erasto, tti yó xí que vacjenguijna, rroanha na para ngain nonttehe Macedonia. Co jehe Pablo xa vittohe sexin ngain nonttehe Asia.

Are ngain ciudad de Efeso chojni coñao na

²³ Are mé tsje chojni coñao ixin tti jian joajné Jesucristo que vanichja Pablo. ²⁴ Ná xí vinhi Demetrio joincheño cain chojni mé. Xí mé vanchechjian xa tsje figurachjenhe nihngo conixin plata, xá ningoe ná ídolo vinhi Diana. Co chojni que vanchehe xé xa vagacha na tsje tomi. ²⁵ Co jehe xa vayé xa nivanchehe xé xa conixin icha chojni que vanchehe xajeho xa co ndache xa na:

—Jaha ra noha ra que conixin xa que nttoho na tedacha na tsje tomi, mexinxin chonda na jian vidá na. ²⁶ Co jaha ra coinhi ra co vicon ra quexén Pablo ngaria co ndačo ixin cain dios que vanchechjian chojni jeha Dios ndoa. Co jañá joincheguitticaon tsje chojni, co jeoha nttihi Efeso, cai merocoa ngoixin nonttehe Asia te chojni que ditticaon tti ndačo jehe. ²⁷ Co nchaoha jí para ixin ján na ixin puede irrochondaha na xa. Co cai puede chojni irronichjaha na de ixin ningoe dios Diana co isinchesayeha na dios mé masqui jai cainxin chojni ngain nonttehe Asia co cainxin chojni ngoixin mundo anto nchesayehe na dios Diana.

²⁸ Co are cain chojni coinhi mé, anto coñao na co ndačo na sén:

—¡Anto jian dios Diana ngain ciudad de Efeso!

²⁹ Cottimeja ngain ciudad mé cain chojni anto coñao na. Co chinca na xatja na Gayo co Aristarco, tti yó xí que Pablo joiaoxin de nonttehe Macedonia. Co coinganji na xa hasta tti jí nchia tjaoxin chó na. ³⁰ Pablo joinao rrojixinhi nttiha para ixin rrojinichjé chojni mé pero chojni que vaguitticaon Jesús coanchjandaha na. ³¹ Cai canxion chojni que vaquetonha ngain nonttehe Asia niamigoe Pablo co nimé rroenhe na joajna ixin sixinttexinha nttiha. ³² Nttiha tti xatte na, jeje coyaotte chó na ixin cain na coñao na co merocoa cain chojni noeha na quedonda xatte na nttiha. ³³ Cottimeja canxion tti tengagué nttiha ndache ná xí vinhi Alejandro ixin quehe xattexin na nttiha, co jehe mé tti chojni judío vantsjeyexin na de ngagué na co joaquehe na xa ngatto con icha chojni. Alejandro conixin rá joinchehe seña ixin chojni rrotencoia na ixin rinao rronichja de ixin chojni judío para que icha chojni tsoñaoha ngain na. ³⁴ Pero are chojni conohe ixin jehe ná judío, cainxin na coyaotte na inchin yó hora co ndačo na:

—¡Viva Diana de ngain ciudad de Efeso!

³⁵ Cottimeja are xisecretarioe ciudad mé onchao joinchetencoia xa chojni, jehe xa ndačo xa:

—Jaha ra de ciudad de Efeso, cainxin chojni ngoixin mundo nohe na ixin ján na nttihi Efeso tenda na ningoe dios Diana que chonda tsje

joachaxin co ixin tenda na retratoe que xincanjinxin de ngajni. ³⁶ Co xonhi chojni nchao ndačo ixin jiji ndoaha; mexinxin tencoa ra, co xaxaon ra jian saho que sinchehe ra ná cosa. ³⁷ Xijoicó ra tehe xonhi vantsje xa de ngain ningoa na co ni nichjaha xa jianha de ixin dioa na. ³⁸ Si Demetrio co ninchehe xé chonda na čoan tti sičo na jie, jí xijuez; co cainxin nchanho te xa ngain juzgadoe xa. Mexinxin jehe na nchao satsji na ngain xijuez de ciudad jiji. Co nttiha cada chojni nchao rronichja tti joinchehe co tti joincheha. ³⁹ Co si jaha ra ojé rinao ra, nchao satse ra chojni co tsjaoxin ra, pero jian inchin ley ttetonha. ⁴⁰ Ixin puede čoan chojni sinttacaxin na arinao na tsetocoho na gobierno romano, co ¿quehe rrondačo na si čoan chojni sanchianguia na ixin quedonda anto coñao na?

⁴¹ Co are joexin nichja xa cain yá, coetonhe xa chojni ixin satsji na.

20

Are Pablo cjoí Macedonia co Grecia

¹ Co are chojni que coñao ojoexin chjequé na, Pablo joatsetaonhe cain chojni que vaguitticaon Jesús co joincheanimá na. Cottimeja chjé chó na joajna co Pablo sacjoi nonttehe Macedonia. ² Ngain cain rajna que cjoí, joitsjehe cain chojni que vaguitticaon Jesús nttiha co joincheanimá na conixin tti ndache na. Cottimeja joií nonttehe Grecia. ³ Nttiha vittohe ní conittjao, co are jehe rroca barco ixin sarrocji ngain nonttehe Siria, conohe ixin chojni judío joinao na narrogoenxon na. Mexinxin cjoixinha nataon jinda sino sacjan vatto ngain nonttehe Macedonia iná. ⁴ Co tsje xí sacjoi xa conixin Pablo. Ná vinhi Sópater que joixin xa rajna Berea; iná vinhi Aristarco, co iná vinhi Segundo, cayoi xí mé joixin ciudad de Tesalónica; co iná vinhi Gayo que joixin xa rajna Derbe; co iná xí vinhi Timoteo; co iyó xí vinhi Tíquico co Trófimo, co mé joixin xa nonttehe Asia. ⁵ Cainxin xí mé vitaon xa nttiha co chonhe xa ixin janha na saso na nttiha ciudad de Troas. ⁶ Co are joexin quíai are jine ní niottja que chondaha levadura, cottimeja janha na coá na barco co vačhjexin na de ngain ciudad de Filipos. Co are nchanho naonxin joiguetanxin na cain xí mé ngain ciudad de Troas. Co nttiha vittona na yáto nchanho.

Are Pablo ngain Troas

⁷ Co saho nchanho de semana janha na xatte na para ixin joine na tti niottja que dinhi Santa Cena. Co Pablo joinchecoene chojni que vaguitticaon Jesús. Co jehe Pablo nichja hasta ngosine ttie ixin jehe chonda que sarrocji nchanho yoxin. ⁸ Janha na otate na ngain ná cuarto piso ninxin. Co nttiha anto tsje xoi candil tedacaon. ⁹ Co nttiha ná xanxí vinhi Eutico tají xan ngain ventana. Pero ixin Pablo anto sé nichja, mexinxin xanxí mé anto chjé xan cottačhin co tavejoa xan; cottimeja ndaditse xan cottačhin co vetsinga xan de ngain ventana de ngain piso ninxin de nchia mé para ndoja. Co are jehe na joatsín na xan, ondadiquenhe xan. ¹⁰ Cottimeja Pablo vania co vettoxin nntajochjihi co cjóa xan co ndačo ngain chojni que vaguitticaon Jesús:

—Xaonha ra, ixin jichon xan.

¹¹ Cottimeja Pablo sacjan ngaxinhi cuarto noi iná co joine tti niottja que dinhi Santa Cena co joinecaho chojni nttiha. Cottimeja jehe nichja icha hasta vingasán, cottimeja sacjoi. ¹² Co xanxí mé cjan xan xingamehe xan

de ndadiguenhe xan co savicao na xan nchiandoha xan co cain na anto ché na.

Are sacjoxin na de Troas co sacjoi na Mileto

¹³ Pablo ndačo ixin jehe rotteo satsjixin hasta tti ngain rajna Asón. Mexinxin janha na coá na ná barco co vitaon na nttiha hasta tti ngain rajna Asón. Nttiha sirroataonxin na Pablo inchin cjoao na. ¹⁴ Co are janha na vetan na Pablo nttiha Asón, coaninxin barco conixin janha na co sacjoi na ngain rajna Mitilene. ¹⁵ Janha na vačhjexin na de nttiha co nchanho yoxin joaso na ngain nontte ngosine ndachaon dinhi Quío. Co nchanho ninxin joaso na ngain iná nontte ngosine ndachaon dinhi Samos, co jointtajogaha na ngain rajna Trogilio. Co ndoexin joaso na ngain ciudad de Mileto. ¹⁶ Jaña conhe ixin Pablo joinaoha cončhenhe sé ngain nonttehe Asia ni joinaoha cjoi ciudad de Efeso ixin jehe joinao toin rroguiji ciudad de Jerusalén ixin joinao vehe nttiha are nchanho quiai que dinhi Pentecostés, si nchao.

Tti nichja Pablo ngain nivaquetonhe chojni que vaguitticaon Jesús ngain Efeso

¹⁷ Are vehe Pablo ngain ciudad de Mileto, rroanha joajna ngain xí que vaquetonhe chojni que vaguitticaon Jesús ngain ciudad de Efeso para ixin tsonchienne na ngain. ¹⁸ Co are jói na ndache na:

—Jaha ra noha ra quexén vanttaha janha desde saho nchanho que joihi nttihi nonttehe Asia co hasta jai. ¹⁹ Cainxin nchanho janha joarihi nganji ra jointtaha tti coetonna Jesús, tti chonda cain joachaxin, co janha xonhi tiempo conona orgulloso. Co jí nttiha tsjanga janha de ixin jaha ra. Co cai anto vetan tangui ixin tti joinchehe chojni judío nganji na janha. ²⁰ Pero janha cointtoaha de vanichja nganji jaha ra cain tti nchao cjoenguijna jaha ra. Co jointtacoanha ra ngain lugar tti te tsje chojni co cai ngain nchiandoi ra. ²¹ Janha coetoan chojni judío co chojni que jeha judío ixin chonda que tsentoxinhi na vidé na inchin Dios rinao co sitticaon na ngain Jesucristo, tti chonda cain joachaxin para ixin ján na. ²² Co jaxon janha satsji ciudad de Jerusalén ixin Espíritu Santo coetonna, masqui nonaha quehe tsonna nttiha. ²³ Jeho nona que ngain cainxin ciudad tti janha cjoi Espíritu Santo ndachjenji na ixin anto tangui tsonna co cai ixin siaxinna ngain cárcel. ²⁴ Pero janha xaonha na de ixin tti ndachjenji na Espíritu Santo co xaonha na masqui ndaserhe na. Jeho rinaho tsjexin xa que Jesús, tti chonda cain joachaxin, chjana. xa mé xa de rronichja tti jian joajna que ndačo ixin Dios anto rinao cain chojni.

²⁵ Are osé janha vanichja nganji ra ixin quexén Dios ttetonna. Co jai nona ixin ni ná de jaha ra rrocjan sicon ni ra janha iná. ²⁶ Mexinxin jai rinaho rrondattjo ra que si čhonja chojni ditticaonha, jeho setsingataha co janha idancataha na jehe. ²⁷ Ixin janha ondattjo ra de ixin cainxin tti rinao Dios que sinchehe ra, co janha xonhi tjañana de ndattjo ra. ²⁸ Mexinxin ttjiho ra cuidado jaha ra co cai dinttenda ra cainxin chojni que ditticaon Jesús ixin Espíritu Santo chjá ra xa jihi de dinttenda ra cain chojni que ditticaon Jesús, ixin Jesús, tti chonda cain joachaxin, ndavenhe para ixin cain ján na are jói jní jehe. ²⁹ Co janha nona ixin are janha satsji, tsí ojé chojni co jehe na sinao na sinttayaha ra na ixin isitticaonha ra Jesús co nimé inchin colobo čhinto are tse va coleco co jine va va. ³⁰ Co cai ngayaha ra jaha ra mismo sačhe tti nirronichja

ndoaha, co jamé canxion chojni que ditticaon Jesús sitticaon na tti rrondačo jehe na. ³¹ Mexinxin ttjiho ra cuidado co řaxaon ra que janha ngoixin ní nano nchanho co ttie jointtacoanha ra hasta tsjanga janha por ixin jaha ra.

³² Jaxon danchia Dios ixin jehe senda ra co ixin sitticaon ra tti joajna que ndačo ixin Dios anto rinao cain ra, co joajna mé chonda joachaxin de sinttaguitticaon ra jian que jaha ra cai tequininxin ra ngain Dios. ³³ Co janha řonhi tiempo joinaho ná cosé chojni ni lontto ni tomi. ³⁴ Jaha ra jian noha ra que janha vanttaha řa para ixin joarichonda cain tti vagondana co cai tti vagondehe nivacjinha. ³⁵ Co jańá janha cjoagoha ra ixin icha jian nchehe ni řa co ttjenguijna ni ninoa. Co řaxaon ra tti ndačo Jesús, tti chonda cain joachaxin, are ndačo: “Icha řhjoin tonohé ansén chojni que danjo que tti tonohé ansén chojni que dayé.”

³⁶ Co are Pablo joexin nichja cain yá, vettoxin nttajochjihi jehe co cainxin chojni co joinchecoanxinhi Dios. ³⁷ Cainxin na tsjanga na are cjóa na co coetoxin na Pablo. ³⁸ Co anto vinttechín na ixin Pablo ndačo ngain na ixin irrocjanha na sicon na. Cottimeja joicanxin na hasta tti jí barco.

21

Are Pablo sacjoi Jerusalén

¹ Are janha na cointtoa na chojni que vaguitticaon Jesús, coá na ná barco co sacjoi na nao ngain nontte ngosine ndachaon dinhi Cos. Co nchanho yoxin joaso na ngain nontte ngosine ndachaon dinhi Rodas co de nttiha sacjoi na ngain rajna Pátara. ² Co nttiha rajna Pátara janha na vittja na ná barco sajittji ngain nonttehe Fenicia, mexinxin coá na barco mé co sacjoi na. ³ Co vicon na nontte ngosine ndachaon dinhi Chipre co nontte mé vittohe lado cjon na co jańá sacjoi na hasta nonttehe Siria. Co nttiha ciudad de Tiro barco chonda que cointtohe barco carga joiaho barco, co mexinxin nttiha janha na vania na. ⁴ Ngain ciudad mé janha na vetan na chojni que vaguitticaon Jesús co nttiha vittona na ngain na ná semana. Co jehe na ndache na Pablo ixin icha jian tsjiha ngain ciudad de Jerusalén. Jańá ndache na ixin Espíritu Santo joinchenohe na quehe tsonhe Pablo nttiha Jerusalén. ⁵ Pero are joexin semana mé, janha na sacjoi na. Cainxin nivaguitticaon Jesús, níxí co řihi na co xenhe na, cain ní mé joicanxin na na hasta tti ngandehe ciudad mé, co nttiha nganda ndachaon janha na joarittoxin na nttajochjihna na co jointtacoanxian na Dios. ⁶ Cottimeja chjaha na na joajna co cjóa na na co coá na barco co jehe na sacjan na nchiandoha na.

⁷ Co jańá sacjoixin na ciudad de Tiro co joaso na ciudad de Tolemaida. Co nttiha vaniixin na barco. Co ngain ciudad mé janha na vetan na nivaguitticaon Jesús co vittona na ná nchanho ngain na. ⁸ Co nchanho yoxin cain na janha na sacjoixin na de ngain ciudad de Tolemaida co joaso na ngain ciudad de Cesarea. Nttiha cjoí na nchiandoha ná xí vinhi Felipe. Xí mé joindache tsje chojni tti jian joajné Jesucristo, co jehe xí mé vehe ná de tti yáto xí que vacjenguijna co vachjé tti sine chojni que vaguitticaon Jesús ngain ciudad de Jerusalén. Co janha na vittona na ngain xí mé. ⁹ Co Felipe vechonda nó xenhe xannčí que řa vinttecaoha xan xí. Co xannčí mé vanichja xan joajna que vagayé xan de ngain Dios. ¹⁰ Are janha na vintte na nttiha canxion nchanho, joiji ná xí que

vanichja xa joajna que vagayé xa de ngain Dios. Xí mé joixin xa nonttehe Judea co vinhi xa Agabo. ¹¹ Co xí mé joí xa joitsjena na xa. Co are jehe xa nttiha nganji na, coá xa cinturoen Pablo co coiattexin xa rotté xa co rá xa conixin cinturón mé co ndačo xa ngain Pablo:

—Espíritu Santo ndačo ixin ngain ciudad de Jerusalén chojni judío tsiatte na jaha janhi inchin janha coiatte rana co rotna co jañá sintachianha na ngain chojni que jeha judío.

¹² Are coian na jiji, janha na co chojni de ngain ciudad de Cesarea jointtatsán na ñao Pablo ixin tsjiha Jerusalén. ¹³ Pero Pablo joattehe:

—¿Quedonda nchehe ra ixin janha sarichinhi? ¿Co quedonda tsjanga ra? Janha rrihi dispuesto de jeoha tsiatte na na sino que cai rrihi dispuesto de ndasenne na ngain Jerusalén para ixin causexin Jesús, tti chonda cain joachaxin.

¹⁴ Pero masqui janha na nichjá na sé, jehe čhohe vitticaon tti ndattjan na. Mexinxin ixonhi icha ndattjan na, jeha ndačhjan na:

—Que tsonhe inchin Jesús, tti chonda cain joachaxin, rinao.

¹⁵ Co are joexin cain jiji, janha na coengachjian na tti cjoinha na co sacjoi na ngain Jerusalén. ¹⁶ Canxion chojni que vaguitticaon Jesús que joixin na de ngain ciudad de Cesarea sacjoinha na na co ngayé cain chojni mé vehe ná xí vinhi Mnasón. Xí mé joixin xa nontte ngosine ndachaon dinhi Chipre, co osé jehe xa vaguitticaon xa Jesús. Co janha na vittona na ngain nchiandoha xí mé canxion nchanho.

Pablo joitsjehe Jacobo

¹⁷ Are joaso na ciudad de Jerusalén, chojni que vaguitticaon Jesús nttiha anto ché na co jian vayahna na na. ¹⁸ Nchanho yoxin Pablo co janha na sacjoi na joitsjá na Jacobo co nttiha cai vintte cainxin xí que vaquetonhe chojni que vaguitticaon Jesús. ¹⁹ Pablo chjé na joajna, cottimeja coequinhi na cainxin tti joinchehe jehe de ixin joachaxin Dios ngain chojni que jeha judío. ²⁰ Are jehe na coinhi na yá, joinchesayehe na Dios. Cottimeja ndache na Pablo:

—Nchao jí hermano; pero jaha noha ixin jí tsje mil chojni judío que oditticaon Jesús. Co cain nimé anto rinao sitticaon na cain tti coetonha ley que vayé Moisés. ²¹ Co jehe nimé coinhi na ixin jaha nchecoene cainxin chojni judío que te ngain rajné chojni que jeha judío ixin sitticaonha na tti coetonha Moisés. Co coinhi na cai ixin jaha nchecoene na ixin icha jian rrochjeha na xenhe na xöhe que dinhi circuncisión co sincheha na inchin ndačo costumbrea na. ²² ¿Quehe sinttaha na reme? Nona na ixin chojni judío que ditticaon Jesús rroxatte na are tsinhi na ixin jaha ojoihi. ²³ Mexinxin xaxanho na icha jian si jaha sinchehe inchin rronattjo ra. Jí nó xí ngaguehna na que sinchecumplí ná promesa para ixin Dios. ²⁴ Tsjiho xí mé. Co sinchehe inchin jehe xa are sinchehe xa cain tti ndačo chojni judío ixin sintte xa jian para ixin Dios. Co chjehe xa tomi para ixin tsenanxin xa cain tti sanjo xa ngain Dios. Cottimeja jehe xa nchao rrocjinhi xa xajá xa. Jañá cainxin chojni rrochonxin que cain tti ndačo na de ixin jaha ndoaha. Co sicon na ixin cai jaha ditticaon cainxin ley que vayé Moisés. ²⁵ Pero de ixin chojni que jeha judío, icha saho janha na rroanha na joajna ngain chojni mé co ndattjan na na ixin chonda que sineha na tti joaquehe na tti nchesayexin na ídolo, co sineha na jni, co sineha na nntaohé coxigo diguisinguehe na ttosin. Co cai que sinttejoacaoha na nchí que jeha nchichihhi na o xí que jeha xixihi na.

Are tse na Pablo ngain nihngo icha importante

²⁶ Cottimeja Pablo sajoicao tti nó xí co nchanho yoxin joinchehe inchin joinchehe xa para ixin vintte xa jian para ixin Dios. Cottimeja Pablo joixinhi nihngo icha importante para ndache na xidána quesa jehe co tti nó xí tsjehe na sinchehe na jamé, rrocho quesa nchao soen na coxigo que sanjo na ngain Dios.

²⁷ Are merocoa vatto tti yáto nchanho are rrocojian tti nó xí, canxion chojni judío que joixin nonttehe Asia vicon na Pablo ngain nihngo icha importante. Chojni mé joincheña na cainxin chojni co tse na Pablo. ²⁸ Co ndacho na sén:

—Jaha ra xo xí Israel, xacoi ra co ttjenguijna ni ra. Xí jihi ttingaria xa cainxin rajna co ndache xa cainxin chojni ixin sitticaonha na chojnia na co sitticaonha na ley que vayé Moisés co sitticaonha na xidané ningoa na jihi. Cai joiaho xa canxion chojni griego ngaxinhi nihngo jihi co jañá joinchehe na menos ningoa na.

²⁹ Jañá ndacho na ixin jehe na vicon na Pablo ngain ciudad de Jerusalén conixin ná xí griego vinhi Tróximo que joixin xa ciudad de Efeso. Co jehe na xaxaon na ixin Pablo joicao xí mé ngaxinhi nihngo icha importante; pero Pablo joincheha jamé.

³⁰ Co cainxin chojni ngain Jerusalén anto coña na co coinga na xatte na. Cottimeja tse na Pablo co coianganji na vantsjexin na de nihngo icha importante co coejé na puerté nihngo mé. ³¹ Jehe na joinao na narrogoenxon na Pablo, pero jehe tti vaquetonhe xisoldado romano coinhi ixin cain chojni ngain Jerusalén anto coña na. ³² Co rato mé jehe tti vaquetonhe xisoldado vayé xisoldadoe co icha xí que vaquetonhe icha xisoldado co cain xí mé coinga xa cjoí xa tti vintte cainxin chojni. Co are cain chojni vicon xisoldado co tti vaquetonhe xisoldado, jehe na igoenha na Pablo icha. ³³ Cottimeja jehe tti vaquetonhe xisoldado conchienne ngain Pablo co coetonhe xisoldadoe ixin tse xa Pablo co ixin coiatte xa Pablo conixin yó cadena. Cottimeja joanchiangui ixin quensen Pablo co quehe joinchehe. ³⁴ Pero cainxin chojni coyotte na co nichja na ojejé cosa. Mexinxin tti vaquetonhe xisoldado choha chonxin quehe conhe ixin anto coyao chojni. Co coetonha ixin sajoicao xa Pablo ngain tti vintte xisoldado. ³⁵ Co are xisoldado joiji xa conixin Pablo ngain escaloen tti vintte xa, jehe xa chonda que vatsin xa Pablo noi ixin chojni joinao rrogoen Pablo iná. ³⁶ Ixin cainxin chojni rroé na co ndacho na sén:

—Nadoenxon ra.

Tti ndacho Pablo ngattoxon con cainxin chojni

³⁷ Co are sajidicao xa Pablo tti vintte xisoldado, Pablo ndache xivaquetonhe xisoldado:

—¿Anchao rronichja nganji?

Co tti vaquetonhe xisoldado joattehe:

—¡Pero jaha nchao nichja nguigoa griego! ³⁸ Mexinxin jaha jaha xí que joixin Egipto que nchion sé coetocaho xa gobierno co sajoicao xa ngagaha jna nó mil xisoldado que anto chintto.

³⁹ Cottimeja Pablo ndacho:

—Janha ná judío que joixin ciudad de Tarso que mé ná ciudad importante ngain nonttehe Cilicia. Co nttatsanha ñao, chjana joachaxin ixin rronichja ngain cainxin chojni.

⁴⁰ Co tti vaquetonhe xisoldado chjé joachaxin co Pablo vingattjen ngataha escalón mé, co joinchechjian seña conixin rá para joinchetenco cainxin chojni. Co are cainxin na tencoa na, Pablo nichjé na ixin nguigoa hebreo co ndačo:

22

¹ —Jaha ra, xo chonda ra nchion tsje nano inchin janha co xo dačhichjan ra, ttinhi ra quehe rrondattjo ra.

² Co are coinhi na ixin Pablo nichjexin na nguigoa hebreo, jehe na tencoa na icha ná Pablo ndache na:

³ —Janha ná judío na. Co goanxin na ngain ciudad de Tarso nonttehe Cilicia co vanguixin na nttihi ciudad de Jerusalén co Gamaliel cjoiximaestróna. Jehe xa joinchecoanna xa jian de ixin ley que vayé Moisés. Cainxin nchanho janha joinaho jointtaha inchin janha xaxanho que Dios rinao, inchin jaha ra nchehe ra jai. ⁴ Icha saho janha rroá co tse chojni que ditticaon Jesús co coixian na ngain cárcel, xí co nchí, co coetonha ixin nagoenxon na na. ⁵ Xidána icha importante co cainxin xittetonha ngain ningoa ra nchao rrondattjo ra na ixin jehe na chjana na carta para ixin chojni judío ngain ciudad de Damasco. Mexinxin janha cjoixi nttiha ixin rrotse chojni que ditticaon Jesús para rrojiquian na nttihi Jerusalén co rrochjaha na castigo.

*Pablo ndache na quexén vitticaon ngain Jesús
(Hechos 9.1-19; 26.12-18)*

⁶ Co janha sacjoi, pero are ngatja nttiha chiaon ciudad de Damasco inchin chonguíxin, rato mé vingasantte na ná xohi que joixin de ngajni ngá nttiha tti rrittji. ⁷ Co janha joaritsinga ngataha nontte. Cottimeja coian inchin ná tté chojni que ndachjenji na: “Saulo, Saulo, ¿quedonda jaha ningacona co feo nchena?” ⁸ Cottimeja janha joanchiangua co ndačhjan: “¿Quensen soixin?” Co ndachjenji na: “Janha Jesús tti joixin rajna Nazaret tti jaha ningaconhe co feo nchehe ngain.” ⁹ Co chojni que cjoinha janha cai vicon na xohi mé. Pero anto xao na ixin coinha na tté Jesús que nichja nganji janha. ¹⁰ Cottimeja janha ndattjan: “¿Soixin, quehe chonda que sinttaha janha?” Co jehe ndachjenji na: “Dingattjen co nchehe sigue sattji ciudad de Damasco. Nttiha jí chojni que rrondattjo cainxin tti chonda que sinchehe jaha.” ¹¹ Co rato mé janha čhoja vicon ixin xohi mé joinchenihi jmacon na janha. Co chojni que cjoinha janha tse na na rana co sacjoinha na hasta joaso na Damasco.

¹² Nttiha vehe ná xí vinhi Ananías. Co xí mé anto nchesayehe xa Dios co anto ditticaon xa ley que vayé Moisés. Co cainxin chojni judío que te ciudad de Damasco nichja na jian de ixin xí mé. ¹³ Co Ananías jói joitsjena co ndachjenji na: “Hermano Saulo, jaxon jaha sicon iná.” Co rato mé janha onchao vicon, co nchao tsjá xa. ¹⁴ Cottimeja Ananías ndachjenji na: “Dios de nindo goelitoa na ocoinchiaha jaha de osé. Jehe coinchiaha jaha para satsoan tti rinao Dios, co para rrochonxin Jesucristo, tti xonhi tiempo joinchehe cosa jianha, co para tsinhi tti rrondačo jehe Jesús nganji jaha. ¹⁵ Jañá joinchehe Dios para ixin jaha rronichja de ixin Jesús ngain cainxin chojni co jaha tsequinhi na tti vicon co tti coinhi. ¹⁶ Choenha icha. Ditticaon ngain Jesucristo co dingattjen co diguite para sinhi chojni Jesús. Co jañá sitjañehe cain tti jianha que joinchehe.”

Pablo coequin quedonda sacjoi ngain chojni que jaha judío

17 Co Pablo ndaŕho cai:

—Co are janha sacjan na nttihi Jerusalén, sacjoi ngain nihngo icha importante para jointtacoanxian Dios. Co nttiha janha vicononxinna Jesús, tti chonda cain joachaxin, 18 co ndachjenji na: “Jaca satsjixin de ciudad de Jerusalén ixin nttihi sitticaonha na tti jaha rrondaŕho de ixin janha.” 19 Cottimeja janha ndattjan Jesús: “Soixin, cainxin chojni mé nohe na ixin janha vangaria tsje rajna co joixinhi cainxin ningoe cain rajna mé para vatse chojni que ditticaon na soixin, co gonhe na co coiaxian na ngain cárcel. 20 Co are chojni coaxin na ŕo Esteban ixin jehe nchehe ŕa de nichja de ixin soixin, janha joarihi nttiha co vicon. Are mé, janha joarihi de acuerdo conixin tti jehe na joinchehe na co janha joarinda lonttoe na que vinttetsá na are goen na Esteban.” Jańá ndattjan Jesús. 21 Pero Jesús, tti chonda cain joachaxin, ndachjenji na: “Sattji ixin janha rrorroanha cjin ngain chojni que jeha judío.”

Are Pablo ngá rá tti vaquetonhe xisoldado

22 Cain chojni nttiha coinhi na tti ndaŕho Pablo hasta jehe ndaŕho ixin jehe tsji ngain chojni que jeha judío. Co are mé coexinhi na ndaŕho na sén:

—Icha jian xí jihi ndasenhe xa. Jiquininxinha sechon xa.

23 Co ixin anto cońao na, coyaotte na co contsenga na lonttoe na que vinttetsá na co cjoa na jinche para noi. 24 Co tti vaquetonhe xisoldado coetonha ixin sajoicao xa Pablo ngaxinhi tti vintte xisoldado. Co ndache xisoldadoe ixin rrogoen xa Pablo conixin ná cuarta de roa para rroquequin Pablo quedonda cainxin chojni coyaotte na. 25 Co are joexin coenŕhoa xa rá co rotté Pablo ixin rrogoen xa, Pablo ndache xicapitán que vengattjen nttiha:

—¿Achonda ra joachaxin para sonhe ra ná chojni romano saho de sinchejuzguehe ra jehe?

26 Are xicapitán coinhi xa yá, sacjoi xa co ndache xa tti vaquetonhe xisoldado co ndaŕho xa:

—Tjiho cuidado tti sinchehe ngain xí yá ixin jehe xa ná chojni romano xa.

27 Cottimeja tti vaquetonhe xisoldado conchienne ngain Pablo co joanchianguihi co ndaŕho:

—¿Andoa jaha ná chojni romano?

Co Pablo joattehe:

—Jan, ndoa.

28 Cottimeja tti vaquetonhe xisoldado ndaŕho:

—Janha cjoenga hna tsje tomi ixin goan na chojni romano.

Co Pablo ndaŕho:

—Pero janha ná chojni romano ixin ndodana cjoí ndo ná chojni romano cai.

29 Are xisoldado que rrogoen Pablo coinhi xa mé, joixintonxin xa de tti jí Pablo. Co tti vaquetonhe xisoldado ŕaon are conohe ixin Pablo ná chojni romano ixin jehe ocoetonhe xisoldadoe ixin coenŕhoa xa Pablo. Co jiquininxinha rrojinchehe xa jamé ngain ná chojni romano.

Are Pablo cjoí ngain juzgadoe nihngo

30 Co ixin tti vaquetonhe xisoldado joinao chonxin quehe ndaŕho chojni judío ixin quehe cosa jianha joinchehe Pablo, mexinxin nchanho yoxin jehe joantsjehe cadena veŕhoaxin Pablo co coetonha ixin ŕatte cain xidána que vaquetonha ngain icha xidána co cain xidána que

vechonda joachaxin de juez ngain juzgadoe na. Cottimeja jehe tti vaquetonhe xisoldado sajoicao Pablo ngain juzgado mé co coetonhe Pablo ixin vingattjen ngagué cain nimé.

23

¹ Pablo tsjehe ngain xite ngain juzgadoe nihngo co ndache xa:

—Soixin ra, janha tonona çhjoin ngain ansenna ngattoxon con Dios de ixin cainxin tti janha jointtaha ngain vidana.

² Cottimeja Ananías que vehe xidána icha importante coetonhe chojni tsingaxintonxin de çhiqué Pablo ixin rroquedoe na manaso rroha. ³ Co Pablo joattehe xa:

—¡Jaha tti ncheha inchin ndaço, Dios cai soen jaha! Jaha nttihi rrihi ixin rrondachjenji na quehe jianha jointtaha janha inchin jitaxin ley. Pero ley çhjaha joachaxin para coetonha chojni ixin rroquedoehna na manaso.

⁴ Co chojni que vengattjen nttiha ndaço na:

—¿Quedonda jaha nichja feo de ixin xidané Dios? ixin jehe xa tti dána icha importante.

⁵ Pablo ndaço:

—Soixin ra, nonaha ixin jehe xidána icha importante. Si janha rrononona yá, rronichjaha tti janha onichja ixin jitaxin ngain Palabré Dios: “Nichjaha jianha de ixin ná tti ttetonhe chojnia.”

⁶ Cottimeja Pablo conohe ixin chojni ngain juzgadoe nihngo vechonda yó grupo. Ná grupo vehe chojni saduceo. Co iná grupo vehe chojni fariseo. Mexinxin Pablo ndaço anto sén:

—Soixin ra, janha ná xifariseo na co ndodana cai cjoí ná xifariseo. Co soixin ra nttihi para rrondaço ra si janha jian na ni jianha na ixin ditticanho que tti nindadiguenhe chonda que rroxechon na.

⁷ Are Pablo ndaço yá, xifariseo co xisaduceo coexinhi xa joinchediscutí xa. Co cayoi grupoe xa çaxaon xa ojejé. ⁸ Ixin xisaduceo vandaço xa ixin tti nindadiguenhe irrocjanha rroxechon na co ixin çonhi ángel jí co ni çonhi espíritu jí. Co xifariseo vandaço xa que ján jí cain mé. ⁹ Cainxin xa coyao xa icha co icha. Cottimeja vingattjen canxion ximaestroey ley que vaguitticaon xa inchin xifariseo co ndaço xa:

—Xí jiji çonhi cosa jianha joinchehe xa. Co puede ná espíritu jian o ná ángel de Dios onichja ngain xa, mexinxin ttjiho na cuidado que ixin rroningacoehna na Dios.

¹⁰ Co anto joinchediscutí xa hasta tti vaquetonhe xisoldado çaon ixin puede nasoexon xa Pablo. Mexinxin rroanha joajna ngain xisoldadoe ixin vantsjexin xa Pablo de nttiha co sajoicao xa Pablo tti vintte xa iná.

¹¹ Co are ttie Jesús, tti chonda cain joachaxin, çago ngain Pablo co ndache:

—Çaonha Pablo, ixin jaha rronichja de ixin janha ngain ciudad de Roma inchin jaha onichja nttihi Jerusalén.

Are çaxaon na queçén narrogoexon na Pablo

¹² Co nchanho yoxin canxion chojni judío cjoao chó na ixin narrogoexon na Pablo. Co joinchejurá na ixin rrojineha na ni rroguiha na hasta narrogoexon na Pablo. Co ndaço na ixin Dios nchao rrojinchehe feo ngain na si nasoexonha na Pablo. ¹³ Co cain nicjoao chó mé icha que cuarenta xí. ¹⁴ Co sacjoi na ngain xidána que vaquetonha ngain cain icha xidána co ngain xivaquetonha ngain nihngo judío co ndache na xa:

—Janha na jointtajurá na co ndattjan na Dios ixin nchao sinchehe feo nganji na si nasoexonha na Pablo. Co jointtajurá na ixin sineha na ni siha na hasta soenja na Pablo. ¹⁵ Mexinxin jaxon, soixin ra co icha chojni que chonda joachaxin ngain juzgadoe nihngo, ndache ra tti ttetonhe xisoldado ixin ndoe tsiaho Pablo nganji ra iná. Co ndache ra ixin rinao ra sanchianguihi ra icha. Pero Pablo tsiha ixin janha na rrochoan na ngatja nttiha para sonhe na.

¹⁶ Co xancoén Pablo, xenhe nchichó Pablo, conohe xan cain yá co sacjoi xan tti vintte xisoldado para ixin ndache xan Pablo cain yá. ¹⁷ Cottimeja Pablo vayé ná xicapitán co ndache xa:

—Nttatsanha ñao, ttjiho xan jihi ngain tti ttetonhe xisoldado ixin chonda xan ná joajna para ixin jehe.

¹⁸ Xicapitán mé joicao xa xan ngain tti vaquetonhe xisoldado co ndache xa:

—Pablo tti jiaxinhi vayahna para ixin joiquian xan jihi nganji ixin jehe xan chonda xan ná joajna para ixin soixin.

¹⁹ Tti vaquetonhe xisoldado tse ná rá xan mé co joantsjenda xan nchion co joanchianguihi xan co ndačo:

—¿Quehe rinao rrondachjenji na?

²⁰ Cottimeja xan mé ndache xan:

—Canxion chojni judío ocjoao chó na ixin rrondattjo na soixin ixin ndoe tsjiho Pablo ngain juzgadoe nihngo. Jehe na rrondattjo na ixin rinao na sanchianguihi na Pablo icha. ²¹ Pero soixin ditticaonha na ixin ngatja nttiha sema icha que cuarenta xí de ngain ladoe na rrochonhe xa Pablo ixin nasoexon xa. Co ojoinchejurá xa ixin Dios nchao sinchehe feo ngain xa isi soenja xa Pablo co cai sineha xa ni siha xa hasta soenja xa Pablo. Co jaxon techonhe xa quehe rrondačo soixin.

²² Cottimeja tti vaquetonhe xisoldado ndache xan ixin rrondacheha xan ni ná chojni tti ndache xan jehe. Cottimeja coančhanda xan sacjoi xan.

Are rroanha na Pablo ngain xigobernador Félix

²³ Cottimeja tti vaquetonhe xisoldado vayé yó xicapitén co ndache xa:

—Sico yó ciento xisoldado que tsjixin rotté co setenta xisoldado que sinttetaha conxin co yó ciento xisoldado que sicao lanzé. Co cainxin ra sattji ra ttie a las nueve ngain ciudad de Cesarea. ²⁴ Co cai ttjiho ra canxion conxin para ixin Pablo setaha. Co dinttenda ra Pablo hasta saso ra ngain Félix xigobernador ixin xonhi tsonhe.

²⁵ Co tti vaquetonhe xisoldado rroanha ná carta conixin xisoldado mé, co carta mé ndačo carta:

²⁶ “Janha Claudio Lisias chjaha joajna nganji soixin Félix xigobernador. ²⁷ Chojni judío coiixinhi xí jihi co joinao na narrogoenxon na xa. Pero are janha conona ixin jehe xa ná chojni romano, janha cjoí conixin xisoldadona co vantsjexin xa de ngá rá chojni judío. ²⁸ Co janha cjoinha xa ngain juzgadoe ningoe chojni judío ixin joinaho conona quehe cosa jianha joinchehe xa. ²⁹ Co janha vicon ixin chojni judío anto coñao na ngain xa pero jeho ixin jehe xa ditticaonha xa ley de jehe na. Pero jiquininxinha senhe xa ni jiquininxinha seaxinhi xa cárcel. ³⁰ Cottimeja coian ixin canxion chojni judío ocjoao chó na ixin nasoexon na xa. Mexinxin janha rroanha xí jihi nganji soixin. Co janha ondattjan chojni

judío que chonda que rroundattjo na soixin quedonda anto coñao na ngain xa.” Janhi jitaxin carta mé.

³¹ Cottimeja cainxin xisoldado joinchehe xa inchin vitonhe xa. Tse xa Pablo co are naxin xehe sajoicao xa ngain rajna Antípatris. ³² Co nchanho yoxin xisoldado que vacjixin rotté sacjan xa ngain tti vintte xa. Co xisoldado que vicao conxin sajoicao xa Pablo hasta ciudad de Cesarea. ³³ Co are joiiji na ngain Cesarea, joanjo xa carta ngain xigobernador co cai cointtohe xa Pablo nttiha. ³⁴ Co are xigobernador joexin tsjehe xa carta mé, joanchianguihi xa Pablo ttinó joixin. Co are coinhi xa ixin Pablo joixin nonttehe Cilicia, ³⁵ ndache xa:

—Janha tsian tti rrondačo jaha are tsí nijoičho jie de ixin jaha.

Cottimeja coetonhe xa xisoldado ixin venda xa Pablo ngaxinhi palacioe Herodes.

24

Tti nichja Pablo ngain Félix

¹ Are vatto naho nchanho, Ananías, tti xidána icha importante, joiiji Cesarea conixin canxion xivaquetonha ngain nihngo judío. Co cai sajoicao ná xiabogado vinhi Tértulo. Cain nimé sacjoi na ngain xigobernador para joičo na jie de ixin Pablo. ² Co are Pablo conchienne ngain xigobernador, Tértulo coexinhi čo jie de ixin Pablo co ndache Félix xigobernador:

—Dio rrotsjenga hna soixin ixin cain na te na jian co ttetoha na. Co nonttehna na anto čhjoin jí ixin soixin xaxaon jian co nchehe tsje cosa jian para ixin janha na. ³ Janha na anto rinaho na chjaha ra soixin gracias ixin cain tti jian que dayá na de nganji soixin. ⁴ Co janha na rinaoha na santsjaha ra tsje tiempo. Pero nttatsanha ñao, ttinhi nchion tti janha na rrondačhjan na. ⁵ Janha na onona na ixin xí jihi anto joincheñao xa chojni. Co ngain cainxin nontte cjoí xa ngayé chojni judío co joinchchjan xa division. Jehe xa tti ttetonhe xa chojni que díticaon Jesús, tti joixin rajna Nazaret. ⁶ Co jehe xa joinao xa rrojinchehe xa menos ningona na icha importante. Pero janha na tse na xa co joinaho na rrochjaha na xa castigo inchin jitaxin leyna na. ⁷ Pero Lisias, tti ttetonhe xisoldado, joi co afuerza vantsjeyenanxin na xa. ⁸ Co cai ndačo ixin chojni que joičo jie de ixin Pablo chonda que joi na nganji soixin. Co si soixin sanchianguihi xí jihi, soixin rrochonxin ixin ndoa tti joičhjan na jie de ixin jehe xa.

⁹ Co chojni judío que te na nttiha ngain xigobernador cai ndačo na ixin ndoa cain tti ndačo Tértulo. ¹⁰ Cottimeja xigobernador joinchehe xa ná señal ngain Pablo ixin nchao rronichja. Co Pablo ndačo:

—Anto chahna ixin soixin tsinhi tti janha rronichja, ixin janha nona que tsje nano soixin rrittetonha ngain nontte jihi. ¹¹ Jai vittja tteyó nchanho que janha cjoí ngain Jerusalén para ixin jointtasayá na Dios. Soixin nchao tsonoha isi andoa ni nahi. ¹² Co janha xonhi chojni cjoao co xonhi chojni jointtañao ngain nihngo icha importante, ni ngain icha nihngo, ni ngain iná parte de ciudad mé. ¹³ Chojni tehe chondaha na quehe rročo na jie de ixin janha ixin janha xonhi jianha jointtaha. ¹⁴ Pero tti ján ndoa es que janha nttasayá Dios inchin nindogoelitona na vanchesayehe na Dios ixin janha nttaha inchin Jesús ttetonha. Mexinxin chojni tehe tendácho na ixin janha rrinttasayá Dios ngain ná manera ojé,

pero ndoaha. Ixin janha ditticanho cainxin tti jitaxin ley que vayé Moisés co ditticanho tti ndačo profeté Dios. ¹⁵ Janha chonda confianza ngain Dios inchin chojni tehe ixin ditticanho que tti nindadiguenhe rrocjan rroxechon na masqui cjoí na chojni jian o ni nahi. ¹⁶ Mexinxin cainxin tiempo janha rinaho ntaha jian ngattoxon con Dios co ngattoxon con chojni.

¹⁷ Co canxion nano janha ojoiningaria tsje rajna. Cottimeja janha sacjan na ngain Jerusalén ixin janha cjoinha tomi ngain ninoa, co tomi mé tomi vachjana chojni. Co cai sacjan na para ixin rroganjo coxigo para ngain Dios. ¹⁸ Co janha cjoí ngaxinhi nihngo icha importante para jointtaha jamé, co ojointtaha inchin jitaxin ley para varihí ná chojni jian ngain Dios. Co are mé canxion chojni judío que joixin nonttehe Asia vicon na ixin janha tarrihi ngaxinhi nihngo mé. Pero tsjeha chojni vehe nganji na co xonhi chojni jointtañao. ¹⁹ Icha jian si chojni que vicon na nttiha tsí na nttihi co rročo na jie de ixin janha si rrondačo na ixin janha jointtaha jianha. ²⁰ O que chojni tehe que cai vintte na ngain juzgadoe nihngo rrondačo na quehe cosa jianha xijuez de ngain juzgado ndačo xa ixin janha jointtaha. ²¹ ¿Apoco janha nichja jianha are janha ndattjan na sén: “Jai soixin ra chonda ra que sinchejuzgana ra ixin ditticanho que tti nindadiguenhe chonda que rrocjan rroxechon na”?

²² Are Félix coinhi yá, jehe joinao rronichja na icha pero iná nchanho ixin jehe oconohe jian quexén nchehe chojni que vaguitticaon Jesús. Co jehe ndache na:

—Are tsí Lisias, tti ttetonhe xisoldado, jehe rrondachjenji na icha de ixin jiji.

²³ Cottimeja Félix coetonhe xicapitán ixin sinchehe xa sigue senda xa Pablo pero coetonha cai ixin rrochjé xa Pablo nchion libertad co cai tsanchjanda xa niamigoe Pablo sitsjehe na co sicaohe na Pablo tti sondehe.

²⁴ Are vatto canxion nchanho cottimeja Félix cjoí ngain Pablo iná. Co joicaao čihi vinhi Drusila que mé ná něhí judía. Co Félix coetonha ixin vayé na Pablo ixin joinao rronichja de ixin quexén ná chojni sitticaon Jesucristo. ²⁵ Co Pablo ndache Félix ixin chonda que sinchehe ni jian inchin Dios rinao co ixin čoha sinchehe ni inchin cuerpoe ni rinao co ixin tsí ná nchanho are Dios sinchejuzguehe cain chojni. Co are Félix coinhi cain mé, anto xaon co ndache:

—Sattji jaxon. Co are janha rrochonda icha tiempo janha sayaha iná.

²⁶ Félix xaaxaon ixin puede Pablo rroganjo tomi ngain para ixin rrocanchjanda. Mexinxin jehe coetonha ixin vayé na Pablo tsje nttiha para ixin cjoao Pablo. ²⁷ Jañá vatto yó nano, cottimeja Félix cointtohe de vehe xigobernador. Co ná xí vinhi Porcio Festo coexinhi vehe gobernador. Co Félix joinaoha ixin chojni judío rrocoñao ngain, mexinxin cointtohe Pablo ngain cárcel.

25

Are Pablo nichja ngain Festo

¹ Cottimeja Festo joiiji ngain ciudad de Cesarea para ixin coexinhi vehe gobernador. Co are vatto ní nchanho, sacjoixin de ngain Cesarea co cjoí ngain Jerusalén. ² Nttiha xidána que vaquetonha ngain icha xidána co chojni judío que vechonda joachaxin joičo na jie de ixin Pablo ngain

Festo. ³ Co jehe na ocjoao chó na ixin rroanha na xí ixin rrogoen xa Pablo ngatja nttiha. Mexinxin anto joinchetsenhe na ñao Festo ixin rrogayé Pablo ngain Jerusalén. ⁴ Pero Festo çhoja co joattehe ixin Pablo veaxinhi nttiha Cesarea co jehe çaxaon ixin tsjeha nchanho rroconçhjenhe co toin rrocjan nttiha. ⁵ Co ndache na:

—Nchao nittetoanha ra tsjinha na ngain ciudad de Cesarea co jehe na siçho na jie de ixin Pablo, si jehe joinchehe jianha.

⁶ Festo vittohe ngain Jerusalén jeha jni o tte nchanho icha, cottimeja sacjan ngain ciudad de Cesarea. Nchanho yoxin jehe vetaha xintaon que gondehe are vehe gobernador co coetonhe xisoldado ixin vayé xa Pablo.

⁷ Co are Pablo jói, çatte tsje chojni judío que joixin de Jerusalén co chojni mé joiçho na jie de ixin Pablo co ndaço na ixin jehe joinchehe anto tsje cosa jianha, pero çhoja joincheguitticaon na Festo que ixin ján seguro Pablo joinchehe jamé. ⁸ Cottimeja Pablo ndaço de ixin jehe mismo:

—Janha çonhi jianha jointtaha ngain ley chojni judío, ni ngain nihngo icha importante, ni ngain emperador romano.

⁹ Festo joinaoha ixin chojni judío rrocoñao na ngain, mexinxin ndache Pablo:

—¿Arinao satsji Jerusalén? Co nttiha janha sinttajuzgaha jaha.

¹⁰ Co Pablo joattehe:

—Jaxon janha rrihi ngain juzgadoe emperador romano co nttihi tti janha jiquininxin soan na juzgado co nahi ngain Jerusalén. Soixin ochonxin que janha çonhi jianha jointtaha ngain chojni judío. ¹¹ Si janha jointtaha jianha co jiquininxin ndasenhe na, janha rronichjaha nahi. Pero si jehe na ndaço na ndoaha de ixin janha, çonhi chojni chonda joachaxin para sinchechienhe na janha ngain na. Janha rinaho que xiemperador ngain ciudad de Roma sinchejuzgana.

¹² Cottimeja Festo cjoao nivacjenguijna vaquetonha, cottimeja ndache Pablo:

—Jaha ndaço ixin jaha rinao que ixin xiemperador sinttajuzgá; mexinxin jaha satsji ngain xa.

Are Pablo nichja ngain xirey Agripa

¹³ Canxion nchanho después Agripa xirey co Berenice nçhichó xa cjoí Cesarea para ixin joitsjehe na Festo. ¹⁴ Co ixin vittohe na nttiha nchion nchanho, Festo coequin Agripa de ixin Pablo. Co ndache xa:

—Jí ná xí que tti Félix cointohe ngain cárcel nttihi are janha coexian joarihi gobernador. ¹⁵ Are janha cjoí Jerusalén xidána que ttetonha ngain icha xidána co tti xí que ttetonha ngain ningoe chojni judío joiçho na jie de ixin jehe xí mé. Co jehe na rinao na ixin janha sinttacondená xa para ndasenhe xa. ¹⁶ Co janha ndattjan na ixin ley romano ndaço ixin çhoja sinchecondená ni ná chojni para ndasenhe antes que chojni mé tsinhi tti rrondaço chojni que joiçho jie de ixin jehe. Co cai chonda que chojni mé rronichja de ixin quehe joinchehe jehe are chojni que tjanguihi tsinhi na tti rronichja jehe. ¹⁷ Mexinxin are chojni judío jói na nttihi, janha toin nchanho yoxin joaritaha xintaoen xigobernador co vayá Pablo. ¹⁸ Janha çaxanho que jehe joinchehe ná cosa anto jianha, pero nijoiçho jie de ixin jehe nichjaha na inchin janha çaxanho. ¹⁹ Jeha ndaço na ixin jehe ditticaonha religioen na. Co nichja na de ixin ná xí vinhi Jesús que ndavenhe. Pero Pablo ndaço ixin xí mé jichon xa. ²⁰ Janha joinonaha quehe rrojinttaha, mexinxin janha joanchianguia Pablo si jehe rinao tsji

Jerusalén para soenxin juzgado nttiha. ²¹ Pero Pablo ndaço ixin jehe rinao Augusto tti emperador sinchejuzguehe. Mexinxin janha coetonha ixin jehe vittohe ngain cárcel hasta que janha nchao rroanha jehe ngain emperador mé.

²² Cottimeja Agripa ndache Festo:

—Cai janha rinaho tsian tti rrondaço xí mé.

Festo joattehe:

—Ndoe tsinhi tti rrondaço xa.

²³ Co nchanho yoxin Agripa co Berenice vinttengá lonttoe jian co çhjoin te. Co are chojni anto joinchesayehe na, cayoi na sacjoi na ngaxinhi ná cuarto jie tti vintte tsje nivaquetonhe xisoldado co tsje nivechonda joachaxin ngain ciudad mé. Festo coetonhe xisoldadoe ixin vayé xa Pablo. ²⁴ Cottimeja Festo ndaço:

—Rey Agripa co cainxin soixin ra que joihi ra, nttihi jí tti xí. Tsje chojni judío ngain Jerusalén co nttihi Cesarea joiço na jie de ixin jehe xa. Co cainxin nchanho ndachjenji na na ixin jehe xa jiquininxin ndasenne xa. ²⁵ Pero janha xaxanho que jehe xa xonhi joinchehe xa para jiquininxin ndasenne xa. Co ixin jehe xa joanchia xa que Augusto tti emperador sinchejuzguehe xa, mexinxin janha rrorroanha jehe xa ngain jehe emperadoar na. ²⁶ Pero janha nonaha tti cosa jianha que joinchehe xa para janha nchao rrocjin na joajna ngain emperador. Mexinxin janha vayá xa para soixin ra sicon ra co para rey Agripa sicon co sanchianguihi ra xa tti cosa jianha que joinchehe xa. Jamé puede janha nchao rrocjin na joajna para ngain emperador. ²⁷ Ixin xonhi xé si janha rrorroanha ná tti teaxinhi cárcel co çhoha rrondattjan tti cosa jianha que joinchehe.

26

Are Pablo nichja ngain rey Agripa

¹ Cottimeja Agripa ndache Pablo:

—Jaha nchao nichja de ixin tti jaha joinchehe jaxon.

Co Pablo vatsín rá para chjé joajna ngain Agripa co coexinhi nichja ngain co ndaço:

² —Soixin, anto chahna ixin chjana joachaxin de rronichja nganji soixin de ixin tti jianha que ndaço chojni judío de ixin janha. ³ Co cai anto chahna ixin soixin onoha jian cainxin costumbre de chojni judío co onoha quexehe cosa nchediscutí na. Mexinxin nttatsanha ñao soixin, ttinhi jian tti janha rrondattjo.

Quexén vanchehe Pablo icha saho, antes de que rroguitticaon ngain Jesús

⁴ Cainxin chojni judío chonxin quexén janha jointtaha ngayé na ngain rajnana co ngain ciudad de Jerusalén desde janha xa nchín na. ⁵ Co cai jehe na chonxin na co nchao rrondattjo na soixin, si jehe na rinao na, ixin de osé janha joarihi ná fariseo. Co xifariseo icha dicao cuidado de nchehe cainxin tti jitaxin ley que vayé Moisés que icha chojni judío. ⁶ Co jaxon janha nttihi rrihi para que soixin rrondaço ixin janha, ajian na ni jianha na ixin ditticanho que Dios sinchexechon nindadiguenhe inchin ndaço Dios ngain nindogolitoa na. ⁷ Cainxin chojni ngain tti tteyó grupoe chojni Israel chonda na confianza ixin Dios sinchexechon nindadiguenhe ixin jañá ndaço. Mexinxin nchesayehe na Dios nchanho co

ttie. Co jaxon, canxion chojni judío joicho na jie de ixin janha ixin janha chonda confianza mé cai. ⁸ ¿Apoco soixin ra xo judío ra ditticaonha ra ixin Dios sinchexechon nindadiguenhe?

Icha saho quexén Pablo vanchehe jianha ngain chojni que vaguitticaon Jesús

⁹ Icha saho janha vařaxanho ixin janha vanttaha jian are vanttaha feo ngain chojni que ditticaon Jesús, tti joixin rajna Nazaret. ¹⁰ Co jañá janha vanttaha ngain ciudad de Jerusalén. Co xidána que ttetonha ngain icha xidána chjana xa joachaxin de coaxian tsje chojni que ditticaon Jesús. Co are jehe xa ndačo xa ixin navenxon na, janha cai ndačhjan ixin nchao vanchehe xa. ¹¹ Anto tsje nttiha janha jointtaha feo ngain chojni que ditticaon Jesús ixin rinaho que chojni mé irroguitticaonha na Jesús icha. Co jañá vanttaha ngain cainxin nihngo. Co janha anto vacoñaoa na, mexinxin hasta vacjé chojni mé ngain tsje rajna de ojé nontte.

*Pablo nichja iná de ixin quexén jehe coexinhi vitticaon Jesús
(Hechos 9.1-19; 22.6-16)*

¹² Co are janha vanttaha jamé, janha sacjoi ciudad de Damasco conixin joachaxin de xidána que ttetonha ngain icha xidána. ¹³ Pero are janha ngatja nttiha ngosine nchanho, janha vicon vingasantte na ná xohi que joixin ngajni ngá nttiha que rrittji janha conixin chojni que cjoinha. Co xohi mé anto icha soji xoi que nchanho. ¹⁴ Cottimeja cain na vinttji na ngataha nontte. Co janha coian tté Jesucristo nichjaxin nguigoahna hebreo co ndačo: “Saulo, Saulo, ¿quedonda ningaonna co feo nchena? Jaho rritoniha ixin jaha inchin coxintá are řantoe va con garrocha.” ¹⁵ Cottimeja janha ndačhjan: “¿Quensen, soixin?” Co Jesús, tti chonda cain joachaxin, ndačo: “Janha Jesús tti jaha ningaconhe co feo nchehe ngain. ¹⁶ Dingattjen, janha joihi nganji co nichjaha para sinchehe řana. Janha coinchiaha jaha ixin jaha rrondate chojni quexén jaha vicon na janha jai co cai tti janha tsjagoha jaha are jaha sicon na janha icha. ¹⁷ Co janha rrorroanha jaha ngain chojni que jaha judío. Co janha tsjenguijna jaha are jaha ngayé chojni judío co chojni que jaha judío para ixin cain chojni mé nasoenxonha na. ¹⁸ Janha rrorroanha jaha ngayé chojni que jaha judío para que jaha sinchecoehne na tti ndoa. Jamé jehe na tsinttohe na de nchehe na cosa jianha co tsexinhi na sinchehe na cosa jian. Co jehe na isitticaonha na tti ndačo xijianha, sino que sitticaon na ngain Dios. Co jañá janha sinttatjañá na cain cosa jianha que nchehe na. Co jehe na sintte na conixin icha chojni que coinchiehe Dios.”

Pablo vitticaon tti ndačo Jesús

¹⁹ Mexinxin, soixin, janha vitticanho cain tti ndačo Jesús nganji na are janha vicononxinna. ²⁰ Janha saho nichja ngain chojni ngain ciudad de Damasco. Cottimeja nichja ngain chojni ngain ciudad de Jerusalén, cottimeja nichja ngain chojni ngoixin nonttehe Judea co ngain chojni que jaha judío. Janha ndattjan cain chojni mé ixin tsentoxinhi na vidé na co sincheha na cosa jianha, sino que sinchehe na cosa jian inchin Dios rinao para tsjagoe na icha chojni que ndoa jehe na coentoxinhi na vidé na. ²¹ Co canxion chojni judío tse na janha ngain nihngo ixin janha nichja jamé. Co chojni mé joinao rrogoen na janha. ²² Pero Dios cjoenguijna na, mexinxin janha řa rrinichja cain tti janha vicon ngain chojni noa co ngain chojni rico, co cainxin tti janha nichja jí de acuerdo conixin

cain profeté Dios co Moisés dindačo ixin chonda que tsonhe. ²³ Co cain nimé dicjin na ixin Cristo chonda que anto tangui tsonhe co ixin Cristo ndasenhe co rroxechon icha saho de cainxin chojni que ndadiguenhe. Co jañá tti Cristo tsjagoe chojni judío co chojni que jeha judío ixin ndoa jehe nchao danjo ngain cain chojni iná vida nroaxin.

Pablo joinao ixin rey Agripa rroguitticaon Jesús

²⁴ Are Pablo jinichja cain yá de ixin jehe, Festo ndačo sén:

—¡Pablo, jaha ndadixenga! Jaha dixantte ttjelea ixin anto coangui xón.

²⁵ Pero Pablo joattehe:

—Nahi, soixin, janha dixengaha na. Cainxin tti janha ndačhjan ndoa.

²⁶ Co nttihi jí rey Agripa. Jehe chonxin cain yá. Janha nichja ngain jehe conixin confianza ixin nona que jehe ochonxin cain tti janha ndačhjan. Ixin cain tti ndačhjan janha ndoa conhe ngattoxon con tsje chojni.

²⁷ Cottimeja Pablo ndache rey Agripa:

—Soixin, ¿aditticaon tti dicjin profeté Dios? Janha nona que soixin ditticaon.

²⁸ Cottimeja Agripa ndačo:

—Ngain nchion tiempo jiji ¿axaxaon ixin sincheguitticaon na Jesús?

²⁹ Cottimeja Pablo ndačo:

—Masqui nchion o tsje tiempo, anto jian si soixin co cain icha chojni nttihi que tettinhi tti janha rrinichja sitticaon ra co sintte ra inchin janha. ¡Pero nahi siatthea ra conixin cadena inchin janha!

³⁰ Are Pablo joexin nichja cain yá, xirey, xigobernador, Berenice co cain icha chojni que te nttiha vingattjen na, ³¹ co vačhjexin na de cuarto co coexinhi na cjoao chó na co ndačo na:

—Xí jiji xonhi cosa jianha joinchehe xa, mexinxin jiquininxinha xa ndasenhe xa ni jiquininxinha xa siaxinhi xa cárcel.

³² Co Agripa ndache Festo:

—Si xí jiji rrondačhoha xa ixin rinao xa que xiemperador sinchejuzguehe jehe xa, ján na nchao rrogantsje na xa de cárcel.

27

Are rroanha na Pablo para Roma

¹ Cottimeja jehe na cjoao chó na co rroanha na na janha na para nonttehe Italia. Co are mé jehe na ndache na ná xicapitán que vinhi Julio ixin sajoicao xa Pablo conixin icha nivintteaxinhi nttiha. Jehe Julio cjoí xicapitén ná grupoe xisoldado vinhi Augusto. ² Cai ná xí vinhi Aristarco que joixin xa de ngain ciudad de Tesalónica ngain nonttehe Macedonia cjoí xa conixin janha na. Coá na ná barco que joixin ciudad de Adramitio. Co barco mé vehe listo sajittji barco ngain canxion rajna ngain nonttehe Asia. ³ Co nchanho yoxin joaso na ciudad de Sidón. Julio joinchehe jian ngain Pablo co coančhanda Pablo vanianxin de barco co joitsjehe niamigoe nttiha co coančhanda niamigoe Pablo chjé na jehe tti gondehe. ⁴ Cottimeja janha na sacjoixin na de nttiha ngain barco. Anto soji jittja čhintto, mexinxin janha na vatto na nontte ngosine ndachaon dinhi Chipre ngain lado cjon ixin nttiha čhintto mé icha sojiha čhintto. ⁵ Cottimeja vattoa na ndachaon chian nonttehe Cilicia co nonttehe Panfilia. Co joaso na ciudad de Mira ngain nonttehe Licia.

⁶ Nttiha xicapitén xisoldado vittja xa ná barco que joixin ciudad de Alejandría co barco mé sajittji ngain nonttehe Italia. Jehe xa coetonha

xa ixin janha na coá na barco mé para jointtaha sigue sacjoi na. ⁷ Co canxion nchanho sacjoi na anto yao co anto tangui joaso na chian rajna Gnido. Anto soji čhintto co čhoja sacjoi na nao icha, mexinxin vatto na chiaon rajna Salmón ngain nontte ngosine ndachaon dinhi Creta ixin nttiha čhintto icha sojiha. ⁸ Anto yao vatto na ngoixin nontte mé hasta joaso na ná lugar chian rajna Lasea. Co lugar mé anto nchao para cainxin barco dinttengattjen barco nttiha, mexinxin dinhi Buenos Puertos.

⁹ Are mé ovatto canxion semana hasta joaso na lugar mé, co anto chiaon tiempoe quin are anto soji čhintto. Mexinxin Pablo nichja tti řaxaon ¹⁰ co ndačo:

—Janha ndattjo ra ixin anto tangui tsoan na isi satsji na icha. Barco jih rroxantte ixin anto soji tseto jinda. Co barco co cargue sitján. Co anto peligro para cain na ján na cai.

¹¹ Pero xicapitén xisoldado icha joinchehe xa caso tti ndačo xí que vagueca barco mé co tti ndačo xí que coehna barco mé. ¹² Co masqui lugar tti vintte na anto nchao para cainxin barco vaguengattjen, nchaoha nttiha para barco vaguittohe ngoixin tiempoe quin are anto soji čhintto. Mexinxin merocoa cainxin chojni řaxaon ixin icha jian janha na sacjoixin na de nttiha. Jehe na joinao na rrogaso na ngain ciudad de Fenice ngain řajeho nontte mé para rrogatto na tiempoe quin are anto soji čhintto, ixin ngain ciudad mé veva čhinttoe norte ni čhinttoe sur.

Are coeto ndachaon soji

¹³ Cottimeja joí ná čhinttoe sur que sojiha čhintto danto, co jehe na řaxaon na ixin nchao satsji na icha. Mexinxin janha na sacjoixin na de lugar mé co sacjoi na anto chiaon ngandehe ndachaon čiqué nontte ngosine ndachaon que dinhi Creta. ¹⁴ Pero nchion después joí ná čhintto anto soji que joixin nontte mé co vinhi čhintto Nordeste. čhintto mé anto soji joinchenguittjen čhintto barco mé. ¹⁵ Co čhintto mé coančhjandaha barco para sacjoi nao, mexinxin tti veca barco ndajoinchengattonoa barco. Cottimeja coančhjanda ixin čhintto veca barco mé. ¹⁶ Co vatto na ná nontte nchín que jí ngosine ndachaon que dinhi nontte Claudia. Co nttiha čhintto mé joinchenguittjenha barco soji inchin icha saho. Mexinxin masqui tangui, janha na nchao vantsje na ná lanchachjan de ngataon jinda tti jičoanito barco para xantteha lanchachjan mé. ¹⁷ Co joaqué na lanchachjan mé ngaxinhi barco. Cottimeja coiattehe na barco conixin jino jieto. Co joaqué na jino mé činguihi barco para ixin barco rroxantteha. Co anto řaon na ixin řaxaon na puede barco satsji ngain lugar vinhi Sirte, tti jí tsje nchise co ningaha jinda. Mexinxin jehe na joinchegania na manta jie que joinchegonda čhintto para deca barco. Cottimeja barco mé sacjoi lado jitjaxin čhintto. ¹⁸ Co nchanho yoxin řa anto soji čhintto, mexinxin jehe na coexinhi na vancajinhi na barco cargué barco čingui ndachaon para ixin barco setsinganguiha jinda ixin anto soji coinguittjen jinda. ¹⁹ Co nchanho ninxin janha na conixin rana na vancanguixin na jinda tsje cosa tti nchexin na řa ngaxinhi barco. ²⁰ Tsje nchanho janha na viconha na ni nchanho ni conotse. Co janha na řaxanho na ixin ndarroguenhe na nttiha ixin řa anto soji coinguittjen ndachaon co čhintto.

²¹ Co are vatto tsje nchanho que jehe na joinaha na, Pablo vingattjen ngagué na co ndačo:

—Icha jian isi jaha ra rroguitticaon ra tti janha ndattjo ra icha saho. Icha jian isi rrocjixinha na de Creta. Pero jai cainxin cosé barco ndavitján. ²² Co jaxon janha ndattjo ra ixin taha ra joachjaon, ixin masqui barco jiji sitján, pero xonhi chojni ndasenhe. ²³ Jamé nona, ixin are naxin xehe jói nganji na janha ná ángel Dios, tti ttonna co janha rrinttaha xé jehe Dios mé. ²⁴ Co ángel mé ndachjenji na: “xáonha, Pablo, ixin jaha chonda que satsji ngain emperador romano. Co ixin Dios anto rinao jaha, ni ná chojni conixin jaha ngaxinhi barco jiji ndasenhe.” Jañá cho ángel Dios. ²⁵ Mexinxin taha ra joachjaon ixin janha chonda confianza ngain Dios co ditticanho ixin cainxin cosa tsonhe inchin ndačo Dios. ²⁶ Pero seguro que masqui barco rroxante, pero ján na saso na ngain ná nontte.

²⁷ Jañá vatto yó semana de čhintto. Cottimeja ná ttie joaso na ngain parte de ndachaon que vinhi Adria. Co johó čhintto veca barco mé. Co ngosine ttie mé, jehe nitenda na barco vicon na ixin barco mé ojojji barco chiaon de ngain tti jí jinche. ²⁸ Jehe na vattechoha na jinda para chonxin na quexén ningaxin vehe jinda mé. Co jinda vechonda nda treinta y seis metros nttiha. Co are vatto na nchion icha, cjan na vattechoha na jinda iná co nttiha vechonda veintisiete metros. ²⁹ Co ixin jehe na xáon na ixin puede barco rroxante ngataha xo, mexinxin vancahngui na jinda nó chia yeye conixin jino para ixin coengattjen na barco mé. Co jehe na anto joinao na jaca rrojingasán. ³⁰ Nivinttenda barco joinche xaxaon icha chojni ixin jehe na tedancahngui na icha chia jinda conixin jino nojaxin barco. Pero jehó joincheyehe na na ixin joinao na sarroquinga na de ngain barco ngaxinhi lanchachjan. ³¹ Cottimeja Pablo ndache xicapitán co xisoldadoe:

—Si xí que tericao barco jiji sittoeha xa ngaxinhi barco, jaha ra ndasenhe ra čingui jinda.

³² Mexinxin xisoldado cončhinji xa jinoe lanchachjan icha saho que xí que tericao barco vengá lanchachjan mé. Co sajoicao jinda lanchachjan mé.

³³ Co are ojidingasán Pablo ndache cain na:

—Icha jian isi jaha ra sintte ra ixin vatto yó semana co xonhi jointte ra ni vinttečinha ra. ³⁴ Mexinxin jintte ra para ixin rrochonda ra fuerza. Co taha ra joachjaon ixin xonhi tsonha ra ni tsoniaha ra.

³⁵ Co are joexin nichja Pablo cain yá, jehe tse ná niottja co chjé gracias ngain Dios are cainxin chojni coinhi na. Cottimeja jehe cončhinji niottja mé co coexinhi joine nio. ³⁶ Cottimeja cain na goan na animado de ixin tti ndačo Pablo, co jehe na cai joine na. ³⁷ Co janha na vintte na doscientos setenta y seis chojni ngaxinhi barco mé. ³⁸ Co are joexin joine na niottja mé co ocojehe na, coexinhi na vancahngui na trigo ndachaon para ixin itsonontteha barco čingui jinda.

Are xantte barco

³⁹ Co are vingasán, jehe nitericao barco chonxinha na nontte ngosine ndachaon tti joaso na. Pero vicon na ná lugar ngandehe nontte mé ttinó jinda ijittinguittjenha nda co tti ojí nchise. Jehe na joinao na rroguca na barco nttiha, si nchao. ⁴⁰ Cottimeja jehe na cončhinji na jinoe chia yeye que coengattjenxin na barco co vittohe chia čingui jinda. Cottimeja coxindangehe na direccioen barco čingui jinda que jehe na gondehe na para ixin veca na barco mé nao. Cottimeja jehe na vatsín na manta jie

ngain já barco para ixin ċhintto nchao veca ċhintto barco mé. Cottimeja barco sacjoi ngain lugar tti ijittinguittjenha jinda. ⁴¹ Pero sacjoi na ngain lugar tti jinda vetanxin chó nda. Co jinda tse nda barco co sajoicao nda ngain ná jnanchjan de puro nchise ċhingui jinda. Co já barco mé ċhoha vaċhjexin de nttiha. Co noton barco mé coexinhi xantte ixin anto soji goen jinda. ⁴² Rato mé xisoldado ċaxaon xa ixin narrogoenxon xa tti vintteaxinhi ixin ċaon xa que puede tti vintteaxinhi nchao sarroquina na are oviji na ngataha nontte xema. ⁴³ Pero xicapitán joinaoha xa ixin Pablo ndasenhe, mexinxin coanċhjandaha xa xisoldadoe xa goen xa tti vintteaxinhi; sino que coetonhe xa cain chojni que onohé nchenadá rroċhinca na ngain jinda hasta siji na ngain nontte xema. ⁴⁴ Co cai coetonhe xa cain chojni que noeha nchenadá ixin queċén satto ngataonhe jinda ngataha nttatablé barco co ngataha icha cosé barco. Co jañá cain na joaso na tti xema nontte co ċonhi conna na.

28

Are Pablo ngain nonttehe Malta

¹ Co are cain na joaso na nontte, coian na ixin nontte mé dinhi Malta. ² Co chojni nttiha coiaconoana na. Jehe na joinchechjian na ná ċohi jie ixin anto quin co ixin jittí ċhin. Cottimeja ndachjenji na na ixin rroxixona na ngandehe ċohi mé. ³ Pablo tse ná manajo de nttaniho co joaquehe nta ngataha ċohi. Co rato mé ná conché vaċhjexin va de ngacjan ċohi mé ixin anto soa co joinehe va rá Pablo co taveriahnda va nganito rá Pablo. ⁴ Are chojni que joixin nontte mé vicon ixin conché mé taveriahnda va nganito rá Pablo, jehe na ndache chó na:

—Seguro xí jilhi ná tti doen chojni. Co masqui ndavenha xa ngain ndachaon, pero chonda que ndasenhe xa ixin joinchehe xa jianha.

⁵ Pero Pablo contsenga rá co vanca va ngatto ċohi. Co ċonhi conhe Pablo. ⁶ Co chojni que joixin nontte mé chonhe na para ixin rroguicon na rrogatjoe rá Pablo o que rato mé ndarroguenhe Pablo. Pero chonhe na sé co Pablo ċonhi conhe, mexinxin ċaxaon na ojé co coexinhi na ndaċho na ixin Pablo ná dios.

⁷ Ná xí vinhi Publio vaquetonhe nonttehe Malta. Jehe xa chonda xa jnguihi xa chiaon tti janha na texixona na, co jian vayahna na xa ngaxinhi nchiandoha xa ngoixin tti ní nchanho que vintte na nttiha.

⁸ Tiempo mé ndodé Publio tavetsinga ndo ngataha saoen ndo ixin anto vechonda ndo soa co anto vechonda ndo diarrea. Pablo sacjoi joitsjehe ndo. Jehe tsín rá ngataha ndo co joinchecoanxinhi Dios. Co jehe ndo xingamehe ndo. ⁹ Cottimeja cainxin chojni nihi ngain nontte mé jói na ngain Pablo co cain jehe na xingamehe na. ¹⁰ Co anto tsje cosa joinchettogna na na. Co are janha na sacjoi na, jehe na cjoenguijna na na jointtaca na iná barco cain cosa mé.

Are Pablo joihi Roma

¹¹ Are vatto ní conittjao que janha na vintte na ngain nontte mé, coá na iná barco que nttiha vehe ngoixin tiempo quin are anto soji ċhintto. Co barco mé joixin de ngain ciudad de Alejandría. Co ngain nojaxin barco mé vintte yó retratoe dios, ná vinhi Cástor co ná vinhi Pólux. ¹² Co ngain barco mé sacjoixin na de nonttehe Malta que jí ngosine ndachaon co joaso na ciudad de Siracusa. Vittona na nttiha ní nchanho. ¹³ Cottimeja sacjoixin na de nttiha co sacjoi na chiaon ngandehe ndachaon hasta

joaso na ngain ciudad de Regio. Co nchanho yoxin coexinhi cjoa ná čhinttoe sur, mexinxin janha na sacjoi na norte co ndoexin joaso na ngain ciudad de Puteoli. Nttiha vanianxin na de barco. ¹⁴ Nttiha janha na vetan na canxion chojni que vaguitticaon na ngain Jesús, co jehe na vayahna na na ngain nchiandoha na para ngoixin ná semana. Cottimeja janha na sacjoi na para ciudad de Roma. ¹⁵ Co chojni que vaguitticaon Jesús ngain Roma coinhi na de ixin janha na. Mexinxin vachjexin na de ciudad mé co vetan na na ngatja nttiha. Canxion na sacjoi na hasta ngain rajna Foro de Apio co icha na sacjoi na hasta ngain lugar que dinhi Tres Tabernas para vetan na na. Co are Pablo vicon na, jehe chjé gracias ngain Dios co goan animado. ¹⁶ Are joaso na ngain Roma, xicapitán joanjo xa tti vintteaxinhi ngain xivaquetonha cárcel de Roma. Pero jehe xa joanjo xa joachaxin que Pablo vittohe ngain ná nchia, jehe conixin nacoa xisoldado para venda xa.

Are Pablo joinchecoenhe chojni de ixin Dios ngain Roma

¹⁷ Are vatto ní nchanho de joaso na Roma, Pablo rroanha joajna cainxin nivaquetonhe chojni judío que vintte na nttiha Roma ixin xatte na ngain jehe Pablo. Cottimeja Pablo ndačo ngain na:

—Hermanos, masqui janha xonhi jianha jointtaha ngain chojni judío ni ngain costumbre que chonda na de ngain nindogoelitoa na xančhjen, pero masqui jamé coiaxinna na nttiha Jerusalén co joanjo na na ngá rá chojni romano. ¹⁸ Co chojni romano anto cjoao na co ndačo na ixin janha jiquininxinha ndasenne na. Mexinxin joinao na rrocanchjanda na na rrogačhjexin de cárcel. ¹⁹ Pero chojni judío čhoha na. Mexinxin janha chonda que joanchia ixin xiemperador sinchejuzgana janha masqui chondaha ni ná cosa jianha para rronichja de ixin chojni judío. ²⁰ Mexinxin janha vayaha ra ixin janha rinaho sicon ra co rronichjaha ra ixin jaxon janha rričoaxin cadena jeho ixin janha ditticanho ngain jehe tti techonhe cain chojni judío.

²¹ Cottimeja jehe na ndache na Pablo:

—Janha na xonhi joajna vayá na de ngain nonttehe Judea de ixin soixin. Co xonhi chojni judío que joixin nttiha nichja jianha de ixin soixin. ²² Pero janha na nona na ixin ngain cainxin lugar te chojni que anto coňao ngain chojni que ditticaon Jesús. Mexinxin janha na anto rinaho na tsian na tti rrondachjenji ni ra soixin.

²³ Cottimeja jehe na coín na ná nchanho para ixin jehe na xatte na iná. Co nchanho mé jehe na co anto tsje icha chojni xatte na ngain nchia tti vehe Pablo. De vingasán hasta ttie Pablo ndache na de ixin quexén Dios ttetonha. Pablo joinao ixin cain chojni mé rrochonxin na quensen Jesús, mexinxin conixin ley que vayé Moisés co xón que dicjin profeté Dios Pablo cjoagoe chojni de ixin quensen Jesús. ²⁴ Co canxion chojni vitticaon na tti ndačo Pablo co icanxin na čhoha vitticaon na. ²⁵ Co ixin vintteha na de acuerdo, sacjoi na cada na nchiandoha na. Cottimeja Pablo ndačo:

—Anto ndoa tti ndačo Espíritu Santo ngain nindogoelitoa na are nichjé Isaías co ndačo:

²⁶ Sattji ngain chojni tehe co ndache na:

Jaha ra ján tsinhi ra, pero tsinxinha ra.

Jaha ra ján sicon ra, pero rrochonxinha ra quehe rročo tti sicon ra;

²⁷ ixin ansean ra anto concha

co rinaoha ra tsinhi ra
 co coejehe ra jmacon ra
 para que siconha ra conixin jmacon ra
 ni tsinhi ra conixin ndatsjoan ra,
 ni tsinxin ra ngain ansean ra
 ni tsentoxinhi ra vidá ra para que janha sinttaxingamaha ra.

²⁸ Co cai Pablo ndačo:

—Mexinxin chonxin ra ixin Dios de jai pa ndaha sanjo joachaxin ngain chojni que jeha judío ixin sitticaon na Jesús co jehe sinchetjañehe na cosa jianha que nchehe na. Co chojni mé sinao na tsinhi na cain tti ndačo Dios.

²⁹ Co are joexin nichja Pablo cain yá, sacjoi chojni judío co anto joinchediscutí na de ixin cain yá.

³⁰ Co Pablo vittohe nttiha yó nano ngain nchia que joincherentá. Co vayé quexeho chojni vacji nchiandoha. ³¹ Co Pablo nichja de ixin queñén Dios ttetonha. Co joinchecoenhe chojni de ixin Jesucristo, tti chonda cain joachaxin. Co xonhi chojni cayacoen Pablo para nichja joajné Dios.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Roma

Pablo chjé joajna chojni ngain Roma

¹ Janha Pablo, ná ninchehe xé Jesucristo. Dios nichjahna janha co joantsjenda na para rrihi ná representanté jehe, para rrindattjan icha chojni joajné jehe que danjo iná vida naroaxin.

² Desde anto osé Dios ndačo joajna jiji ngain cain profeté, co jehe profeta cjin joajna jiji ngain tti libro que jitaxin Palabré Dios. ³ Jehe joajna jiji tti jinichja de ixin Jesucristo, Xenhe Dios. Co para nttihi ngataha nontte, Jesucristo mero razé rey David. ⁴ Pero para ixin ngajni, Espíritu Santo ndačo que Jesucristo Xenhe Dios, tti chonda cain joachaxin, ixin jehe xechon de tti ndavenhe. ⁵ De ixin Jesucristo, Dios chjana na joachaxin para que te na representanté jehe para que ngain cainxin nación, sintte chojni que sitticaon Dios co sinchehe na inchin jehe rinao. ⁶ Ngayé cain chojni jiji, te ra jaha ra cai, xo nichjaha ra Dios para goan ra chojni Jesucristo.

⁷ Mexinxin janha rricjinha ra jaha ra, xo te ra ngain ciudad de Roma, jaha ra xo Dios anto rinao ra, co nichjaha ra para sintte ra ngain ná vida jian para ixin Dios. Jehe Dios Ndodá na, conixin Jesucristo, tti chonda cain joachaxin para ixin ján na, cayoi nimé ni sinttanchaon ra co sanjo nganji ra tti chjoin que tsonohe ansean ra.

Pablo rinao sitsjehe chojni ngain Roma

⁸ Saho, de ixin Jesucristo, janha chjaha gracias ngain Dios para ixin cainxin jaha ra ixin cainxin parte de ngoixin mundo tenichja chojni de ixin tti jaha ra ditticaon ra ngain Jesucristo. ⁹ Co Dios, tti xé rrinttaha janha conixin ansenna ixin rrindattjan chojni tti jian joajné Xenhe Dios, jehe Dios nohe jian quexén janha xaxanho jaha ra cainxin nttiha que janha rrinttacoanxian Dios. ¹⁰ Janha cain tiempo rrinttatsán ñao Dios para que jehe rrochjana joachaxin para que jai janha nchao saso sasotsjaha ra. ¹¹ Ixin janha rinaho sicon ra co tsjenguijna ra de ngain tti ditticaon ra de ixin Jesucristo para que sitticaon ra icha jian; ¹² rročo para que sonttoanimá chó na conixin jehe tti dotticaon na jiji de jaha ra conixin janha.

¹³ Hermanos, janha rinaho que jaha ra tsonoha ra que tsje nttiha janha joinaho rrogaso para rrogasotsjaha ra, pero hasta jai xa choha. Janha rinaho saso nttiha Roma para sinttaguitticaon chojni nttiha de ixin Jesucristo inchin jointtaha ngain icanxin parte de ngoixin mundo. ¹⁴ Ixin Dios coetonna janha ixin chonda que sinttanoa cainxin chojni, sea griego o jaha griego; o chojni que chonxin jian, o chojni que xonhi chonxin. ¹⁵ Mexinxin jañá janha anto rinaho rrondattjo ra cai tti joajna que danjo iná vida naroaxin, jaha ra xo te ra ngain ciudad de Roma.

Joachaxin que chonda tti joajna jian

¹⁶ Janha tsoanaha de rrondattjan chojni tti jian joajné Jesucristo ixin mé joachaxin Dios para sanjo iná vida naroaxin ngain cain tti chojni que ditticaon joajna mé. Icha saho chojni nichja joajna jiji jeha ngain chojni

judío, pero jai, cai nichja na ngain chojni que jeha judío. ¹⁷ Ixin joajna jiji tjagoa na quexén Dios nttaroa na ngattoxon con jehe. Co jehe nttajian na de ixin tti confianza que ján na chonda na ngain Jesucristo, co jeha ixin chonda na confianza mé. Jamé ndačho ngain tti jitaxin Palabré Dios cai: “Tti chojni que dehe jian para ngain Dios conixin confianza que chonda ngain jehe, chojni mé rrochonda iná vida naroaxin.”

Tti teca chojni ngain Dios

¹⁸ Ján na docon na ixin tti anto soji castigoe Dios ttixin de ngajni para ngain chojni que jeha jian co nchehe na inchin jiquininxinha. Ixin tti jianha que chojni mé nchehe tančhjadaha que rrochonxin na tti ján ndoa. ¹⁹ Cain chojni mé nohe na jian quexén rrochonxin ni de ixin Dios, ixin jehe Dios mismo cjoagoe na. ²⁰ Ixin desde que Dios joinchechjian mundo, cain chojni nchao chonxin na cosa de Dios que čhoha dicon ni, ixin nchao chonxin ni ixin tti joachaxin que jehe chonda xonhi tiempo tsjexin, co ni jehe Dios xonhi tiempo tsjexin. Co jiji jehe ni nchao satsoan ni de ixin ngain cain tti dinchechjian Dios; mexinxin cain tti chojni que ditticaonha ngain Dios, jehe sinchetjañeha cain chojni mé, ixin ¿quedonda ditticaonha na? ²¹ Co cain chojni mé masqui chonxin na jiji de ixin Dios, nchesayehe na inchin jiquininxin jehe, ni danjoha na gracias ngain jehe. En lugar de sinchehe na mé, jehe na joxon xaxaon na cosa que xonhi xé, co jamé naxin xehe para joarrixaoen na. ²² Masqui ndačho na que jehe na anto nohe na, pero jeha ndoa, ixin jehe na xonhi chonxin na. ²³ Ixin en lugar de rrojinchesayehe na Dios, tti ndoa jian, co tti xonhi tiempo ndasenhe, jehe na nchesayehe na retratoe chojni que ndadenhe, co hasta retratoe conttoa, conché co icha coxigo nchesayehe na.

²⁴ Mexinxin Dios ndacointtohe na para nchehe na cosa jianha inchin jehe na rinao na, co jamé jehe na nchehe na cosa de joasoaxin de ná na co iná na. ²⁵ Jehe na vitticaonha na tti ndoa de ixin Dios, sino que jehe na vitticaon na ngain cosa ndoaha, co jehe na nchesayehe na co nchecoanxinhi na tsje cosa que Dios joinchechjian, co nahi Dios mismo tti jiquininxin tsocoanxinhi para cainxin tiempo. Amén.

²⁶ Mexinxin Dios ndacointtohe cain chojni mé para nchehe na cosa de joasoaxin inchin rinao cuerpoe na, ixin hasta nčí nchehe nča ngain iná nčí tti jiquininxinha sinchehe nča, mé jiquininxin nchehe nča jeha ngain xixihi nča. ²⁷ Co xajeho jamé nchehe xí cai, nchehe xa ngain iná xí cosa de joasoaxin que jiquininxinha; jeha jiquininxin sinchehe xa ngain čihi xa. Co hasta anto rinao cuerpoe xa sinchehe xa jamé. Xí mé nchehe xa cosa de joasoaxin ngain iná xí, co mexinxin Dios nchecastigá xa ngain cuerpoe xa de ixin tti jianha que jehe xa nchehe xa.

²⁸ Co ixin chojni mé irinaoha na datsoan na de ixin Dios, mexinxin jehe cointtohe na para xaxaon na cosa jianha, co para que sinchehe na sigue de sinchehe na tti tequininxinha na sinchehe na. ²⁹ Jehe na anto nchehe na cosa que jiquininxinha; ncheyehe na nčí co xí, nchehe na tti jianha, anto rinao na cosa de ngataha nontte, co jianha na. Co jehe na anto chjoehe na, dantsjehe na vidé icha chojni, ttjé na chijni, ncheyehe na icha chojni, xaxaon na cosa jianha, co ncheoxinhi na ttequin na cuentoe icha chojni que jiquininxinha tsequin na. ³⁰ Jehe na nichja na jianha de ixin icha chojni, ningaconhe na Dios, chondaha na respeto ngain icha chojni, co nichja na jian de ixin jeha na mismo, co orgulloso na. Co jehe na xaxaon na quexén nchehe na icha cosa jianha, co ditticaonha na

ndodé na ni janné na. ³¹ Jehe na rinaoha na ttinxin na, co ncheyaxon na chonja tti ndačo na, rinaoha na icha chojni, noeha na nchetjañehe na na, co ttiaconoeha na ni ná chojni. ³² Cain chojni mé nohe na jian quehe coetonha Dios, co nohe na que cain chojni que nchehe cosa jihi, Dios ndačo que chojni mé tequininxin tsji ngain infierno; pero masqui jamé, jehe na nchehe na sigue de nchehe na cosa jianha co hasta ché na are dicon na iná chojni que jinchehe jamé cai.

2

Dios nchejuzguehe chojni inchin jiquininxin

¹ Mexinxin jaha ra nchejuzgueha ra iná chojni, masqui jaha ra chojni judío o quexeho chojni, sino que nchehe ra jeha inchin jiquininxin. Ixin are jaha ra tenchejuzguehe ra iná chojni, jaha ra mismo tedoan ra condenado, ixin jaha ra mismo cai tenchehe ra jehe tti jianha mé. ² Ján na noa na que Dios nchejuzguehe chojni inchin tequininxin are jehe ndačo ixin quehe tsonhe cain tti chojni que nchehe cain cosa jianha jihi. ³ Co jaha ra, xo nchejuzguehe ra icha chojni, cottimeja nchehe ra xajeho inchin jehe na, ¿Apoco xaxaon ra que jaha ra Dios sinttastigaha ra? ⁴ ¿Apoco xaxaon ra que xonhi rentte que ixin Dios anto jian nchehe ngain chojni, co chonda anto tsje paciencia ngain na, o atonoaha ra ixin jehe anto jian nganji ra ixin rinao que jaha ra tsentoxinhi vidá ra? ⁵ Pero jaha ra anto cha ansean ra co xa rinaoha ra ttentoxinhi ra vidá ra. Mexinxin jaha ra anto tettjejo ra castigo para ixin jaha ra que sayehe ra ngain tti nchanho de castigo are Dios sinchejuzguehe cain chojni inchin tequininxin na. ⁶ Are mé jehe tsjenguehe hna cada chojni inchin jehe na joinchehe na. ⁷ Dios sanjo iná vida naroaxin ngain tti chojni que cain tiempo nchehe tti jian, ixin ttjé na Dios conixin glorié co ixin rinao na que Dios sinchenaon na co rrochjé na iná vida naroaxin que xonhi tiempo tsjexin. ⁸ Pero Dios anto toñao co sinchecastigá cain tti chojni orgulloso, co rinaoha na ditticaon na tti ndoa, sino que ditticaon na ngain cosa jianha. ⁹ Anto tangui tsonhe co anto joachjaon tsí ngain cain tti chojni que nchehe cosa jianha; co mé saho tsonhe chojni judío, cottimeja tti chojni que jeha judío. ¹⁰ Pero cain chojni que nchehe tti jian, Dios rrochjé na gloria co sinchenaon na, co sanjo ngain na tti chjoin que tsonohe ansén na; co mé saho sayé tti chojni judío, cottimeja cai tti chojni que jeha judío.

¹¹ Ixin para Dios xonhi chojni icha rentte; cainxin na xajeho na. ¹² Ixin cain chojni que jeha judío co chonxinha na tti ley que vayé Moisés, are jehe na nchehe na cosa jianha, jehe na ndasinchetján na almé na masqui chondaha na ley mé. Co chojni judío que chonxin na ley que vayé Moisés, are nchehe na cosa jianha, Dios sinchejuzguehe chojni mé inchin ndačo ley mé. ¹³ Ixin jeha jian ni para ngain Dios si jeha chonxin ni ley mé, sino que jian ni si nchehe ni cain tti ttonha ley mé. ¹⁴ Pero tti chojni que jeha judío co ni chondaha na ley mé, pero are deporsín nchehe na inchin ttonha ley mé, jamé rročo ixin jehe na ochonda na ná ley de jehe na mismo, ¹⁵ ixin jamé jehe na tjago na de ngain tti jehe na nchehe na que ján chonda na ná ley ngain ansén na. Mexinxin chonxin na tti jian, co joarrixaon na ndache na si jian tenchehe na o ani jianha tenchehe na. ¹⁶ Jamé tsonhe ngain tti nchanho are Dios sinchejuzguehe tti jimao que xaxaon cainxin chojni. Dios sinchejuzguehe na de ixin Jesucristo inchin

ndačo tti joajna que danjo iná vida naroaxin que janha ndattjan icha chojni.

Chojni judío co ley que vayé Moisés

¹⁷ Pero cada jaha ra ndačo ra que ixin judío ra, co chonda ra confianza ngain ley que vayé Moisés, co tonoha ra anto orgulloso ixin jaha ra tti chojni Dios. ¹⁸ Cada ra chonxin ra quehe rinao Dios, co ley que vayé Moisés tjagoha ra para ttinchiehe ra tti icha jian. ¹⁹ Co jaha ra tonoha ra orgulloso ixin toenao ra ixin nchao nchecoenhe ra tti chojni chejo, rročo tti chojni que xonhi chonxin de ixin Dios, co toenao ra ixin nchao nchengasenhe ra tti chojni que espirítue te ngain tti naxin xehe. ²⁰ Co xaxaon ra que noha ra quexén nchecoenhe ra tti chojni que xonhi nohe de Palabré Dios, co quexén nchenohe ra cain tti chojni que xa jianha ditticaon ngain Dios, ixin ngain tti ley que vayé Moisés nttiha chonda ra quexén para chonxin ra de ixin Dios co quexén para chonxin ra tti ndoa. ²¹ Co jaha ra xo jañá xaxaon ra ixin nchao nchecoenhe ra icha chojni, ¿quedonda tanguiha ra jaho ra mismo? Si jaha ra mismo ndache ra chojni que jiquininxinha tsé ni cosé iná chojni, ¿quedonda jaha ra ttehe ra? ²² Si jaha ra mismo ndačo ra que jiquininxinha sincheyehe ni čihi iná xí, ¿quedonda jaha ra jamé nchehe ra? Si jaha ra mismo ndoa ningaonhe ra ídolo, ¿quedonda ttehe ra cosa que jí ngaxinhi ningoe? ²³ Jaha ra tonoha ra anto orgulloso ixin chonda ra tti ley que vayé Moisés, pero jaha ra chondaha ra respeto ngain Dios ixin ncheha ra inchin jitaxin ngain ley mé. ²⁴ Mexinxin jí razón jitaxin ngain Palabré Dios janhi: “Tti chojni que jeha judío nichja na jianha de ixin Dios, pero por ixin tti jaha ra nchehe ra.”

²⁵ Ján, ndoa que tti xöhe que dinhi circuncisión jian para ixin jaha ra si ditticaon ra tti ley que vayé Moisés. Pero si jaha ra ditticaonha ra ley mé, rročo que inchin ni chondaha ra xöhe mé. ²⁶ Co si ná chojni que chondaha xöhe mé, pero si jeha nchehe inchin ttetonha ley, Dios sayé chojni mé inchin si jeha rrochonda xöhe, masqui chondaha xöhe mé. ²⁷ Tti chojni que chondaha xöhe jili ngain cuerpoe, pero tti ditticaon ley que vayé Moisés, chojni mé tti sinttajuzgá jaha ra, xo ditticaonha ra ley mé; masqui techonda ra ley nganito xón co techonda ra xöhe ngain cuerpoa ra. ²⁸ Ixin ná chojni judío čhoha rrondačo ixin jeha ndoa judío jeha ixin ndodé co janné cjoí chojni judío. Co tti xöhe que jeha chonda xonhi rentte si jeha chonda xöhe mé ndojaxin, ngama cuerpoe. ²⁹ Sino que tti chojni que jeha ndoa judío pero de ngain ansén, co tti xöhe que ndoa rentte, mé tti xöhe de ngain ansén, co jili ná cosa que ley čhoha sinchehe, sino que jeha Espíritu Santo tti nchao sinchehe. Co tti chojni jamé, Dios mismo sinchesayeha chojni mé, co nahi chojni nttihi ngataha nontte tti sinchesayeha.

3

¹ Mexinxin ¿quexén icha jian para ná chojni judío? ¿o quehe rentte para ná chojni que chonda tti xöhe que dinhi circuncisión? ² Ján, jí anto tsje razón ndoa. Co ná de razón mé ixin Dios joanjo joajné ngain chojni judío. ³ ¿Pero quehe tsonhe are čhonja de jeha na iditticaonha na joajna mé? ¿Apoco ixin jeha na jamé na, mexinxin Dios isincheha tti jeha ndačo? ⁴ ¡Seguro que Dios sincheha jamé! Sino que Dios nchehe inchin

jiquininxin tti ndoa, masqui cainxin chojni ngoixin mundo mentiroso na, ixin ngain tti jitaxin Palabré Dios ndačo:

Chonda que űago ixin soixin nichja inchin jiquininxin, co soixin sacha are chojni sinttajuzgaha na.

⁵ Cosa roa icha roa are jí ngain cosa chimeco. Co canxion chojni ndačo na ixin jamé cai tti jianha que ján na nttoho na tjago anto jian que ixin Dios nchehe inchin jiquininxin. ¿Quehe rrondačo na remé? ¿Apoco Dios nchehe jianha ixin jehe nttacastigá na? (Jaxon janha rrinichja inchin tti icha chojni.) ⁶ ¡Seguro que nahi! Ixin si Dios rrocji jianha ¿queűén jehe nchao sinchejuzguehe chojni ngoixin mundo?

⁷ Pero si janha rronichja cosa ndoaha co si cosa mé rrogonda para que rrocjago ixin tti nchehe Dios anto jian; si jamé rrocji, mexinxin ¿quedonda Dios nchejuzgá na que janha ná chojni jianha na? ⁸ Si jamé, ¿a icha jian si ján na sonttoho na tti jianha para que jamé tsí tti jian? Jihi tti ndačo canxion chojni que janha na tjagoha ra, pero jehe na jianha űaxaon na, co cain chojni que nichja mé tequininxin na soan na condenado.

Cain na teca na cosa jianha ngain Dios

⁹ ¿Mexinxin quehe rrondačo na? ¿Aján na űo judío na icha jian na que jehe na que jeha judío na? ¡Seguro que nahi! Ixin janha na ondattjo ra que ixin cosa jianha chonda joachaxin para ixin cain chojni judío co cai para ixin cain icha chojni que jeha judío. ¹⁰ Ngain tti jitaxin Palabré Dios ndačo:

űonhi chojni jian, pero ni ná chojni;

¹¹ űonhi chojni rinao ttinxin,

űonhi ni ná chojni ttjé Dios.

¹² Cainxin chojni ndavitján na de ngain Dios, cainxin na tenchehe na joxon tti nchaoha jí.

űonhi chojni que nchehe tti jian, űonhi pero ni ná na.

¹³ Ttosin na inchin ná sepulcro que jiűangue;

conixin neje na ncheyexin na icha chojni.

Co inchin ná venenoe conché jí ngaxinhi rroha na;

¹⁴ Jehe na jeha nichja na cosa jianha para icha chojni co cosa que chjé joachjaon iná chojni.

¹⁵ Jehe na daca ttji na para digoenxon na chojni;

¹⁶ co de ixin tti jianha que jehe na nchehe na tsje chojni ndaditján co detan tangui,

¹⁷ co jehe na chonxinha na tti čhjoin que tonoho ansén ni.

¹⁸ Co ni űonhi tiempo űaxaon na para űaon na ngain Dios.

¹⁹ Ján na noa na que cain tti ndačo ley que vayé Moisés are osé tiempo, cain mé ndačo para ixin cain chojni que vayé ley mé. Jamé para que űonhi chojni rrondačo ixin jehe jiquininxinha castigoe Dios, co para que cainxin chojni, Dios tti sinchejuzguehe na. ²⁰ Ixin űonhi chojni nchao tsojian de ixin ley mé, ixin ley jeha donda para nttanoa na que ján na nttoho na cosa jianha.

Dios tsjenguijna chojni si jehe na chonda na confianza ngain Jesucristo

²¹ Pero jai Dios ojointtanoa na queűén joinchehe jehe para que ján na sontte na chojni jian ngattoxon con jehe. Co mé jeha de ixin ley, pero tti libro que jitaxin ley jihi, co tti dicjin cain profeté Dios, mé nichja de ixin jihi. ²² Co mé rročo que ixin Dios nttajian na ngattoxon con jehe si

ján na chonda na confianza ngain Jesucristo. Co jamé para ixin cainxin chojni que chonda confianza ngain Jesucristo, ixin para ixin Dios cainxin chojni xajeho rentte na. ²³ Ixin cainxin chojni joinchehe na jianha co tequininxinha na para sayé na iná vida naroaxin de ngain Dios. ²⁴ Pero Dios, ixin jehe anto jian ngain cainxin chojni, mexinxin jehe joinchejian na co xonhi nchecobrehe na; rrocho ixin chjá na iná vida naroaxin de ixin tti joinchehe Jesucristo. ²⁵ Dios rroanha Jesucristo para joiguenxin nntihi ngataha nontte co mexinxin de ixin jehe, Dios nchetjañehe chojni tti jianha que jehe na nchehe na. Co cain chojni vitjañehe cain cosa jianha que nchehe na si jehe na chonda na confianza ngain Jesucristo. Jihi conhe para xagoxin que Dios nchehe inchin jiquininxin, co de ixin tti paciencia que jehe chonda, jehe joincheha caso cain cosa jianha que joinchehe chojni are saho. ²⁶ Cai conhe cain jihi para xagoxin que Dios jehe nchehe inchin jiquininxin jai cai, rrocho que Dios cain tiempo nchehe inchin jiquininxin ixin jehe ndacho que cain chojni que chonda confianza ngain Jesucristo, ixonhi cosa jianha teca na ngain Dios.

²⁷ Mexinxin ¿quehe cosa chonda na para sontte na orgulloso? Ixin orgulloso chojni ixonhi rentte. ¿Co quedonda? Ixin si chojni nchao rroguitticaon na ley co jamé rrocojian na ngattoxon con Dios, jamé nchao rroconohe na orgulloso; pero Dios dayá na inchin chojni jian jehó ixin chonda na confianza ngain Jesucristo co mexinxin ján na choha tsonoa na orgulloso. ²⁸ Mexinxin janha na ocjoagoha ra que Dios ndacho ixin cain chojni que chonda confianza ngain Jesucristo jian na ngattoxon con Dios masqui joinchehe na inchin ttetonha ley o ni nahi.

²⁹ ¿Apoco Dios jehó Dios de chojni judío? ¿Ajeha cai Dios para chojni que jeha judío? Claro que cai Dios para jehe na. ³⁰ Ixin xonhi iná Dios, jehó nacoaxinxon. Co jehe tti Dios mé tti nchejian cain chojni que chonda confianza ngain Jesucristo masqui chonda na tti xohe que dinhi circuncisión o ni nahi. ³¹ Mexinxin, ¿axaxaon ra que jihi rrocho que ley que vayé Moisés xonhi rentte ixin ján na odotticaon na ngain Jesucristo? ¡Seguro que jeha jamé! Sino que ján na ndacho na que ján ley jihi anto rentte.

4

Ejemplo Abraham

¹ Mexinxin ján na, ¿quehe rrondacho na de ixin quehe joacha Abraham tti cjoí ndogoelitoa na xanchjen? ² Ixin si jehe ndo vanchehe ndo cosa jian, mexinxin rrondaçoxin Dios que Abraham jian ngattoxon con jehe; si jamé rrocji, Abraham jehe nchao rroconohe orgulloso, pero jeha ngattoxon con Dios. ³ Pero ndacho ngain tti jitaxin Palabré Dios: “Abraham chonda confianza ngain Dios, co ixin jehe chonda confianza mé, Dios vayé jehe inchin ná chojni que xonhi jica.” ⁴ Nchao jí remé. Jí ná ejemplo: si ná chojni nchehe ná xa, tti tomi que xinajni danjo, mé jeha ná regalo, sino que tomi mé xinajni ojica xa ngain tti nchehe xa mé. ⁵ Pero si ná chojni masqui xonhi cosa jian joinchehe, pero si jehe chonda confianza ngain Dios, Dios dayé chojni mé inchin ná chojni jian jehó ixin chojni mé chonda confianza ngain Dios. Jamé Dios dayé chojni que nchehe cosa jianha como si rrocji jian. ⁶ Cai mé tti rrocho rey David are ndacho ixin anto thjoin para ixin tti chojni que Dios dayé inchin chojni

jian sin que nchehe caso cain cosa jianha que chojni mé joinchehe. ⁷ Co David ndaĉho:

Anto ĉjoin para ixin cain tti chojni que Dios nchetjañehe na cain cosa jianha que nchehe na.

⁸ Anto ĉjoin para ixin tti chojni que Dios ncheha caso cain tti jianha que chojni mé joinchehe.

⁹ ¿Aĉaxaon ra que tti ĉjoin jiji jeho para ixin tti chojni que chonda ĉohe que dinhi circuncisión, o ni cai para ixin tti chojni que chondaha ĉohe mé? Janha na ondaĉhjan na que Dios vayé Abraham inchin ná chojni jian que ĉonhi cosa jianha veca ixin jehe vechonda confianza ngain Dios. ¹⁰ Pero, ¿aĉaxaon ra quesa Dios vayé Abraham? ¿Adespúes de que Abraham vayé ĉohe mé, o ani icha saho? Nahi, jeha despúes, sino que icha saho. ¹¹ Co despúes que Dios vayé Abraham inchin jian, cottimeja Abraham vayé tti ĉohe que dinhi circuncisión inchin ná señał o ná sello que ixin Dios ovayé Abraham inchin ná chojni jian ixin Abraham ovechonda confianza ngain Dios. Jañá conhe para que Abraham joiguehe inchin ndodé cain tti chojni que chonda confianza ngain Dios, masqui vayeha na ĉohe mé, pero ixin chonda na confianza ngain Dios, jehe Dios dayé na inchin chojni jian que ĉonhi jianha teca na. ¹² Ján seguro que Abraham inchin tti ndodé cain chojni judío que dayé ĉohe mé, pero jeho si chojni mé chonda confianza ngain Dios inchin ndodá na Abraham are ĉa vayeha ndo ĉohe mé.

Promesé Dios que tonhe are chojni chonda confianza ngain jehe

¹³ Dios ndaĉho ngain Abraham conixin ngain cain chojni Abraham que sayé na ngoixin nontte inchin herencia. Co Dios ĉjé na promesa jiji pero jeha ixin Abraham joinchehe cain tti ttetonha ley, sino que ixin jehe chonda confianza ngain Dios, co ixin Dios vayé jehe Abraham inchin ná chojni jian que ĉonhi jianha veca. ¹⁴ Ixin si jeho tti chojni que nchehe tti ttetonha ley tti dayé herencia, entonce rroĉho que ĉonhi rentte tti confianza que chonda chojni ngain Dios, co ĉonhi rrocorentte promesé Dios. ¹⁵ Ley ndaĉho ixin Dios tsiaho castigo para chojni que ditticaonha ley me; pero tti chojni que ĉonhi ley chonda, ĉhoha ni rrondaĉho ni si ná ni nchehe ni tti ttetonha ley o ni nahi.

¹⁶ Mexinxin, para que promesé Dios ngain Abraham tonhe ngain cain chojni Abraham, mé chonda que vehe inchin ná regalo que dayé cainxin chojni que chonda confianza ngain Dios. Rroĉho, que promesa mé jeoha para ixin cain tti chojni que nchehe tti ttetonha ley, sino cai para ixin chojni que chonda confianza ngain Dios inchin confianza vechonda Abraham. Mexinxin jehe Abraham cjoí inchin ndodá na cainxin na ¹⁷ ĉo chonda na confianza ngain Dios inchin confianza vechonda jehe. Inchin ndaĉho ngain tti jitaxin Palabré Dios: “Janha coín jaha inchin ndodé tsje chojni.” Ixin Dios tti danjo vida ngain tti chojni que ondadenhe, co jehe Dios tti nchehjian cain cosa que veba are saho.

¹⁸ Masqui ngain tiempo mé Abraham ĉonhi esperanza vechonda de rrochonda ĉhjan; pero masqui jamé, jehe vechonda confianza ngain Dios co jamé jehe joiguehe “ndodé tsje chojni”, jamé inchin Dios ndaĉho ngain jehe Abraham: “Jañá tsotsjexin chojni razá.”

¹⁹ Abraham joinchetjanha confianza jiji ngain promesé Dios, masqui jehe ovechonda inchin cien nano co ovenohe que jehe co Sara anto onttaxichjan para que rroquinttechonda ĉhjan. ²⁰ Pero masqui jamé

jehe Abraham cointtoeha de vitticaon ni goanha desconfiado de ixin tti ndačo Dios, sino que jehe icha vitticaon co vechonda icha confianza de ixin tti ndačo Dios. Co jehe Abraham joichecoanxinhi Dios, ²¹ ixin jehe Abraham anto vechonda seguro de que Dios chonda joachaxin para sinchehe cain tti jehe ndačo. ²² Mexinxin Dios vayé jehe Abraham inchin ná chojni jian que xonhi jianha veca ixin Abraham vechonda confianza ngain Dios.

²³ Co jehe jiji de que ixin Dios vayé jehe Abraham inchin ná chojni jian que xonhi jianha veca ixin jehe vechonda confianza ngain Dios, mé vetaxinha de ixin jeho Abraham; ²⁴ sino que vetaxin cai de ixin ján na. Ixin ján na cai chonda na confianza ngain Dios tti dayá na ján na cai inchin chojni jian que xonhi jianha teca na, ján na xo dotticaon na ngain Dios tti joinchexechon Jesucristo, tti chonda cain joachaxin para ixin ján na. ²⁵ Jesucristo xanjo para ndavenhe para cjoenga hna cain cosa jianha que jointtoho na co cjan xechon, co jamé para que Dios nchao vayá na inchin chojni jian.

5

Tti tsonhe ni ixin Dios ovayé ni inchin chojni jian

¹ Jañá ixin Dios ovayá na ján na inchin chojni jian ixin chonda na confianza ngain jehe, mexinxin ján na dontte na amigoe Dios de ixin Jesucristo, tti chonda cain joachaxin para ixin ján na. ² Ixin de ixin Jesucristo Dios jointtanchaon na ján na ixin chonda na confianza ngain jehe. Co ixin jehe jointtanchaon na, mexinxin chonda na seguro, chá na co techonhe na ixin Dios rrochjá na parte ngain joachaxin jehe. ³ Co jeoha chá na de ixin jiji, sino que cai chá na masqui tti anto tanguí toan na, ixin noa na que de ngain tti tanguí que toan na, nttiha ttixin paciencia que ján na chonda na. ⁴ Co are ján na ttixian na ngain cosa tanguí conixin paciencia, are mé Dios sayá na inchin chojni jian co mé chjá na esperanza de rrochonda na iná vida naroaxin. ⁵ Co ján na xonhi tiempo tsosoá na ixin chonda na esperanza jiji ixin mé cjoago que Dios anto rinao na ján na ixin rroanha Espiritu Santo nganji na.

⁶ Ixin are ján na xa čoha vanttoho na inchin Dios ncheoxinhi, Cristo venhe para cjoenguijna chojni jianha ngain tiempo que Dios coinchiehe. ⁷ Xonhi chojni rinao denhe para tsjenguijna iná chojni, ni jehe rinaoha senhe para tsjenguijna ná chojni jian; pero para ixin ná chojni que anto jian, ján, puede sittoexin iná chojni senhe para tsjenguijna chojni jian mé. ⁸ Pero Dios tjagoa na que jehe anto rinao na, ixin jehe rroanha Jesucristo para venxin nttihi ngataha nontte para cjoenguijna na ján na masqui ján na xa vanttoho na cosa jianha. ⁹ Co jai, ján na ote na chojni jian para ngain Dios ixin Jesucristo ndavenhe para ixin ján na. Mexinxin jai nchao rrochonda na seguro ixin jehe Jesucristo tsančhاندaha na para ngain tti castigo anto soji que tsí después. ¹⁰ Ixin si Dios mismo cointte na chojni jian para ixin jehe ixin ndavenhe Jesucristo, Xenhe jehe Dios, are ján na xa gontte na chojni jianha para ixin jehe, mexinxin jai icha seguro que ján na rrochonda na iná vida naroaxin ixin Cristo jichon co jí nganji na. ¹¹ Co jeoha jiji, sino que cai chá na ngain Dios de ixin Jesucristo, tti chonda cain joachaxin para ixin ján na, ixin de ixin Jesucristo ján na amigoe na Dios.

Adán co Cristo

¹² Jañá de ixin tti jianha que joinchehe nacoaxinxon xí jói cosa jianha ngataha nontte ntthi, co cai jói tti denhe ni, co mexinxin cainxin chojni denhe na ixin cainxin na joinchehe na cosa jianha. ¹³ Icha saho que rrogehe ley que vayé Moisés, cainxin chojni ngoixin mundo ovanchehe na cosa jianha; masqui Dios vancheha caso de ixin cosa jianha que vanchehe chojni are xa chondaha na ley mé. ¹⁴ Pero masqui jamé, desde ngain tiempoe Adán hasta ngain tiempoe Moisés cain chojni que joinchehe na jianha chonda que ndavenhe na, masqui jehe tti jianha que jehe na joinchehe na jeha inchin tti joinchehe Adán, tti vitticaonha tti coetonha Dios. Co Adán rroanha cain tti jianha que nchehe chojni, pero Jesucristo tti jói después dinttjian cain tti jianha mé.

¹⁵ Pero tti jianha que joinchehe Adán čhoha tsoyahi tti jian que Dios chjá na. Ixin de tti cosa jianha que joinchehe nacoa xí, anto tsje chojni ndavintteguenhe na. Pero de tti joinchehe iná xí co mé Jesucristo, de ixin mé Dios chjá na iná vida naroaxin, co xonhi nttacobra na. Co jiji tti joinchehe Dios, mé tti anto icha jian de tti joinchehe Adán, co jehe mé tti ttjenguijna tsje chojni. ¹⁶ Tti jianha que joinchehe nacoaxinxon xí čhoha tsoyahi tti vida naroaxin que Dios chjá na; ixin de ngain tti nacoa cosa jianha que joinchehe Adán, Dios joinchecondená cainxin chojni. Pero jai Dios chjé chojni iná vida naroaxin co xonhi nchecobrehe na masqui anto tsje cosa jianha teca na. ¹⁷ Ixin si tti ndadenhe ni vechonda joachaxin ngain chojni jeho de ixin tti jianha que joinchehe nacoa xí, mexinxin anto icha seguro que cainxin chojni que Dios ndačo que ixin ixonhi cosa jianha teca na, cain chojni mé rrochonda na joachaxin Dios para isincheha na cosa jianha ngain vidé na naroaxin de ixin tti joinchehe iná xí, co jehe xí mé Jesucristo.

¹⁸ De ixin tti jianha que joinchehe Adán, cainxin chojni ngataha nontte vintte na condenado, jamé cai de ixin tti jian que joinchehe Jesucristo, Dios dayé cainxin chojni que chonda confianza ngain Jesucristo inchin chojni que xonhi cosa jianha teca. ¹⁹ Rročo que de ixin tti vitticaonha nacoaxinxon xí, que mé Adán, tsje chojni joinchehe na cosa jianha; pero cai de ixin tti vitticaon nacoaxinxon xí, que mé Jesucristo, Dios rrondačo ixin tsje chojni jian na.

²⁰ Dios vanjo ley ngain Moisés para que chojni anto jian rrochonxin na que tenchehe na cosa jianha; pero masqui chojni joinchehe na tsje cosa jianha; Dios anto icha jian ngain na ixin nchetjañehe na cosa jianha que nchehe na. ²¹ Jañá, mexinxin inchin tti cosa jianha que joinchehe chojni joichonda joachaxin para joiaho tti diguenxin ni, jamé cai ixin Dios ndačo que ixonhi cosa jianha teca na ján na, mexinxin tti jian que ttixin de ngain Dios, mé chonda joachaxin para chjá na iná vida naroaxin que xonhi tiempo tsjexin. Co cain tti sayé na jiji, mé por ixin Jesucristo, tti chonda cain joachaxin para ixin ján na.

6

Ján na inttoha na tti jianha, sino que nttoho na inchin ttetonha Jesucristo

¹ Mexinxin jai ¿que xén sonttoho na? ¿Axa sonttoho na sigue de sonttoho na cosa jianha para que Dios sinchehe sigue sinttatañá na? ² ¡Seguro que nahi! Ján na ocoentoxinhi na vidá na de ngain tti jianha que vanttoho na.

Mexinxin ¿queñén ján na sonttoho na sigue de sonttoho na cosa jianha? ³ ¿Anoaha jaha ra que ixin ján na co Jesucristo te na inchin nacoa chojni ixin joiguite na para sontte na chojní jehe? Co mé rrocho que ixin ján na ndarroguenhe na conixin jehe. ⁴ Ixin are ján na joiguite na, mé rrocho que inchin ján na cai xavá na conixin jehe are jehe ndavenhe, para que inchin jehe xechon de ixin tti anto jie joachaxín Ndodá na, que ttjen ngajni, cai ján na xechon na para te na ngain iná vida naroaxin.

⁵ Ixin si ján na cjoí na ngain Cristo para ndavenhe na, jañá cai rroxechon na inchin jehe xechon. ⁶ Ixin ján na noa na que cainxin tti jianha que vanttoho na are saho, cain mé ondavenxin nganito cruz conixin Jesucristo, para que cuerpoa na tehe que rridinchehe cosa jianha ixonhi joachaxin rrochonda para que tsetoan na sonttoho na cosa jianha; co ján na isontteha na de esclavo ngain cosa jianha inchin ngain ná xinajni. ⁷ Ixin chojni que ondadenhe na de ngain cosa jianha, jehe na ichoha sinchehe na icha cosa jianha. ⁸ Si ján na ondavenhe na conixin Jesucristo, ján na rrochonda na confianza que sonttechon na conixin jehe. ⁹ Ixin ján na noa na que ixin Cristo oxechon de ngain tti jehe ndavenhe; ixonhi tiempo jehe rrocjan senhe iná ixin tti ndadenhe ni ixonhi joachaxin chonda para ngain Jesucristo. ¹⁰ Ixin are Cristo ndavenhe, jehe cjoenga hna cain cosa jianha que nchehe cainxin chojni; jehe ndavenhe nacoa nttiha co mé gonda para cainxin tiempo. Co jehe xechon, co jai jehe jichon para cainxin tiempo para Dios. ¹¹ Jañá jaha ra cai xaxaon ra que inchin ondavenhe ra de cain cosa jianha que joinchehe ra; pero jai jaha ra dintte ra para ixin Dios inchin nacoa chojni, jaha ra conixin Jesucristo, tti chonda cain joachaxin para ixin ján na.

¹² Mexinxin jai jaha ra dittoaxinha ra que cosa jianha sinchehe sigue de tsetonha ngain cuerpoa ra, tti cuerpo que ndadenhe. Dittoaxinha ra que cosa jianha que rinao cuerpoa ra tsetonha nganji ra. ¹³ Co dittoaxinha ra que cuerpoa ra sinchehe cosa jianha. Sino que danjo ra ansean ra para ixin Dios, inchin jiquininxin chojni que ondavenhe co cjan xechon. Dittoaxin ra que Dios tsetonha ngain cuerpoa ra para que sinchehe ra cosa jian. ¹⁴ Ixin cosa jianha ixonhi joachaxin chonda nganji ra, ixin ley que vayé Moisés ittetoanha nganji ra jai, ixin jai tti jian que ttixin de ngain Dios, mé tti ttetonha nganji ra.

Ján na inchin ninchehe xa ngain ná xinajni

¹⁵ ¿Mexinxin, quehe sonttoho na? ¿Asonttoho na cosa jianha ixin ley ittetoanha nganji na, co ixin tti jian que ttixin de ngain Dios tti ttetoan na? ¡Seguro que nahi; sonttoha na cosa jianha! ¹⁶ Jaha ra noha ra jian que si rroxanjo ra inchin ná esclavo ngain ná xinajni para sitticaon ra xa cain tti tsetonha ra xa, jamé jaha ra oná esclavo ra ngain xa co chonda ra que sitticaon ra xa. Jañá, mexinxin si jaha ra sitticaon ra cosa jianha inchin ná xinajni, pero mé ndasinchetján almá ra. Co si sitticaon ra Dios, jaha ra sintte ra ngain ná vida nao co jian. ¹⁷ Pero janha chjaha gracias ngain Dios ixin masqui jaha ra are saho vintte ra inchin esclavo ngain cosa jianha, pero jai jaha ra conixin ansean ra vitticaon ra Palabré Dios inchin cocoanha ra. ¹⁸ Jai jaha ra iteha ra inchin esclavoe cosa jianha, ixin jai jaha ra ote ra inchin ninchehe xé cosa jian que rinao Dios. ¹⁹ (Janha rinichja inchin cain chojni jaxon, ixin jaha ra xa choha ttinxin ra jian cain cosa jihi.) Inchin are saho jaha ra xanjo ra joinchehe ra cosa ttoaha

co cosa jianha; jamé xanjo ra jai para nchehe ra cosa jian, para sintte ra ngain ná vida nao inchin chojni que tequininxin Dios.

²⁰ Are jaha ra xa vintte ra inchin esclavo de ngain cosa jianha, are mé jaha ra vintteha ra ngain ná vida nao. ²¹ Pero ¿quehe cosa joacha ra are mé de ngain cosa que jai tosoaha ra ixin vanchehe ra mé? xonhi joacha ra ixin cosa mé jeha para nchetján almé ni. ²² Pero jai cosa jianha mé ixonhi joachaxin chonda para ixin jaha ra ixin jaha ra ojoanjo ra vidá ra para tenchehe ra xé Dios. Co jihi ná cosa jian para ixin jaha ra co de ixin mé jaha ra sinao ra sinchehe ra jeha cosa inchin Dios rinao. Co después rrochonda ra iná vida que xonhi tiempo tsjexin. ²³ Pero chojni que nchehe cosa jianha, jehe na chonda na que tsji na ngain infierno. Pero Dios danjo iná vida que xonhi tiempo tsjexin co tti vida mé rrochonda na ján na conixin Jesucristo, tti chonda joachaxin para ixin ján na.

7

Ejemploe ná nchiganha conixin ján na

¹ Hermanos, jaha ra xo chonxin ra ley que vayé Moisés onoha ra que ley mé chonda joachaxin ngain chojni, pero jeha are xa jichon chojni mé. ² Jihi ná ejemplo: Ná nchí que tottehe xixihi, ley ttetonhe ncha que chonda que secaho ncha xixihi ncha mé are jehe xa xa jichon xa; pero si xixihi ncha ndasenne xa, ley mé ixonhi ttetonhe ncha de ixin jihi. ³ Rrocho que si jehe ncha decaho ncha iná xí co xixihi ncha xa jichon xa, jehe ncha jianha nchehe ncha ixin jicaho ncha yó xí ngain nacoa tiempo. Pero si xixihi ncha ndavenhe xa, jehe ncha chonda ncha joachaxin de secaho ncha iná xí co jamé jeha cosa jianha sinchehe ncha.

⁴ Jañá jaha ra cai, hermanos, xo tequininxin ra Cristo; are saho, ley que vayé Moisés vaquetonha nganji ra inchin ná xí ttetonha xa ngain nchichíhi xa. Pero jai jaha ra cai ondavenhe ra de ngain ley mé, para que jai oje xí ttetonha ra, co mé Cristo, tti xechon de tti ndavenhe. Co jihi conhe para que vidá na nchao sonda ngattoxon con Dios. ⁵ Ixin are saho, are ján na xa vanttoho na cain tti vajinao cuerpoa na, are mé tti ley que vayé Moisés vanttanimá na para vanttoho na icha cosa jianha inchin vajinao cuerpoa na. Co cain cosa jihi jeha donda para nchetján almé ni. ⁶ Pero jai ján na ondavenhe na para ngain ley mé, tti ley que anto soji vaquetoan na, co jamé ján na nchao sonttoho na inchin rinao Dios de ngain vidá na naroaxin que chjá na Espíritu Santo, co inttoha na inchin vanttoho na are tti ley icha saho vaquetonha nganji na.

Tti jianha que jí nganji na janha

⁷ Mexinxin, ¿quehe rrondacho na? ¿Apoco rrondacho na ixin ley que vayé Moisés, mé jianha? ¡Seguro que nahi! Pero janha rrochonxinha quexehe cosa jianha si rroqueha ley mé. Jí ná ejemplo: Janha rrocononaha tti jianha de rinaho cosé iná chojni si ley rrondachoha que ixin mé jianha. ⁸ Si rrococoha ley jihi, janha antoha rrojinaho rrojinttaha cosa jianha, pero ixin ley joí, joarrixaonna icha xaxaon de jointtaha cosa jianha. Ixin tti coha ley, cai nttiha chojni chonxinha quexehe cosa jianha. ⁹ Vehe ná tiempo are janha xa venonaha quehe ttetonha ley jihi, are mé janha vaaxanxo que xonhi cosa jianha rrica. Pero después, are janha oconona quehe ttetonha ley jihi, are mé janha joatsoan que rrica tsje cosa jianha, que hasta jiquininxin na tsji ngain infierno ixin anto tsje

cosa jianha jointtaha. ¹⁰ Jañá rrocho que ley mé tti rroganjo ná vida que ñonhi tiempo tsjexin ngain tti chojni que rroguitticaon ley mé, pero para ixin janha, ley mé jehó cjoago que jiquininxin na tsji ngain infierno ixin çhoha jointtaha cain tti ttetonha ley mé. ¹¹ Ixin tti jianha que cuerpona rinao, mé joincheyana, cottimeja joinchegonda ley para ndaço que ixin janha jiquininxin tsji ngain infierno.

¹² Mexinxin jehe ley mé que vayé Moisés, seguro jian ley, co cain tti ttetonha ley jian, co inchin jiquininxin, co nchao jí. ¹³ Pero ¿apoco rrocho que cain cosa jian jihi, tti ndaço ixin janha jiquininxin tsji para ngain infierno? ¡Seguro que nahi! Tti cain cosa jianha que janha jointtaha, mé tti ndaço ixin janha jiquininxin tsji para ngain infierno ixin ley jihi cjoago que tti janha jointtaha jianha jí. Co jañá ley jihi cjoago ixin tti jianha que nchehe ni anto nchaoha jí.

¹⁴ Ján na noa na que ley jian ixin joixin de ngain Espíritu Santo, pero janha inchin ná esclavo que dicochji na ngain cosa jianha. ¹⁵ Ixin janha ttianxinha quehe tonna, ixin janha rinaho sinttaha inchin jiquininxin, pero çhoha. Sino que tti jianha que janha rinaoha sinttaha, mé tti janha nttaha. ¹⁶ Jañá si tti janha rinaoha sinttaha, mé tti janha nttaha, jamé janha datsoan que jehe ley que vayé Moisés jian ley mé. ¹⁷ Mexinxin jañá rrocho que jeha janha tti nttaha cosa jianha yá, sino que tti jianha que jí ngaxinhi cuerpona, mé tti nchehe cosa jianha yá. ¹⁸ Ixin janha nona que tti jí nganji janha, rrocho ngain cuerpona, mé jeha jian. Ndoa janha rinaho sinttaha cosa jian, pero çhoha. ¹⁹ Janha çhoha nttaha cosa jian inchin janha rinaho, sino que janha nttaha sigue de nttaha cosa jianha que janha rinaoha. ²⁰ Mexinxin si janha nttaha tti janha rinaoha sinttaha, rrocho que jeha janha tti rrinttaha, sino tti jianha que jí ngaxinhi cuerpona, mé tti jinchehe yá.

²¹ Jañá mexinxin janhi tti tonna: are janha rinaho sinttaha cosa jian, çhoha ixin jehó nchao nttaha cosa jianha. ²² Ngaxinhi ansenna janha anto rinaho sinttaha inchin ttetonha ley de Dios. ²³ Pero cuerpona rinaoha nchehe inchin rinao ansenna. Cosa jianha que jí ngaxinhi cuerpona, mé tti ttetonha ngain cuerpona co mé rrocho que inchin jiaxinna ngain cosa jianha.

²⁴ ¡Anto feo tonona janha! ¿Quensen nchao tsonxindanguehe joachaxin jianha que jí ngain cuerpona jihi para que janha tsjiha ngain infierno? ²⁵ Jehó Dios tti nchao tsjenguijna na janha de ixin Jesucristo, tti chonda cain joachaxin para ixin ján na. ¡Chjaha gracias ngain Dios para ixin jihi! Mexinxin jai janha ttianxin que janha chonda que sitticanho ley de Dios pero si janha rroguitticaonha ngain Jesucristo, cain cosa jianha ña rroguinte ngain cuerpona co janha rrogarihi inchin esclavo de ngain cosa jianha mé.

8

Espíritu Santo de Dios tti ttjenguijna na para nttoho na inchin jiquininxin

¹ Pero jai Dios ñonhi castigo sanjo ngain cain tti chojni que te inchin nacoa chojni conixin Jesucristo; tti chojni que incheha na inchin rinao cuerpoe na, sino que nchehe na inchin rinao Espíritu Santo. ² Ixin tti ttetonha Espíritu Santo, mé tti nttaha janha jai. Co Espíritu mé tti chjana janha vida naroaxin ixin janha ditticanho Jesucristo, co jamé cosa jianha

ichondaha joachaxin nganji janha, co itsjiha ngain infierno. ³ Ixin Dios nchao joinchehe tti čhoha joinchehe ley que vayé Moisés, ixin ley mé coixinha joacha ngain cosa jianha que jí ngain cuerpoe ni. Pero Dios ján, coixinhi joacha ngain cosa jianha ixin jehe rroanha Xenhe, co joigayé Xan ná cuerpo inchin cuerpo que ján na chonda na para ndavenhe Xan para que cjoenga Xan hna cain cosa jianha que jointtoho na. Rročo que jamé Dios rroanha Xenhe para joantsjehe tti joachaxin que vechonda cosa jianha ngain cuerpoe na. ⁴ Cain jiji joinchehe Dios para que ján na nchao sonttoho na cain tti ttetonha ley, ixin jai ján na inttoha na inchin rinao cuerpoe na, sino inchin rinao Espíritu Santo.

⁵ Ixin cain tti chojni que nchehe inchin rinao cuerpoe, chojni mé jeho řaxaon na cain cosa que rinao cuerpoe na. Pero cain tti chojni que nchehe inchin rinao Espíritu Santo, chojni mé řaxaon na de ixin cosa que Espíritu Santo rinao. ⁶ Co si rrořaxaon ni jeho cain cosa que rinao cuerpoe ni, jehe ni seguro tsji ni ngain infierno are ndasenhe ni. Pero si rrořaxaon ni cosa que Espíritu Santo rinao, jehe ni rrochonda ni vida ngain Dios que řonhi tiempo tsjexin, co tsonohe ni čhjoin ngain ansén ni. ⁷ Cain tti chojni que řaxaon jeho tti rinao cuerpoe, chojni mé ningaconhe na Dios, ixin ni rinaoha na ni čhoha na para que jehe na sitticaon na ngain ley de Dios. ⁸ Mexinxin cain tti chojni que anto rinao nchehe jeho inchin rinao cuerpoe, chojni mé čhoha sinchehe inchin ncheřoxinhi Dios.

⁹ Pero jaha ra itencheha ra inchin rinao cuerpoe ra, sino que jai jaha ra tenchehe ra inchin rinao Espíritu Santo, si ndoa Espíritu Santo de Dios jí nganji ra. Ixin tti chojni que chondaha ngain ansén tti Espíritu Santo que Cristo rroanha, chojni mé jeha chojni Cristo. ¹⁰ Pero si Cristo jí ngain ansean ra masqui cuerpoe ra chonda que ndasenhe ixin joinchehe ra cosa jianha, masqui jamé tsonhe cuerpoe ra, pero espiritua ra sinchehe sigue sechon ixin Dios ondačo que jaha ra řxonhi cosa jianha teca ra. ¹¹ Espíritu Santo de Dios joinchexechon Jesucristo, co cai si jí Espíritu Santo nganji ra, jehe Dios sinchexechon cuerpoe ra co rrochonda cuerpo ina vida nroaxin de ixin Espíritu Santo mé.

¹² Jańá hermanos, mexinxin jí ná cosa que ján na chonda que sonttoho na, pero jeha de sonttoho na tti rinao cuerpoe na. ¹³ Ixin si jaha ra tenchehe ra cain tti rinao cuerpoe ra, jaha ra chonda ra que tsji ra ngain infierno, pero si sinchehe ra inchin rinao Espíritu Santo, jamé jaha ra sinchexantte ra tti jianha que rinao cuerpoe ra, co jamé jaha ra rrochonda ra tti vida nroaxin.

¹⁴ Cainxin chojni que nchehe inchin rinao Espíritu Santo de Dios, cainxin chojni mé xenhe Dios. ¹⁵ Co Espíritu Santo que jaha ra vayehe ra, mé jeha ná espíritu que joindattjo ra que jaha ra sintte ra inchin ninchehe řa que anto chonda joařaon ngain xinajni na. ¡Nahi, jeha jamé! Sino que Dios rroanha Espíritu mé nganji ra para que jaha ra nchao sintte ra xenhe Dios. Co jehe Espíritu jiji tti nttacoán na nichja na: “¡Dios, Ndođa na!” ¹⁶ Co jehe mismo Espíritu Santo jiji tti ttí ngain espiritua na para dindačo nganji na que ján na seguro oxenhe Dios na. ¹⁷ Co ixin ján na xenhe Dios na, ján na chonda na derecho de sayé na cain tti jian que Dios ndačo rrochjá na ixin ján na conixin Jesucristo sayé na cain tti jian mé. Ixin si jai tona na tangui inchin Cristo conohe, después ján na tsosayá na conixin jehe.

¹⁸ Nchao remé, janha xaxanho que tti tangui jiji xonhi quehe para ngain tti chjoin que socon na después. ¹⁹ Cainxin tti joinchechjian Dios techonhe co anto rinao tsí tti nchanho que Dios rrondacho quecá chojni tti xenhe Dios. ²⁰ Ixin cain cosa que joinchechjian Dios goan condenado, pero jeha ixin cosa mé jamé rinao, sino que ixin Dios tti joinchecondená cain yá ixin chojni joinchehe na jianha. Pero mé jeha tsonchjenhe hasta que ²¹ cainxin cosa que jí, sehe naroaxin co xonhi tiempo rroxantte ni irrorrengaha, sino que sintte na chjoin inchin xenhe Dios co ixonhi tsonhe cain cosa mé. ²² Ján na noa na que hasta ngain tiempo jiji cainxin tti joinchechjian Dios tangui jitonhe co deha inchin ná nchí que jittín ixin sincheconcjiji chjan. ²³ Co jeha cainxin cosa mé tti tangui jitonhe, sino que cai ján na mismo, masqui ján na ochonda na Espíritu Santo ngain ansean na, que mé saho de cain tti rrochjá na Dios. Ján na anto tá na joachjaon co techonhe na tti nchanho are ján na sontte na inchin mero xenhe Dios, ixin are mé Dios tsentoxinhi cuerpoa na que chonda na jai para rrochonda na iná cuerpo que xonhi tiempo ndasenhe. ²⁴ Ixin ján na dotticaon na ngain Jesucristo, mexinxin chondaxin na iná vida naroaxin; co ixin dotticaon na, rrocho ixin ján na techonhe na ná cosa que xa chondaha na. Ixin si ján na orrochonda na cosa mé, ichondaha na que rrochonhe na jehe mé. ²⁵ Pero si tti ján na techonhe na, mé ná cosa que ján na xa choha dayé na, ján na chonda na que rrochonhe na conixin paciencia.

²⁶ Co cai jamé Espíritu Santo jittjenguijna na are ján na techonda na ná problema. Ixin ján na noaha na nttotsenhe na ñao Dios inchin jiquininxin, pero Espíritu Santo, jehe mismo tti nchetsenhe ñao Dios para ixin ján na, co jehe nichja de iná manera que ján na chonxinha na. ²⁷ Co Dios, tti chonxin ansén cain chojni, nohe quehe rinao Espíritu Santo ixin jehe Espíritu Santo nchetsenhe ñao Dios para que Dios sinchehe ngain chojni inchin jehe Dios rinao.

Ján na osacha na cain tti jian de ixin Jesucristo

²⁸ Ján na noa na que cainxin tti tonhe chojni que rinao Dios, cain cosa mé Dios rroanha ngain na para ttjenguijnanxin na, ixin cain chojni mé tti Dios coinchiehe, co mé tonhe na inchin rinao Dios. ²⁹ Ixin desde are coexinhi vehe mundo, Dios onohé quecá chojni sitticaon na ngain jehe, co desde are maho jehe ondacho que cain chojni mé sintte na inchin xenhe jehe para que Jesucristo Xenhe Dios, mé tti Xansaho de ngayehe tsje xanchó Xan. ³⁰ Co cain tti chojni que desde are saho Dios ondacho que sintte na inchin xenhe jehe, cai jehe nichjé cain chojni mé para tsí ngain jehe, co cai jehe sayé cain chojni mé inchin chojni jian para ixin jehe, co cai jehe Dios vanjo tsje cosa jian ngain cain chojni mé.

³¹ ¿Mexinxin, jai quehe rrondacho na remé? Si Dios jañá ttjenguijna na, ¿quensen nchao tsja cha nganji na? ³² Xonhi cosa jí que Dios rinaoha chjá na, ixin hasta rroanha Xenhe para joiguenhe Xan para cjoenguijna na Xan ján na cainxin na. Mexinxin si jehe jamé rroanha Xenhe nganji na, seguro que jehe rrochjá na cain tti jian que jehe chonda. ³³ ¿Quensen nchao rrocho jie de ixin tti chojni que Dios coinchiehe? Ixin Dios tti ondacho que jehe na ixonhi cosa jianha teca na. ³⁴ Mexinxin ¿quensen nchao sinchecondená cain chojni mé? Ixin Cristo tti ndavenhe para ixin jehe na, co icha de mé, Cristo tti oxechon co jai jehe jí ngain lado jian de Dios, co jinchetsenhe ñao Dios para ixin ján na. ³⁵ Mexinxin, ¿quensen

nchao rrocayacoen Cristo para que isinaoha na? xonhi cosa sinchehe mé, ixin masqui tsonia na o tsonoa na tangui, o masqui icha chojni feo sinchehe na nganji na, o masqui senhe na jintta o rrochondaha na lontto, o masqui rrochonda na peligro, o masqui hasta ndasenne na; masqui cain problema mé rrochonda na, pero Cristo cainxin tiempo sinao na.
³⁶ Inchin ndacho ngain tti jitaxin Palabré Dios:

De ixin causá soixin janha na cain nchanho chonda na peligro de ndasenne na;
 icha chojni nchehe na nganji na inchin nchehe na ngain coleco que sadiguenhe.

³⁷ Pero masqui cain jiji toan na, ján na sacha na ngain cain cosa jiji, de ixin Jesucristo, tti anto rinao na. ³⁸ Jañá mexinxin janha rrichonda seguro que xonhi cosa rrocayacoen Dios para que isinaoha na. Ni masqui ndasenne na, o ni sonttechon na, ni masqui tti sinchehe ángel de Dios, ni tti sinchehe espíritu jianha, ni masqui cain tti tetoan na jai, ni cain tti tsoan na después, ³⁹ ni masqui tti sinchehe cain cosa que jí noi, ni tti sinchehe cain cosa que jí anto nihnga, ni masqui tti sinchehe iná cosa que Dios joinchechjian, pero ni ná de cainxin cosa yá chonda joachaxin para que rrocayacoen Dios para que Dios isinaoha na, ixin jehe cjoagoa na que anto riano na ixin rroán na Jesucristo, tti chonda cain joachaxin para ixin ján na.

9

Dios tti coinchiehe chojni Israel

¹ Janha rrindačhjan tti mero ndoa inchin jiquininxin chojni que ditticaon ngain Jesucristo, co xonhi cosa ndoaha rrindačhjan. Ixin Espíritu Santo jittetonhe ansenna, co jinchenona que ján seguro tti janha rrindačhjan. ² Co janha anto rrichinhi co ngain ansenna cainxin tiempo anto feo tonona, ixin chojni Israel ditticaonha na joajna ndoa. ³ Mexinxin janha mismo rrojinaho que Dios rrojinchecondená na co rrogáčhenda de Cristo, si cain jiji rrocji jian para ixin chojnina, tti chojni que joixin de ngain xajeho razana. ⁴ Cain chojni jiji razé Israel, co are icha saho Dios vayé nindogoelitoe jehe na inchin xenhe jehe. Dios vehe ngayeje jehe na co vicon na tti chíxo que jehe chonda are cononxin ngain na, co Dios joinchechjian trato ngain na, joanjo ngain na tti ley que vayé Moisés, cjoagoe na quexén vanchecoanxinhi na jehe ngain nihngo, co chjé na promesa. ⁵ Co cain chojni Israel de tiempo jiji joixin na de ngain razé nigoelitoa na xančhjen. Co de ngain nimé cai joixin Cristo, co Cristo, jehe Dios de cainxin cosa, co jamé jiquininxin tocoanxinhi para cainxin tiempo. Amén.

⁶ Pero mé rročhoja que ixin promesé Dios coenha ngain chojni Israel; pero rročho que cainxinha chojni que joixin de ngain razé Israel cjoit tti ndoa chojni Israel. ⁷ Cai cainxinha chojni que joixin de ngain razé ndoAbraham cjoit ndoa chojni ndo, ixin Dios ondačo ngain tti jitaxin Palabré: “De ixin xanha Isaac rrochonda xanttia.” ⁸ Mexinxin noa na que ni xonhi chojni cjoit xenhe Dios jeha ixin joixin de ngain ná raza especial. Sino que jeha chojni que ditticaon ngain promesé Dios, mé tti xenhe Dios. ⁹ Ixin janhi promesé Dios para ixin Abraham: “Ngain tiempo que janha coinchía, janha sihi co nchíchiha Sara rrochonda ncha ná chjan.”

¹⁰ Co cai jí icha. Cayoi xenhe Rebeca chonda xan nacoa ndodé xan, que mé ndogoelitoa na Isaac. ¹¹⁻¹³ Pero icha saho que chjan mé concjihi xan, rroçho are xa xonhi joinchehe xan, ni cosa jian joincheha xan, ni cosa jianha joincheha xan, pero are mé Dios ndache Rebeca: “Esaú, tti sehe xansaho, sinchehe xé Jacob, tti xanyoxin.” Co mexinxin cai Dios ndaçho ngain tti jitaxin Palabré: “Janha rinaho Jacob pero rinaoha Esaú.” Mexinxin jihi cjoago ixin Dios chonda joachaxin de ttinchiehe quexeho chojni que jehe rinao, masqui nchehe na jian o jianha.

¹⁴ Mexinxin ¿quehe rrondaçho na? ¿Apoco rrondaçho na ixin Dios ncheha inchin jiquininxin? ¡Segruo que nahi! ¹⁵ Ixin Dios ndaçho ngain Moisés: “Janha tsiaconoá chojni tti janha rinaho ttiaconoá, co sinchenina tti chojni que janha rinaho tsiaconoá.” ¹⁶ Mexinxin rroçho que Dios tsiaconoeha chojni ixin jehe na jamé rinao na o ixin jehe na joinchehe na tsje cosa jian, sino que Dios tsiaconoeha chojni jeha ixin jehe jamé rinao. ¹⁷ Ixin ngain tti jitaxin Palabré Dios, nttiha Dios ndaçho janhi ngain rey de Egipto: “Janha chjaha jaha joachaxin de rey jeha para cjoago tti joachaxin que janha chonda co para chojni ngoixin nontte rrochonxin nombrena.” ¹⁸ Mexinxin rroçho ixin Dios tsiaconoeha tti chojni que jehe Dios rinao ttiaconoeha co jehe sincheha ansén tti chojni que jehe Dios rinao nchecha ansén na.

¹⁹ Pero puede ná ra rrondachjenji ni ra: “Si jamé, ¿quedonda Dios ndaçho ixin chojni teca jianha ngain jehe? Ixin ¿quensen nchao sinchehe cosa ojé que Dios rinao? ²⁰ Pero, ¿quensen jaha para sinchediscutí ngain Dios? ¿Apoco ná chi nchao ndaçho ngain jehe tti joinchekhjian chi mé: “¿Quedonda jaha jañá joinchekhjian na?” ²¹ Ixin jehe tti nchekhjian chi chonda joachaxin de nchekhjian quexeho cosa jehe rinao. Jehe nchao nchegonda xajeho tipo de jinche para nchekhjian ná chi anto çhjoin co iná chi corriente.

²² ¿Co quexén jaha ndaçho ixin nchaoha si Dios rinao sinchegonda chojni que tsji ngain infierno, co jehe coixinhi ngain na conixin anto paciencia masqui vequininxin na castigo, si jehe joinchegonda chojni mé para cjoago joachaxin que jehe chonda co ixin jehe nchecastigá chojni jianha? ²³ Ixin jehe Dios jamé joinchehe para que ján na rrochonxin na ixin jehe jiquininxin tsosayehe co ján na jehe coiaconoá na co jointtanoa na icha saho ixin rrochonda na toha joachaxin conixin Jesucristo. ²⁴ Ixin Dios ndattjo na ján na ixin sihi na ngain jehe, ján na xo judío na conixin jaha ra xo jeha judío ra. ²⁵ Jamé inchin ndaçho ngain Palabré Dios ngain libroe Oseas:

Chojni que jeha chojnina, jehe na sinttaguinhi na chojnina, co chojni que rinaoha, chojni mé tti janha sinaho.

²⁶ Co ngain xajeho lugar tti janha ndaçhjan: “Jaha ra jeha chojnina”, nttiha chojni mé sinhi na xenhe Dios que jichon.

²⁷ Co profeta Isaías ndaçho janhi de ixin chojni Israel: “Masqui chojni de ngain razé Israel tsotsje na hasta inchin xochjenhe nchise ngandeha ndanchaon, masqui jamé sintte na, pero jeha nchion na rrochonda na iná vida naroaxin de ngain Dios, ²⁸ ixin Dios, tti chonda cain joachaxin, anto daca sinchecastigá cainxin chojni ngataha nontte. ²⁹ Co inchin Isaías ndaçho icha saho ngain Palabré Dios:

Si Dios, que chonda cainxin joachaxin nttiha ngajni, si jehe rroquiaconoaha na ján na

ján na rrocoha na jai, inchin chojni ngain ciudad de Sodoma co ciudad de Gomorra.

Chojni judío vitticaonha na tti jian joajna

³⁰ Mexinxin ¿quehe rrondaçhjan na? Rrindaçhjan na que ixin chojni que jeha judío cjoeha na quexén sintte na jian ngattoxon con Dios. Pero masqui jamé, Dios vayé na inchin chojni jian ixin chonda na confianza ngain Jesucristo. ³¹ Pero chojni Israel rinao ditticaon nchehe ná ley co jamé rroguinte na jian ngattoxon con Dios, pero jehe nimé çhoaha joinchehe na cain tti ttetonha ley mé. ³² ¿Quedonda çhoaha vintte na jian? Ixin jehe na joinao na rroguinte na jian ngattoxon con Dios jeho de ixin tti vanchehe na, co nahi de ixin tti confianza ngain Dios. Mexinxin jehe na vetsinga na inchin ngataha “tti ço que tonttenguixin chojni”, ³³ tti ço que Palabré Dios ndaço janhi:

Janha tsín ngain ciudad de Sión inchin ná ço que tonttenguixin chojni, co jehe na çantjaxin na;

co cain chojni que ditticaon ngain jehe tti ço mé, çonhi tiempo sinttechín na de ixin ço mé.

Ixin ço mé Jesucristo.

10

¹ Hermanos, tti janha anto rinaho ngain ansenna co tti janha anto nttatsán ñao Dios, mé que ixin cainxin chojni Israel rrochonda na iná vida naroaxin. ² Anto nchao para ixin jehe na ixin anto rinao na sinchecoanxinhi na Dios, pero chonxinha na nttié Dios. ³ Ixin jehe na chonxinha na quexén Dios nchejian chojni ngattoxon con jehe, sino que jeho na cjoé na quexén sinchehe na para tsojian na ngattoxon con Dios, co jamé ditticaonha na tti joinchehe Dios para ixin jehe na. ⁴ Ixin are Cristo jói, jehe joinchehe cain tti ttetonha ley que vayé Moisés. Co jai de ixin tti jehe joinchehe, cain chojni que chonda confianza ngain jehe tsojian na ngattoxon con Dios.

⁵ Moisés dicjin janhi de ixin quexén chojni tsojian na ngattoxon con Dios de ixin ley que jehe vayé: “Chojni que nchehe cain tti ndaço ley sinttechon na para cainxin tiempo.” ⁶ Pero ján na tsojianxin na ngattoxon con Dios de ixin tti confianza que chonda na ixin ngain Palabré Dios ndaço janhi: “Ndaçhoaha ra ngain ansean ra: ¿Quensen sacojín para ngajni? —rroço para sinchexincanji ra Jesucristo—; ⁷ ni ndaçhoaha ra: ¿Quensen rroxincanji ngain tti te nindadiguenhe?” —rroço para sinchecajín ra Cristo de ngayehe nindadiguenhe. ⁸ Cain mé ndaçhoaha ra ixin jitaxin ngain Palabré Dios janhi: “Palabré Dios jí anto chiaon nganji ra, ixin ojé Palabra mé ngá rroha ra co ngaxinhi ansean ra.” Co Palabra jishi tti joajna que janha na ndaçhjan na. ⁹ Si jaha rrondaço conixin rroha que ixin Jesucristo, mé tti chonda joachaxin nganji jaha, co si jaha ditticaon ngain ansean ixin Dios joinchexechon jehe, si jamé nchehe, jaha rrochonda iná vida naroaxin. ¹⁰ Rroço de ixin tti dotticaon na ngain ansean na, ján na nchao tsoroa na ngattoxon con Dios. Co de ixin rroha na nichjaxin na jian de ixin Jesucristo para jamé rrochonda na iná vida naroaxin.

¹¹ Ngain Palabré Dios ndaço: “Ni ná chojni que ditticaon ngain Jesucristo sechín de ixin jehe.” ¹² Jeha importante para ixin Dios si chojni judío o ni nahi, ixin Dios chonda joachaxin para ixin cain chojni,

co anto nchenciaon cain chojni que nchecoanxinhi jehe. ¹³ Ixin janhi ndačo ngain tti jitaxin Palabré Dios: “Cainxin chojni que nchecoanxinhi Dios, tti chonda cain joachaxin, cain chojni mé rrochonda na iná vida naroaxin.” ¹⁴ Pero ¿queXén chojni nchao sinchecoanxinhi na Dios si Xa ditticaonha na ngain? ¿Co queXén nchao sitticaon na ngain Dios si Xa Xonhi coinhi na de ixin jehe? ¿Co queXén tsinhi na si Xonhi chojni cjoijoin dache na joajna de ixin jehe? ¹⁵ ¿Co queXén chojni tsji sindache icha chojni joajna mé si Xonhi quensen rroanha na? Inchin jitaxin ngain Palabré Dios: “¡Anto čhjoin are ttí chojni que dicao joajna que ncheconohe čhjoin ansén chojni, co mé tti jian joajné Jesucristo!”

¹⁶ Pero cainxinha chojni nchehe caso ngain joajna mé que danjo iná vida naroaxin. Jamé inchin ndačo profeta Isaías: “¿Quensen vitticaon joajna que joiquian na?” ¹⁷ Mexinxin chojni nchao sitticaon na o ani nahi ngain Jesucristo, pero jeha hasta tsinja na joajné jehe.

¹⁸ Pero janha danchiangui: ¿Andoa ixin chojni Israel coinha joajné Jesucristo? ¡Nahi, ndoaha; seguro que jehe na coinhi na! Ixin ngain Palabré Dios ndačo janhi:

Chojni de ngoixin mundo coinhi na tté chojni que vanichja Palabré Dios, co hasta chojni ngain lugar icha cjin de ngain nontte jiji cai coinhi na palabré jehe na.

¹⁹ Pero janha cjan danchiangui iná: ¿Apoco chojni Israel coinxinha na joajna mé? Saho Dios nichjaxin tté Moisés para ndačo ngain tti jitaxin Palabré Dios:

Janha sinttanchaon ná nación que jeha nación ndoa para que tsochjio chojnina,
co janha sinttanchaon chojni que Xonhi chonxin para que tsoña chojnina.

²⁰ Cottimeja Dios nichjaxin tté profeta Isaías para ndačo:

Chojni que cjoeha na na janha, pero nimé ni vittja na;

co janha Xago na ngain chojni que joanchianguiha de ixin janha.

²¹ Co Dios nichja iná ixin tté Isaías; nichja de ixin chojni Israel are ndačo: “Ngoixin nchanho janha rrinichjá chojni que ditticaonha nganji na co tti ningaonna janha.”

11

Chojni Israel que chonda iná vida naroaxin

¹ Mexinxin jaxon janha danchiangui: ¿Apoco Dios vengui cain chojni jehe, tti chojni Israel co iXonhi tiempo rrocjan sayé na iná? ¡Seguro que nahi! Ixin janha mismo ná chojni Israel. Janha joixin de razé Abraham co de ngain grupoe Benjamín. ² Desde are saho Dios ndačo ixin chojni Israel, chojni jehe. Co jehe senguiha cain na jai. ¿Achonxinha ra tti ndačo Palabré Dios ngain historié profeta Elías tti joinchecoanxinhi co cjoanguihi chojni Israel ngain Dios? Jehe Elías are mé ndačo: ³ “Chojni Israel nagoenxon na cain profeté co joinchexantte na cain altár soixin. Co jeha janha xehe na, co jehe na rinao na nasoenxon na na cai.” ⁴ Pero Dios ndačo: “Janha coenchjinha yáto mil xí que joinchesayeha xa ídolo Baal.” ⁵ Co tonhe Xajeho jai cai. Dios coinchiehe nchion chojni Israel para joinchetjañe na. Jamé joinchehe Dios ixin jehe anto jian. ⁶ Dios nchetjañe chojni ixin jehe Dios jian. Si Dios jeha rrojinchetjañe tti

chojni que nchehe jian, mé rrocho que ján na ivitjañaha na de ixin tti jian que Dios chonda.

⁷ Mexinxin jihi tti conhe: Chojni Israel vittjaha na tti cjoé na. Jeho tti chojni que Dios coinchiehe, mé nivittja tti jian que Dios chonda. Cain icha chojni cosoji ansén na. ⁸ Inchin ndacho ngain Palabré Dios: “Dios joinchecha ansén na; jehe chjé na jmacon na que čhoha dicon co ndatsjoen na que čhoha ttinhi. Co jamé tetonhe na hasta jai.” ⁹ Cai David ndacho:

Que vandangoe na rrocjamanguia inchin trampa co inchin nonchaha para que jeho mé rrotse chojni co soan na castigado.

¹⁰ Co que jmacon na isiconha jmacon co tsochejo na, co que lomoe na rrožadoho para cainxin tiempo.

Chojni que jeha judío nchao rrochonda na iná vida naroaxin

¹¹ Jai janha danchiangui: ¿Apoco chojni judío are vetsinga na ixonhi tiempo singattjen na iná? ¡Seguro que nahi! Sino que ixin chojni judío vitticaonha na, mexinxin chojni que jeha judío chonda na oportunidad de rrochonda na iná vida naroaxin. Jamé para tsochjio chojni Israel hasta que jehe na cai sinao na vida mé. ¹² Mexinxin tti nchaoha que joinchehe chojni judío cjoí jian para icha chojni ngataha nontte. Co ixin chojni judío concjin de ngain Dios, icha chojni nchao tsonchienen ngain Dios. Mexinxin, si jihi tti conhe ixin chojni judío iditticaonha ngain Dios, ¡seguro anto icha jian tsonhe cain chojni are chojni judío rrocjan sitticaon ngain Dios iná!

¹³ Pero janha chonda tti rrondattjo ra čo jeha judío ra. Ixin Dios chjana ča de representanté Jesucristo ngain chojni que jeha judío, mexinxin janha ndačhjan ixin ča jihi, anto importante ča. ¹⁴ Rinaho que de ixin ča jihi canxion chojni que cai judío na tsochjio na de ixin jaha ra, co sinao na rrochonda na iná vida naroaxin cai. ¹⁵ Ixin si chojni ngoixin mundo tsonohe čhjoin ngattoxon con Dios ixin jai jehe venguí chojni judío mexinxin ¿quehe tsonhe are Dios sayé na iná? Mé inchin vida naroaxin para tti nindadiguenhe. ¹⁶ Ixin si tti saho niottja que tonchjian de ngain nchoho, si niottja mé jiquininxin ngain Dios, rrocho ixin ngoixin nchoho mé jiquininxin ngain Dios. Co si noehe ná nttá jiquininxin ngain Dios, rrocho ixin cain ramé nttá mé jiquininxin ngain Dios cai.

¹⁷ Ná chojni nchao tončhinji ramé ná nntaolivo fino co ngain lugar mé nchetsexin ramé ná nntaolivo cimarrón. Jamé conhe chojni judío; Dios cončhinji canxion chojni judío co saquehe chojni que jeha judío ngain lugué na. Co mexinxin jai jaha ra čo jeha judío ra chonda ra čajeho parte ngain Dios inchin vechonda chojni Israel. Jamé inchin ramé ná nntaolivo cimarrón que ndatsexin nntaolivo fino, rama mé chonda parte ngain noehe co ngain vidé nntaolivo fino. ¹⁸ Pero čaxaonha ra ixin jaha ra icha jian ra que rama que vehe icha saho, rrocho chojni judío. Co si čaxaon ra ixin icha jian ra, čaxaon ra ixin jaha ra vanjoha ra vidá ra ngain noehe nnta, sino que noehe nnta tti chjá ra vida.

¹⁹ Puede rrondačo ra: “Ján ndoa pero tti rama icha saho čhinji rama para janha tsexin na nttiha.” ²⁰ Ndoa, pero jehe na čhinji na ixin vitticaonha na ngain Jesucristo, co jaha ra chonda ra lugar nttiha jeho ixin ditticaon ra ngain Jesucristo. Mexinxin ttonoaha ra orgulloso, sino que ttijho ra cuidado. ²¹ Ixin si Dios joinchetjañaha chojni judío, tti cjoí inchin rama icha saho, cai jaha ra sinttatjañaha ra si chondaha ra

confianza ngain Jesucristo. ²² Tsjexinxin ra, Dios anto jian, pero cai jehe toñao ngain chojni que ndaditján ngain tti jianha. Pero jehe anto jian nganji jaha ra. Pero jaha ra chonda que sinchehe ra sigue dayehe ra jian cain tti jian que danjo Dios. Si nahi, jaha ra cai tsončhinji ra inchin ramé nttá icha saho. ²³ Co cai si chojni judío ʒa rrocjan sitticaon iná, Dios sinchetsexin ngain nttá iná, ixin Dios chonda joachaxin mé. ²⁴ Ixin si jaha ra que jeha chojni judío, pero Dios cončhinji jaha ra de ngain ná nntaolivo cimarrón co joinchetsexin ngain nntaolivo fino; si Dios nchao nchehe jamé, ¡seguro que jehe nchao sinchetsexin rama saho ngain nttá iná; rročho ixin nchao sayé chojni judío iná!

Are chojni Israel rrochonda na vida naroaxin

²⁵ Hermanos, janha rinaho que jaha ra rrochonxin ra cosa jima que Dios sinchehe. Rinaho que jaha ra datsoan ra jiji para ʒaxaonha ra ixin anto noha ra. Co jiji tti ʒaxaon Dios: Masquí tsje chojni Israel ditticaonha ngain Jesucristo jai, pero mé jeho tsončhenhe hasta que ositticaon cainxin chojni que jeha judío que sinao sitticaon ngain Jesucristo. ²⁶ Are tsonhe jiji, cottimeja cainxin chojni Israel sayé na iná vida naroaxin, ixin ngain tti jitaxin Palabré Dios ndačho: Jehe tti danjo iná vida naroaxin tsixin de ngain Sión co jehe sinttjian cain tti jianha de ngain razé Jacob.

²⁷ Co janha sinttachjian trato jiji conixin jehe na are sinttjian cain tti jianha que chonda na.

²⁸ Ixin chojni judío ditticaonha tti jian joajné Jesucristo, mexinxin Dios ningaconhe na. Jamé para rrochjá jaha ra ná oportunidad para sitticaon ra ngain Jesucristo. Pero Dios ʒa rinao chojni judío ixin coinchiehe nindogoelitoe na ʒančhen. ²⁹ Co tti Dios danjo, jehe ʒonhi tiempo dinttjian iná co ʒonhi tiempo ndačho ixin chojni jehe ijeha chojni. ³⁰ Icha saho jaha ra vaguitticaonha ra Dios, pero jai Dios coiaconoaha ra ixin chojni judío incheha na inchin ttetonha jehe. ³¹ Co jai jehe na iditticaonha na, pero mé jeho para que Dios tsiaconoehe na, jamé inchin jai coiaconoaha ra jaha ra. ³² Ixin Dios chjé joachaxin cainxin chojni de sincheha na inchin jehe ttetonha para que jehe nchao tsiaconoehe yahi cain na.

³³ ¡Anto tsje cosa rentte chonda Dios! ¡Co anto nohe co anto ttinxin jehe! ʒonhi chojni nchao ndačho quedonda jehe nchehe tti jehe nchehe, ni ʒonhi chojni nchao ttinxin nttié jehe. ³⁴ Ixin jitaxin ngain Palabré Dios: “¿Quensen ttinxin tti ʒaxaon Dios, tti chonda cain joachaxin? ¿O quensen joinchecoehne Dios? ³⁵ ¿Co quensen nchao rrochjé Dios ná cosa saho, para que después nchao sachá čhonja cosa?” ³⁶ Ixin cainxin cosa joixin de ngain Dios co cainxin cosa conchjian de ixin jehe co para ixin jehe. ¡Dios tsosayehe para cainxin tiempo! Amén.

12

Quexén nchehe chojni que tequininxin ngain Dios

¹ Mexinxin hermanos, ixin Dios anto ttiaconoehne cain chojni, janha nntatsanha ñao ra ixin ʒanjo ra jaha ra mismo ngain Dios, inchin ná ofrenda que jichon, que jiquininxin ngain Dios, co ncheʒoxinhi jehe. Jiji rročho ixin jaha ra ndoa ncheoanxinhi ra Dios, co jiji tti jiquininxin sinchehe ra. ² Ncheha ra inchin ndačho chojni que ditticaonha ngain Jesucristo; sino ttentoxinhi ra joarrixaoan ra para que jamé sintte ra

chojni naroaxin. Co jamé rrochonxin ra tti rinao Dios, rrocho cosa jian, cosa que ncheħoxinhi Dios co tti jian que jiquininxin sinchehe ra.

³ Ixin Dios anto jian, jehe chjana ħa de representanté Jesucristo. Co mexinxin janha rrondattjo ra cain ra, que ħaxaonha ra ixin jaha ra anto jian ra. Pero cada ra chonda ra que ħaxaon ra jian queħén tenchehe ra jai que Dios ojointtanchaon ra de ixin tti confianza que chonda ra ngain Jesucristo. ⁴ Ixin inchin cuerpoe chojni chonda tsje parte, co cainha parte mé nchehe ħajeho ħa, ⁵ jamé cai ján na masqui tsje na, pero ján na inchin nacoa cuerpo. Co ján na te na ngain Jesucristo inchin cain parte de cuerpoe ná chojni.

⁶ Dios ochjá na ojeje joachaxin. Co chjá na cada na tti clase de joachaxin que jehe rinao rrochonda na. Co ján na chonda na que nttogonda na jian tti clase de joachaxin que Dios chjá na. Rrocho, si Dios chjá na joachaxin de ndache na chojni joajna que dayé na de ngain Dios, ján na chonda na que sotticaon na jian ixin Dios ndoa chjá na joajna, co rrondache na chojni joajna que dayé na. ⁷ O si Dios chjá na joachaxin de tsjenguijna na icha chojni, ján na chonda na que tsjenguijna na na jian. Co jehe tti chonda joachaxin para sincheoenhe chojni, chonda que sincheoenhe na conixin ngoi ansén. ⁸ Co jehe tti chonda joachaxin de sincheanimá chojni, chonda que sincheanimá na conixin jian ansén. Co jehe tti tsjenguijna icha chojni conixin tomi ixin Dios jamé rinao, jehe chonda que sanjo tomi conixin jian ansén. Co jehe tti chonda joachaxin para tsetonhe icha chojni, chonda que sicao cuidado de sinchehe jamé pero jian. Co jehe tti chonda joachaxin de tsiaconoehe chojni noa, chonda que tsonohe ħjoin are sinchehe jamé.

Tti chonda que sinchehe chojni que ditticaon ngain Jesucristo

⁹ Rinao chó ra conixin ansean ra roa. Ningaconhe ra cain tti jianha co nchehe ra tti jian. ¹⁰ Chonda ra que rinao chó ra inchin rinao ra xanchó ra; ttjenguijna chó ra co ncherespetá chó ra.

¹¹ Nchehe ra ħá ra conixin ansean ra, co ħonhi tiempo tosaha ra. Co nchehe ra xə Jesucristo conixin ngoixin ansean ra.

¹² Cainxin tiempo contento dintte ra ixin jaha ra chonda ra seguro ixin chonda ra iná vida naroaxin. Co chonda ra paciencia are tangui tsonha ra. Co ħonhi tiempo ttinttohe ra de nchecoanxinhi ra Dios.

¹³ Ttjenguijna ra icha chojni que ditticaon ngain Jesucristo are jehe na dondehe na ħonja cosa. Co jian dayehe ra tti chojni que siji sitsjaha ra.

¹⁴ Nchetsenhe ra ñao Dios ixin jehe sinchenchaon chojni que nchehe feo nganji ra. Nchetsenhe ra ñao Dios ixin jehe sinchenchaon chojni mé, co danchiaha ra cosa jianha para ixin jehe na.

¹⁵ Contento dintte ra ngain chojni que te contento; co tsjanga ra conixin chojni que tetsjanga.

¹⁶ Rinao chó ra ħjoin. Dintteha ra orgulloso, sino que dintte ra inchin chojni que jeha importante. Co ħaxaonha ra ixin anto noha ra.

¹⁷ Si ná chojni sinchehe feo nganji ra, jaha ra ncheha ra feo ngain chojni mé. Tsjehe ra queħén sinchehe ra para que sinchehe ra tti jian ngattoxon con cain chojni. ¹⁸ Nchehe ra cainxin tti jaha ra nchao nchehe ra para sinao ra ħjoin cainxin chojni. ¹⁹ Hermanos que janha anto rinaho, ħonhi tiempo nchehe ra feo ngain chojni que joinchehe feo nganji ra, sino que dittoaxin ra que Dios sinchecastigá chojni mé,

ixin ngain tti jitaxin Palabré Dios ndačo: “Janha tti jiquininxin na sinttacastigá chojni; janha tti tsjengá hna, ndačo Dios, tti chonda cain joachaxin.” ²⁰ Cai ndačo ngain Palabré Dios: “Si ná chojni que jaha ningaonha jidenhe jintta, chjehe jehe tti sine; co si jidenhe jinda, chjehe jehe tti sihi, ixin si jaha jamé sinchehe, jehe anto tsosoé.” ²¹ Dittoaxinha ra que sinttatján ra cosa jianha. Sino que nchetján ra tti jianha de ixin tti jian.

13

¹ Cain chojni chonda que sitticaon na ngain nittetonha ngain gobierno. Ixin xonhi chojni chonda joachaxin para ttetonha si Dios chjehe joachaxin mé. Co cainxin nittetonha mé vayé na joachaxin na de ngain Dios. ² Mexinxin chojni que ttetocaho gobierno, chojni mé ttetocaho tti Dios joinchexhian. Co cain chojni que nchehe jamé sintteca tti jianha co soan castigado. ³ Ixin cainxin chojni que ttetonha ngain gobierno teha para sinchexaon chojni que nchehe jian, sino que para sinchexaon chojni que nchehe tti jianha. Mexinxin çarinao tasarihi co rroxaonha ngain nittetonha? Nchehe tti jian co chojni que ttetonha anto sinao na jaha. ⁴ Ixin nittetonha, mé ninchehe xé Dios que nchehe xa para ttjenguijna jaha. Pero si jaha sinchehe tti jianha, rrochonda que rroxaogen nittetonha mé ixin jehe na ndoa chonda na joachaxin para sinchecastigá na chojni. Nittetonha mé ninchehe xé Dios para sinchecastigá chojni que nchehe jianha. ⁵ Mexinxin jaha ra chonda ra que ditticaon ra ngain nittetonha nganji ra, co jeoha para sayeha ra castigo, sino que cai para que tsonoha ra de ngain ansean ra que chonda que sitticaon ra. ⁶ Co cai de ixin cain jihi jaha ra chonda ra que tsjenga ra hna impuesto ixin nittetonha mé nchehe na xé Dios co jehe na cainxin tiempo nchehe na xa jihi.

⁷ Chjehe ra cada chojni tti jiquininxin. Ngain chojni que jaha ra teca ra contribución, ttjenga ra hna contribución mé. Co ngain chojni que jaha ra teca ra impuesto, ttjenga ra hna impuesto mé. Co ngain chojni que jiquininxin respeto, chjehe ra respeto. Co ngain chojni que jiquininxin sintheadmirá ra, ntheadmirá ra chojni mé. ⁸ Dinttecaha ra ngain ni ná chojni. Jaha ra jehi chonda ra que rinao chó ra. Ixin chojni que rinao icha chojni, mé tti jinchehe cain tti ttetonha ley de Dios. ⁹ Mandamientoe Dios ndačo: “Chondaha ra nchicoxe o xicoxe, co dantsjeha ra vidé iná chojni, ni tteha ra cosé iná chojni ni nichjaha ra cosa ndoaha de iná chojni, ni dinaoha ra rrochonda ra cosé iná chojni”; pero mandamiento jihi co cain icha mandamiento jí ngain jehi palabra que ndačo janhi: “Dinao ra icha chojni inchin rinao ra cuerpoa ra.” ¹⁰ Chojni que rinao icha chojni sincheha feo ngain na, co jamé de ixin tti rinao chó na, ditticaon na nchehe na ngoixin ley que ttetonha Dios.

¹¹ De ixin cain palabra jihi, xaxaon ra ngain quexehe tiempo techon na jai, co onoha ra ixin ojoí tiempo para que ján na rroxingamá na de ngain cottaçhin. Jamé ixin jai anto icha ochiaon jitonchienenhe tiempo para rrochonda na iná vida naroaxin que are coexinhi na gotticaon na joajné Jesucristo. ¹² Tti naxin xehe omerocoa ndajoexin, co jitonchienenhe nchanho. Mexinxin chonda na que isonttoha na cosa que nchehe ni ngain naxin xehe, rroçho cosa jianha, co sonttengá na lonto de chia para sontte na inchin soldado que çhji ngain joadingasán. ¹³ Rroçho

que sonttoho na tti jian, inchin jiquininxin nchehe ni ngain nchanho. Co sontteha na dicoan na, ni sacjiha na ngain vandango tti anto ruido jí, ni rrochondaha na nchicoxe ni xicoxe, ni rrochondaha na vicio, ni tsetocoha chó na, ni rrochondeha chó na joachjoehe. ¹⁴ Pero ján na jian sayé na joajné Jesucristo, que mé tsjenguijna na inchin lontto chia ttjenguijna xisoldado. Co rrořaxaonha na de sonttoho na inchin rinao cuerpoa na.

14

Nichjaha feo de ixin tti nchehe iná chojni que ditticaon ngain Jesucristo

¹ Si ná chojni řa jianha ditticaon ngain Jesucristo, pero dayehe ra chojni mé inchin hermanoa ra co nchediscutiha ra ngain chojni mé cosa que seguroha de ixin tti dotticaon na. ² Jí ná ejemplo: Te chojni que řaxaon ixin nchao jine na cain cosa, co te chojni que řa jianha ditticaon ngain Jesucristo, co chojni mé jineha nttao. ³ Tti chojni que jine cain cosa řhoha sinchehe meno jehe tti jineha cainxin cosa; co tti chojni que jineha cainxin cosa chondaha que rronichja feo de ixin jehe tti jine cain cosa, ixin Dios ovayé jehe chojni mé. ⁴ ¿Co quensen jaha ra para rronichja ra feo de ixin ninchehe řé iná chojni? Ixin si chojni mé sittohe jian o sittoeha jian, pero mé cosé ninajní jehe. Co seguro ixin jehe sittohe jian ixin Dios, tti chonda cain joachaxin, tsjenguijna jehe para sittohe jian.

⁵ Co jí iná ejemplo: Te chojni que chjé icha importancia ngain ná nchanho que ngain iná nchaon, co te icha chojni que řaxaon cain nchanho řajeho nchaon. Naná chojni chonda que tsinchiehe tti jehe sitticaon, co sitticaon jian ngain mé. ⁶ Chojni que řaxaon ixin te nchanho que icha importante que icha nchaon, chojni mé jamé řaxaon para nchesayehe Jesucristo. Co tti chojni que řaxaon ixin cain nchanho řajeho, cai chojni mé jamé řaxaon para nchesayehe Jesucristo. Co chojni que jine cain cosa, jamé jine na para nchesayehe na Jesucristo, ixin chojni mé danjo na gracias ngain Dios para ixin tti jine na. Co chojni que jineha cain cosa, cai jamé nchehe na para nchesayehe na Jesucristo, co jehe na cai danjo na gracias ngain Dios.

⁷ Ixin ni ná de ján na techon na para ixin jaon na mismo, co are ndadenhe na, jeha para ixin jaon na mismo. ⁸ Ixin are techon na, mé para ixin Jesucristo, co are ndasenhe na, mé para ixin Jesucristo cai. Mexinxin are techon na co después de ndasenhe na, ján na chojni Cristo na. ⁹ Ixin Cristo ndavenhe co después jehe xechon iná, para rrochonda cain joachaxin para ixin tti nindadenhe co cai para tti ni řa techon.

¹⁰ Pero jaha ra, ¿quedonda nchejuzgá ra ngain icha chojni que ditticaon Jesucristo? ¿O quedonda nchehe ra meno jehe na? Ixin cain ján na rrochonda na que tsonchienhe na ngattoxon con Cristo para que jehe sinttajuzgá na. ¹¹ Ixin ndařho ngain Palabré Dios:

Inchin anto seguro que janha rrichon, cai anto seguro que cainxin chojni settoxin nttajochjihi na ngattoxon con na janha, ndařho Dios, tti chonda cain joachaxin,

co cainxin chojni rrondařho na ngattoxon con icha chojni ixin janha Dios na.

¹² Mexinxin naná na chonda na que rrondache na Dios cainxin tti nttoho na nntihi ngataha nontte.

Nchetjanjiha ra icha chojni que ditticaon ngain Jesucristo

¹³ Mexinxin ján na chondaha na que rronichja na feo de ixin tti nchehe icha chojni que ditticaon ngain Jesucristo. Co en lugar de mé tsjehe ra quexén sinchehe ra para que sinchetjanjiha ra chojni mé, rrocho que xonhi nchehe ra para sinchencheha ra na cosa jianha. ¹⁴ Janha nona que ni ná cosa que jine chojni ttjoaha, co janha chonda seguro de jihi ixin ditticanho Jesucristo, tti chonda cain joachaxin. Pero si chonja chojni xaxaon ixin ná cosa ttjoaha para jine ni, mexinxin para ixin jehe, cosa mé ttjoaha. ¹⁵ Co si de ixin tti jintte jaha, iná chojni que ditticaon Jesucristo tonohé feo, mé rrocho ixin are jintte cosa mé jaha irinaoha chojni mé. Dittoaxinha que ndasitján ná chojni que Jesucristo ndavenhe para cjoengujna, jehó ixin jaha rinao jintte chonja cosa que chojni mé ndacho ixin ttjoaha. ¹⁶ Chjeha ra icha chojni oportunidad de rronichja na jianha de ixin cosa que jaha ra ndacho ra ixin jian. ¹⁷ Ixin ngain tti ttetonha Dios jeha importante tti jine ni co tti dihi ni, sino que tti importante, mé ná vida jian, co tti chjoin que tsonohe ansean ra co ixin contento sintte ra. Cain mé tti danjo Espíritu Santo. ¹⁸ Jehe tti nchehe xé Cristo inchin cain jihi, chojni mé nchehe tti nchexoxinhi Dios co icha chojni rronichja jian de ixin jehe chojni mé cai.

¹⁹ Mexinxin ján na sonttoho na sigue tsjé na tsje cosa que tsonohe chjoin ngain ansean na ixin conixin cain mé ján na nchao tsjengujna chó na para icha jian sotticaon na. ²⁰ Xonhi cosa nchehe que sinchetján tti joinchehe Dios ngain vidé iná chojni de ixin tti jintte. Seguro ixin chojni nchao jine quexeho cosa, pero jianha para jine ni ná cosa que sinchetjanji iná chojni para sinchehe cosa jianha. ²¹ Anto jian si chojni sineha nntao, ni diha vino, ni xonhi iná cosa nchehe que sincheyehe iná chojni que ditticaon ngain Jesucristo, o que sinchenchehe jehe cosa jianha, o que sinchesojiha de ngain confianza que jehe chonda. ²² Tti jaha ditticaon de ixin cain cosa jihi ndache jehó Dios. ¡Anto chjoin para ixin tti chojni que tonohé feo are jehe nchehe ná cosa que jehe ndacho ixin jian! ²³ Pero tti chojni que jine ná cosa co chondaha seguro que mé jian, Dios sinchecondená chojni mé, ixin jehe mé chondaha seguro si Dios ndacho ixin jian cosa mé para sine. Ixin jianha nntofo na are nttofo na ná cosa co chondaha na seguro si Dios chjá na joachaxin para nttofo na jamé.

15

Nchehe tti nchexoxinhi icha chojni co jeoha tti nntaxoxinhi jaha

¹ Já n na xo dotticaon na jian ngain Jesucristo choha sonttofo na jehó inchin jaon na rinao na, sino que chonda que tsjengujna na tti chojni que xa jianha ditticaon ngain Jesucristo para que jehe na icha tsosoji na de ngain confianza para ngain Jesucristo. ² Naná já n na chonda na que sonttofo na tti nchexoxinhi icha chojni para tsjengujna na jehe na para que sinttotsje na confianzé na para ngain Jesucristo. ³ Ixin Cristo cai joincheha inchin jehó joinchexoxinhi; sino que conhe inchin ndacho ngain Palabré Dios: “Tti cosa feo que chojni ndacho de ixin soixin, vetsingataha na janha.” ⁴ Ixin cain cosa que vetaxin icha saho ngain Palabré Dios, cain cosa mé chojni Dios dicjin na para tsjagoa na na de ixin Dios, para que já n na rrochonxin na jian que ixin Dios danjo ngain chojni iná vida nroaxin, co de ixin jihi rrochonda na paciencia co consuelo que danjo tti Palabré Dios. ⁵ Que Dios, tti danjo paciencia co consuelo,

tsjenguijna ra para sintte ra çhjoin ngain icha chojni, inchin ndaço Jesucristo. ⁶ Jamé para que cain ra junto, xá nacoa tté chojni tsinhi ni, sinchecoanxinhi ra Dios, Ndodé Jesucristo, tti chonda cain joachaxin.

Tti jian joajné Jesucristo cai para ixin chojni que jeha judío

⁷ Mexinxin dayehe chó ra inchin Cristo vayá na ján na; jamé nchehe ra para nchesayehe ra Dios. ⁸ Ixin janha ndattjo ra que ixin Cristo jói ngataha nontte para tsjenguijna chojni judío co jañá joinchehe ngain na para joiconhe tti joincheprometé Dios are saho ngain nindogelitoa na, co jamé cjoago ixin Dios ndoa nchehe tti ncheprometé. ⁹ Cai jehe jói ngataha nontte para que chojni que jeha judío sinchecoanxinhi Dios ixin jehe anto ttiaconoehé chojni, inchin ndaço ngain Palabré Dios: Mexinxin janha sinttacoanxinha soixin ngayé chojni que jeha judío co janha rrotsje na himno para sinttasayaha soixin.

¹⁰ Co ngain iná parte de Palabré Dios ndaço:

Chaha ra xó jeha judío ra conixin jaha ra xó chojni Dios.

¹¹ Co ngain iná parte de Palabré Dios ndaço:

Nchecoanxinhi ra Dios, tti chonda cain joachaxin, cainxin ra xó jeha judío ra

co cain ra nichja ra de ixin tti joachaxin que jehe chonda.

¹² Co Isaías dicjin:

Tsoncijihi ná tti tsixin razé Isaí

que mé Dios tsín para tsetonhe cain chojni que jeha judío;

co jehe nimé tsí na ngain jehe para rrochonda na iná vida naroaxin.

¹³ Que Dios, tti chjá na confianza de rrochonda na iná vida naroaxin, tsjenguijna ra para anto rrochaha ra co anto çhjoin tsonohe ansean ra ixin ditticaon ra ngain jehe, para que de ixin joachaxín Espíritu Santo jaha ra anto tsje confianza rrochonda ra de rrochonhe ra tti iná vida naroaxin que tsí.

¹⁴ Hermanos, janha chonda seguro ixin jaha ra anto jian ra ngain icha chojni co anto jian chonxin ra, co ixin anto noha ra quexén chjehe chó ra jian consejo. ¹⁵ Pero ngain carta jihi janha xaonha na para cjinha ra anto claro de ixin cain cosa jihi para que xonhi rrotjañaha ra. Janha jamé jointtaha ixin Dios, tti anto jian, chjana xa ¹⁶ de nttaha xé Jesucristo ngayé chojni que jeha judío. Janha ndaçhjan na tti joajné Dios que danjo iná vida naroaxin ngain cainxin chojni para que janha nchao sanjo tti chojni mé ngain Dios, co jehe Dios sinao sayé na ixin Espíritu Santo osincheroa na.

¹⁷ Ixin janha ditticanho Jesucristo, mexinxin janha tonona çhjoin de ixin xa que nttaha para ixin Dios, ¹⁸ ixin janha nichja jehó tti Jesucristo joinchehe de ixin janha para que jai chojni que jeha judío ditticaon na ngain Dios co nchehe na inchin ndaço jehe. Co jihi joiconhe conixin palabra que jehe joinchenichja na co de ixin tti jehe joinchehe conixin janha, ¹⁹ co de ixin señas co milagros co joachaxín Espíritu Santo. Co jamé janha joexin ndattjan chojni tti jian joajné Jesucristo desde ciudad de Jerusalén co cainxin lugar hasta regioen Ilírico. ²⁰ Mexinxin janha cainxin tiempo joinaho nichja tti jian joajna mé ngain lugar tti chojni xa coinha de ixin Cristo, para que janha xonhi tiempo sinttaha sigue sinttaha xa que iná chojni nchequexinhi. ²¹ Sino que icha jian tonhe inchin ndaço ngain Palabré Dios:

Chojni que xonhi tiempo coinhi joajné jehe, mé sicon na jehe,

co chojni que xonhi tiempo coinhi de ixin jehe, nimé ni tsinxin de ixin jehe.

Pablo xaxaon tsji Roma

²² Co ixin janha varichonda tsje xa, mexinxin choha joasotsjaha ra, masqui tsje nttiha janha joinao rrogasotsjaha ra. ²³ Pero jai janha ojoexin xana ngain región jihi, co ixin chonda tsje nano que janha rinaho saso sasotsjaha ra, ²⁴ jai xaxanho ixin satto nttiha para sasotsjaha ra are satsji España. Co después de osasotsjaha ra, xaxanho que puede jaha ra tsjenguijna ni ra para sinttaviajá tti tsji. ²⁵ Pero jai janha tsji Jerusalén para tsinha tomi ngain chojni que ditticaon Jesucristo nttiha. ²⁶ Ixin chojni ngain nihngo ngain Macedonia co Acaya xaxaon na joatsetaonhe chó na tomi para rroanha na ngain chojni Jesucristo que anto noa ngain Jerusalén. ²⁷ Jehe na joinchehe na jamé ixin xaxaon na ixin mé jian, co ndoa jihi jian, ixin ndoa cai que chojni ngain Macedonia co Acaya teca na ngain tti ni ngain Jerusalén. Ixin de ixin chojni judío, tti chojni que jeha judío nchao rrochonda iná vida naroaxin. Mexinxin chojni que jeha judío co ditticaon ngain Jesucristo co chonda iná vida naroaxin chonda que tsjenguijna conixin tomí na tti chojni judío que ditticaon ngain Jesucristo. ²⁸ Mexinxin are janha tsjexin xana co sanjo tomi mé ngain chojni de Jerusalén, cottimeja satsji España co are mé satto sasotsjaha ra cai. ²⁹ Janha chonda seguro que are janha tsji nganji ra, Dios anto sinchennaon tti jian joajné Jesucristo que janha rroundattjo ra.

³⁰ Hermanos, janha nttatsanha ñao ra por ixin Jesucristo, tti chonda cain joachaxin para ixin ján na, co de ixin Espíritu Santo, tti ttjenguijna na para rinao chó na, nttatsanha ñao ra de ixin mé que sinchetsenhe ra ñao Dios para ixin janha. ³¹ Nchetsenhe ra ñao Dios que tsjenguijna na para que xonhi tsonna de ngain chojni que ditticaonha Jesucristo ngain Judea, co ixin chojni que ditticaon Jesús ngain Jerusalén jian sayena na janha conixin tomí que tsjinha. ³² Jamé para que si Dios rinao janha saso sasotsjaha ra co anto rrochahna co nchao sinttajogaha are sasotsjaha ra jaha ra. ³³ Que Dios, tti danjo tti chjoin que tonohe ansén ni, sehe nganji ra. Amén.

16

Joajna que cjoihí cada chojni

¹ Janha rrinttatsanha ñao ra que dayehe ra jian hermana Febe, nchí que joinchehe xé Dios ngain nihngo que jí ngain rajna Cencrea. ² Dayehe ra nchí jihi jian de ngain nombré Jesucristo, inchin jiquininxin nchehe cain chojni que ditticaon ngain Jesucristo, co ttjenguijna ra ncha de ngain quexeho cosa que sondehe ncha, ixin jehe ncha cjoenguijna ncha tsje chojni que ditticaon ngain Jesucristo, co cai cjoenguijna na ncha janha mismo.

³ Chjehe ra joajna cai ngain nchí que dinhi Priscila co xixihi que dinhi Aquila, tti compañerona ngain xé Jesucristo. ⁴ Cayoi chojni jihi coín na vidé na en peligro para cjoenguijna na na janha para venha na. Mexinxin janha chjaha cayoi na gracias, co jeoha janha rrichjaha na gracias, sino que cai cain chojni que jeha judío pero ditticaon ngain Jesucristo. ⁵ Chjehe ra joajna cai cain tti chojni que ditticaon ngain Jesucristo, ni xatte ngain nchiandoha Priscila co Aquila. Chjehe ra joajna xiamigona Epeneto que janha anto rinaho, ixin xí jihi tti saho vitticaon

ngain Jesucristo de cainxin chojni ngain regioen Acaya. ⁶ Chjehe ra joajna María, tti anto joinchehe xa ngayaha jaha ra. ⁷ Chjehe ra joajna Andrónico co Junias tti vintequixin rajnana co tti vintteguiaxinhi ngain cárcel conixin janha. Cain nirepresentanté Jesucristo anto jian chonxin cayoi xí jihi, co jehe xa icha saho vitticaon xa ngain Jesucristo que janha.

⁸ Chjehe ra joajna Amplias, xiamigona que janha anto rinaho que ditticaon xa ngain Jesucristo. ⁹ Chjehe ra joajna Urbano, xicompañeroa na de ngain xé Jesucristo, cai chjehe ra joajna Estaquis, xiamigona que anto rinaho. ¹⁰ Chjehe ra joajna Apeles, tti ocjoagoa na tsje nttiha ixin jehe anto jian ditticaon ngain Jesucristo. Cai chjehe ra joajna cain nifamilié Aristóbulo. ¹¹ Chjehe ra joajna Herodión, tti joixin de rajnana. Co cai chjehe ra joajna cain nifamilié Narciso que cain nimé ditticaon na ngain Jesucristo. ¹² Chjehe ra joajna Trifena co Trifosa, nchí que dinttenchehe xé Jesucristo. Chjehe ra joajna na Pérsida, nchí que ján na anto rinao na; jehe anto joinchehe xé Jesucristo cai. ¹³ Cai chjehe ra joajna Rufo, tti anto jian ditticaon ngain Jesucristo, co cai janné tti cjoí inchin ná jannana janha. ¹⁴ Chjehe ra joajna Ansíncrito, co Flegonte, Hermas, Patrobas, Hermes, conixin cain chojni que ditticaon Jesucristo nttiha. ¹⁵ Chjehe ra joajna Filólogo, Julia, Nereo conixin nchichó Nereo, Olimpas conixin cain chojni que ditticaon ngain Jesucristo que te ngain nimé.

¹⁶ Naná ra chjehe chó ra joajna jian. Cain chojni nttihi que ditticaon ngain Jesucristo roanha na joajna para ixin jaha ra.

¹⁷ Hermanos, janha nttatsanha ñao ra que ttjiho ra cuidado de ngain tti chojni que nchechjian división co ttín na cosa que nchetjanji chojni. Cayoi cosa jihi ningaconhe tti jaha ra coangui ra de ixin Jesucristo. Jaha ra dačhjenda ra de ngain chojni mé. ¹⁸ Ixin cain chojni que nchehe mé nchesayeha na Jesucristo, tti chonda cain joachaxin para ixin ján na, sino que chojni mé nchehe na inchin rinao cuerpoe na, co ncheyehe na chojni que nandá ttexinhi ditticaon ngain Jesucristo, conixin tti anto čjoin que jehe na nichja na. ¹⁹ Cainxin chojni ngoixin mundo nohe na quexén jaha ra vitticaon ra nchehe ra tti ndačo Jesucristo; mexinxin janha anto chahna jai, co janha rinaho que jaha ra sintte ra listo para sinchehe ra joxon cosa jian, pero que sincheha ra cosa jianha. ²⁰ Co Dios, tti danjo tti čjoin que tonohé ansén chojni, mé tti toin sinchettegoa Satanás ngangui rottea na. Que Jesucristo, tti chonda cain joachaxin para ixin ján na, sinttanchaon ra.

²¹ Nttihi Timoteo, tti xicompañerona de ngain xé Jesucristo, rroanha joajna para ixin jaha ra; cai Lucio, Jasón co Sosípater, tti nijoixin de ngain rajnana rroanha na joajna para ixin jaha ra cai.

²² Janha que dinhi na Tercio, que rricjin na carta jihi para ixin Pablo, cai rriroanha joajna para ixin jaha ra de ngain nombré Jesucristo.

²³ Cai Gayo rroanha joajna para ixin jaha ra. Janha nttihi rrihi ngain nchiandoha jehe Gayo, tti nchia que Gayo nchecjen cain chojni que ditticaon ngain Jesucristo para que jehe na nchegonda na para servicio. Cai Erasto, tti tesoroero de ngain ciudad jihi rroanha joajna para ixin jaha ra co cai tattita que dinhi Cuarto, tti ditticaon ngain Jesucristo, rroanha joajna para ixin jaha ra.

²⁴ Que Jesucristo, tti chonda cain joachaxin para ixin ján na, que jehe sinchenchaon nganjí ra cainxin ra. Amén.

Nttihi joexinxin joajna jihi

²⁵ Co jai nttocoanxinhi na Dios, tti nchao icha sinttajian na de ixin tti joajna que danjo iná vida naroaxin que joajna mé tti janha ndačhjan co nttacoán chojni de ixin Jesucristo. Co cai joajna mé xajeho palabra que Dios xaxaon icha saho que nontte rroquehe, pero desde mé joajna jihi vema joajna. ²⁶ Pero jai Dios, que jí para cainxin tiempo, jehe jinchenohe cain chojni joajna mé de ixin cain xón que dicjin profeté are saho. Jamé joinchehe Dios para que jai chojni de cain nación sitticaon na co sinchehe na tti ndačo jehe.

²⁷ ¡Jeho nacoa Dios, mé tti nohe cainxin cosa, co jehe tti jiquininxin tsosayehe para cainxin tiempo de ixin tti joinchehe Jesucristo! Amén.

Saho Carta Que Dicjin Pablo Para Ixin Chojni Que Ditticaon Jesucristo Ngain Ciudad De Corinto

Pablo chjé joajna chojni Corinto

¹ Janha Pablo na, tti Dios vayahna janha para rrihi ná representanté Jesucristo. Janha co Sóstenes² techjaha ra joajna ngain carta jihi para ixin cain jaha ra que ditticaon ra Dios, xo te ra ngain ciudad de Corinto; jaha ra xo tequininxin ra ngain Dios ixin jaha ra anto ditticaon ra Jesucristo. Dios vayaha jaha ra ngain ná vida jian, jaha ra conixin cain chojni de cain lugar tti nichja na jian de ixin nombré Jesucristo, tti chonda joachaxin para ixin ján na. Jehe tti chonda joachaxin para ixin jehe na, co para ixin ján na cai. ³ Dios Nnodá na, co Jesucristo, tti chonda joachaxin para ixin ján na, sinchenaon nganji ra co rrochjá ra tti chjoin que tsonohe ansean ra.

Quexén nchenaon Dios chojni por ixin Jesucristo

⁴ Janha siempre chjaha gracias ngain Dios de ixin jaha ra ixin Dios jointtanchaon jaha ra de ixin Jesucristo. ⁵ Ixin ditticaon ra Cristo, Dios chjá jaha ra cainxin joachaxin de ngain cain tti jaha ra nichja ra co ngain cain tti jaha ra noha ra. ⁶ Tti ndattjo ra de ixin Cristo jaha ra ndoa vayehe ra. ⁷ Co jamé sinchetjanha ra ni ná cosa que danjo Dios jaxon que xa techonhe jaha ra tti nchanho que Jesucristo, tti chonda joachaxin para ján na, rrocjan tsí iná. ⁸ Jehe tti sinchesoji ansean ra hasta are ndasenne ra para que ni ná ra xonhi jianha sintteca ra are tsí Jesucristo, tti chonda joachaxin para ixin ján na. ⁹ Dios siempre nchehe tti jehe ndačo, co jehe tti vayaha jaha ra para que te ra jai, jaha ra conixin Jesucristo, Xenhe Dios co tti chonda joachaxin para ixin ján na.

Tti ndačo Pablo de ixin chojni Jesús que dačhjenjehe chó

¹⁰ Nttatsanha ñao ra de ixin nombré Jesucristo, tti chonda joachaxin para ixin ján na, que dintte ra de acuerdo co dačhjenjehe chó ra. Dintte ra nacoaxinxon grupo, co nacoaxinxon forma de xaxaon ra co de tsonohe ngain joarrixaoan ra. ¹¹ Janha ndačhjan jihi nganji jaha ra ixin nindoha Cloé ndachjenji na na janha ixin jaha ra toñaöhe chó ra. ¹² Janha ndačhjan que jaha ra toñaöhe chó ra ixin cada jaha ra nichja ra ojejé; canxion ra ndačo ra: “Janha chojni Pablo na”; co icanxin ra ndačo ra: “Janha chojni Apolo na”; co icanxin ra ndačo ra: “Janha chojni Pedro na”; co icanxin ra ndačo ra: “Janha chojni Cristo na.” ¹³ Pero, çapoco Cristo rinao que chojni sačhjenjehe chó na? ¿Apoco janha Pablo na goan na crucificado para ixin jaha ra? ¿O ani joiguite jaha ra para sintte ra jecho chojnina? ¹⁴ Janha chjaha gracias ngain Dios ixin janha jointtaguiteha ni ná jaha ra, jecho Crispo co Gayo tti jointtaguite janha. ¹⁵ Jañá ni ná chojni choha rrondačo na ixin joiguite na para sintte na chojnina janha. ¹⁶ Ján, cai jointtaguite cain nindoha Estéfanos, pero janha xaxanho que ijointtaguiteha icha chojni. ¹⁷ Cristo coetonnaha para sinttaguite chojni. Jehe coetonna para rrondattjan chojni quexén sinchehe na para sayeha na castigo de ixin tti jianha que nchehe na, pero janha nichjaha conixin joxon palabra chjoin inchin ncheçoxinhi chojni,

ixin janha nichja jeho de ixin quedonda Cristo ndavenxin nganito cruz, co jiji tti icha rentte para que chojni tsonohe.

Cristo chonda joachaxín Dios, co jehe chonxin quexehe cosa jian inchin Dios chonxin

¹⁸ Are chojni que ndaditján ngain vicio ttinhi na tti joajna de ixin quedonda ndavenxin Cristo nganito cruz, jehe na xaxaon na ixin mé xonhi xé, pero para ján na que chonda na iná vida naroaxin que sehe para cainxin tiempo, joajna mé chonda joachaxín Dios. ¹⁹ Inchin ndačo ngain tti jitaxin Palabré Dios:

Janha tsjago ixin xonhi xé tti anto chonxin chojni que anto nohe cosa de ngataha nontte,

co janha tsín ndaha joarrixaoen tti chojni que chonda seguro ixin anto jian ttinxin de tti nohe jeho.

²⁰ Mexinxin xonhi rentte tti xaxaon chojni que anto chonda seguro ngain tti jehe na xaxaon na, co tti anto nohe, co tti anto tjao chó de ixin cosa de ngataha nontte nttihi. Dios cjoago ixin tti xaxaon chojni que ditticaonha Jesucristo, mé xonhi xé. ²¹ Dios jehe nohe nchehe cain cosa jian. Co jehe coančjanda cain chojni que jeho nchexoxinhi na cosa de ngataha nontte para que rrochonxinha na quehe rinao jehe Dios, ixin tti jehe na nohe na xonhi xé mé para ixin Dios. Pero jehe Dios conixin joajné coančjandaha tsji ngain infierno tti chojni que chonda confianza ngain jehe Dios. Masqui tti chojni que ditticaonha xaxaon na que joajna jiji xonhi xé.

²² Ni chojni judío ni chojni griego rinaoha na sitticaon na tti jian joajné Jesucristo. Ixin chojni judío icha rinao na sicon na señal de milagro, co chojni griego icha rinao na ttjé na de quexén tsonohe na quexén rrochonxin na icha de ngataha nontte nttihi. ²³ Pero janha na ndattjan na cain chojni de ixin Cristo que goan crucificado. Co chojni judío are ttinhi na ixin Jesús goan crucificado, jehe na xaxaon na que mé xa jeha Cristo mero, mexinxin xa čhoha na ditticaon na. Co tti chojni que jeha judío, jehe na ndačo na ixin xonhi xé tti janha na ndačhjan na. ²⁴ Pero para tti chojni que Dios coinchiehe, masqui chojni judío o chojni griego, pero ttinxin na que Cristo chonda joachaxín Dios co jehe ttinxin cainxin tti nchehe Dios. ²⁵ Ixin masqui jí chojni que ndačo ixin tti nchehe Dios xonhi xé, pero jehe mé icha jian que cain tti jian que nchehe chojni ngataha nontte. Co masqui jí chojni que ndačo ixin tti nchehe Dios sojiha joachaxin chonda, pero jehe mé icha soji joachaxin chonda que tti joachaxin que chonda chojni ngataha nontte. ²⁶ Jaha ra chonda que rroxaxaon ra quexén vayaha ra Dios. Jehe vayaha ra masqui tsjeha ra chonxin ra jian tti nohe chojni ngataha nontte, co masqui tsjeha ra chonda ra joachaxin ngain icha chojni ni nindoi ra importanteha na ngain autoridad. ²⁷ Jaha jamé ixin Dios coinchiehe de ngataha nontte tti chojni que icha xonhi chonxin para sinchecosoé na tti chojni que anto chonxin. Co Dios coinchiehe de ngataha nontte tti chojni que chondaha ni rioho joachaxin ngataha nontte para sinchecosoé na tti chojni que chonda anto tsje joachaxin. ²⁸ Dios coinchiehe chojni que xonhi importancia chonda ngataha nontte, tti chojni que icha chojni rinaoha na jehe, rročo ixin Dios coinchiehe tti chojni que icha chojni xaxaon ixin xonhi rentte, para tjago que ngattoxon con Dios xonhi rentte tti chojni que chonda importancia nttihi ngataha nontte. ²⁹ Jamé

joinchehe Dios para que ñonhi chojni nchao tsonohe ixin jehe icha jian ngattoxon con Dios. ³⁰ Pero Dios mismo jointtauní jaha ra ngain Jesucristo. Co Dios ndaño cai que de ixin Cristo ján na rrochonxin na jian de ixin Dios, co de ixin tti joinchehe Cristo, Dios itoñaoha nganji ján na co joxon jian na para ngain Dios, co ixonhi tsonhe almá na. ³¹ Mexinxin inchin ndaño ngain tti jitaxin Palabré Dios: “Si ñonja ra rinao ra tsonoha ra orgulloso, tonoha ra orgulloso pero de ngain Dios.”

2

Joajné Cristo que goan crucificado

¹ Ttinhí jaha ra, are janha joasondattjo ra tti ndoa de ixin Dios, janha jointtagondaha palabra anto tanguí co ni palabra que nchegonda chojni anto importante. ² Are janha joarihi ngayaha ra, janha joinaoha conona de icha cosa, jeho de ixin Jesucristo co de ixin quehe rroño que Jesucristo goan crucificado. ³ Are janha joaso nganji ra janha ña sojiha na co ñanga na de joañaon. ⁴ Co are nichjaha ra co ndattjo ra jehe jian joajné Jesucristo, janha joinaoha jointtaguitticaon jaha ra conixin palabra tanguí inchin palabré chojni que anto chonxin. Janha jaha jamé jointtaha, pero conixin Espíritu Santo co joachaxín Dios janha jointtaguitticaon jaha ra. ⁵ Mexinxin jaha ra ditticaon ra ngain Jesucristo ixin vicon ra joachaxín Dios co jaha ixin coinhi ra palabré ná chojni que anto chonxin cosa nttihi ngataha nontte.

Dios rroanha Espíritu Santo para rrochonxin ni jehe por ixin Espíritu Santo

⁶ Pero ixinha jamé, are janha ttji ngayehe tti chojni que ditticaon jian ngain Jesucristo, janha na nichja na conixin palabra tanguí. Pero palabra jihi jaha de ixin chojni nttihi ngataha nontte, ni de ixin cain tti ttetonha nttihi ngataha nontte ixin tti nohe chojni nttihi ngataha nontte, mé chonda que ndatsjexin. ⁷ Tti tanguí que janha na nichja na joixin de ngain Dios, co mé rroño tti ñaxaon Dios para que jehe rrochjá na vida que ñonhi tiempo tsjexin. Jihi tti ñaxaon Dios icha saho que jehe rrojinchechjian nontte. Pero ñagoha nganji na hasta ndavenja Jesucristo. ⁸ Ni ná xí que ttetonha ngataha nontte jihi ttinxinha xa jihi, ixin si rroguinttequinxin xa, rrojinchecrucificaha xa Jesús que joixin de ngajni. ⁹ Pero conhe inchin jitaxin ngain Palabré Dios:

Cosa que ñonhi chojni vicon ni coinha na,
ni ñonhi chojni ñaxaon,

pero mé tti ñaxaon Dios para cain chojni que jehe na rinao na jehe.

¹⁰ Dios jointtagatsoan na cosa jihi de ixin tti Espíritu Santo que jehe rroanha, co Espíritu mé tti chonxin cain cosa co hasta cain cosa que jima ngain Dios.

¹¹ Ixin ¿quensen nchao rrochonxin quehe jiñaxaon ansén iná chojni? Chonda que jeho espiritue chojni mé tti nohe. Jamé cai Espíritu Santo tti nohe quehe ñaxaon Dios. ¹² Tti ján na coanguí na jaha tti ñaxaon chojni de ngataha nontte jihi; ján na vayé na Espíritu Santo que joixin de ngain Dios para que ján na tsinxin na cain lo que Dios chjá na. ¹³ Janha na nichja na de ixin cosa jihi conixin palabra que joinchecoanna na Espíritu Santo de Dios, co jaha de ixin palabra que janho na coanguí na. Jañá ndachjan na cosa de Espíritu Santo ngain chojni que Espíritu mé jí ngain.

¹⁴ Tti chojni que coha Espíritu Santo ngain, jehe čhoha dayé cosa que ttixin de ngain Espíritu mé ixin para chojni mé xonhi xé cain cosa de Espíritu Santo. čhoha ttinxin chojni mé cosa de Dios ixin cain cosa de čhoha chonxin na si jian o ni nahi ixin coha Espíritu Santo de Dios ngain na. ¹⁵ Pero tti chojni que jí Espíritu Santo de Dios ngain, jehe nchao rrochonxin quehe rročo cain cosa, co xonhi chojni nchao rrondačo de ixin quehe jinchehe jehe tti chojni que jí Espíritu mé ngain. ¹⁶ Tti jitaxin Palabré Dios ndačo: “xonhi chojni ttinxin tti jiřaxaon jehe tti chonda cainxin joachaxin. Co xonhi chojni nchao sehe maestro ngain Dios.” Pero ixinha mé, ján na noa na tsje de tti jiřaxaon Jesucristo.

3

Chojni que nchehe xé Dios

¹ Are janha joarihi nganji ra, hermanos, janha čhoha nichja nganji jaha ra inchin janha rronichja ngain tti chojni que tenchehe inchin rinao Espíritu Santo. Sino que janha nichja nganji ra inchin ngain tti chojni que coha Espíritu Santo ngain. Janha nichja nganji ra inchin are nichja ni ngain xannchinnchinchjan que řa chondaha tsje experiencia, jamé jaha ra cai řa chonxinha ra jian de ixin Cristo. ² Tti janha jointtacoanha ra tanguiha inchin ná xanletsjochjan que řa tai. Dayé xan tsjin en lugar de nio co ndařa. Co inchin jamé vinte jaha ra cai. Inchin estomagoe ná xanletsjochjan čhoha dayé nio co ndařa, jamé jaha ra cai čhoha coinxin ra tti tetonha Cristo. Co ni jai řa čhoha ttinxin ra ³ ixin jaha ra řajeho inchin cain icha chojni. Ixin jaha ra řa chjoaha ra, řa ningaconhe chó ra, co řa chonda ra división. Mexinxin jaha ra jeho inchin cain icha chojni co tenchehe ra inchin nchehe cain chojni. ⁴ Ixin are ná ra ndačo ra: “Janha chojni Pablo na”, co iná ra ndačo ra: “Janha chojni Apolo na”; are jaha ra ndačo ra jaňá, jaha ra tenchehe ra inchin nchehe cain icha chojni.

⁵ ¿Quensen janha Pablo? co ¿quensen jehe Apolos? Cayoi janha na řajeho ninchehe xé Dios co de ixin janha na jaha ra vitticaon ra Jesucristo, tti chonda cainxin joachaxin. Cada na janha na jointtaha na tti řa que Dios coetonna na. ⁶ Janha inchin tti ttenga noa ngataon jngui, jamé coín palabré Dios ngain ansean ra; co Apolos inchin tti chjé jino jinda, ixin jointtanimá ra. Pero Dios tti joinchegangui fe ngain ansean ra inchin are jehe nchegangui jino ngataon jngui. ⁷ Mexinxin xonhi rentte ni tti ttenga noa ni tti chjé jino jinda; jeho Dios tti rentte ixin jehe nchegangui cain cosa. ⁸ Mexinxin tti ttenga co tti chjé jinda řajeho nataonxin, pero Dios ttjenguehe na hna cada na inchin řa que jehe na nchehe na. ⁹ Cayoi janha na compañero na de ngain xé Dios co jaha ra inchin jngui que Dios jinchehe řa.

O cai, jaha ra inchin ná nchia jie que Dios jinchechjan. ¹⁰ Janha inchin ximaestro albañil co Dios chjana joachaxin para coín base. Co jé ni tettette nchia ngataha base. Pero cada na rrochonda na cuidado quexén tsette na nchia ngataha base ¹¹ ixin xonhi iná chojni nchao tsín iná base que jeho base que ojí, co jehe base mé jehe mero Jesucristo. ¹² Co cada maestro nchao tsette quexeho clase de nchia ngataha base jihi, nchia de oro, de plata, co řo que anto fino inchin marmol, o nchia de nntatabla, de ntanehe co cachji. ¹³ Co are Jesucristo tsí conixin řohi para rrondačo quehe tsonhe, cottimeja tsonohe cada maestro mé

quehe clase de nchia dinchechjian. Ixin cada nchia mé chonda que rroche nchia. ¹⁴ Co si çhonja maestro dinchechjian nchia que rrocheha, maestro mé rroxenguehe hna. ¹⁵ Pero tti maestro que dinchechjian nchia que ndarroche, maestro mé ndasinchetján cainxin, masqui jehe mismo çonhi tsonhe, co jehe inchin ná chojni que sattingaxin de ngain ná çohi.

¹⁶ ¿Apoco noaha ra que ixin jaha ra tti nihngo para ixin Dios co Espíritu Santo jí nganji ra? ¹⁷ Si çhonja chojni sinchexante ningoe Dios, Dios sinchexante jehe chojni mé cai ixin ningoe Dios anto jian ningo ngattoxon con jehe, co jaha ra tti jehe nihngo mé.

¹⁸ Masqui anto noha ra pero çaxaonha ra ixin anto ttinxin ra jian. Si ttoha ra tonoha ra que ixin anto noha ra inchin çaxaon chojni nttihi ngataha nontte, chonda ra que rrocjan ra inchin tti chojni que çonhi nohe para que sintte ra tti chojni que ndoa nohe, ¹⁹ ixin tti nohe chojni ngataha nontte nttihi çonhi xé para ixin Dios. Tti jitaxin Palabré Dios ndaço: “Dios nchenchehe tti chojni que anto nohe para que tti jehe na nchehe na çonhi xé.” ²⁰ Cai ndaço ngain Palabré Dios: “Jehe tti chonda cain joachaxin nohe que çonhi rentte tti çaxaon cain chojni que anto nohe.” ²¹ Mexinxin ni ná jaha ra chondaha ra que tonoha ra orgulloso ixin tangui ra de ngain ná chojni maestro, ixin cainxin maestro co cainxin cosa jian Dios çhjá ra para tsjenguijna ra ngain tti ditticaon ra. ²² Pablo, Apolos, Pedro, ngoixin mundo, vida, tti ndadenhe ni, tiempo jaxon, tiempo tsí, cainxin mé para tsjenguijna jaha ra. ²³ Co jaha ra chojni Jesucristo co Jesucristo joixin de ngain Dios.

4

Tti xa que joinchehe cain nirepresentanté Jesucristo

¹ Jañá chonda ra que rroçaxaon ra que janha na jehó ninchehe xé Jesucristo. Janha na tti vitonna na para rronichja na tti jima de ixin Dios. ² Nchao remé, ná tti ditonhe ná cosa chonda que sinchehe cosa mé jian para jamé chojni sicon na que jehe ná chojni de confianza. ³ Pero para ixin janha, antoha tá joachjaon de ixin tti nichja chojni de ixin janha, jaha ra o ngain ná juzgado tti ttetonha chojni nttihi ngataha nontte. Ni janha mismo ndaçhjanha ixin anto jian rrinttaha. ⁴ Masqui janha çaxanho que çonhi jianha rrinttaha, pero mé ça rroçhoha ixin janha anto jian na. Jesucristo, tti chonda cain joachaxin, mé tti rrondaço ixin queçén na janha. ⁵ Mexinxin jaha ra ndaçhoha ra icha saho ixin quehe tenchehe icha chojni; jaha ra chonhe ra hasta are tsí Jesucristo, tti chonda cain joachaxin, co jehe sinchenonxin cain tti jima ngain tti naxin xehe. Co jehe sinchenonxin cain tti teçaxaon ansén cada chojni. Cottimeja Dios rroçhjé cada chojni inchin tequininxin na.

⁶ Janha rrindattjo ra cain cosa jiji para tsjenguijna jaha ra. Janha co Apolos ná ejemplo para ixin jaha ra para que icha jian tsinxin ra. Janha ndaçhjan jañá para que de ixin ejemplona na jaha ra tsangui ra sitticaon ra jehó tti ttetonha Dios, co para que ni ná ra tsonoaha ra orgulloso de ngain ná chojni co sincheha ra caso iná chojni. ⁷ ¿Quedonda çaxaon ra que jaho ra tti icha jian ra? ¿Quehe cosa chonda ra que jeha Dios çhjá ra? Jehe Dios çhjá ra cain cosa que jaha ra chonda ra, mexinxin ¿quedonda tonoha ra orgulloso ixin cain cosa que jaha ra chonda ra jehó conixin joachaxian ra chondaxin ra?

⁸ Jaha ra tonoha ra que anto tsje cosa que joixin ngain Dios chonda ra, co chonda ra cain tti jaha ra rinao ra. Tonoha ra inchin rey, co janha na ndacointtona ni ra iná lado. ¡Icha jian si ndoa jaha ra rroguintte ra rey para que janha na rroquetonha na cai ngain tti jaha ra ttetonha ra! ⁹ Janha tonona que janha na xo representanté Jesucristo na Dios cointtona na hasta tti último lugar. Janha na inchin tti chojni que tequinixin ndadenhe, janha na inchin ná joaxoan que chojni ngoixin mundo dicon na na. Dicon na cain ángel cai. ¹⁰ Cain chojni ndačo na que ixin janha na chojni que xonhi chonxin ixin ditticanho na Jesucristo, co jaha ra tonoha ra que ixin anto ttinxin ra cain cosa de Jesucristo. Janha na xonhi importancia chonda na para ngain chojni co jaha ra tonoha ra anto importante ra. Cain chojni ncheha na na caso janha na, co jehe na chonda na respeto nganji ra. ¹¹ Hasta jai janha na denhe na jintta co jinda co xonhi xé lontto que chonda na, co tsje chojni feo nchehe na nganji na co chondaha na nchia tti sintte na, ¹² co tončhjen na ixin anto nttaha na xa conixin rana na. Nichja chojni feo nganji janha na, pero janha na nttatsán na ñao Dios que jehe sinchenchaon jehe na. Chojni feo nchehe na nganji na pero janha na ttixinna na. ¹³ Nichja na cosa ndoaha de ixin janha na, pero janha na chjaha na na consejo conixin paciencia. Nchehe na nganji na inchin nchehe na ngain caxineno ngataha nontte; hasta jai tonna na ngain na inchin tti ixonhi xé de ngain chojni.

¹⁴ Janha rricjianha ra cain cosa jihi para tsosoaha ra, jeho para rrichjaha ra ná consejo ixin jaha ra inchin xanhna que anto rinaho ra. ¹⁵ Co masqui jaha ra rrochonda ra hasta dies mil maestro que sinttacoanha ra de ixin Jesucristo, pero cain mé xa sintteha inchin ndodá ra. Janha tti ndodá ra de ngain confianzé Jesucristo ixin janha tti joasondattjo ra de ixin tti jian joajna, co mexinxin Jesucristo chjá ra iná vida naroaxin are vitticaon ra joajna mé. ¹⁶ Mexinxin janha nttatsanha ñao ra que rroehe ra ejemplona.

¹⁷ Janha rrorroanha Timoteo nganji ra co jehe inchin xanhna que anto rinaho ixin jehe ditticaon jian ngain Jesucristo. Jehe Timoteo tti sinttaxaxaon ra quexén janha nttaha ixin ditticanho Jesucristo co quexén janha nttacoán cainxin chojni que ditticaon Jesucristo ngain cainxin rajna. ¹⁸ Canxion jaha ra atto tonoha ra orgulloso ixin xaxaon ra que janha xaon na para sasotsjaha ra iná. ¹⁹ Pero janha rinaho que toin saso para sasotsjaha ra, si Jesucristo rinao. Cottimeja janha sicon si jaha ra xo tonoha ra anto orgulloso, ndoa chonda ra joachaxín Dios o ni nahi. ²⁰ Ixin are Dios ottetonha ngain ansén ná chojni, mé nichjacoaha ixin palabré cai chonda joachaxín Dios. ²¹ ¿Quehe rinao jaha ra remé are janha saso? ¿Asaso para sinttacastigá ra o ni saso para rronichjaha ra chjoin?

5

Pablo ndačo ixin quehe tsonhe chojni que nchehe jianha

¹ Tenohe tsje chojni ixin ná de jaha ra techonda ra jeho jannajonha ra de čiha ra. Co jehe yá ná cosa anto jianha que ni tti chojni que ditticaonha Dios xa ncheha na jañá. ² ¡Co jaha ra xa tonoha ra ixin anto jian ra en lugar de rroguinttechinhi ra co rrocsoaha ra! Tti chojni que jincehe cosa jianha yá jaha ra chonda ra que dantsjeyexin ra de nganji ra. ³ Masqui janha mero rriha nganji ra, pero janha ořaxanho de ixin

quehe tsonhe tti xí que jinchehe jianha yá inchin janha mero rrojarihi nganji ra. ⁴ Xatte cainxin ra de ixin nombré Jesucristo, tti chonda cainxin joachaxin para ixin ján na, co joarrixaonna sehe nganji ra, co joachaxin Jesucristo sehe nganji ra. ⁵ Cottimeja tti xí que jinchehe cosa jianha yá ncheha ra consiente ngain ningoa ra; tančhanda ra Satanás para sinchehe inchin jehe rinao ngain cuerpoe xí mé. Co puede jamé jehe xa sačhenda xa de cosa jianha que nchehe xa para que xonhi tsonhe espíritue xa are tsí Jesucristo, tti chonda cainxin joachaxin.

⁶ Jaha ra chondaha ra que tonoha ra orgulloso. ¿Anoaha ra que si ná chojni jinchehe cosa jianha ngayaha ra, sicon icha chojni co jehe rrořaxaon sinchehe jamé cai? ⁷ Denguixin ra de nganji ra tti chojni que jinchehe jianha yá para que cainxin ra sintte ra joxon chojni que xonhi jianha chonda. Jesucristo ondavenhe para ixin ján na inchin cain coleco que ndavaguenhe ngain quié pascua para que Dios vanchetjañehe na tti jianha que vanchehe na. ⁸ Mexinxin ján na rrochá na ngain jehe co sontte na jian ngain vidá na inchin rinao Jesucristo co ttinttohe na nondaha tti vida jianha que nchaoha jí que ján na jointtoho na. Co jai nttosayehe na Jesucristo conixin vidá na jian que xonhi jianha tenttoho na inchin tti niottja que chondaha levadura para tosayexin Dios.

⁹ Ngain saho cartana que rroanha ra jointtatsanha ñao ra que tatoha ra tti chojni que ncheřoxinhi dinttejoacaho icha nčhí que jeha nčhičihi. ¹⁰ Pero janha ndačhjanha que ixin ndasačhjendehe ra cain chojni de ngain mundo, rročo tti chojni que ditticaonha Jesucristo. Ndoa, que chojni que ditticaonha Jesús ncheřoxinhi na dinttejoacaho na icha nčhí que jeha nčhičihi na, co jehe na anto rinao na rrochonda na icha co icha cosa, co jehe na chehe na, co jehe na nchesayehe na ídolo. Co para que jaha ra te ra ngataha nontte jihi, jaha ra chonda ra que sintte ra ngayé cain chojni yá. ¹¹ Pero janha ndačhjan que jaha ra chonda ra que sačhendehe ra cain chojni que ndačo ixin ditticaon na Jesucristo co řa nchehe na cosa jianha. Inchin puede ncheřoxinhi na dinttejoacaho na icha nčhí que jeha nčhičihi na, o rinao na rrochonda na icha co icha cosa, o nchesayehe na ídolo, o ncheřoxinhi na nichja na feo de iná chojni, o ncheřoxinhi na coan na, o ttehe na cosé iná chojni. Tti chojni de jaha ra que nchehe jañá ni para sinttecoho ra chondaha ra que tsonchienne ra ngain. ¹² Janha xonhi joachaxin chonda para rrondačhjan de ixin quehe tenchehe tti chojni que ditticaonha Cristo. Pero jaha ra chonda ra que rrondačo ra de ixin tti jianha que tenchehe tti chojni que ditticaon Jesucristo inchin jaha ra. ¹³ Co tti chojni que ditticaonha Cristo, Dios tti rrondačo de ixin quehe tenchehe na, ¿ajian o ni nahi? Pero jaha ra chonda ra que rrondačo ra de ixin quehe tenchehe tti chojni que ditticaon Jesucristo. Mexinxin jaha ra dantsjeyehe ra de ngayaha ra tti xí que jinchehe cosa jianha yá.

6

Are chojni coeto na ngain xijuez que vaguitticaonha Jesucristo

¹ Are čhonja ra rrochonda ra ná cosa que tsjangui ra de ixin iná chojni que ditticaon Jesucristo, nchaoha jí si jaha ra sicjangui ra ngain xijuez que ditticaonha Jesucristo en lugar de rroguicjangui ra ngain řajeho chojni que ditticaon Jesucristo para que jehe chojni mé rrondačo quexehe ra řo chonda ra razón. ² ¿Apoco noaha ra que ngain tiempo que tsí chojni

que ditticaon Jesús sinchejuzguehe na chojni que ditticaonha Jesucristo? Mexinxin jai, ¿quedonda jeha jaho ra nchechjian ra cain asunto icha tanguiha que jaha ra chonda ra? ³ ¿Apoco noaha ra que ján na nchao sonttojuzguehe na hasta ángel? ¡Co mé chojni que ditticaon Jesucristo ngain tiempo jiji čhoha xijonttonhe na ná jie! ⁴ Co are jaha ra chonda ra problema de ngain tiempo jiji, ¿quedonda dicjangui ra ngain xijuez que ditticaonha Jesucristo? ⁵ Janha ndačhjan yá para que rrochonda ra joasoaxin. ¿Apoco coha ngayaha ra ni ná chojni que nohe jian para que jehe chojni mé tti rrojinttajuzgaha ra cain jaha ra řo ditticaon ra Jesucristo? ⁶ ¿Apoco jiquininxin que ná chojni que ditticaon Cristo sičo jie de ixin iná chojni Jesucristo ngain xijuez que ditticaonha Jesucristo?

⁷ Mexinxin atto nchaoha jí tteo ra jaho ra. Icha jian si ttixinha ra are nicompañeroa ra feo sinchehe na nganji ra. Co icha jian si jaha ra toñaoha ra are tsaha ra na cosá ra. ⁸ Pero jaha ra en lugar de rrojinchehe ra jamé, jaha ra nchehe ra feo cai inchin jehe na, co cai hasta ttehe ra cosé řajeho chojni que ditticaon Jesús.

⁹⁻¹⁰ ¿Apoco noaha jaha ra que tti chojni que ncheha jian seha ngain parte tti ttetonha Dios? Dittoaxinha ra sinttayaha ra na ixin ngain parte tti ttetonha Dios čhoha sintte tti chojni que puro ncheřoxinhi tson-taonxin nčhí co doanha nča nčhičhihi, ni chojni que nchesayehe ídolo, ni chojni que ncheřoxinhi dinttejoacaho icha nčhí que jeha nčhičhihi, ni xí que chonda řajeho iná xí inchin rrocji nčhičhihi, ni tti chehe que tté cosé iná chojni, ni chojni que anto rinao rrochonda icha co icha cosa de ngataha nontte, ni chojni que puro coan, ni chojni que nichja cosa ndoaha ngain iná chojni, ni tti chojni que nichja ná cosa seguro co jehe ncheha. Tonoha ra jian que cainxin chojni yá čhoha sintte ngain parte tti ttetonha Dios. ¹¹ Canxion jaha ra jańá vanchehe ra cai, pero Jesucristo, tti chonda cainxin joachaxin, co Espíritu Santo que Dios rroanha ojointtaroa ra de cain cosa jianha que joinchehe ra, co jointtajoxon ra chojni jian, co mexinxin Dios vayé jaha ra co ndačo que jaha ra joxon chojni jian que řonhi jianha chonda ra.

Tti jiquininxinha sinchehe ni ngain cuerpoe ni

¹² Jehe ni ndačo ni que nchao sinchehe ni cain tti sinao ni. Co ján ndoa, pero jeha cainxin mé jian para ixin jehe ni. Si ná ni sinchehe ni lo que sinao ni, pero sicao ni cuidado que ni ná cosa mé tsetoanha ngain cuerpoe ni. ¹³ Jáń, ndoa que cain tti jine ni sattji para ngain tsejnoe ni co tsejnoe ni para tti jine ni, pero cayoi cosa mé ndatsjexin are ndasenhe ni. Pero jeha ndoa que cuerpoe ni para ngain iná nčhí que jeha nčhičhihi ni; cuerpoe ni jeho para ixin Jesucristo, tti chonda cain joachaxin, co Jesucristo jí para ixin cuerpoe ni. ¹⁴ Co jańá inchin Dios joinchexechon Jesucristo, jamé sinttaxechon na jáń na cai conixin joachaxín jehe.

¹⁵ ¿Apoco ttinxinha jaha ra que cada cuerpo que jaha ra chonda ra, mé ná parte de cuerpoe Jesucristo? ¿Apoco nchao tsá na ná de tti parte de jehe cuerpoe Jesucristo para sanjo na ngain cuerpoe ná nčhí que dachaxin tomi cuerpoe? ¡čhoha sonttoho na jamé! ¹⁶ ¿Apoco noaha jaha ra que are ná xí dejoacaho xa ná nčhí que dachaxin cuerpoe tomi, cayoi na tonchjian na inchin nacoa cuerpo? Ngain tti jitaxin Palabré Dios ndačo: “Cayoixin chojni sintte na inchin nacoa chojni.” ¹⁷ Pero are ná chojni ditticaon ngain Jesucristo, chojni mé co Jesucristo dintte na inchin nacoa chojni ixin chonda jehe na řajeho Espíritu Santo.

¹⁸ Mexinxin janha rrindattjo ra que dinttečhincoha ra nčhi que jeha nčhičhiha ra. Űonhi iná cosa icha jianha para ixin cuerpoe ni, jeha cosa mé ixin are ná chojni nchehe cosa jianha yá, jeha nchehe jianha ngain cuerpoe. ¹⁹ Jaha ra noha ra que cuerpoa ra mé ningoe tti Espiritu Santo que Dios chjá ra, co Espiritu Santo jí ngaxinhi cuerpoa ra. Jeha jaha ra tti ttetonha ra ngain cuerpoa ra, ²⁰ ixin Dios anto rentte cjoenga hna para ixin cuerpoa ra. Mexinxin chonda ra que nchesayehe ra Dios de ngain cuerpoa ra co de ngain espiritua ra ixin cayoi cosa mé cosé Dios.

7

Consejo para chojni que tecaó chó

¹ Jai rrondattjo ra tti jaha ra joanchianguina ra ngain cartá ra. Ján ndoa, jian para que xí secaoha xa nčhi. ² Pero ixin anto tsje chojni puro rinao tsontaonxin chó, mexinxin icha jian si cada xí rrochonda xa nčhičhihi xa co cada nčhi rrochonda nčha xixihi nčha. ³ Co xixihi nčhi chonda xa que sinchehe xa inchin jiquininxin ngain nčhičhihi xa, co cai nčhi chonda nčha que sinchehe nčha inchin jiquininxin ngain xixihi nčha. ⁴ Cuerpoe nčhičhihi ná xí jeha jehe nčha tti cuerpoe nčha ixin cuerpo mé jiquininxin xixihi nčha. Co Űajeho ngain xixihi nčhi cai, nčhičhihi xa tti jiquininxin cuerpoe xa. ⁵ Űo nčhi ra, are xixiha ra sinao xa cuerpoa ra ndačhoha ra que nahi, co cai jaha ra Űo xí ra, are nčhičhiha ra sinao nčha cuerpoa ra, cai ndačhoha ra que nahi. Jeho si jaha ra sinao ra rrochjeha chó ra cuerpoa ra ixin sinchecoanxinhi ra Dios. Cottimeja nchao rrochjehe chó ra cuerpoa ra ixin puede tsixianha ra sé tiempo, co puede Satanás rrondattjo ra co sinchehe ra cosa jianha.

⁶ Janha rrindattjo ra cain jiji, co rročo que janha rridanjo joachaxin que nchao sinttecoho chó ra si jaha ra sinao ra, co cai nchao si jaha ra sinaoha ra sinttecoho chó ra. ⁷ Janha rrojinaho que cain jaha ra Űonhi nčhi rroguinttecoho ra inchin janha, pero cada na Dios chjá na joachaxin de queŰén sontte na; ttoha na sonttecoho na nčhi co te na nahi.

⁸ Cain chojni que Űa tecaoha chó co cain nčhiganha que Űonhi xí tecaó, janha ndačhjan que icha jian para ixin jehe na si iŰonhi nčhi o xí sinttecao na; janhi inchin janha. ⁹ Pero si jehe na tsixinha na, nchao tsjé na nčhičhihi na o xixihi na ixin icha jian rrochonda na nčhičhihi na o xixihi na que puro rroŰaxaon na de ixin nčhi o de ixin xí.

¹⁰ Pero cain ra Űo otecoho ra nčhičhiha ra o xixiha ra, janha rritetonha ra que nčhi tsinttoeha nčha xixihi nčha. Tti janha rritetonha jiji joixinha de ngain joarrixaonna, sino que joixin de ngain Jesucristo, tti chonda cain joachaxin. ¹¹ Pero si ná nčhi sačhjendehe nčha xixihi nčha, jehe nčha čhoha secoa nčha iná xí, pero Űa nchao rrocjanttehe nčha Űajeho xixihi nčha. Co Űajeho ngain xixihi ná nčhi cai, jehe xa čhoha sačhjendehe xa nčhičhihi xa.

¹² Icanxin chojni ndattjan na inchin janha nona, ixin Űonhi coetonha Cristo de ixin jiji. Si ná xí que ditticaon Jesucristo co čhihi xí mé ditticaonha nčha, pero si jehe nčha jí nčha conforme para tasecao xí mé ngoixin vidé nčha, jehe xí mé chondaha xa que tsinttohe xa nčhičhihi xa. ¹³ Si ná nčhi ditticaon Jesucristo co xixihi nčha nahi, pero si jehe xa jí xa conforme para tasecao xa nčhi mé ngoixin vidé xa, cai jehe nčhi mé chondaha nčha que sačhjendehe nčha xixihi nčha mé. ¹⁴ Ixin tti xixihi ná nčhi que ditticaonha xa Jesucristo co jehe nčha ditticaon nčha, Dios

ojoinchenchaon xí mé ixin jehe xa jicao xa nčí que ditticaon Jesucristo. Co nčíchihi ná xí que ditticaonha ncha Jesucristo co jehe xa ditticaon xa, cai nčí mé Dios ojoinchenchaon ncha ixin jehe ncha jicao ncha xí que ditticaon Jesucristo. Si jeha jamé, xanha ra sintte xan inchin xenhe chojni que ditticaonha Jesucristo, pero ixin masqui jeha ná ra ndoa ditticaon ra Jesucristo, mexinxin cai xanha ra Dios ojoinchenchaon xan.
¹⁵ Pero si xixihi ná nčí o nčíchihi ná xí que ditticaonha Jesucristo sinao sachjendehe xixihi o nčíchihi, tančhanda ra na sinchehe na. Cottimeja tti xí o tti nčí que ditticaon Jesucristo chonda libertad, ixin Dios rinao que tti chojni que ditticaon Jesucristo sintte na čhjoin ngain vidé na.
¹⁶ Co si jaha ná nčí, ¿quečén noanxin ixin anchao tsjenguijna xixiha para sitticaon xa Jesucristo? O si jaha ná xí, ¿quečén noanxin ixin anchao tsjenguijna nčíchihi para sitticaon ncha Jesucristo?

¹⁷ Mexinxin cada chojni chonda que sintte na ngain vidé na de acuerdo conixin tti joachaxin que joanjo Jesucristo co inchin jehe na vintte na are Dios vayé na. Jańá ttetonha janha ngain cain chojni que ditticaon Jesucristo. ¹⁸ Si Dios vayé chojni que chonda xöhe que dinhi circuncisión ngain cuerpoe, chojni mé chonda que jamé sittohe conixin xöhe mé. Co si Dios vayé chojni que chondaha xöhe que dinhi circuncisión ngain cuerpoe, chojni mé chondaha que rrochonda xöhe. ¹⁹ Ixin jeha importante para que cain chojni rrochonda xöhe mé; tti importante que cain na sitticaon na cain tti ttetonha Dios. ²⁰ Cada chojni chonda que sintte na inchin vintte na are Dios vayé na. ²¹ Si jaha joarihi ná ninchehe xa que dicochji ngain xinajni are Dios vayaha, jaha taha joachjaon de ixin mé. Masqui jamé, si jaha chonda oportunidad de sarihi libre, nchao, ixin icha jian sarihi libre. ²² Tti chojni que vehe ninchehe xa que dicochji ngain xinajni are Dios vayé na para que jehe na vitticaon na ngain Jesucristo, jai jehe na te na libre para ngain xé Jesús. Co cai, tti nivintte libre are Dios vayé na, jai jehe na te na inchin tti nchehe xa que tochji pero de ngain Jesús. ²³ Dios anto rentte coenanxin jaha ra, mexinxin dittoaxinha ra para que iná chojni tsetonha ra. ²⁴ Jańá, cada ra dintte ra ngattoxon con Dios inchin jaha ra vintte ra are Dios vayaha ra.

²⁵ Co cain chojni que xa tecaoha nčí o xí, janha xa xonhi tsetoan na ixin Jesucristo xonhi coetonha de ixin jehe na, pero janha rronhattjan na tti janha xaxanho ixin tti janha xaxanho jehe jian ixin Dios chjana tti janha xaxanho. ²⁶ Cain chojni que ditticaon Jesucristo tiempo jai atto tsje peligro tetonchienhe ngain na, co tiempo inchin jihi, para ixin janha, puede icha jian para cain chojni que xa dinttecaoha nčí o xí, isinttecaoha chó na. ²⁷ Pero tti chojni que otecao čihi o xixihi irroaxaonha na para tsinttohe chó na. Pero tti chojni que xa dinttecaoha chó, icha jian irroaxaonha na para sinttecao chó na. ²⁸ Pero si sinttecao chó na cai nchao jí ixin mé jeha cosa jianha. Cai si ná xannčí secas xan xixihi xan, cai mé jeha jianha sinchehe xan. Pero tti chojni que sinttecao chó rrochonda na problema ngain vida jihi, co janha rinaho que rrochondaha na problema mé.

²⁹ Janha rinaho rronhattjo ra ixin atto tsjeha tiempo dittoá na jai pa ndaha. Mexinxin cain chojni que tecaos čihi o xixihi chonda que sinchehe na xé Jesucristo como si rrochondaha na čihi na o xixihi na. ³⁰ Co tti chojni que anto techín, chonda que sintte na como si xonhi joachjaon rroguinttechonda na. Co tti chojni que techonda quiai, chonda

que sinchehe na como si xonhi quiai rroguinttechonda na. Co tti chojni que coehna na cosa, chonda que sintte na como si rrochondaha na cosa mé. ³¹ Co tti chojni que anto nchegonda na tti cosa que jí ngataha nontte, chonda que sintte na como si rrojinchegondaha na cosa mé, ixin mundo jihi que ján na docon na ondajittjexin.

³² Janha rinaho que jaha ra rrochondaha ra joachjaon. Are ná xí que xonhi nchí jicao, jehe xa icha xaxaon xa de ixin Dios co nchehe xa xé Dios ixin rinao xa que Dios nchexoxinhi tti jehe xa nchehe xa. ³³ Pero are ojicao xa nchí, jehe xa icha xaxaon xa cain cosa de ngataha nontte jihi, co para que chíhi xa nchexoxinhi ncha tti jehe xa nchehe xa. ³⁴ Cai jí diferencia de ngain nchí que tecaó xí conixin nchí que tecaoha xí. Nchí que tecaoha xí icha xaxaon ncha cosa de Dios para que te ncha jian ngain Dios de ngain cuerpoe ncha co de ngain espiritue ncha. Pero tti nchí que tecaó xí icha xaxaon ncha cosa de ngataha nontte jihi co para que xixihi ncha sinchexoxinhi xa tti jehe ncha tenchehe ncha.

³⁵ Janha rrindattjo ra cain jihi pero jeho para tsjenguijnaxin ra, jeha para que jaha ra isinttecoha chó ra ndoa. Janha rinaho que sinchehe ra cain cosa inchin jiquininxin co rinaho que cain tiempo sinchehe ra jian xé Jesucristo, tti chonda cain joachaxin.

³⁶ Pero si ná chojni xaxaon que icha jian para que xenhe secoa xan xí, ixin ojiddattohe xan de xannchí, co si para ixin jehe chojni mé jihi tti icha jian, nchao sinchehe remé. Nchao secoa xenhe chojni mé xí. Mé jeha cosa jianha para ixin Dios. ³⁷ Pero si ná chojni xaxaon que xenhe secoaha xan xí co si ndoa jehe jamé rinao sehe xenhe, cai chojni mé nchao nchehe. ³⁸ Jañá, tti rinao que secoa xenhe xí nchao nchehe, co tti rinaoha que secoa xenhe xí icha nchao nchehe.

³⁹ Ley de Dios ndačo que tti nchí que tecaó xixihi, jehe ncha chonda que sitticaon ncha tti rrondačo xixihi ncha hasta ndasenhe xa. Pero si xixihi nchí mé ndasenhe xa, jehe ncha sittohe ncha libre para secoa ncha quexeho xí que jehe ncha sinao ncha, pero ná xí que ditticaon Jesucristo. ⁴⁰ Pero janha ndačhan que jehe ncha icha feliz sehe ncha si ixonhi xí secoa ncha, jihi tti xaxanho janha, co toenaho que tti janha rrindattjo ra jihi joixin de ngain Espiritu Santo que Dios rroanha.

8

Tti danjo chojni ngain ídolo

¹ Janché rrondattjo ra quehe rročo tti danjo chojni ngain ídolo. Ján, ndoa que cain na xaxaon na que chonxin na co noa na jian de ixin cosa jihi, pero tti ján na noa na, mé xonhi xé ixin anto tonoa na orgulloso. Pero si sonao chó na, mé tti sinttasoji na ngain tti dotticaon na de ixin Jesucristo. ² Si čonja chojni tonohé que jehe anto nohe pero jehe xa xonhi nohe ixin xa ditján tti jiquininxin tsonohe. ³ Pero tti chojni que rinao Dios, Dios jí ngain chojni mé.

⁴ Mexinxin, ¿quehe chonda na que sonttoho na? ¿Asontte na tti nntao que ttinhi na ídolo? Ján, ndoa noa na jian que ná ídolo na xoinxon joachaxin chonda ngain cain chojni, ixin jí jeho nacoaxinxon Dios. ⁵ Canxion chojni ndačo que ixin jí tsje dio que chonda joachaxin ngajni co nttihi ngataha nontte, co jehe na ncheguinhi na, señor. ⁶ Pero ján na noa na que jí nacoaxinxon Dios, tti Ndoá na. Ndo mé Ndo joinchechjian cainxin cosa, co ján na te na para ixin jehe Ndo. Cai jí nacoaxinxon tti

dinhi Señor, co jehe mé Jesucristo. De ixin jehe jixin cainxin cosa, hasta ján na texin na cai.

⁷ Pero cainxinha chojni nohe jihi. Canxion niditticaon Jesucristo jai vintte na acostumbrado de vanchesayehe na ídolo. Co jai xa ttinxinha na jian de ixin Jesucristo. Mexinxin are jine na tti nntao que dehe na ngain ídolo, tonohé na feo ixin xa xagoen na ídolo mé. ⁸ Seguro que Dios ndosenha si ján na sontte na nntao mé o ni nahi. Jeha icha jianha na si sontte na nntao mé, ni jeha icha jian na si sontteha na nntao mé. ⁹ Pero ttjiho ra cuidado de ixin tti joachaxin que jaha ra coá ra de ixin sintte ra cain cosa, ixin puede de ixin tti sinchehe ra jaha ra icha chojni sinchehe na jianha ixin xa ttinxinha na jian de ixin Jesucristo. ¹⁰ Ntitihi jí ná ejemplo: si ná de jaha ra xo ojian ttinxin ra de ixin Jesucristo, co noha ra de ixin cain cosa jihi sintte ra sintte ra ngain lugar tti icha chojni nchesayexin ídolo co sicon ra iná chojni que xa ttinxinha jian de ixin Jesucristo, chojni mé nchao rroxxaon sine cai tti cain cosa que saquehe na ngain ídolo. ¹¹ Jañá jaha ra ixin ottinxin ra jian sinchetján ra iná chojni tti xa ttinxinha jian, co Jesucristo venhe cai para ixin chojni mé. ¹² Mexinxin are jaha ra sinchetján ra tti chojni que xa ttinxinha jian de ixin Jesucristo, jaha ra cai rrocho que sinchehe ra jianha ngain mero Jesucristo. ¹³ Mexinxin, si janha sinttatján tti chojni que xa ttinxinha jian de ixin Jesucristo are jehe chojni mé sicon na janha sine tti nntao que daquehe na ídolo, icha jian xonhi tiempo janha sine nntao mé para sinttatjanha chojni mé ngain cosa jianha.

9

Derecho que chonda ná representanté Jesucristo

¹ Já n, ndoa que janha chonda joachaxin co cain derecho ná representanté Jesucristo. Janha vicon Jesucristo, tti chonda joachaxin para ixin já n na, co jaha ra tti xa que janha jointtaha para ixin jehe. ² Puede icanxin chojni xa chonxinha na na janha ixin janha ná representante na. Pero jaha ra chonda ra que chonxin ni ra janha ixin janha tti ndattjo ra para que jaha ra vitticaon ra ngain Jesucristo, co yá ná prueba que ndoa janha ná representante na de Jesucristo.

³ Co jihi tti rrondaçhjan ngain cain chojni que nchexoxinha tti janha rrinttaha: ⁴ janha chonda derecho de sayá cain tti rrochjana na para sine co cain tti rrochjana na para sihi, ⁵ co cai para rrochonda ná çhina que ditticaon ncha Jesucristo sacjinha ncha ngain viajena tti çhji, jañá inchin nchehe tti icanxin representanté Jesucristo inchin Pedro co xanchó Jesús. ⁶ ¿O apoco xaxaon ra que janho co Bernabé tti tequininxin na sinttaha na yó xa ngain nacoa tiempo? xa para sachaxin na tomi que sondana na, co xa de rronddattjo ra tti jian joajna. ⁷ xaxaon ra jian que xonhi xisoldado jí que jehe xa ttjenga xa hna cain gastoe xa. Co xonhi chojni que ttjenga nntauva que jehe jineha ttochjoín nnta. Co xonhi chojni que ttingaria coleco que jehe diha tsjinhi va. ⁸ Co xaxaonha ra ixin jehó xí ngataha nontte xaxaon jihi, ixin cai Dios coetonhe Moisés para coentaxin de ixin jihi ngain libro tti jitaxin ley de Dios. ⁹ Co ngain libro mé jitaxin: “Ttengueha ra coxinttaha nchisen are tondai va trigo.” Dios ndaçhoja jihi de ixin jehó coxinttá, ¹⁰ jehe ndaço jañá para ná ejemplo para ixin já n na. Ley jihi jian para ixin já n na ixin tti nchehe xa ngataon jngui co tti tondai trigo chonda na derecho de sayé na parte de cosecha. ¹¹ Mexinxin,

si janha na coenga na ngayaha ra palabré Dios, ¿apoco tonoha ra atto tsje si jaha ra rrochjana ra nchion tomi para sinenxin na? ¹² Si icanxin chojni chonda na derecho jiji de chjehe ra na tomi, mé icha janha na.

Pero janha na nntagondaha na derecho que janha na chonda na. Janha na nttaha na icanxin xa para dachaxin na tomi que dondana na co para que jaha ra, xo rinao ra sitticaon ra tti jian joajné Jesucristo, tsonoaha ra molestia de ixin janha na. ¹³ Jaha ra noha ra que tti nchehe xa de ngain ningoe chojni judío de ngain nihngo sachaxin na tti sine na. Rrocho que tti chojni que nchehe xa ngain alté Dios, tti ttín na nntaohe coxigo para ixin Dios, chojni mé jine tti nntao que dehe nttiha. ¹⁴ Xajeho cai, Jesucristo ndacho que tti chojni que nichja tti jian joajna, chojni mé de ngain xa mé sachaxin na tti sine na. ¹⁵ Pero janha xonhi tiempo jointtagonda ni ná derecho jiji, ni cai jeha rricjinha ra jiji para que jaha ra rrochjana ra nchin tomi. ¡Para ixin janha icha jian si saho ndasenxin na jintta que ná chojni santsjena tti chjoin que tsonohe ansenna de ixin jiji!

¹⁶ Janha nichja tti jian joajna ngain chojni pero rinaoha que chojni sinchesayana ixin Dios coetonna que rronichja joajna mé. Co anto tangui tsonna si janha rrondaçhjanha joajna jiji. ¹⁷ Si janho rroguinchiá xa jiji, Dios rrocjengana hna. Pero jeha jamé ixin xa jiji ná respnsabilidad que Dios chjana, co çhoha rrondattjan que nahi. ¹⁸ Mexinxin tti anto chjoin tonona are ndattjan chojni tti jian joajna, jiji tti xenga na hna co xonhi chojni ndattjan ixin tsjengana hna tomi. Rrocho janha nntagondaha derechona para rrogacha tomi de ngain xana ixin janha nichja tti joajna mé.

¹⁹ Masqui janha jeha ninchehe xé de ni ná chojni, janha goan na ninchehe xa de cainxin chojni para dacha icha chojni para ixin Jesucristo. ²⁰ Are janha rrihi ngayé chojni judío janha cjan na inchin chojni judío para dacha jehe na para ixin Jesucristo. Rrocho para tti anto ditticaon ley que vayé Moisés, janha cai ditticanho ley mé para que janha dacha jehe na, masqui janha chondaha que nttaha inchin ttetonha ley mé. ²¹ Co para que janha dacha para ixin Jesús tti chojni que ncheha inchin ttetonha ley que vayé Moisés, janha cjan na inchin jehe na cai. Masqui ján, janha nttaha inchin ttetonha ley de Dios ixin janha ján orrinttaha inchin ttetonha ley de Jesucristo. ²² Co are janha rrihi ngain chojni que xa ttinxinha jian de ixin Jesucristo, janha nttaha inchin costumbré jehe na para que janha chonda oportunidad de ndattjan na icha de ixin Jesucristo, jamé nttaha para que jehe na icha ttinxin na. Rrocho janha darihi inchin cada naná jehe na para que jamé nchao Jesucristo tsjengujna canxion na para xonhi castigo rrochonda na de cain cosa jianha que nchehe na. ²³ Ján, nttaha cain jiji para que nttanoa chojni tti jian joajna co para que janha cai rrochonda tti jian que Dios danjo.

²⁴ Jaha ra onoha ra que ngain ná juego de carrera cain ni ttinga ni pero jeha nacoaxinxon tti dacha. Jamé ttinga jaha ra cai para que jamé sachá ra. ²⁵ Cain tti chojni que doan preparado cuerpoe para rrotsontaon ngain ná juego, chojni mé jineha cosa que sinchehe daño co ncheha cosa que sinchehe daño ngain cuerpoe. Co cain chojni mé nchehe na jamé jeha para dacha na ná premio jeha ná corona de qué nttalaurel que tonçhjenha sé. Pero ján na nttoho na lucha para que sachá na ná premio que tsonçhjenhe para cainxin tiempo. ²⁶ Para ixin janha jeha

jamaoncoa ttinga; janha jeha ttinga para sinttatján. Co cai janha inchin ná xiboxeador que tjacoaha tton ngataonhe čhintto. ²⁷ Janha nttaguetan cuerpona tanguí co nttaha para que cuerpona sitticaon na janha para que janha sinttatjanha tti janha ditticanho que janha jointtacoán icha chojni.

10

Pablo rinaoha que chojni sinchesayehe na ídolo

¹ Janha rinaho que jaha ra tsonoha ra tti conhe nindogoelitoa na xančhjen ngatja nttiha are anto osé. Para que jehe na sacjoi na, Dios rroanha ná ttjoi para vitaonhe na nttiha. Co Dios conxiré ndachaon para vehe ná nttiha tti jehe na vattoxin na ndachaon que dinhi Mar Rojo. ² Ttjoi jihi co tti conhe ndachaon, jihi ná señal que Dios coinchiehe Moisés para savicao jehe na co rročo que por ixin milagro jihi que Dios chjé Moisés, jehe na joiguitte na ngain. ³ Co cai cain jehe na joine na tti joanjo Dios ⁴ co cain jehe na vihi na tti jinda que vačhjedorin xo co jinda mé Dios joanjo cai. Co tti xo mé inchin Cristo. ⁵ Co masqui jamé, anto tsje na vitticaonha na Dios, co mexinxin cain nimé ndavintteguenxin na nttiha ngagaha jna.

⁶ Cain jihi conhe inchin ná ejemplo para ixin ján na para que ján na snonaoha na cosa jianha inchin joinao na jehe na. ⁷ Mexinxin jaha ra nchesayehe ra ídolo inchin joinchehe canxion jehe na. Noa na que joinchesayehe na ídolo ixin ndačo tti jitaxin Palabré Dios: “Tti chojni nttiha vintte na joine na co vihi na. Cottimeja vinttengattjen na vinttette na són para joinchesayehe na tti coxinttachjan de oro.” ⁸ Co ján na chondaha na que rrotsontaonxin na nčhí que jeha nčhičhiha na inchin vinttenchehe canxion jehe na, co mexinxin vintteguenxin veintitrés mil na ngain nacoa nchanho. ⁹ Ni chondaha na que tsjá na paciencia que chonda Dios inchin joinchehe canxion jehe na, co mexinxin conché joinehe va jehe na co ndavintteguenhe tsje na. ¹⁰ Ni tsoñaoha na ngain Dios inchin joinchehe canxion jehe na, co mexinxin Dios rroanha ná ángel de jehe co ndagoen tsje na.

¹¹ Cain jihi conhe nindogoelitoa na xančhjen are saho co vetaxin ngain tti jitaxin Palabré Dios inchin ná ejemplo para ixin ján na para que ján na isonttoha na jamé inchin joinchehe jehe na ixin ján na techon na ngain tiempo que ochian ndatsjexin mundo. ¹² Mexinxin jaha ra xo tonoha ra que ojian ditticaon ra Jesucristo ttjiho ra cuidado para que sincheha ra jianha. ¹³ Tti tanguí que jaha ra tonha ra xajeho jamé tonhe cainxin chojni cai. Pero jaha ra nchao chonda ra confianza ngain Dios ixin jehe sanjoha icha tanguí nganji ra, jeha tti jaha ra nchao tsixinha ra. Ixin are rrochonda ra tanguí, Dios sinttanoha ra ngain ansean ra para quežén sinchehe ra para sachjexin ra de ngain tanguí mé. Co jamé tsixinha ra ngain cain cosa tanguí.

¹⁴ Mexinxin, cain jaha ra hermano, nchesayehe ra ídolo. ¹⁵ Janha ndattjo jaha ra jańa ixin jaha ra nchao ttinxin ra, co xaxaon ra jian si jeha ndoa tti janha ndattjo ra. ¹⁶ Are dayé na tti vaso de vino ngain Santa Cena co are ján na donho na vino mé, jamé nttoho na ixin rročo que ján na dotticaon na ixin Jesucristo jehe cointtji jni para ixin ján na. Co are jontte na tti niottja que ján na tonchjea na, jamé nttoho na ixin rročo que ján na dotticaon na ixin Jesucristo jehe joanjo cuerpoe para ixin ján

na. ¹⁷ Masqui ján na anto tsje na, pero cain na jontte na xajeho niottja mé co jhi rrocho ixin cain na nacoaxinxon cuerpo na para ngain Jesucristo.

¹⁸ Xaxaon ra de ngain chojni Israel; are jehe na jine na nntao que dehe ngain mesé Dios, tjago na ixin cain jehe na nacoaxinxon cuerpo para ngain Dios. ¹⁹ Ndaçhjanha que ixin ídolo techon o chonda joachaxin, ni tti nntao que daquehe chojni ngain jeha icha jian nntao que cain icha nntao. ²⁰ Tti janha ndaçhjan rrocho que are tti chojni que chonxinha Dios daquehe nntao ngain ídolo, nntao mé para ixin espíritu jianha ixin nntao mé jeha para ixin Dios. Co janha rinaoha que jaha ra sinchesayehe ra espíritu mé. ²¹ Çhoha sixin ra ngain vasoe Jesucristo co sixin ra ngain vasoe espíritu jianha. Çhoha sinttexin ra ngain mesé Jesucristo co sinttexin ra ngain mesé espíritu jianha. ²² ¿Apoco sonao na sonttoñao na Jesucristo? ¿Apoco icha soji ján na que jehe?

Tti nchao sinchehe ni co tti sinao chó ni ixin ditticaon ni Cristo

²³ Já n, ndoa tti ndaço na que ná ni nchao sinchehe ni lo que sinao ni, pero cainxinha jian para ixin jehe ni. Já n, ná ni nchao sinchehe ni lo que sinao ni, pero jeha cainxin tti sinchehe ni tsjenguijna ni para sitticaon ni Jesucristo icha. ²⁴ Chonda ni que tsjé ni tti jian para icaxin chojni co jeoha tsjé ni jian para ixin jeha ni.

²⁵ Jaha ra nchao jintte ra cainxin tipo de nntao que toçhi ngain ndásin. Jaha ra chondaha ra joaxaon de sintte ra quexeho nntao mé co danchianguiha ra si vehe nntao mé ngain ídolo o ni nahi ²⁶ ixin nontte co cain cosa que jí ngataha nontte Dios joinchechjian cain mé co cain mé cosé jehe.

²⁷ O si çhonja chojni que xa ditticaonha Jesucristo rrondattjo ra ixin sinttecoho ra, co si jaha ra sinao ra sinttecoho ra, nchao para jaha ra jintte ra cain tti rroçhjá ra na co xaonha ra para jintte ra nntao mé. Co çonhi danchianguihi ra de ixin ttinó joixin cain nntao mé. ²⁸ Pero si tti chojni que rroçhjá ra nntao rrondaço ixin nntao mé vehe nntao ngain ídolo, jaha ra jintteha ra nntao mé para sincheha ra jianha ngain tti chojni que rrondattjo ra jamé, co para que chojni mé tsonoeha feo ngain ansén. ²⁹ Janha rrinichja de ixin queçén tonohe icha chojni, nahi de ixin queçén tonoha jaha ra.

Pero puede çhonja ra sanchianguiha ra: “¿Andosenna tti xaxaon icha chojni?” ³⁰ Ixin puede xaxaon ra que si danjo ra gracias ngain Dios de ixin tti jintte ra, icha chojni çhoha rronichja na feo de ixin jaha ra. ³¹ Nchao jí si jaha ra jintte ra o dihi ra o nchehe ra icaxin cosa, pero nchehe ra cain mé para nchesayexin ra Dios. ³² Ncheha ra cosa que iná chojni feo tsonohe ngain ansén, ni para chojni judío, ni para chojni que jeha judío, ni para chojni que ditticaon Jesucristo. ³³ De partena janha ttjinha cuidado para que cainxin chojni sinao na tti janha rrinttaha, janha ttjeha jian jeha para ixin janha, janha ttjé para ixin icha chojni para que Jesucristo nchao tsjenguijna jehe na para que rrochondaha na castigo de ixin tti jianha que nchehe na.

11

¹ Jaha ra roehe ra ejemplona janha inchin janha rroá ejemploe Jesucristo.

Tti jiquininxin sinchehe nçhí ngain servicio

² Janha atto chahna ixin jaha ra cainxin tiempo xaxaon ni ra janha co tenchehe ra sigue tti janha jointtacoanha ra. ³ Pero janha rinaho que tsinxin ra que Cristo, mé tti já de cada xí ixin jehe tti tetonhe cada xí; co cada xí, mé tti já nchíchihi ixin jehe xa tti tetonhe nchíchihi xa; jañá inchin Dios, mé tti já Jesucristo. ⁴ Si ná xí tsjanotaon já xa are jincheoanxinhi xa Dios are ngain servicio o are jindache xa chojni ngain nihngo tti joajna que jehe xa vayé xa que joixin de ngain Dios, mé rrocho ná joasoaxin para ixin Cristo. ⁵ Pero si ná nchí tsjanotaonha já ncha are jincheoanxinhi ncha Dios are ngain servicio ngain nihngo o are jindache ncha icha chojni tti joajna que jehe ncha vayé ncha que joixin de ngain Dios, rrocho ná joasoaxin para ixin xixihi ncha. xajeho inchin jehe ncha rrocjinhi ncha ngoixin já ncha. ⁶ Si ná nchí tsjanotaonha já ncha, mexinxin icha jian rrochinji cainxin xajá ncha. Pero si jaha ra tsonoha ra que atto soaxin para ná nchí rrochinji xajá ncha o rrocjin ncha hasta tti nganito já ncha, mexinxin icha jian chonda ncha que tsjanotaon já ncha. ⁷ Xí chondaha que tsjanotaon já xa ixin Dios joinchekhjian jehe xa inchin jehe Dios. Co de ngain xí Dios tosayehe. Co nchí para sinchesayehe ncha xí. ⁸ Jañá ixin are Dios joinchekhjian xí, jehe joinchekhjianha xa de ngain ná nchí, sino que Dios joinchekhjian nchí de ngain xí. ⁹ Nchí conchjian ncha para ixin xí, co jeha conchjian xí para ixin nchí. ¹⁰ Mexinxin de cain jihi, nchí chonda que tsjanotaon já ncha para ná señal que jehe ncha ditticaon ncha xixihi ncha, co para rroché cain ángel. ¹¹ Pero masqui jamé, para ixin ján na que dotticaon na Jesucristo, xí choha sehe xa si coha nchí, ni nchí choha sehe ncha si coha xí, ¹² ixin ján ndoa que saho nchí conchjian ncha de ngain ná xí, pero de are mé para ndahi, xí doanxin xa de ngain nchí, co cayoi mé ttixin de ngain Dios.

¹³ Jaha ra mismo ndacho ra si nchao jí que nchí are sincheoanxinhi ncha Dios tsjanotaonha já ncha. ¹⁴ ¿Apoco noeha cain chojni que ná joasoaxin para ixin xí rrochonda xa xajá xa yeye? ¹⁵ Pero para ixin nchí ná cosa jian para ixin jehe ncha rrochonda ncha xajá ncha yeye ixin vayé ncha xajá ncha yeye para rrojanotaon já ncha. ¹⁶ Pero si chonja chojni rinao tsoñao de ixin asunto jihi, pero chojni mé chonda que tsonohe que ni ján na co ni icha chojni que ditticaon na Dios chonxinha na iná costumbre.

Tti joinchehe chojni ngain Santa Cena

¹⁷ Janha xaxanho rrondattjo ra canxion cosa que janha ncheoxinnaha. Ndachjenji na chojni que are xatte ra para ngain servicio, parece que chojni ngain ningoa ra nchehe na jianha en vez de jian. ¹⁸ Ixin janha ndachjenji na na que are xatte ra para nchesayehe ra Dios ngain servicio, are mé nichja ra ixin rrochjeya ra, co janha ditticanho nchion que puede ndoa jamé nchehe ra. ¹⁹ Pues, ¡puede jaha ra xaxaon ra que chonda que rrochjeya ra en grupos para que tsonohe ni quexehé ra xo ndoa ditticaon ra Jesucristo! ²⁰ Mexinxin tti cena que jaha ra jintte ra ngain nihngo, mé ijeha Cena de Jesucristo ixin jaha ra jañá xaxaon ra. ²¹ Co ixin are hora que jaha ra jintte ra cena mé, cada ra choenha chó ra; saditaon ra nttiha para ditse ra cená ra jaho ra. Mexinxin ttoha ra anto jintte ra co dihi ra hasta dinttecoan ra. Co ittoha ra denhe ra jintta. ²² Co jañá tenchexin ra jianha ngain chojni Jesucristo co nchecosoehe ra tti chojni noa que dicaoha tti jine. ¿Achondaha ra

nchiandoi ra tti sinttixin ra co tti sixin ra? ¿Quexén rročhjan de ixin jaha ra? ¿Arronichja čhjoin de ixin jaha ra? ¡Nahi de ixin tti tenchehe ra jiji!

Cena de Jesucristo

(Mt. 26.26-29; Mr. 14.22-25; Lc. 22.14-20)

²³ Janha de ngain Jesucristo mismo vayaxin tti janha jointtacoanha jaha ra: Que ngain tti tte que Judas cjoago Jesús para ngain tti chojni que ningaconhe jehe, Jesús de rá tsexin niottja ²⁴ co are joexin joanjo gracias ngain Dios, jehe cončhinji nio co ndačo: “Jintte ra. Jiji jehe cuerpona que janha sanjo para tsjenguijnaxin jaha ra. Janhi nchehe ra para rrořaxaonxin ni ra janha.” ²⁵ Jamé cai, are joexin cena, jehe de rá tsexin tti vaso que jiria vino co ndačo: “Vino jiji rročo tti nuevo trato que nchegurá conixin jnina. Cada nttiha que jaha ra sihi ra, nchehe ra para rrořaxaonxin ni ra janha.” ²⁶ Mexinxin cada nttiha que jaha ra sintte ra niottja co sihi ra vino para ngain Santa Cena, jaha ra nchehe ra jańá ixin Jesucristo ndavenhe para ixin jaha ra. Co nchehe ra jiji hasta que jehe tsí iná.

Quexén sine chojni tti Santa Cena

²⁷ Jańá, quexeho chojni que jine niottja co dihi de ngain vasoe Jesucristo co si jehe chojni mé ncheha inchin jiquininxin, jehe nchesayeha Dios, co chojni mé nchehe jianha ixin dicaoha respeto ngain cuerpoe Jesucristo co ngain jní Jesucristo. ²⁸ Mexinxin ante de sintte ra tti niottja co sihi ra de tti ngain vaso que Jesucristo coetonha, cada jaha ra řaxaon ra jian quexén sinchehe ra para sintte ra Cena mé inchin jiquininxin ²⁹ ixin si jintte ra co dihi ra co řaxaonha ra que ixin mé rročo cuerpoe Jesucristo, pero jeho tettjé ra castigo para ixin jaha ra. ³⁰ Mexinxin anto tsje de jaha ra teniha ra co tsangaha ra, co icanxin chojni de jaha ra hasta ondavenhe na. ³¹ Pero si ján na rrocjinho na cuidado jian jaon na ante de rrojontte na Cena jiji, Jesucristo rrochondaha que rrochjá na castigo jiji. ³² Pero are Jesucristo jehe dicon que ján na nchaoha tenttoho na, jehe nttacastigá na nchion jai para que ján na ttentoxinhi na vidá na, co jamé ján na tsjinha na ngain infierno tti tsji cain chojni que ditticaonha Jesucristo.

³³ Jańá mexinxin are rrořatte ra para sintte ra Cena jiji, chonhe chó ra naná ra para nataonxin sintte ra cain ra. ³⁴ Si čhonja chojni senhe jintta, icha jian si jehe sine ngain nchiandoha para que jehe sitaonha nttiha co sine icha que cainxin chojni are sine na ngain Cena mé, co jamé Dios rrochjeha chojni mé castigo. Co tti icha asunto janha rrondattjo ra are saso para sasotsjaha ra.

12

Tti joachaxin que danjo Espíritu Santo ngain cada chojni

¹ Hermanos, jí icanxin cosa que janha rinaho tsonoha ra de ixin joachaxin que danjo Espíritu Santo ngain cada chojni.

² Jaha ra noha ra jian que are řa vaguitticaonha ra Jesucristo, jaha ra vaguittooxin ra de vanchesayehe ra canxion ídolo que čhoha nichja. ³ Mexinxin jai janha rinaho tsonoha ra que cain chojni que jí Espíritu Santo ngain čhoha rrondačo: “¡Jesús jianha!” Co cain chojni que rrondačo: “¡Jesús tti chonda cain joachaxin!” pero ixin Espíritu Santo jí ngain chojni mé.

4 Dios chjá na tsje clase de joachaxin, pero jeho ngain Espíritu Santo ttixin cain joachaxin mé. 5 Jí tsje clase de xa que sonttoho na, pero cain xa mé xajeho xa para ixin Jesucristo. 6 Jí tsje manera que nttoho na xa mé, pero jeho nacoaxinxon Dios tti ttjenguijna cain chojni para nchehe na xa mé. 7 Dios tjago ixin cada na chonda na Espíritu Santo nganji na ixin jehe mé tti chjá na joachaxin cada na. Co joachaxin mé tti ttjenguijna na ján na para que ján na nchao tsjenguijna na icha chojni que ditticaon Jesús. 8 De ixin Espíritu Santo Dios danjo joachaxin ngain canxion chojni para nichja na jian inchin anto ttinxin na. Co icanxin na xajeho Espíritu Santo tti danjo joachaxin para ndačo na ngain icha chojni tti Dios joinchenohe na. 9 Canxion na dayé na joachaxin de ixin jehe Espíritu mé para ditticaon na jian. Co icanxin na dayé na joachaxin para nchexingamehe na chojni nihi. 10 Icanxin na dayé na joachaxin de nchehe na milagro. Co icanxin na dayé na joachaxin para ndache na chojni joajné Dios que jehe na dayé na. Co icanxin na Espíritu Santo chjé na joachaxin para datsoan na tti chojni que jí espíritu jianha ngain co tti chojni que jí Espíritu ndoa ngain. Co icanxin na dayé na joachaxin de nchao nichja neje na palabra que ni jehe na ttinxinha na. Co icanxin na dayé na joachaxin para ndačo na ixin quehe rročo palabra mé. 11 Pero cainxin cosa jihi nchehe jeho tti nacoaxinxon Espíritu Santo, mé tti tonchjea ojeje joachaxin ngain cada chojni inchin rinao jehe Espíritu Santo.

Cain na tequininxin na ngain nacoaxinxon cuerpo

12 Inchin cuerpoe ni chonda tsje parte, pero masqui tsje parte rročo nacoa cuerpo, jamé ján na cai ngain Jesucristo; masqui tsje na, pero tonchjian na nacoa cuerpo para ixin jehe. 13 Cada na ján na ná parte de cuerpoe Cristo masqui judío na o griego na, o dicochji na ngain xa o ni nahi. Pero Espíritu Santo joinchechjian cain na nacoa cuerpo are joiguitte na. Co mexinxin ján na parte de cuerpoe Cristo, co cain na vayé na Espíritu Santo.

14 Ná cuerpo tonchjianha nacoa parte, sino de tsje parte. 15 Si rotté ni rrondačo: “Janha jeha rá na, mexinxin janha jeha ná parte de cuerpo jihi”, ¿apoco por ixin jamé rotté ni ijeha ná parte de cuerpoe ni? 16 O si ndatsjoen ni rrondačo: “Janha jeha jmacon na, mexinxin janha jeha ná parte de cuerpo jihi”, cai ¿apoco por ixin jamé ndatsjoen ni ijeha ná parte de cuerpoe ni? 17 Si ngoixin cuerpoe ni rrocji joxon jmacon ni, ¿quexén nchao rroquinhi ni? O si ngoixin cuerpoe ni rrocji joxon ndatsjoen ni, ¿quexén nchao rrocoxajnihi ni ná cosa? 18 Pero Dios coín cada parte de cuerpoe ni ngain lugar tti jehe joinao. 19 Si cain rrocji nacoa parte, ¿quexén rroguehe cuerpoe ni? 20 Masqui jí tsje parte, tonchjian jeho nacoaxinxon cuerpo.

21 Jmacon ni čhoha rrondačo ngain rá ni: “Jaha rrogondanaha”; ni cai já ni čhoha rrondačo ngain rotté ni: “Jaha rrogondanaha.” 22 Jeha jamé ixin tti cain parte de ngain cuerpoe ni que jehe ni tonohe ni dondaha ngain cuerpo, pero cain parte mé tti icha donda ngain cuerpoe ni. 23 Co tti ngain parte de cuerpoe ni tti antoha rinao ni, cai xanotaon. Co tti ngain parte de cuerpoe ni que čhoha xago, co mé tti icha dicao ni cuidado para xanotaon jian, 24 co ncheha ni ngain parte que nchao xago. Jamé Dios joinchechjian cuerpoe ni para que cain parte que icha rinaoha ni, mé tti icha tosayehe, 25 para que xonhi parte tsoñaohé iná parte, sino que cada

parte de cuerpo rroꝥaxaon de ixin icha parte de ꝥajeho cuerpo. ²⁶ Si ná parte de cuerpoe ni ttín, cai icha parte de cuerpoe ni tonohe feo. Co si ná parte de cuerpoe ni ꝥjjoin tonohe, cai tti icha parte de cuerpoe ni ꝥjjoin tonohe.

²⁷ Tti janha rrindaꝥhjan rroꝥho que cain jaha ra tonchjian ra nacoa cuerpoe Cristo, co cada ra tonchjian ra naná parte de cuerpo mé. ²⁸ Jamé Dios chjé cargo jian canxion chojni que te ngain nihngo. Co saho parte para ixin tti chojni que te representanté Jesucristo, yoxin parte para ixin tti chojni que ndaꝥho tti joajna que jehe dayé de ngain Dios, ninxin parte para tti chojni que nchecoenhe icha chojni de ixin Dios, cottimeja para ixin tti chojni que nchehe milagro, para ixin tti chojni que nchexingamehe chojni nihi, para ixin tti chojni que nchao ttjenguijna icha chojni, co para ixin tti chojni que nchao tjagohe icha chojni para nchao nchehe na ꝥa unido, co para ixin tti chojni que nichja neje palabra que ni jehe ꝥhoha ttinxin. ²⁹ ¿Apoco cain na joxon representanté Jesucristo na? O ¿apoco cain na dayé na joajné Dios? ¿Apoco cain na nttocoenhe na chojni de ixin Dios? O ¿apoco cain na nttotoho na milagro? ³⁰ O ¿apoco cain na chonda na joachaxin de nttoxingamehe na chojni nihi? ¿Apoco cain na nchao ndaꝥho neje na palabra que ján na ttinxinha na? ¿Apoco cain na nchao ndache na icha chojni quehe rroꝥho palabra mé? Claro que nahi. ³¹ Jaha ra nchehe ra de que sayehe ra de ngain Dios cain tti joachaxin icha jian. Pero janha tsjagohe ra iná cosa icha jian.

13

Quehe rroꝥho tti rinao chó chojni

¹ Si janha nchao nichja cainxin nguigoeha chojni ngataha nontte co hasta nguigoeha cain ángel, pero si janha rinaoha cain chojni, janha ꝥonhi rentte na masqui rrinichja, ixin mé inchin ná niroa que torancjan o inchin ná chia que nchechjian joxon ruido. ² Si janha ndaꝥhjan tti joajna que janha dayá de ngain Dios, co si janha chonxin cainxin cosa que siconhe, co si janha nona canchesinxon cosa, co si janha anto jian ditticanho Cristo hasta nchao ttetoan jna para satsjixin jna de ngain lugar que te jna, si janha nchao nttaha cain mé, pero si janha rinaoha cain chojni, janha ꝥonhi rentte na. ³ Si janha tsonchjeyá chojni noa cainxin cosa que janha chonda nttihi ngataha nontte, co si janha sanjo hasta cuerpona para rroche ixin janha nichja joajné Jesucristo, pero si janha rinaoha cain chojni, ꝥonhi xé cain tti janha jointtaha.

⁴ Tti chojni que rinao cain chojni chonda paciencia co nchehe cosa jian ngain icha chojni. Chojni mé jeha chjoehe, ni jeha puro nichja de ixin jehe mismo, ni jeha orgulloso. ⁵ Chojni mé jeha grosero ni ttjeha cosa jian para ixin jeha. Chojni mé toñaoha ni ttenchjianha coraje. ⁶ Chojni mé cheha de ixin tti jianha que nchehe icha chojni, jehe ché ngain tti ndoa. ⁷ Cainxin ttixinhí chojni mé de ngain icha chojni ixin jehe na cain tiempo ꝥaxaon na jian de ixin cain chojni mé, co jehe na chonhe na para que chojni mé tsentoxinhi na vidé na ixin nchaoha tenchehe na, co chonda na paciencia para cain chojni mé.

⁸ Ján na chonda na que sonao na cain chojni para cainxin tiempo. Tsí tiempo que tti chojni que nichja joajné Dios que jehe dayé irrochondaha na que rronichja na, ni irronichjaha neje na tti palabra que ni jehe na ttinxinha na. Co ngain tiempo mé isondeha na que Dios sinchenohe na.

⁹ Jai ján na chonda na joachaxin para rrochonxin na, pero jehonchion, co chojni jai tsjeha joajné Dios dayé. ¹⁰ Pero are tsí Jesucristo, cottimeja tti nchion que ján na chonxin na ndatsjexin ixin Dios sittanoa na cain.

¹¹ Are janha xa nchín joarihi, janha vanichja co vařaxanxo co vaquianxin inchin ná chjan. Pero are janha ocjoi ná xí, cointtoa cain cosa que vařaxanho are nchín na. ¹² Xajeho jamé jai docon na cain cosé Dios inchin ngacjan ranontte, o inchin are čhoja doconxin na con na ngain ná espejo que xonhi xé. Pero cottimeja ján na socon na cain cosa claro. Jai janha chonxin jehonchion, pero cottimeja janha rrochonxin cainxin inchin Dios chonxin na janha. ¹³ Jamé, jí ní cosa que ján na chonda na que sonttoho na para cain tiempo. Chonda na que sotticaon na Jesucristo, co chonda na que sotticaon na ixin seguro tsonhe cain tti ndačho Dios, co chonda na que sonao na cain chojni. Pero de canio cosa jiji jehonacoa tti icha importante; jehon tti sonao na cain chojni.

14

Pablo ndačho ixin quehe rročho tti nichja neje ni palabra que jehe ni ttinxinha ni

¹ Nchehe ra que rinao ra cain chojni, co xajeho tiempo danchia ra que Dios rrochjá ra cain clase de joachaxin, pero icha danchia ra tti joachaxin de rronchache ra chojni tti joajna que dayé ni que ttixin de ngain Dios. ² Tti chojni que nichja neje tti palabra que ni jehe ttinxinha, chojni mé nichja ngain Dios co jeha ngain chojni ixin xonhi chojni ttinxin tti jinichja chojni mé. Espíritu Santo tti nchenichja chojni mé, pero jehe nichja cosa jima que xonhi chojni ttinxin. ³ Co tti chojni que nichja tti joajna que jehe dayé que ttixin ngain Dios, jehe nichja ngain icha chojni para icha sitticaon na Jesucristo co para sincheanimá na co para que xonhi joachjaon tsa ansén na.

⁴ Tti chojni que nichja neje tti palabra que ni jehe ttinxinha, jamé jehe mismo icha ditticaon Jesucristo. Pero tti chojni que nichja tti joajna que jehe dayé que ttixin de ngain Dios, chojni mé icha nchequitticaon cain chojni que ttinhi.

⁵ Janha rrojinaho que cain jaha ra rrochonda ra joachaxin de rronichja neje ra tti palabra que ni jaha ra ttinxinha ra. Pero are xatte ra ngain servicioa ra, janha icha rinaho que jaha ra rronichja ra tti joajna que dayehe ra que ttixin de ngain Dios. Ixin jamé icha tsjenguijna ra cain chojni, co rronichjaha ra tti palabra que xonhi chojni ttinxin. Pero si ná ra chonda ra joachaxin para rronchache ra chojni quehe rročho palabra mé, nchao para rronichja ra palabra mé ixin cai mé tsjenguijna cain jaha ra. ⁶ Mexinxin si janha saso para sasotsjaha ra co rronichjixin ra tti palabra que ni janha tsianxinha, xonhi xé para ixin jaha ra tti janha rronichja. Pero si janha rronattjo ra claro tti ndachjenji na Dios, o sinttacoanha ra tti ndoa de ixin Dios, cottimeja ján, janha rrochjaha ra tti rrogondaha ra co tti ndoa sondaha ra.

⁷ Tsín na de ejemplo cosa que nchechjan són tti chondaha vida inchin ná flauta o ná arpa. Si chojni noeha danoa o dinga cosa mé, čhoja satsoan ni quehe són jinchechjian. ⁸ Co iná ejemplo de ngain guerra. Si clarín sanoaha xa claro ixin tseto xa, xonhi soldado rrořaxaon ixin tseto. ⁹ Xajeho jamé tonhe nganji jaha ra cai: si neje ra ndačhoja palabra que nchao tsinxin ni, xonhi chojni tsinxin quehe tendačho ra. ¹⁰ Ján, ndoa

que jí tsje idioma ngoixin mundo, co palabré cada idioma mé chonda sentido. ¹¹ Pero si janha ttianxinha tti idioma que rronichjananxin icanxin chojni, janha inchin chojni de iná nación para ngain chojni mé, co cai jehe na inchin chojni de iná nación para nganji na janha. ¹² Mexinxin jaha ra que anto rinao ra sayehe ra joachaxin que ttixin de ngain Espiritu Santo, pero de cain yá, icha nchehe ra que dayehe ra tti joachaxin que tsjengujna cain chojni que ditticaon Jesucristo.

¹³ Jamé cai, tti chojni que chonda joachaxin de nichja neje palabra que jehe ttinxinha, cai chonda que sanchia joachaxin ngain Dios para que Dios rrochjé jehe joachaxin de nchao tsinxin para rrondache icha chojni quehe rrocho palabra mé. ¹⁴ Si janha sinttacoanxin Dios conixin tti palabra que janha ttianxinha, já, ndoa que janha rrinichja conixin espirituna, pero ngain joarrixaoanna rritianxinha quehe rrocho tti janha rrinichja. ¹⁵ ¿Quehe sinttaha janha remé? Chonda que jí tiempo que janha rronichja ngain Dios conixin espirituna pero cai chonda que jí tiempo que janha rronichja ngain Dios conixin joarrixaoanna. Chonda que sinttacoanxin himno conixin espirituna, pero cai sinttacoanxin conixin joarrixaoanna. ¹⁶ Ixin si ná chojni jinchecoanxinhi Dios jeho de ngain espiritue, masqui icha chojni tettinhi tti jehe jindacho, pero jehe na ttinxinha na tti jehe jindacho co mexinxin choha rronichja na ngain Dios junto conixin jehe ixin jehe na ttinxinha na palabra mé. ¹⁷ Masqui tti jehe ni nichja ni ngain Dios atto nchao jí, pero para icha chojni, nahi, ixin ttinxinha na tti jehe ni nichja ni. ¹⁸ Janha chjaha gracias ngain Dios ixin janha nichja neje palabra que janha ttianxinha icha tsje nttiha que cain jaha ra, ¹⁹ pero are ngain servicio, icha jian si janha nichja jeho naho palabra que chojni nchao tsinxin na, que rronichja dies mil palabra que xonhi chojni ttinxin.

²⁰ Hermanos, janha rinaho que rroxaxaonha ra inchin chjan de cain cosa jihi. Já, dintte ra inchin chjan que chonxinha cosa jianha, pero dintte ra inchin chojni yeye para xaxaon ra jian ngain cosa de Dios. ²¹ Ndacho ngain tti libro que jitaxin Palabré Dios: “Janha rronichjá nación mé ngain ojé nguigoa co de ixin tti chojni que tsixin de ngain ojé nontte, pero masqui jamé, xa sincheha na na caso, jañá cho Dios.” ²² Jamé que tti joachaxin de rronichja neje ni palabra que ni jehe ni tsinxinha ni, mé sirve para ná señal para ixin tti chojni que ditticaonha Jesucristo, co jeha para ixin tti chojni que ditticaon Jesucristo. Pero tti joachaxin de rrondache ni chojni tti joajné Dios que jehe ni dayé ni, mé sirve de señal para ixin tti chojni que ditticaon Jesucristo, co jeha para ixin tti chojni que ditticaonha Jesucristo. ²³ Mexinxin are ná chojni que ditticaonha Jesucristo o chonxinha quehe rrocho cain jihi siji ngain nihngo co tsinhi que jaha ra tenichja ra palabra que ni jaha ra ttinxinha ra, chojni mé daca rroxaxaon que jaha ra ndadinttexenga ra. ²⁴ Pero si ngain nihngo jaha ra tendacho ra tti joajna que ttixin de ngain Dios que dayehe ra co rato mé sixinhi chojni que ditticaonha Jesucristo o tti chojni que xa ttinxinha jian de ixin Cristo, chojni mé sitticaon co satsoan ixin joinchehe jianha. Jehe jamé tsonohe are tsinhi tti jaha ra tendacho ra. ²⁵ Jamé cain tti jí ngain ansén chojni mé tononxin, co jehe settoxin nttajochjihi para sinchesayehe Dios co rrondacho que ndoa jí Dios gayaha ra.

Nchehe ra cain cosa inchin ditonha ra co inchin jiquininxin

²⁶ Mexinxin, hermanos, are rroʒatte ra para sinchecoanxinhi ra Dios, canxion ra rrotsje ra salmo, co icanxin ra sinchecoenhe ra chojni cosa de Dios, co icanxin ra rrondačo ra cosa que Dios jointtanoha ra, co icanxin ra rronichja neje ra palabra que ni jaha ra ttinxinha ra, co icanxin ra rrondačo ra ixin quehe rročo tti palabra mé. Pero janha rinaho que cain mé tsjenguijna chojni que ditticaon Jesucristo. ²⁷ Are rronichja neje ra palabra que ni jaha ra ttinxinha ra pero are mé rronichja jeho yoto ra, o hasta ní ra co rronichja ra naná ra co naná ra. Co ttoha de jaha ra chonda ra que rrondačo ra quehe rročo tti nichja compañeroa ra. ²⁸ Pero si ʒonhi chojni nchao rrondačo ixin quehe rročo tti palabra que rronichja ra, icha jian ʒonhi palabra mé rronichja ra ngain servicio, sino que cada ra rronichja ra jion ngain Dios para que ʒonhi chojni sinchetjanji ra. ²⁹ Jamé cai si para rronichja ra tti joajna que jaha ra dayehe ra que ttixin de ngain Dios, rronichja jeho yó o ní chojni, co icha ra tsinhi ra co rrondačo ra si ndoa joajna mé joixin de ngain Dios. ³⁰ Pero si rato mé Dios sinchenohe ʒonja cosa iná chojni que te nttiha, tti chojni que jinichja rato mé chonda que sattechoha tiempo para que rroxeha tiempo para ixin rronichja iná chojni. ³¹ Jańá cain ra ʒo sayehe ra joajné Dios, saho rronichja ná ra cottimeja iná ra para que icha chojni tsangui co soan na animado. ³² Tti chojni que nichja tti joajna que jehe dayé que ttixin de ngain Dios chonda joachaxin para rrochonhe tsjexin rronichja ná na cottimeja jehe ³³ ixin Dios jehe ncheʒoxinha chojni que ttenchjianha respeto.

Jaha ra nchehe ra jian inchin nchehe chojni ngain icha nihngo. ³⁴ Ixin ngain ningoe Jesucristo, mé nčí chondaha ncha que rronichja ncha are ngain servicio ngain nihngo ixin jiquininxinha. Ixin chondaha nčí joachaxin para que jehe ncha tsetonha ncha ngain nihngo ixin jamé jitaxin ngain ley de Dios. ³⁵ Si jehe ncha rinao ncha tsonohe ncha ná cosa, chonda ncha que sanchianguihi ncha xixihi ncha are ongain nchiandoha na ixin ʒjoinha dicon ni que ná nčí rronichja ncha are ngain servicio.

³⁶ Chonda que ʒaxaon ra que jaha jaha ra tti chojni que saho conohe palabré Dios, ni jeoha jaha ra tti chojni que vayé palabré Dios, mexinxin ʒoha tti rrondačo jaha ra sinchehe icha chojni ngain nihngo. ³⁷ Si ttoha de jaha ra datsoan ra que chonda ra joachaxin para nichja ra joajna que dayehe ra que ttixin de ngain Dios o que chonda ra quexeho joachaxin de Espíritu Santo, pero chonda que satsoan ra que tti janha rricjinha ra Dios coetonna. ³⁸ Pero si chojni que rronichja joajna mé ncheha caso jiji, cai jaha ra ncheha ra caso tti rrondačo chojni mé.

³⁹ Jańá, hermanos, nchehe ra de que Dios rrochjá ra joajné para nchao rrondache ra icha chojni, co cayacoenhe ra tti chojni que rronichja neje palabra que ni jehe tsinxinha. ⁴⁰ Pero nchehe ra cain jiji inchin jiquininxin conixin respeto.

15

Pablo ndačo quehe rročo ixin Cristo xechon

¹ Janché, janha rinaho que rroʒaxaon ra tti jian joajna que janha ndattjo ra. Joajna jiji tti jaha ra vitticaon ra, co tti jaha ra ditticaon ra hasta jai. ² Cai de ixin joajna jiji jaha ra chonda ra iná vida naroaxin

que xonhi tiempo tsjexin si jaha ra sinchehe ra sigue tti jaha ra ditticaon ra, si vitticaon ra ndoa.

³ Saho, janha jointtaoanha ra tti janha vayá. Janha ndattjo ra que ixin Cristo venhe para cjoenga hna de ixin cain tti jianha que nttoho na inchin ndaço ngain libro que jitaxin Palabré Dios. ⁴ Co janha ndattjo ra que cjoavá na Jesús co ninxin nchanho jehe xechon inchin jitaxin ngain Palabré Dios cai. ⁵ Co janha ndattjo ra que ixin jehe saho xago ngain Pedro, cottimeja ngain tti icha nirepresentanté jehe. ⁶ Co después ngain nacoa tiempo jehe xago ngain icha de naho ciento chojni que vitticaon jehe. Co tsje de chojni mé xa techon na jai, masqui ttoha na ondavenhe na. ⁷ Después, jehe xago ngain Jacobo, cottimeja ngain cain nirepresentanté jehe.

⁸ Co después de cainxin mé, xago nganji na janha cai masqui are mé janha joarihi inchin ná chjan que toncjihi xan are janné xan xaxaonha jan ixin tsoncjihi chjan mé. ⁹ Janha tti icha jeha importante na de cainxin nirepresentanté Jesucristo co ninchin jiquininxinha na para sinhi na representanté jehe ixin janha feo vantaha ngain chojni que vitticaon jehe. ¹⁰ Pero jai janha ndoa representanté Jesucristo na ixin Dios jian nganji janha, co tti jehe joinchehe nganji janha jeha jamaoncoa ixin janha jointtaha xa icha que cain icha nirepresentanté Jesucristo masqui jeha janha tti jointtaha, Dios tti joinchehe de ixin janha. ¹¹ Pero ndosennaha si janha tti icha jointtaha xa o jehe na, pero jihi tti joajna que janha na vayá na, co joajna jihi tti vitticaon ra jaha ra.

Quehe rroço tti rroxechon chojni que ndadenhe

¹² Tti joajna que janha na ndattjo ra ndaço que Cristo xechon, mexinxin ¿quedonda ttoha de jaha ra ndaço ra que ixin tti chojni que ndadenhe irrocjanha na rroxechon na? ¹³ Si chojni que ndadenhe irroxechonha na, mexinxin ni Cristo xechonha. ¹⁴ Co si Cristo xechonha, rroço xonhi xé tti joajna que janha na ndattjo ra remé. Co tti jaha ra ditticaon ra de ixin Jesucristo xonhi xé cai remé. ¹⁵ Si jamé, janha na rroço chojni que nichja ndoaha de ixin Dios ixin ondaçhjan na que Dios joinchexechon Cristo are ndavenhe. Pero si jeha ndoa que ixin chojni que ndadenhe xechon na, mexinxin jeha ndoa que Dios joinchexechon Cristo are ndavenhe ¹⁶ ixin si nindadenhe ixechonha na, mexinxin cai Cristo xechonha are ndavenhe. ¹⁷ Co si Cristo xechonha are ndavenhe, tti jaha ra ditticaon ra de ixin jehe na xoinxon xé, co jaha ra xa teca ra cain cosa jianha que nchehe ra. ¹⁸ Co si jamé, cai cain chojni que vitticaon Cristo co ndavitnteguenhe na ndavitján almé na. ¹⁹ Si ján na dotticaon na que Cristo jeha jian para ngain vida jihi, ján na tti chojni que icha feo tsonohe de cain chojni.

²⁰ Pero tti mero ndoa que ján, Cristo xechon are ndavenhe. Jehe tti saho xechon para que cain chojni que ndadenhe chonda que rroxechon na. ²¹ Ixin Adán vitticaonha Dios, cainxin chojni ngoixin mundo tequininxin ndasenne na. Co ixin Jesucristo xechon are ndavenhe, jamé cai cain chojni jehe chonda que rroxechon na después de ndadenhe na. ²² Jamé inchin cain na ndadenhe na ixin ján na razé Adán na, cai cain na rroxechon na co rrochonda na iná vida naroaxin ixin ján na chojni Cristo na. ²³ Pero cada na inchin tequininxin na: Cristo tti saho xechon are ndavenhe. Cottimeja are Cristo tsí iná, cain chojni jehe rroxechon na. ²⁴ Cottimeja Cristo sinchexantte cainxin joachaxin que jí ntthi ngataha

nontte co ngajni co sinchegayé joachaxin mé ngain Dios Ndodá na ²⁵ ixin Cristo chonda que tsetonha hasta tsjeja cainxin chojni que ningaconhe jehe. ²⁶ Co tti última cosa que jehe ningaconhe, tti ndadenhe ni, cai mé chonda que rroxante co ndasitján. ²⁷ Ixin Dios joanjo joachaxin ngain Cristo para que jehe ttetonhe cain cosa, pero are ndačo ngain Palabré Dios que Cristo ttetonhe cain cosa, mé rročoha ixin ttetonha ngain Dios ixin Dios tti joanjo joachaxin ngain Cristo para que jehe ttetonha. ²⁸ Co are Cristo osacha de ngain cain tti ningaconhe, cottimeja jehe Cristo tti Xenhe Dios, rrocjan sanjo joachaxin que jehe vayé de ngain Dios para que jehó Dios tti tsetonha cain cosa. Ixin Dios tti joanjo joachaxin para que Cristo sacha.

²⁹ Si chojni que ndadenhe irroxechonha na ¿quedonda jí chojni que diguite na en lugar de tti chojni que ndadenhe? ¿Quedonda nchehe na jańá si jehe na ditticaonha na que tsí nchanho que cain tti ndadenhe rroxechon?

³⁰ ¿Co quedonda cain tiempo ján na techonda na peligro? ³¹ Cain nchanho janha chonda peligro de ndasene na ixin nichja de ixin Jesucristo. Co jamé ndoa tti janha tonna, pero cai čhjoin tonona janha ixin jaha ra ditticaon ra Jesucristo, tti chonda cain joachaxin para ixin ján na. ³² Janha jointtadiscutí xí čhintto ngain ciudad de Efeso de ixin jehe palabré Dios, pero si rrocji ndoa que chojni que ndadenhe irroxechonha na, janha irrochondaha que rrondačhjan palabra mé co rrochonda razón tti chojni que ndačo: “Sontte na co sonho na ixin ndoe o rejngui ondasene na.”

³³ Dittoaxinha ra sinttayaha ra na. Ndoa inchin ndačo dicho: “Chojni jianha nchetján chojni jian.” ³⁴ Jaha ra dintte ra ngain ná vida jian co nao; ncheha ra cosa jianha. Janha ndattjo ra jihi ixin nona que ttoha de jaha ra řa ditticaonha ra Dios. Janha ndattjo ra jańá para que rrochonxin ra joasoaxin.

Quexén rroxechon chojni que ndadenhe

³⁵ Pero puede čhonja chojni sanchiangui: “¿Quexén rroxechon chojni que ndadenhe? ¿Quehe clase de cuerpo rrochonda na?” ³⁶ Co mé ná pregunta que řonhi xé. Inchin are dinga ná semilla, semilla mé chonda que ndadenhe para que činhi ca. ³⁷ Tti dinga jeha ca ixin jeha ca tti čhintaon, jehó grano que dinga, mé tti čhintaon, sea trigo o iná semilla. ³⁸ Cottimeja Dios čhjé semilla mé forma que jehe rinao co cada semilla dayé cuerpoe inchin tequininxin. ³⁹ Jeha cainxin cuerpo řajeho. Cuerpoe chojni ojé clase, co cuerpoe coxigo ojé clase, cuerpoe conttoa iná clase, co cuerpoe copescado ojé clase. ⁴⁰ Jamé cai cuerpoe ángel ngajni ná clase co cuerpoe chojni ngataha nontte iná clase. Pero cuerpoe ángel chonda ná manera de čhjoin te co cuerpoe chojni chonda ojé manera de čhjoin te. ⁴¹ Tté nchanho icha jé que tté conittjao, co cai icha jé tté conotse, co de cain conotse cai ojejé tté va. ⁴² Jamé tsonhe cai ngain tti rroxechon chojni que ndadenhe. Jehe řavá ná cuerpo que rrenga, co rroxechon iná cuerpo que isenha. ⁴³ Tti cuerpo que chonda na jai čhjoinha te ixin tonihi co ndadenhe, pero cuerpo que rroxechon anto čhjoin sehe ixin itsoniha co ni isenha. Cuerpo que chonda na jai tsangaha, pero cuerpo que rroxechon jehe soji. ⁴⁴ Are ndadenhe ni, řavá jehó cuerpo que jehe ni dayé ni de ngataha nontte, pero are rroxechon

ni, sayé ni cuerpo de ngain Dios. Jí cuerpo de ngataha nontte, co cai jí cuerpo de ngajni.

⁴⁵ Ndačo ngain tti jitaxin Palabré Dios: “Tti saho xí cjoí Adán co jehe vehe tti saho chojni que vechonda vida”, pero ján na ndačo na ixin Cristo tti último Adán ixin jehe chonda espíritu que danjo vida. ⁴⁶ Pero jai ján na chondaha na cuerpo de ngajni; jai ján na chonda na cuerpo de ngataha nontte. Cottimeja rrochonda na cuerpo de ngajni. ⁴⁷ Tti saho xí conchjian xa de jinche, co jehe xa de ngataha nontte xa. Co Jesucristo inchin tti yoxin xí, pero jehe joixin de ngajni. ⁴⁸ Cada chojni chonda naná cuerpo inchin cuerpo que vechonda Adán que conchjian de jinche. Pero tti chojni que ditticaon ngain Jesucristo, chojni mé tsí nchanho que rrochonda na cuerpo inchin cuerpo que chonda Jesucristo ngajni. ⁴⁹ Xajeho jai ján na chonda na ná cuerpo inchin cuerpo Adán, pero tsí nchanho que ján na rrochonda na cuerpo inchin cuerpo Jesucristo.

⁵⁰ Janha rrindattjo ra que cuerpo de nttao co nttaloro čhoča sehe ngain lugar tti jittetonha Dios, ixin tti seha tončjenhe čhoča sehe ngain tti tončjenhe para cainxin tiempo. ⁵¹ Pero janha rinaho que jaha ra tsonoha ra ná cosa que xa noaha ra: Jaha cainxin na senhe na, pero ján, cainxin na sayé na oje cuerpo. ⁵² Jihi tsonhe anto daca inchin are ttejé co danttjé con ni; tsonhe are tsinhi ni tti último tsoyao trompeta. Are mé cain chojni que vitticaon palabré Jesús co ondavenhe na, jehe na rroxechon na conixin iná cuerpo co ixonhi tiempo senhe na. Co xo xa sonttechon na are mé anto daca sitoxin cuerpoa na cai ⁵³ ixin cuerpoa na jai tončjenha sé; co chonda que sitoxin para que nchao tsončjenhe conixin tti tončjenhe para cainxin tiempo. ⁵⁴ Co are tsonhe jamé, cottimeja yá joiconhe tti ndačo ngain tti jitaxin Palabré Dios: “Tti ndadenhe ni ondaxante ixin ojoacha tti danjo vida.” ⁵⁵ Co nttiha ndačo cai: “Muerte, ¿cja tti joachaxin que jaha joarichonda para vagoenxin cuerpona na? ¿Cja tti jaha rrojacha?” ⁵⁶ Ixin tti jianha que nchehe ni, mé tti chjé joachaxin muerte para doen cuerpoe ni. Co ley que joanjo Dios ndačo que ixin jamé tsonhe. ⁵⁷ Pero chjé na gracias ngain Dios ixin jehe chjá na joachaxin para sacha na de ngain muerte ixin Jesucristo ojoacha.

⁵⁸ Mexinxin de cain jihi, cainxin tiempo dintte ra soji co nchehe ra icha co icha inchin coetonha Jesucristo ixin jaha ra onoha ra que tti xa que jaha ra tenchehe ra conixin Cristo jaha jamaoncoa.

16

Quexén joatsetaonhe chó na tomi

¹ Janhi sinchehe ra para satsetaonhe chó ra tomi para tsjenguijnaxin ra icha chojni que ditticaon Jesucristo, xajeho inchin tti ndattjan chojni ngain cainxin nihngo que te ngain nonttehe Galacia. ² Cain domingo cada jaha ra dantsjenda ra nchion tomi que dacha ra ngain cada semana co ttenchjinha ra tomi mé para que isatsetaonha chó ra tomi are janha saso. ³ Co are janha saso, janha rrorroanha para Jerusalén tti chojni que jaha ra rrondačo ra, co janha rrochjaha na ná carta para que sicao na tomi que jaha ra joatse ra para ngain chojni que ditticaon Jesús nttiha. ⁴ Co si janha nchao tsji, cai tsji conixin jehe na.

Are xaxaon Pablo quecá lugar satsji

⁵ Ngain viajena chonda que satto nongain nonttehe Macedonia, cotimeja saso ngain ciudad de Corinto. ⁶ Puede nttiha tasarihi nganji ra nchion sé o puede hasta ngoixin tiempoe quin. Cotimeja jaha ra nchao tsjenguijna ni ra para ngain viajena tti janha chonda que satsji después. ⁷ Janha rinaoha jehó sattotaonxon nganji ra; janha rinahó sarihi ná tiempo nchion sé nganji ra si Dios rrochjana joachaxin. ⁸ Pero janha xa sarihi nttihi ngain ciudad de Efeso hasta ngain quiai de Pentecostés, ⁹ ixin janha chonda ná jian oportunidad ngain tiempo jiji para rrondat-tjan chojni co tsjagoa na de ixin Dios masqui te tsje chojni que jehe anto ningaconhe tti janha ndachjan.

¹⁰ Si siji Timoteo nganji ra, nchehe ra que jehe sehe contento ngayaha ra ixin jehe nchehe xé Dios inchin janha. ¹¹ Mexinxin ni ná jaha ra nchedespreciaha ra are jehe siji nganji ra. Ttjenguijna ra para ngain viajé jehe para que jehe tsí contento sitsjena ixin janha rrichoan jehe conixin icanxin xicompañerona na.

¹² Co Apolos janha anto jointtatsán ñao para que rroguiji rroguitsjaha ra conixin icanxin chojni que ditticaon Jesucristo, pero jehe choha joiiji jai. Jehe siji pero are jehe rrochondaja oportunidad.

Pablo joexin cjin carté co rroanha joajna

¹³ Dintte ra listo, co ditticaon ra jehó Cristo. Dintte ra inchin xí jian. Dintte ra soji. ¹⁴ Cain cosa que sinchehe ra, nchehe ra jian ixin jamé rrocho que ján rinao ra cain chojni.

¹⁵ Co jai, hermanos, jaha ra noha ra que ixin Estéfnas conixin cain nindoha, jehe na tti nisaho vitticaon tti jian joajné Cristo ngain regioen Acaya. Co jehe na nitettjenguijna icha chojni que teditticaon palabré Cristo. ¹⁶ Janha rinahó que jaha ra ditticaon ra tti chojni que nchehe inchin jehe Estéfnas conixin nindoha co inchin tti chojni que nchehe xé Dios co inchin tti chojni que ttjenguijna icha chojni que ditticaon palabré Cristo. ¹⁷ Janha anto chahna ixin vicon joí Estéfnas, co Fortunato co Acaico. Jehe na nicjoenguijna na janha na ixin jaha ra choha cjoenguijna ni ra ixin vintteha ra nttihi. ¹⁸ Jehe na joincheanimá na na janha inchin joinchehe na nganji ra cai. Janha rinahó que cain chojni rronichja jian ngain chojni que nchehe inchin jehe na.

¹⁹ Cain chojni ngain nihngo de ngain regioen Asia rroanha na joajna para ixin jaha ra. Co Aquila, co Priscila, co cain chojni que xatte ngain nchiandoha na para servicio cai rroanha na tsje joajna para ixin jaha ra. ²⁰ Cai cain chojni que ditticaon Jesucristo nttihi ngain ciudad jiji rroanha na tsje joajna nganji jaha ra. Co cain jaha ra chjehe chó ra joajna jian are setan chó ra.

²¹ Janha, Pablo na, rriroanha ra joajna jiji que cjinxin na conixin rana co letrana.

²² Si chonja chojni rinaoha na Jesucristo, chojni mé te na condenado. ¡Jesucristo, jaca sihi!

²³ Jesucristo sinchenchaon nganji ra. ²⁴ Janha rinahó de ngain ansenna cainxin jaha ra ixin cainxin na chojni Jesucristo na. Amén.

Yoxin Carta Que Dicjin Pablo Para Ixin Chojni Que Ditticaon Jesucristo Ngain Ciudad De Corinto

Pablo chjé joajna chojni ngain Corinto

¹ Janha Pablo na Dios joinao para que janha rrihi ná representanté Jesucristo. Janha conixin Timoteo techjaha ra joajna jihi, jaha ra xo ditticaon ra Dios ngain ciudad de Corinto, co cai jaha ra xo ditticaon ra Dios que te ra ngoixin regioen Acaya. ² Dios Ndojá na co Jesucristo, tti chonda joachaxin para ixin ján na, sinchenchaon nganji ra co rrochjá ra tti čhjoin que tsonohe ansean ra.

Tti anto tangui que conhe Pablo

³ Já n na sonttocoanxinhi na Dios Ndojá Jesucristo ixin jehe Dios mé tti Ndojá na que ttiacoaná na co jehe Dios mé tti chjá na consuelo cainxin tiempo. ⁴ Dios chjana na janha na consuelo de cainxin tti tangui que tonna na para que janha na cai nchao sinttaconsolá na tti chojni que tangui tonhe conixin xajeho consuelo que chjana na Dios. ⁵ Jañá janha na anto tangui tonna na ixin ditticanho na Cristo, pero cai de ixin Cristo janha na dayé na anto tsje consuelo. ⁶ Mexinxin si janha na tangui tonna na o si Dios ncheconsolá na, mé para que jaha ra rrochonxin ra de ixin Dios co rrochondaha ra castigo de ixin tti jianha que joinchehe ra. Co jamé rrochonda ra paciencia para tsixinha ra are anto tangui tsonha ra inchin tetonna na janha na jai. ⁷ Co janha na chonda na seguro que xonhi jianha tsonha ra are setan ra tangui inchin janha na tedetan na jai ixin Dios tsjenguijna ra inchin jehe ttjenguijna cain chojni que ditticaon ngain.

⁸ Hermanos, janha na rinaho na que jaha ra tsonoha ra quejanhi problema joichonda na janha na ngain nonttehe Asia. Mé cjoí ná cosa anto tangui para ixin janha na, hasta que merocoa rroquixinnaha na ngain problema mé. Co janha na ořaxanho na que ndarroguenxin na nttiha. ⁹ Janha na conona na que seguro narrogoenxon na na. Pero jihi conna na para que coangu na chonda na confianza jehó ngain Dios que nchexechon chojni, co chondaha na confianza ngain chojni ni nganji na janha na mismo sino que jehó ngain Dios. ¹⁰ Dios coančhjangandaha janha na venhe na are mé, co xa jinda na jai; jehe tančhjangandaha chojni que rinao nasoenxon na. Co chonda na cainxin confianza ngain jehe que jehe xa senda na de ngain chojni que ningaonna na, ¹¹ si jaha ra tsjenguijna ni ra ixin sinchetsenhe ra ñao Dios para ixin janha na. Co si tsje chojni sinchetsenhe na ñao Dios para ixin janha na, cai tsje chojni sanjo gracias ngain Dios de ixin tti jian que Dios sinchehe nganji na janha na.

Quedonda cjoiha Pablo ngain ciudad de Corinto

¹² Jí ná cosa que ansenna na čhjoin tonohe, co mé ixin janha na nona na que janha na jian tenttaha na ngataha nontte jihi, co cai nganji jaha ra. Dios cjoenguijna na janha na para que tenttaha na jañá ixin jehe anto jian; jeha ixin janha na anto nona na. ¹³⁻¹⁴ Cain carta que janha na rroanha ra, xonhi icha cosa jitaxin nttiha jehó tti jaha ra nchao cjoao

ra co coinxin ra. Jai te parte que jaha ra ocoinxin ra, pero janha rinaho que tsinxin ra jian cain parte para que ngain nchanho are tsí Jesucristo jaha ra nchao tsonohe ansean ra ĉhjoin de ixin janha na, inchin janha na ĉhjoin tsonohe ansenna na de ixin jaha ra.

¹⁵ Janha chonda confianza de ixin cain jihi, mexinxin janha joiĉaxanho saho rrogaso nganji ra para rrogasotsjaha ra para que jaha ra ĉhjoin rroconoha ra ixin janha rrogasotsjaha ra yó ntŕiha. ¹⁶ Janha joiĉaxanho rrogatto noyá para rrogasotsjaha ra are janha sacjoi para regioen Macedonia, co después are janha rrocjanxin na de ntŕiha rrogaso para rrogasotsjaha ra iná. Co jamé jaha ra rrochonda ra oportunidad de rrocjenguijna ni ra de ixin tti rrogondana ngain viajena para regioen Judea. ¹⁷ Puede jaha ra ĉaxaon ra que janha jointtachjianha medidana jian are janha joiĉaxanho rrojinttaha jihi. O puede ĉaxaon ra que janha inchin tti chojni que ndaĉho de ngain rroha “ján” co de ngain ansén “nahi”. ¹⁸ Dios nohe jian que janha na jeha jamé na. ¹⁹ Silvano, co Timoteo co janha ndattjo ra de ixin Jesucristo tti Xenhe Dios. Co Jesucristo jeha inchin tti chojni que ndaĉho jamé; Jesucristo cainxin tiempo nchehe cain tti jian que jehe ndaĉho. ²⁰ Co de ngain jehe toenxin cainxin tti jian que ndaĉho Dios. Mexinxin are nttocoanxinhi na Dios, ndaĉho na “Amén” que rroĉho jamé tsonhe, co ndaĉho na jańa ngain Dios por ixin Jesucristo. ²¹ Co Dios, mé tti nchesoji na conixin jaha ra para que dontte na inchin nacoa chojni ngain Cristo, co jehe tti jointtaroa na ngattoxon con jehe. ²² Co jehe cjoago ixin ján na chojni jehe ixin jehe coín Espíritu Santo ngain ansean na co mé rroĉho ixin anto seguro que jehe rroĉjá na anto tsje icha cosa jian cai ngain tiempo que tsí.

²³ Pero ĉa dasoha Corinto ixin rinaoha sinttasattaha ra porque janha anto rinaho ra co janha tsín Dios de testigona co jehe nchao santsjena vidana si ndoaha tti janha rrindattjo ra. ²⁴ Jaha ixin janha na rinaho na tsetonha ra de ngain tti ditticaon ra. Nahi. Jaha mé ixin jaha ra oditticaon ra jian ngain Cristo. Janha na jeho rinaho na tsjenguijna ra para que rrochaha ra icha co ĉonhi joachjaon sehe ngain ansean ra.

2

¹ Mexinxin janha joiĉaxanho ijoasoha joasochjaha ra joachjaon. ² Ixin si janha rroĉjaha ra joachjaon jaha ra, cottimeja ĉonhi ngain chojni tti rochananxin janha ixin jaha ra irroĉhoha ra tsjenguijna ni ra para rrochahna ixin janha ochjaha ra joachjaon. ³ Mexinxin janha cjinha ra cartana icha saho para que jaha ra tsentoxinhi ra vidá ra ixin rinaoha saso sinttasattaha ra co rroĉjaha ra joachjaon. Icha jian si are janha sasotsjaha ra janha rrochahna nganji ra. Janha chonda seguro que are chahna janha, cain jaha ra chaha ra cai. ⁴ Are janha cjinha ra carta mé, anto coá joachjaon que hasta tsjanga; co conona que ndavichjenga ansenna are janha cjinha ra carta mé. Pero jeha cjinha ra carta mé para que jaha ra sinttechinhi ra, jeho para que janha cjoagoha ra que anto rinaho ra.

Quexén sitjañehe tti chojni que joinchehe jianha

⁵ Pero si ĉhonja chojni joinchehe jianha co jidanjo joachjaon, chojni mé jeoha janha jichjana joachjaon, cai cain jaha ra jichjá ra nchion joachjaon. Janha ndaĉhjan que jichjá ra nchion joachjaon para

rrondaçhjanha icha soji nganji ra. ⁶ Tti castigo que jaha ra chjehe ra chojni mé, conixin jehó mé ichondaha ra que rrochjehe ra icha castigo. ⁷ Jai onchao, nchetjañehe ra chojni mé, co dantsjehe ra joachjaon ngain ansén ixin si nahi, puede jehe isitticaonha Jesucristo. ⁸ Mexinxin janha rrinttatsanha ñao ra que tjadohe ra chojni mé que jaha ra ján rinao ra jehe. ⁹ Janha rroanha carta mé nganji ra de ixin asunto jihi para rroconona aco ndoa teditticaon ni ra. ¹⁰ Co si jaha ra sinchetjañehe ra chojni mé, cai janha sinttatjañá jehe. Si ndoa jehe joinchehe jianha nganji na janha, janha jointtatjañá jehe ixin janha anto rinaho jaha ra. Co janha jointtatjañá chojni mé ngattoxon con Jesucristo, ¹¹ para que Satanás tsixinha sinttayá na, ixin ján na chonxin na jian quexén jehe rinao sincheyehe chojni.

Pablo veva contento ngain ciudad de Troas

¹² Are janha joaso ngain ciudad de Troas para joindattjan chojni joajné Jesucristo, are mé janha joarichonda anto jie oportunidad para ndattjan chojni joajna mé. ¹³ Pero ansenna veva contento ixin janha vittjaha Tito. Mexinxin janha sacjoixin de nttiha co sacjoi para regioen Macedonia.

Pablo joinchenohe chojni quexén sacha ni are ditticaon ni ngain Jesucristo

¹⁴ Pero janha chjaha gracias ngain Dios ixin cain tiempo jehe ttjenguijna na para dacha na ngain cosa jianha. Co de ixin janha na, Dios ndache tsje chojni joajné Jesucristo. Co joajna mé inchin tsjoca que toncañajni cain lugar. ¹⁵ Ixin janha na inchin tti tsjoca que Cristo tjaga para ixin Dios. Co tti xajni mé ttji para ngain tti chojni que ditticaon co para ngain chojni que sitján almé. ¹⁶ Para ixin tti chojni que sitján almé, tti çhjoin xajni jihi, anto feo xa para ixin jehe na inchin ná cosa que ndadoen chojni. Pero para ixin tti chojni que chonda vida naroaxin, para ixin jehe na, cosa que çhjoin xajni jihi inchin ná cosa que danjo vida ngain na. Co si Dios tsjenguijnaha chojni, jehe na çhoha rronichja na joajna jihi. ¹⁷ Janha na jeha rindattjan na chojni joajné Dios para sachaxin na tomi. Janha na tentoxinha na joajné Dios inchin nchehe icha chojni. Janha na jeha jamé nttaha na. Janha na ngattoxon con Dios ndattjan na chojni joajna jihi ixin janha na ninchehe xé Jesucristo co chojni Dios que jehe rroanha.

3

Tti ndaço joajné trato naroaxin

¹ Are janha na ndaçhjan na jihi, çaxaxaon ra que janha na cjan na tendaçhjan na iná ixin janha na anto jian na? Ço apoco rinao ra que janha na tsjagoha ra ná carta de recomendación que ixin andoa ditticanho na Cristo? O çani rrogondana na que jaha ra rrochjana ra ná carta de recomendación para sacjinha na? ² Nahi, janha na jeha jamé sinttaha na ixin jaha ra mismo inchin tti carta de recomendación que janha na rrogondana na, ixin cain chojni que dicon que jaha ra ocoentoxinhi ra vidá ra, chojni mé tti rrondaço que ixin ján jian tti janha na tenttaha na nganji ra, co mé tti rroço que jaha ra inchin ná carta de recomendación para ixin janha na. ³ Jaha ra tti inchin carté Cristo que janha na cjin na ixin janha na jointtacoanha ra palabré jehe co jai ditticaon ra jehe. Jaha ra ná carta que conchjianha conixin ndajni,

sino conixin Espiritu Santo de Dios que jichon. Jaha ra jeha ná carta que vetaxin nganito ná xo inchin tti Diez Mandamiento, sino que vetaxin ngain ansén chojni.

⁴ Janha na chonda na seguro de cain tti nichja na jihi, porque chonda na confianza ngain Dios por ixin Jesucristo. ⁵ Jaha ixin janho na chonda na joachaxin para sinttaha na ná cosa jian. Nahi, jeha jamé ixin cain tti nchao que janha na nttaha na ttixin de ngain Dios. ⁶ Jehe chjana na joachaxin para que janha na nichja na joajné Jesucristo, co joajna mé tti trato naroaxin. Co jehe trato naroaxin mé chjá na vida naroaxin ixin Espiritu Santo jí ngain ansean na. Tti saho trato que Dios chjé Moisés, mé vaganjoha vida naroaxin ixin trato mé jeho tjagoa na ixin anto jianha na co tequininxin na ndasenhe na.

⁷ Jehe ley de trato que Dios chjé Moisés jihi vetaxin nganito yó tabla de xo. Co are Moisés vayé ley mé, jói ná chíxo anto soji ngá con Moisés que chojni Israel are mé choha tsjehe na ngá con jehe ixin anto jitonguixian ngá con. Pero masqui jamé, jehe chíxo mé yayao ndavanga. Pero si anto chjoin jói ley mé, co jeho cjoago que jiquininxin ndasenhe ni, ⁸ mexinxin joajné Jesucristo que ttiaoa na na Espiritu Santo anto icha chjoin. ⁹ Si ley mé anto chjoin jói co jeho joicjago que janha na tequininxin na ndasenhe na, mexinxin joajna que ndacho ixin ixonhi jianha teca na anto icha chjoin joajna que ley mé. ¹⁰ Ixin tti ley are saho anto chjoin jói ley mé, pero jai merocoa ixonhi rentte ley mé ixin jai anto icha chjoin co icha rentte tti joajna que danjo vida naroaxin. ¹¹ Mexinxin si anto chjoin jói tti ley que conchjenha sé tiempo, seguro anto icha chjoin co rentte tti joajna que xonhi tiempo tsjexin.

¹² Janha na chonda na seguro que joajna jihi xonhi tiempo tsjexin, mexinxin janha na ndattjan na icha chojni conixin anto tsje confianza. ¹³ Janha na xonhi tiempo nttaha na inchin joinchehe Moisés ixin jehe vacjanotaon ngá con conixin ná manta para que chojni Israel rroguiconha na quexén ndajoexin chíxo mé ixin chíxo mé deporsín seha rroconchjenhe. ¹⁴ Pero jehe na vaquinxinha na quexén Dios rinao tsjenguijna na. Co hasta jai chojni Israel xa choha ttinxin na jihi ixin are jehe na tsjehe na ngain tti jitaxin ley que vayé Moisés xajeho inchin jicayacoen joarrixaoen na tti manta que cjoanotaon con Moisés. Co jehe manta mé tti tanhchandaha na para ttinxin na. Co xonhi chojni nchao sinttjan manta mé, jeho Jesucristo. ¹⁵ Hasta ngain tiempo jai, are jehe na tsjehe na libroe Moisés, xá ná manta cayacoen joarrixaoen na para ttinxinha na. ¹⁶ Pero are ná chojni ditticaon jehe, tti chonda cain joachaxin, are mé manta ndadačhehe manta de ngain joarrixaoen chojni mé. ¹⁷ Co Dios, jehe tti Espiritu Santo. Co si Espiritu Santo que rroanha Dios jí ngain ansean na, joarrixaoan na chonda libertad para tsinxin na de ixin Dios. ¹⁸ Mexinxin cain ján na ixin tešanotaonha con na conixin manta, ján na te na inchin ná espejo ixin icha chojni nchao sicon de ixin ján na ixin Dios anto jian. Co ján na sontte na icha co icha jian inchin Cristo ixin chonda na icha co icha joachaxin jehe. Cain jihi nchehe jehe tti Espiritu Santo de Dios.

4

¹ Mexinxin janha na xonhi tiempo soan na desanimado ixin Dios tti coiaconoana na, jehe chjana na xa jihi de rronichja na palabré jehe.

² Janha na ningacoan na cain cosa que nchehe ni jimao, co cain cosa de joasoaxin, janha na xonhi chojni nttayá na ni ttentoxinha na Palabré Dios. Sino que janha na ndachjan na jecho tti ndoa, co jamé icha chojni nchao rrochonxin na que janha na tjagoa na na jehe tti ndoa co cain tti nttaha na, nttaha na ngattoxon con Dios. ³ Pero si te chojni que ttinxinha tti jian joajna que janha na ndachjan na, jecho ixin chojni mé ndateditján almé na para cainxin tiempo. ⁴ Jehe na ditticaonha na ngain Cristo, mexinxin inchínji chonda joachaxin ngain na, co jehe tti jicayaoen joarrixaoen na. Mexinxin ttinxinha na tti anto jian joajné Jesucristo co jehe Jesús, mé tti jói ngataha nontte co jehe mero Dios. ⁵ Are janha na ndachjan na de ixin joajna jihi, jeha ndachjan na de ixin janho na, sino que janha na ndachjan na de ixin Jesucristo que jehe tti chonda cain joachaxin, co nttanoha ra ixin janha na jecho inchin ninchehe xa nganji ra ixin janha na rinaho na Jesucristo. ⁶ Are Dios joinchekhjian mundo jihi, jehe tti coetonha para vehe xohi que joinchengasán ngain tti naxin xehe que vehe are saho. Co jamé Dios tti joinchengasán ngain ansean na para que de ixin joadingasán mé Cristo nttanoa na ixin Dios anto jian.

Are chonda na confianza ngain Jesucristo, ján na chonda na vida naroaxin

⁷ Co tti jointtanoa na Cristo, mé anto rentte inchin ná tesoro ngain cuerpoa na, masqui cuerpoa na tehe sojiha inchin chi de barro. Jamé para que rroxoago que joachaxin que jí ngain cuerpoa na, mé joachaxín Dios co jeha joachaxian na ján na. ⁸ Mexinxin masqui janha na chonda na anto tsje problema, pero xonhi tiempo sinttechinhi na ixin Dios ttjenguijna na. Co masqui chonda na joachjaon, pero xonhi tiempo rinaho na ttinttoa na de tti ditticanho na. ⁹ Co masqui chojni feo nchehe na nganji na, pero xonhi tiempo te na janho na ixin Dios jí nganji na. Co masqui chojni doen na, pero nadoenxonha na na. ¹⁰ Cain lugar tti janha na chji na, xaxanho na que puede icha chojni nasoenxon na na ixin janha na ndattjan na chojni tti jian joajné Jesucristo. Pero janha na rroxaonha na ixin jamé jehe na nchao sicon na que janha na chonda na vida naroaxin que danjo Jesucristo. ¹¹ Cada nchanho que janha na xa techon na, chonda na peligro de senhe na ixin ndattjan na chojni joajné Jesucristo. Pero mé tjago ixin Jesucristo jí nganji na janha na cada nchanho. ¹² Mexinxin janha na cainxin tiempo jí en peligro vidana na ixin nichja na joajné Jesucristo, pero jaha ra ovayehe ra vida naroaxin ixin janha na ndattjo ra joajna mé.

¹³ Ngain tti jitaxin Palabré Dios ndacho: “Janha vitticanho co mexinxin nichjaxin.” Jamé janha na cai, ditticanho na, mexinxin nichjaxin na jai, ¹⁴ ixin nona na que Dios joinchexechon Jesús are ndavenhe, co jehe Dios mé sinchexechon na janha na para sinttechon na conixin Jesús. Co janha na conixin cain jaha ra cai, satsjiho na ngain lugar tti ttjen jehe. ¹⁵ Cain cosa tanguí que tonna na jihi, mé jian para ixin jaha ra ixin are icha co icha chojni sayé tti jian de ngain Dios, jamé cai sintte icha tsje chojni que sanjo gracias ngain Dios para que jehe tsoyayehe.

¹⁶ Mexinxin janha na xonhi tiempo doan na desanimado. Masqui cuerpona na ndatettjexin, pero espirituna na icha tetosoji cada nchanho. ¹⁷ Ixin cain tti tanguí que tonhe ní ngain vida jihi, seha tonchjenhe, toin datto co jamé tonhe ní para que Dios rrochjé ní ná vida que xonhi tiempo tsjexin co vida mé anto icha jian que iná vida. ¹⁸ Janha na tsjianha na

cuidado de ngain cosa que nchao dicon ni; sino que janha na tsjinha na cuidado de ngain cosa que čho ha dicon ni ixin cain cosa que nchao dicon ni, mé toin ndattjexin, pero cain cosa que čho ha dicon ni, mé xonhi tiempo tsjexin.

5

¹ Ján na noa na que are ndasenhe na, cuerpoa na ndarroxante ixin cuerpoa na inchin ná nchia que tončhenha sé. Pero Dios rochjá na iná cuerpoa na que jehe jittenchjanha ngajni para ixin ján na, co cuerpo mé xonhi tiempo tsjexin. Co cuerpo mé inchin ná nchia que conchjianxinha de rá chojni. ² Ján ndoa jaxon que xa techon na ngain cuerpo tehe, techín na ixin orinao na rrochonda na tti cuerpo de ngajni, ³ ixin cuerpo mé sonttengá na inchin lonttoa na para que tsottolochoha na. ⁴ Jaxon que xa techon na ngain cuerpoa na tehe que inchin ná nchia ngataha nontte nttihi, ján na tonoa na feo co donttechín na. Pero jeha ixin ján na orinao na sachjexin na de ngain cuerpoa na tehe. Tti ján na rinao na na que orrochonda na tti cuerpo de ngajni para que isenja na. ⁵ Co Dios tti ndačo ixin jańa tsoan na. Co jehe chjá na Espiritu Santo jai para ná seguridá que jehe rrochjá na anto tsje icha cosa jian.

⁶ Mexinxin janha na cainxin tiempo chonda na confianza co xaonha na de ndasenhe na. Nona na que jaxon que xa techon na ngain cuerpona na tehe janha na xa teha na ngajni tti jí Jesucristo. ⁷ Pero masqui jamé, janha na sinttaha na sigue ngain xa que chjana na Dios ixin chonda na confianza ngain, co jeha ixin nchao dicon na jaxon tti rrochjana na Dios. ⁸ Pero xaonha na de ndasenhe na ixin icha rinaho na ndasenhe na para sachjexin na de ngain cuerpo que chonda na jai para nchao sasiguintte na ngain Jesucristo. ⁹ Mexinxin cain tiempo rinaho na nttaha na jeha tti nchexoxinhi Jesús, sea que te na ngain cuerpona na jai o masqui are sintte na ngajni. ¹⁰ Ixin cainxin na chonda na que tsonchienen na ngattoxon con Jesucristo para que cada na sayé na inchin jiquininxin si jointtoho na jian o si jointtoho na jianha cain tti ján na tenttoho na jai que xa techon na ngataha nontte nttihi.

Quexén sintte chojni de acuerdo

¹¹ Ixin janha na nona na que Jesucristo sinchejuzguehe cain chojni, mexinxin ttingaria na ndattjan na chojni que sittoexin na sitticaon na tti jehe coetonha. Pero Dios onohé quexén janha na tonona na ngain ansenna na, co janha rinaho que jaha ra tsonoha ra jamé cai de ixin janha na. ¹² Janha na tecjanha na tenichja na jian de ixin janho na, sino que janha na techjaha na jaha ra ná oportunidad de čhjoin tsonoha ra nganji na para que nchao rrochonxin ra quehe rrondache ra tti chojni que anto orgulloso de ixin tti nchehe na en lugar de tti jí ngain ansén. ¹³ Jí nttiha are chojni ndačo na ixin janha na ndadixenga na are ttinhi na nichja na de ixin Dios, pero Dios jamé rinao que janha na sinttaha na. Co are jehe na ndačo na que ixin janha na jian te joarrixaonna na, mé jian para ixin jaha ra. ¹⁴ Jesucristo jehe anto rinao na cainxin na, mexinxin janha na chonda na que ndattjan na chojni de ixin jehe. Co janha na chonda na seguro de que Jesucristo ndavenhe para que cjoenga hna tti jianha que joinchehe cainxin chojni, co mexinxin cainxin tti jianha que gontteca na, jai itecaha na. ¹⁵ Cristo ndavenhe para cjoenga hna tti jianha que joinchehe cainxin chojni para que jai chojni que xa techon isincheha

na inchin rinao na jeho na, sino que sinchehe na inchin rinao Cristo ixin jehe ndavenhe co xechon para jittjenguijna cain jehe na. ¹⁶ Tti chojni que ditticaonha Jesucristo xaxaon na ixin icha chojni čhjoin vidé chonda si jehe importante o si jehe chonda tsje tomi. Janha na ixaxaonha na jamé. Ndoa vehe ná tiempo que janha na cai vařaxanho na de ixin Cristo inchin xaxaon chojni nntihi ngataha nontte, pero jai janha na ixaxaonha na jamé de ixin jehe. ¹⁷ Jamé are ná chojni ditticaon Jesucristo, chojni mé oná chojni naroaxin ixin cain cosa jianha que jehe vanchehe incheha; jai cain cosa que jehe nchehe onaroaxin cainxin.

¹⁸ Cain jihi nchehe Dios. De ixin Jesucristo Dios joinchehe para que ján na sontte na chojni jian ngattoxon con jehe, co cai coetonna na que rroundattjan na icha chojni de ixin Cristo para que jehe na cai sintte na chojni jian ngattoxon con Dios. ¹⁹ Rročho que de ixin Jesucristo Dios joanjo oportunidad ngain chojni ngoixin mundo de que sintte na chojni jian ngattoxon con jehe. Dios ndajoinchetjañehe cain tti jianha que jehe na joinchehe na. Co jihi tti joajna que jehe coetonna na para rroundattjan na icha chojni. ²⁰ Mexinxin janha na tti joiquinha na joajné Jesucristo nganji ra. Dios jinchegonda na janha na para que de janha na jehe jinichja nganji ra. Mexinxin de ixin nombré Jesucristo, janha na nntatsanha ñao ra que ditticaon ra jehe para que jaha ra sintte ra chojni jian ngattoxon con Dios. ²¹ Jesucristo ni ná cosa jianha joincheha; pero por ixin ján na Dios rroanha jehe ngataha nontte para joiguenxin nntihi vetan tangui inchin chojni que nchehe tsje cosa jianha, para que ján na are odotticaon na Cristo, Dios ndačho ixin ján na jian na inchin jehe jianxin.

6

¹ Mexinxin ixin janha na compañeroa ra de ngain xé Dios, nntatsanha ñao ra que nchegonda ra cain tti jian que Dios danjo nganji ra. ² Ixin jehe dindačho ngain tti libro que jitaxin Palabré jehe:

Ngain ná tiempo que jian para ixin jaha ra, janha coian tti jaha ra tedanchia ra;

janha tsjenguijna jaha ra ngain tti tiempo que janha sanjo iná vida naroaxin ngain chojni que ditticaon na.

Co jai jehe mero tti tiempo jian para ixin jaha ra co jai jehe mero tti tiempo que Dios danjo vida naroaxin.

³ Janha na rinaoha na sinttaha na ni ná cosa que chojni ndačho ixin jianha, para que xonhi chojni rronichja jianha de ixin xa que janha na tenttaha na. ⁴ Sino que janha na rinaho na sinttaha na joxon jian para que cain chojni sicon na que janha na ndoa ninchehe xé Dios ixin janha na anto chonda na paciencia are anto detan na tangui co are chondaha na tti dondana na co are icha chojni feo nchehe na nganji na, ⁵ ixin goen na na co coiaxinna na na. Co cai chonda na paciencia are chojni ningaonna na co vacoyaotte na na. Co janha na anto soji jointtaha na xa co vehe ttie que ni vaguinttečhinha na co vehe tiempo que vaguenhe na jintta. ⁶ Cain mé ttixinna na para que chojni dicon na que janha na ndoa ninchehe xa na de Dios. Mexinxin janha na jian chojni na ngain vidana na, chonxin na tti ndoa, chonda na paciencia, nntaha na jian ngain chojni, co Espiritu Santo jí nganji na, co janha na ján ndoa rinaho na cain chojni, ⁷ ndačhjan na tti joajna ndoa que joixin

de ngain Dios co joachaxín Dios jí nganji na. Co janha na nttagonda na cosa jian que chjana na Dios, mé inchin ná morona para ttetoquianxin na tti jianha, co cosa jian mé cai inchin ná escudo que janha na chjinha na para cayacoanxin na tti jianha. ⁸ Jí rato que chojni nchesayana na co jí rato que chojni feo nichja na nganji na. Jí rato que chojni nichja jian de ixin janha na, co jí rato que jehe na nichja na jianha de ixin janha na. Jí nchanho chojni ndačo na que ixin janha na jeha chojni que nichja tti ndoa, co jí nchanho ndačo na que ixin janha na tti chojni que nichja na tti ndoa. ⁹ Jí nchanho nchehe na nganji na inchin chojni que jehe na chonxinha na, co jí nchanho nchehe na nganji na inchin chojni que jehe na anto jian chonxin na. Co jí nchanho que janha na anto tangui tonna na que hasta merocoa nasenxon na, pero masqui jamé janha na xa techon na. Janha na tangui conna na ngain chojni pero nadoenxinhao na na. ¹⁰ Masqui jí rato que janha na dinttechinhi na, pero cainxin nchanho janha na chahna na ngain xé Jesucristo. Co masqui janha na xonhi tomi chonda na, pero tti joajna que janha na ndattjan na icha chojni, mé tti icha rentte para ngain almé na. Co masqui xonhi cosa anto rentte chonda na ntthi ngataha nontte, pero janha na chonda na tti icha rentte que joixin de ngain Dios.

¹¹ Jaha ra de ngain ciudad de Corinto, ndattjo ra cainxin tti janha na tonona na, ixin janha na anto rinaho na cainxin jaha ra. ¹² Janha na ixonhi cosa jichjian ngain ansenna na que rrondattjo ra; jaha ra tti xa techonda ra tsje tti rrondachjenji ni ra. ¹³ Janha rrinttatsanha ñao ra inchin ná ndodaha que nchetsenhe ndo ñao xenhe ndo, rinao ni ra conixin ansean ra inchin janha rinaho jaha ra.

Ján na tti ningoe Dios que jichon

¹⁴ Chondaha ra confianza ngain chojni que ditticaonha Jesucristo, ni nchechjianha ra nchichiha ra o xixiha ra chojni mé ixin si jaha ra tsato ra chojni mé, jaha ra tsonha ra inchin ná yunta que dinttjianha ningue nataonxin. Ixin cosa jian choha sehe ngain cosa jianha. Co joadingasán choha sehe compañeroe tti naxin xehe. ¹⁵ Ixin Satanás choha sinchehe inchin rinao Cristo, ni Cristo choha sinchehe inchin rinao Satanás. Co cai ná chojni que ditticaon Cristo choha sinchehe inchin rinao ná chojni que ditticaonha Cristo. ¹⁶ Cai, ningoe Dios conixin ídolo teha de acuerdo. Co jaha ra mero tti ningoe Dios que jichon, inchin ndačo Dios: Janha sarihi ngaxinhi ansén na co tti sacji na, ntthiha sacjinha na; janha tti sarihi Dios de jehe na, co jehe na nisoan chojnina.

¹⁷ Mexinxin cai ndačo Dios: Dačhjeixin ra de ngayehe jehe na, co dačhjenda ra; dintteha ra compañeroe jehe chojni jianha.

Para que janha nchao sayaha jaha ra

¹⁸ co janha sarihi ná Ndodaha para ixin jaha ra, co jaha ra soan ra xanhna, jañá cho Dios que chonda cainxin joachaxin.

7

¹ Jañá hermanos, cain yá tti ndačo Dios sinchehe nganji na. Mexinxin ján na cain tiempo tsjiho na cuidado de sonttoha na cosa que nchejianha cuerpoe ni co tti nchejianha espiritue ni. Co ixin ján na xaon na ngain

Dios, mexinxin ján na sonttoho na joxon jian para que sontte na chojni jian para ixin jehe.

QueXén coentoxinhi chojni Corinto vidé na

² Nttatsanha na ñao ra, rinao ni ra de ngain ansean ra ixin janha na xonhi cosa jianha jointtaha na nganji ra ni ná ra, ni jointtagaXhoeha na ni ná jaha ra, co ni jointtayaha ra ni ná ra. ³ Janha rrindachjan cain jihi pero jeha para rrintasattaha ra ixin janha ondattjo ra que janha anto rinao cain jaha ra de ngain ansenna para que masqui ndasenne na o Xa sonttechon na pero sontte na inchin naoa chojni ngattoxon con Dios. ⁴ Janha anto chonda confianza nganji ra, co anto chahna nganji ra. Masqui tsje cosa tangui tonna na pero are janha Xaxanho jaha ra, janha anto chahna co Xaonha na ngain tti tangui que tonna na.

⁵ Desde que joaso na ngain regioen Macedonia, janha na vintteha na contento ixin anto tsje cosa tangui conna na co tsje chojni coetoquinha na, co anto coá na joachjaon de ixin queXén sinttaha na sigue Xa que janha na chonda na. ⁶ Pero Dios tti ncheanimá cain chojni que techín, jehe mé tti joincheanimá janha na are joiiji Tito nganji na. ⁷ Co jeoha ixin Tito joiiji nganji na, cai ixin jaha ra anto dincheanimá ra jehe. Co jehe ndachjenji na que jaha ra anto rinao ra sicon ni ra janha na, co coequinna na ixin jaha ra anto techinhi ra de ixin tti jaha ra vitticaonha ni ra janha na, co cai ixin jaha ra anto rinao ra tsjenguijna ni ra janha. Are janha coian cain jihi, janha anto icha chahna.

⁸ Masqui vinttechinhi ra are tsjehe ra tti cartana que janha orroanha ra, janha taha joachjaon de ixin tti janha cjin na ngain carta mé. Ndoa, janha coá joachjaon are saho de ixin tti ndattjo ra ngain carta mé, ⁹ pero jai janha chahna. Pero jeha chahna ixin jaha ra vinttechinhi ra, sino que de ixin tti jaha ra vinttechinhi ra, mé tti coentoxinhi vidá ra. Jaha ra coixinha ra ngain joachjaon mé inchin joinao Dios, mexinxin tti janha na cjin na nganji ra jehe jian co nahi jianha. ¹⁰ Ixin are Dios nchehe ná cosa para que ján na donttechín na, jehe jamé nchehe nganji na para que ján na ttentoxinhi na vidá na, co mé rrocho tsjenguijna na para que ján na rrochonda na iná vida naroaxin, mexinxin ján na chondaha na que tsá na joachjaon are donttechín na. Pero tti dinttechinxin tti chojni que ditticaonha Cristo, mé tti sadicao na ngain infierno. ¹¹ Jaha ra coixinha ra are vinttechinhi ra co mé joinchehe ra inchin Dios rinao, co jai cain mé jian para ixin jaha ra. Jehe mé tti jointtaXaxaon ra jian de ixin quehe ndattjo ra ngain cartana, co jehe mé tti jointtaXaxaon ra que jaha ra ján vaguittoaxin ra para vehe chojni jianha ngayaha ra. Co jehe mé tti jointtaXaxaon ra para coñao ra ngain tti joinchehe jianha ngayaha ra, co cai para Xaon ra que ixin Dios rrojinttacastigá ra. Cottimeja anto joinao ra sicon ni ra janha. Co jehe tti vinttechinhi ra, mé tti jointtaXaxaon ra para joinchecastigá ra tti chojni que joinchehe jianha mé. Co ngain cain jihi jaha ra cjoago ra que jaha ra Xonhi culpa chonda ra de ngain cosa jianha mé. ¹² Mexinxin are janha cjinha ra saho carta, jeha ixin janha anto Xaxanho de ixin tti chojni que joinchehe jianha ni de ngain tti chojni que conhe jianha mé. Janha Xaxanho cjin na carta mé para que jaha ra conoha ra ngattoxon con Dios que jaha ra ndoa anto rinao ra tsjenguijna ni ra janha na. ¹³ Mexinxin janha na anto Xjoin conhe ansenna na.

Co icha chahna na are janha na vicon na que Tito jehe anto jiché ixin jaha ra dicjenguijna ra para que jehe conohe Xjoin ngain ansén. ¹⁴ Janha

vittona jian de ixin tti ndattjan Tito icha saho que jehe joiji nganji ra. Janha ndattjan jehe ixin janha anto chahna de ixin jaha ra. Co inchin cain tti janha na ndattjo ra cjoï ndoa, jamé cjoï ndoa cain tti ndattjan na Tito, que ixin janha na anto chahna na de ixin jaha ra. ¹⁵ Co Tito jehe icha rinao jaha ra are jehe xaxaon que cain jaha ra joinchehe ra tti jehe coetonha ra, co ixin jaha ra vayehe ra jehe conixin respeto. ¹⁶ Co janha chahna ixin chonda cain confianza nganji ra.

8

Pablo rinao que chojni Corinto tsjenguijna na chojni noa que ditticaon Jesucristo

¹ Hermanos, jai rrondattjo ra que Dios joinchenciaon cain chojni que ditticaon Jesucristo de ngain cain nihngo que te ngain regioen Macedonia. ² Masqui anto tsje cosa tangui conhe na para que Dios vicon aco ndoa ditticaon na Jesucristo, jehe na ché na. Co masqui jehe na anto noa na, pero jehe na vintteganjo na tsje tomi inchin chojni rico. ³ Janha ná testigo na de ixin mé, ixin vicon na ndoa joanjo na tsje tomi co hasta icha que tti nchao rroganjo na. ⁴ Jehe na anto joinchetsena na na ñaho na ixin rroganjo na joachaxin para que jehe na xa rrocjenguijna na chojni noa que ditticaon Jesucristo. ⁵ Jehe na joinchehe na icha que tti janha na joiixaxanho na ixin saho jehe na mismo xanjo na ngá rá Jesús para joinchehe na inchin rinao jehe. Cottimeja jehe na xanjo na para vitticaon na tti ndattjan na na. Jamé joinchehe na inchin rinao Dios. ⁶ Mexinxin janha na jointtatsán na ñao Tito que jehe jian sinchejexin tti xa que jehe coexinhi ngayaha ra de joatsetaonhe tti tomi que jaha ra joanjo ra, para ixin tti chojni noa que ditticaon Jesucristo. ⁷ Jaha ra nchehe ra jian cainxin cosa; jaha ra anto jian ditticaon ra Cristo, jaha ra anto nchao nchecoehne ra icha chojni Palabré Dios, anto jian ttinxin ra de ixin Dios, anto rinao ra Jesucristo, co anto rinao ni ra janha na. Mexinxin jaha ra cai nchao sinchehe ra xa jiji jian de tsjenguijna ra icha chojni noa conixin tomi.

⁸ Janha rrindattjo ra jiji, pero jeha rritettonha ra que sinchehe ra afuerza, jeha ixin rinaho que jaha ra rrochonxin ra quexén xaxaon chojni ngain Macedonia ixin jehe na rinao na tsjenguijna na icha chojni. Mexinxin janha rrindattjo jaha ra cai para siconxin ni aco ndoa rinao ra tsjenguijna ra icha chojni cai. ⁹ Jaha ra ochonxin ra tti jian que joinchehe Jesucristo, tti chonda cain joachaxin para ixin ján na. Jehe anto rico de ngain joachaxin que jehe chonda, pero ixin jehe anto rinao na ján na, mexinxin jehe joinchegondaha joachaxin mé, inchin jehe rrocji anto noa de joachaxin. Mexinxin vittoexin jehe ndavenxin nganito cruz para que ján na nchao rrochonda na cain tti jian que ttixin de ngain Dios.

¹⁰ Janha rinaho jian para ixin jaha ra, mexinxin janha rrondattjo ra tti janha xaxanho de ixin cosa jiji. Jaha ra tti saho grupo que coexinhi ra joatsetaonhe chó ra tomi ngain nano vatto. Jaha ra joinchehe ra jamé pero jeha ixin coetonha ra iná chojni, sino que ixin jaha ra ján joinao ra joinchehe ra jamé. ¹¹ Co jai janha rinaho que nchehe ra sigue jañá, inchin chjoin coexinhi ra, jamé hasta tsjexin para tsjenguijna ra chojni mé conixin tti jaha ra nchao sanjo ra. ¹² Ixin si ná chojni ndoa rinao sanjo, Dios ján sayé; Dios choha sanchia icha tsje de tti jehe ni chonda ni.

¹³ Rinaho que jaha ra tsjenguijna ra chojni noa, pero jeha sanjo ra cain tti jaha ra chonda ra. ¹⁴ Tti janha rinaho que cain ra rrochonda ra nataonxin. Jai jaha ra tsjenguijna ra jehe na ixin jehe na chondaha na co jaha ra chonda ra. Co después jehe na nchao tsjenguijna ra na jaha ra ixin puede jehe na orrochonda na co jaha ra irrochondaha ra. Co jañá cain ra rrochonda ra nataonxin. ¹⁵ Inchin jitaxin ngain Palabrè Dios: “Tti vechonda anto tsje, xonhi xehe; co tti tsjeha vechonda xonhi vitjañehe.”

Tito co nicompañeroe

¹⁶ Pero janha chjaha gracias ngain Dios ixin jehe joinche xaxaon Tito para tsjenguijna ra xajeho inchin janha xaxanho tsjenguijna ra. ¹⁷ Ixin jehe vittoexin tti janha coetoan que jehe siji sitsjaha ra, co jai jehe tti anto rinao para siji sitsjaha ra.

¹⁸ Jai siji Tito conixin iná nihermanoa na que janha na rrorroanha na. Nihermano mé anto jian ditticaon ngain Jesucristo, co chojni que ditticaon Jesucristo nichja na jian de ixin jehe ixin jehe jian nichja ngain na tti joajna que danjo iná vida naroaxin. ¹⁹ Co jeoha de ixin cayoi cosa mé, sino que chojni que ditticaon Jesucristo coinciehe na jehe para tsjinha na de compañero ngain viajena na para tsjinha na tti tomi que janha na joatsetaoan na para tsjenguijnaxin na chojni noa. Co jiji sinttaha na para tsosayehe Jesucristo co para que tsjago na que jaha ra anto rinao ra chojni. ²⁰ Jañá sinttaha na ixin rinaoha na que chojni rronichja na feo de ixin janha na de ixin tti tomi que janha na tedatsetaoan na jai. ²¹ Janha na tenttaha na jiji pero inchin jiquininxin, co jeoha de ngattoxon con Dios, sino que cai de ngattoxon con chojni.

²² Co ngain cayoxin jehe na janha na rrorroanha na iná nihermano. Co janha na vicon na tsje nttiha que ján ndoa jehe anto rinao Jesucristo, hasta jai jehe chonda anto tsje confianza nganji ra. ²³ Jaha ra xó ditticaon ra Jesucristo ngain Corinto, si chonja chojni sanchianguiha ra de quensen jehe Tito, jaha ra ndache ra na que mé xicompañerona janha, que janha co jehe tenttaha na xajeho xa para tettjenguijna na jaha ra. O si sanchianguiha ra na de ixin quensen tti yó compañeroe Tito, jaha ra ndache ra na que chojni que ditticaon Jesucristo nttihi rroanha na cayoi nihermano mé ixin cayoi jehe na nchesayehe na Jesucristo. ²⁴ Mexinxin, para que icha chojni que ditticaon Jesucristo rrochonxin na de ixin quehe chojni jaha ra, jaha ra rinao ra canio chojni mé. Jamé para que icha chojni que ditticaon Jesucristo tsonohe na que janha na chonda na razón para chonda na confianza nganji ra.

9

Tti tomi que joatsetaonhe na para tsjenguijnaxin na chojni noa

¹ Janha ichondaha que rrondattjo ra de ixin tti tomi que tedatsetaonhe chó ra para tsjenguijnaxin ra chojni noa que ditticaon Jesucristo, ² ixin janha ochonxin que jaha ra anto rinao ra sinchehe ra jamé. Janha chahna cainxin nttiha que janha ndachjan ngain cain chojni que te ngain regioen Macedonia de ixin jaha ra xó te ra ngain regioen Acaya. Ixin jaha ra anto rinao ra para tettjenguijna ra chojni noa desde ngain nano vatto. Co conohe chojni que ditticaon Jesucristo ngain regioen Macedonia ixin jaha ra jañá tettjenguijna ra chojni, mexinxin cai mero-coa cain jehe na goan na animado de tettjenguijna na chojni noa. ³ Pero

masqui jamé, janha rrrirroanha ra nihermano tehe para que siconhe ndoa tti janha ndachjan de ixin jaha ra de ngain asunto jihi. Rrocho que ndoa jaha ra ochonda ra tti tomi que joatsetaonhe chó ra inchin janha ndachjan, ⁴ ixin nchaoha si chonja chojni de Macedonia sasoquinha janha co jehe sicon ixin jaha ra xa digatsetaonhe chó ra tomi. Co jamé janha na anto tsosoahna na después de que janha na anto chonda na confianza nganji ra ixin jaha ra ochonda ra tomi mé. Co si jamé tsonhe, seguro que jaha ra icha tsosoaha ra que janha na. ⁵ Mexinxin janha xaxanho que icha jian janha saho rrorroanha ra nihermano tehe para que jehe na siji na sitsjaha ra na saho. Co jehe na tsjenguijna ra na para satsetaonhe ra tomi mé para que jaicoa sinchexette ra tti tomi que jaha ra ondacho ra are icha saho. Co jamé tti tomi que jaha ra sanjo ra osehe listo. Jamé jaha ra tsjago ra que anto rinao ra para sanjo ra tomi mé, co jeha ixin janha na tenttapurado ra ixin sanjo ra tomi mé.

⁶ Xaxaon jaha ra palabra tehe: Tti tsjeha ttenga, cai tsjeha cosecha tsín; co tti ttenga tsje, cai tsje cosecha datsín. ⁷ Cada ra danjo ra inchin tti oXaxaon ra de ngain ansean ra ixin xonhi xé si jaha ra sanjo ra co hasta tenttaniha ra. O ni jeha afuerza para sanjo ra, ixin tti chojni que danjo co ncheniha, Dios rinao chojni mé. ⁸ Dios nchao rrochjá ra cainxin tti jian que ttixin ngain jehe para que jamé cainxin tiempo rrochonda ra cain cosa que icha donda de ngain vidá ra, co rrochonda ra para que sinchexin ra cain cosa jian. ⁹ Ngain tti jitaxin Palabré ndacho janhi:

Dios joanjo anto tsje ngain chojni noa,
co tti jian que jehe joinchehe, mé sittohe para cainxin tiempo.

¹⁰ Dios danjo semilla para que dinga ngataon jngui, co Dios chjá na tti jontte na. Co jehe tsjenguijna ra para sinchehe ra jian co jehe sinchenciaon tti jian mé para que jaha ra nchao sinchehe ra icha tsje jian. ¹¹ Jamé jaha ra rrochonda ra tsje cosa para que jaha ra nchao sanjo ra tsje. Co chojni nttiha que ditticaon Jesucristo sanjo na gracias ngain Dios de ixin tti tomi tsjinha na janha na que jaha ra rrorroanha ra. ¹² Ixin are janha na rrochjaha na chojni que ditticaon Jesucristo tomi jihi, jeoha rrochjaha na na tti jehe na rrongondehe na, sino que cai sinttaha na para que jehe na anto sanjo na gracias ngain Dios. ¹³ Jehe na sinchesayehe na Dios ixin tti tomi que jaha ra tsjenguijnanxin ra na jihi rroXaxaonxin jehe na que jaha ra anto ditticaon ra tti jian joajné Jesucristo. Cai jehe na sinchesayehe na Dios de ixin tti tsje tomi que jaha ra sanjo ra para ixin jehe na co para ixin icha chojni que ditticaon Jesucristo. ¹⁴ Co jehe na sinchetsenhe na ñao Dios para ixin jaha ra, co jehe na icha sinao na jaha ra ixin Dios anto jian joinchehe ngain jehe na pero de ixin jaha ra.

¹⁵ Janha chjaha gracias ngain Dios ixin jehe rroanha Xenhe nttihi, co mé anto jian para ixin ján na que hasta ni choha rrondacho na queXén jehe mé anto jian!

10

Tti joachaxin que chonda Pablo de representanté Jesucristo

¹ Janha Pablo na, rrinttatsanha ñao jaha ra jian inchin Jesucristo rrojinttatsanha ñao ra. Canxion jaha ra ndacho ra que are janha rrihi nganji ra sojiha palabrana, pero ngain cartana que janha roanha ra canxion ra ndacho ra que ixin anto soji palabrana. ² Mexinxin are janha sasotsjaha ra, rrinttatsanha ñao ra que xonhi ra ndachjenji ni ra ixin

janha rrinttaha inchin tenchehe chojni que ditticaonha Jesucristo, ixin janha rrocjan na sinttasattaha ra soji çhonja ra ðo rrondaço ra jamé. ³Ján ndoa que janha na chojni na, pero janha na ixonhi tiempo nttaluchá na inchin ncheluchá tti chojni que ditticaonha Jesucristo. ⁴Ixin tti janha na tjayaxin na jeha inchin tti tjayaxin chojni nttihi ngataha nontte, ixin janha na nntagonda na joachaxín Dios para nttaxanttexin na cain joachaxín espíritu jianha que te ngain mundo jihi. ⁵Jamé nttaxantte na cain tti jianha que nichja chojni de ixin Dios, co cain icha cosa jianha que cayacoen chojni para sitticaon na Dios. Co danjo na ngain Cristo cain tti ðaxanho na para que Cristo tsetonha ngain cainxin tti janha na ðaxanho na. ⁶Co are ocainxin jaha ra de ngain Corinto ositticaon ra jian, cottimeja si te chojni ngayaha ra que ða rinaoha na sitticaon na, janha na seguro sinttacastigá na chojni mé conixin joachaxín Dios.

⁷Jaha ra jeha ðaxaon ra tti dicon ra de ngain chojni, co ðaxaonha ra de quehe jí ngain ansén chojni mé. Si çhonja ra ðaxaon ra que seguro ditticaon ra Jesucristo, chonda ra que ðaxaon ra que janha na cai seguro ditticanha na Jesucristo. ⁸Masqui janha nichja icha tsje de tti jiquinixin rronichja de ixin joachaxin que chonda na, pero janha chondaha que tsosoahna ixin Jesucristo çjana na joachaxin jihi para que janha na sinttasoji na jaha ra de ngain tti ditticaon ra co jeha para que janha na sinttaxantte na tti jaha ra ditticaon ra. ⁹Janha rinaoha que çhonja ra rroðaxaon ra que janha jeho rinaho sinttaðaon ra de ixin tti ndattjo ra ngain cartana. ¹⁰Ttoha de jaha ra ndaço ra que ixin janha atto soji palabrana ngain cartana, pero are janha dasotsjaha ra co nichja janha mismo nganji ra, jaha ra ndaço ra que janha inchin tti chojni que ðonhi nohe co ðonhi xé tti janha ndaçhjan. ¹¹Pero tti chojni que ndaço cain jihi chonda que rroðaxaon cai que inchin janha na nichja na ngain cartana na, jamé sinttaha na cai are janha na saso na para sasotsjaha ra.

¹²Janha na ðonhi tiempo nttaha na inchin nchehe tti chojni que nichja jian de ixin jeho. Chojni mé ðonhi xé tti nchehe na ngattoxon con Dios ixin en lugar de sinchehe na inchin rinao Dios, jehe na nchehe na inchin nchehe icha chojni, cottimeja jehe na ndaço na ixin jehe na jian na jeho ixin nchehe na inchin nchehe icha chojni. ¹³Janha na rinaoha na que chojni rrochondana na anto tsje respeto que ijiquininxinha na. Dios nohe quehe ða tenttaha na janha na, co jehe tti çjana na joachaxin para que janha na joaso na Corinto para joasondattjo ra jaha ra tti jian joajné Jesucristo. ¹⁴Janha na tti saho chojni que joasondattjo ra tti jian joajné Jesucristo. Mexinxin janha na jeha oje ða tenttaha na; janha na tenttaha na tti ða que vitonna na. ¹⁵Tti ða que iná chojni jinchehe ngayaha ra o ngayé icha chojni de ixin Jesucristo, janha na ndaçhjanha na que ða mé janha na jointtaha na. Janha na jeho rinaho na que jaha ra sitticaon ra icha co icha de ixin Jesucristo, co jamé janha na icha nchao sinttacoanha ra de ixin Jesucristo, pero cain tiempo janha na rronddattjo ra jeho inchin coetonna na Dios. ¹⁶Cottimeja janha na nchao satsji na ngain icha tsje parte que te icha cjin de Corinto para rronddattjan na chojni nttiha tti jian joajné Jesucristo. Pero janha na tsji na jeho ngain tti rajna que ða ðonhi chojni tenchehe ða de ixin Jesucristo, para que ðonhi chojni rrondaço que ixin ða que odinchehe iná chojni, mé sittonanxin na jian janha na.

¹⁷Jamé si çhonja chojni rinao tsonohe orgulloso, tonohé orgulloso pero de ngain Dios. ¹⁸Ixin tti chojni que nichja jian de ixin jeho mismo,

chojni mé dačhjeha jian ngattoxon con Dios, sino que tti chojni que Jesucristo nichja ixin ján jian.

11

Pablo nichja de ixin chojni que ndačo ixin jehe na representanté na Jesucristo, pero ndoaha

¹ Rinaho que jaha ra tsixinha ra are janha ndačhjan nchion cosa de ixin tti jian de janho mismo. Puede xonhi xé que janha ndačhjan jamé, pero ntatsanha ñao ra ttxinha ra rrondattjo ra tti janha tonona ngain ansenna. ² Ixin janha anto chjio na de ixin jaha ra, xajeho inchin Dios anto chjio de ixin jaha ra. Ixin janha ondačhjan que sanjo jaha ra ngain Jesucristo joxon jian ra co sinao ra jeho jehe, inchin ná xannčí que ttenchjinha cuerpoe para hasta ngain xixihi xan que secoo xan. ³ Pero janha xaon na que puede chonja chojni jianha tsí nganji ra para sinttayaha ra sinchehe ra ojé co ndarrotjañaha ra de ixin Jesucristo, inchin joinchehe Eva are conché joincheyehe va jehe conixin palabra chjoin are jehe ngain huerta de Edén. ⁴ Ixin jaha ra anto daca ditticaonxin ra tti chojni que diji dindattjo ra anto ojé de ixin Jesucristo co jeha inchin tti janha na ndattjo ra. Co de ngain ansean ra anto rinao ra dayehe ra ojé espíritu que Espíritu Santo que jaha ra ovayehe ra, co anto daca ditticaonxin ra ojé joajna que tti jian joajné Jesucristo que janha na ondattjo ra. ⁵ Pero janha xaxanho que tti chojni que tenttayaha ra chondaha icha tsje joachaxin que janha ngattoxon con Dios. ⁶ Masqui jaha ra xaxaon ra que tti forma que janha nichja anto xaja, pero janha nona jian ngain Palabré Dios. Co jiji cjoago janha na nganji ra de ngain tti janha na jointtaha na cain tiempo.

⁷ ¿Oni xaxaon ra que janha jointtaha jianha are joasondattjo ra tti jian joajné Jesucristo co xonhi cobro jointtaha ra? Janha jamé jointtaha para joarihi icha importanteha ngattoxon con jaha ra para que jaha ra ditticaon ra Jesucristo co jamé te ra icha importante ngattoxon con Dios. ⁸ Janha joanchiá icha chojni que ditticaon Jesucristo tomi co ján vittoexin na chjana na, co tomi mé gondana are janha joasondattjo ra de ixin Cristo. ⁹ Co are janha joarihi nganji ra co are ndavacjena tomi co vaguenhe na jinta, janha xonhi tiempo ndattjo ni ná jaha ra que rrochjana ra tomi o ni tti rrojine. Canxion chojni que ditticaon Jesucristo ngain nonttehe Macedonia joí na nganji na co nimé ni chjana na tomi para gondana. Co jamé janha cjoinha cuidado de xonhi molestia chjaha jaha ra. Co jamé xa sinttaha para que xonhi tiempo rrochjaha ra molestia. ¹⁰ Inchin jaxon janha chonda seguro que ndoa chonxin tti ndoa de ixin Jesucristo, jamé nona que xonhi chojni de ngoixin regioen Acaya santsjena tti chjoin que tonohé ansenna ixin xonhi tomia ra dayá janha. ¹¹ Janha ndačhjan jañá nganji ra, pero xaxaonha ra que ixin janha rinaoha ra; Dios nohe que janha anto rinaho jaha ra.

¹² Pero janha xa sinttaha sigue ngain tti rrinttaha para xonhi oportunidad rrochjaha tti chojni que tenttayaha ra, ixin chojni mé rinao na que jaha ra rrondačo ra ixin chonda na xajeho xa que janha na. ¹³ Ixin chojni mé ndoaha ixin jehe na representanté Jesucristo na. Jehe na nichja na ixin jehe na representanté Jesucristo na, pero para ncheguitticaon na tsje chojni tti jeha ndoa de ixin Jesucristo. ¹⁴ Co jiji jeha ná cosa que chojni soan na admirado ixin Satanás mismo cjamanga

inchin ná ángel de Dios que tti conixin joadingasán. ¹⁵ Co mexinxin tanguiha para que tti chojni que nchehe tti rinao Satanás cjan na chojni que nchehe jian. Pero cain chojni mé Dios sinchecastigá na de ixin cain cosa jianha que nchehe na.

Tti anto tangui que conhe Pablo ixin jehe ná representanté Jesucristo

¹⁶ Janha rrocjan na rrondattjo ra iná que xaxaonha ra que ixin janha ndadinttatján joarrixaonna, pero si jaha ra xaxaon ra jamé, tančhjanda ni ra que janha rronichja nganji ra masqui inchin tti chojni que ndadinchetján joarrixaonna para que janha cai tsonona nchion orgulloso inchin tonohé tti chojni que nichja ixin jehe ná representanté Jesucristo pero jeha ndoa. ¹⁷ Tti janha rrindačhjan jihi jeha Dios coetonna, sino que janha rrindačhjan inchin ná chojni que ndadinchetján joarrixaoen, jeho para que janha tsonona orgulloso. ¹⁸ Ixin jí anto tsje chojni que tonohé orgulloso jeho de ixin cain cosa que jí ngataha nontte, jamé janha cai tsonona orgulloso. ¹⁹ Jaha ra ndačo ra que ixin anto noha ra tsje cosa mexinxin jaha ra ttixinha ra ttinhi ra tti ndačo chojni que ndadinchetján joarrixaoen. ²⁰ Co jaha ra ttixinha ra ngain tti chojni que nttayaha ra masqui jehe na ndattjo ra na co nttantaha ra na que sinchehe ra inchin jehe na rinao na, masqui jehe na dantsjacoa ra na cosá ra, masqui jehe na rinaoha na jaha ra, co masqui jehe na xanguí na canxion rá na ngá con ra. ²¹ Masqui janha na cai nchao sinttaha na inchin chojni mé pero janha na xonhi tiempo jointtaha na ni sinttaha na.

Pero si cain chojni mé cosoeha na de nichja na jian de ixin jeho na, mexinxin cai janha tsooanaha de rronichja jian de ixin janho, masqui ndačo ra que janha nichja inchin tti ndadinchetján joarrixaoen. ²² Chojni mé ndačo na ixin jehe na hebreo na, pero janha cai hebreo na. Co jehe na ndačo na ixin nacioen na Israel, pero janha cai nttiha nacionna. Co jehe na ndačo na ixin Abraham tti ndogoelitoé jehe na xančhjen, pero janha cai mé tti ndogoelitona xančhjen. ²³ Co jehe na ndačo na ixin nchehe na xé Jesucristo, pero seguro que janha icha tsje xé Jesucristo rrinttaha que jehe na, masqui jaxon janha rrinichja inchin tti dinchetján joarrixaoen ixin janha rrinichja jian de ixin janho. Pero ján, ndoa que janha tti icha tsje xé Jesucristo rrinttaha que jehe na, co janha tti icha vicaon na que jehe na, co janha tti icha tsje nttiha viaxinna ngain cárcel, co tsje nttiha janha joarichonda peligro de narroguenxon na. ²⁴ Co chojni judío naho nttiha chjana na tti castigo de vicaon na janha conixin tti treinta y nueve cuarta. ²⁵ Co ní nttiha coaxin na na nttá, co ná nttiha coaxin na na xó. Co ní nttiha cononttengui barco jinda tti barco que janha cjoinha, co ná de tti ní nttiha mé vittona janha ngataonhe ndachaon ná ttie co ná nchanho. ²⁶ Janha anto jointtavaijá, co tsje peligro vetan janha de ngain tsje río, de ngain tti chehe, peligro de ngacjén chojni de ngain nacionna janha, de ngacjén chojni que jeha nacionna. Vetan peligro ngain ciudad, ngagaha jna, ngataon ndachaon, co vetan peligro ngacjén tti chojni que ndačo ixin jehe na ditticaon na Jesucristo co ndoaha. ²⁷ Janha soji xa jointtaha hasta anto cončhjen na, co tsje ttie janha joaričhinha, tsje nttiha janha vaguenhe na jinta co jinda, tsje nttiha janha cjaño vagarihi, co tsje nttiha janha tangui conna de ixin quin co de ixin lontto ixin ndajoexin vichje cain lonttona.

²⁸ Masqui cain cosa jiji conna, pero cada nchanho janha icha xaxanho de ixin chojni que ditticaon Jesucristo ngain cain región. ²⁹ Si chonja de jehe na anto tanguí tonohé na de ixin tti jian joajné Jesucristo, mé inchin rrocji janha mismo rroconona jamé, ixin janha ttiaconoá na jehe na. Co si ná chojni ncheyehe chonja de jehe na para que jehe na isitticaonha na Jesucristo, janha anto feo tonohé ansenna co toñaho ngain chojni mé. ³⁰ Si nchao tsonohé ni orgulloso, janha tsonona orgulloso de cain cosa tanguí que tonna ixin de nttiha xago que janha chondaha joachaxin. Co jamé tti rinao Dios para que jehe nchao nchegonda na janha. ³¹ Dios, Ndodé Jesucristo tti jiquininxin sonttocoanxinhi na cainxin tiempo, mé tti nohe icha jian que janha ján nichja tti ndoa. ³² Are joarihi janha ngain ciudad de Damasco, xigobernador que vehe ngain tti nontte que vaquetonha rey Aretas, xigobernador mé coetonha xa que vinttenda xisoldado cain puerta de ciudad mé, ixin ngoixin ngandajin ciudad mé jindehe ttjarioho atto noi, mexinxin xisoldado vintte xa cada puerta mé para rrotse na xa janha co rroquixinna xa. ³³ Pero canxion chojni amigona que diuqenca nchiandoha ngain ttjarioho mé de ngain ventané nchia mé joinchexincajinxin na na janha conixin jino ngá ná nnttaxa para toenxin ttjarioho mé, co jamé janha nchao sacingá xigobernador mé.

12

Tti vicononxinhi Pablo co tti jehe coxinxin

¹ xonhi dacha ni de nichja ni jian de ixin jehó ni mismo. Pero masqui jamé, janha chonda que rrondachjan tti coxinnanxin co tti vicononxinna que Jesucristo cjoagohna. ² Janha chonxin ná xí que ditticaon Jesucristo, que ochonda catorce nano que Dios savicao xí mé hasta tti ngain ninxin ngajni. Pero janha nonaha si xí mé sacjoi xa conixin cuerpoe xa o ani nahi; jehó Dios tti nohe. ³ Pero ján, nona que ixin xí mé sacjoi xa, jehó nonaha si sacjoi xa conixin cuerpoe xa, o ani nahi, jehó Dios tti nohe mé. ⁴ Dios sajoicao xí mé hasta tti ngain lugar de ngajni mé, co nttiha coinhi xa tsje palabra que xonhi chojni chonxin ni xonhi chojni chonda joachaxin para rronichja na palabra mé. ⁵ Janha nchao rroconona orgulloso de ixin tti joinchehe Dios ngain xí mé ixin xí mé janha mero, pero janha tononaha orgulloso de ixin janho mismo, sino que ixin janho mismo chondaha joachaxin. ⁶ Masqui, si janha rronichja jian de ixin janho mismo, cai mé jian ixin tti janha rronichja joxon cosa que ndoa, pero janha xonhi tiempo sinttaha jamé, para que xonhi chojni rronichja jian de ixin janha icha de tti janha ni ijiquininxinha na.

⁷ Cain tti janha coxinnanxin, mé anto chjoin. Co para que janha tsononaha anto orgulloso de ixin mé, janha vayá ná cosa que inchin ná nchaha joidoho cuerpona. Co mé joixin de ngain Satanás, para nchemolestá na janha co para que janha xonhi tiempo tsonona orgulloso de ixin tti janha coxinnanxin. ⁸ Ní nttiha janha joanchiá Jesucristo que jehe rroquintjianxin de ngain cuerpona tti anto jittín. ⁹ Pero jehe ndachjenji na: “Jaha ixonhi icha dondaha, jehó tti janha anto rinaho jaha, ixin joachaxin que janha chonda xago icha jian ngain tti chojni que sojiha de ngain cuerpoe.” Mexinxin janha chahna que ixin sojiha cuerpona, para que joachaxin Jesucristo rroxago nganji janha. ¹⁰ Mexinxin janha chahna ixin sojiha na, co ixin chojni nichja na feo nganji janha, co de ixin are xonhi tomi chonda co denhe na jintta, co de tanguí que tonna

ixin janha ditticanho Jesucristo. De cainxin yá janha chahna ixin si janha tonona icha tsangaha na, pero are mé janha icha soji na de ixin joachaxín Jesucristo que jehe chjana.

Pablo anto coá joachjaon por ixin chojni Corinto

¹¹ Janha jointtaha inchin ná chojni que ndadinchetján joarrixaoen ixin nichja jian de ixin janho mismo, pero janha chonda que jamé jointtaha ixin jaha ra ttjioha ra respeto nganji. Jaha ra tti jiquininxin rronichja ra jian de ixin janha. Si janha xonhi rentte na nganji ra, icha xonhi rentte tti chojni que ndačo na que jehe na representanté Jesucristo na pero jeho nttayaha ra na. Janha ndattjo ra cain jiji masqui xonhi rentte na. ¹² Ngain tti xa que janha jointtaha conixin anto paciencia ngayaha ra, nttiha vicon ra tsje señal co tsje milagro que janha jointtaha, co cain mé rročo que janha ndoa ná representanté Jesucristo na. ¹³ Are janha joarihi ngayaha ra, cain tiempo jointtaha nganji ra xajeho inchin nttaha ngain icha chojni que ditticaon Jesucristo. Jeho nacoa cosa oje jointtaha nganji ra; janha xonhi tiempo joanchiaha ra tomia ra. ¡Si jiji ná cosa nchaoha para ixin jaha ra, nttatsanha ñao ra nchetjañana ra!

¹⁴ Co jai janha orrihi listo para sasotsjaha ra ninxin nttiha pero xonhi molestia sasochjaha ra de ixin tomi, ixin janha jeha tomi rinaho; janha rinaho jaha ra mismo. Inchin ná ndodaha, jehe ndo tti jiquininxin ttjé ndo tomi para ixin xenhe ndo, co jeha chjan tti tsjé tomi para ixin jehe ndo. ¹⁵ Co janha anto rinaho sinttaxian cain tomi que janha chonda co hasta janha mismo ndajittjexin na para que almá ra sintte jian. Jamé ixin janha cada nchanho icha co icha rinaho ra, masqui puede jaha ra cada nchanho icha rinaoha ni ra janha.

¹⁶ Co nona que canxion ra masqui xaxaon ra que janha xonhi tiempo ndattjo ra ixin rrocjenguijna ni ra conixin tomi, pero ndačo ra que ixin janha jimao jointtayaha ra. ¹⁷ ¿Ani xaxaon ra que janha jointtayaha ra de ngain ttoha de tti chojni que janha rroanha nganji ra? ¹⁸ Janha jointtatsán ñao Tito para que jehe joiiji joitsjaha ra, co janha rroanha iná xí que ditticaon Jesucristo para joiijicaho jehe. ¿Ani Tito jointtayaha ra para joantsjaha ra tomia ra? ¿Añoaha ra que janha co jehe Tito nttaha na xajeho jian co cayoi na chonda na xajeho Espíritu Santo?

¹⁹ Puede jaha ra xaxaon ra que cain tti janha na tendattjo ra, mé para que rroxaxaon ra jian de ixin janha na. Pero jeha jamé ixin janha na tenichja na ngattoxon con Dios conixin joachaxín nombré Jesucristo. Co mé para tsjenguijnanxin ra de ngain espiritua ra para sinttasoji ra ngain tti ditticaon ra de ixin Jesucristo ixin janha na anto rinaho na jaha ra. ²⁰ Ixin janha xaon na que are janha sasotsjaha ra puede itencheha ra inchin janha rinaho, co jaha ra isinttaxoxianha ra tti janha rrondattjo ra. Janha xaon na que sehe pleito ngayaha ra, joachjoehe, puro tetoñaöhe chó ra, jaho ra tsonoha ra que icha importante ra que icha chojni, sinttaxoxinha ra tsequin ra cuentoe iná chojni que jiquininxinha, sinttaxoxianha ra xé iná chojni que jehe jinchehe, tsonoha ra jian de ixin jaho ra mismo, co xonhi respeto sehe ngayaha ra. ²¹ Janha xaon na que are janha sasotsjaha ra Dios sincheconohe ngain ansenna ná joasoaxin de ixin jaha ra, co hasta rrochonda que rrotsjanga janha de ixin cain jaha ra xo xa diquentoxinha ra vidá ra de tti jianha que tenchehe ra desde are saho, co de tti techonda ra oje nchí que jeha nchichiha ra o xo nchí ra

techonda ra ojé xí que jeha xixiha ra, co icha vicio que jaha ra dicangui ra.

13

Tti coetonha Pablo co tti joexinxin joajné

¹ Jihí tti ninxin nttiha que janha sasotsjaha ra. Co are mé sayehe ra castigo cain ra xo tenchehe ra cosa jianha, pero saho sintte yó o ní testigo tti rrondačo que ndoa jehe nimé vicon na que jaha ra tenchehe ra jianha. ² Ngain tti yoxin nttiha que janha joasotsjaha ra, are mé ndattjo ra que cain ra xo joinchehe ra cosa jianha que isincheha ra. Co jai que cjin rrihi de jaha ra, janha rrittetonha ra cain ra xajeho iná. Co jai que sasotsjaha ra iná, si chonja ra xa tenchehe ra jianha, janha itsiaconoaha ra. ³ Cottimeja sicon ra que ixin Cristo seguro nchegonda na janha para que jehe nichja nganji ra. Co jeha ixin Jesucristo xonhi joachaxin chonda para nganji ra, sino que jehe tjago nganji ra tti anto tsje joachaxin que jehe chonda. ⁴ Ján ndoa que jehe goan crucificado nganito cruz co ndavenhe inchin si jehe rrochondaha joachaxin, pero jai jehe jichon de ixin joachaxín Dios Ndodé jehe. Jamé janha na jai cai chondaha na joachaxin ngain cuerpona na, pero masqui jamé janha na te na inchin nacoa chojni conixin jehe co techon na de ixin joachaxín Dios para nchao tsjengujna ra jaha ra.

⁵ Jaho ra mismo xaxaon ra jian tti joinchehe ra, para sicon ra aco ndoa jian ditticaon ra Jesucristo, co mé ná prueba para ixin jaha ra. Ixin ¿anoaha ra que Jesucristo jí ngain ansean ra si jaha ra ndoa ditticaon ra jehe mero? ⁶ Pero janha rinaho que jaha ra tsonoha ra que janha na ján ndoa ditticanho na jehe mero. ⁷ Co janha na nttatsán na ñao Dios para que jaha ra xonhi cosa jianha sinchehe ra ngain vidá ra, pero jeha para que icha chojni rrondačo na ixin janha na anto jian jointtacoanha ra, sino para que jaha ra sintte ra jian ngain vidá ra. Co jeha importante que chojni rronichja si janha na tenttaha na inchin rinao Cristo o ani nahi. ⁸ Ixin janha na choha rronichja na tti ndoaha, sino chonda na que rronichja na joxon tti ndoa. ⁹ Mexinxin janha na sintte na contento masqui xonhi joachaxin chonda na ixin janha na rinaho na que jaha ra tsosoji ra de ixin joachaxín Dios, co sinttaha na sigue de sinttacoanxian na Dios para que jaha ra sintte ra chojni jian. ¹⁰ Janha rricjinha ra carta jihí icha saho que janha sasotsjaha ra, para que jaha ra noha ra cain quehe sinchehe ra para que are janha saso, irrochondaha que sinttasattaha ra ni sinttacastigá ra conixin joachaxin que janha chonda. Co tti joachaxin mé chjana Jesucristo para tsjengujnaxin ra para que icha jian sitticaon ra Jesucristo co jeha para que janha sinttaxante tti jaha ra ditticaon ra.

¹¹ Co jai hermanos, rinaho que jaha ra sintte ra contento. Ttjé ra quexén nchehe ra para sintte ra chojni jian ngain vidá ra, co ditticaon ra tti consuelo que janha chjaha ra, co ditticaon chó ra cain ra co ttetocoha chó ra. Co Dios, tti danjo tti chjoin que tonohé ansén ni, co jehe tti anto rinao ni, mé tti senda ra. ¹² Chjehe chó ra joajna jian naná ra. ¹³ Cain chojni que ditticaon Jesucristo nttihi, rroanha na joajna para ixin jaha ra.

¹⁴ Dayehe ra tti jían que ttixin de ngain Jesucristo, tti chonda cain joachaxin nganji na. Co noha ra ixin Dios anto rinao ra co Espíritu Santo jí nganji ra. Amén.

Carta Que Dicjin Pablo Para Ixin Chojni Que Ditticaon Jesucristo Ngain Regioen Galacia

Pablo chjé joajna chojni ngain regioen Galacia

¹ Janha Pablo na, janha ná representanté Jesucristo. Janha jeha chojni de nttihi ngataha nontte rroanha na, ni jeha chojni joincheguinhí na representante, sino que Jesucristo mismo rroanha na janha co jehe tti joincheguinhí na jañá, conixin Dios Ndodá na, tti joinchexechon Jesucristo are jehe ndavenhe. ² Janha rricjin na carta jihi conixin icha chojni que ditticaon Jesucristo, tti nite nttihi nganji na janha. Co carta jihi para nganji jaha ra xó ditticaon ra Jesucristo que te ra ngain regioen Galacia. ³ Dios Ndodá na, co Jesucristo, tti chonda cain joachaxin, sinttanchaon ra co rrochjá ra tti çhjoin que tonohe ansean ra. ⁴ Jehe Jesucristo xanjo para ndavenhe para cjoenga hna cain tti jianha que ján na jointtoho na co jañá jehe vinttjianxin na de ngain cain cosa jianha que jí ngataha nontte jai, ixin jamé joinao Dios Ndodá na. ⁵ ¡Dios jehe tti jiquininxin tsosayehe para cainxin tiempo! Amén.

Ixonhi iná joajna que danjo iná vida naroa

⁶ Janha ttianxinha quedonda jaha ra anto daca ndatetjañaha ra Dios, tti nichjá na de ixin tti jian que joinchehe Cristo para ixin ján na ixin jehe Cristo anto rinao na, co jai jaha ra teditticaon ra oje joajna que toenao ra rrochjá ra iná vida naroa. ⁷ Jeha ixin jí iná joajna que sanjo iná vida naroa. Sino que tti jitonhe jihi que canxion chojni tenttayaha ra co rinao na que jaha ra sitticaon ra oje joajna que jeha joajné Jesucristo, tti danjo iná vida naroa. ⁸ Pero si çhonja chojni rrondattjo ra iná joajna oje de tti joajna que janha na ondattjo ra, chojni mé chonda que soan condenado, quexeho chojni que rrondattjo ra oje joajna mé, masqui janha o ná ángel que tsixin de ngajni. ⁹ Janha ondaçhjan co xa rrocjan na rrondaçhjan iná: Quexeho chojni que rrondattjo ra oje joajna de tti joajna que janha ondattjo ra, chojni mé soan condenado.

¹⁰ Janha ndaçhjan cain jihi, pero jeha ixin rinaho para que chojni rronichja jian de ixin janha, sino que rinaho que Dios xaxaon jian de ixin janha. Si janha rinaho sittona jian ngain chojni, janha isariha ná jian xinchehe xé Jesucristo.

Quexén joiguehe Pablo representanté Jesucristo

¹¹ Pero janha rinaho que jaha ra tsonoha ra que tti joajna que danjo iná vida naroa que janha rrindattjan chojni, mé joixinha de ngain tti xaxaon chojni nttihi ngataha nontte. ¹² Janha vayaha joajna jihi ni de ngain ná xí, ni xonhi chojni joinchecoanna joajna jihi, sino que Jesucristo mismo tti joinchenona joajna jihi.

¹³ Jaha ra onoha ra quehe vanttaha janha are saho, are janha varroá religioen chojni judío. Jaha ra onoha ra que janha conixin anto coraje vanttaha feo ngain cain chojni que ditticaon Jesucristo, co vajinaho que narrogoenxon cainxin na. ¹⁴ De ngain religioen chojni judío, janha tti icha vagoenxaon nttiha de tsje xicompañeroná que chonda xajejo nano inchin janha, ixin janha tti icha vaguitticanho cain costumbré

nindogoelitona xančhjen. ¹⁵ Pero Dios ocoinchiehe na janha icha saho que rroconcjina, co ixin jehe anto rinao na, mexinxin nichjahna. Co cai are jehe jañá joinao, ¹⁶ jehe joinchegatsoan na Xenhe para que janha joindattjan tti chojni que jeha judío tti jian joajné jehe. Are jiji joiconhe, janha cjoiha joiganchianguia ni ná chojni quexén sinttaha. ¹⁷ Ni cjoiha ngain ciudad de Jerusalén para joiganchianguia cain tti vintte representanté Jesucristo icha saho que janha. Sino que janha jaicoa sacjoi para ngain regioen Arabia, co después sacjan na para Damasco.

¹⁸ Co hasta vattoja ní nano janha cjoi ngain ciudad de Jerusalén. Nttiha joatsoanxin Pedro, co joarihi yó semana ngain jehe. ¹⁹ Pero viconha icha representanté Jesucristo, sino que jeha Jacobo, xanchó jehe Jesús. ²⁰ Janha nttaseguraha ra jiji ngattoxon con Dios, que tti rrindattjo ra jiji, ján ndoa.

²¹ Después de cain jiji janha sacjoi para ngain regioen Siria co regioen Cilicia. ²² Are mé cain chojni que ditticaon Jesucristo, tti nite ngain regioen Judea xa vechonxinha na na janha mismo. ²³ Jeha vaquinhi na vanichja chojni janhi: “Tti xí que feo vanchehe are saho ngain chojni Jesucristo, jai jehe xí mé tti rridendache chojni xajeho tti joajna que are saho joinao xa rrojinchexantte xa.” ²⁴ Co chojni mé joinchesayehe na Dios ixin jehe coentoxinhi vidana janha.

2

Are icha representanté Jesucristo vitticaon que Pablo cai ná representanté Jesucristo

¹ Vatto catorce nano, cottimeja janha cjoi Jerusalén iná conixin Bernabé co cjoinha na Tito cai. ² Janha cjoi nttiha iná ixin Dios ndachjenji na que janha chonda que tsji nttiha iná. Nttiha ngain Jerusalén are xatte cain ninchecoehne cain chojni que ditticaon Jesucristo, janha ndattjan na de ixin tti joajna que danjo iná vida naraa que janha rrinttanoa icha chojni que jeha judío. Janha jointtaha jiji ixin rinaoha que cain xé Jesucristo que ojointtaha co rrinttaha, xonhi tsorentte xa mé. ³ Nttiha vehe Tito nganji na janha, co masqui coaha xohe que dinhi circuncisión ixin jeha judío, ndacheha na que ixin jehe chonda que rroca xohe mé. ⁴ Já n ndoa que canxion chojni nttiha joinao na que Tito rroca xohe mé. Pero jehe chojni mé ndoaha ditticaon na Jesucristo, co jimao dijiyehna na na. Chojni mé joiiji na para joitsayana na na para vicon na co nichja na feo de ixin janha na ixin iditticaonha na costumbré chojni judío. Co jehe na joinao na que janha na rroguintte na esclavo de ngain costumbre mé iná. ⁵ Pero janha na ni ná rato jointtaha na caso ngain na, ixin janha na joinaho na que jaha ra joinchehe ra sigue vitticaon ra cainxin tti ndoa que jí ngain tti joajna que danjo iná vida naraa.

⁶ Pero cain tti ninchecoehne chojni que ditticaon Jesucristo nttiha, que chojni ndačo que ixin jehe na anto importante na, jehe na ndačoha na ixin nchaoha jí tti rrinttacoán chojni. Co janha ndosenaha si jehe na importante na o ani nahi, ixin Dios tsjeha tti nchehe chojni, sino que jehe tsjehe ngain ansén cada chojni. ⁷ En lugar de rrondachjenji na na ixin nchaoha jí tti rrinichja janha, jehe na vitticaon na que já n ndoa Dios tti chjana xa de rrindattjan chojni que jeha judío tti joajna que danjo iná vida naraa, jañá inchin Dios chjé Pedro xa de ndačo xajeho joajna jiji ngain cain chojni judío. ⁸ Ixin Dios que rroanha Pedro inchin

representanté para ngayé chojni judío, xajeho Dios mé rroanha na janha cai inchin representanté para ngayé chojni que jeha judío.

⁹ Mexinxin Jacobo, Pedro co Juan, canio nimé nivintte nttiha icha importante de vaquetonha na, joatsoan na que ján ndoa Dios chjana xa jiji. Mexinxin jeha na tsenda na rana na janha na Bernabé. Jiji joinchehe na para ná señal que janha na co jeha na compañero na, co nchao para que ixin janha na tsji na sindachjan na joajna jiji ngayé chojni que jeha judío inchin jeha na rrondacho na ngayé chojni judío. ¹⁰ Pero jeha na joinchetsena na na ñaho na que rroxaxanho na co tsjenguijna na chojni noa, co jiji tti janha na anto tsjá na nttaha na conixin tsje cuidado.

Are Pablo joinchesattehe Pedro ngain ciudad de Antioquía

¹¹ Pero are Pedro cjo ngain ciudad de Antioquía, janha jointtasattá ixin tti jeha joinchehe jianha jí. ¹² Ixin are saho jeha joincecho chojni que jeha judío, hasta que joijija canxion chojni que dirroanha Jacobo, cottimeja jeha ttingavačjendehe chojni que jeha judío co cointtohe de joincecho na, ixin jeha xaoon ngain nijoiiji ixin nimé ni ndačo que cain chojni Jesucristo chonda que sitticaon na ngain circuncisión co ngain icha costumbré chojni judío. ¹³ Cottimeja inchin Pedro joinchehe tti jianha, cai icha chojni judío que ditticaon Jesucristo joinchehe na xajeho inchin tti jianha que joinchehe Pedro, que hasta Bernabé joinchehe cai inchin joinchehe Pedro. ¹⁴ Pero are janha vicon que jeha na tencheha na inchin ttetonha tti ndoa que tjago tti joajna que danjo iná vida nara, janha ndattjan Pedro ngattoxon con cain chojni que ditticaon Jesucristo: “Jaha que ná chojni judío joinchehe inchin nchehe chojni que jeha judío, co incheha inchin jiquininxin nchehe chojni judío, ¿mexinxin que xén rinao jaha que chojni que jeha judío sinchehe na inchin chojni judío?”

Dios dayé cain chojni masqui jeha judío, jeha por ixin confianzé na ngain Jesucristo

¹⁵ Janha na chojni judío na desde are concjina na, co janha na jeha chojni que nchehe jianha inchin icha chojni. ¹⁶ Co ixinha mé, janha na nona na que xonhi chojni sehe jian ngain Dios jeha ixin nchehe na tti ttetonha ley que vayé Moisés, sino que chojni jian na ngain Dios si jeha na chonda na confianza ngain Jesucristo. Mexinxin cai janha na vitticanho na ngain Jesucristo para que janha na sintte na chojni jian ngain Dios de ixin confianza que janha na chonda na ngain jeha, co nahi ixin janha na jointtaha na tti ttetonha ley que vayé Moisés. Ixin xonhi chojni nchao sintte jian ngain Dios jeha ixin nchehe tti ttetonha ley mé.

¹⁷ Co jai si ján na rinao na sontte na chojni jian ngain Dios jeha por ixin Jesucristo; pero si jamé, rročo que ján na idotticaonha na ley que vayé Moisés. ¿Apoco jiji rročo que Cristo tti ndattjo na sonttoho na jianha? ¡Nahi, jeha jamé rročo! ¹⁸ Pero ján, janha jianha rrojinttaha si janha rrojinttaxante ná cosa cottimeja rrocjan na sinttachjian. Rročo que janha jianha sinttaha si janha tsinttoa de sinttaha tti ndačo ley, cottimeja rrocjan na sinttacoán chojni de ixin ley mé iná. ¹⁹ Ixin janha para ngain ley que vayé Moisés inchin ondavenhe na, ixin ley mismo ndačo ixin janha jiquininxin ndasenne na, co jai janha rrinttaha inchin Dios rinao. ²⁰ Rročo que janha inchin ondavenxin na nganito cruz conixin Jesucristo ixin janha isinttaha inchin joinaho icha saho. Mexinxin ijeha

janha tti rrichon jai, sino que Jesucristo tti jichon ngaxinhi cuerpona. Co jai tti vida que janha rrichonda ngain cuerpona, janha rrichonda vida jiji ixin janha ditticanho Xenhe Dios. Ixin jehe Xan anto joinao na Xan janha co xanjo Xan para ndavenhe Xan por ixin janha. ²¹ Mexinxin janha ditticanho ngain Cristo ixin rinaoha sinttaha desprecio tti danjo Dios. Ixin si ná ni nchao sintte ni chojni jian ngain Dios jeho ixin sitticaon ni nchehe ni tti ttetonha ley que vayé Moisés, si rrocji jamé, rrocho que xonhi xé ixin Cristo venhe para ixin ján na.

3

¿Quexehe cosa icha nchao: aley que vayé Moisés o confianza ngain Dios?

¹ ¡Atto cha ttinxin ra jaha ra chojni Gálatas! ¿Quensen joantonga ra para que jaha ra ditticaonha ra tti joajna ndoa? Janha na mismo jian cjoagoha ra de ixin Cristo. Co jaha ra ocoinxin ra jian quedonda ndavenxin Jesucristo nganito cruz. ² Jai ndachjenji ni ra jiji: ¿Avayehe ra jaha ra Espíritu Santo de Dios ixin joinchehe ra cain tti ttetonha ley que vayé Moisés, o ani ixin vitticaon ra tti coinhi ra de ixin Jesucristo? ³ ¿Quedonda jaha ra anto cha ttinxin ra? Are saho jaha ra anto tsje confianza chonda ra ngain Dios ixin Espíritu Santo cjoenguijna ra. ¿Apoco jai xaxaon ra ixin icha jian rroguitticaon ra si rrojinchehe ra tsje cosa inchin ttetonha ley? ⁴ Después de anto tangui conha ra de ixin tti jian joajné Jesucristo, ¿andasinchetján ra cain mé? Nahi, janha rinaho que sinchetjanha ra mé. ⁵ Ndachjenji ni ra: Are Dios rroanha Espíritu Santo nganji ra co are jehe nchehe tsje milagro ngayaha ra, ¿quedonda jehe nchehe jiji? Jehe nchehe jiji pero jeha ixin jaha ra nchehe ra cain tti ttetonha ley que vayé Moisés, sino que ixin jaha ra nchehe ra caso tti jian joajna que jaha ra coinhi ra.

⁶ Abraham jehe vitticaon ngain Dios, co ixin jehe vechonda confianza ngain, mexinxin Dios vayé Abraham inchin ná xí jian para ixin jehe. ⁷ Mexinxin jaha ra chonda ra que tsonoha ra que cain tti nichonda confianza ngain Dios, mé ni ndoa chojni Abraham. ⁸ Tti xón que jitaxin Palabré Dios, nttiha jitaxin que Dios sinchejian cain chojni que jeha judío si rrochonda na confianza ngain jehe. Mexinxin desde are icha saho Dios ndache Abraham tti jian joajna jiji: “Chojni de cainxin nación tsonchaon na por ixin jaha.” ⁹ Mexinxin Dios nchenchaon cain chojni que chonda confianza ngain jehe xajeho inchin joinchenchaon Abraham are jehe vechonda confianza cai.

¹⁰ Cain chojni que chonda confianza que jeho ley que vayé Moisés tsjenguijna, chojni mé soan na condenado. Ixin ndacho ngain tti jitaxin Palabré Dios: “Cainxin chojni que sincheha jian masqui nacoa de cain tti jitaxin ngain ley que vayé Moisés, cainxin chojni mé soan na condenado.” ¹¹ Jañá jí claro que ixin xonhi chojni jian ngattoxon con Dios jeho ixin vitticaon na joinchehe na cain tti ttetonha ley que vayé Moisés, ixin ngain tti jitaxin Palabré Dios ndacho: “Tti chojni que dehe jian para ngain Dios conixin confianza que chonda ngain jehe, chojni mé rrochonda iná vida naroa.” ¹² Pero ley que vayé Moisés jindachoha de tti confianza que rrochonda ni, sino que jindacho: “Tti chojni que nchao sinchehe cainxin tti jitaxin ley jiji, rrochonda iná vida naroxin ixin jehe tsixinhi sinchehe cain tti ndacho ley.”

¹³ Jesucristo cjoenga hna para que ján na irrochondaha na castigo inchin ttetonha ley que vayé Moisés, jehe Jesucristo tti goan condenado

de ixin causaxin na ján na, ixin ndačo ngain tti jitaxin Palabré Dios: “Condenado cain tti chojni que seriahnda nganito ná nttá.” ¹⁴ Cain jihi conhe para que de ixin Jesucristo, Dios nchao sinchenchaon chojni que jeha judío xajeho inchin jeha Dios joinchenchaon Abraham. Co para que cainxin ján na nchao sayé na Espíritu Santo ixin chonda na confianza ngain Dios.

Ley que vayé Moisés co promesé Dios

¹⁵ Hermanos, janha rrondattjo ra ná ejemplo de ngain vida jihi: Are ná xí nchechjian ná testamento co nchefirmá xa, ixonhi chojni nchao tsentoxinhi testamento mé, ni ixonhi chojni tsentaxin icha palabra ngain testamento mé. ¹⁶ Nchao remé, Dios vanjo promesa ngain Abraham co ngain xanntí Abraham. Pero Palabré Dios jitaxinha de ixin tsje xanntí. Sino que rročo nacoa xanntí Abraham, co mé rročo que jeha Jesucristo. ¹⁷ Tti janha rrindačhjan rročo janhi: Dios joinchechjian ná promesa ngain Abraham co Dios joinchesegurehe promesa mé. Mexinxin ley que vayé Moisés cuatro cientos treinta nano después, čhoja sinchexante jeha promesa mé co sittohe sin que tsorentte tti ndačo Dios ngain Abraham. ¹⁸ Ixin si tti danjo Dios rroquixin jeha si rrogotticaon na rojonttoho na cainxin tti tetonha ley que vayé Moisés, mexinxin mé rročo que ijeha promesé Dios. Pero jeha jamé, ixin ján na noa na que Abraham vayé promesé Dios jeha ixin vechonda confianza ngain jeha co nahi ixin vaguitticaon vanchehe tti vaquetonhe Dios.

¹⁹ Mexinxin ¿quedonda jí ley que vayé Moisés? Ley mé joiguehe después de Abraham para joicjago ley que ixin tti nchehe cain chojni nchaoha jí. Pero ley jihi jeha cončhehe ley hasta tti ngain nchanho que joi jeha tti xanntí Abraham que Dios joincheprometehe ixin rroquí. Dios rroanha ángel para joiaho ley jihi co joinchegonda Moisés para cjoago ley ngain cain chojni judío. ²⁰ Pero are Dios nichjé Abraham, mé cjoí para vanjo promesa ngain. Inchin are ná chojni chjé promesa iná chojni, dondeha que iná chojni rronichja por ixin jeha. Mexinxin jañá Dios gondeha iná chojni o ángel are nichjé Abraham.

Quedonda vehe ley que vayé Moisés

²¹ ¿Apoco jihi rročo que ley que vayé Moisés jiha de acuerdo conixin tti promesé Dios? Nahí, jeha jamé. Ixin si ná ley nchao rroganjo ley iná vida naroa ngain chojni, si jamé rrocji, Dios rrondačo que chojni rrocojian na si ditticaon na nchehe na cain tti rroquetonha ley mé. ²² Pero inchin jitaxin ngain Palabré Dios cainxin na tteaxian na para sonttoho na cosa jianha. Co cain jihi jañá jí para que cain chojni que rrochonda confianza ngain Cristo sayé cain tti jian que Dios joincheprometé, jeha ixin chonda confianza mé.

²³ Icha saho de que chojni rrochonda oportunidad de rroguitticaon ngain Jesucristo, janha na xó judío na vintte na inchin tti teaxinhi ngain cárcel, co ley que vayé Moisés, mé inchin tti cárcel viaxinna na hasta que joija tiempo que janha na nchao rrochonda na confianza ngain Jesucristo. ²⁴ Rročo ixin ley que vayé Moisés vaquetonna na inchin ná maestro tetonha ngain chjannchecoenhe. Co jamé vintte na hasta que joija Cristo are Dios ndačo que janha na chojni jian na para ngain jeha si chonda na confianza ngain Cristo. ²⁵ Co jai janha na ochonda na

oportunidad de chonda na confianza ngain Jesucristo, co mexinxin ley que vayé Moisés ixonhi joachaxin chonda nganji na.

²⁶ Co cai cain jaha ra xenhe Dios ra ixin chonda ra confianza ngain Jesucristo. ²⁷ Co cain jaha ra joiguite ra ixin ocan ra chojni Jesucristo. Co mexinxin Cristo jí ngain ansean ra co nchehe ra inchin jehe rinao. ²⁸ Co para que xo chojni Jesucristo, jeha importante si judío o ani griego, o nchehe xa de ngain ná xinajni o ani nahi, o si ani nchí o xí, ixin cainxin na xajeho na inchin nacoa chojni ngattoxon con Jesucristo. ²⁹ Co si jaha ra chojni Jesucristo ra, mé rrocho ixin jaha ra cai chojni Abraham co sayehe ra cainxin tti ndacho Dios que rrochjé Abraham.

4

¹ Jihi ná ejemplo de tti janha ndachjan: Ná chjan are ndadenhe ndodé xan, sayé xan cainxin tti chonda ndodé xan. Pero are xa nchín xan, jehe xan jí xan inchin ná ninchehe xé ndodé xan ixin xa choha tsetonha xan ngain cain cosa mé hasta que sanguija xan, masqui cain cosa mé ocósé xan. ² Dintte chojni que dicao cuidado de ixin jehe xan are xa nchín xan co nchechjan na cain asuntoe xan hasta que dinqué tiempo que coetonha ndodé xan para sayé xan joachaxin de cain cosé ndo. ³ Co jamé tonhe nganji janha na cai, ixin are saho janha na xa vaquianxinha na de ixin Dios. Are mé janha na vintte na inchin xannchinnchinchjan ixin costumbré chojni ngataha nontte jihi, mé tti vaquetonha nganji na. ⁴ Pero are ovinqué tiempo que Dios ndacho, jehe rroanha Xenhe joiconcjihi Xan de ngain ná nchí, co jói Xan inchin chojni judío que vitticaon ley que vayé Moisés. ⁵ Jañá jói Xan para que joichjana na Xan libertad cain janha na xo vaquetonna na ley mé para que Dios vayehna na janha na inchin chojni jehe.

⁶ Co para que Dios cjoagoha jaha ra que jaha ra oxenhe jehe cai, jehe rroanha Espíritu Santo ngain ansean ra, co Espíritu mé joixin de ngain Cristo, co Espíritu tti nttanichja na are ndacho na: “¡Padre mío!” ⁷ Mexinxin jai jaha ra oxenhe Dios ra, ijeha inchin ninchehe xa. Co ixin jaha ra oxenhe Dios ra, jehe rrochjá ra por ixin Cristo cainxin inchin jehe ndacho.

Pablo ta joachjaon para ixin cain chojni que ditticaon Jesucristo

⁸ Are saho, are jaha ra xa vechonxinha ra de ixin Dios; jaha ra vintte ra inchin esclavo de ngain choan cosa que joincheguini ra dios, pero que jeha ndoa Dios. ⁹ Pero jai que ochonxin ra de ixin Dios, o icha jian rrocho que ixin Dios ochonxin ra jaha ra, mexinxin ¿quedonda jaha ra xa rrocjan ra sintte ra esclavo iná ngain costumbre que vechonda ra are saho? Onoha ra que mé xonhi rentte co xonhi joachaxin chonda. ¹⁰ Rrocho que jaha ra jai te nchanho co conittjao co tiempo co nano que icha chojni ndacho ixin importante, co jaha ra xa nchesayehe ra mé. ¹¹ Janha anto xaon na ixin puede tti xa que janha joasonttaha ngayaha ra tsoxonhi xé xa mé.

¹² Hermanos, nttatsanha ñao ra que nchehe ra inchin janha, ixin icha saho varichonda ley que vayé Moisés co jai sacjan na inchin jaha ra xo chondaha ra ley mé. Janha rrinichja jihi, pero jeha ixin jaha ra joinchena ra chonja cosa jianha. ¹³ Jaha ra onoha ra, are janha joaso nganji ra saho nttiha para joasondattjo ra tti jian joajna que danjo iná vida narao, are mé janha anto venina, co mexinxin vechonda tiempo para ndattjo ra tti

joajna mé. ¹⁴ Co tti chin que janha joarichonda, mé cjoí ná prueba para ixin janha, pero jaha ra cjoanoaha ni ra ni joinchesattenaha ni ra ixin jamé joarihi. Sino que jaha ra vayehna ni ra inchin rrogayehe ra ná ángel Dios o inchin rrogayehe ra Jesucristo mero. ¹⁵ Co ¿cja tti anto chaha ra que vinttechonda ra are mé? Are mé vicon janha que si rrocji posible, jaha ra hasta rrogantsjengui ra jmacon ra para rrochjana ni ra janha ixin anto joinao ni ra janha. ¹⁶ Co jai, ¿aningaconna ni ra jehó ixin ndattjo ra tti ndoa?

¹⁷ Tti icha chojni que joí nganji ra ndačo na ixin anto rinao ra na, pero jeha ndoa. Jehé na jehó rinao na que santsjenda ra na de nganji na janha na, para que cottimeja jaha ra jehó sitticaon ra jehé na. ¹⁸ Ján, anto nchao jí para sinao ra chojni, pero de jian co que mé tsončhenhe para cainxin tiempo, co jeoha are janha rrihi nganji ra. ¹⁹ Jaha ra inchin xannchinnchinchjanha co jai janha jittín na de ixin jaha ra inchin are ttín ná jannaha are ncheconcijihí jan xenhe jan; co sinchehe sigue tsín na hasta que jaha ra sitticaon ra jian ngain Cristo. ²⁰ Janha rrojinaho rrojarihi nganji ra jaxon, para que rronichjaha ra icha jian; jixin janha anto tsje joachjaon tá de ixin jaha ra!

Ejemploe Agar co Sara

²¹ Jaha ra xó rinao ra sitticaon ra ley que vayé Moisés, ndachjenji ni ra jihí: ¿Acoinha ra tti jitaxin ley mé? ²² Nttiha jitaxin que Abraham joichonda yó xenhe xanxí. Ná xan concijihí xan de ngain ná nčhinchehe xé, co iná xan concijihí xan de ngain nčhičhihi jehé, que nčhi mé jeha nchehe xa nča. ²³ Xenhe jehé nčhinchehe xa mé concijihí xan xajehó inchin toncijihí cain chjan, pero chjan que concijihí de ngain čhihi mero, chjan mé concijihí xan para que conixin jihí joiconhe tti ndačo Dios ngain Abraham. ²⁴ Yá conhe para ná ejemplo. Tti yó nčhi mé rročo yó manera que Dios ttjenguijna chojni. Ná de tti yó manera jihí joiconhe ngataha jna Sinaí, tti vanjonxin Dios ley ngain Moisés. Co tti nčhi vinhi Agar rročo cain jihí. Co cain chojni que ditticaon jehó jihí, jehé na inchin esclavo na ngain jihí, xajehó inchin Agar conixin xenhe vintte esclavo cai. ²⁵ Co Agar rročo jna Sinaí que jí ngain nonttehe Arabia, co jna Sinaí rročo ciudad de Jerusalén ixin chojni nttiha jai tiempoa na jihí te na inchin esclavo ngain ley que vayé Moisés. ²⁶ Pero ngajni jí iná Jerusalén. Co ján na xó tequininxin na nttiha, chonda na libertad ixin Dios jinda na, co mé rajná na. ²⁷ Ndačo janhi ngain Palabré Dios de ixin ciudad de Jerusalén nttiha ngajni:

Chaha jaha nčhi que čhoha ncheconcijihí chjan, jaha que xonhi chjan chonda;

toyao ixin anto chaha, jaha que chonxinha tti ttín nčhi de ncheconcijihí nča chjan.

Ixin tti nčhi que ndacointtohe xixihi, nčhi mé rrochonda nča icha tsje chjan

que tti nčhi que jicao xixihi.

²⁸ Hermanos, ján na te na inchin Isaac, ixin jehé goan ixin Dios ndache Sara, nčhičhihi Abraham, ixin rrochjé nča ná chjan. Co ján na xenhe Dios na, tti chjan que jehé joincheprometé. ²⁹ Pero ngain tiempo vatto, xenhe Agar, tti concijihí xan inchin cain chojni, chjan mé feo joinchehe xan ngain tti chjan que joincheconcijihí Sara de ixin tti joinchehe Espiritu Santo; co cai jamé tetoan na ján na jai ixin chojni que rinao nchehe

na inchin ttetonha ley que vayé Moisés, chojni mé feo nchehe nganji na xo dotticaon na Cristo. ³⁰ Pero ¿quehe ndačo ngain Palabré Dios? Nttiha ndačo: “Dehngui nčhinchehe xa conixin xenhe nča ixin xenhe nčhinchehe xa čhoha rrochonda xan parte ngain tti herencia que sayé xenhe tti nčí que jeha nchehe xa.” ³¹ Jańá, hermanos, ján na jeha inchin xenhe tti nčhinchehe xa, sino que ján na inchin xenhe tti nčí que jeha nchehe xa.

5

xonhi tiempo ttintohe ra tti libertad que chonda ra jai

¹ Cristo vantsje na de ngain joachaxín ley que vayé Moisés para que ján na sontte na libre. xonhi tiempo jaha ra ttintohe ra libertad jiji, co icjanha ra dintte ra inchin esclavoe ley mé o icha costumbré chojni.

² Ttinhi ra tti rroundattjo ra. Janha Pablo rrindattjo ra que si jaha ra sittoaxin ra tsa ra tti xohe que dinhi circuncisión, ixin xaaxaon ra ixin xohe mé tsjenguijna ra ngattoxon con Dios, si jamé sinchehe ra, Jesucristo ichoha tsjenguijna ra. ³ Janha rrindačhjan iná que cain xí que xaaxaon que ixin icha jian si tsa xa xohe mé, jehe xa chonda xa que sinchehe xa cainxin tti ttetonhe ley que vayé Moisés. ⁴ Jaha ra xo xaaxaon ra ixin Dios rrogayaha ra inchin chojni jian si jeha rroguitticaon ra rrojinchehe ra cain tti ttetonha ley mé, pero mé rročo ixin jaha ra ichondaha ra confianza ngain Jesucristo; jaha ra ondavačhjenja ra de ngain jehe co de ngain tti jian que ttixin de ngain Dios. ⁵ Pero ján na chonda na confianza ngain Jesucristo de ixin joachaxín Espíritu Santo, co mexinxin chonda na seguro que ixin Dios sayá na inchin chojni jian. ⁶ Ixin are ján na te na ngain Jesucristo, jeha rentte si ján na chonda na xohe mé o ni nahi. Tti ján, rentte, mé tti ján na rrochonda na confianza ngain Cristo. Co confianza mé tti ttjenguijna na para sonao na cain chojni.

⁷ Jaha ra oanto jian vanchehe ra. ¿Quensen jointtayaha ra para que ndacointtohe ra de ditticaon ra tti mero ndoa mé? ⁸ Jaha Dios tti jointtayaha ra, sino que chojni que ditticaonha ngain jehe. ⁹ xaaxaon ra que “nchion levadura nchegangi cain nchoe niottja.” Co cai nchion chojni jianha nchejianha icha chojni. ¹⁰ Pero janha chonda confianza ngain Dios que jehe tsjenguijna jaha ra para rroxaxaonha ra iná cosa que jeha ndoa. Co Dios sinchecastigá tti chojni que tenttayaha ra; jehe ndosenha quexeho de jehe na.

¹¹ Co de ixin janha, hermanos, si janha xa rroquetoan chojni que chonda confianza ngain Jesucristo que ixin chonda na que tsa na xohe que dinhi circuncisión, chojni judío ifeoha rrojinchehe na nganji na janha co irrocoñaoha na are rroquinhi na tti joajna que janha ndačhjan de ixin quedonda Cristo ndavenxin nganito cruz. ¹² Pero tti chojni que nttayaha ra ixin chonda ra que tsa ra tti xohe que dinhi circuncisión, jncho jeha na rrojinchenihi cuerpoe na mismo!

¹³ Ixin jaha ra hermanos, Dios vayaha ra para que jaha ra sintte ra chojni libre. Pero jiji rročooha ixin jaha ra nchao sinchehe ra jeha tti rinao ra, sino que por ixin rinao chó ra, ttjenguijna chó ra naná ra. ¹⁴ Ixin ngoixin ley de Dios rročo jiji: “Rinao chó ra inchin rinao ra cuerpoe ra jaha ra mismo.” ¹⁵ Pero si jaha ra sintte ra inchin coxigo čhintto que

nehe chó va co jine chó va jeho va, si jamé nchehe ra, ttjiho ra cuidado ixin jamé jaho ra sinchetján chó ra.

Ti rinao cuerpoe ni co tti vida que danjo Espiritu Santo

¹⁶ Jihi tti janha rrindattjo ra: Nchehe ra inchin rinao Espiritu Santo, co jañá isincheha ra tti jianha que rinao cuerpoa ra. ¹⁷ Ixin tti jianha que rinao cuerpoe ni, mé rinaoha Espiritu Santo de Dios. Co tti rinao Espiritu Santo, mé rinaoha cuerpoe ni. Cayoi parte mé ningaconhe chó co mexinxin jaha ra čhoja sinchehe ra inchin jaho ra rinao ra. ¹⁸ Pero si jaha ra nchehe ra inchin rinao Espiritu Santo, tti ley que vayé Moisés ichondaha joachaxin nganji ra.

¹⁹ Tanguiha para datsoan ni quehe nchehe tti chojni que nchehe tti rinao cuerpoe: Jehe na deoacaho na iná nčhi que jeha čihi na, co nchehe na cosa anto jianha, joxon cosa que rinao cuerpoe na, ²⁰ co jehe na nchesayehe na ídolo co dantonga chó na, ningaconhe chó na, ditticaonha chó na, co chonda na joachjio. Nanao toñaohé chó na. Si nchehe na čhoan cosa jian, pero jeho para que jehe na sittohe na jian ngain icha chojni. Co dačhjendehe chó na co nchechjian na tsje grupo. ²¹ Jehe na chjoehe na, dantsjehe na vidé icha chojni, coan na, anto xengo na, co nchehe na icha cosa jianha inchin cain jihi. Janha rrindattjo ra iná inchin ondattjo ra are saho, que cain chojni que nchehe cosa jihi rrochondaha na parte ngain tti ttetonha Dios.

²² Pero janhi tti nchehe Espiritu Santo: Jehe nchehe para que ján na rinao na cain chojni, para que anto chá na, para que tonoa na čhjoin ngain ansean na, para que chonda na paciencia, para que sontte na amable na, para que sinao ansean na ttjenguijna icha chojni, para que ján na sonttoho na sigue inchin Dios rinao, ²³ para que tsorentteha na ni sontteha na orgulloso, co para que sonttoha na tti rinao cuerpoa na. Co jamé xonhi ley jí que ndačo ixin cosa tehe nchaoha te. ²⁴ Co tti chojni que ditticaon Cristo, chojni mé ncheha na cain tti rinao cuerpoe na ni cain tti jehe na xaxaon na. ²⁵ Jañá inchin Espiritu Santo chjá na iná vida nara, ján na cai chonda que sittoaxin na que Espiritu mé tsetonha nganji na.

²⁶ Ján na chondaha na que sontte na orgulloso, ni sonttoñaoha chó na, ni tsonchjoeha chó na.

6

Ttjenguijna chó ra ná ra co iná ra

¹ Hermanos, si jaha ra tsinhi ra que ná chojni de jaha ra jinchehe jianha, jaha ra xo ojian ditticaon ra nchehe ra tti ttetonha Espiritu Santo nganji ra, xo mé chonda ra que rrondache ra chojni que jinchehe jianha que isincheha jamé. Pero mé chonda ra que sinchehe ra conixin ansean ra jian, co torentteha ra ixin tsjenguijna ra na. Co ttjiho ra cuidado cada ra cai para que jaha ra sincheha ra cosa jianha jamé cai. ² Ttjenguijna chó ra naná ra are tangui tsonha ra, co jamé sinchehe ra tti ttetonha Cristo.

³ Ixin si ná chojni tsonohe ixin anto importante co jehe ni xonhi quehe, mé rročo que jeho jincheyehe ansén. ⁴ Cada ni chonda ni que sinchejuzgá ni tti jehe ni tenchehe ni. Co si jian tti jehe ni joinchehe ni, jehe ni nchao tsonohe ni čhjoin, co xonhi xé para rroxaxaon ni si joinchehe ni icha tsje o icha tsjeha que iná chojni. ⁵ Ixin cada chojni chonda responsabilidad ngattoxon con Dios de tti jehe nchehe.

⁶ Co nitetangui ngain tti jian joajné Jesucristo, chojni mé chonda que tsonchjeya na ngain ximaestroe na cain cosa jian que jehe na chonda na.

⁷ Dittoaxinha ra řaxaon ra tti ndoaha: řonhi chojni nchao tsjanoa Dios, ixin tti jehe ni ttenga ni, mé tti tsín ni. ⁸ Tti chojni que ttenga cosa jianha inchin tti rinao cuerpoe, jehe ndasinchetján vidé ngattoxon con Dios, co de tti jehe ndasenhe, mé rrořho cosecha que jehe rrotsín. Pero tti chojni que ttenga tti rinao Espíritu Santo, chojni mé rronchonda iná vida naroa para cainxin tiempo, co mé tti coseché que jehe rrotsín. ⁹ Mexinxin ján na řonhi tiempo tsinttohe na de sonttoho na tti jian, ixin si ján na soanha na desanimado de sonttoho na tti jian, ján na rrotsín na cosechá na mero ngain tti tiempo que Dios coinchiehe. ¹⁰ Mexinxin cada nttiha que nchao, ján na sonttoho na jian ngain cain chojni, nttoho na jamé co icha para ngain tti chojni que ditticaon ngain Jesucristo.

Pablo joexin cjin carté co rroanha joajna

¹¹ Tsjexin ra queřén yeyexin letra rricjianxin ra conixin rana ngain parte jihi. ¹² Tti chojni que ndattjo ra ixin chonda ra que tsa ra tti řohe que dinhi circuncisión, chojni mé jamé nchehe na jého para que sittoexin na jian ngain chojni judío, co jamé para que tsonoeha na tangui ixin causexin Jesucristo are rrondache na icha chojni ixin quedonda Jesucristo ndavenxin nganito cruz. ¹³ Ixin ni jehe tti chojni que ta řohe mé nchehe na cain tti jindařho ngain ley que vayé Moisés. Pero jehe na rinao na que jaha ra tsa ra řohe mé para que jehe na nchao tsonohe na orgulloso, ixin jaha ra vitticaon ra coá ra řohe inchin jehe na coetonha na nganji ra. ¹⁴ Pero para ixin janha, rinaoha tsonona orgulloso de ixin icha cosa, sino que janha tonona orgulloso de ixin quedonda Jesucristo ndavenxin nganito cruz. Ixin are jehe ndavenhe, rrořho inchin cain cosa feo co jianha ngataha nontte jihi ndavitján co ndavenhe para ixin janha, co janha inchin ondavenhe na de cain cosa mé. ¹⁵ Ixin si ján na chojni Cristo na, jeha importante si ján na techonda na tti řohe que dinhi circuncisión o ni nahi; tti importante na, que ján na sontte na chojni naroxin para ngain Dios. ¹⁶ Janha rinaho que Dios rrochjá ra tti řhjoin que tsonohe ansean ra, co jehe tsiaconoaha ra, cain jaha ra řo ditticaon ra jihi, co para cainxin tti chojni que ján ndoa chojni Dios.

¹⁷ De jai para ndaha rinaho que řonhi chojni rrochondana problema, ixin cain marca que rrichonda ngain cuerpona jai de ixin tti anto vicaon na, mé tjago que janha ndoa ná ninchehe řé Jesucristo.

¹⁸ Hermanos, janha danchia que Jesucristo, tti chonda cain joachaxin, sinttanchaon ra cainxin ra jaha ra. Amén.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Efeso

Pablo chjé joajna chojni ngain Efeso

¹ Janha Pablo na, Dios joinao que janha rrihi ná representanté Jesucristo. Janha rricjin na carta jihi para nganji jaha ra xo te ra ngain ciudad de Efeso, jaha ra xo chojni Dios ixin ditticaon ra Jesucristo. ² Dios Ndodá na co Jesucristo, tti chonda cain joachaxin para ixin ján na, sinchenaon nganji ra co rrochjá ra tti chjoin que tsonohe ansean ra.

Dios anto nttanchaon na de ixin Jesucristo

³ Nttocoanxinhi na Dios Ndodé Jesucristo, tti chonda joachaxin para ixin ján na, ixin jehe Dios anto jointtanchaon na de cainxin cosa jian que ttixin de ngajni. Jehe rroán na cain cosa mé ixin ján na te na inchin nacoa chojni, ján na conixin Jesucristo. ⁴ Icha saho que Dios joinchechjian nontte, jehe ocoinchíá na ján na para sontte na chojni jehe de ixin Jesucristo, para que ján na sontte na chojni jian ngattoxon con jehe que xonhi cosa jianha rrochonda na. ⁵ Cai desde icha saho, Dios anto joinao na, mexinxin jehe ndačo que ján na sontte na xenhe jehe. Mexinxin jehe rroanha Jesucristo para joicjenga hna para ixin ján na, jamé joinchehe Dios ixin jehe jamé rinao. ⁶ Mexinxin ján na cainxin tiempo sonttocoanxinhi na Dios ixin jehe anto jian nganji na, ixin jehe chjá na joachaxin para que ján na te na inchin nacoa chojni conixin Xenhe que jehe anto rinao. ⁷ Dios jehe anto rinao na ján na, mexinxin rroanha Xenhe nttihi ngataha nontte para ndavenhe Xan; jamé para cjoenga Xan hna cain tti jianha que ján na nttoho na. Co mexinxin jai Dios ojointtatjañá na cain tti jianha mé. ⁸ Dios ocojogoa na que jehe anto rinao na ixin jehe tti ntaaxaon na jian co ntaquianxin na jian de ixin jehe. ⁹ Co jehe jointtagatsoan na tti jehe rinao co tti jehe sinchehe ngain cain chojni, co cain mé nonxinha vehe desde ngain tiempo vatto. ¹⁰ Co jihi rročo que tsonhe ngain tti mero nchanho que Dios tsinchiehe, jehe Dios sanjo joachaxin ngain Jesucristo para que Jesucristo tsetonhe cain cosa que jí ngajni co cain cosa que jí nttihi ngataha nontte.

¹¹ Co desde icha saho, Dios ocoinchíá na ján na para que sontte na inchin nacoa chojni conixin Jesucristo, jamé para que ján na nchao sayé na tti jehe Dios rrochjá na. Co cain jihi tsonhe inchin jehe rinao, co Dios nchehe cainxin cosa inchin tti jehe ndačo que jian jí. ¹² Jañá joinchehe Dios para que janha na xo saho vitticanho na Jesucristo sinttacoanxian na jehe Dios ixin jehe anto jian. ¹³ Co cai jaha ra vitticaon ra Jesucristo are coinhi ra tti joajna ndoa, co joajna mé tti chjá ra iná vida naroaxin. Co desde ngain rato mé jaha ra te ra inchin nacoa chojni conixin Jesucristo. Co Dios ndačo ixin jaha ra chojni jehe are chjá ra Espíritu Santo inchin jehe ndačo icha saho. ¹⁴ Espíritu Santo que jí nganji ján na, mé inchin ná seguridá de que ján na sayé na tti ndačo Dios que rrochjá na are jehe tsjexin sincheroa cain chojni que jiquininxin para ixin jehe co cain jihi para que tsocoanxinxin jehe, ixin jehe anto jian.

Pablo nchetsenhe ñao Dios que Dios sinchequinxin cain chojni que ditticaon Jesucristo

¹⁵ Mexinxin desde ngain nchanho que janha coian ixin jaha ra oditicaon ra Jesucristo, co ixin anto rinao ra cain chojni Dios, ¹⁶ desde ngain nchanho mé co hasta jai, janha cainxin tiempo danjo gracias ngain Dios para ixin jaha ra, co cain tiempo xaxanho jaha ra are janha rrinttacoanxian Dios. ¹⁷ Janha nttatsán ñao Dios, Ndodé Jesucristo, tti chonda cain joachaxin, co Dios mé Ndodá na cai co tti jiquininxin tsosayehe. Janha nttatsán ñao jehe que sinttaquianxin ra conixin Espíritu Santo para que tsinxin ra jian tti jehe rronhattjo ra, co para que jian rrochonxin ra jehe. ¹⁸ Co janha nttatsán ñao Dios que jehe sinchengasán ngain joarrixaoan ra para que rrochonxin ra que ixin jaha ra oseguro chonda ra tti vida naroaxin que jehe ochjá ra. Co para que cai rrochonxin ra que anto jian co anto rentte cain cosa que danjo Dios ngain chojni jehe. ¹⁹ Co rinaho cai que jaha ra rrochonxin ra que Dios chonda anto tsje joachaxin co xonhi cosa que Dios choha sinchehe. Joachaxin jihi jí nganji ján na xo dotticaon na Jesucristo. Co xajeho joachaxin jihi joinchegonda Dios ²⁰ are jehe joinchexechon Jesús are ndavenhe co joaquehe ngain lado jian nttiha ngajni. ²¹ Co rato mé jehe Dios chjé Jesús joachaxin para que Jesús ttetonhe cain tti icha ttetonha nttiha ngajni. Co Jesucristo jehe tti chonda icha joachaxin de cain cosa, masqui quexeho tiempo, sia tiempo jai o tiempo que tsí. ²² Dios chjé Jesucristo cain joachaxin para ngain cain cosa co Dios joanjo joachaxin cai para que Jesucristo jí inchin já cain chojni que ditticaon jehe. ²³ Co tti cain chojni que ditticaon Jesucristo, cain chojni mé inchin ngoixin cuerpoe Jesucristo ixin cain jehe na conixin Jesucristo te na inchin nacoa cuerpo. Co Jesús jí ngain cainxin lugar desde ngajni co nttihi ngataha nontte.

2

Dios chjá na vida naroaxin ixin jehe anto rinao na

¹ Dios chjá jaha ra vida naroaxin masqui icha saho jaha ra vintte ra inchin tti ndadiguenhe de ixin tti cainxin cosa jianha ² que jaha ra vanchehe ra. Are mé jaha ra vanchehe ra inchin nchehe cain chojni que ditticaonha Jesucristo, co jaha ra vaguitticaon ra tti ttetonha ngain cain demonio que chonda joachaxin ngain cain tti chojni que ncheha tti ttetonha Dios. ³ Co cai cain ján na jañá vanttoho na are saho. Ján na vanttoho na inchin vařaxaon na, co vanttoho na inchin vajinao cuerpoa na co joarrixaoan na. Mexinxin ján na vequininxin na tti anto soji castigoe Dios inchin icha chojni. ⁴ Pero Dios jehe anto coiaconoá na, co anto rinao na, ⁵ masqui ján na gontte na inchin chojni que ndadiguenhe para ixin Dios ixin anto tsje jianha vanttoho na. Pero jehe chjá na iná vida naroa, co mexinxin jai ján na co Jesucristo inchin nacoa chojni. Jañá jaha ra irrochondaha ra tti anto soji castigo ixin Dios anto coiaconoaha ra. ⁶ Co jamé rrocho que Dios jointtaxechon na de tti ndavenhe na, are jehe joinchexechon Jesucristo, co inchin jehe Dios ocoín na ján na ngajni ngain Jesucristo. ⁷ Jehe joinchehe jañá para que sicon cain chojni de ngain tiempo que tsí que ixin anto rinao na ján na, co jehe anto jian nchehe nganji na de ixin Jesucristo. ⁸ Mexinxin jaha ra ochonda ra iná vida naroa ixin Dios anto rinao ra co ixin jaha ra chonda ra confianza ngain Jesucristo. Co vida jihi jeha ixin jaha ra joinchehe ra ná cosa jian

mexinxin chondaxin ra vida jiji, sino que Dios joinao chjá ra vida jiji. ⁹Jeha de ixin tti jian que nchehe ná chojni mexinxin chondaxin vida jiji, nahi jeha jamé. Mexinxin xonhi chojni tsonohe orgulloso ixin chonda vida jiji. ¹⁰Ixin Dios jehe jointtachjian na ján na; co de ixin Jesucristo Dios chjá na iná vida naroa para que ján na sonttoho na jian ngataha nontte jiji, inchin jehe oxxaon desde are saho.

Tti çhjoin tonoa na ngain Dios por ixin Cristo

¹¹Mexinxin xaxaon jaha ra de ixin quexén vintte ra are saho. Jaha ra jeha chojni judío ra, co chojni judío ndaço na que jeha na nichojní Dios ixin chjé chó na xohe que dinhi circuncisión ngain cuerpoe na, co jaha ra nahi ixin chondaha ra xohe mé. ¹²Ngain tiempo mé jaha ra xa jeha chojni Jesucristo ra, co jaha ra ni jeha chojni judío ra, co ni xa vinttechonxinha ra tti trato que joinchechjian Dios conixin Abraham, co ni xa vinttenoaha ra de ixin tti jian que Dios ndaço sanjo ngain chojni. Are mé jaha ra vintte ra ngataha nontte jiji pero xonhi esperanza vinttechonda ra que ixin Dios tsjenguijna ra co ni vinttechonxinha ra de ixin Dios. ¹³Pero masqui ngain tiempo mé jaha ra cjin vintte ra de Dios, jai jaha ra oconchienhe ra ngain Dios ixin para mé venxin Jesucristo co jai te ra inchin nacoa chojni conixin jehe. ¹⁴Jesucristo mé tti chjá na tti çhjoin que tonohé ansean na. Co jehe tti joinchehe para que chojni judío co chojni que jeha judío pero que cain na xo dotticaon na jehe te na inchin nacoa grupo ixin Jesucristo conxante tti vaningaonhe chó na. Mexinxin jai cain chojni que ditticaon na jehe, cain na amigo na. ¹⁵Are ndavenhe Jesús, are mé jehe conxante cain tti costumbre que vanchehe chojni judío ngain ley que vayé Moisés, ixin ley jiji tti chjeyaxin chojni. Pero jehe joinchechjian nacoa grupo de chojni jehe, de tti chojni judío co de tti chojni que jeha judío, pero cain na te na nacoa grupo jai. Co jamé cointte Jesucristo cain chojni jehe para que cain na rinao chó na. ¹⁶Mexinxin are Jesucristo ndavenxin nganito cruz, jehe joinchexante tti vaningaonhe chó chojni de chojni judío co tti chojni que jeha judío. De cain chojni mé jehe cointte na inchin nacoa chojni para que jai cain na sintte na jian ngattoxon con Dios.

¹⁷Jesucristo jói ngataha nontte jiji para joindache cayoi grupo de chojni jiji tti jian joajna para que ansean na cain na çhjoin tsonohe. Jehe ndattjo jaha ra joajna mé masqui cjin vintte ra para Dios, co jehe ndachjenji na janha na xo chojni judío na cai, co janha na icha chian vintte na para Dios. ¹⁸Mexinxin de ixin Jesucristo, cainxin na masqui chojni judío na o nahi pero cainxin na nchao tsonchienenhe na ngain Dios Ndodá na ixin chonda na xajeho Espíritu Santo. ¹⁹Mexinxin jai jaha ra ijeha chojni ojé ra, sino que jai jaha ra xajeho cain chojni que ditticaon Dios, ixin cain na ján na xajeho chojni Dios na. ²⁰Co jaha ra inchin ná nchia jie que jingattjen soji. Ixin jai jaha ra te ra ngataha tti base que vinttequín cain nirepresentanté Jesucristo co cain profeté Dios, co Jesucristo mismo inchin tti xo esquina que icha importante ngain base mé. ²¹Co ngataha base jiji, que mé Jesucristo, ján na sontte na cainxin na inchin xo que ditte ttjarioho hasta que tsonchjian na ná nihngo jian para ngain Dios co cainxin na sontte na inchin nacoa na para ixin Jesucristo. ²²Co jamé jaha ra cai dintte ra inchin nacoa chojni conixin Jesucristo, co doan ra inchin nacoa ra conixin icha chojni jehe para que cain na tsonchjian ra ná nchia tti nchao sehe Espíritu Santo de Dios.

3

Dios chjé Pablo xa de rronichja joajné ngain chojni que jeha judío

¹ Mexinxin janha Pablo na nttatsán ñao Dios para ixin jaha ra, co janha rriaxinna ngain cárcel ixin ndattjo ra joajné Jesucristo, jaha ra xo jeha chojni judío ra. ² Seguro que onoha ra que ixin Dios anto jian jehe chjana xa jiji que janha rrinttaha nganji ra para que jaha ra sintte ra chojni jehe. ³ Rrocho que Dios cjoagohna tti nonxinha vehe que jehe xaxaon joinchehe ngain chojni. Jehe joinchenona mé, co janha ondattjo ra nchion de mé ngain cartana. ⁴ Are jaha ra rrotsjehe ra carta mé iná, nchao tsinxin ra que janha chonxin tti nonxinha mé de ixin Jesucristo. ⁵ Mé ná cosa que xonhi chojni venohe are icha saho, pero jai Dios cjoagoe cain nirepresentanté jehe co cain profeté jehe de ixin Espíritu Santo que jehe rroanha. ⁶ Tti nonxinha vehe mé jiji: que de ixin tti jian joajné Jesucristo, Dios nchennaon tti chojni que jeha judío inchin nchennaon chojni judío, co cain na xajeho chojni Jesucristo na; rrocho inchin nacoa cuerpo cain na, co cain na yahi sayé na tti ndacho Dios que rrochjá na ixin dotticaon na Jesucristo.

⁷ Dios jehe anto jian para nganji janha ixin de joachaxin que jehe chonda, ixin jehe chjana xa de nichja joajna jiji. ⁸ Janha tonona que icha rentteha na de cain chojni Dios, pero masqui jamé, Dios chjana joachaxin jiji para ndattjan icha chojni que jeha judío tti jian joajné Jesucristo. Co joajna mé anto icha rentte que cainxin cosa nttihi ngataha nontte. ⁹ Dios tti joinchechjian cainxin cosa, coetonna para rronhattjan cain chojni tti jehe vacjagoha jian ngain cain chojni are icha saho. ¹⁰ Jamé conhe, para que jai de ixin cain chojni que ditticaon Jesús, cain ángel que chonda joachaxin nttiha ngajni tsonohe, tsinxin co satsoan icha tsje de tti danjo Dios, tti anto chonxin co nohe cain de cain tti jian. ¹¹ Dios joinchehe cain jiji inchin jehe xaxaon desde icha saho que jehe joinchechjian mundo jiji, co de ngain Jesucristo coenxin cain cosa jiji. ¹² Co de ixin tti joinchehe Jesucristo ján na jai ochonda na joachaxin para tsonchienhe na ngain Dios. Ján na chonda na confianza mé ixin dotticaon na ngain Jesucristo. ¹³ Mexinxin janha nttatsanha ñao ra que doanha ra desanimado ixin janha rriaxinna jai. Janha cain jiji jitonna ixin ndattjo ra tti jian joajné Jesucristo, co cain tti janha jitonna jiji rrocho chjoin para ixin jaha ra.

Pablo nchetsenhe ñao Dios para rrochonxin na quexén Cristo rinao jehe na

¹⁴ Mexinxin janha darittoxin nttajochjihna ngattoxon con Dios Ndodé Jesucristo. ¹⁵ Co jehe Dios jiji tti Ndodé cain chojni que te nttihi ngataha nontte, co de ángel que te nttiha ngajni; jeha Dios jiji tti Ndodaha desde nttiha ngajni co hasta nttihi ngataha nontte. ¹⁶ Janha nttatsán ñao Dios que de ngain cain tti jian que jehe chonda, rrochjá ra joachaxin co sinchesoji espiritua ra de ixin Espíritu Santo que jehe rrochjá ra, ¹⁷ para que Jesucristo mismo nchao sehe ngain ansean ra ixin jaha ra ditticaon ra jehe. Co janha nttatsán ñao Dios que jaha ra anto sinao ra cain chojni ixin jaha ra osoji tengattjen ra ngain Dios inchin ná nttá que jingattjen soji ixin noehe nnta nihnga tejavá. ¹⁸ Co jamé para que jaha ra co icha chojni que ditticaon jehe nchao tsinxin ra jian quexén Jesucristo anto rinao na ján na. ¹⁹ Janha danchiá Dios que jaha ra rrochonxin ra quexén jehe anto rinao ra para que jamé xonhi sinchetján ra ixin Dios sehe

nganji ra. Janha danchia jiji masqui xonhi chojni nchao tsinxin cainxin de quexén Dios rinao chojni.

²⁰ Co jai de ixin joachaxín Dios que jí nganji na, sonttosayehe na jehe ixin jehe tti chonda joachaxín para sinchehe anto icha tsje que tti ján na danchiehe na, o icha que de tti ján na xaxaon na. ²¹ Que cain chojni que ditticaon Jesucristo, conixin jehe Jesucristo cai, cainxin na sinchesayehe na jehe Dios para cainxin tiempo. Amén.

4

Cain chojni que chonda Espíritu Santo te na inchin nacoa chojni

¹ Mexinxin janha que rriaxinna jai ngain cárcel ixin nttanoha ra tti jian joajné Jesucristo nttatsanha ñao ra que nchehe ra jian inchin jiquininxin sinchehe chojni que Dios coinchiehe, ixin jehe coinchiaha jaha ra. ² Dintteha ra inchin chojni orgulloso, nchehe ra jian ngain icha chojni, co chondehe chó ra paciencia, co ttiaconoehe chó ra ixin rinao chó ra cain ra. ³ Nchehe ra de que cainxin tiempo dintte ra inchin nacoa chojni ixin Espíritu Santo tsjenguijna ra para sinchehe ra jamé ixin jehe danjo tti chjoin que tsonohe ansean ra. ⁴ Ixin cainxin na, xo dotticaon na Jesucristo, te na inchin nacoaxinxon cuerpo para ixin jehe, co cain na chonda na xajeho nacoaxinxon Espíritu Santo, co Dios ndattjo na cain na ixin seguro rrochonda na iná vida naroaxin cainxin na. ⁵ Co jí jeho nacoaxinxon Jesucristo, tti chonda cain joachaxin para ixin ján na, co jeho jehe tti jiquininxin sotticaon na ján na, co cainxin na diguite na para xago ixin ján na chojni Jesucristo, ⁶ co jí jeho nacoaxinxon Dios, tti Ndodé cainxin chojni. Co jehe tti ttetonha cain cosa, co jehe nchegonda chojni para nchehe xé jehe nttihi ngataha nontte, co jehe jí nganji na cainxin na.

⁷ Pero cada na ján na Jesucristo chjá na naná clase de joachaxin inchin jehe joinao. ⁸ Mexinxin ndaño ngain tti jitaxin Palabré Dios: Jehe sacojín para ngajni, jamé joinchehe para cjoago que jehe ojoacha ngain cain tti ningaconhe jehe,

co ngain rato mé joanjo joachaxín jehe ngain tti chojni que ditticaon jehe.

⁹ ¿Co attinxin ra de ixin quehe rrocho jiji tti “jehe sacojín”? Jiji rrocho que saho jehe xincanji hasta tti chingui nontte. ¹⁰ Co xajeho jehe tti xincanji, mé tti sacojín hasta tti ngain parte icha noi de ngajni para que jamé Jesús jí ngain cainxin lugar desde nttihi ngataha nontte co hasta ngajni. ¹¹ Co jehe chjá na cada na xo dotticaon na jehe ná clase de joachaxin. Canxion na chjá na joachaxin de nirepresentanté jehe, co icanxin na chjá na tti joachaxin de ndache na icha chojni tti joajné Dios que jehe mismo nttanoa na, co icanxin na chjá na joachaxin de ndache na icha chojni tti jian joajna que danjo iná vida naroaxin, co icanxin na chjá na joachaxin de tenda na chojni ngain icha nihngo, co icanxin na chjá na joachaxin de nttocoenhe na icha chojni ngain nihngo de ixin Dios. ¹² Co jañá cain joachaxin yá danjo Jesucristo ngain chojni para que jehe na nchao sinchehe na xé jehe co para que chojni jehe tosoji na ngain tti ditticaon na. Co cain chojni mé inchin cuerpoe Jesucristo. ¹³ Jamé hasta que cainxin na sontte na inchin nacoa chojni ngain tti dotticaon na co tsinxin na cainxin de ixin Xenhe Dios. Co jamé, sontte na chojni de jian joarrixaon para ngattoxon con Dios ixin sontte na inchin Jesucristo mismo. ¹⁴ Are mé ján na isontteha na inchin xannchinnchinchjan que

anto daca ttentoxinhi xan tti xaxaon xan, ni isontteha na inchin ca dixema que anto daca sadicao ĉhinto, rroĉho que are mé isotticaonha na tti ndaĉho canxion chojni que rinao sinttayá na ixin tjagoa na de ixin Cristo, pero jeha mero ndoa tti jehe na sinttacoán na na, jeha rinao na que ján na sonttoho na inchin jehe na tenchehe na. ¹⁵ Sino que ján na sonttoho na tti mero ndoa que rinao Dios ixin sonao chó na. Co chonda na que sonttosoji na espirítua na para que jamé nchao sontte na conixin Jesucristo, inchin nacoa chojni ixin cain chojni que ditticaon jehe tonchjian na inchin nacoa cuerpo co Jesucristo jehe tti já cuerpo jihi. ¹⁶ Inchin cada parte de cuerpo tetsexin chó, jamé ján na are ĉhjoin dotticaon chó na de ixin Jesucristo. Co inchin já na ttetonhe cuerpoa na para nchehe inchin jehe já na rinao, jamé cai Jesucristo ttetoan na ján na. Co mexinxin are ján na sonttoho na inchin rinao Jesucristo, co sonao chó na, cottimeja cain na junto nttosoji na espirítua na co ttjenguijna chó na.

Tti vida naroa que chonda na ixin dotticaon na Jesucristo

¹⁷ De ixin joachaxín nombré Jesucristo, jaxon janha rrindattjo ra, co rritettonha ra que ixonhi icha cosa jianha nchehe ra inchin tenchehe tti chojni que ditticaonha tti ttetonha Dios, co nchehe na inchin jehe na teĉaxaon na. Co tti jehe na teĉaxaon na, mé xonhi xé. ¹⁸ Co chojni mé joarrixaoen na te inchin ngain tti naxin xehe ixin ttinxinha na de ixin Dios. Chojni mé chondaha na tti vida naroa que danjo Dios ixin jehe na choxinha na quehe rinao Dios ixin ansén na anto cha para ngain Dios. ¹⁹ Chojni mé itosoeha na de cain tti jianha que nchehe na, co ndadixanjo na para nchehe na tsje cosa jianha, co hasta ché na are nchehe na cain cosa jianha mé. ²⁰ Pero jaha ra jeha jañá coangui ra ngain Jesucristo, ²¹ si ndoa jaha ra coinhi ra de ixin jehe, co coangui ra de ngain jehe Jesús tti ndoa que jehe chonda. ²² Mexinxin jai jaha ra incheha ra cain cosa jianha que vanchehe ra are saho. Ixin vida mé anto feo ixin cosa jianha que vaĉaxaon joarrixaoan ra mé tti jointtayaha ra para vanchehe ra jamé. ²³ Dittoaxin ra que Dios tsentoxinhi joarrixaoan ra co ansean ra, ²⁴ co ngain vidá ra naroa nchehe ra joxon cosa jian inchin rinao Dios, co jamé sicon chojni ixin jaha ra chonda ra ná vida jian para ixin Dios. Jaha ra chonda ra que nchehe ra joxon jian inchin jiquininxin ngain vidá ra.

²⁵ Mexinxin jaha ra ichondaha ra que nichja ra mentira, sino que cada ra ndache chó ra joxon tti ndoa, ixin cain na ján na rroĉho parte de cuerpoe Jesucristo.

²⁶ Si tsoñao ra, pero ncheha ra jianha, co tanĉhmandaha ra coraje mé sehe ngain ansean ra ngoixin nchanho. ²⁷ Chjeha ra inchínji ni rioho oportunidad de sehe nganji ra.

²⁸ Si ĉhonja ra vaquehe ra cosé iná chojni, jai incheha ra jamé, icha jian nchehe ra ná xá jian conixin rá ra para que jamé nchao sachá ra tomia ra co jamé rrochonda ra nchion tomi para tsjenguijnanxin ra chojni noa.

²⁹ Nichjaha ra palabra jianha, sino que tangui ra nichja ra joxon palabra jian que tsjenguijna ngain espirítue cain chojni que tsinhi, co palabra mé sicao ná cosa jian ngain chojni mé. ³⁰ Co xonhi cosa jianha nchehe ra para que sechinha Espíritu Santo de Dios nganji ra, ixin Dios rroanha Espíritu jihi nganji ra para ná señal que jaha ra ochojní jehe co jañá sintte ra hasta ngain tti nchanho que jehe tsjehe sincheroa ra de cainxin tti jianha que nchehe ra.

³¹ Ttenchjianha ra coraje co itoñaoeha chó ra co itoyaotteha chó ra co ifeoha xoahe chó ra co incheha ra cosa jianha. ³² Ncheha ra cain mé, dintte ra chojni jian, co ttiacnoehe chó ra ná co ná ra co nchetjañehe chó ra ná ra co ná ra, jamé inchin Dios jointtatañaaha ra jaha ra ixin ditticaon ra Jesucristo.

5

Quexén jiquinixin sintte chojni Dios

¹ Jaha ra oxenhe Dios que jehe anto rinao, mexinxin chonda ra que sinchehe ra jian inchin jehe nchehe. ² Rinao chó ra ngain vidá ra, jamé inchin Jesucristo rinao na cainxin na. Co inchin chojni are saho vagoen na coleco para que Dios vanchetjañehe na tti jianha que vanchehe na, cai Jesucristo xanjo venhe jamé para que ján na vitjañá na para cainxin tiempo tti jianha que nttoho na. Co Dios anto joinche xoxinhi tti joinchehe Jesús para cjoengujna na cainxin na.

³ Co jai jaha ra que ochojni Dios ra, ni ichondaha ra que rro xaxaon ra de sintte chincoho ra iná nchi que jeha nchihihi ra, ni de quexeho iná cosa jianha, ni de rrochonda ra anto tsje cosa. ⁴ Nichjaha ra palabra grosería, ni palabra que xonhi xé, ixin jiquinixinha que chojni Dios rronichja jañá; icha jian danjo ra gracias ngain Dios. ⁵ Jaha ra onoha ra que ixin chojni jianha choha rrochonda na parte ngain tti ttonha Jesucristo co Dios. Jih rrotho tti chojni que deoacaho nchi que jeha nchihihi, o nchehe iná cosa jianha, o que rinao rrochonda anto tsje cosa, ixin jehe tti icha rinao rrochonda tsje cosa de nntihi ngataha nontte co xaxaonha de ixin Dios, chojni mé xajeho inchin jehe tti nchesayehe ídolo. ⁶ Dittoaxinha ra para sinttayaha ra icainxin chojni conixin palabra que xonhi xé ixin jamé ttixin castigoe Dios anto soji ngain tti chojni que ditticaonha tti ttonha Dios. ⁷ Ni tatoha ra cain chojni que nchehe jamé.

⁸ Are saho jaha ra vintte ra inchin ngain tti naxin xehe, pero jai ote ra inchin ngain joadingasán ixin ditticaon ra Jesucristo co te ra inchin nacoa chojni conixin jehe. Mexinxin cain tiempo nchehe ra inchin nchehe chojni que te ngain joadingasán, ⁹ ixin joadingasán mé tti ttjengujna na para nttoho na jian ngain chojni, co para nichja na tti ndoa, co para nttoho na inchin jiquinixin ngain vidá na. ¹⁰ Tangui ra nchehe ra jeho tti rinao Jesucristo. ¹¹ Ncheha ra cosa que xonhi xé que nchehe tti chojni que rridintte inchin ngain tti naxin xehe. Sino que nchenohe ra chojni mé que ixin tti jehe na tenchehe na, mé jianha. ¹² Co hasta soaxin rronichja ni tti jehe na nchehe na jimao. ¹³ Pero are cain mé rro xago ngain joadingasán, cainxin tsononxin, ixin joadingasán sinchenonxin cainxin. ¹⁴ Mexinxin ojitaxin:

Xingamaha, jaha que tarri chin,
dingattjenxin de ngayehe nindadiguenhe,
co Jesucristo sinttangasaha jaha.

¹⁵ Mexinxin ttjho ra cuidado jian tti jaha ra sinchehe ra. Ncheha ra inchin chojni que xonhi chonxin, sino que nchehe ra inchin chojni que chonxin jian. ¹⁶ Co nchegonda ra cada oportunidad que rrochjá ra Dios para nichja ra joajné jehe ngain icha chojni ixin ngain tiempo jih anto tsje chojni tenchehe jianha. ¹⁷ Co dintteha ra chojni que ttinxinha de ixin Dios sino que tangui ra ttinxin ra jian quehe rinao Jesucristo. ¹⁸ Dinttecoanha ra ixin tti coan ni ndanchetján ni. Sino que cain nchanho

dintte ra conixin joarrixaon ra jian co dittoaxin ra que Espíritu Santo tsetonha ngain ansean ra. ¹⁹ Ndache chó ra naná ra conixin salmo, co tsje ra himno co coro, jamé jaha ra rrotsje ra co sinchecoanxinhi ra Jesucristo conixin ansean ra. ²⁰ De cainxin cosa jaha ra danjo ra gracias ngain Dios Ndodá na de ixin joachaxín Jesucristo, tti chonda cain joachaxin para ixin ján na.

Tti jiquinixin sinchehe ni conixin nindoha ni are oditticaon ni Jesucristo

²¹ Chondehe chó ra respeto cada ra ixin jamé rrořago que chonda ra respeto ngain Dios.

²² Jaha ra řo nřhí ra ditticaon ra tti tsetonha ra xixiha ra, jańá inchin jaha ra ditticaon ra tti ttetonha Jesucristo. ²³ Ixin xí tti jiquinixin ttetonha ngain nřhíchihi, jamé inchin ttetonha Jesucristo ngain cain chojni que ditticaon jehe. Co cai jehe Jesucristo tti ttjenguijna ján na para rrochondaha na castigo de cain cosa jianha que nttoho na, co cain na řo dotticaon na jehe te na inchin cuerpoe jehe. ²⁴ Jańá inchin cain chojni Jesucristo ditticaon na tti ttetonha jehe, jamé cai cain nřhí chonda nřha que sitticaon nřha cain tti tsetonha xixihi nřha.

²⁵ Jaha ra řo xí ra rinao ra řhiha ra, jańá inchin Jesucristo jehe rinao chojni, hasta joanjo vidé para ixin jehe na. ²⁶ Jańá joinchehe jehe para joincheroa ansean na řo dotticaon na jehe para ixin Dios. Co jehe jointtaroa na ixin ján na joiguittexin na jinda co cai conixin palabré jehe.

²⁷ Jańá joinchehe jehe para que are ján na tsonchienne na ngattoxon con jehe, řonhi cosa jianha sehe ngain ansean na, sino que sontte na joxon chojni jian para ixin jehe que rrochondaha na ni ná mancha jianha ngain ansean na are mé. ²⁸ Jamé xí cai chonda que sinao xa nřhíchihi xa, inchin jehe xa rinao xa cuerpoe xa. Co xí que rinao nřhíchihi, jamé rinao xa cuerpoe xa cai. ²⁹ Seguro que řonhi chojni tti rinaoha cuerpoe; cain ni rinao ni cuerpoe ni ixin chjé ni cuerpoe ni tti techonxin cuerpo, co dicao ni cuidado de ixin jehe cuerpo. Co jamé nchehe Jesucristo nganji na ján na řo dotticaon na jehe, ³⁰ ixin ján na cuerpoe Jesús, co ján na de ngain cuerpoe jehe inchin de nntaohe co nntaloro. ³¹ Mexinxin ndařo ngain tti jitaxin Palabré Dios: “Xí sařhendehe xa ndodé xa co janné xa, para secas xa jeha řhihi xa, co cayoxin na sintte na inchin nacoa chojni.” ³² Co jihi ná cosa jimao que anto importante, co janha ndařhan que rrořo de ixin Jesucristo conixin cain chojni que ditticaon jehe. ³³ Pero cai rrořo que cada ra chonda que rinao ra nřhíchiha ra, inchin rinao ra cuerpoa ra. Co jaha ra řo nřhí ra chonda que rrochonda ra respeto ngain xixiha ra.

6

¹ Co jaha ra řo xannchinnchinchjan ra, chonda que sitticaon ra tti tsetonha ra ndodá ra co janná ra ixin jamé jiquinixin sinchehe chjan que ditticaon Jesucristo. ²⁻³ “Ttjiho ra respeto ngain ndodá ra co ngain janná ra para que rrochaha ra co para que sinttechon ra tsje nano ngataha nontte jhi.” Jhi tti saho mandamientoe Dios que ndařo jehe sinchenchaon cain chojni que sinchehe jamé.

⁴ Co jaha ra, řo ndodaha ra, ncheha ra feo ngain xanha ra para que jehe xan soanha xan desanimado, sino que ncheoenhe ra xan sitticaon

xan cain tti tsetonhe ra xan, co nchecoenhe ra xan quežén sitticaon xan Jesucristo, tti chonda cain joachaxin para ixin ján na.

⁵ Co jaha ra, žo ninchehe ža ra, ditticaon ra tti tsetonha ra ninajnia ra nttihí ngataha nontte, ditticaon ra na conixin respeto, co chonda ra joaxaon ngain na, co ditticaon ra na conixin ansean ra jian. Jañá inchin jaha ra rrojinchehe ra žé Jesucristo.

⁶ Are sinchehe ra žé na, doan ra purado jeoha are tatetsjehe na para sittoaxin ra jian ngain na, sino que nchehe ra ža inchin ninchehe žé Jesucristo, co nchehe ra ža jian inchin rinao Dios. ⁷ Nchehe ra ža mé conixin jian ansean ra inchin ná ža que jaha ra rrojinchehe ra ngain Jesucristo, co nahi ngain chojni. ⁸ Ixin jaha ra onoha ra que cada chojni masqui ninchehe ža de ngain iná chojni o tti chojni que jaha ninchehe ža, pero cada chojni Jesucristo tsjenguehe na hna inchin tti jian que jehe na joinchehe na.

⁹ Co jaha ra, žo najni ra, žajeho jamé nchehe ra jian ngain ninchehe žá ra, co žonhi tiempo nchežxaon ra na. žaxaon ra que jaha ra conixin jehe na žajeho chojni Jesucristo que ttjen ngajni, co para ixin jehe, jaha ra jaha icha jian ra que jehe na; para ixin jehe cain chojni žajeho na.

Tti tsetoxin chojni Dios ngain espíritu jianha

¹⁰ Co jai, hermanos, dintte ra soji ngain Jesucristo de ixin tti anto soji joachaxin que jehe chonda ixin jaha ra te ra inchin nacoa chojni conixin jehe. ¹¹ Co nchegonda ra cain joachaxin que Dios chjá ra, para que sintte ra soji are inchíni rinao sinttayaha ra. ¹² Ixin jaha tettetocoho na chojni de nttao co loro, sino que ján na tettetocoho na espíritu jianha que čhoha dicon ni. Co espíritu mé čhi ngataon čhintto, co espíritu mé tti chonda joachaxin ngain tti chojni que ditticaonha Jesucristo. ¹³ Mexinxin jaha ra dayehe ra cain joachaxin que Dios chjá ra para que nchao tsixinha ra ngain tti nchanho que tsí are anto tanguí tsonha ra, co después de sinchehe ra jamé, nchehe ra sigue de dintte ra soji ngain Dios. ¹⁴ Jamé dintte ra soji ngain Dios. Dinttečhiha ra jian conixin tti palabra ndoa que chjá ra Dios ixin palabra mé inchin cinturoen xisoldado. Co tti jian que nchehe ra, mé tti rrocayacoen cuerpoa ra are inchíni sinao sinttayaha ra inchin tti chia que dinttengá pechoe xisoldado para que didoha xa espada are tteto xa conixin espada. ¹⁵ Dintte ra listo para dindache ra chojni joajné Jesucristo inchin are xisoldado tjanga xa tteroé xa para dintte xa listo ngain guerra. ¹⁶ Co tti jaha ra ditticaon ra, mé inchin ná escudo para cayacoenxin ra cain cosa jianha que rrorroanha inchíni, inchin xisoldado cayacoenxin xa escudo cain fleché chijno que tja xicontrarioe xa. ¹⁷ Co tti vida naroaxin que chonda ra, mé inchin casco que sinttengá já ra inchin cascoe xisoldado. Co palabré Dios nchegonda ra inchin espada que Espíritu Santo chjá ra. ¹⁸ Nchecoanxinhi ra Dios para que nchao sinchehe ra cain cosa jihi; nchetsenhe ra ñao Dios co danchéhe ra cainxin tiempo conixin joachaxin Espíritu Santo. Co para que nchao sinchehe ra cain jihi, dintte ra listo co žonhi tiempo doan ra desanimado, co nchetsenhe ra ñao Dios para que jehe tsjenguijna cain chojni jehe. ¹⁹ Cai nchetsenhe ra ñao Dios para que jehe rrochjana palabra que janha rronichja are rronattjan icha chojni joajné jehe, co para que janha rrožxaonha na rronichja are sinttanoa na quehe rročo joajné Jesucristo que danjo iná vida naroaxin co joajna mé nonxinha vehe are saho. ²⁰ Dios chjana ža de rrihi representanté jehe para nichja

joajna jiji. Co mexinxin rriaxinnanxin jai ngain cárcel. Nchetsenhe ra ñao Dios para que jehe tsjenguijna para rroxaonha na janha de rroundattjan icha chojni joajna jiji inchin jiquininxin.

Pablo joexin cjin carté co rroanha joajna

²¹ Tíquico, jehe cai anto jian ditticaon Jesucristo, co tti ján na anto rinao na, co tti cain tiempo ttjenguijna na janha ngain xé Jesucristo, jehe rroundattjo ra de cain tti janha jitonna, co de cain tti janha rrinttaha.

²² Mexinxin janha rroanha jehe nganji ra para que jehe rroundattjo ra de quexén te na janha na nttihi, co jamé jaha ra rrochaha ra.

²³ Dios Ndodá na co Jesucristo, tti chonda cain joachaxin para ixin ján na, sanjo ngain chojni que ditticaon jehe tti chjoin que tsonohe ansén na, co tsjenguijna na para sinao chó na ixin ditticaon na jehe. ²⁴ Co Dios sinchenchaon ngain cain chojni que anto rinao na Jesucristo, co que xonhi tiempo ttentoxinhi na de tti jehe na rinao na Jesucristo. Amén.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Filipos

De ngain cárcel rroanxin Pablo joajna para chojni ngain Filipos

¹ Janha Pablo na co Timoteo ninchehe xé Jesucristo techjaha ra joajna ngain carta jihi; jaha ra xo ditticaon ra Jesucristo ngain ciudad de Filipos. Co carta jihi cai para ixin cain chojni que chonda joachaxin ngayaha ra co cai para cain tti chojni que ttjenguijna nichonda joachaxin ngayaha ra, que cain chojni mé conixin jaha ra chojni Dios ixin ditticaon ra Jesucristo. ² Dios Ndodá na co Jesucristo, tti chonda cain joachaxin para ixin ján na, sinchenchaon nganji ra co rrochjá ra tti chjoin que tsonhe ansean ra.

Pablo vanchetsenhe ñao Dios para ixin chojni Jesucristo

³ Cada nttiha que janha xaxanho jaha ra, janha danjo gracias ngain Dios de ixin jaha ra. ⁴ Co janha anto chahna are nttatsán ñao Dios para cainxin jaha ra ⁵ ixin cainxin jaha ra cjoenguijna ni ra para que janha nchao ndattjan icha chojni tti jian joajné Jesucristo desde are nacoexinxon ra hasta jaxon. ⁶ Dios coexinhi joinchehe tti jian ngain vidá ra, co janha chonda seguro que jehe xa sinchehe tti jian mé hasta que jaha ra sintte ra joxon jian ngain nchanho que Jesucristo tsí. ⁷ Anto jiquininxin rroxaxanho jañá de ixin cain jaha ra ixin anto rinaho jaha ra ixin Dios jointtanchaon jaha ra inchin joinchenchaon na janha para tonoa na xajeho masqui janha diaxinna o masqui janha tonchián ngain xinchíxin para nttadefendé tti jian joajné Jesucristo, co para janha ndachjan que seguro ndoa co jian joajna mé. ⁸ Dios nohe que janha anto rinaho cain jaha ra, co mé tti joixin de ngain Jesucristo. ⁹ Janha are nttacoanxian Dios, janha danchia que jaha ra icha sinoa chó ra co icha sinoa ra Dios cai. Co danchia que tsonoha ra quexehe cosa jian para ixin Dios co jaha ra tsinxin ra cainxin cosa mé inchin Dios ttinxin, ¹⁰ para que cain tiempo tsonoha ra tsinchiehe ra tti jian. Jamé nchao rrochonda ra ná vida roa co ixonhi cosa jianha sehe nganji ra are Jesucristo tsí. ¹¹ Jañá para que vidá ra sehe inchin ná jian cosecha ixin tecaon ra de cosa jian que danjo Jesucristo, jamé jaha ra sinchesayehe ra Dios de ixin vidá ra co vidá ra tsjago que jaha ra anto jian ditticaon ra Dios.

Pablo ndacho que para ixin jehe, Jesucristo mé tti vida

¹² Janha rinaho que jaha ra tsonoha ra que cain cosa que janha conna, cain cosa mé cjoenguijna na para que janha nichja tti jian joajné Jesucristo. ¹³ Mexinxin jai cainxin xisoldadoe xiemperador co cain icha chojni nohe na que janha rriaxinna por ixin ndattjan chojni joajné Jesucristo. ¹⁴ Co jai que janha rriaxinna, icha tsje chojni que ditticaon Jesús coexinhi na nichja na jehe joajné Dios co xaonha na co icha tsje confianza chonda na ngain Jesucristo, tti chonda cainxin joachaxin.

¹⁵ Ján, ndoa que canxion chojni nichja na de ixin Jesucristo pero ixin tonchjoehe na nganji janha co toñaona na, pero ittoha chojni ndoa nchehe na de jian. ¹⁶ Co tti chojni que toñaon co tonchjoehe nichja na de

ixin Jesucristo ixin rinao na sintte na icha importante co nahi ixin jehe na rinao na Jesucristo, ixin cain jehe na rinao na que janha icha tangui tsonna jai que rriaxinna. ¹⁷ Pero ittoha na tenchehe na ixin rinao na Jesucristo co rinao na na janha ixin nohe na que nttihi rrihi janha ixin rrinttadefendé tti jian joajné Jesucristo. ¹⁸ Pero janha ndosennaha de quexeho de cayoi manera mé, ixin masqui jehe na nichja na de jian o ni nahi, pero jehe na xa nichja na de ixin Jesucristo. Mexinxin janha anto chahna.

Co janha xa rrochahna icha ¹⁹ ixin janha nona que cain tti janha tsonna, jihi atto jian para ixin janha ixin jaha ra nchetsenhe ra ñao Dios para ixin janha co ixin Espíritu Santo que rroanna Jesucristo ttjenguijna na janha. ²⁰ Janha rinaho sinttaha cain cosa jian co jamé tsooanaha ngattoxon con Jesucristo. Janha rinaho rronichja conixin cainxin confianza inchin jaxon co para cainxin tiempo, para que icha chojni sicon na icha co icha que janha rrinttasayá Jesucristo, masqui janha rrichon o ndasenhe na. ²¹ Janha rinaho sarichon para sinttaha jehi inchin rinao Cristo, pero are ndasenhe na, mé tti sacha. ²² Pero si janha xa sarichon ngain cuerpo jihi, janha xa rrondattjan chojni tti jian joajné Jesucristo, tti chonda cain joachaxin. Mexinxin janha ni nonaha quexehhe tti tsinchiá. ²³ Para ixin janha atto tangui para tsinchiá cayoi cosa yá. Janha rrojinaho ndarroguenhe na para tsji sigarihi ngain Jesucristo, co jamé icha jian para ixin janha. ²⁴ Pero para ixin jaha ra icha jian para janha sarichon ngain cuerpo jihi. ²⁵ Co ixin janha rrihi seguro de cain jihi, janha nona que xa sittona nganji ra para que tsjenguijna ra para sitticaon ra icha co para que rrochaha ra icha ngain tti jaha ra ditticaon ra. ²⁶ Co ná nchanho janha rrocjan na sasotsjaha ra iná co jamé rrochonda ra icha razón para rrochaha ra de ixin Jesucristo.

²⁷ Janha rinaho que dintte ra jian ngain vidá ra inchin ttetonha joajné Jesucristo. Jamé para que si janha saso sasotsjaha ra o cjin sarihi de jaha ra, janha sayá joajna ixin cainxin ra jaha ra xa ditticaon ra Jesucristo co te ra inchin nacoa chojni, co nichja ra tti jian joajné Jesucristo, ²⁸ co ninchin dittoaxinha ra xaon ra ngain chojni que ningaonha ra. Cain jihi ná señal atto nonxin que jehe na teditján na de ixin cosa jianha que nchehe na, pero xago cai que jaha ra rrochonda ra iná vida naroaxin, co cain jihi ttixin de ngain Dios. ²⁹ De ixin Jesucristo jaha ra chonda ra oportunidad jeoha de ditticaon ra jehe, ixin cai para tangui tsonha ra de ixin jehe. ³⁰ Jaha ra conixin janha tenttoho na xajeho xa de ixin joajné Jesucristo. Jaha ra ovicon ra icha saho quexén jointtaha xa mé, co jai noha ra quexén janha xa rrinttaha xa mé.

2

Tti nchehe Jesucristo para ixin ján na

¹ Jamé Cristo chjá ra ánimo, co chonda ra consuelo ixin jehe rinao ra, co chonda ra xajeho Espíritu Santo que jehe rroanha, co ttiaconoehe ra chojni. ² Si ndoa cain jihi chonda ra, rinao chó ra co ditticaon chó ra para que cain ra sintte ra inchin nacoa chojni, co jamé janha anto rrochahna. ³ Xonhi cosa sinchehe ra para que jaha ra sintte ra icha importante, ni nchehe ra que jaha ra icha noha ra, co xaxaonha ra que jaha ra icha jian ra que icha chojni; sino que naná ra xaxaon ra que icha chojni icha jian

na que jaha ra. ⁴ Ttjeha ra tti jian jeha para ixin jaha ra; sino que ttjé ra tti jian para cain icha chojni cai.

⁵ Janha rinaho que cain jaha ra xaxaon ra inchin Jesucristo xaxaon ⁶ ixin masqui jehe cai Dios, pero joinaoha joinchegonda joachaxin que Dios chonda. ⁷ Jehe joinchegondaha joachaxin mé are jehe concjihi inchin ná xí co vehe inchin ná nchehe xa. ⁸ Co are jehe vehe ná xí, jehe vittoexin co vitticaon cain tti ndačo Dios hasta jehe ndavenhe, masqui soaxin de que jehe ndavenxin nganito cruz. ⁹ Mexinxin Dios chjé cain joachaxin co Dios ndačo que icha importante nombré Jesús que de cainxin nombre. ¹⁰ Jamé joinchehe Dios para que cain na rrochonda na respeto are tsinhi na nombré Jesús. Co sinttettoxin nttajochjihi cainxin tti te ngajni co cainxin tti te ngataha nontte co cainxin tti te ngain infierno ¹¹ para que cain yá rrondačo que ixin Jesucristo, mé tti chonda cainxin joachaxin, co jamé tosayexin Dios Ndodá na.

Cain chojni que ditticaon Jesucristo inchin ná conotse que tetongúxin are naxin xehe

¹² Mexinxin hermanos, inchin jaha ra vitticaon ni ra janha cainxin tiempo are janha joarihi nganji ra, ditticaon ra icha jai que cjin rrihi de nganji ra. Dios ondačo que jaha ra ixonhi castigo rrochonda ra ixin ditticaon ra Jesucristo. Mexinxin cain nchanho nchehe ra jian. Co chonda ra cuidado que ncheha ra cosa jianha que Dios ncheoxinha ¹³ ixin jehe Dios tti chjá ra tti jian que xaxaon ra, co ttjenguijna ra para sinchehe ra jamé inchin jehe rinao.

¹⁴ Cain yá nchehe ra, pero toñaoha ra ni ttetocoha chó ra ¹⁵ para que ni ná chojni rrondačoha que ixin jaha ra tenchehe ra cosa jianha co para que jaha ra sintte ra joxon chojni jian. Jaha ra xenhe Dios, mexinxin dintte ra jian ngayehe chojni que nchaoha nchehe. Jaha ra tongúxin ra ngayehe chojni mé inchin cain conotse ngain tti naxin xehe ¹⁶ are jaha ra tsjiohe ra na tti joajna que danjo iná vida naroaxin. Jañá, para que are tsí Jesucristo janha nchao tsonona chjoin de ixin jaha ra ixin are mé janha tsonona que tti xa que janha jointtaha jeha jamaoncoa ni coingaha jamaoncoa. ¹⁷ Co masqui janha senhe na para que cuerpona rroxettexin de tti jaha ra danjo ra ngain Dios ixin jaha ra ditticaon ra jehe, janha chahna co rinaho que cain jaha ra rrochaha ra cai. ¹⁸ Chaha jaha ra cai co chaha ra inchin janha chahna.

Tti joinchehe Timoteo co Epafrodito

¹⁹ Jesucristo, tti chonda joachaxin para ixin ján na, si jehe sinoa que janha rrorroanha Timoteo, janha rrorroanha jehe toin para siji sitsjaha ra co are jehe rrocjan, janha rrochahna are janha tsonona de ixin jaha ra. ²⁰ Ixin nttihi ixonhi iná chojni que chonda janha que rroxaxaon inchin janha, co xonhi iná chojni xaxaon de ixin quexén sintte ra jian. ²¹ Cain chojni nttihi icha rinao na jeha xé na nchehe na co nahi xé Jesucristo. ²² Pero jaha ra onoha ra que Timoteo jehe anto jian co cjoenguijna na janha para nichja na joajné Jesucristo inchin ná chjan que ttjenguijna xan ndodé xan. ²³ Mexinxin, janha rinaho rrorroanha Timoteo para siji sitsjaha ra are janha tsonona quehe xaxaon chojni sinchehe nganji na nttihi tti rrihi. ²⁴ Co cai janha chonda confianza que Jesucristo, tti chonda cainxin joachaxin para ixin ján na, sanjo joachaxin para que janha mismo sasotsjaha ra.

²⁵ Pero cai xaxanho que rrogonda rrorroanha ra Epafrodito, tti xicompañerona de ngain xa que janha rrinttaha, tti jaha ra rroanna ra para cjoenguijna na ixin jehe vachjana tti janha vagondana. ²⁶ Jehe anto rinao sicon cain jaha ra co anto jita joachjaon ixin jaha ra conoha ra que ixin jehe conihi. ²⁷ Ján, ndoa que jehe venihi hasta merocoa ndarroguenhe, pero Dios coiaconoehe jehe, co jeoha jehe coiaconoehe Dios, cai janha, para que janha icoaha icha joachjaon, jehó joachjaon que tti janha chonda jaxon. ²⁸ Mexinxin janha anto rinaho rrorroanha jehe Epafrodito nganji ra para que jaha ra anto rrochaha ra are sicon ra iná, co para que janha isarichinha icha. ²⁹ Dayehe ra jehe Epafrodito chjoin ngain ansean ra inchin xanchó ra ixin jehe co jaha ra ditticaon ra Jesucristo, tti chonda cainxin joachaxin. Co cainxin nchanho chjehe ra respeto cain chojni que nchehe inchin jehe Epafrodito, ³⁰ ixin merocoa ndarroguenhe por ixin jehe joinchehe xé Jesucristo. Jehe coín en peligro vidé are jehe cjoenguijna na janha ixin jaha ra mismo choha cjoenguijna ni ra.

3

Pablo nichja de ixin vida que ján jian jí

¹ Co jai janha rinaho que rrochaha ra ngain Jesucristo, tti chonda cain joachaxin. Para ixin janha, xonhi molestia si rrocjan na rrondattjo ra iná tti ocjin na ixin nona que sonda para ixin jaha ra. ² Mexinxin janha rrindattjo ra iná que ttjiho ra cuidado de cain chojni que nchehe jianha inchin tti conia ditsi; cain chojni mé ta xóhe de circuncisión ngain cuerpoe para ndačo que ixin jehe mero chojni Dios. ³ Pero ján na tti chojni que ndoa techonda na xóhe ngain ansean na ixin ján na tti nttosayehe na Dios ngain ansean na co chá na ixin ján na chojni Jesucristo na, co chondaha na confianza ngain costumbré chojni. ⁴ Si costumbré chojni rrocojian ngattoxon con Dios, janha cai rrochonda confianza ngain cain costumbre mé. Co xonhi chojni rrochonda icha razón que janha para rrochonda confianza ngain costumbre mé. ⁵ Janha coá xóhe de circuncisión are janha joarichonda jni nchanho de concjina, co janha razé chojni Israel, co janha de ngain grupoe Benjamín, co janha chojni hebreo na de are concjina ixin jannana co ndodana cayoi na chojni hebreo na. Janha vaguitticanho ley de chojni judío inchin tjago xifariseo. ⁶ Co janha anto joinao que cainxin chojni rrojinchehe na inchin costumbré chojni judío, mexinxin feo vanttaha ngain chojni que vitticaon Jesús. Co ngain vidana que janha joarichonda xonhi chojni vanichja ixin janha vaguitticaonha ley mé. ⁷ Pero cain cosa jiji, are saho para ixin janha anto jian, pero jai ndačhjan que cain cosa mé xonhi xé ixin jai janha joatsoan tti mero ndoa que ttetonha Jesucristo. ⁸ Co icha que yá, janha ndačhjan que cain cosa mé xonhi rentte ixin icha rentte joatsoan palabré Jesucristo, tti chonda joachaxin para ixin janha. De ixin Jesucristo janha jointtatján cainxin mé co ndačhjan que cain cosa mé inchin caxineno ixin icha rentte que janha cjan na chojni Jesucristo ⁹ co rrihi conixin jehe. Icha saho janha vařaxanho ixin jian na ixin vaguitticanho ley de chojni judío. Pero jai nona que jehó Dios nchao ndačo si janha jian na o ani nahi, co jehe ndoa ndačo ixin jian na pero jehó ixin ditticanho ngain Jesucristo. ¹⁰ Joxon rinaho rrochonxin icha co icha de ixin Jesucristo co tsonona tti joachaxin que xechonxin are

ndavenhe, co tsonona tti tangui que jehe conohe co tsonna inchin jehe conhe are ndavenhe, ¹¹ para que janha nchao rrochonda confianza que ján rroxechon na conixin niondadenhe.

Pablo ndačo tti jiquininxin sinchehe ni para rrochonda ni iná vida naroaxin

¹² Jeha rročo que ixin janha ojoacha cain yá, ni jeha rročo que ixin janha ojian na, nahi, rročoha jamé ixin janha xa sinttaha sigue icha ixin rinaho sarihi inchin Jesucristo rinao. ¹³ Janha mismo rrindattjo jaha ra que janha xa chondaha cain jihi, tti janha rrinttaha que janha rrotjañana cain cosa que ojointtaha, co jai janha sinttaha lucha para sacha tti jichonhe para ixin janha ¹⁴ para que janha tsjena xana co sacha tti premio que Dios que ttjen ngajni danjo nganji ján na ixin dotticaon na Jesucristo.

¹⁵ Janha rinaho que cainxin ra, xo anto jian ttinxin ra tti dotticaon na, xaxaon ra xajeho inchin janha xaxanho. Pero si ná cosa rroxaxaon ra ojé, Dios tsjagoha ra tti ndoa. ¹⁶ Pero chonda na que rroxaxaon na co sonttoho na inchin tti ocoangui na.

¹⁷ Rinaho janha que nchehe ra inchin janha rrinttaha, co cai nchehe ra caso tti chojni que tenchehe inchin janha na jointtacoanha ra. ¹⁸ Janha ondattjo ra tsje ntthi, co xa cjan na rrindattjo ra iná hasta conixin ndacon que jai xa jí tsje chojni que nchehe jianha ixin jehe na ndosenha na que Cristo ndavenxin nganito cruz para ixin jehe na. ¹⁹ Pero ngain nchanho que tsí, cain chojni mé tsji na ngain infierno para cainxin tiempo ixin dios de jehe na jeha tti rinao cuerpoe na, co tti jehe na tenchehe na tonhe na anto chjoin co xaxaonha na tosoé na ixin tti jehe na tenchehe na jeha joasoaxin para ixin jehe na. Jehe na jeha xaxaon na ngain cosa de ngataha nontte. ²⁰ Pero ján na ngajni jí nontteha na co techonhe na que de ntthi tsixin Jesucristo, tti chonda joachaxin para ixin ján na, co jehe tti tsjenguijna na para rrochondaha na castigo de cain tti jianha que jointtoho na. ²¹ Jehe tsentoxinhi cuerpoa na tehe, tti cuerpo que ndadenhe, para sayé na cuerpo inchin cuerpo que jehe chonda ngajni. Co jehe sinchehe mé conixin joachaxin que jehe chonda para tetonhe cainxin cosa.

4

Cainxin tiempo chaha ra ngain Jesucristo

¹ Janha anto rinaho sicon jaha ra. Co janha anto chahna de ixin jaha ra co jaha ra inchin tti sacha janha de ixin xa que rrinttaha janha. Co rinaho que jaha ra cainxin tiempo jian sitticaon ra Jesús, tti chonda joachaxin para ixin ján na.

² Janha nttatsán ñao cayoi nchí que dinhi Evodia co Síntique que sitticaon chó ncha inchin rrocji chó ncha ixin cayoi ncha ditticaon ncha Jesús, tti chonda joachaxin para ixin ján na. ³ Co jaha, tti xicompañerona que anto vitticaon na de ngain xa que janha rrinttaha, janha rinaho que jaha tsjenguijna cayoi nchí mé ixin jehe ncha cjoenguijna na ncha janha para ndattjan chojni tti jian joajné Jesucristo, cayoi nchí mé conixin Clemente cai co icanxin chojni que cjoenguijna na janha. Nombé cain chojni mé otetaxin ngain libroe Dios tti tetaxin nombé cain chojni que rochonda iná vida naroaxin.

⁴ Cainxin tiempo Jesucristo jí ngain ansean ra, mexinxin janha rinaho que cainxin tiempo chaha ra ngain jehe. Rrocjan na rrondattjo ra iná: ¡Chaha ra cainxin tiempo ngain jehe tti chonda joachaxin para ixin ján na! ⁵ Janha rinaho que cain chojni rrochonxin jaha ra ixin nda ansean ra para cain chojni ixin Jesucristo, tti chonda joachaxin para ixin ján na, otoiñ tsí.

⁶ Taha ra joachjaon de ni ná cosa; cainxin tiempo ndache ra Dios cainxin tti tsonohe ansean ra, co danchiehe ra cain tti sondaha ra, pero danjo ra gracias ngain jehe. ⁷ Cottimeja jehe Dios rrochjá ra tti anto čhjoin tsonohe ansean ra que ni cain chojni čhoha tsinxin ixin mé anto tsje co anto jian. Co si jaha ra chonda ra tti čhjoin que tonohé ansean ra, xonhi joachjaon rrochonda ansean ra ixin ditticaon ra Jesucristo.

ǰaxaon ra ngain cosa jian

⁸ Co jai saho que janha tsjena carta jihi, rinaho rrondattjo ra icha. Ttenchjinha ra ngain joarrixaoan ra cain cosa ndoa, co cain cosa que jiquininxin respeto, conixin cainxin cosa que chonda jian joarrixaoan, cain cosa que joxon jian, cain cosa que sincheǰoxinhi ansén chojni jian, co cain cosa que chojni nichja jian de ixin cosa mé. Jaha ra ǰaxaon ra cainxin cosa que jian co que jiquininxin tsosayehe.

⁹ Nchehe ra tti janha jointtacoanha ra. Tangui ra tti coinhi ra que ndačhjan janha co tti vicon ra jointtaha. Nchehe jaha ra cain yá co Dios, tti čhjé tti čhjoin ngain ansén chojni, sehe nganji ra.

Tti joanjo chojni filipense ngain Pablo

¹⁰ Janha anto chahna ngain Jesucristo, tti chonda joachaxin para ixin ján na, ixin jaha ra ocjan ra ǰaxaon ni ra janha. Janha ndačhjanha ixin ndatjañaha ni ra jehó ixin joichondaha ra oportunidad para cjoenguijna ni ra. ¹¹ Pero jeha ndačhjan ixin janha anto gondana ixin janha onona chahna si janha chonda tsje o tsjeha. ¹² Janha nona queǰén vidé ni are noa ni, co nona queǰén vidé ni are anto chonda ni. Janha tonona čhjoin ngain ansenna de ngain quexeho cosa mé; janha tonona čhjoin ngain ansenna si tsehe jicaon o jidenhe jintta, co cai are xehe cosa, co cai are naǰoinxon chonda. ¹³ Janha nchao tsixinna ngain cain cosa ixin Jesucristo nchesoji na janha. ¹⁴ Masqui jamé, jaha ra joinchehe ra jian ixin cjoenguijna ni ra janha de ngain cain cosa tangui que dattoa.

¹⁵ Jaha ra ǰo Filipino ra noha ra cai are janha sacjoixin de ngain regioen Macedonia co coexian ndattjan chojni tti jian joajna, jehó jaha ra ngain nihngo nttiha Filipos cjoenguijna ni ra janha ixin rroanna ni ra tti janha gondana. Jaha ra joinchehe ra jamé ixin chaha ra ixin janha tti jointtacoanha ra queǰén sitticaon ra Jesús. ¹⁶ Are janha ǰa joarihi ngain Tesalónica, jaha ra rroanna ni ra tomi icha que ná nttiha para que vagondana. ¹⁷ Pero janha ǰaxaonha jehó ngain tti janha dayá ixin icha rinaho que jaha ra rrochonda ra icha premio ngain Dios. ¹⁸ Janha ovayá cainxin hasta ovayá icha de tti dondana. Conixin tti jaha ra rroanna ni ra ngain Epafrodito janha chonda tsje. Tti tomi que jaha ra rroanna ni ra, mé inchin tti tsjoca que anto čhjoin ǰajni que jaha ra danjo ra ngain Dios que jehe ncheǰoxinhi. ¹⁹ Dios que ttjen ngajni chonda cain cosa jian co rrochjá ra cain tti rrogondaha ra ixin jaha ra ditticaon ra Jesucristo. ²⁰ Co Dios Ndo dá na que ttjen ngajni, ¡nchechoanxinhi ra Ndo cainxin tiempo! Amén.

Pablo joexin cjin carté co rroanha joajna

²¹ De ixin nombré Jesucristo chjehe ra joajnana cainxin chojni que ditticaon Dios. Chojni que ditticaon Dios que te nganji na nntihi rroanha na joajna para ixin jaha ra. ²² Cainxin chojni que te nntihi co ditticaon na Dios, co icha mero ninchehe xé xiemperador romano rroanha ra na joajna. ²³ Jesucristo, tti chonda joachaxin para ixin ján na, sinchenciaon cainxin jaha ra. Amén.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Colosas

Pablo rroanha joajna jihi ngain chojni de ciudad de Colosas

¹ Janha Pablo na, Dios joinao que janha rrihi ná representanté Jesucristo. Conixin Timoteo, ² janha cjin na carta jihi para nganji jaha ra xo jian ditticaon ra Jesucristo ngain ciudad de Colosas, xo tequininxin ra ngain Dios. Dios, Ndodá na, co Jesucristo, tti chonda cain joachaxin para ixin ján na, sinchençaon nganji ra, co rrochjá ra tti chjoin que tsonohe ansean ra.

Pablo nchetsenhe ñao Dios para ixin cain chojni que ditticaon Jesucristo

³ Are janha na danjo na gracias por ixin jaha ra ngain Dios, Ndodé Jesucristo, cai nttatsán na ñao jehe por ixin jaha ra. ⁴ Ixin janha na ndachjenji na na que ixin jaha ra ndoa jian ditticaon ra Jesucristo, co ixin anto rinao ra cain chojni Dios. ⁵ Jamé nchehe ra ixin jaha ra chonda ra seguro que Dios jittenchjinha iná vida naroaxin para ixin jaha ra nttiha ngajni. Jaha ra coexinhi ra joichonda ra seguro de ixin mé are coinhi ra tti joajna ndoa, que mé tti jian joajné Jesucristo. ⁶ Jehe joajna jihi, tti coinhi ra, co jai chojni nichja na joajna jihi ngoixin mundo, co cain lugar tsje chojni ditticaon na joajna jihi xajeho inchin are jaha ra vitticaon ra desde ngain tiempo que jaha ra coinhi ra que ixin Dios anto rinao chojni co conoha ra que jihi ndoa. ⁷ Cain jihi tti jointtacoanha ra Epafras, tti hermano que ján na anto rinao na, co joinchehe xa conixin janha na. Co jehe mé ná jian ninchehe xé Jesucristo para tsjenguijra ra. ⁸ Co jehe mé tti jointdachjenji na que ixin jaha ra jian ditticaon ra Jesucristo, co ixin anto rinao chó ra.

⁹ Mexinxin janha na, desde ngain nchanho que conona na cain jihi, ttinttoaha na de nttatsán na ñao Dios para ixin jaha ra, co danchia na Dios que jehe sinttagatsoan ra jian tti jehe rinao, co sinttaquianxin ra cain cosa jian de ixin Espíritu Santo. ¹⁰ Jañá para que jaha ra nchao sinchehe ra inchin jiquininxin nchehe chojni Jesucristo. Rrocho que cain tiempo sinchehe ra tti rinao Jesús, co inchin jaha ra sanjo ra ná jian cosecha ngain Jesucristo de cain cosa que jaha ra sinchehe ra. Co cai jaha ra sinchehe ra sigue rrochonxin ra icha co icha de ixin Dios. ¹¹ Co janha na danchia na que Dios sinttasoji ra conixin tti anto joachaxin que jehe chonda para que nchao tsixinha ra conixin paciencia ngain cainxin cosa tanguí co masqui tanguí jí, jaha ra rroché ansean ra ixin tsixinha ra ngain cain mé. ¹² Co jaha ra danjo ra gracias ngain Dios ixin jehe tti jointtajian na para sayé na parte ngain tti rroché chojni jehe que chji ngain joadingasán, rrocho tti chojni que chonxin jian de ixin jehe. ¹³ Dios vinttjianxin na de ngain joachaxin tti naxin xehe, rrocho que vinttjianxin na de ngain tti jianha, co jehe chjá na jai parte ngain tti ttonha Xenhe que jehe anto rinao. ¹⁴ Co Xenhe ndavenhe Xan de nganito cruz, jamé para cjoenga Xan hna cainxin tti jianha que jointtoho na, co jamé Dios jointtatjañá na cain tti jianha mé.

Ján na anto chjoin tona na ngattoxon con Dios ixin ovenhe Jesucristo para ixin ján na

¹⁵ Jehe ni čhoha dicon ni Dios, pero jehe goan ná xí co joí ngataha nontte para que chojni nchao vatsoan na jehe Dios. Co jehe mé joiconhe are concjihi Cristo, tti Xenhe Dios, co jehe Cristo ovehe icha saho de que cain cosa que jí rroconchjian. ¹⁶ Co de ixin jehe Cristo, Dios joinchechjian cain cosa que jí ngajni co nttihi ngataha nontte. Cosa que čhoha dicon ni conixin cosa que nchao dicon ni, Dios joinchechjian cain por ixin Cristo. Cai de ixin Cristo Dios joinchechjian cain tti ángel que ttetonha nttiha ngajni. Cain mé conchjian de ixin jehe co para ixin jehe. ¹⁷ Cristo ovehe icha saho que cainxin cosa, co jehe tti jinda cain cosa jihi para jian sintte cain cosa. ¹⁸ Co cai Cristo inchin já cain chojni que ditticaon jehe, co cain chojni mé inchin cuerpoe jehe. Co jehe tti danjo vida ngain cuerpo jihi. Jehe tti saho xechon de ngain tti ndavenhe, co mexinxin jehe tti icha importante de cain chojni. ¹⁹ Co Dios joinao que cain joachaxin que jehe chonda sehe ngain Cristo cai para que Cristo nchao tsetonhe cain cosa. ²⁰ Co cai joinao Dios que de ixin Cristo, Dios ncheroa cain cosa que jí ngataha nontte, co cain cosa que jí ngajni. Co jihi joinchehe are Cristo ndavenxin nganito cruz para ixin ján na.

²¹ Are saho jaha ra vechonxinha ra de ixin Dios, co vintte ra inchin niningaconhe Dios ixin vařaxaon ra co vanchehe ra tsje cosa jianha ngattoxon con jehe. Pero jai Dios jointtaroa para que nchao tsonchienne ra ngain jehe. ²² Mexinxin Dios rroanha Jesucristo para ndavenhe de ngain cuerpoe que jehe vechonda are jehe vacji nttihi ngataha nontte. Jamé joinchehe Dios para que jaha ra nchao tsonchienne ra ngattoxon con jehe inchin chojni que jiquininxin para ixin jehe, que řonhi mancha ni cosa jianha chonda ra ngain ansean ra. ²³ Pero para que sintte ra jamé jaha ra chonda ra que sintte ra inchin ná nttá que jingattjen soji ixin nihnga jixává noehe nnta, rročo ixin chonda ra que sinchehe ra sigue de jian sitticaon ra, co sinchehe ra sigue de sitticaon ra que ixin Dios seguro rochjá ra iná vida naroaxin inchin ndačo tti jian joajna que jaha ra coinhi ra. Co joajna jihi tti jinichja chojni cainxin parte de mundo, co janha Pablo na ttjenguijna chojni para dindačhjan na joajna jihi.

Pablo ná ninchehe xé Dios para ttjenguijna chojni que ditticaon Jesucristo

²⁴ Co jai janha chahna de ngain tti tangui que tonna por ixin jaha ra, ixin mé rročo ixin rroxette de ngain cuerpona tti řa ditján de cain tti tangui inchin conhe Cristo para cjoenguijna na cain ján na, řo inchin cuerpoe jehe Cristo. ²⁵ Janha ttjenguijna cain chojni que ditticaon Cristo. Dios chjana řa jihi para que janha ttjenguijna jaha ra ixin řa mé řa de sindattjo ra ngoixin tti jian joajné jehe. ²⁶ Co joajna jihi, mé tti Dios vechonda jima sé tiempo are icha saho. Pero jai Dios cjoago joajna jihi ngain chojni jehe. ²⁷ Dios joinao joinchenohe chojni tti anto rentte co jian palabra que chonda jehe joajna que vema jihi. Co mé para ixin chojni inchin jaha ra que jeha judío ra. Co tti vema jihi, rročo que Cristo jí nganji jaha ra co de ixin jehe, jaha ra seguro rrochonda ra gloria que jehe ndačo.

²⁸ Mexinxin janha na ndattjan na cain chojni de ixin Cristo. Janha na chjé na consejo cain chojni de ixin Jesucristo, co nttacoán na cain na de ixin jehe para que cainxin na tsinxin na jian de ixin jehe co para que

rrochonxin na tsje de ixin Cristo. ²⁹ Mexinxin janha rrinttaha xa jiji conixin cainxin fuerza co cain joachaxin que chjana Cristo.

2

¹ Janha rinaho que jaha ra tsonoha ra que janha anto tsje nttiha nttatsán ñao Dios que jehe tsančhjandaha ra ngain tti jianha. Co cai nttatsán ñao Dios para cain nite ngain Laodicea co cai para ixin cainxin chojni que janha xa xonhi tiempo joitsjá. ² Janha danchiá Dios que cainxin ra soan ra animado ngain ansean ra, co ixin cain ra sinao chó ra, co anto rrochonda ra confianza ngain Dios ixin tsinxin ra icha jian. Jamé para que jaha ra jian satsoan ra Cristo, tti are saho vehe jimao, pero jai Dios tjago ngain cain chojni. ³ Co de ixin Cristo ján na nchao tsinxin na co tsonoa na cain cosa de ixin Dios. Co mé tti anto rentte que jí ngain Jesucristo. ⁴ Cain jiji rrindattjo ra jaha ra para que xonhi chojni sinttayaha ra conixin palabra čhjoin que ndoaha. ⁵ Masqui janha coha na nganji ra, pero janha anto rriřaxanho de ixin jaha ra, co anto chahna ixin nona que anto čhjoin ditticaon chó ra, co ixin anto jian ditticaon ra Jesucristo.

⁶ Mexinxin jañá inchin jaha ra icha saho coexinhi ra vitticaon ra Cristo, tti chonda cain joachaxin; jañá cai cain ra chonda ra que sinchehe ra sigue sinchehe ra inchin jehe rinao. ⁷ Jamé ditticaon ra jian ngain Cristo inchin ná nttá que nihnga jixává noehe nnta co soji jingattjen nnta. Co inchin cocoanha ra, cainxin tiempo danjo ra gracias ngain Dios.

Tti vida naroaxin de ngain Cristo

⁸ Tjiho ra cuidado, co dittoaxinha ra nchehe ra inchin sinao tti chojni que rinao sinttayaha ra para sinchehe ra inchin jehe na texaxaon na que mé jeha ndoa. Chojni mé chondaha na confianza ngain Cristo; jeha chonda na confianza ngain costumbré chojni nttihi ngataha nontte, co ngain tti xaxaon cain chojni de ixin cain cosa que jí nttihi.

⁹ Cain tti ndoa co cain joachaxin que chonda Dios, cain mé jí cai ngain cuerpoe Cristo. ¹⁰ Co cain mé jí nganji ra jaha ra cai ixin jaha ra conixin Cristo te ra inchin nacoa chojni. Co jehe tti ttetonhe cain espíritu que ttetonha nttiha ngajni co nttihi ngataha nontte. ¹¹ Cai ixin jaha ra te ra ngain Cristo, rročo que Cristo ochjá ra tti xohe que dinhi circuncisión, pero mé jeha xohe de ngain cuerpoe ra inchin chonda nijudío. Xohe que jaha ra chonda ra, mé de ngain ansean ra ixin Cristo tti cjoenguijna ra para que tti rinao cuerpoe ra ixonhi joachaxin chonda nganji ra. Jiji rročo tti xohe que ttixin de ngain Cristo. ¹² Are jaha ra joiguitte ra de ngain jinda, mé rročo que jaha ra xává ra conixin Jesucristo, co jamé cai xechon ra conixin jehe ixin vitticaon ra ngain joachaxin Dios que joinchexechon Jesucristo. ¹³ Are icha saho jaha ra espiritua ra inchin ondavenhe de ixin cain tti jianha que vanchehe ra co ixin chondaha ra tti xohe que dinhi circuncisión ngain cuerpoe ra. Pero jai Dios ojointsatjañaha ra cain tti jianha que vanchehe ra co ochjá ra vida naroaxin ngain Jesucristo. ¹⁴ Ley que vehe are saho ndačo ixin ján na tequininxin na tsji na infierno ixin jointtoha na inchin jitaxin ley mé. Pero cain tti teca na are mé Dios joinchetjañehe are Cristo ndavenhe nganito cruz. ¹⁵ Jesucristo are jehe ndavenxin nganito cruz, jehe joacha ngain inchínji co cain icha espíritu jianha que vechonda joachaxin.

Cottimeja jehe savicao cain espirítue xijianha inchin tti deaxinhi para cjoago ngain cain chojni co ngain cain ángel de Dios ixin jehe joacha.

Ttjé ra tti chjoin que ttixin de nganji

¹⁶ Mexinxin xonhi chojni chonda derecho de rronichja feo de ixin jaha ra de ixin tti jintte ra o de ixin tti dihi ra, o si nchesayeha ra quiai de chojni judío, masqui quiai que ttí cada nano, o que ttí cada conittjao, o tti nchanho que nchejogaha chojni cada semana. Icha saho que jói Cristo, chojni judío vitonhe de joinchehe cain mé. ¹⁷ Pero cain jihi jehó inchin ná sanho de tti ndoa que joija, co tti mero ndoa, mé Cristo. ¹⁸ Mexinxin jaha ra dittoaxinha ra que santsjaha ra na tti premio que jaha ra ochonda ra. Rrocho que ditticaonha ra chojni que nchehe na inchin chojni humilde co nchesayehe na ángel. Jehe na ndacho na ixin vicon na cosa que ni ndoaha vicon na, co dintteconohe na anto orgulloso de ixin tti jehó na xaxaon na. ¹⁹ Chojni mé iteha na ngain Jesucristo, tti ttetonha ngain cain chojni que ditticaon jehe, co cain niditticaon mé ni inchin cuerpoe jehe, co jehe nchegangui cuerpo mé, co nchesoji cuerpo, co jehe tti jittinhi cuerpo mé cain parte inchin rinao Dios.

²⁰ Ixin jaha ra ditticaon ra Jesucristo, mé rrocho que jaha ra ndavenhe ra conixin jehe, rrocho que jaha ra isincheha ra cain tti xaxaon chojni nntihi ngataha nontte. Mexinxin, ¿quedonda jaha ra xa nchehe ra inchin nchehe cain chojni co xa ditticaon ra cain costumbré na? ²¹ Inchin ná ejemplo, jehe na ndacho na: “Catteha ra cosa jihi, ni jintteha ra cosa jiha, ni tseha ra cosa yá ngá rá ra.” ²² Cain costumbre jihi jehó para ngain cosa que atto dada ndattjexin, co cain costumbre jihi jehó tti ttetonha chojni, co tti jehe na tjago na. ²³ Ján ndoa que cainxin costumbre mé chojni tonhe na que anto importante ixin costumbre mé ttetonha ngain na ixin jañá jiquininxin sinchesayehe ni Dios ixin ni sintteha ni orgulloso co ixin sinchecastigá ni cuerpoe ni, pero cain mé ttjenguijnaha ni para sacha ni ngain tti jianha que rinao cuerpoe ni.

3

¹ Jai jaha ra oxechon ra conixin Cristo, mexinxin xaxaon ra cosa que ttixin de ngajni tti ttjen Cristo lado jian de Dios. ² xaxaon ra cosa de ngajni; xaxaonha ra cosa jianha de nntihi ngataha nontte. ³ Jai jaha ra ncheha ra inchin vanchehe ra are saho, co mé rrocho ixin ndavenhe ra conixin Cristo co jai Cristo jittenchjianha ra vidá ra ngain Dios. ⁴ Jehe Cristo mismo mé chjá na jai tti vida jian que chonda na, co are jehe rrocjan tsí iná, cottimeja jaha ra tsononxin ra conixin jehe co rrochonda ra parte ngain tti ttetonha jehe.

Tti vida que vechonda na icha saho co tti vida naroaxin que chonda na jai

⁵ Mexinxin jaha ra nchetján ra cain cosa jianha que jí nganji ra, rrocho cosa jianha de ngataha nontte jihi: rrocho que xonhi ra tsontaonxin ra iná nchí que jeha chiha ra, ni ncheha ra cosa jianha, ni ncheha ra inchin rinao cuerpoa ra co inchin tti jianha que jaha ra xaxaon ra, co ni dintteha ra ambicioso ixin chojni ambicioso xajehó inchin tti nchesayehe ídolo. ⁶ Ixin chojni que tenchehe na cain cosa jihi rrochonda tti anto soji castigoe Dios ixin chojni mé tti ncheha inchin ttetonha Dios. ⁷ Co jaha ra cai vanchehe ra cain jihi are icha saho. ⁸ Pero jai ttinttohe ra de toñaöhe chó ra, de ttetocoho chó ra, de nchehe ra cosa jianha, de ttjehe ra chijni

iná chojni, co de nichja ra palabra feo. ⁹ Nchechjienha chó ra mentira ná ra co iná ra, ixin jaha ra ojoinchexantte ra vidá ra que joichonda ra are saho de ngain cain cosa jianha que vanchehe ra. ¹⁰ Co jai chonda ra iná vida naroaxin, co Dios jinttajian ra icha co icha para que jaha ra sintte ra inchin jehe rinao co para que jaha ra rrochonxin ra jian cainxin de ixin jehe. ¹¹ Para ixin Dios, ijeha importante si ján na judío na o ni nahi, ni si chonda na tti xohe que dinhi circuncisión o ni nahi, ni si ján na joixin na de ngain ojé nontte o ni nahi, ni si chonxin na xón o ni nahi, o ni si esclavo na o ni nahi; para ixin Dios jaha importante cain mé, sino que Cristo jehó mé tti importante, co jehe tti jí ngain cainxin chojni jehe.

¹² Dios anto rinao jaha ra co jehe ocoinchiaha ra para que sintte ra chojni jehe. Mexinxin jaha ra dintte ra jian; rrocho ttiacoñohe chó ra, co ditticaon chó ra, co tonoaha ra ixin jaha ra anto importante ra, co dintte ra amable, co chonda ra paciencia. ¹³ Chondehe chó ra paciencia ná ra co iná ra, co nchetjañehe chó ra naná ra are chonda ra problema. Jañá inchin Cristo jointtatjañaha ra, jañá nchehe ra jaha ra cai. ¹⁴ Pero tti icha importante de cainxin cosa yá, que jaha ra anto sinao chó ra, ixin jamé rroxettjixin cain tti jian que nchehe ra co sintte ra inchin nacoa chojni. ¹⁵ Co dittoaxin ra que tti chjoin que Dios tñin ngain ansean ra, que mé tsetonha ra. Ixin mé tti coetonha Dios jiquininxin sinchehe ra jaha ra xo inchin nacoa cuerpo para ixin jehe. Co danjo ra gracia ngain ixin cain mé.

¹⁶ Que joajné Jesucristo rrocaon de ngain ansean ra. Co ncheconhe chó ra joajna jiji co ncheanimá chó ra ná ra co iná ra conixin jian joarrixaon. Co tsje ra canxin Salmo, co himno, co coro; jamé danjo ra gracias ngain Dios de ngain ansean ra. ¹⁷ Quexeho cosa que sinchehe ra o rrondaño ra, pero nchehe ra conixin nombré Jesucristo, tti chonda cain joachaxin, co are mé danjo ra gracias de ixin jehe ngain Dios Ndodá na, ixin Cristo cjoengujna na.

Quexén jiquininxin sintte cain chojni que oditticaon Jesucristo

¹⁸ Jaha ra xo nchi ra que otecoho ra xixiha ra chonda ra que sitticaon ra tti tsetonha ra xixiha ra ixin jiji tti jiquininxin sinchehe jaha ra xo oditticaon ra Cristo. ¹⁹ Co jaha ra xo xí ra, que otecoho ra nchihiha ra, rinao ra ncha co xonhi tiempo ttetocoho ra ncha. ²⁰ Co jaha ra xo xannchinnchinchjan ra ditticaon ra ndodá ra co janná ra cain tti tsetonha ra na ixin jiji tti ncheoxinhi Jesucristo. ²¹ Co jaha ra xo ondodaha ra de ngain chjan, ncheñaoha ra xanha ra para que jehe xan soanha xan desanimado. ²² Co jaha ra xo nchehe ra xa ngain ninajni, ditticaon ra nchehe ra cain tti tsetonha ra ninajnia ra nttihi ngataha nontte, co jeoha are jehe na tatetsjehe na nganji ra para que jaha ra sittoaxin ra jian ngain na, sino que jaha ra cain tiempo nchehe ra jian ngain xé na ixin jaha ra xagonhe ra Dios. ²³ Quexeho cosa que jaha ra sinchehe ra, pero que nchehe ra conixin jian ansean ra inchin rrojinchehe ra xé Cristo co nahi xé chojni. ²⁴ Jaha ra onoha ra que Jesucristo rrochjá ra inchin ná premio tti vida naroaxin que sayehe ra, ixin jaha ra tenchehe ra xé Cristo ixin jehe tti mero xinajnia ra. ²⁵ Pero xo sinchehe ra jianha, jamé rroxengaha ra hna de tti jianha que jaha ra sinchehe ra; co para ixin Dios xonhi chojni icha jian o icha rentte que iná; cain na xajeho na.

4

¹ Co jaha ra x̄o najni ra chonda ra que sintte ra jian co nchehe ra inchin jiquininxin ngain nichehe x̄á ra. x̄axaon ra que cai jaha ra chonda ra ná Xinajni que ttjen ngajni.

² Nchehe ra sigue nchecoanxinhi ra Dios co danjo ra gracias, pero x̄axaon ra jian quehe rronichja ra. ³ Nchetsenhe ra ñao Dios cai por ixin janha na para que jehe rrochjana na jian oportunidad de rronichja na joajné jehe, co de rrondattjan na icha chojni tti conhe Jesucristo para cjoenga hna cain tti janha que jointtoho na, que mé inchin ná cosa jima para ixin jehe na. Co jai janha rriaxinna ixin ndattjan chojni cain jihi. ⁴ Nchetsenhe ra ñao Dios para que janha jian sinttaquianxin chojni de ixin jihi inchin jiquininxin sinttaha.

⁵ Dintte ra chojni jian para ngain tti chojni que ditticaonha Jesucristo co nchegonda ra cain oportunidad para ndache ra na de ixin Jesucristo. ⁶ Are rronichja ra ngain chojni mé chonda que cain tiempo rronichja ra jian para que jehe na sinchex̄oxinhi na co chonda ra que tsonoha ra quehe rrondache ra cada chojni que sanchianguiha ra de ixin Jesucristo.

Nttihi joexinxin carté Pablo

⁷ Tíquico, que mé hermanoa na que anto rinao na, jehe mé cain tiempo anto ttjenguijna icha chojni que ditticaon Jesucristo, co cai ttjenguijna na janha cai de tenttaha na x̄é Jesucristo. Jehe Tíquico tti rrondatto ra cain tti jitonna janha, co cain tti rrinttaha. ⁸ Mexinxin janha rrorroanja jehe Tíquico nganji ra para rrondattjo ra quex̄én te na janha na nttihi co para que sinttanímá ra de ngain Jesucristo. ⁹ Jehe Tíquico sijicaho Onésimo que jehe Onésimo cai ná hermano que anto rinao na co tti anto ditticaon Jesucristo. Co jehe Onésimo mé joixin de ngain rajná ra. Cayoi jehe chojni jihi tti rrondattjo ra cain tti jitonhe nttihi.

¹⁰ Aristarco, xicompañerona nttihi ngain cárcel rroanha xa joajna nganji ra cai, co cai Marcos, xiprimoe Bernabé rroanha xa joajna nganji ra. Jaha ra onoha ra de ixin jehe Marcos, co si jehe siji sitsjaha ra, dayehe ra jian. ¹¹ Cai Jesús, tti jehe cai dinhi Justo, rroanha joajna nganji ra cai. De cain chojni judío que ditticaon Jesucristo, jeho tti ní chojni yá tti tettjenguijna na janha de tenttaha na x̄a para ixin Dios. Co jehe na anto jie consuelo cjoí na para ixin janha. ¹² Epafras cai rroanha joajna para ixin jaha ra, jehe cai ná ninchehe x̄é Jesucristo, co jehe cai joixin de ngain rajná ra. Jehe Epafras cain tiempo que jehe nchecoanxinhi Dios, jehe anto nchetsenhe ñao Dios para ixin jaha ra, para que jaha ra cain tiempo jian sitticaon ra Dios, co de rrox̄anjo ra jian de sinchehe ra inchin rinao Dios. ¹³ Ixin janha nona quex̄én Epafras anto x̄axaon de ixin jaha ra, co cai jehe anto x̄axaon de ixin cain chojni que ditticaon Jesucristo que te ngain ciudad de Laodicea co ciudad de Hierápolis. ¹⁴ Lucas, tti xinchexoan que ján na anto rinao na, conixin Demas, cayoi chojni mé cai rroanha na joajna para ixin jaha ra.

¹⁵ Noyá chjehe ra joajna cain chojni que ditticaon Jesucristo, tti nite ngain ciudad de Laodicea. Cai chjehe ra joajna Ninfas conixin cain chojni que ditticaon Jesucristo, tti nix̄atte nittiha ngain nchiandoha jehe Ninfas para servicioe na. ¹⁶ Cain jaha ra are tsjexin tsinhi ra quehe jícho carta jihi, cottimeja rroanha ra carta para ngain nihngo que jí ngain Laodicea para que nttiha cai cain chojni que ditticaon Jesucristo tsinhi na quehe jitaxin carta jihi, co cai jaha ra tsjehe ra quehe jitaxin cartana

que sijixin de nihngo que jí ngain Laodicea. ¹⁷ Ndache ra Arquipo que ndačhjan janha que tsinttoeha de sinchehe tti ʒa que Dios joanjo ngain jehe.

¹⁸ Janha Pablo na, rricjinha ra parte jiji conixin rana co letrana. ʒaxaon ra que janha jiaxinna jai ngain cárcel. Que Dios sinttanchaon ra. Amén.

Saho Carta Que Dicjin Pablo Para Ixin Chojni Ngain Ciudad De Tesalónica

Pablo co xicompañeroe chjé na joajna chojni ngain nihngo Tesalónica

¹ Janha, Pablo na, conixin Silvano co Timoteo rroanha carta jiji para ngain chojni que ditticaon Jesucristo ngain ciudad de Tesalónica, co chojni mé te ngain Dios Ndodá na co ngain Jesucristo, tti chonda cain joachaxin. Co Dios Ndodá na co Jesucristo, tti chonda joachaxin para ixin ján na, sinchenchaon nganji ra co rrochjá ra tti çhjoin que tsonohe ansean ra.

Tti coinhi icha chojni de icha rajna de ixin confianzé chojni Tesalónica ngain Cristo

² Janha na cainxin nchanho chjaha na gracias ngain Dios de ixin cainxin jaha ra, co çaxanho na cain jaha ra are janha na nttacoanxian na Dios. ³ Co çaxanho na queçén jaha ra ditticaon ra Jesucristo, mexinxin tenchehe ra tsje cosa jian. Co çaxanho na queçén jaha ra anto rinao ra jehe Jesús, mexinxin anto tettjenguijna ra icha chojni. Co cai çaxanho na queçén jaha ra tenchehe ra sigue jian ditticaon ra que jehe Jesús tsí iná. Mexinxin janha na chjaha na gracias Dios para ixin cain yá. ⁴ Dios rinao cain jaha ra, co janha na nona na ixin jehe coinchiehe jaha ra ⁵ ixin are janha na joasondattjo ra tti jian joajna, jeha jamaoncoa ixin janha na ndattjo ra conixin joachaxin Espíritu Santo co janha na chonda na seguro ixin tti janha na ndaçhjan na seguro ndoa. Co jaha ra jian noha ra que janha na jian jointtaha na nganji ra ixin janha na rinaho na jian sintte ra.

⁶ Co jaha ra joinchehe ra inchin janha na nttaha na co tti joinchehe Jesucristo. Co de ixin Espíritu Santo ansean ra anto ché are vayehe ra tti jian joajna, masqui anto tangui conha ra. ⁷ Mexinxin jaha ra ná ejemplo para cain chojni que ditticaon Jesucristo ngain nonttehe Macedonia co Acaya. ⁸ Anto tsje chojni nohe ixin jaha ra ditticaon ra tti jian joajné Jesucristo, tti chonda cain joachaxin. Co jeoha chojni ngain Macedonia co Acaya tti ninohe, cai nohe chojni de cainxin nontte. Co ixin cain na nohe na ixin jaha ra ditticaon ra Jesucristo, mexinxin janha na ichondaha na que rronichja na jian de ixin jaha ra. ⁹ Sino que jeha na nittequin ixin joitsjaha ra, co ttequin na tti jian que joinchehe ra nganji janha na, co ttequin na queçén cointtohe ra de vitticaon ra ídolo co coexinhi ra vitticaon ra Dios que jichon. ¹⁰ Cai ttequin na ixin queçén jaha ra techonhe ra tiempo are Xenhe Dios rrocjan tsí Xan iná. Co jehe mé, Jesús tti Dios joinchexechon. Co jehe mé tti tsançhjandaha na para ngain tti anto soji castigo que tsí.

2

xa que joinchehe Pablo ngain Tesalónica

¹ Jaha ra jian noha ra que are joasotsjaha ra, jeha jamaoncoa. ² Co masqui icha saho janha na joinchesattena na na co anto tangui conna na ngain ciudad de Filipos inchin jaha ra onoha ra pero masqui jamé, Dios çjoenguijna na para joasondattjo ra tti jian joajné jehe que danjo iná vida naroaxin, co jehe çjoenguijna na para çonhi çagoan na masqui

tsje chojni joinaoha tti janha na nichja na. ³ Co cain tti janha na ndattjo ra ján ndoa, co tti nichja na jeha para jointtaxin na ná cosa jianha, co jeha jointtayaxin na chojni. ⁴ Pero Dios chonda confianza nganji janha na, co jehe chjana na tti jian joajna que danjo iná vida nroaxin. Co mexinxin janha na nichja na joajna mé. Janha na nichjaha na para sincheřoxinhi chojni, janha na nichja na para sincheřoxinhi Dios ixin jehe tti chonxin jian tti jí ngain ansenna na. ⁵ Jaha ra noha ra ixin janha na řonhi tiempo jointtayaxin ra conixin palabra řhjoin ni ndattjo ra icha cosa para vachaxin na tomi. Cai Dios nohe cain jihi. ⁶ Janha na řonhi tiempo joinaho na para que chojni rrojinchesayana na, sia jaha ra o icanxin chojni, masqui janha na chonda na joachaxin para rrojinttaha na jamé ixin janha na representante na de Jesucristo. ⁷ Pero janha na jeha jamé jointtaha na, janha na rinaho na cain jaha ra inchin ná jannaha rinao jan xenhe jan are jinchegangui jan xan. ⁸ Janha na anto rinaho na jaha ra hasta que rinaoha na rrochjaha ra jeho tti jian joajné Dios, sino que hasta rinaho na rrochjaha ra vidana na cai, jańá janha na anto rinaho na cain jaha ra. ⁹ Jaha ra řaxaon ra queřén janha na jointtaha na řa co tangui jointtaha na para joacha na tti joine na. Ngoixin tiempo are janha na ndattjo ra tti jian joajna que joixin de ngain Dios, janha na jointtaha na řa nchanho co ttie para que ni ná jaha ra vechondaha ra que chjana ra tti joine na.

¹⁰ Cain jaha ra jian noha ra co Dios cai nohe ixin janha na jointtaha na joxon tti jian nganji ra co řonhi chojni nchao sinchecaxin janha na ni ná cosa jianha. ¹¹ Cai cjoenguijna ra cada ra para iřonhi joachjaon coá ansean ra, co para ivinttechinha ra cada ra, jamé jointtaha na inchin nchehe ná ndodaha ngain xenhe ndo. ¹² Co jointtatsanha na ñao ra que sinchehe ra inchin jiquininxin nchehe chojni Dios, tti chojni que Dios vayé para rrochonda na parte ngain lugar que Dios ttetonha co ngain glorié Dios.

¹³ Co cai janha na cainxin tiempo chjaha na gracias ngain Dios ixin are jaha ra coinhi ra tti jian joajné Dios que janha na ndattjo ra, jaha ra vayehe ra inchin joajné Dios, co jeha inchin joajné chojni. Co, ján, ndoa joajné Dios, mexinxin jaha ra řo ditticaon ra, coentoxinhi ra vidá ra. ¹⁴ Hermanos, are tangui conha ra de ixin chojni ngain rajná ra, conha ra inchin conhe chojni que vitticaon Dios conixin Jesucristo ngain regioen Judea. Cai jehe na tangui conhe na ngain chojni rajné na, tti chojni judío. ¹⁵ Jehe chojni judío tehe tti nagoenxon Jesús, tti chonda cain joachaxin. Co cai ngain tiempo vatto chojni judío nagoenxon na profeté Dios, co jai chojni judío vengui na na janha na cai. Dios ncheřoxinha tti nchehe jehe na co jehe na ningaconhe na cain chojni. ¹⁶ Ixin are joinaho na nichjá na chojni que jeha judío para que jehe na cai rrochonda na iná vida nroaxin, jehe chojni judío joinaoha rrocanřhanda na. Mexinxin jańá merocoa jicaontja tti jidingachjian cainxin tti jianha que nchehe na cainxin tiempo. Co jai, nchoe joí ngain na tti anto tangui castigo que Dios rroanha para ixin jehe na.

Pablo rinao sitsjehe chojni Tesalónica iná

¹⁷ Hermanos, are janha na sajoixin na de nganji ra para nchion tiempo, co vaguiconha ra, pero anto řaxanho na de ixin jaha ra co janha na anto joinaho na rrogasotsjaha ra iná. ¹⁸ Joitaha na de rrogaso na. Cai janha Pablo tsje nttiha joinaho rrogaso tti te ra, pero cada nttiha mé Satanás

rroanna problema para cayaconhna. ¹⁹ Joinaho na rrogasotsjaha ra ixin chonda na confianza nganji ra ngattoxon con Dios co anto rrochahna co anto ĉjoin tsonohe ansenna na de ixin jaha ra are tsí Jesucristo, tti chonda cain joachaxin para ixin ján na. ²⁰ Ndoa, jaha ra tti razón para anto ĉjoin tsonona na co anto rrochahna na.

3

¹ Mexinxin ixin coixinnaha na choan na icha para conona queĉén te ra ngain tti ditticaon ra, ģaxanho na vittona na janho na ngain ciudad de Atenas, ² co rroanha na Timoteo para joiĵi joitsjaha ra. Jehe ná nchehe ģé Dios co nchehe ģa conixin janha na are janha na ndaĉhjan na tti jian joajné Jesucristo. Jehe Timoteo nchao joinchesoji tti jaha ra ditticaon ra co jointtanimá ra, ³ para que ni ná ra tsingaxintonha ra ixin ningaconha ra na. Jaha ra onoha que ján na chonda que anto tangui tsoan na ixin icha chojni ningacoan na na. ⁴ Are ģa vintte na nganji ra, ndattjo ra que tangui tsoan na, co jamé conhe, inchin jaha ra onoha ra. ⁵ Co ixin icoixinnaha choan icha, janha rroanha Timoteo para joanchianguiha ra si ģa ditticaon ra jian ngain Jesucristo, ixin ģaon na que puede Satanás rrondate ansean ra co rrojinchehe ra jianha co tti janha na ndattjo ra irrocoĉonhi ģé.

⁶ Pero jai Timoteo ojoixin de Tesalónica co ndachjenji na ixin jaha ra anto jian ditticaon ra Jesucristo co anto rinao ra icha chojni. Cai ndachjenji na que jaha ra cainxin tiempo ģaxaon ra de ixin janha na co anto rinao ra sicon ni ra janha na, jańá inchin janha na rinaho na sicon na jaha ra. ⁷ Mexinxin hermanos, masqui anto tsje cosa tangui tonna na, pero janha na anto chahna na ixin conona na que cain jaha ra ģa jian ditticaon ra ngain Jesucristo. ⁸ Inchin ná vida naroaxin para ixin janha na are conona na que jaha ra jian ditticaon ra ngain Jesucristo. ⁹ Jaxon janha na danjo na anto tsje gracias ngain Dios ixin janha na anto chahna na ngattoxon con jehe Dios de ixin jaha ra. ¹⁰ Nchanho co ttie jointtatsán na ñao Dios ixin rrochjana na joachaxin para saso na nttiha co para tsjagoha ra cain tti ģa ditján ngain tti ditticaon ra.

¹¹ Janha na rinaho na que jehe Dios Ndodá na cainxin na co Jesucristo, tti chonda joachaxin para ixin ján na, tsjenguijna na janha na para nchao saso na sasotsjaha ra. ¹² Co janha na nttatsán na ñao Jesús, tti chonda cain joachaxin, ixin tsjenguijna ra para que sinao chó ra icha co icha, co para sinao ra icha chojni cai inchin janha na rinaho na jaha ra. ¹³ Co nttatsán na ñao Dios ixin rroquehe ansean ra co santsjexin ra de ngain tti jianha, co santsjexin de ngain ansean ra cain cosa jianha para sintte ra jian ngattoxon con Dios Ndodá na are tsí Jesucristo, tti chonda cain joachaxin, conixin cainxin chojni jehe.

4

Vida que ncheĉoxinhi Dios

¹ Jai nttatsanha na ñao ra co rrondate tti ra jiji conixin joachaxin co nombre Jesús, tti chonda cain joachaxin: inchin janha na jointtacoanha ra quexehe tipo de vida Dios ncheĉonhi, jańá nchehe ra icha co icha.

² Jaha ra chonxin ra tti janha na jointtacoanha ra, inchin coetonna na Jesús, tti chonda cain joachaxin. ³ Dios rinao que jaha ra daĉhjeixin ra de ngain tti jianha co dintte ra jian ngain jehe Dios. Mexinxin ĉonhi ra

ncheyehe ra čhihi iná tattita, ni nčhí sincheyeha xixihi iná nanita. ⁴ Cada ra rrochonda ra nanacoa nčhičhiha ra inchin Dios rinao, co rrochonda respeto ngain nčha. ⁵ Co ncheha ra tti jianha que rinao cuerpoa ra inchin nchehe chojni que chonxinha de ixin Dios. ⁶ Co jañá xonhi ra sincheyehe ra icha chojni ixin Dios anto soji castigo rrorroenhe cain chojni que sinchehe cosa jianha mé inchin ondattjo ra. ⁷ Dios ndačhoha que ján na sontte na chojni jianha, Dios rinao que ján na sačhjeyexin na de ngain tti jianha para que sontte na jian ngain Dios. ⁸ Jañá, si ná chojni ditticaonha jiji, jeha palabré inacoa chojni tti ditticaonha, sino que chojni mé ditticaonha Dios, tti chjá na Espiritu Santo.

⁹ Janha ichondaha que rrocjinha ra ixin chonda ra que sinao chó ra, ixin Dios ojointtaoanha ra para que sinao chó ra naná ra. ¹⁰ Co jamé tenchehe jaha ra ngain cainxin chojni que ditticaon Dios que te ngoixin nonttehe Macedonia. Pero nttatsanha na ñao ra que sinao chó ra icha. ¹¹ Tsjehe ra quexén sinchehe ra para nchehe ra xá ra jian, co dixintteha ra ngá xé iná chojni tti jaha ra chondaha ra que sicon ra. Sino que nchehe ra xá ra inchin janha na coetonha ra jaha ra, ¹² para que icha chojni que ditticaonha Jesucristo sicao na respeto nganji ra co jañá xonhi cosa sinttaha ra falta.

Quehe tsonhe are tsí Jesucristo

¹³ Rinaho janha na que jaha ra tsonoha ra quehe tonhe ngain chojni que ndadenhe para que jaha ra sinttechinha ra inchin icanxin chojni que ditticaonha, ixin chojni que ndadenhe rrocjan rroxingamehe. ¹⁴ Jañá inchin ján na dotticaon na que Jesús venhe co xechon, jañá dotticaon na que Dios sinchexechon cainxin chojni que vitticaon Jesús co ndavenhe na. Co jehe Dios tsiaho cain chojni mé conixin Jesús.

¹⁵ Mexinxin janha na ndattjo ra inchin cjoago Jesús, tti chonda cain joachaxin, que ján na xo xa sonttechon na are jehe Jesucristo tsí, ján na čhoha sotaon na nttiha que niondavenhe. ¹⁶ Ixin jehe Jesucristo rroxincanjinxin de ngajni co rronichja soji ixin chonda joachaxin. Co tti ángel que chonda tsje joachaxin rronichja soji co tsoyao trompeté Dios. Cottimeja chojni que ondavenhe co vitticaon na Cristo, chojni mé rroxingamehe na de ngayehe tti nindadiguenhe; ¹⁷ cottimeja ján na xo xa sonttechon na satsjiho na na ngacjan ttjoi para sigotanxin na ngataonhe čhintto jehe Jesucristo, tti chonda cain joachaxin. Cottimeja sontte na conixin jehe para cainxin tiempo. ¹⁸ Mexinxin ndache chó ra jiji naná ra para sincheanimá chó ra.

5

¹ Pero chondaha que rrocjinha jaha ra de ixin nchanho co tiempo que tsonhe jiji. ² Jaha ra atto jian noha ra que nchaoen Jesucristo tsí nchaon are ján na ni rrořaxaonha na inchin are tí ná tti chehe are ttie. ³ Are chojni tendačho na: “Cainxin nchao jí co seguro”, cottimeja anto daca tsí castigo ngataha chojni mé inchin tti dolor que ditaha ná nanita are osincheconcijih chjan; co jehe na čhoha satsinguehe na castigo mé. ⁴ Pero jaha ra que ditticaon ra Dios iteha ra ngain naxin xehe para que jehe nchanho mé sinttařaon jaha ra inchin are řagoen ni ná tti chehe. ⁵ Ixin cainxin jaha ra chojni que čhji tti jinchengasán nchanho ixin jaha ra ditticaon ra tti ndačho Jesucristo. Ján na jeha chojni que čhji ttie ni jeha chojni que čhji tti naxin xehe ixin chojni que nchehe jianha, mé tti

čhji jamé. ⁶ Mexinxin ján na sonttečhincoaha na inchin icha chojni. Já n na chonda na que tasanttetsjehe na conixin jian joarrixaon na. ⁷ Chojni que dinttejoa, dinttejoa na are ttie; co chojni que coan, coan na are ttie; ⁸ pero já n na, xo chojni de joadingasán na, chonda na que sontte na cain tiempo conixin joarrixaon na jian. Are dotticaon na Jesús co are rinao na icha chojni cayoi mé tti ttjenguijna na para xonhi tsoan na inchin xisoldado are tteto xa xonhi tonhe xa ixin jingá pechoe xa ná chia que dinhi armadura. Co já n na chonda na seguro ixin rrochonda na iná vida nara; co jiji anto ttjenguijna na inchin tti jocho que ttjinga xisoldado para xonhi tonhe já xa. ⁹ Ixin Dios coinchiaha já n na para sayé na castigo, sino que Dios coinchiá já n na para sayé na iná vida nara. ¹⁰ Jesucristo ndavenhe para ixin já n na para que sonttechon na já n na conixin jehe masqui xa techon na o ondavenhe na are jehe rrocjan tsí. ¹¹ Mexinxin ncheanimá chó ra co nchesoji chó ra ansean ra inchin jaha ra otenchehe ra.

Pablo chjé consejo chojni que ditticaon Jesucristo

¹² Nttatsanha na ñao ra hermanos que chonda ra respeto ngain chojni que nchehe xa ngayaha ra, tti chojni que Jesucristo coinchiehe para que rrondattjo ra de ixin quexén sinchehe ra co para sinttacoanha ra. ¹³ Chonda ra que rroxaxaon ra jian de ixin jehe na co anto sinao ra na de ixin tti xa que jehe na nchehe na. Dintte ra čhjoin naná ra.

¹⁴ Janha na ttetonha ra que chjehe ra consejo chojni que čhoha nchehe xa, co ncheanimá ra chojni que chonda joachjaon para que ixonhi joachjaon rronchonda ansén na, co ttjenguijna ra chojni que antoha jian ditticaon co chonda ra paciencia ngain cain chojni.

¹⁵ Ttjiho ra cuidado que xonhi chojni tsjengaxin hna jianha ngain chojni que joinchehe jianha ngain jehe. Ncheha ra jamé, sino que cain nchanho nchehe chó ra jian naná ra co hasta cainxin chojni ngoixin nontte.

¹⁶ Cainxin nchanho dintte ra contento. ¹⁷ Nchecoanxinhi ra Dios cainxin tiempo. ¹⁸ De cainxin tti tsonhe danjo ra gracias ngain Dios ixin jamé Dios rinao de nganji ra xo ditticaon ra Jesucristo.

¹⁹ Cayacoenha ra tti nchehe Espíritu Santo. ²⁰ Are chojni rrondattjo ra ná joajna que vayé de ngain Dios, ttinhi ra jian co ncheha ra menos joajna mé. ²¹ Cain joajna que tsinhi ra, xaxaon ra si joixin de ngain Dios ani nahi co ttenchjinha ra jehó tti jian que joixin de ngain Dios. ²² Dačhjenda ra de ngain cainxin cosa jianha.

²³ Jehe Dios tti ncheconhe ansean na čhjoin santsjenda ra de ngain cain tti jianha co tsenchjinha espiritua ra, alma ra, co cuerpoa ra para xonhi tti feo xehe rrochonda ra are tsí Jesucristo, tti chonda cain joachaxin para ixin já n na. ²⁴ Dios tti vayaha ra, nchehe cain tti ndačo co jehe sinchehe cain jiji.

Pablo joexin cjin carté co rroanha joajna

²⁵ Jaha ra nchetsenhe ra ñao Dios de ixin janha na.

²⁶ Chjehe ra cain chojni que ditticaon Jesucristo jian joajna.

²⁷ Janha rritetonha ra conixin joachaxín Jesucristo que tsjehe ra carta jiji ngain cain chojni que ditticaon Jesucristo nttiha.

²⁸ Que Jesucristo, tti chonda cain joachaxin para ixin já n na, sinchenchaon nganji ra. Amén.

Yoxin Carta Que Dicjin Pablo Para Ixin Chojni Ngain Ciudad De Tesalónica

Pablo co xicompañeroe chjé na joajna chojni ngain nihngo Tesalónica

¹ Janha, Pablo na, conixin Silvano co Timoteo rroanha carta jihi para ngain chojni que ditticaon Jesucristo ngain ciudad de Tesalónica, co chojni mé te ngain Dios Ndodá na co ngain Jesucristo, tti chonda cain joachaxin. ² Dios Ndodá na co Jesucristo, tti chonda cain joachaxin, sinchenchaon nganji ra co rrochjá ra tti çhjoin que tsonohe ansean ra.

Are Jesucristo tsí, Dios sinchejuzgá cain chojni

³ Janha na chonda na que sanjo na gracias ngain Dios para ixin jaha ra cainxin nchanho. Jamé jiquininxin sinttaha na ixin jaha ra icha co icha ditticaon ra Jesucristo co cai ixin jaha ra icha co icha rinao chó ra naná ra. ⁴ Mexinxin janha na chahna na nichja na ngain icha ningoe Dios de ixin tti paciencia que jaha ra chonda ra co ixin jaha ra nacoa ditticaon ra ngain Dios, masqui anto tsje tangui conha ra. ⁵ Cain jihi tjago ixin Dios ná juez jian ixin jehe nchegonda cain cosa tangui mé para que jaha ra siquininxin ra sintte ra tti lugar que Dios tsetonha.

⁶ Cai jehe Dios sinchehe inchin jiquininxin ixin rrorroanha cosa tangui ngain tti chojni que tenchehe na cosa tangui nganji jaha ra. ⁷ Co ján na que anto tangui toan na, Dios sanjo joachaxin para tasehe tti anto tangui mé are Jesús, tti chonda cain joachaxin, tsixin de ngajni ngacjan neje çohi conixin ángel de jehe que chonda tsje joachaxin. ⁸ Tsí para rrochjé castigo tti chojni que chonxinha de ixin Dios co ni ditticaonha na tti jian joajna de ixin Jesucristo, tti chonda cain joachaxin para ixin ján na. ⁹ Chojni jihi ndasitján ansén na para cainxin tiempo co satsjixin na de ngattoxon con jehe tti chonda cain joachaxin co de glorié jehe co de ngain joachaxín jehe ¹⁰ are jehe tsí ngain nchanho mé para tsosayehe co soan admirado de ixin chojni que vitticaon jehe. Cainxin jaha ra sintte ra nntiha nchanho mé cai ixin ovitticaon ra tti janha na ndattjo ra.

¹¹ Mexinxin janha na nttatsán na ñao Dios para ixin jaha ra cainxin tiempo. Danchiá na Dios para tsentoxinhi vidá ra para sintte ra inchin jiquininxin chojni que jehe ovayé. Co cai nttatsán na ñao Dios ixin jehe sinchegonda joachaxin para sinchejian ra inchin jaha ra rinao ra co para tsjenguijna jaha ra sinchehe ra cain cosa que jaha ra nchehe ra para ixin Jesucristo. ¹² Jañá nombré Jesucristo, tti chonda cain joachaxin para ixin ján na, tsosayehe nombre nganji ra, co jehe sinttasayaha jaha ra cai. Jihi tti tsonhe ixin anto jian Dios conixin Jesucristo, tti chonda cain joachaxin.

2

Xí anto jianha que tsí antes que tsí Jesús

¹ Janché janha rrondaçhjan de ixin are tsí Jesucristo, tti chonda cain joachaxin para ixin ján na, co are sigatse na co sontte na ngain jehe. Nttatsanha na ñao ra, ² ttentoxinha ra tti jian çaxaon ra co ni çaonha ra are ná chojni rrondaçho ra ixin nchaon Jesucristo ojoj nchaon. Co puede ná chojni rrondaçho ixin Dios coetonhe mé, o puede ná chojni

que tsinhi ra jinichja ngain anto tsje chojni ixin quexén nchehe na, o puede jaha ra sayehe ra ná carta co chojni ndačo ixin janha na cjin na carta mé, co ndoaha. ³ De cain yá dittoaxinha ra sinttayaxin ra na ni ná. Ixin saho que tsí nchanho yá chonda que tsonhe yó cosa: saho tsje chojni rroningaconhe na Dios, cottimeja rrořago ná xí anto jianha, co xí mé chonda que tsji ngain infierno. ⁴ Xí jihi rroningaconhe xa cainxin tti ditticaon Dios co cain cosa que jiquininxin tsosayehe. Co xí jihi hasta siguehe xa ngain ningoe Dios icha importante como si jehe xa rrocji xa Dios, co jehe xa rrondačo xa ixin jehe xa Dios xa.

⁵ ¿Axaxaonha ra are janha řa joarihi nganji ra, janha vandattjo ra cain jihi? ⁶ Co jai jaha ra onoha ra quehe tančhjadaha xí mé para tsí xa. Jehe xa čhoha tsí xa icha saho que mero nchaoen xa. ⁷ Tsje cosa jianha que sinchehe xí mé, ojí. Pero cain tti tsonhe řa čhoha tsonhe hasta tsajandaja tti jicayacoen jai. ⁸ Cottimeja tsononxin xí anto jianha jiha, co Jesús, tti chonda cain joachaxin, nasoenxon xí mé jehó sanotte Jesús xa conixin rroha Jesús co ndarroxante xí mé conixin chíxo que singasán are tsí Jesús. ⁹ Jehe xí mé tsí pero Satanás tti rrorroanha xa co tsí xa conixin tsje joachaxin co sinchehe xa tsje milagro co señal pero cain mé ndoaha ixin tsixin joachaxin Satanás. ¹⁰ Co sinchegonda xa cainxin cosa jianha para sincheyexin xa chojni que sitján ansén. Co cain chojni mé sitján ansén na ixin řonhi tiempo sitticaon na Jesús, co rrochondaha na iná vida naroa. ¹¹ Mexinxin Dios tsančhjanda chojni mé para sitticaon na tti ndoaha. ¹² Co Dios sinchecondená cainxin chojni mé ixin rročhoha na sitticaon na tti ndoa, sino que sincheřoxinhi na cosa jianha.

Quexén sinchehe chojni que Dios coinchiehe

¹³ Pero janha na cainxin tiempo chonda na que rrochjaha na gracias ngain Dios de ixin jaha ra que Dios rinao ra ixin Dios coinchiaha ra desde are saho para sayehe ra iná vida naroxin. Cain yá conhe ixin Espíritu Santo joinchechjian jaha ra chojni jian co ixin vitticaon ra tti ndoa. ¹⁴ Dios vayaha jaha ra para ixin cain jihi de ixin tti jian joajna que janha na ndačhjan na para que jaha ra tsosayaha ra conixin Jesucristo, tti chonda cain joachaxin para ixin ján na.

¹⁵ Mexinxin cain jaha ra dintte ra soji co tjañaha ra tti janha na jointtacoanha ra are joaso na nganji ra co ngain carta que janha na rroanha ra. ¹⁶ Jesucristo, tti chonda cain joachaxin para ixin ján na, co Dios Ndodá na tti rinao na co chjá na Ndo consuelo para cainxin tiempo co ttjenguijna na ján na para rrochonda na confianza ixin cain cosa tsonhe inchin jehe Ndo ndačo Ndo. ¹⁷ Que Dios co Jesucristo sincheanimá ansean ra co sinttasoji ra para que cain tti rronichja ra co cain tti sinchehe ra sehe jian.

3

Pablo rinao que chojni sinchetsenhe na ñao Dios para ixin jehe co xicompañeroe

¹ Hermanos, nchetsenhe ra ñao Dios para ixin janha na para que tti jian joajné Jesucristo, tti chonda cain joachaxin, jaca siji ngain chojni ngoixin nontte co para que jehe na jian sayé na tti jian joajna mé. Jañá inchin jaha ra vayehe ra. ² Cai nchetsenhe ra ñao Dios para que janha na řonhi sinchena na cain xí feo que nchehe tsje cosa jianha, ixin cainxinha

chojni ditticaon na Dios. ³ Pero Jesucristo, tti chonda cain joachaxin, ndoa nchehe cain tti ndačo co jehe sinttasoji ra co senda ra para que tti jianha xonhi sinchehe nganji ra. ⁴ Co janha na chonda na confianza ngain Jesucristo que ixin jaha ra sinchehe ra sigue sinchehe ra cain tti janha na ttetonha ra. ⁵ Que Jesucristo tsjenguijna ra para que tsonoha ra quexén Dios rinao ra co para rrochonda ra paciencia inchin Cristo chonda.

Chojni chonda que nchehe xa

⁶ Hermanos, janha na ttetonha ra conixin joachaxín co nombré Jesucristo, tti chonda cain joachaxin para ixin ján na, que dačhjendehe ra quexeho nirinaoha sinchehe xa co nisincheha tti janha na cjoagoha ra. ⁷ Jaha ra jian noha ra quexén sinchehe ra para sinchehe ra inchin janha na nttaha na. Ixin are janha na vintte na ngayaha ra, xonhi tiempo vintte na sin que jointtaha na xa, ⁸ co ni joinecoaha na niotsanho ni ná chojni co cjoengaha na hna. Janha na xonhi tiempo jointtaha na mé, sino que jointtaha na xa nchanho co ttie masqui anto cončhjen na, para que ni ná jaha ra conoaha ra tangui de ixin janha na. ⁹ Masqui janha na joichonda na derecho para que rrondattjo ra ixin rrocjenguijna ni ra, pero janha na joinaoha na jamé. Janha na jointtaha na xa soji para que jaha ra vicon ra co para sinchehe ra inchin janha na. ¹⁰ Ixin are janha na vintte na nganji ra, ndattjo ra regla jihi: tti rinaoha sinchehe xa, sineha cai. ¹¹ Janha na ndachjenji na na ixin ttoha de jaha ra ncheha ra xa co atto rinao ra que xonhi sinchehe ra. ¹² Ngain chojni mé tettetonha na conixin joachaxín co nombré Jesucristo, tti chonda cain joachaxin para ixin ján na, que sinchehe chojni mé xa čhjoin para que sacha na tti sine na.

¹³ Hermanos, dinttecončhjenha ra de nchehe ra tti jian. ¹⁴ Si čhonja chojni čhoha sitticaon tti janha na ndačhjan na ngain carta jihi, ttjiho ra cuidado quensen mé co tatoha ra para que tsosoé chojni mé. ¹⁵ Pero ningacoenha ra chojni mé, sino que chjehe ra chojni mé consuelo como si rrocji ná xanchó ra.

Pablo joexin cjin carté

¹⁶ Co Jesucristo, tti danjo tti čhjoin que tonohé ansén ni, sanjo tti čhjoin mé nganji ra para cainxin tiempo co ngain cainxin tti sinchehe ra. Que jehe Jesús sehe nganji ra cain ra.

¹⁷ Janha Pablo na cjin na letra conixin rana ngain tti joexinxin carta jihi para ixin jaha ra. Janhi nttafirmá cain cartana, co janha cjin na. ¹⁸ Que Jesucristo, tti chonda cain joachaxin para ixin ján na, sinchenchaon nganji cain ra. Amén.

Saho Carta Que Dicjin Pablo Para Ngain Timoteo

Pablo chjé joajna Timoteo

¹ Janha Pablo na, ná representanté Jesucristo. Dios co Jesucristo coetonna janha mé. Dios tti chjá na vida naroaxin para cainxin tiempo co Jesucristo tti ján na techonhe na hasta jehe tsí iná. ² Janha rricjin na carta jihi para ixin jaha, Timoteo, jaha tti cjoí inchin xanhna ixin jaha ndoa vitticaon ngain Jesucristo are janha jointtacoanha jaha. Dios Ndoá na co Jesucristo, tti chonda cain joachaxin para ixin ján na, sinttanchaon jaha, tsiaconoaha, co rrochjá tti chjoin que tsonohe ansean.

Tti ndačo Pablo de ixin chojni que tjago tti ndoaha

³ Inchin ojointsatsanha ñao are janha sacjoi para nonttehe Macedonia, janha rrinttatsanha ñao jai que jaha dittoha ngain ciudad de Efeso para que tsetonhe canxion chojni que te nttiha que itsjagoeha na icha chojni tti jaha ndoa, ⁴ ni sincheha na caso cuento que xonhi xé, co ni tti jitaxin de ixin nigoelito xanchjen. Cain cosa jihi joxon tti xonhi xé que ttequincaho chó na co ttjenguijnaha na na para sinttoho na tti coetoan na Dios. Chonda que sotticaon na Dios para sinttoho na tti coetoan na.

⁵ Janha rritetonha jihi para que chojni nttiha conixin ján na sonao chó na naná na conixin ansean na roa que xonhi jianha chonda na, co sinttoha na cosa jianha que nchenihi ansean na, co sotticaon na tti ndoa. ⁶ Canxion chojni vaguitticaon na canio cosa jihi pero vačhjenda na co ndavitján na. ⁷ Chojni mé rinao sintte na ximaestroey ley que vayé Moisés, pero ni ttinxinha na tti jehe na nichja na co ni tti jehe na tjago na chojni conixin anto confianza.

⁸ Noa na ixin ley que vayé Moisés jian, pero chonda que sonttogonda na inchin jiquininxin. ⁹ Chonda na que tsonoa na que ni ná ley dehe para ixin tti chojni que nchehe jian. Ley dehe ley para jecho chojni que ncheha tti ndačo ley co nchehe tsje cosa jianha. Ley dehe para ixin chojni que ningaconhe Dios, co ditticaonha ngain Dios, para ixin chojni que dicaoha respeto ngain Dios, para ixin chojni que nadoenxon ndodé o janné, co para ixin cain chojni que nadoenxon chó. ¹⁰ Co ley cai para ixin chojni que ncheyehe chó para dinttejoacaho chó que jeha xixihi o nchichihi, para ixin chojni que dinttejoacaho chó xí co xí, para ixin chojni que tté chojni, para ixin chojni que nichja cosa ndoaha co chojni que nchejurá de ixin cosa que jeha ndoa. Co ley cai para ixin cain tti chojni que ningaconhe tti joajné Jesús que nttocoenhe na chojni. ¹¹ Co cain jihi que nttocoenhe na chojni jihi jí de acuerdo conixin tti joajna mé que jiquininxin tsosayehe. Co Dios, tti anto jian, tti coetonna janha para ixin nichja joajna mé.

Pablo joanjo gracias ngain Dios

¹² Janha chjaha gracias Jesucristo, tti chonda cain joachaxin para ixin ján na, ixin jehe tti chjana fuerza para nichja cain cosa jihi ixin jehe tti ndačo ixin janha jiquininxin na xa jihi, co jehe tti joinchegonda na janha para ngain xé. ¹³ Jehe joinchehe cain jihi nganji na janha masqui feo vanichja de ixin jehe, co varroá chojni que vaguitticaon jehe

co vanttaha feo ngain na. Pero Dios coiaconoana janha ixin janha xa vaguitticaonha Jesús co venonaha quehe vanttaha. ¹⁴ Mexinxin jehe Jesucristo anto joinchençaon na janha co cjoenguijna na janha para ditticanho co para rinaho chojni inchin jehe ttjenguijna cain chojni que te na conixin jehe.

¹⁵ Palabra janhi anto ndoa co cain chojni chonda na que sitticaon na: Jesucristo jói ngataha nontte para chjé cain chojni que nchehe cosa jianha iná vida naroaxin. Co de cain chojni mé, janha tti saho na. ¹⁶ Pero de cain tti jianha que janha jointtaha, Dios coiaconoana janha para que de ixin janha Jesucristo cjoago cainxin paciencia que jehe chonda. Co jañá joigarihi janha ná ejemplo para icha chojni que sitticaon Jesús co rrochonda na iná vida naroaxin que xonhi tiempo tsjexin. ¹⁷ Mexinxin janha cain tiempo sinttasayá co rrondachjan ixin Dios anto jian. Jehe Rey para cainxin tiempo co xonhi tiempo senhe co ni choha dicen ni. Dios nacoaxinxon co chonxin cainxin cosa. Amén.

¹⁸ Timoteo, jaha que inchin xanhna; janha rritetonha jiji para que nchao sincheluchá jian para ixin Jesucristo inchin ndattjo chojni are nichja na joajna que joixin de ngain Dios para ixin jaha. Mexinxin sinchehe jamé. Co jian ditticaon Jesucristo conixin ansean roa. ¹⁹ Canxion na joincheha na caso tti nchenihi ansén na para nchehe na jianha co jehe nimé joinchetján na tti jehe na vitticaon na. ²⁰ Jañá conhe ngain Himeneo co ngain Alejandro, tti ni janha coančhanda ngain Satanás para que tsanguí na rronichjaha na feo de ixin Dios.

2

QueXén sinchecoanxinhi ni Dios

¹ Saho rritetonha jaha que chojni que ditticaon Jesucristo chonda que sinchetsenhe na ñao Dios, sinchecoanxinhi na Dios, sanchia na Dios co sanjo na gracias ngain Dios para cainxin chojni. ² Jañá nchetsenhe ñao Dios para ixin cain chojni que chonda joachaxin para ttetonha ngain gobierno co chojni que ttetonha ngain cain rajna para que ján na nchao sontte na chjoin co xonhi tseto na co sontte na inchin Dios rinao co para icha chojni rrochonda na respeto nganji na. ³ Cain jiji jian co tti nchexoxinhi Dios tti chjá na iná vida naroa. ⁴ Jehe rinao que cainxin chojni sayé iná vida naroa co satsoan na tti ndoa. ⁵ Jí nacoaxinxon Dios, co jí nacoa tti nchao tsintte chojni para ngain Dios, co tti xí mé, jehe Jesucristo. ⁶ Jesucristo joanjo cuerpoe para ndavenhe para que cjoenga hna tti jianha que nttoho na cainxin na. Co jiji joiconhe ngain tiempo que Dios ondačo icha antes que rrojiconhe. ⁷ Mexinxin Dios coinchiehe na janha para ná representanté Jesucristo co para tjagoa tti chojni que jeha judío de ixin tti ndoa que dotticaon na. Janha ditticanho Cristo, mexinxin janha nichja tti ndoa co nichjaha tti ndoaha.

⁸ Mexinxin janha rinaho que ngain ngoixin nontte xí sinchecoanxinhi xa Dios. Co are rrotsin rá xa para sinchecoanxinhi xa Dios, pero joxon rá tti chojni que xonhi jianha joinchehe para que Dios sicon rá naroa. Co tsoñaoha xa ni tsetocaoha chó xa de ixin chijni. ⁹ Co janha rinaho que nchí sinttengá ncha lonttoe ncha inchin jiquininxin conixin jian joarrixaon co rroxanotaon cuerpoe ncha tti jiquininxinha sicon chojni. Are rrojinji ncha co tsette lazoé ncha pero inchin jiquininxin co xonhi cosa anto rentte tsentaha já ncha, ni cosa anto rentte que setea ncha, ni

lontto que anto rentte para sengá ncha. ¹⁰ Nchí sehe ncha chjoin, pero de ixin tti jian que sinchehe ncha inchin nchí que dačhjeixin ngain cosa jianha co dintte ncha jian ngain Dios. ¹¹ Nchí chondaha ncha que rronichja ncha are tsinhi ncha ngaxinhi nihngo para jamé tsangui ncha inchin chojni que ditticaon tti ditonhe. ¹² Janha danjoha joachaxin para que nchí sinchecoehne ncha chojni are icha chojni sintte na ngaxinhi nihngo, co ni tsetoanha ncha ngain xí; chonda ncha que rrotencoia ncha. ¹³ Ixin Dios saho joinchechjian Adán, cottimeja Eva. ¹⁴ Co jeha Adán tti joincheyehe Satanás, sino que Eva tti joincheyehe Satanás. Co ixin Satanás nchao joincheyehe Eva, mexinxin después Eva joinchehe cosa jianha. ¹⁵ Pero masqui Dios ndačo que anto tangui para ná nchí are ncheconcihi ncha chjan, pero xonhi tsonhe ncha si jehe ncha ditticaon ncha Dios, co si rinao ncha cain chojni, co si sehe ncha jian inchin rinao Dios conixin jian joarrixaoen ncha.

3

Quexén sinchehe chojni que ttetonha ngain nihngo

¹ Palabra jili atto ndoa: si chonja chojni rinao rrochonda joachaxin ngain nihngo, atto jian ná xa que jehe rinao sinchehe. ² Mexinxin, tti rinao sehe tti ttetonha ngain nihngo chonda que sehe jian para que ni ná chojni choha sinchesattehe. choha secao iná nchí si jehe jicao nchichihí, co sicao ná vida jian para que icha chojni rrochonda na respeto ngain jehe, co tsjanoha de ixin cosé Dios co sehe jian ngain joarrixaoen. Co chonda que sehe jian cainxin nchanho para sayé chojni que tsji ngain nchiandoha. Co chonda que rrochonxin quexén nchao tsjagoe icha chojni. ³ Seha dicoan, co xonhi chijni tsjé ngain iná chojni, co sinaoha tomi que sachaxin de cosa jianha. Seha jamé, sino que jehe chonda que sinchehe cain cosa jian co tsetocaoha chojni co tantoha sinao tomi. ⁴ Chonda que tsonohe tsetonha jian ngain nchiandoha para que xenhe sitticaon xan co rrochonda xan respeto, ⁵ ixin si ná chojni, ni ngain nchiandoha noeha ttetonha, ¿quexén nchao tsetonha ngain ningoe Dios? ⁶ Mexinxin tti tsetonha ngain ningoe Dios jeha ná tti nandá vitticaon ngain Jesucristo, ixin puede jehe rrořaxaon ixin anto nohe co jamé jianha sinchehe mexinxin sayé castigoe Dios inchin conhe Satanás. ⁷ Cai chojni que xa ditticaonha ngain Jesucristo chonda que rrochonda respeto ngain tti tsetonha ngain ningoe Dios. Jañá chojni choha rronichja jianha de ixin jehe co Satanás xonhi rrocayacoen jehe.

Quexén sinchehe tti chojni diáconos

⁸ Jañá cai diáconos, tti chojni que ttjenguijna jehe que ttetonha ngain ningoe Dios, chojni diaconos mé chonda que sintte na jian chojni cai. Co icha chojni chonda que rrochonda na respeto ngain chojni mé. Co chojni diáconos choha rronichja tti ndoaha, ni rrocoanha na, ni choha anto sinao na tomi que sachaxin de cosa jianha. ⁹ Chonda na que sintte na ngain tti ndoa que joixin de ngain Dios tti ján na dotticaon na, co sincheha na cosa jianha que sinchenihi ansén na. ¹⁰ Co jaha chonda que tsonoha saho si cain tattita mé seguro ditticaon co si seguro nchehe jian, cottimeja jehe na nchao sinchehe na xa de tsjenguijna na jehe tti ttetonha ngain nihngo. ¹¹ Cai nchichihí xa chonda que rrochonda chojni respeto ngain ncha, co rronichjaha ncha cosa que jiquininxinha

de iná chojni, co tsjanoha ncha de ixin cosé Dios, co sehe ncha jian ngain cainxin tti nchehe ncha. ¹² Ná chojni diácono čoha rrochonda yó nčí nacoa tiempo co chonda que tsonohe jian quexén tsetonha ngain xenhe co ngain nchiandoha. ¹³ Ixin chojni diácono que nchehe xé jian, jehe na dacha na icha tsje respeto co icha rroxaonha na para rronichja na de ixin tti ditticaon na de ixin Jesucristo.

Tti dotticaon na

¹⁴ Janha rinaho sasotsjaha toin, pero janha rricjinha cain jiji ¹⁵ para que si janha tsončjenna, jaha onoha quexén sinchehe chojni Dios, co chojni mé rročho ningoe Dios que jichon. Co chojni mé tti ttixinhi co ttjenguijna tti ndoa. ¹⁶ Xonhi chojni rrondačo que tti dotticaon na jieha, ixin janhi ndačo ngain tti jitaxin Palabré Dios:

Dios jói ngataha nontte inchin ná xí;
co Espíritu Santo cjoago ixin jehe jian,
co tsje ángel vicon jehe
co chojni nichja na de ixin jehe ngain cainxin nación.
Co ngoixin mundo jí chojni que vitticaon na ngain jehe
co jehe sacojín ngajni.

4

Chojni que sachjenda de ngain tti dotticaon na

¹ Pero Espíritu Santo ndačo claro are ndačo que icha saho que tsjexin mundo ttoha chojni sachjenda na de tti ditticaon na de ixin Dios, co sitticaon na ojé espíritu que ncheyehe chojni co sitticaon na tti sinchecoene na ninchehe xé xijianha. ² Co jehe na tsinhi na co sitticaon na tti rronichja chojni que ncheha inchin ndačo na co sincheyaxon na, co itsonoeha na feo are sinchehe na cosa jianha ixin tti sinchenihi ansén na, mé inchin ná cosa que ndache ngain xohi. ³ Chojni jiji rrondačo na ixin jianha para tsottehe na, co cai rrondačo na ixin čoha sine na canxion cosa que jine ni. Pero Dios joinchechjian cainxin tti jine ni para ixin tti chojni que ditticaon jehe, nichonxin tti ndoa. Mexinxin nimé nchao sanjo na gracias ngain Dios co sine jiji. ⁴ Ixin cainxin tti joinchechjian Dios, mé jian, co ján na čoha rrondačo na ixin jehe jianha; sino que ján na sayé na co sanjo na gracias ngain Dios ⁵ ixin tti ndačo Dios, co tti gracias que danjo na ngain Dios, mé nchejian cain cosa mé.

Quexén sinchehe ná tti jian ninchehe xé Jesucristo

⁶ Si jaha sinchecoene chojni que ditticaon Dios cain jiji, jaha sarihi ná jian xinchehe xé Jesucristo. Co jaha sarichonxin tti palabra que ján na dotticaon na co tti jian que rrinchecoene chojni de ixin Jesucristo. ⁷ Pero jaha ncheha caso tti cuento que jeho chojni xaxaon ixin cuento mé xonhi xé. Nchehe jeho tti rinao Dios. ⁸ Masqui tti nchetsontaon ni cuerpoe ni donda nchin, pero are sinchehe ni inchin rinao Dios, mé tti donda para cainxin ixin mé ttjenguijna ni ngain vidé ni jiji co cai ngain vida que tsí. ⁹ Palabra jiji atto ndoa, co cain chojni chonda na que sitticaon na. ¹⁰ De ixin cain jiji, ján na nttoho na xa masqui tangui toan na ixin noa na que Dios jichon co sinchehe jian nganji na co jehe rinao tsjenguijna cainxin chojni para rrochonda na iná vida naroaxin, co icha para chojni que ditticaon jehe.

¹¹ Cain cosa jiji chonda que tsetonhe chojni co tsjagohe na. ¹² Jaha chjeha oportunidad chojni para que jehe na sinttaha na menos jaha ixin xa tsjeha nano chonda jaha, sino que darihi ná ejemplo para ixin chojni que ditticaon Dios. Mexinxin ttjiho cuidado quexén rronichja co quexén sinchehe; sinao cain chojni, jian ditticaon Jesucristo, co nchehe jeho cosa jian inchin Dios rinao. ¹³ Ngoixin tiempo hasta que janha saso, jaha nchehe de que tsjehe ngain nihngo tti jitaxin Palabré Dios, co ncheanimá chojni que ditticaon Jesucristo, co nchecoenhe cain chojni tti ndoa. ¹⁴ Jaha tjañaha tti joachaxin que Dios chjá are canxion chojni que chonda joachaxin ngain nihngo coín rá ngataha jaha co nichja joajna que joixin de ngain Dios para ixin jaha.

¹⁵ Ttín cuidado cainxin tiempo ngain cosa tehe para que sicon cainxin chojni quexén jaha tsojian. ¹⁶ Ttjiho cuidado de jaho co de tti nchecoenhe chojni, co darihi soji de cain. Si sinchehe jiji, jaha rrochonda iná vida naroaxin co cai jaha tsjenguijna tti chojni que ditticaon tti jaha ndačo para que rrochonda na iná vida naroaxin.

5

Quexén sinchehe ni ngain icha chojni que ditticaon Jesucristo

¹ Nchesatteha ná dačhichjan, sino que jion dačhjeyecoxin de ngayehe chojni para ndache dačhichjan mé inchin rrocji ndodá, co nchehe jian ngain xanxí inchin rrocji xanchó. ² Nchehe jian ngain načhichjan inchin rrocji janná, co xanñhí nchehe jian ngain xan inchin rrocji xanchó, co ni ná cosa jianha xaxaonha de ixin jehe xan.

³ Ttjenguijna nčhiganha si jehe nča chondaha nča nindoha nča. ⁴ Pero si ná nčhiganha chonda nča xenhe nča o xanntí nča, jehe xan mé xan chonda que tsjenguijna nča. Co jamé jiquininxin xan para que tsjenga xan hna tti jica xan ngain nindoha xan ixin are nchinnchin xan anto joinao nindoha xan. Co jiji tti anto nchexoxinhi Dios. ⁵ Tti nčhí que ndoa chondaha nindoha co vittohe jeoxinxon, jehe nča chonhe nča quehe sinchehe Dios co tinttoeha nča de nchecoanxinhi nča Dios nchanho co ttie. ⁶ Pero nčhiganha que icha nchexoxinhi cain cosa que jí ngataha nontte, nčhí mé ondavenhe espiritue nča masqui xa jichon nča. ⁷ Ttetonhe na cai cain cosa jiji para que ni ná chojni rrochondaha na de quehe tsoattexin na. ⁸ Co si čhoan chojni sincheha caso chojni jehe co icha ngain nindoha, xajeho inchin chojni mé ndačo ixin jehe iditticaonha Jesucristo, co chojni mé icha nchaoha nchehe que tti chojni que xonhi tiempo ditticaon Jesucristo.

⁹ Are tsentaxin ra nombré nčhiganha que tsjenguijna ra, pero jeho nčhiganha que chonda icha de sesenta nano, co jeho nčhiganha que vecaoha yó xí nacoa tiempo. ¹⁰ Co chonda que rrochonxin chojni tti jian que jehe nča joinchehe nča. Inchin si joichonda nča chjan co jian joinchegangui nča xan, o si joinchehe nča jian ngain cain chojni que ttji ndoha nča, o si joinchehe nča ndacoa ngain xé chojni que ditticaon Jesús co ndačhoaha nča ixin jehe nča nčhí anto jian, o si cjoenguijna nča chojni que anto tangui conhe, o quexeho iná cosa jian que joinchehe nča.

¹¹ Co ttentaxinha ra nombré nčhiganha que xa tsjeha nano chonda ixin puede rroxaxaon nča de ixin jeho nča co secoa nča xí iná. ¹² Co jañá isincheha nča xa que jehe nča ndačo nča que seguro sinchehe

ncha para ixin Cristo. ¹³ Co cai puede jehe ncha chji ncha nchia co nchia co ndanchetján ncha tiempoe ncha, co jeoha tiempoe ncha nchetján ncha, cai nchexoxinhi ncha nichja ncha cosa que jiquininxinha de iná chojni. ¹⁴ Mexinxin janha rinaha que nchiganha que xa chondaha tsje nano secao ncha xixihi ncha co rrochonda ncha chjan co sicao ncha cuidado ngain nchiandoha ncha, co sanjoha ncha oportunidad ngain tti ningaconhe ncha para que rronichjaha na feo de ixin jehe ncha. ¹⁵ Ixin canxion nchiganha ovačjenda ncha de Cristo, co nchehe ncha inchin rinao Satanás.

¹⁶ Si ná de chojni que ditticaon Jesús, chonja familié vittoeganha, jehe chonda que tsjenguijna co tsanchjandaha jeha nihngo sinchexinhi tomi para ixin jehe ncha. Jañá cai nihngo nchao tsjenguijna nchiganha que ndoa rrongondehe.

¹⁷ Cain xí que ttetonha jian ngain nihngo jiquininxin icha tsje respeto, co jiji icha ndoa de ixin nimé que nichja cain tiempo ngayehe chojni co nchecoeha na na. ¹⁸ Ixin ndačo ngain tti jitaxin Palabré Dios: “Ttengueha ra coxintá nchísen are jitonndai va trigo.” Co cai ndačo: “Tti xinchehe xa chonda que rroxenguehe xa hna tomi xa.”

¹⁹ Jaha ncheha caso tti icha chojni tsjanguihi na ná xí que ttetonha ngain nihngo si seha yó o ní chojni que vicon tti joinchehe xí mé. ²⁰ Pero tti chojni que sinchehe cosa jianha, jaha chonda que rrochjehe na consejo ngattoxon con cainxin chojni, para que icha na tsose na co isincheha na cosa jianha. ²¹ Ngattoxon con Dios co Jesucristo, tti chonda cain joachaxin, co ngattoxon con cain ángel que jehe coinchiehe, janha rritetonha que jaha nchehe cain jiji jian, co nchehe xajeho para cainxin chojni masqui amigoo o chojni que ningaconha. ²² Saho tsjehe jian para saqué ná chojni que tsetonha ngaxinhi nihngo ixin si sanjo joachaxin ngain ná chojni que jinchehe jianha, icha chojni rroaxaon que cai jaha ntaxoxinha cosa jianha. Ttjho cuidado para que tti jianha seha nganji.

²³ Co diha jeha jinda, sino que dihi nchion vino cai ixin nchion tsje nchanho jaha ttín tsé.

²⁴ Tti jianha que nchehe canxion chojni nchao dicon ni icha saho que Dios sinchejuzguehe na, pero tti jianha que nchehe icanxin na diconha ni hasta nchanho mé. ²⁵ Cai dicon ni tti jian que nchehe chojni, co masqui diconha ni daca cain tti jian que jehe na nchehe na, pero choha sema cainxin para cainxin tiempo.

6

¹ Tti chojni que nchehe xa chonda que rrochonda tsje respeto ngain xinajní, para que xonhi chojni rronichja feo de ixin nombré Dios co ni de ixin tti ján na tjagoe na chojni. ² Si xinchehe xa chonda xa xinajni que ditticaon Jesús, xinchehe xa mé choha rrochonda xa icha tsjeha respeto jeha ixin cayoixin na ditticaon na ngain Jesucristo. Pero xinchehe xa mé chonda xa que sinchehe xa icha xa ixin tti sayé xa mé ditticaon Jesús co jehe xa rinao xa inchin ná xanchó xa. Jaha, Timoteo, ndache na co nchecoeha na de ixin jiji.

¿Quexehe tti icha nchao; sinao ni Dios o sinao ni tomi?

³ Si chonja chojni tsjagoe icha chojni tti jeha ndoa, co cosa mé jeha de acuerdo ngain tti jindačo tti jian que cjoagoo na Jesucristo, tti chonda cain joachaxin para ixin ján na, ni jeha de acuerdo ngain tti dotticaon

na, ⁴ chojni mé anto orgulloso, pero ñonhi nohe. Jehe joxon rinao chojni tsetocaho na ngain chijni, mexinxin chojni tsonchjoehe, rroningaonhe chó na, rroundache chó na feo, co ñaxaon chó na jianha, ⁵ co chojni que chonda joarrixaoen jianha ñonhi tiempo ttjexin toñaöhe chó co chonxinha na tti ndoa. Jehe na chojni mé ñaxaon na que tti jehe na nchecoenhe na chojni de ixin Dios, mé para sachaxin na anto tsje tomi. Jaha daçhenda de ngain chojni que nchehe jañá. ⁶ Ján ndoa que tti ján na nttocoenhe na chojni de ixin Dios anto rentte, pero jehó sí ján na te na contento conixin tti ján na ochonda na. ⁷ Ján na joihi na ngataha nontte pero ñonhi joicoho na, ni are satsji na ñonhi tsjinho na; ⁸ pero si chonda na tti jontte na co chonda na lonttoa na, conixin jehó yá otsje para que ján na sontte na contento. ⁹ Pero tti chojni que rinao rrochonda anto tsje tomi, ttixinha na ngain prueba ixin toin sinchehe na cosa jianha para rrochondaxin na icha tomi, co toin dinttji na ngain trampé joarrixaon que ñonhi ñé, co mé tti ndanchenihnga na co ndanchetján na. ¹⁰ Ixin tti anto rinao ni tomi, mé tti ttexinxin cainxin cosa jianha; co te canxion chojni ixin anto joinao na tomi mexinxin ndatjañehe na tti jehe na vitticaon na, co anto tangui conhe na ngain vidé na.

Pablo ndache Timoteo queñén sinchehe para rrotjañeha Dios

¹¹ Pero jaha xí que ditticaon Dios, mexinxin sattinguehe cain jihi. Co nchehe inchin Dios rinao, co rinao jehó Dios, chonda confianza ngain Dios, rinao cain chojni, chonda paciencia conixin jehe na, co dariha orgulloso. ¹² Jaha ncheluchá jian para tti jaha ditticaon, tsjehe jian para que jaha rrochonda iná vida naroaxin para cainxin tiempo. Ixin Dios vayaha jaha para cain jihi co jaha ondaço claro ngattoxon con tsje chojni ixin jaha jian ditticaon Dios ngattoxon con tsje chojni. ¹³ Co jai ngattoxon con Dios, tti chjé vida cainxin cosa que jí, co ngattoxon con Jesucristo, tti cai ndaço jian are ndaço cain tti ndoa ngattoxon con Poncio Pilato; ngattoxon con cayoi na janha rritetonha ¹⁴ que ditticaon tti vitonha, co ttentoxinha, para que rrochondaha de quehe tsosattaxin, jaha nchehe mé hasta are tsí Jesucristo, tti chonda cain joachaxin para ixin ján na. ¹⁵ Co jehe tsí ngain tiempo que ondaço. Dios sinchehe jian cain jihi ixin jehe tti nacoaxinxon Dios co ngain jehe jí cainxin tti jian, jehe Rey de cainxin tti rey, co jehe tti Ttetonha de cainxin tti tetonha. ¹⁶ Co jehó jehe Dios tti ñonhi tiempo senhe, co jehe jí ngain joadingasán tti ñonhi chojni nchao tonchienhe. Ni ná chojni viconha jehe, co ni çhoha sicon na. ¡Jehe tti jiquininxin tsosayehe co jiquininxin cainxin joachaxin para cainxin tiempo! Amén.

¹⁷ Ttetonha tti chojni que chonda tsje tomi ngataha nontte jihi que sintteha na orgulloso, ni rroñaxaonha na que ixin tomí na tti icha tsjenguijna na, ixin mé ñonhi ñé. Icha jian rroñaxaon na ngain Dios que jichon, co tti chjá na cainxin cosa para que ján na nttogonda na. ¹⁸ Jaha tetonha na que sinchehe na tti jian para que rrochonda na tsje pero de ixin tti jian que jehe na sinchehe na, co ixin sintte na listo para tsonchjeyehe na icha chojni tti jehe na ochonda na. ¹⁹ Co jañá sintte na rico ngain Dios, co jamé jehe na nchao rrochonda na seguro ixin jehe na rrochonda na iná vida naroaxin que ñonhi tiempo tsjexin.

Nttihi joexin tti coetonha Pablo ngain Timoteo

²⁰Jaha Timoteo, tjañaha de nchehe cain tti coetonha Dios. Jaha ncheha caso tti chijni que tjao chojni, ixin chijni mé xonhi xé. Co ncheha caso tti nichja chojni que ndačo na ixin anto nohe na pero ndoaha, ²¹ixin chojni que xaxaon jehe tti anto nohe, nimé ndatjañehe na tti jehe na vitticaon na.

Que Dios sinchenciaon nganji. Amén.

Yoxin Carta Que Dicjin Pablo Para Ngain Timoteo

Pablo chjé joajna Timoteo

¹ Janha Pablo na, ná representanté Jesucristo. Janha tti rroanha na Dios ixin jehe joinao, para ndattjan chojni de ixin iná vida naroaxin que danjo Jesucristo. ² Janha rricjin na carta jihi para ixin jaha Timoteo que inchin xanhna que anto rinaho. Dios Ndodá na co Jesucristo, tti chonda cain joachaxin para ixin ján na, sinttanchaon nganji jaha co tsiaconoaha jaha co rrochjá tti chjoin que tsonohe ansean.

Tti ndacho Pablo de ixin Jesucristo

³ Cainxin tiempo que janha nttacoaxian Dios, janha xaxanho jaha; nchanho co ttié janha chjaha gracias ngain Dios tti janha nttaha xa ngain conixin ansenna roa inchin joinchehe nindogoelitona icha xančhjen. ⁴ Janha anto xaxanho de ixin ndacon que jaha cointtji are janha sacjoixin de nganji jaha, co janha rinaho sicon jaha para anto rrochahna janha. ⁵ Janha xaxanho ixin jaha ndoa jian ditticaon. Jangoelítá Loida co janná Eunice anto vitticaon na, co janha chonda seguro que jaha cai ditticaon jamé.

⁶ Mexinxin janha rritetonha jaha que nchegonda tti joachaxin que chjá Dios are janha coín rana ngataha jaha. ⁷ Ixin Dios rinaoha que ján na rroxaon na, mexinxin Dios chjá na Espíritu Santo co Espíritu mé chjá na joachaxin co ttjenguijna na para rinao na chojni, co chjá na jian joarrixaon. ⁸ Jaha chondaha joasoaxin para rronichja tti ndoa que jaha noha de ixin Jesucristo, tti chonda cain joachaxin para ixin ján na, co ni chondaha jaha joasoaxin de ixin janha cai tti rriaxinna de ixin causexin jehe. Sino que jaha dittoaxin tsonha tti anto tangui que tsí de ixin causexin tti jian joajna co Dios sinttasoji jaha. ⁹ Dios tti chjá na iná vida naroaxin, co jehe coinchiá na para que ján na sontte na jian ngain jehe, pero jeha de ixin tti jian que jointtoho na, sino que ixin jehe oxaon jañá, co ixin jehe rinao na ján na ixin dotticaon na Jesucristo. Dios joinao cain ján na icha saho que nontte rrogeue, ¹⁰ co jai jehe cjoagoa na que ján rinao na ixin rroanha Jesucristo, tti chjá na iná vida naroa. Co jehe Jesús joinchexantte joachaxin de tti ndadenhe ni, co joinchegonda tti jian joajna para cjoago iná vida naroaxin que ichoha tsjexin.

¹¹ Dios tti coinchiehe na janha para rronichja tti jian joajna mé, co rroanha na janha para sarihi ná representanté Jesucristo para sintta-coán chojni que jeha judío. ¹² Mexinxin jí razón que janha anto tangui jitonna de ixin cain cosa jihi. Pero janha chonda confianza ixin janha nona quensen ngain vitticanho co chonda seguro que jehe mé chonda joachaxin para sinchehe sigue tsjenguijna na ngain xa que jehe chjana hasta are tsí nchaoen jehe.

¹³ Jaha rroehe tti ejemplo jian que janha jointtacoanha co darihi ngain tti jian que ján na dotticaon na co rinao cain chojni. Jamé nchao sinchehe ixin Jesucristo ttjenguijna cain chojni jehe para nchehe na jamé. ¹⁴ Espíritu Santo que jí nganji na tsjenguijna jaha para tsjiho cuidado ngain tti chjá Dios.

¹⁵ Inchin jaha onoha, cainxin chojni nonttehe Asia ndacointtona na jaonxinxon. Cai Figelo co Hermógenes ndacointtona na. ¹⁶ Que Jesucristo, tti chonda cain joachaxin, tsiaconoehe nindoha Onesíforo ixin jehe tsje ntthia cjoenguijna na, co jehe cosoeha que janha rriaxinna. ¹⁷ Co are jehe jói ntthi ciudad de Roma jehe cointtoeha de cjoé na janha hasta que vittja na. ¹⁸ Mexinxin janha nttatsán ñao Jesucristo que tsiaconoehe jehe ngain nchaoen jehe Jesús. Jaha jian xaxaon cai que jehe anto cjoenguijna na janha na ngain ciudad de Efeso.

2

Quexén sinchehe ni inchin ná jian xisoldadoe Jesucristo

¹ Timoteo, jaha inchin xanhna, tosoji jaha de ixin tti jian que chonda na ixin te na ján na ngain Jesucristo. ² Tti jaha coinhi que janha nichja de ixin Jesús ngattoxon con tsje chojni, mé tti nchecoeha icha xí que chonda jaha confianza ngain; xí que nchao sinchecoeha icha chojni tti jaha noha.

³ Jaha ttixinha ngain tti anto tanguí que tsonha inchin ná jian xisoldadoe Jesucristo. ⁴ Ni ná xisoldado que jí ngain xé čhoha sinchehe xa caso vidé iná chojni que jaha soldado ixin chonda xa que sinchehe xa jeha inchin tsetonha xittetonhe xa. ⁵ Co cai ná tti tsontaon čhoha sayé ni ná premio si jehe rrotsontaonha inchin jiquininxin ná juego. ⁶ Tti nchehe xaxa ngataon jngui chonda derecho que jehe tti saho rrotsín tti soanxin ngataon jngui mé. ⁷ xaxaon tti janha ndačhjan, co Jesucristo, tti chonda cain joachaxin, tsjenguijna jaha para tsinxin cain.

⁸ xaxaon Jesucristo, tti xechonxin de ngacjén nindadiguenhe co tti cjoixanntí icha xančhjen de rey David. Co jihi tti ndačo tti jian joajna que janha ndattjan tsje chojni. ⁹ Causexin tti jian joajna jihi janha tanguí jitonna hasta janha rriaxinna co rričoaxin conixin cadena inchin ná chojni que joinchehe tsje cosa jianha. Pero tti jian joajna de ixin Dios, čhoha sečoah joajna. ¹⁰ Mexinxin janha ttixinna cain tti anto tanguí jihi para ixin cain chojni que Dios coinchiehe sayé na iná vida naroaxin que anto jian co que xonhi tiempo tsjexin. Co mé ján na nchao rrochonda na ixin te na ngain Jesucristo.

¹¹ Palabra jihi ndoa:

Si ján na ndavenhe na conixin jehe, cai sonttechon na conixin jehe.

¹² Si ján na tsixian na are anto tanguí tsoan na, cai ján na rrochonda na parte ngain tti ttetonha jehe.

Pero si rrondačo na nahi de ixin jehe, cai jehe rrondačo nahi de ixin ján na.

¹³ Si ján na cainxinha tiempo dotticaon na, pero jehe ján cainxin tiempo rinao na ján na ixin Dios čhoha rrondačo nahi de ixin jeha mismo.

Ná xinchehe xa jian

¹⁴ Nche xaxaon chojni jaha jihi co ttetonhe na ngattoxon con Dios, tti chonda cain joachaxin, que tsetocaoha na chojni de ixin chijni. Ixin chijni jihi xonhi xé, jeha nchehe jianha ngain chojni que ttinhi. ¹⁵ Jaha tsjehe quexén nchehe para que tonchienne ngattoxon con Dios inchin ná xinchehe xaxa jian que rrochondaha xa que tsosoé xa. Co jian nchecoeha icha chojni quehe ndačo tti jitaxin Palabré Dios. ¹⁶ Jaha ncheha caso tti

chijni xonhi xé que nichja chojni, ixin tti chojni que nichja jamé icha co icha ndaditján na ngain cosa jianha. ¹⁷ Co jehe tti chojni que nichja na, mé tsinga inchin tti chin que anto daca ncherrenga nntao. Jehe jiji tti jitonhe Himeneo co Fileto. ¹⁸ Chojni jiji ndavachjenda na de ngain tti ndoa ixin ndacho na que Dios ojoinchexechon chojni, co jañá tencheyehe na canxion chojni que icha saho vitticaon ngain Jesús. ¹⁹ Pero Dios vaquehe ná base anto soji co jehe mé chonda ná joajna que ndacho: “Dios, tti chonda cain joachaxin, chonxin chojni jehe”, co “Cain chojni que ndacho ixin jehe ditticaon Cristo chonda que sachjenda de ngain cosa jianha.”

²⁰ Ngain ná nchia jie jí jeoha traste de oro co plata, cai jí traste de nntá co nchechin. Ttoha traste mé para dondehe na ngain chonja quiai, co ittoha traste para dondehe na cain nchanho. ²¹ Si sachjexin ni de ngain cain cosa jianha, jehe ni sintte ni inchin tti traste de joxon oro, co Jesucristo, tti chonda cain joachaxin, nchao sinchegonda ni ngain quexeho xa jian.

²² Satinguehe cain tti nchaoha que xaxaon ni are xa tsjeha nano chonda ni, co roehe ná vida nao, co ditticaon Jesús, rinao cain chojni co ttetocoha icha chojni. Jañá nchehe jaha conixin cain chojni que chonda ansén na roa que nchetsenhe na ñao Jesucristo, tti chonda cain joachaxin, para jehe tsjenguijna na. ²³ Jaha ncheha caso tti chojni xonhi xé que nichja chojni, jaha onoha que chojni mé nchequeto chojni. ²⁴ Ixin nchaoha para ná tti nchehe xé Jesucristo tsetocaho iná chojni. Sino que jehe chonda que sehe jian ngain cain chojni. Chonda que sehe jian co rrochonda paciencia ngain chojni. ²⁵ Co are rrondache tti chojni que ditticaonha ixin tsentoxinhi na vidé na, pero rroxaxaonha ixin jaha icha jian, sino que chonhe co nchetsenhe ñao Dios ixin sinchequentoxinhi vidé na co tsjenguijna na rrochonxin na cain tti ndoa. ²⁶ Jamé para que jehe na rroxingamehe na co satsingaxin na de ngain tti trampé inchínji tti jehe na teaxinhi na para sinchehe na inchin jehe inchínji rinao.

3

Quexén sintte chojni are ochiaon tsjexin mundo

¹ Cai chonda jaha que tsonoha jiji: que ngain tiempo que ochiaon mundo sitján, tsí tsje nchanho tangui para ixin chojni. ² Anto rroxaxaon na de ixin jeha na, anto sinao na tomi, tsonohe na ixin jeha na ni icha jian, co tsonohe na que jeha na ni icha chjoin te. Co rronichja na nchaoha de ixin Dios, sitticaonha na ndodé na co janné na, xonhi tiempo sanjo na gracias ngain tti chojni que sinchehe jian ngain na, co sinchesayeha na Dios. ³ Co sinaoha na iná chojni ni tsiaconoeha na chojni, rronichja na tti ndoaha de iná chojni, tsinttoeha na de sinchehe na cosa jianha que jehe na rroxaxaon na, jehe na rroché na are sinchehe na feo ngain iná chojni, co rroningaconhe na cain tti jian. ⁴ Co sintte chojni traicionero, sitticaon na jeha na, co rrondacho na ixin jehe na icha chonxin na. Co jehe na sinchehe na inchin jehe na rroxaxaon na, co irroxaxaonha na Dios. ⁵ Jehe na tsji na ngain nihngo, pero rrondacho na que Dios chondaha joachaxin.

Jaha diyeha cain chojni jiji. ⁶ Ixin chojni jiji dixinhi nchiandoha nchí que xaxaonha jian co tonohé ncha feo de ixin tsje cosa jianha que nchehe ncha. Co chojni mé dixinhi na nchiandoha nchí mé co nchecoeha na ncha tti ndoaha. Nchí jiji, xaxaon ncha jeha de ixin tti jehe ncha rinao ncha, ⁷ co cainxin tiempo tetanguí ncha pero xonhi tiempo ttinxin ncha

tti ndoa. ⁸ Inchin tti xí Janes co Jambres coñao ngain tti ndačo Moisés, jañá cain chojni mé toñahe na tti ndoa. Xí que nchehe jamé ngain nchí, jianha jí ngain joarrixaen xa co ndoaha ixin ditticaon xa Jesús. ⁹ Pero cosaha tsje sinchehe xí mé ixin cainxin chojni tsonohe na ixin xí mé xonhi xé tti xaxaon xa, jañá inchin conhe Janes co Jambres tti xí que coñahe Moisés.

Ultima cosa que Pablo coetonha ngain Timoteo

¹⁰ Pero jaha ojoinchehe caso tti janha jointtacoanha, que xén jointtaha, co que xén rinahó icha chojni. Jaha jian chonxin tti janha ditticanho, co ixin chonda paciencia, co ixin janha coixinna ¹¹ are anto tsje chojni coñao nganji na co are anto tangui conna. Jaha noha cain tti janha conna ngain ciudad de Antioquía, co ngain ciudad de Iconio, co ngain rajna Listra. Co jaha noha cain tti anto tangui que conna ixin anto tsje chojni coñaona, pero Jesucristo, tti chonda cain joachaxin, cjoenguijna na para vattoa cain yá. ¹² Co ndoa que anto tangui tsonhe cain chojni que rinao sintte jian para ixin Jesucristo. ¹³ Pero cain tti chojni jianha co tti chojni que ncheyehe icha chojni, jehe na cada nchanho icha jianha sintte na. Jehe na sincheyehe na icha co icha chojni, co chojni sincheya ngain na cai.

¹⁴ Pero jaha darihi soji ngain tti jaha coangui, co tti jaha ovitticaon. Jaha noha quensen jointtacoanha, ¹⁵ ixin de xa nchín jaha ojoatsoan quehe jitaxin Palabré Dios, co mé tti sinttanoha icha jian ixin nchao sayé ni iná vida nroa si ditticaon ni ngain Jesucristo. ¹⁶ Cain tti xón que jitaxin Palabré Dios, jehe Dios tti chjé chojni joajna para que conohe na quehe palabra cjin na ngain xón mé. Co xón mé para que ján na tsonoa na tti ndoa, co para nntanoa na ixin nntoho na jianha, co que xén tsentoxinhi na vidá na, co xon mé tsjenguijna na sontte na ngain ná vida nao. ¹⁷ Mexinxin tti xí que nchehe xé Dios nchao tsangui xa tti rinao Dios para que jehe xa nchao sinchehe xa cainxin jian.

4

¹ Janha anto rritetonha ngattoxon con Dios co ngattoxon con Jesucristo, tti chonda cain joachaxin, co tti tsí inchin rey para sinchejuzguehe cain chojni, masqui ondavenhe na o xa techon na. ² Janha rritetonha que rrondache chojni joajné Dios. Jaha chonda que rrondache chojni joajna mé, masqui rinao na tsinhi na o rinaoha na tsinhi na. Ncheguiticaon na joajna mé, chjehe na consejo, ttjenguijna na para sitticaon na, co chonda paciencia are sinchecoehne na joajna mé. ³ Ixin tsí tiempo que chojni isinaoha na tsinhi na tti jian que ján na nttocoehe na na co sinchehe na inchin jehe na sinao na. Jehe na tsjé na anto tsje ximaestro para sinchecoehne xa na inchin jehe na sinao na tsinhi na. ⁴ Sinaoha na tsinhi na tti ndoa, co sinchehe na caso cain cuento que xonhi xé. ⁵ Pero jaha cainxin tiempo darihi conixin joarrixaon jian co ttixinha ngain tti anto tangui, co nchanho co nchanho ndache chojni tti jian joajna co nchehe jian cain xa.

⁶ Janha ochian joí nchanho que chojni nasoenxon na na co ojitonchiaon hora que janha tsinttoa vida jiji. ⁷ Janha atto jointtaluchá para ixin Jesús, co janha atto coinga ngoixin nntié Jesucristo hasta que joexin vidana, co cainxin tiempo janha vitticanho. ⁸ Co jai jichonna premio para ixin tti vida nao. Co Jesucristo, tti chonda cain joachaxin, rrochjana premio mé ngain nchanho que tsí, co jehe mé ná juez jian

ngain nchanho que tsí. Co jeoha janha rrochjana, cai rrochjé cain chojni que anto rinao tti nchanho que tsí jehe Jesucristo.

Joajna que cjin Pablo para jeho Timoteo

⁹ Jaha tsjehe quexén sinchehe para que sitsjena toin, ¹⁰ ixin Demas ndacointtona janho ixin icha joinao cosa ngataha nontte, co sacjoi para ngain ciudad de Tesalónica. Co Crescente sacjoi para nonttehe Galacia, co Tito sacjoi para nonttehe Dalmacia. ¹¹ Jeho Lucas jí nganji janha. Ttjé Marcos co sicohna ixin jehe mé tti nchao tsjenguijna na ngain xa que janha chonda. ¹² Tíquico janha rroanha para ngain ciudad de Efeso. ¹³ Are jaha sihi, sicohna noxana noxa bocamanga que janha cointtoa ngain nchiandoha Carpo ngain ciudad de Troas, cai sicohna librona co icha rinaho sicohna xonna.

¹⁴ Alejandro, tti nchechjian cosa de chia, joinchehe atto tsje cosa jianha nganji janha. Jesucristo, tti chonda cain joachaxin, tsjenguehe hna cain tti jehe joinchehe. ¹⁵ Jaha ttjiho cuidado de ixin jehe, ixin jehe anto ningaconhe tti ján na ndačo na.

¹⁶ Are saho nttiha que janha ndačhjan ngain xijuez cain tti ndoa que janha nttaha, ni ná chojni cjoenguijnaha na janha; cainxin na ndacointtona na janho. Janha rinaho que Dios irroxaxaonha quehe joinchehe jehe na. ¹⁷ Pero Jesucristo, tti chonda cain joachaxin, cjoenguijna na janha co joinchesoji na para que janha nchao joena ndattjan chojni que jeha judío tti jian joajna. Jañá jehe Jesús coančhاندaha na janha para ndarroguenhe na, ¹⁸ co tsančhاندaha na janha de cainxin cosa jianha co jehe tsenchjinha na janha para ngain tti lugar que jehe ttetonha ngajni. ¡Jehe jiquininxin tsosayehe para cainxin tiempo! Amén.

Pablo joexin cjin carté co rroanha joajna

¹⁹ Janha rroanha joajna para ixin Prisca co Aquila, co ngain nindoha Onesíforo. ²⁰ Erasto vittohe ngain ciudad de Corinto, co Trófimo nihi cointtoa ngain rajna Mileto. ²¹ Jaha tsjehe quexén sinchehe pero sihi icha saho que ngain tiempo quin, si nchao. Cai Eubulo, Pudente, Lino, Claudia co cain icha chojni que ditticaon Dios nttihi rroanha joajna para ixin jaha.

²² Jesucristo, tti chonda cain joachaxin, sehe nganji, co Dios sinchenchaon nganji cainxin jaha ra nttiha. Amén.

Carta Que Dicjin Pablo Para Ngain Tito

Pablo chjé joajna Tito

¹ Janha Pablo na, ná xinchehe xé Dios co ná representanté Jesucristo. Janha tti jehe rroanha na para que janha ttjenguijna chojni que Dios coinchiehe para jehe na ditticaon na, co para que jehe na satsoan na tti mero ndoa de ixin tti dotticaon na, ² co para jehe na rrochonxin na que seguro rrochonda na iná vida naroa que xonhi tiempo tsjexin. Dios čhoha sincheyaxon, co icha saho que nontte rroquehe, jehe seguro ndačo ixin ján na rrochonda na vida mé. ³ Co jai, mero ngain tiempo que jehe coinchiehe, jointtagatsoan na joajné, co joajna mé tti janha rrinichja. Dios tti ttjenguijna na coetonna jamé. ⁴ Janha rricjinha carta jiji, Tito; jaha inchin xanhna ixin vitticaon Jesucristo are janha jointta-coanha jaha. Dios Ndodá na co Jesucristo, tti chonda cain joachaxin para ixin ján na co tti danjo iná vida naroa, sinttanchaon jaha, co sinttaniha jaha ngain ansean, co rrochjá tti čhjoin que tsonohe ansean.

Quexehe xa jinchehe Tito ngain Creta

⁵ Are cointtoha ngain tti nontte que dinhi Creta que jí ngosine ndachaon, jamé para que jaha rrocjaha tti xa que xa vitján conhe, co para jaha cjoé xí que tsetonha ngain nihngo cada rajna inchin janha coetonha jaha. ⁶ Co xaxaon jaha ixin xí mé chonda que sehe xa jian ngain vidé xa para que ni ná chojni chondaha na de quehe sinchesattexinha xí mé. Co čhoha chonda xa yó nčí nacoa tiempo, co cain xenhe xa chonda xan que ditticaon xan Dios co xonhi cosa jianha joinchehe xan ni tsoñaoha xan de ixin tti sitonhe xan. ⁷ Tti ttetonha ngain ningoe Dios chonda que nchehe jamé ixin jehe nchehe xa para ixin Dios, mexinxin chonda que jehe dicao ná vida jian. Seha terco co ndacoa sinchehe ngain cain chojni, rrocoanha ni čhinttoha sehe, ni sinoaha tomi que sachaxin de ngain cosa jianha. ⁸ Jehe chonda que sayé chojni que tsji ngain nchiandoha, co jehe chonda que sehe na xí que nchehe jian, co sehe jian de ngain joarrixaoen, co sinchehe inchin jiquinixin, co sachjeyexin de ngain tti jianha. Jehe chonda que sinchesayehe Dios, co sincheha jeho inchin rinao cuerpoe. ⁹ Chonda que rrorroé tti joajna ndoa que jehe cocoenhe para que jehe cai nchao sincheanimá icha chojni are sinchecoenhe na co para que sincheguitticaon tti chojni que ditticaonha joajné Cristo.

¹⁰ Ixin jí atto tsje chojni que toñaon nganji na co de cainxin na, chojni judío tti icha xonhi xé tti nichja na co ncheyehe na icha chojni. ¹¹ Cain chojni mé chonda que tsejehe ni rroha na ixin ncheguitticaon na tsje familia ixin tjagoe na na tti jiquininxinha jeho para dachaxin na tomi, co jianha jí tti tenchehe na.

¹² Ná profeta que vehe nttiha ngain mero nonttehe Creta, ndačo janhi de ixin chojni ngain Creta: “Chojni ngain Creta cainxin tiempo nichja na cosa que ndoaha, co te na inchin coxigo čhintto ngagaha jna, co atto xengo na, co atto sehe na.” ¹³ Co ndoa tti jehe ndačo. Mexinxin jaha nchesattehe na soji para sintte na jian ngain tti ditticaon na, ¹⁴ co para que sincheha na caso tti cuento que diřaxaon chojni judío, ni sincheha na caso tti ttetonha tti chojni que rinaoha ditticaon tti ndoa.

¹⁵ Para ixin tti chojni que chonda joarrixaoen jian, para ixin jehe nimé cainxin cosa jian co roa cosa; pero para ixin tti chojni que ditticaonha co ni joarrixaoen na jianha, xonhi cosa jian para ixin jehe na ixin hasta joarrixaoen na co tti nchenihi ansén na para sinchehe na jianha, hasta cayoi mé jianha cai. ¹⁶ Jehe na ndačo na ixin chonxin na Dios, pero tti nchehe na tjago que ndoaha tti ndačo na, ixin icha chojni ningaconhe jehe na, co jehe na ningaconhe na cain tti ttetonhe na co xonhi xé ttjelé na para sinchehe na ni ná cosa jian.

2

Pablo ndache Tito ixin ndacoa sinchecoenhe chojni

¹ Are jaha nchecoenhe chojni chonda que nchecoenhe na inchin ndačo palabra que nichja tti ndoa. ² Nchecoenhe dačhichjan ixin rrocoanha, co ixin sinchehe jian para que chojni rroxaxaon na jian de ixin jehe, co ixin rrochonda ná vida nao. Co cai nchecoenhe dačhichjan ixin jian sitticaon, ixin sinao chojni, co ixin tsoncha are chojni feo sinchehe na ngain. ³ Xajeho ngain načhichjan cai, nchecoenhe ixin sinchehe inchin jiquininxin ngattoxon con Dios co ixin rronichjaha cosa que jiquininxinha de ixin iná chojni, co ni rrocoanha. Jehe načhichjan mé chonda que sanjo ná jian ejemplo ⁴ para que jamé tsjagoe cain nčhí que icha tsjeha nano chonda para sinao nča xixihi nča conixin xenhe nča, ⁵ co para rrochonda nča jian joarrixaoen nča, para xonhi jianha sinchehe nča, para sicao nča cuidado ngain nchiandoha nča, para sincheniha nča tti sanjo nča ngain icha chojni, co para sitticaon nča tti rrondačo xixihi nča. Cain jihi sinchehe nča para que xonhi chojni rronichja mal de ixin joajné Dios.

⁶ Cai ncheanimá xanxí que xa tsjeha nano chonda para sintte jian joarrixaoen xan, ⁷ co jaha mismo chonda que chjehe xan ná jian ejemplo de cainxin cosa. Co are sinchecoenhe chojni, nchecoenhe na nao conixin respeto. ⁸ Jaha nichja palabra jian para que xonhi chojni nchao rronichja jianha de ixin palabra mé. Jañá tsosoé quexeho chojni que tsoñao nganji jaha ra co čhoħa rronichja jianha de ixin jaha ra.

⁹ Ndache ninchehe xa que sitticaon na cain tti ttetonha xinajní na; sintte ansén na čhjoin para ixin jehe xa, co rronichjanguiha na xa. ¹⁰ Co tseha na cosé xa, sino que sintte na jian chojni para que cainxin icha chojni sicon na quexén vidé na co jamé rrochonxin na ixin anto čhjoin čho Palabré Dios, tti chjá cain na iná vida naroa.

¹¹ Ixin Dios cjoagoa na tti jian que jehe nchehe nganji na para ttjen-guijna cain chojni para sayé iná vida naroa que jehe danjo. ¹² Co tti jian mé que ttixin de ngain Dios tjagoa na ixin chonda na que tsinttohe na cosa jianha co tti nchaoha que ján na xaxaon na ngataha nontte jihi, co sonttoho na cosa ngataha nontte jihi inchin nchehe chojni de jian joarrixaon, co chonda na que rrochonda na ná vida nao inchin Dios rinao. ¹³ Para que jamé rrochonhe na tti nchanho que jehe ndačo are socon na rroxago tti chíxo que tsiaho Dios, que chonda anto tsje joachaxin, conixin Jesucristo, tti danjo iná vida naroa. ¹⁴ Jehe joanjo cuerpoe para ndavenhe para ixin ján na para que danjo iná vida naroa co para que joincheroa almá na para que ján na sontte na chojní jehe; chojni que anto sinao sinchehe tti jian.

¹⁵ Cain jihi tti jaha chonda que tsjagohe chojni, co ncheanimá na, co chjehe na consejo conixin cainxin joachaxin que jaha chonda de ngain Dios. Jaha danjoha oportunidad para que rrořaxaonha chojni ixin jaha řonhi řá.

3

Tti jiquininxin sinchehe chojni que ditticaon Jesucristo

¹ Ncheřaxaon chojni que sitticaon na cain gobernación co cain tti ttetonha, co sittoexin na sinchehe na quexeho cosa jian. ² Ndache na que rronichjaha na jianha de ni ná chojni, ni tsetocaoha na chojni, co sinchehe na cain cosa jian ngain icha chojni co sintteha na orgullosa ngain icha chojni.

³ Ixin cai ján na are saho vechonxinha na co vagotticaonha na ngain Dios, co vacjin na inchin chojni que ndadiguitján. Co ján na gontte na inchin ninchehe řa de ngain cain tti jianha que cuerpoa na joinao, co de ngain cain tti jianha que vanttařoxian na vanttoho na. Vanttoho na cosa jianha co vaconchjoá na ngain chojni co vacoňao na ngain na co jaon na vacoňaohe chó na. ⁴ Pero are Dios, tti chjá na iná vida naraa, cjoagoo na ixin jehe jian nchehe co ixin jehe rinao cain chojni, ⁵ are mé jehe cjoenguijna na para que chonda na iná vida naraa. Pero jeha ixin ján na jointtoho na ná cosa jian, sino que ixin jehe coiaconoá na. Jehe joinchehe jamé are Espíritu Santo cjoén almá na, co mexinxin coentoxinhi vidá na co chjá na iná vida naraoxin. ⁶ De ixin Jesucristo, tti danjo iná vida naraa, Dios anto chjá na joachaxin de ngain Espíritu Santo ⁷ para que conixin tti jian que joixin de ngain jehe, ján na jamé tsojian na co sayé na tti iná vida naraoxin que řonhi tiempo tsjexin que ján na techonha na.

⁸ Palabra jihi atto ndoa. Co rinaho que jaha anto tsje nttiha rrondache chojni cain cosa jihi para que tti chojni que ditticaon Dios sinchehe na tti jian. Cain cosa jihi jian co ttjenguijna cain chojni. ⁹ Pero jaha ncheha caso tti chijni que řonhi řé, ni tti jitaxin de ixin queřén joinchehe nigoelito icha řanřhen are saho, ni ncheha caso tti ningaconhe chó chojni, ni tti ttetocaho chó na de ixin queřén ttetonha ley que vayé Moisés. Cain cosa mé řonhi řé co ttjenguijnaha chojni.

¹⁰ Si řhonja chojni santsjenda chojni de ngain nihngo, jaha nichjehe chojni mé co ndache ná o yó nttiha que isincheha jaňá, co si rrořchoha sinttaha caso, jaha denguxin chojni mé de ngayehe chojni que ditticaon Jesucristo. ¹¹ Ixin jaha onoha que chojni mé ocjamangui joarrixaoen, co tti jianha que nchehe chojni, mé tjago ixin jianha jehe.

Tti ndařho Pablo para jeha Tito

¹² Are janha rrorroanha Artemas o Tíquico, jaha tsjehe queřén sinchehe pero jaha sihi sitsjena ngain rajna Nicópolis ixin janha ořaxanho que nttiha sattoxin tiempo quin. ¹³ Conixin cainxin tti nchao sinchehe jaha, ttjenguijna xiabogado Zenas co cai Apolos, co chjehe na tti rrogondehe na para ngain tti satsji na para que řonhi sitjaňehe na. ¹⁴ Co ttjenguijna cain chojni que ditticaon inchin ján na para que tsanguí na sinchehe na jian co ttjenguijna na chojni are jehe na rrogondehe na para que vidé na sonda para ixin Dios.

Pablo joexin cjin carté co rroanha joajna

¹⁵ Cainxin chojni que te nganji janha rroanha na joajna para ixin jaha. Chjehe joajna cain amigoa na que ditticaon na Jesucristo nttiha. Que Dios sinchenciaon nganji ra. Amén.

Carta Que Dicjin Pablo Para Ngain Filemón

Pablo chjé joajna Filemón

¹ Janha Pablo na que rriaxinna jai ngain cárcel ixin causexin Jesucristo, rricjinha carta jiji janha conixin Timoteo para nganji jaha Filemón. Jaha xicompañerona na de ngain xa que nttaha na co anto rinaho na jaha. ² Co cai carta jiji para ngain chojni que ditticaon Jesucristo que xatte ngain nchiandoi para servicioa ra, co cai para ngain nchi que dinhi Apia que cai ditticaon ncha Jesucristo, co xí que dinhi Arquipo tti ttjenguijna na ngain xé Dios. ³ Dios Ndodá na co Jesucristo, tti chonda cain joachaxin, sinchenchaon nganji ra co rrochjá ra tti chjoin que tsonohe ansean ra.

Pablo ché ixin Filemón anto rinao co ditticaon Dios

⁴ Janha cainxin tiempo chjaha gracias ngain Dios de ixin jaha, Filemón, co xaxanho jaha are janha nttacoanxian Dios ⁵ ixin janha coian que jaha rinao co jian ditticaon Jesucristo co ixin cai rinao cain chojni que ditticaon jehe. ⁶ Janha danchiá Dios que tti chojni que ovitticaon Jesucristo ixin jaha ndache na, chojni mé icha tsinxin na tti jian que Jesucristo rroán na. ⁷ Janha atto chahna co darihi animado ixin jaha rinao cain chojni hasta que anto jian nchehe ngain cain chojni que ditticaon Jesucristo.

Pablo danchia ná joatotsenhe ñao para ixin tti nchehe xa Onésimo

⁸ Mexinxin masqui chonda derecho janha para tsetonha quehe chonda que sinchehe jaha, ⁹ pero jehorinaho sinttatsanha ñao ixin janha anto rinaho jaha. Janha Pablo na, ojonchjan na co jai rriaxinna ngain cárcel ixin causexin Jesucristo, ¹⁰ co janha danchiaha jaha ná joatotsenhe ñao na para ixin Onésimo, tti joigoan inchin xanhna nntihi ngain cárcel tti vitticaon Jesús are janha jointtacoán.

¹¹ Are icha saho Onésimo cjoí ná tti nchehe xa que xonhi xé para ixin jaha, pero jai jehe rrogondá na para ixin jaha co para ixin janha cai. ¹² Janha rrorroanha Onésimo iná. Dayehe inchin rocjiansenna janha. ¹³ Janha rrojinaho que jehe rroguittohe nntihi nganji na para que tti rrojinchehe jaha nganji na janha, jehe tti rrojinchehe mé cain nchanho que janha rriaxinna ixin causexin tti jian joajna. ¹⁴ Pero xonhi rinaho sinttaha si jaha sariha de acuerdo para que tti joatotsenhe ñao na que jaha sinchehe nganji janha jeha afuerza, sino que jehosi jaha jánsinao. ¹⁵ Puede Onésimo vachjenda de nganji jaha ná tiempo, para que jai jehe sehe nganji jaha para cainxin tiempo. ¹⁶ Co jai ijeha inchin ná tti nchehe xa ixin sehe icha jian que ná tti nchehe xa, rrocho, inchin ná xanchó na ngain Cristo que anto rinao na. Janha atto rinaho Onésimo, pero jaha chonda que icha sinao ixin jeha jehorinaho xinchhehe xá, nahí, sino que inchin ná xanchó para ngain Jesucristo, tti chonda cain joachaxin.

¹⁷ Jañá remé, ixin janha xicompañeroa na, dayehe Onésimo inchin rrogayena janha. ¹⁸ Si choan nchaoha joinchehe nganji jaha, o si choan jica nganji jaha, nchena cobro janha. ¹⁹ Janha, Pablo na, cjin na conixin rana co letrana janhi: janha tsjengaha hna, masqui janha nchao rrojinttaxaon que jaha rricana janha ngoixin vidá jaha. ²⁰ Jáñ, nchehe tti joatotsenhe ñao jiji nganji janha para ixin Jesucristo, tti chonda

cain joachaxin, co nchehe jamé para que rrochjana consuelo inchin ná xanchian de ngain Cristo.

²¹ Rricjin na nganji jaha ixin janha chonda seguro que jaha sitticaon tti janha danchiaha co nona que jaha sinchehe icha que tti janha danchiaha jaha. ²² Co cai janha danchiaha jaha ná cuarto tti janha sarihi, ixin janha chonda seguro que Dios rrochjá ra tti joachaxin que jaha ra danchiehe ra para que janha sasotsjaha ra.

Pablo joexin cjin carté co rroanha joajna

²³ Canxion chojni rroanha na joajna para ixin jaha, saho Epafra, xicompañerona ngain cárcel de ixin causexin Jesucristo. ²⁴ Co cai Marcos, Aristarco, Demas, co Lucas cain tti nittjenguijna na ngain xé Dios rroanha na joajna para ixin jaha.

²⁵ Que Jesucristo, tti chonda cain joachaxin para ixin ján na, sinchenchaon nganji cainxin ra. Amén.

Carta Para Ixin Chojni Judío Que Nichja Nguoia Hebreo

Dios joinchegonda Xenhe para que jehe nichjé chojni

¹ Ngain tiempo are saho, Dios joinchegonda profeta para que Dios nichja tsje nttiha co de tsje manera ngain nindogoelitoa na xančhjen.

² Pero jai, ngain nchanho tehe, Dios joinchegonda Xenhe para que jehe nichjá na ján na. Dios joinchegonda cainxin cosa que jí ngain mundo jihi pero de ixin jehe Xenhe, co jehe cointtoehe Xan cainxin cosa jihi para que jehe Xan tsetonha Xan. ³ Jehe Xenhe Dios mé tti Xan tjago glorié Ndodé Xan, co jehe Xan jí Xan mero xajeho inchin Dios jí, co jehe Xan, Xan jiquehe cainxin cosa de ixin palabré Xan, ixin palabré Xan chonda anto tsje joachaxin. Co are joexin jointtaroa na Xan ján na de cain tti jianha que teca na, jehe Xan sajoiguehe Xan ngain lado jian de tti lugar que retaha Dios nttiha ngajni.

Xenhe Dios chonda Xan icha joachaxin que cain ángel de Dios

⁴ Mexinxin Xenhe Dios joiguehe Xan icha importante que cain ángel de Dios, ixin Dios chjé jehe Xan de herencia ná cargo icha importante que cargoe cain ángel.

⁵ Ixin Dios xonhi tiempo ndačo ngain ni ná ángel janhi:

Jaha tti Xanhna;

janha chjaha vida jai.

Ni ndačhoha Dios de ixin ni ná ángel:

Janha sarihi Ndodé jehe,

co jehe sehe Xanhna janha.

⁶ Pero are Dios rroanha tti nacoa Xenhe, xansaho co icha jian ngataha nontte jihi, jehe ndačo:

Cainxin ángel de Dios chonda que sinchesayehe jehe Xan.

⁷ Co de ixin cain ángel de Dios, jehe Dios ndačo:

Janha nchao nttacjamanga cain ángel inchin chintto que jitja,

co cain ángel que nchehe xana janha nchao nttacjamanga inchin neje xohi.

⁸ Pero de ixin Xenhe Dios, jehe ndačo janhi:

Tti joachaxin que jaha chonda, oh Dios, xonhi tiempo tsjexin;

co tti jaha ttetonha, ján rritetonha inchin jiquininxin.

⁹ Jaha cain tiempo rinao cain cosa jian, co ningaconhe cain cosa jianha;

mexinxin janha, tti Dios de jaha, coinchiá jaha

co ndačhjan que jaha icha rrochaha

que cain nicompañeroa.

¹⁰ Co cai ndačo Dios ngain Xenhe:

Jaha, tti chonda cain joachaxin, desde are saho jaha tti joinchegonda nontte,

co jaha joinchegonda ngajni conixin rá.

¹¹ Nontte co ngajni ndatsjexin, pero jaha sarihi para cainxin tiempo.

Nontte co ngajni ndatsonttaxi inchin lontto.

¹² Co jaha tsjadoho nontte co ngajni jian inchin rrocji ná vestido,

co jaha tsentoxinhi cayoi cosa jihi inchin chojni ttentoxinhi lonttoe na.

Pero jaha cainxin tiempo sarihi xajeho,
co vidá xonhi tiempo tsjexin.

¹³ Co Dios xonhi tiempo ndačo ngain ni ná ángel:

Jaha darihi lado jian na

hasta que janha sinttagacha jaha de ngain cain tti ningaonha.

¹⁴ Cain ángel jehe espíritu para ngain xé Dios, co Dios roanha ángel mé para tsjenguijna cain tti chojni que sayé iná vida naroaxin.

2

Chonda ni que sicao ni cuidado para que sayé ni iná vida naroaxin

¹ Mexinxin ján na chonda na que icha tsjinho na cuidado de ngain tti ocoini na para que sachjendaha na de ngain tti nttiha ndoa. ² Tti joajna que Dios coetonhe ángel para joindačo ngain nindogoelitoa na xančhjen are saho, joajna mé Dios cjoago que ján ndoa. Co tti chojni que joincheha inchin coetonha joajna mé, Dios joinchecastigá na inchin jiquininxin na. ³ Mexinxin ján na ¿quexén satsinguehe na castigoe Dios si sonttoha na caso jehe tti vida naroaxin que danjo jehe Dios? Ixin Jesús mismo tti saho joindačo de ixin jehe vida naroaxin jihi, co después tti chojni que coinhi de ngain Jesús de ixin jehe vida naroaxin jihí cjoago na que ján ndoa, co jehe na ndattjo na na ján na de ixin vida naroaxin jihi. ⁴ Co Dios mismo joinchesegurá joajna de ixin vida naroaxin jihi ixin jehe cjoago tsje señal co milagro co icha cosa que joincheadmirá chojni. Co cai jehe Dios rroán na Espíritu Santo, tti chjá na cada na jejú tipo de joachaxin inchin jehe rinao.

Jesucristo vayá na para sontte na inchin xanchó jehe

⁵ Dios chjehe joachaxin cain ángel para que jehe tsetonha ngain mundo que tsí, de jehe tti mundo que janha na tenichja na. ⁶ Sino que ngain ná parte de tti jitaxin Palabré Dios, nttiha ndačo:

Oh Dios, ¿quedonda soixin xaxaon de ixin chojni?

O ¿quedonda soixin anto ta joachjaon de ixin chojni ngataha nontte nttihi?

⁷ Para nchion tiempo, soixin chjehe chojni icha tsjeha joachaxin que cain ángel,

pero cottimeja soixin chjehe na xajeho gloria que soixin chonda, co joinchesayehe na,

co chjehe na joachaxin para que jehe na ttetonhe na cain cosa que soixin joinchekhjian.

⁸ Co soixin chjú chojni joachaxin ngain cain cosa mé.

Jañá are Dios joanjo cain joachaxin ngain chojni para cainxin cosa, Dios cointtoeha ni ná cosa que sitticaonha ngain chojni. Pero masqui jamé, xa doconha na que cain cosa ditticaon ngain na. ⁹ Pero ján na chonxin na de ixin Jesús, que Dios chjú icha tsjeha joachaxin que cain ángel para nchion tiempo. Ixin Dios anto rinao cainxin chojni, mexinxin jehe joanjo Jesús para que ndavenhe para ixin cainxin na ján na. Co jai Dios chjú jehe gloria co nchesayehe ixin jehe ndavenhe masqui anto tangui.

¹⁰ Cainxin cosa que te ngain mundo jihi, te para ixin Dios co cain cosa mé te ixin Dios joinchekhjian; co Dios rinao que cainxin chojni que ocjan na chojni jehe rrochonda na parte ngain glorié jehe. Mexinxin Dios joinao que Xenhe Jesucristo anto tangui conhe Xan para que jehe Jesucristo vachje ná chojni jian, jamé jehe nchao ttjenguijna chojni

para rrochonda na iná vida naroaxin. ¹¹ Ixin cain ján na x̄o ocoroa na, conixin jehe tti jointtaroa na x̄ajeho nacoa Ndodá na chonda na. Mexinxin Xenhe Dios, Jesucristo, tosoeha de ncheguinhí ján na xanchó jehe. ¹² Inchin jehe ndačo ngain tti jitaxin Palabré Dios:

Janha rronichja de ixin soixin ngain xanchian,
co rrotsje na himno para ixin soixin, janha conixin icha chojni ngain nihngo.

¹³ Cai ndačo ngain tti jitaxin Palabré Dios:

Janha rrochonda confianza ngain Dios.

Co ndačo ngain iná parte:

Janha nttilhi rrihi, conixin cain chjan que Dios chjana.

¹⁴ Cain chjan mé chojni que chonda nntao co jni. Mexinxin Jesús cjoí chojni cai que chonda nntao co jni para que jehe nchao ndavenhe co jamé joinchexantte tti vechonda joachaxin para navagoenxon chojni, co mé rročo inchínji. ¹⁵ Co jamé Jesús joanjo libertad ngain cain tti chojni que anto x̄aon na ixin ndasenne na ixin chojni mé te na inchin esclavo ngain joax̄aon mé ngoixin vidé na. ¹⁶ Ixin seguro que Jesús joiha para joicjenguijna cain ángel, sino que Jesús joí para joicjenguijna cain chojni Abraham. ¹⁷ Co para que jehe joinchehe jamé, jehe chonda que cjoí chojni inchin cain xanchó jehe, para que jehe nchao ttiacnoehe cain ján na co para ixin ján na joiguehe ná jian dána ngattoxon con Dios. Co jamé jehe nchao joincheroa cain chojni de tti jianha que nchehe na de ixin tti anto tanguí conhe jehe. ¹⁸ Co ixin jehe mismo tanguí conhe co vitaha de rrojinchehe cosa jianha are ngataha nontte jiji, mexinxin jai jehe nchao ttjenguijna cain chojni que ditaha de sinchehe cosa jianha.

3

Jesús icha importante que Moisés

¹ Mexinxin, hermanos, jaha ra x̄o ocoroa ra ixin Dios jointtaguinhí ra chojni jehe, tsjehe ra jian ngain Jesucristo ixin jehe tti representanté Dios para ixin ján na, co jehe tti dána icha importante de ngain tti dotticaon na. ² Ixin Jesús jehe vanchehe jian cain tti rinao Dios, mexinxin Dios chjé x̄a jiji. Inchin Moisés cai vanchehe jian cain x̄a que jehe vechonda para ixin chojni Dios. ³ Pero Jesús jiquininxin icha tsosayehe que Moisés, jañá inchin tti nchechjian ná nchia icha jiquininxin tosayehe jehe que nchia mismo. ⁴ Cada nchia chonda que tonchjian nchia de ná chojni, pero Dios jehe tti joinchechjian cain cosa que jí. ⁵ Jamé, Moisés cjoí jian ninchehe x̄é Dios ngayé chojni Dios. Co jehe chonda x̄a de vandache chojni de ixin quehe rrojinchehe Dios después ngain na. ⁶ Pero Cristo, ixin jehe Xenhe Dios, jehe chonda joachaxin de ttetonhe chojni Dios, co mé ján na mismo, si ján na ndoa sonttoho na sigue jian sotticaon na co si rrochonda na confianza ngain jehe cainxin tiempo hasta ndasenne na co si sonttoho na sigue chjoin tsonoa na ixin techonhe na tti jian que sayé na de ngain Dios.

Dios rinao que chojni jehe sinchejogaha

⁷ Mexinxin ndačo Espíritu Santo ngain tti jitaxin Palabré Dios:

Jai, si jaha ra ttinhi ra tti ndačo Dios,

⁸ dintteha ra cha de ngain ansean ra, inchin vintte tti chojni judío que vitticaonha na tti ttetonha Dios.

co jehe na joinao na viconxin na paciencié Dios are vacji na ngagaha jna tti xonhi chojni jí.

⁹ Mexinxin ndačo Dios ngain Palabré:

Nttiha nigoelitoa ra xančhjen vaquenaxin na prueba masqui vicon na cain cosa que janha jointtaha ngoixin tti cuarenta nano que jehe na sacjoi na nttiha.

¹⁰ Mexinxin janha coñaho ngain chojni mé,

co ndačhjan: “Cain tiempo ndadiguitján na de ngain ansén na, co rinaoha na datsoan na tti nttiha que janha tjagoa na.”

¹¹ Mexinxin, janha coñaho ngain na co ndattjan na conixin ná juramento, que ixin jehe na čhoha rroguiji na tti rrojinchejogaha na conixin janha.

¹² Hermanos, ttjiho ra cuidado que ni ná de jaha ra rrochondaha ra ansean ra jianha que sachjendehe Dios que jichon, co isitticaonha ra ngain jehe. ¹³ Sino que cada nchanho ncheanimá chó ra, ná ra co ná ra are xa jí tiempo, para que ni ná de jaha ra sitticaonxinha ra ngain cosa jianha, co ansean ra tsochaha para ngain Dios. ¹⁴ Ixin si ján na sonttoho na sigue hasta ndasenne na, de rrochonda na tti confianza que ján na techonda na desde are nacoexinxon na gotticaon na, cottimeja ján na rrochonda na parte ngain Cristo.

¹⁵ Jañá ndačo ngain tti jitaxin Palabré Dios:

Jai, si jaha ra ttinhi ra tti ndačo Dios,

dintteha ra cha de ngain ansean ra inchin vintte tti chojni que vitticaonha na tti ttetonha Dios.

¹⁶ Co, ¿quexehe tti chojni que coinhi na tti ndačo Dios co después vitticaonha na? Mé cjoi cain tti chojni judío que Moisés joantsjexin de ngain nonttehe Egipto. ¹⁷ Co ¿quensen Dios coñao ngain ngoixin tti cuarenta nano? Mé ngain tti xajeho chojni judío que joinchehe jianha, tti chojni que ndavenxin ngagaha jna tti xonhi chojni jí. ¹⁸ ¿Co quensen ngain tti ndačo Dios conixin ná juramento que čhoha tsji na tti rrojinchejogaha na ngain Dios? Mé ngain xajeho chojni judío que vitticaonha tti ttetonha Dios. ¹⁹ Mexinxin ján na ttinxin na que jehe na čhoha joiiji na nttiha ixin jehe na vitticaonha na Dios.

4

¹ Mexinxin jai que ján na xa chonda na oportunidad de tsjin na sinttojogaha na ngain Dios, chonda que rrochonda na cuidado, no sea que čhonja de jaha ra čhoha tsji ra sinchejogaha ra ngain Dios. ² Ixin ján na cai coinhi na tti joajna ndoa que danjo iná vida naroa, inchin jehe na cai coinhi na. Pero para ixin jehe na xonhi xé que jehe na coinhi na mé, ixin masqui coinhi na, jehe na vitticaonha na. ³ Pero ján na xo ogotticaon na, ján na tti tsjin na sinttojogaha na ngain Dios. Pero para ixin tti chojni que vitticaonha Dios, para ixin jehe na conhe inchin ndačo Dios ngain tti jitaxin Palabré:

Mexinxin janha coñaho ngain na co ndattjan na conixin ná juramento, que ixin jehe na čhoha rroguiji na rrojinchejogaha na nganji na janha.

Pero ixinha jamé, jí lugar tti chojni nchao sinchejogaha ngain Dios ixin jehe ojincejogaha desde are jehe joehe xé de joinchechjian mundo.

⁴ Ixin ngain ná parte de tti jitaxin Palabré Dios ndačo janhi de ixin tti yatoxin nchanho:

Dios joinchejogaha ngain nchanho yatoxin de cain xa que jehe joinchehe.

⁵ Co ngain iná parte jitaxin janhi:

Sijiha na sinchejogaha na nganji na janha.

⁶ Co chojni mé que saho coinhi na tti joajna ndoa que danjo iná vida naraa, joiilha na joinchejogaha na ngain Dios, ixin jehe na vitticaonha na joajna mé. Pero te icha chojni que ján siji sinchejogaha ngain Dios.

⁷ Ixin tsje nano después de tti tiempo mé Dios cjan coin iná nchanho, co nchanho mé, jai. Co Dios joinchenichja David janhi de ixin nchanho jai inchin jitaxin ngain Palabré Dios:

Jai si jaha ra ttinhi ra tti ndačo Dios,
dintteha ra cha de ngain ansean ra.

⁸ Si Josué rroganjo ngain chojni Israel oportunidad jihi de rrojinchejogaha na ngain Dios are joihi na nonttehe Canaan, Dios irrocjanha rroganjo iná nchanho después. ⁹ Mexinxin jihi rročo ixin xa dittohe oportunidad para que chojni Dios sinchejogaha na jian ngain jehe.

¹⁰ Ixin tti chojni que nchejogaha ngain Dios, chojni mé nchejogaha de cain xé que jehe joinchehe, jañá inchin joinchejogaha Dios are joexin joinchehe xé. ¹¹ Mexinxin, ján na chonda na que rrotsjehe na quexen sinttoho na para que tsjin na sinttojogaha na ngain Dios, co tsjiho na cuidado que ni ná na sonttoha na inchin joinchehe cain tti chojni que vitticaonha tti ttetonha Dios.

¹² Ixin palabré Dios jichon co chonda joachaxin. Palabra mé icha yao que cain espada que chonda filo de yoixin lado. Co inchin espada nchao dattodoho hasta quexeho parte de cuerpoe ni, jamé palabré Dios dattodoho ngain almé co ngain espiritue ni. Co palabra mé tti jian nchenohe ni tti xaxaon ni co tti rinao ansén ni sinchehe. ¹³ Xonhi cosa jí que Dios joinchechjian que nchao sema de ngain jehe. Para ngattoxon con Dios cain cosa jixago, co ján na rrochonda na que rrondačo na ngain jehe cain tti jointtoho na.

Jesús jehe tti dána icha importante

¹⁴ Jesús, tti Xenhe Dios, mé tti dána icha importante para ixin ján na, co jehe tti cjoí joiguehe tti ttjen Dios. Mexinxin, ján na chonda na que sonttoho na sigue sotticaon na inchin ttetonha Dios. ¹⁵ Co jehe tti dána icha importante para ixin ján na, mé tti nchao tsiacoaná na ján na are jianha dotticaon na ixin jehe cai anto joitaha de rrojinchehe cain tipo de cosa jianha, pero jehe xonhi tiempo joinchehe ni ná cosa jianha.

¹⁶ Mexinxin, ján na tsonchienne na ngain tti ttjen Dios co rroxaonha na ixin jehe Dios anto rinao na, co jehe tsiacoaná na ján na co tsjenguijna na are ján na tanguí tsoan na.

5

¹ Cada dána icha importante para ngain chojni judío joixin de ngayé chojni judío, co Dios ttinchiehe jehe para que jehe sehe representanté Dios para ixin chojni mé, co para que dána mé saquehe cosa de ofrenda ngain alté Dios para que Dios sinchetjañehe chojni tti jianha que jehe na joinchehe na. ² Co ixin jehe dána mé nchehe cosa jianha inchin cain chojni, mexinxin jehe nchao rrochonda paciencia ngain tti chojni que tsjeha chonxin de ixin Dios co ngain tti chojni que ncheha jian. ³ Co ixin dána mé cai nchehe cosa jianha, mexinxin jehe chonda que danjo cosa para ngain Dios para que Dios sinchetjañehe tti jianha que jehe joinchehe

cai, ʒajeho inchin nchehe para que Dios sinchetjañehe tti jianha que nchehe cain chojni.

⁴ ʒonhi chojni siguehe dána icha importante de ixin jeho mismo, sino que Dios tti nchegayé chojni mé joachaxin jihi, inchin conhe ngain Aarón tti cjoí saho dána. ⁵ Co jañá conhe ngain Cristo cai; jehé vinha dána icha importante ixin jeho joinao, sino que Dios joinchegayé joachaxin mé; inchin Dios ndačo ngain Cristo:

Jaha tti Xanhna;

janha tti chjaha vida jai.

⁶ Cai ndačo Dios ngain Cristo ngain iná parte de tti jitaxin Palabré Dios:

Jaha ná dána para cainxin tiempo,

co jaha ʒajeho clase de dána inchin Melquisedec.

⁷ Are Cristo vehe nttihi ngataha nontte, jehé anto joinchecoanxinhi Dios co anto joinchetsenhe ñao Dios, co are joinchehe jamé, jehé nichja soji co hasta joinchequina ndacon para ngain Dios tti chonda joachaxin para que rrocanchjandaha Jesucristo para ndarroguenhe. Co Dios coinhi cain tti ndačo Cristo ixin jehé Cristo anto vanchesayehe Dios. ⁸ Mexinxin Cristo masqui jehé Xenhe Dios, jehé coanguí vitticaon joinchehe cain tti tetonha Dios de ngain tti anto tangui que conhe. ⁹ Co después que Cristo jañá vačhje anto jian, are mé jehé nchao danjo iná vida naroa que ʒonhi tiempo tsjexin ngain cain chojni que ditticaon ngain jehé. ¹⁰ Ixin Dios tti joincheguinihi Jesucristo tti dána icha importante, co ndačo ixin jehé ʒajeho clase de dána inchin Melquisedec.

Tti anto tangui que jí si tsinttohe ni tti confianza que chonda ni ngain Cristo

¹¹ Janha na ʒa chonda na tsje que rrondattjo ra de ixin asunto jihi, pero atto tangui para rrondattjo ra ixin jaha ra rinaoha ra ttinxin ra.

¹² Ovatto tsje tiempo que jaha ra ditticaon ra Jesucristo, co jai jaha ra onchao rrojinchecoenhe ra icha chojni de ixin Cristo. Pero jai jaha ra ʒa dondaha ra iná chojni que rrondattjo ra iná cain cosa icha tanguiha de ixin Dios. Cjan ra anto sojiha ra de ngain tti ditticaon ra inchin ná xanletsjochjan que chonda que sihi xan tsjin en lugar de sine xan comida soji. ¹³ Co tti chojni jamé, jehé na inchin tti xanletsjochjan que tetai, rročo ixin jehé na ʒa ttinxinha na jian quehe rročo tti vida nao. ¹⁴ Co tti comida soji, mé para ixin chojni yeye, que onohe dinchiehe quexehe tti jian co quexehe tti jianha.

6

¹ Mexinxin nttoho na sigue de tangui na icha de ixin Dios para que rocjan na inchin chojni yeye de ngain tti dotticaon na. Co tsinttohe na ná lado tti coanguí na are nacoexinxon na coanguí na de ixin Jesucristo, inchin queʒén ttentoxinhi ni vidé ni para isincheha ni cosa jianha que dicao ni para ngain infierno, co de queʒén sitticaon ni ngain Dios, ² co de ixin quedonda chonda ni que diguite ni, co de ixin quedonda ttín rá ni ngataha já iná chojni que ditticaon Jesucristo co nchetsenhe ñao Dios ixin jehé sinchenaon chojni mé, co queʒén rroxechon cain chojni que ndaenhe co ixin Dios sinchejuzguehe cain chojni co rrondache na quehe tsonhe cada na para cainxin tiempo. ³ Ján na onoa na cain yá, mexinxin sonttoho na sigue tsanguí na icha si Dios sanjo joachaxin.

⁴ Ixin chojni que ovayé joadingasán co ochonxin na de ixin tti jian que danjo Dios, co ojí Espíritu Santo ngain na, ⁵ co oconohe na tti jian joajné Dios co ochonda na tti joachaxín Espíritu Santo que icha rrožago ngain mundo que tsí; ⁶ tti cain chojni que ochonxin na cain yá, co si rrocjan na isitticaonha na ngain Jesucristo, ni ná chojni nchao sincheanimá chojni mé para tsentoxinhi vidé na iná ixin xajeho inchin jehe na mismo tecjan na tettenganito na Xenhe Dios nganito cruz iná co tetjanoa na Xenhe Dios ngattoxon con cain chojni. ⁷ Co cain chojni ngataha nontte inchin ná jngui que ndadihi cain čhin que dinttji ngataon jngui. Co Dios nchenciaon jngui mé si danjo ná cosecha jian para ixin tti chojni que nchehe xa ngataon jngui mé. ⁸ Pero si jngui mé danjo jeho canchaha co icha ca que xonhi xé, nontte mé xonhi rentte nontte. Co Dios rrondačo que nontte mé jiquinixin rroche nontte.

Confianzá na ngain Cristo nttasoji na para techonhe na tti jian que sanjo Dios

⁹ Pero masqui janha na ndačhjan jańá nganji ra tti janha na anto rinaho na, pero janha na chonda na seguro ixin jaha ra jeha inchin tti chojni que ttinttohe na de ditticaon na ngain Cristo, sino que ixin jaha ra sayehe ra cainxin tti jian que tí de ngain Dios ixin ditticaon ra ngain. ¹⁰ Ixin Dios jehe nchehe inchin jiquinixin, co jehe rrotjańeha tti jian que jaha ra joinchehe ra ni rrotjańeha que jaha ra ján ndoa rinao ra jehe Dios co mexinxin cjoengujna ra icha chojni que ditticaon Jesucristo co ixin cain mé tenchehe ra jai cai. ¹¹ Pero janha na rinaho na que cada ra jaha ra sinchehe ra sigue xajeho inchin tenchehe ra jai para que jamé Dios nchao rrochjá ra tti jaha ra techonhe ra. ¹² Janha na rinaoha na que jaha ra tsosaha ra, sino que rroehe ra ejemploe cain tti chojni que jian ditticaon ngain Cristo co que chonda paciencia. Ixin chojni mé tedayé na tti herencia que Dios ndačo sanjo.

¹³ Ixin are Dios chjé promesa Abraham de ixin tti sanjo Dios, jehe joinchejurá conixin nombré jehe ixin xonhi iná nombre icha importante para rrojinchejuraxin que jeho nombré jehe. ¹⁴ Co Dios ndačo ngain Abraham: “Ján ndoa que janha anto sinttanchaon jaha co tsotsje xanttia xančhjen.” ¹⁵ Abraham chonhe mé conixin paciencia, co jamé jehe vayé tti ndačo Dios ngain. ¹⁶ Are chojni nchejurá na, jehe na nchejurá na conixin iná nombre icha importante que jehe na; co are jamé nchese gurá na, ichondaha na que tjaon na icha. ¹⁷ Mexinxin Dios joinchesegurá tti promesé jehe conixin ná juramento ixin jehe joinao cjoago claro ngain tti chojni que sayé promesé ixin jehe ján sanjo tti jehe ndačo, co xonhi cosa tsentoxinhi. ¹⁸ Jańá tti promesé Dios co tti juramentoe Dios yó cosa que čhoha sitoxinhi. Dios čhoha sincheyaxon de ixin cayoi cosa jihi. Co mexinxin Dios chjá na consuelo jian ján na xo conchienne na ngain jehe para que jehe tsjengujna na, co chonda na confianza ngain promesé jehe. ¹⁹ Co jehe mé tti nchesoji co nchese gurá almá na inchin ancla que dečhoa ngangui jinda para nchese gurá barco. Co tti confianza que ján na chonda na ngain promesé Dios, mé tti ttenčhoa na ngain Dios tti ttjen toenxin cortiné nihngo nttiha ngajni. ²⁰ Nttiha tti joixinhi Jesús icha saho para joanttjé nttiha para que ján na nchao tsjin na tti ttjen Dios. Co jańá mexinxin Jesús joiguehe para cainxin tiempo tti dána que icha importante, co jehe xajeho clase de dána inchin Melquisedec.

7

Jesús xajeho clase de dána inchin Melquisedec

¹ Jehe Melquisedec cjoí rey de ngain ciudad de Salem co cjoí dána para ixin Dios que ttjen ngajni. Co are Abraham cjanxin de ngain tti guerra que Abraham cjoa cha ngain cainxin rey que jehe coetocaho, are mé jehe Melquisedec viguetan ngatja nttiha, co nttiha Melquisedec, conixin joachaxín Dios, joinchençaon Abraham. ² Co Abraham joanjo ngain Melquisedec ná ttexin parte de cainxin tti jehe joacha ngain guerra mé. Tti nombre Melquisedec, mé rrocho saho “rey que nchehe tti jian”; co ixin jehe tti rey de ngain ciudad de Salem, co ixin nombré ciudad mé rrocho “paz”, mexinxin rrocho nombré rey mé “rey que xonhi guerra ttjé.” ³ Co xonhi lugar jitaxin de ixin quensen cjoí ndodé ni quensen cjoí janné jehe Melquisedec, ni de ixin quensen cjoí nindogelitoe xanchjen. Cai xonhi lugar jitaxin quesa concjihi ni quesa ndavenhe; mexinxin jehe Melquisedec nchao sonttocaninxin na Xenhe Dios ixin cai jehe Melquisedec cjoí ná dána para cainxin tiempo.

⁴ Nchao jí remé, jai xaxaon ra de ixin Melquisedec. Jehe anto importante vehe, ixin hasta Abraham, tti cjoí ndogelitoe xanchjen cain chojni Israel, jehe ndo mismo joanjo ndo ngain Melquisedec ná ttexin parte de cain que jehe ndo joantsjehe ndo cain rey que coetocaho ndo ngain guerra. ⁵ Ján ndoa que tsje nano después, ley que vayé Moisés ndacho que jeha xannti xanchjen de Leví nchao doan dána. Co ley mé cai chjé dána mé joachaxin de sinchecobrá ngain chojni Israel ná tti ttexin parte de cain cosa que jehe na chonda na, masqui cain jehe na co xidána mé xajeho razé co chojni Abraham. ⁶ Pero Melquisedec masqui jehe jeha razé Leví, pero jehe vayé tti ttexin parte de tti joacha Abraham. Co jañá Melquisedec joinchençaon Abraham, tti vayé promesé Dios. ⁷ Co cain chojni nohe na que ná tti nchençaon ná cosa o ná chojni, mé tti icha importante que tti tonchaon. ⁸ Co nttihi ngayá na ján na, dána que dayé ttexin parte, chojni mé jai xa denhe na. Pero tti jitaxin Palabré Dios nichja de ixin Melquisedec inchin ná chojni que xa jichon. ⁹ Co cai nchao rrondacho ni que Leví co cain dána razé Leví, que jai nchecobrá tti ttexin parte de cain cosa que chonda chojni Israel, cain nimé cai cjoenga na hna tti ttexin parte ngain Melquisedec ngain rato are Abraham cjoenga hna tti ttexin parte ngain Melquisedec. ¹⁰ Ixin are mé rrocho que Abraham ojoicao cain razé mé ngain cuerpoe, masqui are mé jehe na xa toncjiha na are Melquisedec joiguetanxin Abraham ngatja nttiha.

¹¹ Cain chojni Israel vayé na ley pero de ngain dána razé Leví, co cain dána mé xannti xanchjen Aarón, tti saho dána. Pero ley que dána ndache chojni, ley mé xonhi joachaxin chonda para nchejian chojni ngattoxon con Dios. Mexinxin chonda que joí iná dána; nahi dána que chonda joachaxin inchin Aarón, sino que ná dána que chonda joachaxin inchin Melquisedec. ¹² Ixin si ditoxin clase de dána, cai ley chonda que ditoxin. ¹³ Co tti iná clase de dána, mé Jesucristo, tti chonda cain joachaxin para ixin ján na. Co jehe Jesús jeha razé Leví, sino que jehe joixin razé Judá. Co xonhi tiempo ná tti razé Judá cjoí dána. ¹⁴ Ixin anto jian nohe ni que Jesucristo joixin razé Judá, co Moisés xonhi ndacho de ixin jehe raza jiji are jehe nichja de ixin cain dána.

¹⁵ Co jiji icha claro para tsinxin na are noa na ixin tti dána naroaxin que joicononxin, mé inchin Melquisedec. ¹⁶ Ixin Jesús cjoí dána mé pero

jeha inchin coetonha ley, ixin ley ndačo jeha chojni razé Leví nchao soan na dána. Rročo que Jesús cjoí dána pero ixin jehe chonda joachaxin para sechon cainxin tiempo. ¹⁷ Ixin Dios ndačo janhi de ixin jehe:

Jaha ná dána para cainxin tiempo,
co jaha xajeho clase de dána inchin Melquisedec.

¹⁸ Jañá, mexinxin tti ley que vayé chojni are saho, icoha jai ixin čoha cjoenguijna chojni co xonhi rentte ley mé. ¹⁹ Rročo que tti ley que vayé Moisés čoha nchejian ni ná chojni. Co jai en lugar de ley mé, chonda na confianza ngain Jesucristo; co de ixin confianza mé, ján na nchao tonchienne na ngain Dios.

²⁰ Co Dios ndačo conixin ná juramento que ixin Jesucristo, mé tti dána jai. ²¹ Tti icha dána vintteguinhi dána pero sin ni ná juramento de Dios. Pero are Jesucristo vinhi dána, Dios joinchejurá, ixin ngain tti jitaxin Palabré Dios ndačo:

Dios joinchejurá, co tsentoxinha tti jehe ndačo:

“Jaha ná dána para cainxin tiempo,
co jaha xajeho clase de dána inchin Melquisedec.”

²² Mexinxin Jesús jehe tti joinchesejurá nganji na tti trato naroaxin jiji que mé icha jian que tti trato saho. ²³ Tsje chojni vintte na de dána, ixin are ná dána ndadenhe, iná xí dehe xa de dána, co jañá ni ná xidána mé nchao nchehe sigue xé para cainxin tiempo. ²⁴ Pero ixin Jesús jehe xonhi tiempo senhe, mexinxin jehe xonhi tiempo sanjo xé de dána que jehe chonda ngain iná chojni. ²⁵ Mexinxin Jesús jehe nchao danjo iná vida naroaxin que xonhi tiempo tsjexin ngain cain tti chojni que tonchienne ngain Dios por ixin jehe Jesucristo, ixin jehe jichon para cainxin tiempo para que nchetsenhe ñao Dios para ixin jehe na.

²⁶ Mexinxin Jesucristo, jehe tti mero dána icha importante que ján na rrogondá na. Ixin Jesús jehe joxon jian ngattoxon con Dios, jehe xonhi cosa nchaoha ni jianha joinchehe. Jehe vachjendehe chojni que nchehe jianha, co sacojinhi icha noi que ngajni. ²⁷ Icha dána chonda que doen coxigo para daquehe jni va ngain alté Dios cada nchanho. Saho nchehe mé para ditjañehe cain tti jianha que jehe joinchehe; cottimeja para ditjañehe cain tti jianha que joinchehe icha chojni. Pero Jesús chondaha que nchehe jamé ixin jehe xanjo venhe nacoa nttiha para vitjañenxin cainxin tti jianha que nchehe cain chojni co mé donda para cain tiempo. ²⁸ Ley que vayé Moisés ncheguinhí dána icha importante xí que teca tsje cosa jianha que joinchehe. Pero tti juramento que Dios ndačo después de ley mé, juramento mé tti ncheguinhí Xenhe Dios dána icha importante, co jehe Xan ni ná cosa jianha joincheha Xan.

8

Jesús jehe tti abogado de ngain tti trato naroaxin

¹ Tti cosa icha importante que janha na tendačjhan na, mé janhi: tti dána que icha importante para ixin ján na, jehe joxon jian, co sajoigüehé ngain lado jian de tti retaha Dios nttiha ngajni. ² Co nttiha ngajni jehe jinchehe xa de dána ngain tti mero ningoe Dios nttiha; co Dios, tti chonda cain joachaxin, mé tti joinchechjian nihngo mé, co jeha chojni tti joinchechjian. ³ Co cain icha dána que icha importante vinchiehe na para que jehe dána mé saquehe cosa co nntaöhe coxigo ngain altar para ixin Dios. Co mexinxin rrogonda que Jesucristo cai vanjo cosa para

ixin Dios. ⁴ Si jehe Jesucristo xa rrogeuhe nntihi ngataha nontte, jehe ni rrogeuha de dána ixin jai xa te dána que daquehe cosa para ixin Dios inchin ttetonha ley que vayé Moisés. ⁵ Pero tti nchehe cain dána nntihi ngataha nontte, jehe inchin ná copia o inchin sanho de cain cosa que jí ngajni. Ján na noa na que ixin mé jehe inchin ná copia de lo que tti jí ngajni ixin icha saho que Moisés joinchechjian ningoe Dios, jehe Dios ndačo ngain Moisés: “Ttjiho cuidado co nchechjian nihngo ngataha nontte xajeho inchin janha cjoagoha are ngagaha jna.” ⁶ Pero Jesucristo, tti dána icha importante para ixin ján na, co jehe mé chonda icha jian xa de dána que cain dána nntihi ngataha nontte ixin Jesucristo jehe tti abogado de ngain ná trato icha jian que trato saho. Co promesé Dios para nganji na ngain trato naroaxin jiji, mé anto icha jian promesa que promesa vehe ngain trato saho.

⁷ Ixin si tti saho trato nchao rrojinchejian chojni ngattoxon con Dios, irrogondaha rroconchjian tti trato yoxin. ⁸ Pero Dios vicon que chojni jehe vintteha na jian, mexinxin Dios ndačo janhi de ixin jehe na ngain tti jitaxin Palabré:

Dios ndačo: Tsí nchanho

que janha sinttachjian iná trato naroaxin ngain chojni de Israel, co ngain chojni de Judá.

⁹ Ijeha inchin trato que janha jointtachjian ngain nigoelitoe na xančhjen, are janha tsá rá na para joantsjexin na de ngain nonttehe Egipto, pero jehe na joincheha na inchin ndačo trato mé, co mexinxin janha ijointtaha na caso, jañá čo Dios.

¹⁰ Tti trato que janha sinttachjian ngain chojni Israel ngain nchanho que tsí, janhi rročo trato mé, čo Dios:

Janha tsín tti janha ttetonha ngain joarrixaoen na, co tti janha ttetonha ndasittohe ngain ansén na.

Cottimeja janha sarihi Dios de jehe na,

co jehe na sintte na chojnina janha.

¹¹ Co irrochondaha que iná chojni sinchecoenhe iná chojni;

irrochondaha que ná chojni sinchecoenhe compañeroe, o ni xanchó para que rrochonxin na de ixin janha, tti Dios de jehe na,

ixin cainxin na rrochonxin na de ixin janha,

desde xannchinnchinchjan hasta ni icha ojonchjan.

¹² Co janha sinttatjañá na cain tti jianha que nchehe na,

co ixonhi tiempo janha rrořaxanho de cain cosa jianha que jehe na joinchehe na.

¹³ Are Dios nichja de ixin iná trato naroaxin, rročo ixin jehe ondačo que tti saho trato ondaconttaxí. Co cosa que ondaconttaxí iseha donda, co otoin ndasitján.

9

Tti nihngo nntihi ngataha nontte co tti nihngo nntiha ngajni

¹ Tti saho trato vaquetonha ngain chojni que xén vanchecoanxinhi na Dios, pero de ngaxinhi ná nihngo nntihi ngataha nontte. ² Co nihngo jiji janhi conchjian: tti saho cuarto vinhi Lugar Santo, co nntiha vehe tti candeléro de yáto rá, co ná mesa tti vetaha niottja que vaganjo na para ngain Dios. ³ Co toenxin tti manta ngain yoxin puerta, vehe iná cuarto que vinhi Lugar Santísimo. ⁴ Nntiha vehe ná altar de oro tti vachetaxin

tsjoca para ixin Dios, co nttiha cai vehe ná caja co ngama caja mé veyá joxon oro. Co ngaxinhi caja mé vehe ná chichjan de oro que veringa nchion maná, co nttiha cai vengá tti tabla de xo que vetaxin tti saho trato. ⁵ Co ngataha caja mé vintte dibujoe yó ángel que dinhi querubines, co mé rrocho lugar tti ttjen Dios. Co jehe dibujoe ángel mé conixin nenechán vacjanotaon ngataha caja mé tti vanchetjañenxin Dios chojni tti jianha que vanchehe na. Pero janha na jai irrondattjoha ra icha de ixin cain cosa jiji.

⁶ Jañá vintte cain cosa ngain nihngo mé, co dána vaguintteguixinhi cada nchanho tti saho cuartoie nihngo mé para que nttiha vanchecoanxin Dios. ⁷ Pero ngain tti yoxin cuartoie nihngo mé, nttiha vaguixinhi jecho tti dána icha importante, co jecho nacoa nttiha cada nano. Co are dána mé vaguixinhi nttiha, jehe chonda que vaguicao jní coxigo para vaganjo ngain Dios para que Dios vanchetjañehe tti jianha que joinchehe dána mé, co tti jianha que joinchehe icha chojni. ⁸ Conixin cain jiji Espíritu Santo nntaquiainxin na, que masqui icha dána co chojni nchao nchegonda cuarto saho para vanchecoanxin na Dios, jehe na vechondaha na joachaxin para vaguixinhi na tti yoxin cuarto que vinhi Lugar Santísimo. ⁹ Cain jiji inchin ná ejemplo para ixin ján na jai ixin tti cosa co nntaohe coxigo que nttiha vaganjonxin na ngain Dios, cain mé choha sinchejian ansén cain chojni que nchesayexin Dios jañá. ¹⁰ Ixin cain mé jecho inchin canxion regla que vinttechonda na de ixin quexehe cosa nchao jine na co quexehe cosa nchao dihi na, co quexén jiquininxin ncheroa cuerpoe na. Co cain cosa mé jecho chonda joachaxin hasta que Dios joinchechjian iná trato naroaxin.

¹¹ Pero ojoí Cristo, co jai jehe tti dána icha importante que ttjenguijna na para sayé na cain cosa jian que Dios rroanha ngain chojni jehe. Ngain nihngo tti jehe jinchehe xa de dána, nihngo mé tti icha importante co icha jian. Co nihngo mé jecha chojni joinchechjian, rrocho que nihngo mé jiha ningo ngataha nontte jiji. ¹² Cristo jehe tti ndoa joixinhi ngain tti Lugar Santísimo nttiha ngaini pero jecha para joiganjo jní cochivatochjan co jní coxinttachjan, sino jehe joanjo jní jehe mismo. Co jañá jehe joixinhi nttiha nacoa nttiha co mé gonda para cainxin tiempo, co jamé jehe nchao chjá na iná vida naroaxin que xonhi tiempo tsjexin. ¹³ Ján ndoa que jní coxinttá co jní cochivatochjan co nchonih nntaohe coxinttachjan que chexin ngataha altar, vinttjitte ngataha tti chojni que joincheha inchin ttetonha ley que vayé Moisés. Co janá cain mé chonda joachaxin de joincheroa cuerpoe chojni, pero ansén nahi. ¹⁴ Si cain mé jañá chonda joachaxin, ¡mexinxin jní Jesucristo chonda icha joachaxin! Co de ixin Espíritu Santo tti xonhi tiempo ndasenhe, Cristo mismo joanjo cuerpoe ngain Dios co Cristo joxon jian; xonhi jianha chonda jehe, co jní Jesucristo ncheroa ansean na de cain cosa jianha que nchetján chojni. Jamé para que ján na nchao sonttoho na inchin rinao Dios que jichon.

¹⁵ Mexinxin Jesucristo jehe tti abogadoa na de ngain tti trato o testamento naroaxin. Jesucristo ndavenhe para que vitjañehe cain cosa jianha que joinchehe chojni ngain trato que vechonda joachaxin icha saho, co para que tti chojni que Dios coinchiehe nchao sayé na tti iná vida naroaxin para cainxin tiempo, que jehe Dios ndacho sanjo. ¹⁶ Ixin nttihi ngataha nontte are dittohe ná testamento, mé tti ndacho quehe tsonhe

cain cosé chojni que ndavenhe. Co para que chojni familié sinchehe na inchin jindačo ngain testamento mé, chonda na que tsjago na ná xón, que chojni mé ndoa ndavenhe. ¹⁷ Ixin ná testamento xonhi rentte si xa jichon tti joinchechjian testamento mé, sino que are ndadenja tti nchechjian testamento. ¹⁸ Mexinxin Dios are vaquehe tti saho trato chonda que vinttji jní coxigo. ¹⁹ Jihi tti conhe: Moisés ndache cain chojni cain tti ttonha ley que jehe vayé. Cottimeja jehe coá ná ramé nttahisopo co coencjin ntta chjon jatse, co xanguí ngain jní coxinttachjan co cochivatochjan co tettecjan jni jinda, co cointtjitte ngataha tti libro que jitaxin ley que jehe vayé co cai cointtjitte jni mé cain chojni. ²⁰ Cottimeja ndačo ngain na: “Jihi tti jni que nchesegurá trato que Dios coetonha para ixin jaha ra.” ²¹ Co Moisés cai cointtjitte jni nganito nihngo, co cain cosa que vagonda ngaxinhi nttiha para vacocoanxinxin Dios. ²² Co inchin jitaxin ley mé, merocoa cain cosa chonda que toroa conixin jni; co Dios čhoaha sinchetjañehe ná cosa jianha si diguinttjitteha jni.

Tti tangui que Cristo vetan, mé jointtatjañanxin na Dios cain tti jianha que jointtoho na

²³ Jañá que cain cosa yá vagondehe jní coxigo para vacoroaxin, co cain cosa mé jehó ná copia de cain cosa que jí ngajni. Pero cain cosa que tequininxin ngajni, mé gondehe icha jian jni que jni coxigo para coroaxin, co mé jni Jesucristo. ²⁴ Ixin Cristo jehe joixinha ngaxinhi nihngo que chojni joinchechjian, que lugar mé jehó ná copia de nihngo mero ndoa, sino que Cristo joixinhi mero ngain nihngo que jí ngajni tti jai jehe jinchetsenhe ñao Dios para ixin ján na. ²⁵ Tti dána judío icha importante vixinhi ngaxinhi nihngo ngain Lugar Santísimo nacoa nttiha cada nano para joiganjo jni que jeha jni jehe. Pero Cristo xanjoha tsje nttiha para ndadenhe. ²⁶ Ixin si jamé rroconhe, jehe Cristo rrochonda que rrogenhe anto tsje nttiha desde que nontte conchjian. Pero tti conhe que jai are ochian ndajittjexin mundo, Cristo xago co joanjo cuerpoe mismo ngain Dios para cjoenga hna cain tti jianha que nchehe chojni. Co mé conhe nacoa nttiha co donda para cainxin tiempo. ²⁷ Jañá inchin cain chojni chonda que senhe na para nacoa nttiha, cottimeja Dios sinchejuzgá ngain na, ²⁸ jañá cai Cristo xanjo venhe para nacoa nttihi para que cjoenga hna cain tti jianha que nchehe chojni ngataha nontte jiji. Después jehe rroxago nttia yoxin, pero ijeha para sicjenga hna tti jianha que nchehe chojni, sino que para sichjé iná vida naroaxin cain chojni que otechonhe jehe.

10

¹ Tti ley que vayé Moisés cjoí jehó inchin ná sanho de cain cosa jian que tsí co tjadoha claro quexén sintte cain cosa mé. Co masqui chojni que vaconchienhe ngain Dios vaganjo na tsje cosa ngain jehe, pero ley jiji xonhi tiempo joinchejian ansén chojni mé ixin nano co nano vaganjo na xajeho cosa. ² Ixin si ley mé nchao rrojinchejian ansén jehe na, cain cosa que vaganjo na para ixin Dios, irroganjoha na nanao. Ixin cain tti chojni que vaganjo cain cosa mé, are jehe na orrocoroa na para cainxin tiempo de cain tti jianha que joinchehe na, jehe na irroconoeha na feo de ixin tti jianha que joinchehe na. ³ Jañá rročo que cain cosa que vaganjo na, cosa mé jehó para vancheaxaxaon na cain tti jianha que jehe

na nchehe na cada nano, ⁴ ixin jní coxintá co jní cochivatochjan xonhi tiempo nchao rroxengaxin hna cain tti jianha que nchehe chojni.

⁵ Mexinxin are Jesucristo jói ngataha nontte jiji, jehe ndačo ngain Dios:

Soixin irinaoha tti nntaohe coxigo ni icha cosa que chojni chjá, mexinxin soixin joinchechjian ná cuerpo para ixin janha.

⁶ Soixin nntaxoxianha nntaohe coxigo que che ngataha xohi ni icha cosa que chojni nchehe na para nchetjañenxin na tti jianha que jehe na nchehe na.

⁷ Mexinxin janha ndačhjan: “Nntihi joihi janha para sinttaha inchin soixin rinao, oh Dios,

jañá inchin jitaxin de ixin janha ngain libroe Moisés.”

⁸ Cristo saho ndačo que Dios joinaoha ni joinchexoxinha cain cosa que vaganjo chojni, ni coxigo que vaganjo chojni, ni nntaohe coxigo que vacjaga chojni para ixin Dios, para vitjañenxin na tti jianha que nchehe na. Jamé ndačo Cristo masqui cain cosa mé ley que vayé Moisés coetonha para que vanjo na. ⁹ Cottimeja Cristo ndačo: “Nntihi joihi janha para sinttaha inchin soixin rinao, oh Dios.” Rročo que jehe jói para vinttjian cain cosa que vaganjo chojni, co jehe vanjo iná cosa que icha jian. ¹⁰ Dios ojointtajian na ixin Jesucristo joinchehe inchin rinao Dios are Jesucristo joanjo cuerpoe jehe mismo para ngain Dios. Co jehe joinchehe jiji nacoa nntiha, co mé donda para cainxin tiempo.

¹¹ Cain xidána judío vanchehe xa xé xa cada nchanho, co vaganjo xa tsje nntiha xajeho cosa ngain Dios masqui cain cosa mé xonhi tiempo nchao cjoenga hna cain tti jianha que vintteca chojni. ¹² Pero Jesucristo joanjo jeho nacoa cosa ngain Dios para cainxin tiempo, co mé cuerpoe para cjoenga hna cain tti jianha que nchehe chojni. Cottimeja Jesucristo sajoiguehe ngain lado jian de Dios. ¹³ Nntiha jichonhe Jesucristo hasta tti nchanho que Dios sinchegacha jehe de ngain cain tti ningaconhe. ¹⁴ Ixin de tti nacoaxinxon nntiha que jehe xanjo ndavenhe para Dios jehe joinchejian para cainxin tiempo cainxin chojni que tequininxin para ngain Dios. ¹⁵ Co Espíritu Santo nntasegurá na cain jiji ixin saho ndačo: ¹⁶ Janhi sehe tti trato que janha sinttachjian ngain chojni ngain tti nchanho que tsí, čo Dios que chonda cain joachaxin.

Tsín tti ttetonha janha ngain ansén na, co tti janha ttetonha ndasittohe ngain joarrixaoen na.

¹⁷ Cottimeja ndačo:

Ixonhi tiempo janha rroxaxanho de cain cosa jianha que jehe na nchehe na.

¹⁸ Jañá mexinxin are cain tti jianha que vintteca chojni ovitjañehe na, ichondaha na que sanjo na icha cosa ngain Dios para sitjañenxin na cain cosa jianha mé.

Ján na chonda na que tsonchián na ngain Dios

¹⁹ Mexinxin hermanos, jai ján na nchao soxinhí na conixin confianza ngaxinhí tti Lugar Santísimo nntiha ngajni ixin Jesucristo ocointtji jní para ixin ján na. ²⁰ Are Jesucristo vanjo cuerpoe para ndavenhe, are mé rročo ixin cortina para ngain Lugar Santísimo xiré cortina para que ján na nchao satto na cortina mé co tsjia na ngain ná nntiha naroxin que danjo iná vida que xonhi tiempo tsjexin. ²¹ Jehe Jesús, tti dána que icha importante, mé tti ttjenguijna ján na nntiha tti ttjen Dios.

²² Mexinxin ján na chonda na que tsonchián na ngain Dios conixin ansean na jian conixin ná confianza seguro ngain Dios. Jamé ixin Jesucristo ojoincheroa ansean na para que ján na tsonoa na seguro que ixonhi teca na de cain tti jianha que jointtoho na, co cai inchin Dios ojoinchetsinda cuerpoa na para que ján na nchao tsonchián na ngain.

²³ Já nna sonttoho na sigue cainxin tiempo de sotticaon na ngain Dios co xonhi tiempo tsentoxinhi na tti já nna dotticaon na ixin Dios rrochjá na tti jehe ndačo. ²⁴ Co chonda na que rrotsjehe na de quexen sonttoho na para tsjenguijna chó na para sonao chó na co para sonttoho na jian.

²⁵ Rrochondaha na que sonttoho na inchin nchehe tti chojni que ixatteha para nchesayehe Dios, sino que já nna chonda na que sonttoanimá chó na para que tsji na ngain tti xatte na mé, co icha jai que ojitonchian tti nchanho que Jesucristo tsí iná.

²⁶ Ixin si já nna sonttoho na sigue de sinao na sonttoho na jianha después de que já nna ojoatsoan na tti ndoa, ixonhi cosa jí para que já nna sanjo na ngain Dios para que jehe sinttatjañá na cosa jianha que sonttoho na. ²⁷ Si jamé sonttoho na, já nna jeha nchao rrochonhe na tti anto soji castigo ngain xohi que jiche para rrochexin cain tti ningaconhe Dios, are Dios sinchejuzgá cain cosa. ²⁸ Are chonja chonji que xa vitticaon ngain ley que vayé Moisés joincheha inchin coetonha ley mé co si vintte yó o ní chojni de testigo que ndačo ixin ndoa vicon que tti iná chojni joincheha inchin coetonha ley mé, chojni mé vayé castigo de navenxon co xonhi chojni coaxin joachjaon. ²⁹ Mexinxin janto icha soji castigo tequininxin tti chojni que ningaconhe Xenhe Dios, co xaxaon na ixin xonhi rentte jní Xan que coingo Xan, co nichja na feo de ixin Espíritu Santo de Dios, tti anto rinao jehe na! Co jehe jní Cristo, mé tti nchese gurá tti trato naroaxin, co trato mé tti joinchejian chojni mé.

³⁰ Já nna noa na que Dios, tti chonda cain joachaxin, ndačo: “Janha tti sinttastigá chojni jianha; janha tti tsjengá na hna inchin tequininxin na.” Co cai ndačo: “Dios, tti chonda cain joachaxin, sinchejuzguehe chojni jehe.” ³¹ ¡Ixin anto tanguí tsonhe chojni que teca jianha ngattoxon con Dios que jichon!

³² Pero xaxaon ra jaha ra ngain tiempo vatto are jaha ra nandá vayehe ra joadingasán, rročo que coexinhi ra vitticaon ra Jesucristo, are mé jaha ra coixinha ra conixin paciencia tti anto tanguí que conha ra are jaha ra joincheluchá ra para ditticaon ra Jesucristo. ³³ Are mé canxion de jaha ra feo xanttjo ra na co joinchehe na feo nganji ra ngattoxon con icha chojni. Co icaxin ra conoha ra tanguí are vicon ra ixin nicompañeroa ra vetan na tanguí. ³⁴ Jaha ra coiacoeha ra chojni Jesucristo que teaxinhi ngain cárcel, co masqui joantsjaha ra na cosá ra pero chaha ra ixin onoha ra que ngajni chonda ra cosa icha jian que cosa nttihi ngataha nontte, co cosa mé tsonchjenhe para cainxin tiempo. ³⁵ Mexinxin nchetjanha ra confianza que jaha ra chonda ra ixin confianza yá tti tsiaho para ixin jaha ra ná jian premio. ³⁶ Jaha ra rrogondaha ra rrochonda ra paciencia para sinchehe ra inchin rinao Dios co para sayehe ra tti jehe ndačo sanjo. ³⁷ Ixin ngain tti jitaxin Palabré Dios nttiha ndačo:

Daca, chonda que anto daca,

tsí jehe tti chonda que tsí, co jehe tsonchjenha.

³⁸ Pero tti chojni que janha rrondačhan já nna ixin jehe jian chojni, mé sinttechon na ixin ditticaon na na janha,

pero si jehe na isitticaonha na na janha, janha isariha contento ngain jehe na.

³⁹ Pero ján na jeha tti chojni que isitticaonha co sitján, sino que ján na tti chojni que ditticaon cain tiempo co jamé tettenchjinha na almá na.

11

Tti confianza ngain Dios

¹ Are ján na chonda na confianza ngain Dios, mé rrocho ixin chonda na seguro que ján sayé na tti ján na techonha na, co tedotticaon na mé, masqui ján na xa doconha na. ² Canxion nigoelitoa na xančhjen are saho, cjoí na jian ngattoxon con Dios ixin vechonda na confianza ngain Dios.

³ Por ixin confianzá na ngain Dios, noa na que jehe coetonha para conchjian cain mundo. Mexinxin cain cosa que jai docon na conchjianxin de ngain ná tti čhoha docon na.

⁴ Co Abel ixin jehe vechonda confianza ngain Dios, mexinxin jehe joanjo ná cosa icha jian ngain Dios que tti joanjo xanchó Caín, co mexinxin Dios ndačo que ján Abel jehe jian, co Dios vayé tti joanjo Abel. Jańá mexinxin masqui Abel ondavenhe, pero ján na xa tetanguí na de ixin Dios de ixin tti confianza que vechonda Abel.

⁵ Cai Enoc ixin jehe vechonda confianza ngain Dios, jehe ndavenha; Dios sajoicao para ngajni, co icha chojni iviconha na Enoc ixin Dios sajoicao para ngajni. Co cai ngain tti jitaxin Palabré Dios, nttiha ndačo que icha saho que Dios sajoicao Enoc para ngajni, Dios joincheřoxinhi cain tti joinchehe Enoc. ⁶ Pero Dios jehe čhoha rroché ngain ná chojni si chojni mé chondaha confianza ngain Dios, ixin para tsonchian ni ngain Dios, jehe ni chonda ni que sitticaon ni que ixin Dios ján jí co ixin sinchenchaon cain chojni que ttjé na jehe Dios.

⁷ Cai Noé vechonda confianza ngain Dios. Mexinxin are Dios joinchenohe Noé ixin siconhe cosa que Noé xa řonhi tiempo vicon, Noé vitticaon tti ndačo Dios co Noé joinchechjian arca para que nifamilié ndavenxinha na de ixin jinda. Co de ixin confianzé Noé ngain Dios, Noé cjoago que ixin cain chojni que vaguitticaonha Dios ngain tiempo mé jianha na ngattoxon con Dios. Pero Dios ndačo que Noé jehe jian ixin vechonda confianza ngain Dios.

⁸ Cai Abraham vechonda confianza ngain Dios, mexinxin are Dios nichjé jehe, jehe vitticaon co vačhje sacjoi para ngain tti nontte que después Dios joanjo de herencia ngain jehe. Jehe Abraham vačhjexin de ngain nonttehe co sacjoi pero venoeha para ttinó sajittji. ⁹ Co ixin Abraham vechonda confianza ngain Dios, mexinxin jehe vehe ngain tti nontte que Dios ndačo joanjo, masqui inchin chojni que joixin de cjin. Mexinxin jehe vexinhi nchia de carpa, co cai jamé joinchehe xenhe Isaac co Jacob, que cai vayé na tti ndačo Dios que rroganjo. ¹⁰ Jamé vanchehe Abraham ixin jehe chonhe cjoí ngain tti ciudad que tončhjenhe para cainxin tiempo, que Dios joinchechjian, co mé rrocho ngajni tti tjen Dios.

¹¹ Cai Sara, nčhičhihi jehe Abraham, ixin jehe nča misma vechonda nča confianza ngain Dios, masqui jehe nča anto onačhichjan para rrojincheconcjihí chjan, pero vayé nča joachaxin de joincheconcjihí nča ná chjan, co jamé jehe nča cjoí nča janné chjan mé ixin vechonda nča confianza que Dios ján rrojinchehe tti jehe ndačo. ¹² Jańá conhe

Abraham masqui anto odačhichjan, pero řa joichonda ná xenhe, co de xan mé después anto cotsje chojní Abraham hasta que chojní mé inchin cain conotse ngajni co inchin cain řochjenhe nchíse que jí ngandehé ndachaon, que čhoha ttequin ní.

¹³ Cain chojní mé ndavintteguenhe na co vayehea na cain cosa que Dios ndačo ixin rroganjo ngain na. Pero ixin jehe na vechonda na confianza co vitticaon na ixin Dios ndoa rroganjo cain inchin jehe ndačo, mexinxin jehe na anto vaché na ixin vechonxin na ixin cain mé rroguiconhe después. Co mexinxin jehe na ndačo na que jehó joigatto na ngain mundo jiji ixin jehe na jeha de nttihi na, čo na. ¹⁴ Mexinxin cain chojni que nichja jańá, jehe na tendačo na claro que řa tettjé na iná nontte que soan nonttehe na. ¹⁵ Si jehe na řa rrořaxaon na de ngain tti nontte que joixin na, jehe na nchao rrocjan na nttiha iná. ¹⁶ Pero jehe na joinao na iná nontte icha jian, rročo que jehe na rinao na ná lugar nttiha ngajni. Mexinxin Dios tosoeha de dínhi Dios de jehe na, ixin jehe ojoinchechjian ná ciudad nttiha ngajni para ixin jehe na.

¹⁷ Abraham, ixin vechonda confianza ngain Dios, mexinxin are Dios vaquehe prueba ngain Abraham, are mé Abraham joiaho Isaac, xenhe jehe para narrogoenxon xan co rroganjo xan ngain Dios. Abraham vehe dispuesto de rroganjo tti nacoaxinxon xenhe que jehe vechonda masqui Dios ondačo ngain Abraham: ¹⁸ “De ngain xanha Isaac tsotsjexin anto tsje chojnia jaha.” ¹⁹ Abraham jamé joinchehe ixin jehe vechonxin que Dios chonda joachaxin hasta para sinchexechon chojni que ndadenhe. Co ján na nchao rrondačo na cai que Abraham cjan vayé xenhe iná de ngayé nindadiguenhe ixin Abraham ovehe dispuesto para narrogoenxon jehe xan.

²⁰ Cai Isaac ixin jehe vechonda confianza ngain Dios, mexinxin jehe ndačo ngain Jacob co ngain Esaú, xenhe jehe Isaac, que ixin Dios seguro sinchenciaon xan. ²¹ Cai Jacob ixin jehe vechonda confianza ngain Dios, mexinxin are ochiaon ndajoiguenhe, jehe ndačo ngain cayoi xenhe José que ixin Dios sinchenciaon cayoi xan. Co Jacob vingattjenxin conixin nttacottohe co joinchecoanxinhi Dios. ²² Cai José vechonda confianza ngain Dios, mexinxin are ochiaon ndavenhe, jehe ndačo que después cain chojni Israel sačhjexin na de nttiha ngain nonttehe Egipto. Co jehe José coetonha que are satsji na chonda na que sasicao na nttaloroe jehe.

²³ Cai nindoha Moisés vechonda na confianza ngain Dios, mexinxin are concjiji Moisés, jehe na coema na Moisés ngoixin ní conittjao ixin vicon na que Moisés ná xanxichjan anto čhjoin jí, co řaonha na masqui coetonha rey que ixin cain xanxichjan de chojni Israel chonda que narrogoenxon na xan. ²⁴ Cai Moisés vechonda confianza ngain Dios, mexinxin are jehe ojoji ná xí, jehe čhoha para que vinhi xenhe nčhichjehe rey de Egipto. ²⁵ Sino que jehe icha joinao vetan tangui cai inchin icha chojní Dios en lugar de que jehe čhjoin rroconohe de rrojinchehe cosa jianha inchin joinao cuerpoe, ixin jehe venohe que mé jehó para nchion tiempo. ²⁶ Moisés, jehe conohe icha rentte para jehe vetan tangui de ixin causexin Cristo que jehe rroguenchonda cain cosa que jí ngain nonttehe Egipto, ixin jehe venohe jian quehe sacha nttiha ngajni. ²⁷ Cai ixin Moisés vechonda confianza ngain Dios, mexinxin jehe sacjoixin de ngain nonttehe Egipto, co jehe řaonha ixin rrocońao rey de

nttiha, sino que Moisés jehe joinchehe sigue jian vaguitticaon ngain Dios inchin orroguicon Dios que ni ná chojni diconha.

²⁸ Cai ixin Moisés vechonda confianza ngain Dios, mexinxin jehe coetonhe cain chojni Israel que sinchechjian na tti quiai pascua. Co coetonhe na ixin tsinga na jní coleco ngaré puerté nchia para que are joí ángel de Dios para nagoenxon cain xanxi xenhe chojni Egipto, xansaho ángel mé xonhi joinchehe ngain xenhe chojni Israel. ²⁹ Cai ixin cain chojni Israel vechonda confianza ngain Dios, mexinxin jehe na vatto na ndachaon que dinhi Mar Rojo inchin si rrocji ngataha jinche xema. Co are xisoldado de Egipto joinao xa rrogatto xa jamé cai, pero nttiha ndacjonhe xa jinda.

³⁰ Cai ixin chojni Israel vechonda confianza ngain Dios, mexinxin are jehe na ngariandnji na yáto nchanho ngain ciudad Jericó ttjarioho jie que vechonda ciudé na para vaguinttemanxin na are vaquetocaho na icha chojni, ttjarioho mé vetsinga ttjario. ³¹ Cai Rahab, tti nchí que vanchecji cuerpoe ngain tsje xí, pero por ixin confianza que jehe ncha coexinhi ncha vechonda ncha ngain Dios, mexinxin jehe nchí mé venha ncha are ndavintteguenhe cain icha chojni ngain ciudad mé ixin nchí mé jian vayé ncha tti chojni Israel que joitsaya ciudad mé.

³² ¿Co quehe icha rrondaçhjan janha? Janha ichondaha tiempo para rrondattjo ra de ixin Gedeón, de Barac, de Sansón, de Jefté, de David, de Samuel co de ixin cain profeté Dios. ³³ Cain nimé cai ixin confianzé na ngain Dios, mexinxin canxion na joacha na tsje nontte, co icanxin na coetonha na jian ngain chojni, co Dios cjoenguijna na inchin jehe ndaço ngain na. Co icanxin na are vetan na coleón, Dios cjoenguijna na para que joineha na va. ³⁴ Co icanxin na are vinttjin na ngacjan xohi que anto soji, pero xonhi conhe na. Co icanxin na, masqui chojni joinao narrogoenxon na conixin espada, pero nahi. Co tti chojni que tsangaha, jehe na contsanga na, co anto soji coeto na are ngain guerra co coixinhi na joacha na ngain cain soldadoe xivaningaconhe na. ³⁵ Co vinte nchí que masqui ndavenhe xenhe ncha, pero Dios joinchexechon xan mé iná para ixin jehe ncha.

Co icanxin chojni veçhoa co anto soji vicaon na. Co tti cjoaya ndache na ixin ixonhi cosa feo rroconhe na si irroguitticaonha na ngain Dios. Pero jehe na çhoaha na, ixin jehe na icha rinao na que Dios sinchexechon jehe na para rrochonda na ná vida icha jian. ³⁶ Co icanxin chojni vetan na tangui are icha chojni cjoanoa na na co vicaon na conixin nttá, co hasta cadena vintteçhiaxin na co viaxinhi na ngain cárcel. ³⁷ Co icanxin na nagoenxon na na conixin xo, icanxin na hasta conçhinjidonga na na, icanxin na icha chojni joinao que jehe na rrogachjenda na de ngain Dios, icanxin na venxin na conixin espada; co icanxin na vangaria na cain parte co vinttengá na jeho roé coleco co contentso, co anto noa na, coá na joachjaon, co feo conhe na ngain icha chojni. ³⁸ Cain chojni mé anto icha jian na que icha chojni. Vacjicoa na ngagaha nttá, co ngagaha jna, co vinte na ngaxinhi cueva, co ngain lugar que teçhjadoho nontte. ³⁹ Cain chojni mé masqui Dios ovicon que ixin ján ndoa jian vaguitticaon na ngain Dios, pero vayeha na tti ndaço Dios rroganjo ngain na, ⁴⁰ ixin Dios jehe xaxaon iná cosa icha jian para ixin ján na, ixin jehe ndaço que cain chojni mé tsojian ngattoxon con Dios pero hasta conixin ján na cai.

12

Ján na rrotsjehe na ejemploe Jesucristo

¹ Mexinxin ixin cainxin chojni mé que vitticaon na are saho cointtoá na na ejemplo mé, jai ján na tsin na ná lado cain cosa que xonhi xé co cain cosa jianha que ditaha na de sonttoho na, para que nchao conixin paciencia sonttoho na xé Jesucristo que ján na chonda na. ² Ján na rrotsjehe na ejemploe Jesucristo ixin jehe tti joiaoa na confianza que chonda na ngain Dios. Co jehe tti tsjenguijna na para sotticaon na mé para cain tiempo. Jesús jehe vetan tangui nganito cruz, co jehe joincheha caso tti joasoaxin que ixin jehe ndavenxin nttiha, ixin jehe ovenohe que después de setan tangui, jehe çhjoin tsonohe co rroché. Co sajoiguehe ngain lado jian de tti ttjen Dios.

³ Mexinxin jaha ra chonda ra que xaxaon ra ejemploe Jesús, que jehe anto tangui conhe de ngá rá chojni jianha; mexinxin jaha ra tonçhjenha ra ni doanha ra desanimado de ngain xé Jesús. ⁴ Ixin masqui jaha ra tencheluchá ra ngain cosa jianha, pero ni ná ra xa ndadenha ra ixin tenchehe ra jamé. ⁵ ¿Aondatjañaha ra tti Dios ndattjo ra ixin jaha ra inchin xenhe jehe? Jehe ndaço janhi ngain tti jitaxin Palabré:

Hijo mio, ndaçhoha ixin xonhi xé tti castigo que çhjá Dios, para que jaha tsangui sinchehe cosa jian,

ni doanha desanimado are sinttasattaha jehe.

⁶ Ixin Dios nchejian cain chojni que jehe anto riano, co nchecastigá cain tti chojni que jehe dayé inchin xenhe.

⁷ Tonsoji ra ngain castigo mé ixin Dios jehe jamé sinchehe nganji ra ixin jaha ra xenhe jehe. ¿Apoco jí ná çhjan que ndodé xan nchecastigaha ndo xan? ⁸ Pero si Dios sinttcastigaha jaha ra inchin jehe nchecastigá cain xenhe jehe, mexinxin rroço que jaha ra jaha mero xenhe jehe.

⁹ Cai ján na are nchinnchin gontte na, ndodá na de nttihi ngataha nontte vanttcastigá na ndo, co ján vanttorespetá na ndo. Mexinxin ¿quedonda ján na sotticaonha na Ndodá na que ttjen ngajni para que jamé ján na rrochonda na iná vida naroaxin? ¹⁰ Cain ndodá na nttihi ngataha nontte vanttcastigá na ndo nttihi ngain vida jiji que seha sonttechon na, inchin jehe ndo vaconohe ndo que nchao jí. Pero Dios jehe nttacastigá na para tsjenguijna na para que jehe nttajian na inchin jianxin jehe. ¹¹ Ján ndoa que ni ná castigo nttaxoxianha na ngain rato que ján na tedayé na castigo, sino que anto ttín na are mé: pero tti chojni que tangui de ngain castigo mé, después chojni mé chonda na vida jian co çhjoin tonohe na de ngain ansén na.

Tti tsonhe chojni que rinaoha ditticaon tti ndaço Dios

¹² Jañá ixin castigoe Dios anto rentte, mexinxin doan ra animado de nchehe ra tti jehe ndaço, co dinttechinha ra. ¹³ Co ttjé ra tti nttiha nao, co sattji ra ngatja nttiha mé para que chojni que jai ditticaonha jian, sicon na ejemploa ra co sitticaon na icha en lugar de isitticaonha na.

¹⁴ Nchehe ra de que cain ra dintte ra çhjoin conixin icha chojni ngain vida jiji, co daçhjendehe ra cain cosa jianha, ixin chojni que daçhjendehe na de ngain cosa jianha çhoha rrochonxin na Dios. ¹⁵ Ttjiho ra cuidado para que ni ná ra tsinttoeha ra de sayehe ra ayuda que ttixin de ngain Dios, co para que ni ná ra sintteha ra inchin ná ca que anto tsja que nchejianha icha ca. ¹⁶ Co ttjiho ra cuidado cai que ni ná jaha ra

dinttečhicoha ra iná nchí que jeha nchíchiha ra, ni ndačho ha ra ixin cosé Dios xonhi rentte inchin joinchehe Esaú, co mexinxin jehe joinchejji derecho que jehe vechonda de chjan saho ngain xanchó xanJacob. Cain mé joinchejji por ixin nacoa comida. ¹⁷ Co jaha ra noha ra que después, are Esaú joinao que ndodé rrojinchetsenhe ndo ñao Dios para que Dios rrojinchenchaon jehe Esaú, ndodé Esaú ichoha ndo. Co masqui jehe Esaú anto tsjanga pero jehe čhoha vittja quexén rrojinchehe para rroquentoxinhi tti jehe joinchehe.

¹⁸ Jaha ra conchienha ra ngain ná jna que nchao catte ni inchin joinchehe chojni Israel que conchienhe na ngain jna Sinaí tti jiche xohi, co tti vehe anto naxin xehe co tti anto soji cjoa čhintto. ¹⁹ Ni jaha ra coinha ra are coyao trompeta nttiha ni are nichja Dios ngain jehe na. Co cain chojni que coinhi mé, jehe na joinchetsenhe na ñao Moisés que ixin irronichjaha Dios icha jañá ngain jehe na. ²⁰ Jehe na ndačo na jañá ixin coixinha na de joaxaon, de ixin tti coetonha Dios are ndačo: “Quexeho chojni o coxigo que tsingachje ngagaha jna jihi, jaha ra chonda ra que nasoenxon ra chojni mé o coxigo mé conixin xo o conixin ná lanza.” ²¹ Cain na anto xaon na de ixin tti vicon na ngain jna mé, que hasta Moisés mismo ndačo: “Janha rriřanga na de joaxaon.”

²² Pero en lugar de jihi, jaha ra conchienhe ra ngain jna de Sión co ngain tti ciudad de Dios, cayoi mé rročo ngain Jerusalén de ngajni, co ngain tsje miles de ángel. ²³ Co conchienhe ra ngain icha chojni xenhe Dios que tequininxin ngajni; co jaha ra conixin jehe na co cain ángel mé tenchecoanxinhi ra Dios. Co jaha ra oconchienhe ra ngain Dios tti Juez de cainxin chojni co de ngain cain espiritue chojni jian que Dios joinchejian. ²⁴ Co jaha ra conchienhe ra ngain Jesús, tti abogado na ngain Dios para tti trato naroaxin, co chonda ra confianza ngain jni Jesús que jehe cointtji para nttajian na ján na; co jni jehe danjo icha jian cosa que jni Abel.

²⁵ Mexinxin jaha ra ttjiho ra cuidado de nchehe ra caso Dios, tti jinichjá na. Ixin Dios anto soji joinchecastigá chojni Israel are jehe na joincheha na caso tti Dios ndache na de ngain Moisés are ngain jna Sinaí que jí ngataha nontte jihi. Mexinxin ján na seguro soan na castigado si sonttoha na caso tti jindattjoxin na Dios desde ngajni. ²⁶ Are Dios nichjexin chojni Israel de ngagaha jna Sinaí, are mé tté jehe joinchequingui nontte, pero jai jehe ndačo: “Iná nttiha janha sinttaquingui jeoha nontte, sino que cai ngajni.” ²⁷ Are jehe ndačo “iná nttiha”, ján na ttinxin na que are mé rroxantte cain cosa que nchao ttingui que Dios joinchechjian, co jeho siguehe tti čhoha tsingui. ²⁸ Tti lugar que Dios chjá na, tti jehe ttetonha, mé čhoha tsingui. Mexinxin ján na chonda na que rrochjé na gracias ngain Dios de ixin cain jihi, co sonttocoanxinhi na jehe Dios inchin jiquininxin, conixin respeto inchin jehe rinao, ²⁹ ixin Dios jehe inchin ná xohi que tjaga cain cosa jianha.

13

Quexén sinchehe ni para sinchexoxinhi Dios

¹ Ttinttoeha ra de rinao chó ra inchin rrocji ra ichó ra cainxin ra. ² Co xonhi tiempo tjañaha ra de dayehe ra chojni que diji nchiandoi ra ixin jamé canxin chojni vayé na ángel de Dios ngain nchiandoha na, masqui jehe na ni vanjoha na cuenta que tti vayé na jehe ángel de Dios.

³ Co xaxaon ra cain chojni que teaxinhi ngain cárcel, inchin rrocji que jaha ra rroguintteaxinha ra nttiha cai conixin jehe na. Co xaxaon ra de ixin tti chojni que vicaon por ixin nichja de ixin Jesús, ixin jaha ra cai chonda ra ná cuerpo que tonohé ttín.

⁴ Cain ra xo tottaha ra, nchehe ra inchin tequininxin chojni que ototehe, co danjoha ra cuerpoa ra ngain iná chojni ixin Dios sinchejúzguehe cain tti chojni que danjo cuerpoe ngain ojé chojni que jaha xixihi ni jaha nchichihi, co ngain tti chojni que chonda xicoxehe o nchicoxehe.

⁵ Xaxaonha ra de rrochonda ra icha tomi, sino que dintte ra contento conixin jehó tti ochonda ra ixin Dios ndaço: “Janha xonhi tiempo tsinttoha jaho, co xonhi tiempo satsjixin de nganji.” ⁶ Mexinxin jai ján na nchao rrondaço na conixin confianza:

Dios jehe tti ttjenguijna na janha;

co xagoanha ni ná cosa que sinchena çhonja chojni.

⁷ Xaxaon ra de ixin tti chojni que coetonha ngain ningoa ra, co de ixin tti chojni que ndattjo ra joajné Dios. Xaxaon ra quexén joinchehe na ngain vidé na, co ditticaon ra ngain Dios inchin jehe na vitticaon na.

⁸ Jesucristo xonhi tiempo ojé; jehe xajeho jna, jai, co para cainxin tiempo. ⁹ Jaha ra dittoaxinha ra que icha chojni sinttacoanha ra na ojé cosa que ndoaha de ixin Dios. Icha jian tsosoji ansean na de ixin tti jian que ttixin de ngain Dios, co sotticaonha na tti regla de ixin quehe sine ni, ixin regla mé ttjenguijnaha pero ni tti chojni que ditticaon regla.

¹⁰ Co Jesucristo tti joanjo vidé para ixin ján na, pero tti dána que nchehe inchin ttetonha ley que vayé Moisés chondaha derecho de sayé ayuda ngain Cristo. ¹¹ Ixin dána judío icha importante xanxinhi jní coxigo ngaxinhi Lugar Santísimo de ngain ningoe na. Jní mé tti danjo dána ngain Dios para ditjañehe tti jianha que nchehe cain chojni judío. Pero cuerpoe cain coxigo mé che ngain xohi, ndoja de rajné na. ¹² Jamé cai Jesús vetan tangui are ndavenhe, pero ndoja de ciudad para joinchejian cain chojni conixin jní jehe. ¹³ Mexinxin chjin na ngain jehe masqui chojni ndaço ixin anto soaxin ixin dotticaon na ngain jehe. ¹⁴ Ixin ngataha nontte nttihi ján na chondaha na ni ná ciudad que tsonçhenhe para cainxin tiempo, sino que ján na tettjé na tti ciudad que tsí después. ¹⁵ Mexinxin cainxin tiempo ján na chonda na que sonttocoanxinhi na Dios por ixin ngain nombré Jesucristo co mé tti jiquininxin sonttoho na. ¡Mexinxin cain na sonttocoanxinhi na Dios conixin rroha na! ¹⁶ Co xonhi tiempo tjañaha ra de nchehe ra jian co ttjenguijna ra icha chojni conixin tti chonda ra, ixin mé tti ncheçoxinhi Dios dayé de nganji na.

¹⁷ Ditticaon ra tti chojni que ttetonha ngain ningoa ra, co nchehe ra tti jehe na rrondaço na ixin jehe na nitedicao cuidado de ixin almá ra ixin nohe na que jehe na nisanjo cuenta ngain Dios. Mexinxin nchehe ra de que jehe na rroché na nganji ra co jeha de que sinttechín na nganji ra, ixin si jaha ra nchehe ra para que jehe na sinttechín na, jaha ra setan ra tangui.

¹⁸ Nchetsenhe ra ñao Dios para ixin janha na ixin janha na chonda na seguro ixin nttaha na inchin jiquininxin, co rinaho na que cainxin tti sinttaha na, mé jian. ¹⁹ Janha anto danchiaha ra que jaha ra nchetsenhe ra ñao Dios para que Dios rrochjana joachaxin rrocjan na toin para sasotsjaha ra iná.

Tti joexinxin joajna jihi

²⁰Dios, tti rroanha tti ċhjoin que tonohé ansén ni, mé tti joinchexechon Jesucristo, tti chonda cain joachaxin para ixin ján na, co tti chonda cuidado para ixin ján na inchin ná tti jian ttingaria coleco dicao cuidado ixin colecoe, co jehe joinchese gurá tti trato naroaxin que xonhi tiempo tsjexin, conixin jní jehe. ²¹Que Dios mé sinttajian ra para que nchao sinchehe ra inchin jehe rinao, co de ixin Jesucristo jehe sinchehe de nganji cain ján na inchin jehe sinao. ¡Gloria ngain Cristo para cainxin tiempo! Amén.

²²Hermanos, janha nttatsanha ñao ra que chonda ra paciencia para ttinxin ra cain palabra de consejo jihi, ixin janha cjinha ra carta jihi, pero atto nchín carta. ²³Janha rrinttanoha jaha ra que hermano Timoteo ovaċhjexin de ngain cárcel tti jehe vehe. Si jehe tsí ntthi toin, janha sasoquian are janha saso para sasotsjaha ra iná.

²⁴Ĉjehe ra joajna cain chojni que ttetonha ngain ningoa ra, co cain chojni que ditticaon ngain Jesucristo. Cain chojni que ditticaon ngain Jesús ntthi nonttehe Italia rroanha na joajna para ixin cain jaha ra.

²⁵Que Dios sinttanchaon ra cain ra jaha ra. Amén.

Carta Que Dicjin Santiago

Santiago rroanha joajna ngain cain chojni Israel

¹ Janha Santiago na, janha ná ninchehe xé Dios co Jesucristo, tti chonda cain joachaxin. Janha rrichjaha joajna jihi tti tteyó grupoe chojni Israel que dichjequé ngoixin mundo.

Dios nchenohe chojni jehe

² Hermanos, jaha ra chonda ra que tsonoha ra chjoin are rrochonda ra quexeho clase de problema, ixin mé Dios sacaha ra prueba. ³ Ixin jaha ra onoha ra que are Dios dacaha ra prueba ixin andoa ditticaon ra jehe, are mé jaha ra tangui ra de chonda ra icha paciencia. ⁴ Pero nchehe ra que paciencia yá sehe nao, para que jaha ra sintte ra chojni que jian ditticaon Dios co de cainxin sintte ra chojni jian, co jamé cainxin ra xonhi tiempo sitjanha ra tti jian que ttixin de ngain Dios.

⁵ Si chonja de jaha ra noaha ra quehe rinao Dios, ndache ra jehe co jehe sinttanoaha ra, ixin Dios cainxin tiempo jehe anto rinao nchenohe cain chojni co jehe xonhi tiempo ttjengueyexin de tti jehe danjo. ⁶ Pero are sanchiehe ra Dios, chonda ra seguro que ján sinttanoaha ra. xaxaonha ra que ixin puede sinttanoaha ra, ixin tti xaxaon jamé jehe inchin olé ndachaon que sadicao chintto de ná lado a iná lado. ⁷ Tti chojni que xaxaon jamé, xonhi sayé de ngain Dios, ⁸ ixin tti chojni que jai rinao ná cosa co ndoexin jehe rinao ojé cosa, chojni mé chondaha seguro de ngain tti jehe xaxaon.

⁹ Co tti chojni que ditticaon Jesucristo co noa na de nttihi ngataha nontte, chojni mé chonda que tsonohe chjoin ixin jehe na rico na para ngain Dios. ¹⁰ Co tti chojni que ditticaon Jesucristo co jehe na rico na de nttihi ngataha nontte, chojni mé chonda que tsonohe na chjoin para ngain Dios are tsonoa na ixin para Dios xonhi xé cain cosa que chonda na nttihi ngataha nontte. Ixin chojni rico inchin tsjohe ná ca que seha tonchjenhe. ¹¹ Are chinhi nchanho co anto tosoa, ca mé ndaxema ca co tsjohe ca ndadinttjin tsjo co ndattjexin tti anto chjoin que te tsjo mé. Jamé cai chojni rico ndadenhe co ndadittohe cain negocio que jehe na chonda na.

Are Dios daquehe ni prueba, co ditaha ni de sinchehe ni cosa jianha

¹² Anto chjoin para ixin tti chojni que ttixinhi conixin paciencia are Dios daquehe prueba. Ixin are jehe ottixinhi ngain prueba mé, Dios rrochjé chojni mé de premio inchin ná corona, ixin chojni mé sayé tti vida naroxin que Dios ndacho sanjo ngain cain chojni que rinao na jehe. ¹³ Are chonja de jaha ra ditaha ra de sinchehe ra ná cosa jianha, xaxaonha ra que ixin Dios rroanha joarrixaon mé nganji ra, ixin Dios xonhi tiempo ditaha de sinchehe ná cosa jianha, ni jehe nchexaxaonha iná chojni para sinchehe na jianha mé. ¹⁴ Sino que are ná chojni anto rinao sinchehe cosa jianha ixin jehe deporsín jamé xaxaon, jamé ditaxin daca de sinchehe cosa jianha. ¹⁵ Co de ngain tti jianha que jehe xaxaon jihi, mé nchexin cosa jianha, co are cosa jianha jihi ttixinhi ngain chojni mé, Dios chjé na castigo de tti na ngain infierno.

¹⁶ Hermanos, janha anto rinaho jaha ra. Dintte ra listo de ditticaonha ra cosa que jeha ndoa. ¹⁷ Ixin cain tti jian que ján na dayé na ttixin de ngajni ngain Dios, tti joinchechjian cain xohi que jí ngajni. Dios jehé xajeho, co ngain jehé xonhi ditoxin que tsiaho jehé sanho. ¹⁸ Dios chjá na vida naroaxin ixin dotticaon na tti joajna ndoa que jehé rroán na para que ján na sontte na chojni icha jian para ixin jehé, ixin jehé jamé rinao.

Tti palabra que ján ndoa

¹⁹ Mexinxin cada ra jaha ra chonda ra que dintte ra listo para ttinhi ra, pero saho de rronichja ra xaxaon ra jian co dacaha toñaon ra. ²⁰ Ixin tti chojni que toñaon, mé ncheha inchin rinao Dios. ²¹ Jañá mexinxin ncheha ra cain cosa jianha, co cain cosa nchaoha que anto nchehe chojni ngain tiempo jiji, co ditticaon ra jian tti joajna ndoa que vittohe ngain ansean ra ixin joajna mé chonda joachaxin de tsjenguijna almá ra para tsjiha ngain inferno.

²² Pero nchehe ra inchin jittetonha joajna jiji, co jeoha ttinhi ra joajna jiji, ixin si jehé ttinhi ra co ncheha ra inchin jittetonha joajna, jamé jaho ra tencheyehe ra ansean ra. ²³ Tti chojni que jehé ttinhi joajna jiji co ncheha inchin jittetonha joajna, chojni mé inchin tti nchexoan ngá con ngá ná espejo. ²⁴ Jehé tsjehé quexén jitjsehe, pero are jehé sattji ndatjañehe quexén jitsjehé. ²⁵ Pero tti chojni que tjañeha tti jehé ttinhi, sino que jehé tsjehé jian ngain tti jitaxin cain tti ttetonha Dios, co nchehe cain tti jittetonha Dios, ixin mé joxon cosa jian co mé tti chjá na libertad; Dios sinchenchaon cain tti nchehe chojni mé.

²⁶ Si chonja chojni xaxaon na que ixin jehé na anto ditticaon na Jesucristo, pero si jehé na nichjacoa na palabra que jiquininxinha, jehé na noeha na quehe tenchehe na co tti jehé na ditticaon na xonhi xé. ²⁷ Tti chojni que ndoa ditticaon ngain Jesucristo co chondaha ni ná cosa jianha ngattoxon con Dios Ndodá na, mé tti chojni que tjenguijna chjan noa que chondaha ndodé ni janné, co nchiganha que tanguí tonhe, co cai chojni mé ncheha cosa jianha que jí ngataha nontte nttihi.

2

choha tsinchiexon ni chojni que sinao ni

¹ Hermanos, jaha ra que ditticaon ra Jesucristo, tti anto jian co tti chonda cain joachaxin para ixin ján na, jaha ra choha tsinchiexon ra chojni que icha sinao ra. ² Ixin ná ejemplo: Si ná chojni sixinhi ningoa ra que anto jian lontto jingá conixin cochianingo que anto rentte, co ngain rato mé cai sixinhi ná chojni noa que jingá lontto que xonhi xé, ³ co si icha jian sinchesayehe ra tti jingá lontto icha fino co rrondačo ra ngain: “Jaha nttihi darihi ngain ná lugar icha jian”, co tti chojni noa rrondačo ra ngain: “Jaha yá darringattjencoa, o nttihi darihi ngatacoa nontte”, ⁴ are jañá tenchehe ra, jaha ra otettinchiexon ra chojni que icha rinao ra, co jamé jaha ra tenchejuzguehe ra chojni mé inchin xaxaon chojni que ditticaonha ngain Jesucristo.

⁵ Hermanos, janha anto rinaho jaha ra. Ttinhi ra jiji. Dios coinchiehe chojni noa de ngataha nontte jiji para que jehé na sintte na rico de ngain tti jehé na ditticaon na Jesucristo, co para que jehé na sayé na de herencia parte ngain tti ttetonha Dios, que jehé ndačo sanjo ngain cain chojni que rinao na jehé. ⁶ Co jaha ra xaxaonha ra jamé, sino que jaha ra tjanoa

ra chojni noa. ¿Añoaha ra que chojni rico, mé tti anto nttanttaha ra xa, cottimeja ttianganji ra na para ngain juzgado? ⁷ Co chojni rico, mé tti nichja jianha de ixin tti nombre jian que jaha ra chonda ra ixin dinhi ra cristiano ixin ditticaon ra Jesucristo.

⁸Tti icha importante que ttetonha Dios tti jitaxin: “Rinao ra icha chojni jañá inchin rinao ra cuerpoa ra.” Si jaha ra ndoa tenchehe ra jiji, ján tenchehe ra jian. ⁹ Pero si jaha ra ttinchiexon ra chojni que icha rinao ra, mé tenchehe ra jianha ixin tenchehe ra inchin ttetonha Dios. ¹⁰ Ixin si ná chojni nchehe cainxin tti ttetonha Dios, pero si chojni mé ncheha nacoa cosa de cain tti ttetonha Dios, chojni mé xa jica de cain tti ttetonha Dios. ¹¹ Ixin Dios mismo ndačo: “Ncheyeha čihi iná chojni”, cai ndačo: “Dantsjeha vidé iná chojni.” Mexinxin si ná chojni chondaha nchicoexehe, pero jehe joantsjehe vidé iná chojni, chojni mé ivitticaonha cain tti ttetonha Dios. ¹² Mexinxin nichja ra jian co nchehe ra jian inchin jiquininxin sinchehe chojni que Dios sinchejuzguehe conixin ley de Cristo que danjo libertad. ¹³ Ixin tti chojni que coiaconoeha iná chojni, Dios cai tsiaconoeha chojni mé; pero tti chojni que coiaconoeha iná chojni, chojni mé tti sacha are Dios sinchejuzguehe cainxin chojni.

Chojní Jesucristo chonda que sinchehe jian

¹⁴ Hermanos, xonhi xé si ná chojni ndačo que jehe chonda confianza ngain Jesucristo co ncheha cosa jian. ¿Anchao jehe tti confianza mé tsjenguijna para que tsjiha ngain infierno? ¹⁵ Jihi ná ejemplo: Si ná chojni que ditticaon Jesucristo chondaha lontto ni tti jine ¹⁶ co si ná de jaha ra rrondache ra: “Jian gracia ndoe. Jintte co dihi, co daritsí jian para tsonquianha”, pero rrochjeha ra lontto ni tti sine, xonhi xé tti jaha ra rrondache ra. ¹⁷ Jañá tonhe ngain confianza que chonda na ngain Jesucristo cai. Jeho mé xonhi xé. Chonda na que sonttoho na cosa jian para tsjago na que ján chonda na confianza ngain Jesucristo.

¹⁸ Pero puede ðhonja chojni rrondattjo: “Jaha chonda confianza ngain Jesucristo, co janha nttaha cosa jian.” Mexinxin janha ndačhjan: “Jaha tjagohna quexén jaha chonda confianza ngain Jesucristo si sincheha cosa jian, co janha tsjagoha jaha ixin chonda confianza ngain Jesucristo de ixin tti jian que janha rrinttaha.” ¹⁹ Jaha anto chonda confianza que jí nacoaxinxon Dios, co de mé jaha jian nchehe, pero cainxin demonio chonda confianza mé cai, co xanga de joaxaon ixin nohe que Dios sinchecastigá. ²⁰ Jaha que xaxaonha nao, ¿arinaoha tsonoha que tti confianza que jehe ni chonda ni ngain Jesucristo chonda que rroxago de ngain tti jian que jehe ni nchehe ni, co jamé nchoe ján jian confianza mé? ²¹ Xaxaon ra ngain Abraham, tti ndogoelitoa na xančhjen. Dios ndačo ixin jehe jian are Abraham narrogoenxon xenhe, xan vinhi Isaac ixin Dios jamé coetonha ngain Abraham. ²² Jaha onoha que Abraham anto vechonda confianza ngain Dios ixin jehe vehe dispuesto de joinchehe quexeho cosa que Dios rrondačo. Tti confianza que jehe vechonda xettexin de ngain tti jehe joinchehe. ²³ Mexinxin ndačhoxin ngain tti jitaxin Palabré Dios que Abraham vechonda confianza ngain Dios, co Dios ndačo que Abraham jian de ngain ansén ixin chonda confianza mé. Co hasta Dios joincheguinhí Abraham amigoe Dios.

²⁴ Jañá jaha ra onoha ra que Dios dayé chojni de ixin tti jian que jehe na nchehe na, co jeoha de ixin tti confianza que jehe na chonda na.

²⁵ Cai jamé conhe ngain Rahab, tti nchí que vanchecji cuerpoe ngain icha xí. Dios vayé nchí mé de jian ncha ngattoxon con Dios de ixin tti jehe ncha joinchehe ncha ixin jehe ncha joanjo ncha nchia tti vinte tti ní xí que rroanha Josué, co cjoenguijna ncha canio xí mé para sacjoixin xa ngain ojé nttiha. ²⁶ Jañá inchin cuerpoe na are icoha espiritua na jehe ndadiguenhe, jamé cai tti confianza que ján na chonda na inchin ndadiguenhe si nttoha na tti jian.

3

Tti nchehe neje ni

¹ Hermanos, icha jian sintteha ngayaha ra tsje tti sinttacoanha ra ixin jaha ra onoha ra que janha na, xo nttacoanha ra, icha soji soanna na juzgado. ² Cainxin na atto tsje cosa nchaoha nttoho na co nchaoha nichja na. Si chonja chojni cainxin tti jehe nichja jian, chojni mé joxon jian que cai nchao ttetonhe ngoixin cuerpoe. ³ Are ján na ttinhi na freno ngain rroha ná conxin, jehe va ditticaon na va ttjinho na va tti ján na rinao na. ⁴ Xaxaon ra cai ngain barco; masqui anto yeye barco, co chintto que tonxınca barco cai anto soji, pero tti deca barco nchegonda ná nttá anto nchín que dinhi timón. Conixin nttá mé dicaoxin barco tti jehe rinao. ⁵ Jañá tonhe cai ngain neje ni. Neje ni ná parte anto nchín de ngain cuerpoe ni, pero jehe tonohe que nchao sinchechjian tsje problema tangui. Neje ni inchin ná jachjenhe cerillo que anto nchín pero tsixinhi tsjaga ngoixin ná jna. ⁶ Co neje ni, jehe inchin ná xohi. Neje ni ná cosa anto jianha que jí ngain cuerpoe ni, mé ná cosa jianha que nchejianha ngoixin cuerpoe ni. Neje ni jidacaon conixin mero xoi infierno, co xohi mé jitjaga ngoixin cuerpoe ni cain tiempo que techon ni. ⁷ Chojni nchao nchesancho cain tipo de coxigo chintto co tsanga, co conttoa co conché co cain coxigo que jí ngangui ndachaon. Chojni ttixinhi nchesancho cain coxigo mé. ⁸ Pero xonhi chojni ttixinhi ngain neje. Neje ni ná cosa jianha que xonhi chojni ttixinhi ngain, co neje ni chonda inchin veneno que nadoenxon chojni. ⁹ Conixin neje na, nttocoanxin na Dios Ndodá na, co xajeho neje na jiji danchiaxin na cosa jianha para ixin chojni que Dios joinchechjian inchin jehe mismo. ¹⁰ De rroha na nttocoanxin na Dios co de rroha na danchiaxin na cosa jianha para ixin chojni. Nttatsanha ñao ra, jiji jiquininxinha sonttoho na. ¹¹ Ixin ¿apoco nchao tti rrochinxin jinda que anto chjoin jni, nttiha nchao rrochinxin jinda que anto tsja? ¹² ¿O apoco ná nttahigo nchao sinchechjian nttá aceituna, o ná nttauva nchao sinchechjian nttá ttohigo? Jañá cai tti jichinxin jinda que anto xijntta, nttiha choha rrochinxin jinda que anto chjoin jni.

Quexén Dios nchenohe chojni tti anto jian

¹³ Si jí ngayaha ra ná chojni que nohe jian de ixin Dios co ttinxin jian, chojni mé chonda que tsjago de ngain tti jian que jehe nchehe, co jehe tsjago conixin paciencia que ttixin de ngain tti jehe nohe. ¹⁴ Pero si jaha ra anto chjoaha ra, co ttenchjinha ra coraje ngain ansean ra, co de cain cosa rinao ra que jaho ra tti sintte ra icha importante, de cain yá jaha ra chondaha ra que tsonoha ra orgulloso de ixin noha ra de ixin Dios, ixin si jaha ra tonoha ra orgulloso, mé rrocho que jeha ndoa tti jaha ra tenchehe ra. ¹⁵ Ixin cain yá ttixinha de ngain Dios, yá jeho tti nchehe chojni ngataha nontte co yá tti rinao inchínji. ¹⁶ Ixin tti jí joachjoehe co tti

rinao na que jeho na nisintte icha importante, nttiha xonhi respeto jí, co nttiha jí cain clase de cosa jianha. ¹⁷ Pero tti chojni que Dios nchequinxin na, chojni mé chonda na ná vida jian; jehe na chinttoha na, sino que amable na, co jehe na ndačo ansén na para ttjenguijna icha chojni, co ttiacnoehe na chojni, co nchehe na cosa jian. Cai jehe na cainxin tiempo chonda na confianza ngain Jesucristo, co jehe na jeha ncheyaxon na. ¹⁸ Co tti chojni que ncheconohe chjoin ngain ansén icha chojni, chojni mé nchehe na jian para que icha chojni rrochonda cainxin inchin jiquininxin.

4

Chojni que anto ncheoxinhi cosa ngataha nontte rinaoha Dios

¹ ¿De ttinó ttixin tti ningaconhe chó ra co tti ttetococho chó ra? Mé ttixin de ngain tti jianha que jaha ra xaxaon ra ixin jehe mé cainxin tiempo jincheaxaon ansean ra de sinchehe ra jianha. ² Jihi tti tonhe: Jaha ra rinao ra ná cosa, co ixin choha chonda ra, jaha ra hasta nadoenxon ra chojni para nchao chonda ra tti jaha ra rinao ra. Co jí tiempo que tonchjoaha ra de quexeho cosa que chonda iná chojni, co ixin jaha ra choha chonda ra cosa mé, mexinxin jaha ra ttetococho ra chojni. Jaha ra choha chonda ra tti jaha ra rinao ra ixin danchieha ra Dios. ³ Ndoa que jaha ra danchia ra, pero jeha jian tti jaha ra danchia ra, mexinxin Dios chjaha ra tti jaha ra danchia ra ixin tti jaha ra rinao ra jeho para sonda inchin rinao cuerpoa ra. ⁴ ¡Jaha ra chojni jianha! ¿Anoaha ra que si jehe ni anto sinao ni cosa jianha que jí ngataha nontte, jehe ni isinaoha ni Dios? Quexeho chojni que anto sinao cosa jianha que jí ngataha nontte, chojni mé cjan ningaconhe Dios. ⁵ Mexinxin jí razón ndačo ngain tti jitaxin Palabré Dios: “Espíritu Santo que Dios cointtohe nganji na, Espíritu mé anto rinao na pero cai anto chjio para ixin ján na.” ⁶ Pero Dios, jehe anto ttjenguijna na ján na ixin jehe anto jian, ixin ndačo ngain tti jitaxin Palabré: “Dios toñaon ngain chojni orgulloso, pero jehe ttjenguijna tti chojni que jeha orgulloso ixin Dios anto jian.” ⁷ Mexinxin nchehe ra inchin tti ttetonha Dios. Ttixinha ra para ncheha ra inchin rinao inchínji, co jamé jehe satsjixin de nganji ra. ⁸ Tonchian ra ngain Dios, co jehe tsonchian nganji ra. Jaha ra que tenchehe ra jianha, ttentoxinhi ra vidá ra. Co jaha ra xo xaxaon ra ixin nchao sinao ra Dios co sinao ra cosa jianha que jí ngataha nontte ngain nacoa tiempo, ttín ra ansean ra para ixin jeho Dios. ⁹ Dinttechinhi ra, tsjanga ra, co ta ra joachjaon de ixin tti jianha que joinchehe ra. En lugar de tsjano ra, tsjanga ra; co en lugar de rrochaha ra, dinttechinhi ra. ¹⁰ Tonoaha ra importante para ngain Dios, co jamé jehe sinttachjian ra chojni importante ngattoxon con jehe.

Jehe ni chondaha ni que sinchejuzguehe ni iná chojni

¹¹ Hermanos, nttatsanha ñao ra nichjaha ra jianha de ixin iná chojni que ditticaon Jesucristo. Tti nichja jianha de ixin ná chojni que ditticaon Jesucristo o jinchejuzgá ngain na, chojni mé jinichja jianha de ixin ley que coetonha Dios co jinchejuzguehe ley mé. Co si jaha ra sinchejuzguehe ra ley mé, rrocho que jaha ra tti juez ra de ngain ley mé en lugar de sitticaon ra cain tti ttetonha ley mé. ¹² Ixin jeho nacoa tti joanjo ley mé, co jehe mé tti juez, co jehe mé tti nchao tsjenguijna

na o sinttatján na. Pero jaha ra, ¿quehe joachaxin chonda ra para sinchejuzguehe ra iná chojni?

Noeha ni quehe tsonhe ndoe o rejngui

¹³ Jai ttinhi ra jahi jaha ra xo ndačo ra: “Jai o ndoe satsjin na ngain quexeho ná ciudad, co nntiha sontte na ná nano para sonttó na negocio co sacha na tsje tomi.” ¹⁴ Jaha ra ni noaha ra quehe siconhe ngain nchanho ndoe. ¿Quejanhi nano tončhenhe vidé jehe ni? Vidé jehe ni inchin ná ranontte que xago ná rato, cottimeja jaicoa ndaditján. ¹⁵ Janhi tti jiquininxin rrondačo jaha ra: “Si Dios rinao, ján na sonttechon na co sonttoho na jahi co jiha.” ¹⁶ Pero jaha ra ni ndačoha ra jańá, sino que jaha ra nichja ra conixin orgullo de jaho ra, co cain orgullo yá jianha. ¹⁷ Tti chojni que nohe quexehé tti jian co ncheha, chojni mé jianha jinchehe.

5

Tti vitonhe chojni rico

¹ Jaha ra chojni rico, ttinhi ra jahi! Tsjanga ra co toyao ra ixin tti anto tangui jichonha ra. ² Cain cosa rentte que jaha ra chonda ra jai ixonhi xé, co lonttoa ra anto fino que chonda ra ndadijine cochí. ³ Cain oro co plata que chonda ra ndadiguihi chjín, co chjín mé tjago ixin jaha ra joincheha ra inchin jiquininxin conixin tomia ra. Co mé tsjaga nttaoha ra inchin rrocji xohi. ¿Quedonda anto joatse ra tomi co cosa anto rentte ngain tiempo jahi que ochian ndatsjexin mundo? ⁴ Jaha ra cjoengueha ra hna tti chojni que joinchehe xá ra ngataon jnguiha ra co tomí chojni mé tti tečo jie jai para ixin jaha ra. Co Dios, tti chonda cain joachaxin, jinohe cain jahi. ⁵ Nntihi ngataha nontte jaha ra techonda ra ná vida anto čjoin ixin nchehe ra cain tti rinao ra co jintte ra cain tti nttaoxinha ra, tetjonttao ra xá coleco para ngain nchanho de matanza. ⁶ Jaha ra joičo ra jie para ixin chojni que xonhi teca co nagoenxon ra na. Co jehe na tsinha rá na nganji ra.

Quexén rrochonda ni paciencia co quexén sinchecoanxinhi ni Dios

⁷ Mexinxin hermanos, chonda ra paciencia hasta que Jesús tsí iná. Inchin tti ttenga ngataon jngui si jehe rinao rrotsín jian cosecha, jehe chonda que rrochonhe conixin paciencia hasta tsija čin. ⁸ Jamé jaha ra cai chonda ra paciencia co doanha ra desanimado ixin ochiaon joí nchanho que Jesucristo tsí iná. ⁹ Hermanos, tońaoha chó ra para que Dios sinchejuzgaha nganji ra ixin Dios tti Juez co jehe ochian joí. ¹⁰ Hermanos, tse ra de ejemplo tti tangui que conhe cain profeta que nichja conixin joachaxin nombré Dios co tti paciencia que jehe na vechonda na. ¹¹ Ixin ján na xaxaon na feliz tti chojni que ttixinhi are jehe tangui tonhe. Jaha ra ocoinhi ra tti paciencia que vechonda Job. Co jaha ra onoha ra quexén joinchehe Dios ngain Job después ixin Dios jehe anto ttiaconoehé ni.

¹² Pero de cainxin cosa nttatsanha ñao ra hermanos que ncheha ra jurado ni de ixin ngajni, ni de ngataha nontte, ni de iná cosa chondaha ra que sinchehe ra jurado. Are rrondačo ra: “Ján”, que ján jamé tsonhe. Co are rrondačo ra: “Nahi”, que jamé nahi, para que Dios rochjaha ra castigo.

¹³ Si čhonja de jaha ra tedetan ra tangui, chonda ra que nchetsenhe ra ñao Dios para que jehe sinttjian tangui mé. Si čhonja ra anto chaha ra, chonda ra que tsje ra alabanza para ixin Dios. ¹⁴ Si čhonja de jaha ra niha ra, chonda ra que dayehe ra chojni que chonda joachaxin ngain nihngo para que chojni mé sinchetsenhe na ñao Dios para ixin jehe tti nihi mé. Co conixin joachaxin nombré Dios tsinga na aceite já tti nihi mé. ¹⁵ Co are sinchetsenhe ra ñao Dios co rrochonda ra seguro que Dios sinchexingamehe jehe tti nihi mé, tti nihi mé rroxingamehe co Dios sinchetjañehe tti jianha que joinchehe jehe tti nihi mé. ¹⁶ Mexinxin ndache chó ra naná ra tti jianha que joinchehe ra co nchetsenhe ra ñao Dios para ixin icha nicompañeroa ra para que cain ra rroxingamaha ra. Are ná chojni jian ngattoxon con Dios sinchetsenhe ñao Dios conixin ansén, palabré chojni mé chonda tsje joachaxin. ¹⁷ Profeta Elías cjoí ná chojni janhi inchin ján na, co are jehe joinchetsenhe ñao Dios ixin itsiha čhin, jamé conhe; ijoiha čhin ngataha nontte jihi ní nano co rioho. ¹⁸ Co después, are jehe joinchetsenhe ñao Dios iná ixin tsí čhin, jamé conhe; cjan jói čhin iná co nontte joanjo nontte cosecha.

¹⁹ Hermanos, si čhonja de jaha ra isitticaonha ra Dios co sinchehe ra oje cosa, co si iná chojni tsjenguijna ra para que jaha ra rrocjan ra sitticaon ra Dios iná, ²⁰ ttettexin ñao ra que chojni que sinchequentoxinhi vidé iná chojni para que jehe isincheha jianha, chojni mé tsančhjandaha almé chojni para que tsji ngain infierno, co tti chojni que rrondačo jamé, jehe sinchehe que tti iná chojni sitjañehe tsje jianha que jehe joinchehe.

Saho Carta Que Dicjin Pedro

Pedro rroanha joajna ngain chojni judío que ditticaon Jesucristo co teha ngain nacioen

¹ Janha Pedro na, janha ná representanté Jesucristo. Cjin na carta jiji para ixin jaha ra xo judío ra que teha ra ngain nontteha ra co ditticaon ra Jesucristo; jaha ra xo te ra ngain nonttehe Ponto, nonttehe Galacia, nonttehe Capadocia, nonttehe Asia, co nonttehe Bitinia. ² Jaha ra tti Dios Ndodá na coinchiaha ra desde osé tiempo vatto para que sintte ra chojni jehe Ndo. Co Espiritu Santo joincheroa ansean ra para que sitticaon ra tti coetonha Dios, co para que cain tti jianha que joinchehe ra oxenga hna conixin jni Jesucristo. Dios rrochjá ra tsje tti jian co tti chjoin que tsonhe ansean ra.

Tti vida naroaxin que xonhi tiempo tsjexin

³ Ján na sonttocoanxinhi na Dios Ndodé Jesucristo, tti chonda cain joachaxin para ixin ján na, ixin Dios mé tti coiaconoá na, mexinxin chjá na vida naroaxin ixin jehe joinchexechon Jesús. Co jehe joinchehe jañá para que ján na rrochonda na seguro ixin sonttechon na ngain vida naroaxin para cainxin tiempo. ⁴ Co jehe Dios rrochjá ra tti herencia que jehe jittenchjinha nttiha ngajni, co cosa mé choha rroxantte ni choha rrochonda mancha, ni rroxentteha inchin tsjo. ⁵ Co ixin jaha ra ditticaon ra Dios, jehe jinda ra conixin joachaxin jehe para que sayeha almá ra castigo. Co cosa jiji jaha ra sicon ra ngain último tiempo are ochiaon ndatsjexin mundo.

⁶ Mexinxin jai jaha ra anto chaha ra, masqui puede chonda que nchion tiempo jaha ra atto tangui tetonha ra. ⁷ Ixin chonda que jamé tetonha ra para que nchao xago ixin jaha ra ndoa ditticaon ra Jesucristo. Co cai oro, masqui chonda que ndatsjexin, pero tangui tonhe are xotte ngacjan xohi para que chojni dicon si ndoa jian oro. Pero tti jaha ra ditticaon ra, mé icha rentte que oro que ndattjexin. Mexinxin chonda que anto tangui tonha ra para que xago si jaha ra ditticaon ra jian ngain Jesucristo. Co si jaha ra tsixinha ra cain cosa tangui yá, jiquininxin que Jesucristo rronichja jian de ixin jaha ra, co anto sinttasayaha ra are jehe tsí iná.

⁸ Jaha ra rinao ra Jesucristo masqui xonhi tiempo vicon ra, co chonda ra confianza ngain jehe jai masqui diconha ra. Mexinxin jai jaha ra anto chaha ra que hasta ni choha rronichja ra de ixin quexén chjoin tonoha ra, ⁹ ixin jaha ra ochonda ra vida naroaxin ixin ditticaon ra Jesucristo.

¹⁰ Ngain tiempo are saho, profeté Dios anto cjoé ngain tti jitaxin Palabré Dios, co coangui jian para rroquinxin de ixin tti jaha ra ditticaon ra jai, co vanichja de ixin quexén Dios sinchenchaon nganji jaha ra. ¹¹ Espiritu Santo, que rroanha Cristo, vanchenohe profeta desde are saho de ixin quexehe cosa tangui tsonhe jehe Cristo co de ixin después cain chojni sinchesayehe na jehe. Co jehe profeté Dios anto joinao rroconohe ixin quensen jehe tti Cristo co quesa rroquí. ¹² Pero Dios joinchenohe cain profeta que tti xa que jehe vanchehe jeha para ixin jehe, sino para ixin ján na. Co cain tti jehe vanichja, mé xajeho tti jian joajné Jesucristo que jaha ra conoha ra después. Co tti chojni que jointtanoha ra joajna mé,

jehe na vinttechonda na joachaxín Espíritu Santo que joixin de ngajni. Co cain cosa jiji hasta cain ángel orrojinao rroguintteguicon.

Dios rinao que ján na sontte na ngain ná vida jian

¹³ Mexinxin, xaxaon ra jian tti jaha ra sinchehe ra co nchegonda ra joarrixaoan ra. Co chonda ra seguro ngain Dios que jehe sinttanchaon ra ngain nchanho are Jesucristo tsí iná. ¹⁴ Ditticaon ra tti ndačo Dios inchin chjan jian que ditticaon xan ndodé xan, co ncheha ra cosa jianha inchin jaha ra vajinao ra vanchehe ra are icha saho que jaha ra rroguitticaon ra Dios. ¹⁵ Incheha ra jamé, sino que dintte ra ngain ná vida jian ixin Dios que coinciaha ra jehe jian, ¹⁶ ixin ndačo ngain tti jitaxin Palabré Dios: “Jaha ra dintte ra ngain ná vida jian ixin janha jian na.”

¹⁷ Dios tti nchejuzgá tti nchehe cada chojni, co nchejuzgá inchin tequininxin cada chojni. Co si jaha ra ndačo ra ixin Dios mé tti Ndodá ra, jaha ra chonda ra que rrořagonhe ra jehe Dios ngoixin tiempo que jaha ra sinttechon ra ngataha nontte jiji. ¹⁸ Dios icoančjandaha jaha ra para řa rroguintte ra ngain tti vida que řonhi řé para ixin Dios, inchin tti vida que jointtacoanha ra nindogoelitoa ra. Co jaha ra noha ra jian que tti vitte vida que chjá ra Dios; xengaxinha hna conixin cosa que nchao ndatsjexin inchin oro o plata, ¹⁹ sino que xengaxin hna conixin jní Jesucristo. Jesucristo ni ná cosa jianha joinchehe. Mexinxin jehe ndavenhe para cjoenga hna cain cosa jianha que jointtoho na, inchin are saho chojni vagoen na coleco para vaganjo na ngain Dios para vaxenga hna tti jianha que vanchehe na. ²⁰ Jesucristo ovequininxin jańá desde icha saho que nontte rroconchjian. Pero jehe řa coenha mé, jehe joiconhe hasta ngain tti último nchanho tehe que ondajittjexin mundo. Jehe joiřago co conhe jańá para que cjoenguijna jaha ra. ²¹ De ixin Jesucristo jaha ra ditticaon ra Dios. Co Dios joinchexechon co joinchesayehe Jesucristo. Mexinxin ansean ra ndačo para que ditticaon ra Dios co chonhe ra que Dios jian sinchehe nganji ra.

²² De ixin joachaxín Espíritu Santo jaha ra ditticaon ra tti joajna ndoa que joixin de ngain Dios, mexinxin jai jaha ra ocoroa ra. Co mexinxin jaha ra nchao rinao ra cain chojni que ditticaon Jesucristo. Jańá chonda ra que anto sinao chó ra naná ra conixin ansean ra. ²³ Jaha ra cjan ra goan ra iná, pero ijeha de ngain chojni de ntthi ngataha nontte ixin chojni mé ndadenhe. Jaha ra cjan ra goan ra iná pero de ngain palabré Dios, co palabra mé tti danjo iná vida naroxin co tsončjenhe para cainxin tiempo. ²⁴ Ixin tti jitaxin Palabré Dios ndačo:

Cainxin chojni jeho inchin ná ca,
co cainxin cosa jian que jehe na chonda na, mé inchin tsjohe ca.
Ca ndaxema ca, co tsjohe ca ndadingo tsjo;

²⁵ pero palabré Dios tončjenhe para cainxin tiempo.
Co palabra jiji tti jian joajna que jaha ra vayehe ra.

2

¹ Mexinxin, ttinttohe ra cainxin cosa jianha, inchin de tti ncheyehe ra chojni, co tti jaha ra nchehe ra para chojni řaxaon na ixin jaha ra anto jian ra, co ndoaha, ixin ngain ansean ra ojé teřaxaon ra, co ttinttoehe ra tti joachjoehe para ngain chojni, co tti cain clase de chijni que jeha ndoa. ² Nchehe ra inchin chjan que nandá toncjiji; ttjé ra palabré Dios

inchin jehe xan ttjé xan tsjin, para que icha sitticaon ra Jesucristo co para rrochonda ra iná vida naroaxin. ³ Nchehe ra jamé si jaha ra ndoa ditticaon ra que Dios ján jian.

Jesucristo inchin ná xo que jichon

⁴ Ditticaon ra Jesucristo icha co icha ixin jehe inchin ná xo que chonda vida. Janha ndattjo ra jañá ixin jehe inchin tti xo icha importante ngain esquiné nchia, co nchia mé rrocho ningoe Dios. Chojni are saho ndačo na que xo jihi xonhi xé xo, pero para ixin Dios xo jihi anto jian xo co anto rentte xo. ⁵ Jaha ra cai inchin xo que chonda vida. Mexinxin dittoaxin ra que Dios sinttagonda ra para que de jaha ra Dios sinchechjian ná ningoe. Co cain jaha ra ná grupo de xidána jian para ixin Dios que de ixin Jesucristo jaha ra nchesayehe ra Dios ixin nchehe ra jian, co jehe Dios nchao sayé tti jaha ra nchehe ra. ⁶ Janha ndačhjan jañá ixin ndačo ngain tti jitaxin Palabré Dios:

Janha tsín ngain ciudad de Sión ná chojni que sehe inchin tti xo que nchegonda chojni para nchechjian na esquiné ningona, pero xo mé ná xo que janha coinchiá co anto rentte xo mé.

Co cain chojni que ditticaon ngain xo mé, xonhi tiempo sinttechín na de ixin jehe xo mé.

⁷ Jaha ra que ditticaon ra, noha ra que xo mé atto rentte xo; pero para ixin tti chojni que ditticaonha, diconhe inchin ndačo ngain tti jitaxin Palabré Dios are ndačo:

Tti xo que xialbanil ndačo que xonhi xé, pero xo mé xo icha importante de cain xo.

⁸ Co cai tonhe inchin ndačo ngain tti jitaxin Palabré Dios are ndačo: xo jihi tti tonttenguixin chojni, co tti jehe na xantjaxin na.

Ndoa jehe na tonttenguixin na ixin ditticaonha na tti jian joajna, ixin ojamé viquininxin na.

Tti chojni Dios

⁹ Pero jaha ra joxon chojni que Dios coinchiehe, jaha ra ná grupo de dana que nchesayehe Dios ixin mé tti rey; jaha ra ná nación jian, co jaha ra chojni Dios. Co jañá para que jaha ra rrodache ra icha chojni tti jian que nchehe Dios, tti vayaha jaha ra para sajoixin ra de ngain tti naxin xehe que vintte ra, para que jai te ra ngain tti anto čhjoin jí joadingasán que jehe chonda. ¹⁰ Are icha saho jaha ra ni jaha chojni Dios vintte ra, pero jai jaha ra ochojni Dios ra; are icha saho jaha ra xonhi quensen vaquiaconoaha ra, pero jai Dios ttiacoonaaha jaha ra.

Dintte ra ninchehe xé Dios

¹¹ Hermanos, jaha ra que teha ra ngain nacioan ra, nttatsanha ñao ra que xonhi tiempo dittoaxin ra nchehe ra tti jianha que xaxaon ni, ixin jehe mé tti ttetocaho almé ni. ¹² Jaha ra nchehe ra jian ngayé cain chojni que xa ditticaonha Dios. Jamé jehe na, masqui nichja na jianha de ixin jaha ra jai, inchin rrocji ra chojni que joinchehe tsje cosa jianha, pero jehe na sicon na tti jian que jaha ra tenchehe ra, co are tsí nchanho que Dios sinchejuzgá ngain chojni, cottimeja nchoe jehe na rronichja na jian de ixin Dios.

¹³ Ixin jaha ra rinao ra sinchesayehe ra Jesucristo, mexinxin ditticaon ra cai cain chojni que chonda joachaxin para ttetonha ntthi ngataha nontte, inchin tti ttetonha xiemperador que chonda icha jie joachaxin.

¹⁴ Co ditticaon ra cain tti rrondačo cain xigobernador que jehe xiemperador rroanha para sinchecastigá xa tti chojni que nchehe jianha co para sinchesayehe xa tti chojni que nchehe jian. ¹⁵ Ixin Dios rinao que jaha ra sinchehe ra jian, para que cain chojni que xonhi chonxin de ixin Dios co cain chojni que xonhi xé tti jehe xaxaon čhoha rronichja na jianha de ixin jaha ra.

¹⁶ Janha rrindattjo ra ixin ditticaon ra cain chojni que chonda joachaxin para ttetonha nntihi ngataha nontte, pero masqui jamé, xaxaon ra ixin chonda ra libertad. Pero mé rročhoha que ixin jaha ra nchao sinchehe ra cosa jianha ixin chonda ra que sitticaon ra Dios ixin jaha ra chojni jehe. ¹⁷ Jaha ra chonda ra respeto ngain cain chojni. Rinao ra cain chojni que ditticaon Dios, chonda ra que rroxagonhe ra Dios, co chonda ra respeto ngain xiemperador.

Tti anto tangui que conhe Jesucristo, mé ná ejemplo para ixin ján na

¹⁸ Jaha ra, xo nchehe ra xa ngain ná xinajni, chonda ra que sitticaon ra tti tsetonha ra xinajnia ra, co jamé sinchehe ra jeoha ngain xinajni que anto jian para ixin jaha ra, cai ngain xinajni que jaha jian. ¹⁹ Ixin mé ná cosa jian si jehe ni tsixinhi ni tti tangui que tsonhe ni masqui xonhi razón pero jeha ixin jehe ni rinao ni Dios. ²⁰ Ixin si jaha ra nchehe ra canxion cosa jianha co mexinxin nttacastigaxin ra na, mé masqui tsixinha ra conixin paciencia pero jaha ra cjoé ra para tsonha ra jamé. Pero si jaha ra tenchehe ra jian co xa tenttastigá ra na co jaha ra tettixinha ra conixin paciencia, jamé nchoe ján jian tenchehe ra ngattoxon con Dios. ²¹ Mexinxin para ixin jamé Dios coinchiaha jaha ra. Co cai Jesucristo anto tangui conhe para ixin jaha ra, para chjá ra ná ejemplo, para que jaha ra jamé sinchehe ra cai. ²² Jesucristo ni ná cosa jianha joincheha, co jehe xonhi tiempo joincheyehe ni ná chojni. ²³ Co are icha chojni vanichja na jianha ngain jehe, jehe xonhi jianha vanichja ngain jehe na. Co are vancheguetan na Jesús tangui jehe vanchexaonha na, sino que jehe chonhe para tti sinchehe Dios ixin Dios tti Juez que nchehe inchin jiquinixin ngain cainxin chojni. ²⁴ Cainxin tti jianha que ján na nttoho na, Jesucristo ocjoenga hna are jehe vengano cruz; jehe conhe jamé para ján na vachjexin na de ngain cosa jianha, para que jai te na ngain cosa jian. Co jehe vicaon hasta conihi cuerpo para que jointtaxingamaha jaha ra cai. ²⁵ Are icha saho jaha ra vacji ra inchin tti coleco que diguičhoe, pero jai ocjan ra ngain Jesucristo co jehe dicao cuidado de ixin jaha ra inchin ná tti ttingaria coleco co jehe dicao cuidado de ixin almá ra.

3

Vida que rrochonda chojni que otottehe

¹ Jamé cai jaha ra xo nčí ra are osinttecoho ra xixiha ra ditticaon ra tti tsetonha ra xa, para que si ttoha de xixiha ra xa ditticaonha xa joajné Jesucristo, jehe xa nchao sitticaon xa jeha conixin sicon xa tti jian que jaha ra sinchehe ra, co irrogondaha que jaha ra rrondache ra xa. ² Ixin jehe xa osicon xa que čhihi xa chonda ncha respeto co nchehe ncha joxon jian. ³ Jaha ra xo ončičihi ná xí xaxaonha ra de ixin que xén sinchehe ra para icha čhjoin sintte ngama cuerpoa ra, inchin tti sinchejinji já ra anto najni, o are tsín ra ngama cuerpoa ra cosa de joxon oro, o are sinttengaha ra vestido que anto čhjoin te. ⁴ Jaha ra dintte ra čhjoin pero

de ngain ansean ra, co tti çhjoin de ngain ansean ra, mé çonhi tiempo tsjexin, co mé rroço que ansean ra anto nda co çhjoin tonoho, co jehe jihi anto rentte ngattoxon con Dios. ⁵ Ixin cai ngain tiempo vatto osé, cain nçhí que vechonda confianza ngain Dios vanchehe nçha jamé, co cai vaguitticaon nçha tti vaquetonhe xixihi nçha. ⁶ Jamé joinchehe Sara cai; jehe vitticaon cain tti ndaço Abraham xixihi jehe Sara. Co Sara joincheguini jehe Abraham, “soixin.” Jaha ra cai nchao sintte ra ngain vidá ra inchin jehe vehe ngain vidé si sinchehe ra jian co çonhi cosa rroxagonhe ra.

⁷ Cai jaha ra, ço oxixihi ná nçhí, chonda ra que rroxaxaon ra jian de ixin nçhíçhiha ra. Co ttijho ra respeto ngain nçha inchin jehe nçha jiquininxin nçha, jeoha ixin nçhí icha sojiha nçha, sino cai ixin Dios chjé nçha iná vida naroaxin que çonhi tiempo tsjexin inchin chjá jaha ra. Nchehe ra cain jihi para que çonhi quehe rrocayacoen oracioan ra ngain Dios.

Chojni que anto tangui tonhe por ixin nchehe tti jian

⁸ Jañá dintte jaha ra cain ra, ditticaon chó ra co ttiaconoehe chó ra naná ra, co rinao chó ra inchin rrocji ichó ra. çhjoin nichjehe ra cain chojni co çaxaonha ra ixin jaha ra anto jian ra. ⁹ Ncheha ra jianha ngain chojni que sinchehe jianha nganji ra, co nichjaha ra feo de ixin tti chojni que rronichja feo de ixin jaha ra, icha jian nchetsenhe ra ñao Dios para que Dios sinchenchaon ngain chojni mé, ixin Dios coinchiaha jaha ra para sinttanchaon ra. ¹⁰ Ixin ndaço ngain tti jitaxin Palabré Dios: Tti anto rinao vidé co rinao sehe çhjoin cain nchanho de ngain vidé, chonda que sicao cuidado que rronichjaha cosa jianha, ni rronichjaha mentira.

¹¹ Chojni mé chonda que saçhjenda de isincheha cain cosa jianha, co sinchehe jehó cosa jian; jehe tsjé queçén sinchehe para çhjoin sehe ngain cain chojni, co cain tiempo jamé sinchehe.

¹² Ixin Dios jinda tti chojni que nchehe jian co jehe ttinhi cain tti ndaço na ngain jehe, pero cain tti chojni que nchehe jianha jehe toñao ngain na.

¹³ çonhi chojni sinchehe jianha nganji ra si jaha ra cainxin tiempo sinchehe ra jian, ¹⁴ co masqui tangui tsonha ra ixin nchehe ra jian, pero jaha ra çhjoin tsonohe ansean ra. çagoenha ra ni ná chojni ni çonhi tiempo chonda ra joaxaon, ¹⁵ sino que jaha ra nchesayehe ra Cristo ngain ansean ra ixin jehe tti chonda joachaxin para ixin ján na. Jaha ra cainxin tiempo dintte ra listo para sinchenohe ra quexeho chojni que sanchianguilha ra de ixin quedonda jaha ra anto chonda ra seguro que ixin jaha ra chonda ra iná vida naroaxin. Ndache ra na, pero jion conixin respeto. ¹⁶ Jañá nchehe ra joxon cosa jian para que cain tiempo tsonohe çhjoin ansean ra. Jamé cain chojni que nichja jianha de ixin tti jaha ra nchehe ra ixin ditticaon ra Cristo, jehó na tsosoé na de ixin tti jehe na nichja na. ¹⁷ Icha jian tsonoha ra tangui ixin sinchehe ra jian, si Dios jamé rinao, co naha ixin sinchehe ra jianha.

¹⁸ Ixin Cristo mismo tangui conhe ndavenhe para cjoenga hna nacoa nttiha de ixin tti jianha que ján na nttoho na. Cristo jehe jian, pero jehe tangui conhe para ixin ján na ço jianha na, para satsjinho na ngain Dios. Cuerpoe jehe ndavenhe cuerpo pero espirítue venha espíritu. ¹⁹ Co de

ngain espiritue cjoí ngain infierno para joinichja ngain espiritue cain nindadiguenhe que te nttiha. ²⁰ Cain espíritu jihi espiritue tti chojni que vaguitticaonha Dios ngain tiempoe Noé. Ngoixin tiempo que Noé joinchehjian arca, Dios chonhe para que icha chojni rroguitticaon na, pero jehó jni chojni tti xonhi conhe de ngain jinda ixin joixinhi na arca. ²¹ Co jinda mé rrocho tti jinda que ján na diguittexin na jai; de ixin jinda mé ján na ditjañá na cain tti jianha que jointtoho na. Are diguittexin na, jinda jeha tsinda cuerpoa na, sino que are mé ján na danchiehe na Dios que irrocjanha na sinttoho na jianha co jehe rrochjá na ná conciencia jian. Co Dios tsančhjangaha almá na tsji ngain infierno ixin Jesucristo xechonxin, ²² co jehe Jesucristo sacoján para ngajni co nttiha jí ngain lado jian de Dios co jehe tti chonda joachaxin para jittetonhe cain ángel co icha cosa que chonda joachaxin nttiha.

4

Sonttoho na inchin tti joachaxin que chjá na Dios

¹ Mexinxin, inchin anto tangui conhe Jesucristo ngain cuerpoe, cai jaha ra chonda ra que dittoaxin ra para setan ra tangui. Ixin tti chojni que vetan tangui ngain cuerpoe ixin ditticaon Jesucristo, chojni mé incheha cosa jianha, ² para que cain nchanho que sinttechon chojni mé jehe na sinchehe na inchin rinao Dios, co isincheha na tti jianha que jehe na xaxaon na. ³ Oatto tsje joinchehe ra ngain tiempo vatto, jaha ra vanchehe ra tti ncheoxinhi cain chojni que ditticaonha Dios. Ngain tiempo mé jaha ra vinttechonda ra tsje vicio, vanchehe ra tti jianha que vařaxaon ra, co anto vacoan ra, co vaquín ra vandango para vacoanxin ra conixin icha chojni, co anto vaguilhi ra cosa que coanxin chojni, co vanchesayehe ra ídolo que Dios ndačo jianha sinchesayehe ni cosa mé. ⁴ Co jai cain chojni mé ttinxinha na quedonda jaha ra icoancoha ra co ichjioha ra na ngain vida nchaoha mé, mexinxin nichja na jianha de ixin jaha ra. ⁵ Pero chojni mé chonda na que sanjo na cuenté na ngain Dios tti sinchejuzguehe cain chojni que xa techon conixin cain chojni que ondavenhe. ⁶ Ixin tti chojni que ondavenhe are xa vinttechon na, cjoí chojni joindačo joajné Dios ngain jehe na para que espiritue na nchao rroguitttechon jai inchin jichon Dios, masqui jehe na ndavintteguenhe na de ngataha nontte inchin cain chojni chonda que ndasenhe.

⁷ Ochian joí tiempo que ndatsjexin cainxin cosa. Mexinxin jaha ra xaxaon ra jian co cainxin tiempo nichja ra ngain Dios. ⁸ Co tti icha rinaho janha, que jaha ra anto sinao chó ra cada ra ixin tti chojni que rinao icha chojni jehe nchao sinchetjañehe chojni que nchehe cosa jianha. ⁹ Dayehe ra jian tti chojni que siji nchiandoi ra co ndačhoha ra ixin mé ná molestia para ixin jaha ra. ¹⁰ Cada ra Dios chjá ra naná clase de joachaxin para tsjenguijna chó ra. Co inchin ná tti nchehe jian ngain ná xa, jamé nchehe ra cai; nchegonda ra cain tti jian que ttixin de ngain Dios para ttjenguijna ra icha chojni. ¹¹ Tti chojni que chonda joachaxin para nichja quehe rrocho Palabré Dios ngain icha chojni, chonda que rronichja inchin jiquininxin. Co tti chojni que chonda joachaxin para tsjenguijna icha chojni, que sinchehe jian de ngain ansén inchin joachaxin que Dios joanjo ngain jehe. Cain cosa jian que sinchehe ra, nchehe ra para tsosayexin Dios de ixin tti joinchehe Jesucristo. Co Jesucristo jiquininxin

que cain chojni sinchesayehe jehe co jiquininxin cain joachaxin para cainxin tiempo. Amén.

Tti tangui que tonhe chojni Jesucristo

¹² Hermanos, dinttechinha ra are anto tangui tsonha ra ixin jamé tonhe cain chojni que ditticaon Jesucristo, para que Dios datsoan ngain ansén ni si seguro ditticaon ni Jesucristo ani nahi. ¹³ Jaha ra icha jian chaha ra are tsonha ra tti anto tangui ixin chonda ra oportunidad de tsonha ra inchin conhe Jesucristo, para que cai anto rrochaha ra are sicon ra tsí Jesucristo iná inchin ngacjan tsje chíxoe nchanho. ¹⁴ Si chojni nichja na feo nganji ra ixin ditticaon ra Jesucristo, jaha ra anto çhjoin vidá ra ixin Espíritu Santo, que anto jian, jí nganji ra. Jehe na tenichja na jianha de ixin jehe Espíritu Santo jihi, pero jaha ra tenchesayehe ra. ¹⁵ Si çhoan de jaha ra tangui tetonha ra, pero que jeha ixin jaha ra nagoenxon ra iná chojni, o ni jeha ixin coehe ra cosé iná chojni, o ni jeha ixin joinchehe ra cosa jianha, o ni jeha ixin jaha ra joixintte ra problema de iná chojni, ixin cain mé anto joasoaxin para ixin jaha ra. ¹⁶ Pero si çhoan ra tangui tonha ra ixin dinhi ra cristiano, rroçho ixin jaha ra ditticaon ra Jesucristo, jaha ra chondaha ra que tsooaha ra, sino que danjo ra gracias ngain Dios de ixin jehe tti tangui que tsonha ra.

¹⁷ Ojoí tiempo que Dios tsexinhi sinchejuzgá ngain chojni jehe. Co si nganji ján na jittexinxin Dios jinchejuzgá, ¿mé queçén tsonhe are sinchejuzgá Dios ngain tti chojni que ditticaonha joajné Dios? ¹⁸ Si para chojni jian tangui sacha na iná vida naroaxin, ¿mé queçén tsonhe chojni jianha? ¹⁹ Mexinxin tti chojni que tonhe tangui ixin jamé rinao Dios, chojni mé chonda na que sinchehe na sigue de sinchehe na tti jian, co rrochonda na cainxin confianza ngain Dios que joinchechjian na ixin jehe Dios cainxin tiempo nchehe inchin ndaçho.

5

Consejo para cain chojni que ditticaon Jesucristo

¹ Jai janha rrochjaha consejo nittetonha nganji ra ngain ningoa ra. Ixin cai janha chonda joachaxin inchin jehe na, co janha vicon cain tti anto tangui que conhe Jesucristo, co janha cai tsoyana inchin jehe na are Jesucristo tsí iná. ² Nttatsanha ñao ra que inchin cuidado que dicao tti ttingaria coleco, jamé ttjiho ra cuidado de ixin chojni Dios, tti chojni que jaha ra chonda ra responsable de sinchecoenhe ra na de ixin Dios. Nchecoenhe ra na conixin ansean ra jian, inchin rinao Dios co jeha ixin afuerza chonda ra que sinchecoenhe ra na, ni jeha ixin rinao ra sacha ra tomi. Nchehe ra ça jihi pero conixin ansean ra jian, ³ jeha inchin xinajni sintte ra para ngain chojni que sinchecoenhe ra, sino nchehe ra jian cain nchanho para jamé sicon jehe na ná ejemplo. ⁴ Jamé sinchehe ra para que are tsí Jesucristo, jaha ra sayehe ra ná premio anto jian, que çonhi tiempo ndatsjexin.

⁵ Jamé jaha ra cai, ço ça tsjeha nano chonda ra, ditticaon ra tti ttetonha daçhichjan que chonda tsje nano. Cainxin ra chonda ra que sitticaon chó ra naná ra conixin jian ansean ra. Ixin ndaçho ngain tti jitaxin Palabré Dios: Dios toñao ngain chojni orgulloso, pero jehe ttjenguijna tti chojni que çaxaonha ixin jehe chojni anto jian.

⁶ Mexinxin dintteha ra orgulloso ngattoxon con Dios para que jehe sinttasayaha ra are jehe sinchejuzguehe ngoi mundo jiji. ⁷ Ndache ra Dios cainxin joachjaon que jaha ra chonda ra ixin jehe cain tiempo jinda ra.

⁸ Xaxaon ra jian cainxin tiempo co dintte ra listo ixin inchínji tti ningaconha ra rridehe xá ná coleón que anto jitoñao co rrittjé va chojni para nasoenson va. ⁹ Jaha ra sinttaxaonha ra inchínji, sino que dintte ra jian ngain tti jaha ra ditticaon ra ixin noa na que cainxin chojni que ditticaon Jesucristo ngoixin mundo tedetan na tangui inchin jaha ra. ¹⁰ Pero después que jaha ra setan ra tangui nchion tiempo, Dios sinttachjian jaha ra chojni jian que rrochondaha ni ná cosa jianha, co jehe sinttachjian jaha ra chojni soji co seguro de ngain tti ditticaon ra. Co xajeho Dios mé tti anto nttanchaon na jai, vayá na para que ján na sontte na tti jí glorié jehe para cainxin tiempo; ján na conixin Jesucristo. ¹¹ Co jehe Dios tti jiquininxin para cainxin chojni sinchesayehe na jehe co jehe tti rrochonda cainxin joachaxin para cainxin tiempo. Amén.

Ntiti joexinxin joajné Pedro

¹² Silvano, tti janha datsoan que jehe cainxin tiempo ditticaon Jesucristo, jehe tti cjin palabrana ngain carta jiji. Co ngain carta jiji janha rrichjaha ra consejo co rrindattjo ra seguro que cain tti jian que jaha ra vayehe ra, mé tjagoa na ndoa que Dios rinao na ján na. Nchehe ra sigue ditticaon ra jiji cainxin tiempo.

¹³ Cain chojni que ditticaon Jesucristo, nite ngain ciudad de Babilonia, tti ni Dios coinchiehe inchin coinchiaha jaha ra, cain chojni mé rroanha na joajna nganji ra. Co cai Marcos, tti rinaho inchin xanhna, jehe rroanha joajna nganji ra cai. ¹⁴ Chjehe chó ra joajna jian inchin nchehe ra ngain xanchó ra.

Cainxin jaha ra xo ditticaon ra Jesucristo, Dios rrochjá ra tti chjoin que tsonohe ansean ra. Amén.

Yoxin Carta Que Dicjin Pedro

Pedro rroanha joajna para ngain chojni que ditticaon Jesucristo

¹ Janha Pedro na, janha ná ninchehe xé Jesucristo. Co cai janha ná representanté jehe. Janha rricjin na carta jihi para ixin nganji jaha ra xo chonda ra ná fe anto çhjoin inchin janha na. Jamé ixin Dios co Jesucristo, tti chonda cain joachaxin, nchehe inchin jiquininxin. ² Dayehe ra tsje tti jian que ttixin de ngain Dios co tti çhjoin que tsonohe ansean ra, ixin jaha ra chonxin ra tti rinao Dios co Jesucristo, tti chonda joachaxin para ixin ján na.

Quexén sinchehe chojni que ditticaon Jesucristo

³ Dios chjá na de ixin joachaxín jehe cain tti rrogondá na ngain vidá na, co cai para sontosayehe na jehe ixin dotticaon na Jesucristo, tti vayá na ján na de ixin joachaxín jehe co de ixin tti tsje cosa jian que jehe joinchehe. ⁴ De ixin cayoixin cosa jihi jehe chjá na tsje cosa jian co rentte para que de ixin jehe cosa jian jihi, jaha ra nchao sintte ra inchin Dios cointtoexin sehe chojni desde are joinchechjian saho xí nttihi ngataha nontte co satsinguehe ra cain cosa jianha que xaxaon chojni jai. ⁵ Mexinxin jeoha sitticaon ra Jesucristo, cai chonda ra que sinchehe ra jian; co de jian, cai chonda ra que jian tsinxin ra tti coetonha Jesucristo; ⁶ co are otsinxin ra jian tti coetonha Jesucristo, chonda ra que tsetonhe ra cuerpoa ra, co de yá cai chonda ra que rrochonda ra paciencia; co de paciencia, cai chonda ra que sinchesayehe ra Dios, ⁷ co de ya, cai chonda ra que rrottjoehe co sinao chó ra jaha ra xo ditticaon ra Jesucristo.

⁸ Si jaha ra nchehe ra cain cosa jihi icha co icha, vidá ra anto jian sehe, co jeha jamaoncoa vitticaon ra Jesucristo, tti chonda joachaxin para ixin ján na. ⁹ Pero tti chojni que ncheha cain cosa jihi, chojni mé te inchin tti chojni que diconha, o inchin tti chojni que diconha jian. Chojni mé ndatjañehe ixin oxenga hna cain cosa jianha que jehe joinchehe are saho. ¹⁰ Mexinxin hermanos, onchao que Dios ovayaha ra co ocoinchiaha ra, ttjiho ra cuidado para que sincheha ra cosa jianha, co si jaha ra tsjiho ra cuidado jihi xonhi tiempo rrotjañaha ra tti ditticaon ra. ¹¹ Co solo jamé nchao sayehe ra jie joachaxin para sixinhi ra co sintte ra para cainxin tiempo ngain lugar tti tetonha Jesucristo, tti chonda cain joachaxin para ixin ján na, co tti cjoengujna na para xonhi castigo rrochonda na de ixin cain cosa jianha que jointtoho na.

¹² Mexinxin janha sinttaha sigue de sinttaxaxaon ra cain cosa jihi, masqui jaha ra onoha ra co te ra jian de ngain tti ndoa que jaha ra chonxin ra. ¹³ Janha tonona que jian ixin jaxon que xa rrichon janha rronichjaha ra para rrondattjo ra cain consejo jihi. ¹⁴ Jesucristo, tti chonda joachaxin para ixin ján na, ojoinchenona que atto toin janha chonda que tsinttoa vida jihi. ¹⁵ Pero janha sinttaha lucha de sintta-coanha ra cain cosa jihi para que después de janha ndasenhe na jaha ra xa rroxaxaon ra cain cosa jihi.

Canxion chojni que vicon ixin Jesús anto tsje joachaxin chonda

¹⁶ Tti janha na jointtacoanha ra de ixin quexén joí Jesucristo co de ixin tti joachaxin que jehe chonda, mé jeha ná cuento que jeha chojni joinchehjian, ixin mé janha na conixin jmacon na viconxin na tti anto tsje joachaxin que jehe chonda. ¹⁷ Janha na vicon na are Dios Ndodá na joinchesayehe Ndo jehe co chjé Ndo chíxo de jehe Ndo. Co de ngajni ndačhoxin ndo: “Jihi tti Xanhna que janha anto rinaho co de ixin jehe Xan janha anto chahna.” ¹⁸ Janha na mismo coian na palabra yá que joixin de ngajni are janha na tatequinha na Jesucristo ngagaha tti jna santo.

¹⁹ Cai chonda na iná cosa icha seguro, co mé tti joajné Dios que dicjin cain profeta. Jaha ra jian nchehe ra ixin nchehe ra caso joajna mé ixin joajna mé inchin ná lámpara que nchengasán are naxin xehe hasta que nchanho rročhinhi, co Jesucristo tti inchin conotse jie que čhinhi are ndoyo para nchengasán ngain ansean ra. ²⁰ Pero saho xaxaon ra cain cosa jiji que janha rrondačhjan: que ni ná profeta que dicjin ngain tti jitaxin Palabré Dios rrocjinha si Dios rrocjenguijnaha. ²¹ Ixin xonhi tiempo ná profeta dicjin inchin jeha xaxaon; sino que Espiritu Santo tti vanchenohe na quehe vacjin na ixin Dios coinciehe chojni mé para nchija na de ixin jehe.

2

Tti chojni que nchecoenhe icha chojni cosa que jeha ndoa (Judas 4-13)

¹ Pero cai ngayé chojni Israel vintte profeta que vanichja cosa que jeha ndoa. Co jamé cai ngayaha ra te chojni que ndačo ixin nttacoanha ra cosa de Dios, pero jeha ndoa tti jehe na ndačo na. Ixin de ngacjan palabra mé jehe na jimao nttacoanha ra na cosa jianha ixin jehe na mé isitticaonha na Jesucristo tti cjoenga hna para cain cosa jianha que nchehe na. Co mexinxin anto daca ndasinchetján almé na. ² Co tsje chojni sitticaon na tti ndoaha que ndačo chojni mé, co de ixin causexin jehe na icha chojni rronichja feo de ixin tti jian joajné Jesucristo. ³ Co chojni mé anto rinao na tomi, mexinxin sinttacoanha ra na cosa ndoaha para sachaxin na tomi nganji ra. Pero Dios osé ndačo ixin jehe na sayé na ná castigo soji, co otsí nchanho que jehe na seguro sayé na castigo mé.

⁴ Dios joinchetjañeha tti cain ángel que joinchehe jianha ngain Dios, sino que Dios rroanha cain ángel mé para ngain infierno co nttiha tethoaxin cain ángel mé conixin cadena ngain tti naxin xehe. Co Dios coenchjinha cain ángel mé nttiha hasta are tsí tti nchanho que Dios sinchejuzgá cain. ⁵ Ni cai joinchetjañeha Dios tti chojni que vinttechon are osé, rročo tiempo are vechon Noé. Dios rroanha jinda ngoixin nontte para joinchetján cain chojni jianha co Dios joinchexehe jeha Noé conixin yáto chojni Noé. Noé venha are mé ixin jehe joinchehe jian co vandache tsje chojni ixin rrojinchehe na jian cai, pero jehe na vitticaonha na. ⁶ Co cai Dios cjoaga ciudad de Sodoma co Gomorra. Che cayoi ciudad mé hasta que cjan ciudad joxon nttéso. Jamé conhe para que cain chojni hasta tiempo jiji rrochonxin na quehe tonhe tti chojni que nchehe jianha. ⁷ Pero Dios joinchexehe Lot de ngain ciudad Sodoma ixin jehe cjoí xí jian para ixin Dios, co feo vaconohe are vaguicon cain cosa jianha que vanchehe tti icha chojni de ngain ciudad mé. ⁸ Cainxin nchanho que jehe xí jian mé vehe ngayé na, anto feo vaconohe ansén xa

are vaguicon xa co are vaquinhi xa cain cosa jianha que vanchehe cain chojni mé. ⁹ Jañá noa na que Dios nchao sinchexehe de ngain castigo cain chojni que ditticaon palabré jehe. Pero cain chojni jianha jehe sinchegayé na castigo ngain tti nchanho que jehe sinchejuzgá.

¹⁰ Dios icha sinchecastigá tti chojni que cainxin tiempo puro xaxaon sinchehe cosa jianha co ncheha na caso tti coetonha Jesucristo, tti chonda cain joachaxin. Jehe na terco na co chintto na, co xaonha na para nichja na feo ngain tti chonda icha joachaxin para ixin jehe na. ¹¹ Ni cain ángel de Dios, masqui jehe chonda anto tsje fuerza co joachaxin, pero jehe xaon para tsjanguihi chojni jianha conixin palabra feo ngain Dios, masqui chojni mé xonhi joachaxin chonda inchin ángel.

¹² Pero chojni jianha mé inchin coxígo que xonhi joarrixaon chonda va co nchehe va jehó inchin rinao cuerpoe va. Co doan va para que iná chojni tse va co nadoenxon va. Jamé tonhe cain chojni mé. Jehe na nichja na jianha de ixin cosa que jehe na ttinxinha na. Mexinxin jehe na sintteguenhe na inchin denhe cain coxígo mé. ¹³ Jehe na jamé soan na sufrido ixin jehe na jamé joinchesufrí na icha chojni. Jehe na tonohe na anto chjoin are nchehe na cosa jianha que jehe na rinao na. Co cain mé ná joasoaxin co ná cosa feo para ixin jaha ra are jinttecoho ra na ixin nchehe na cosa feo para ncheyexin na icha chojni.

¹⁴ Cain nchí que jehe na dicon na puro xaxaon na de rrotsontaonxin na ncha. Tonchjenha na de nchehe na cosa jianha. Co ncheyehe na chojni que xa antoha jian ditticaon Jesucristo, co anto chonxin na que xén sincheyehe na icha chojni para sachaxin na tomi. Chojni mé chonda que sayé na castigoe Dios. ¹⁵ Jehe na noeha na ttinó rridintte na ixin va chjenda na de ngain nttiha nao. Jehe na rroé na ejemploe tti profeta que vinhi Balaam, xitsihi ná tti vinhi Beor. Jehe profeta mé joinao rrogachaxin tomi conixin cosa jianha. ¹⁶ Co jehó colochóhe nichja va inchin chojni para joinchesattehe va jehe ixin vanchehe cosa jianha. Co jehe tti nichja colochó mé icoanchjandaha profeta mé para joinchehe cosa jianha que jehe xaxaon rrojinchehe ngain nchanho mé.

¹⁷ Cain chojni mé inchin tti pozo que xonhi jinda teria, co inchin ttjoi que rroganjo chin pero chintto sadícao ttjoi. Dios onda cho ixin cain chojni mé para cainxin tiempo sintte na ngain infierno tti anto naxin xehe. ¹⁸ Jamé ixin nichja na palabra orgulloso que xonhi xé, co de ixin tti jianha que nchehe na, co de ixin tti jianha que xaxaon na, jehe na ncheyehe na icha chojni que nandá va chjeyexin de ngayé cain chojni jianha mé. ¹⁹ Chojni jianha mé ndache na icha chojni que si xonhi sitticaon na, ni ley de Dios, ni iná regla jamé jehe na sintte na ngain ná vida libre. Pero jehó na mismo te na inchin esclavo de ngain vida jianha. Ixin cada chojni te inchin esclavo de ngain quexeho cosa jianha que ttetonha ngain vidé. ²⁰ Co cain chojni que oditticaon Jesucristo, tti chonda cain joachaxin tti cjoenguijna na para rrochondaha na castigo de ixin tti jianha que nchehe na, chojni mé ova chjeyexin de cain cosa jianha que jí ngain mundo jiji. Co si después, jehe na xa rrocjan na sinchehe na cosa jianha mé iná, jehe na rrocjan sintte na chojni icha jianha que are saho. ²¹ Ixin si después de vatsoan na joajné Jesucristo, jehe na cjan na joincheha na caso tti ttetonha Jesucristo ngain na, icha jian para ixin jehe na si rrogatsoanha na joajna mé. ²² Pero jañá nchehe na para que de jehe na doan cumple tti dicho ndoa que nda cho: “Conia cjan va jine

va tti toncyan va. Co cocochi que ttjexin tsinda va, cjan va ttingariacjan va ndanchetjaho.”

3

Are tsí Jesucristo iná

¹ Hermanos, jihi tti yoxin carta que janha cjin na nganji ra. Co ngain cayoi carta jihi janha rinaho que jaha ra rroŋaxaon ra jian de ixin consejo que janha rrindattjo ra. ² ŋaxaon ra tti ndačo cain profeté Dios are saho, co tti coetonha Jesucristo ngain representanté jehe, para que representante mé jointtacoanha ra jaha ra tti coetonha Jesucristo, tti chonda cain joachaxin co tti danjo iná vida naroaxin ngain chojni.

³ Janha rinaho que anto jian tsonoha ra cosa jihi: que are ochian tsí nchanho que Jesucristo tsí iná, sintte chojni que tsjanoa cosa de Dios, co sinchehe na cainxin cosa jianha que jehe na rroŋaxaon na. ⁴ Co are mé jehe na sanchiangui na co rrondačo na: “¿Cja tti ndačo Cristo ixin jehe rroquí iná? Pues de tiempo que ndavenhe cain nigoelitoa na ŋanchjen co hasta jai cain nchanho ŋajeho inchin desde are nacoexinxon vehe mundo.” ⁵ Chojni mé jamé rrondačo ixin rinaoha na tsonohe na que ngain tiempo icha sé Dios joinchechjian ngajni co nontte, co de ngangui jinda čhinxin nontte, co de ixin jinda cain cosa jichon. ⁶ Cai de ixin jinda joinchetjanxin Dios mundo are saho. ⁷ Pero ngajni co nontte que jí jai, Dios jittenchjinha para que rroche conixin ŋohi, ixin Dios jamé ttetonha. Co jehe ŋohi mé tti tsjaga ngajni co nontte ngain tti nchanho are Dios sinchejuzguehe cainxin chojni, co are mé Dios sinchetján cainxin chojni jianha.

⁸ Co tjañaha ra, hermanos, que para ixin Jesucristo, tti chonda cain joachaxin, para ixin jehe, ná nchanho inchin mil nano, co tti mil nano inchin nacoa nchanho para ixin jehe. ⁹ Jaha ixin jehe jitončhjenhe para sinchexin tti jehe ndačo, inchin ŋaxaon canxion chojni, jaha jamé, sino que jehe chonda paciencia para ixin ján na. Co jehe rinaoha sitján almé ni ná chojni, sino que jehe rinao que cain na sačhenda na de ngain cosa jianha.

¹⁰ Pero nchanho are Jesucristo tsí iná, nchanho mé ni ná chojni rroŋaxaonha ixin quesa tsí nchanho mé, inchin are ttí ná tti chehe are ttie. Cottimeja ngajni rroxantte de ixin ná ruido anto soji que tsinhi ni, que cainxin chojni rroŋaon na. Co cain cosa que docon na ngajni rroche conixin ŋohi, co nontte rroche nontte conixin cainxin cosa que jí ngataha nontte.

¹¹ Jañá sitjanxin cainxin cosa, mexinxin jaha ra chonda ra que sintte ra chojni jian que Dios rinao, co sinchesayehe ra jehe. ¹² Chonhe ra tti nchanho que tsí Dios co tsjehe ra queŋén nchehe ra para que nchanho mé icha đaca tsí nchanho. Ngain nchanho mé ngajni rroche conixin ŋohi co cain cosa que docon na nttiha satanga conixin neje ŋohi. ¹³ Pero ján na rrochonhe na tti ngajni naroaxin co tti nontte naroaxin tti ndačo Dios que rrochjá na, co ngain nontte mé sehe cainxin inchin jiquininxin, co jian.

¹⁴ Mexinxin, hermanos, jai que ŋa techonhe ra cain cosa jihi, ttjiho ra cuidado que ŋonhi cosa jianha nchehe ra para que are tsí Dios, ŋonhi cosa jianha techonda ra ngain vidá ra co para que ansean ra čhjoin tsonohe cai. ¹⁵ ŋaxaon ra jian que ixin tti paciencia que jichonda

Jesucristo jai para ixin ján na, mé para que ján na tsentoxinhi na vidá na para que jehe nchao tsjenguijna na para que xonhi castigo rrochonda na de ixin tti jianha que jointtoho na. Jañá dicjin Pablo nganji jaha ra cai. Jehe cjin palabra que joanjo Dios ngain jehe. ¹⁶ Cainxin carta que jehe dicjin, jehe dindattjo ra de ixin cain cosa jihi, masqui te parte nchion tangui para tsinxin ra. Co tti chojni que rinaoha tsinxin cosa jihi, co tti chojni que xa antoha jian ditticaon Cristo, jehe na daca ttentoxinhi na sentido de ixin quehe rrocho jihi co nchehe na inchin jehe na xaxaon na, jañá inchin jehe na ttentoxinhi na canxion parte de ngain tti jitaxin Palabré Dios. Jamé jehó na ttjé na tti sitjanxin almé na.

¹⁷ Mexinxin, hermanos, jaha ra que onoha ra cain cosa jihi, ttjiho ra cuidado que xonhi chojni jianha sinttayaha ra. Si nahi, puede sinchehe ra inchin jehe na nchehe na co ndarrotjañaha ra tti ditticaon ra Cristo. ¹⁸ Pero jaha ra ditticaon ra icha jian ngain Jesucristo, tti chonda cain joachaxin para ixin ján na co jehe tti danjo iná vida naroaxin nganji na ján na, co xago ra ngain Jesús co jehe tsjagoha ra quexén jehe anto rinao ra jaha ra. ¡Co jehe tti jiquininxin que cain chojni sinchesayehe na jehe jai co para cainxin tiempo! Amén.

Saho Carta que Dicjin Juan

Jesucristo dinhi: Palabra que chjé chojni vida

¹ Janha rricjinha jaha ra de ixin jehe tti ovehe are cainxin coexinhi. Janha na coian na tti ndačo jehe co vicon na jehe conixin jmacon na, co janha na tsjá na co catte na conixin rana na. Co jehe mé tti dinhi Palabra que chjé chojni vida. ² Palabra jihi cononxin para joatsoan ni co mé tti chjé ni vida. Co janha na vicon na co ndačjan na que ján ndoa que jehe Palabra mé cononxin. Co janha na nttanoha ra jaha ra de ixin jehe tti danjo iná vida naroaxin que xonhi tiempo tsjexin. Co jehe vehe ngain Ndodá na ngajni co después cononxinna na. ³ Janha na ndattjo ra jaha ra tti janha na vicon na co tti janha na coian na para que jaha ra rroché ansean ra inchin janha na ché ansenna na ixin ján na ndoa te na ngain Dios tti Ndodá na co ngain Xenhe Ndo que mé Jesucristo. ⁴ Jañá remé, rricjinha ra cain cosa jihi para que ansean ra anto rroché.

Dios jehe joadingasán

⁵ Tti joajna ndoa que Jesucristo cjoagohna na, mé tti janha na rrindat-tjo ra jaha ra jaxon. Co joajna mé ndačo ixin Dios jehe tti joadingasán, co ngain jehe xonhi naxin xehe jí. ⁶ Si ndačo na ixin te na ngain jehe co xajeho tiempo ján na te na ngain tti naxin xehe, ján na ndoaha tti ndačo na co cai xonhi xé tti nttoho na. ⁷ Pero si ján na te na ngain joadingasán, jañá inchin Dios jí ngain joadingasán, jañá sotticaon chó na cain na co jni Jesucristo Xenhe Dios, jni mé jni nttaroa ján na de cainxin tti jianha que jointtoho na.

⁸ Si ndačo na ixin xonhi jianha jointtoho na, ján na nttoyaxon na co jeha ndoa que ján na dotticaon na tti jian joajné Jesucristo. ⁹ Pero si ttendoenhe na ñao na tti jianha que nttoho na, nchao rrochonda na confianza ngain Dios que jehe sinchehe inchin jiquinixin; rročo que jehe sinttatjañá na tti jianha que ján na jointtoho na co sinttaroa na de cainxin cosa nchaoha. ¹⁰ Pero si ndačo na ixin xonhi jianha jointtoho na, jañá inchin rrondačo na que Dios jehe ncheyaxon co ndoaha que dotticaon na tti jian joajné jehe.

2

Jesucristo tti abogado na

¹ Jaha ra inchin xannchinnchinchjanhna que anto rinaho ra, co rricjin na cain cosa jihi para ixin jaha ra para que xonhi jianha sinchehe ra. Pero si čhonja ra sinchehe jianha, chonda na ná xiabogado ngattoxon con Ndodá na, co xiabogado mé jehe Jesucristo, co xonhi tiempo jehe joinchehe jianha. ² Co de ixin jehe Jesucristo cain cosa jianha que jointtoho na vitjañá na, co jeoha tti jianha que ján na nttoho na, cai cainxin tti jianha que nchehe cainxin chojni ngoixin mundo vitjañehe na cai.

³ Si dotticaon na tti ttetonha Dios, jamé conoa na que joatsoan na jehe. ⁴ Pero si čhonja chojni ndačo: “Janha chonxin jehe”, co ditticaonha tti ttetonha Dios, chojni mé ncheyaxon co ndoaha tti jehe ndačo. ⁵ Co tti chojni que nchehe inchin ttetonha Dios, chojni mé ndoa anto rinao Dios.

Mexinxin jamé noa na que te na conixin jehe si ján na anto rinao na Dios. ⁶ Co chojni que ndačo ixin jehe jí conixin Dios, chojni mé chonda que sinchehe jian inchin Jesucristo.

Juan ncheᵑaxaon chojni de ixin cosa naroaxin que Jesucristo cjoago

⁷ Hermanos, janha ᵑonhi cosa naroaxin rritetonha ra ngain carta jihi, ixin mé ᵑajeho tti vitonha ra are nacoexinxon ra vitticaon ra. Co mé tti coinhi ra desde are mé. ⁸ Pero masqui jamé, tti janha rricjinha ra jehe inchin ná cosa naroaxin que ditonha, ixin Jesucristo tti saho cjoago cosa jihi co jai jaha ra tjago ra cosa jihi cai ngain vidá ra. Rročo que inchin iᵑonhi naxin xehe jí nganji ra ixin Jesucristo joinchengasán ngain ansean ra.

⁹ Si ᵑhonja chojni ndačo que jehe jí ngain joadingasán, pero si jehe ningaconhe icha chojni que ditticaon Jesucristo, jehe ᵑa jí ngain tti naxin xehe. ¹⁰ Pero tti chojni que rinao icha chojni que ditticaon Jesucristo, jehe jí ngain tti joadingasán co chondaha ni ná cosa para que jehe sinchehe jianha. ¹¹ Pero tti ningaconhe ná de tti chojni mé, jehe jí co rridehe ngain tti naxin xehe, co noeha ttinó rridehe ixin jehe que ningaconhe iná chojni ᵑhoha dicon nttié Dios.

¹² Jaha ra ᵑo nandá vitticaon ra ngain Jesús, janha rricjin nganji jaha ra que por ixin Jesucristo Dios jointtatjañaha jaha ra tti jianha que joinchehe ra. ¹³ Cain jaha ra que osé vitticaon ra Jesús, janha rricjinha nganji ra ixin ojoatsoan ra jehe tti ovehe are cainxin coexinhi vehe. Co jaha ra ᵑo ᵑa seha vitticaon ra, janha rricjin ngajni ra ixin jaha ra nchao coixinha ra ngain inchínji.

Janha cjinha jaha ra ᵑo nandá vitticaon ra ixin ojoatsoan ra Dios Ndodá na. ¹⁴ Co janha cjinha jaha ra que osé vitticaon ra Jesús ixin ojoatsoan ra jehe tti ovehe are cainxin coexinhi vehe. Cai cjin na para ixin jaha ra que ᵑa seha vitticaon ra ixin jian ditticaon ra ngain Jesucristo co vayé ra palabré Dios ngain ansean ra, co ixin coixinha ra ngain inchínji.

¹⁵ Janha rritetonha ra que sinaoha ra joxon cosa de ngain mundo jihi. Si ᵑhonja chojni rinao joxon cosa de ngain mundo jihi, chojni mé rinaoha na Dios Ndodá na, ¹⁶ ixin ᵑonhi cosa que mundo danjo ttixin de ngain Dios Ndodá na. Cosa mé ttixin jeho de ngain mundo. Rročo que tti jianha que rinao cuerpoe chojni, tti ncheᵑoxinhi jmacon ni para rrochonda ni, co tti anto orgullo que tonohé ni ixin chonda ni tsje cosa, cain jihi tti danjo mundo. ¹⁷ Co mundo ndajittjexin conixin cainxin que rinao ni que jí ngain mundo jihi, pero chojni que nchehe inchin rinao Dios, sechon para cainxin tiempo.

Chojni que nichja ndoa co chojni que nichja ndoaha

¹⁸ Jaha ra inchin xannchinnchinchjanhna co rrindattjo ra que ochiaon ndatsjexin tiempo. Jaha ra ocoinhi ra que tsí ná chojni que anto rroningaconhe Cristo. Co jai cononxin atto tsje chojni que ningaconhe na Cristo, mexinxin ján na noa na que ochian tsí nchanho que ndatsjexin tiempo. ¹⁹ Cain chojni mé vaᵑhjejeyexin de ngayá na, pero jehe na jeha ndoa chojnia na na ixin si rroci na chojnia na rroguittohe na nganji na. Pero jañá conhe para que vicon ni que ndoa chojni mé jeha chojnia na.

²⁰ Pero jaha ra Cristo chjá ra Espíritu Santo, mexinxin cain ra chonxin ra tti ndoa. ²¹ Mexinxin janha rricjin nganji ra ixin chonxin ra tti joajna

ndoa que joixin de ngain Dios co nahi ixin chonxinha ra. Co jaha ra noha ra que ni ná cosa ndoaha nchao tsixin de ngain joajna mé.

²² ¿Achonxinha ra quensen jehe tti nichja ndoaha? Jehe mé tti mero ndačo ixin Jesús jeha tti Cristo, tti Dios rroanha ngataha nontte. Chojni mé tti ningaconhe Cristo ixin ditticaonha na ni Jesucristo ni Dios Ndodá na. ²³ Cainxin chojni que ndačo ixin Jesucristo jeha Xenhe Dios Ndodá na, cai jehe Ndo jiha Ndo ngain na. Pero tti chojni que ndačo ixin Jesucristo Xenhe jehe Ndo, cai chojni mé Ndodá na jí Ndo ngain chojni mé.

²⁴ Mexinxin, ttenchjinha jaha ra ngain ansean ra tti jian joajna que coinhi ra de are nacoexinxon ra vitticaon ra. Co si tti coinhi ra are icha saho sittohe ngain ansean ra, jaha ra cai cainxin tiempo sintte ra ngain Ndodá na co ngain Xenhe Ndo. ²⁵ Co Jesucristo ndačo que jehe rrochjá na iná vida naroaxin que xonhi tiempo tsjexin.

²⁶ Janha cjinha ra cain jiji de ixin tti chojni que rinao nttayaha ra. ²⁷ Pero jaha ra chonda ra Espíritu Santo que Jesucristo chjá ra, mexinxin ixonhi chojni rrogondaha ra para sinttacoanha ra, ixin jeha Espíritu Santo tti sinttacoanha ra cain cosa co tti jehe sinttacoanha ra, mé ndoa co jeha ixin ndoaha. Mexinxin jañá nchehe ra para dintte ra cain ra ngain Cristo inchin nttacoanha ra jehe Espíritu Santo.

²⁸ Mexinxin jaha ra xo xannchinnchinchjanhna, dintte ra cain ra ngain Cristo para que rrochonda na confianza are jehe rroxago co rrochondaha na joasoaxin ngattoxon con jehe are jehe tsí. ²⁹ Jai que onoha ra que Jesucristo nchehe jian, chonda ra que tsonoha ra cai que cain chojni que nchehe jian, cain chojni mé xenhe Dios.

3

Quexén sinchehe tti chojni que xenhe Dios

¹ Tsjexinxin ra, Dios Ndodá na anto rinao na hasta que ján na nchao dinhi na xenhe Dios, co ján ndoa ján na xenhe Dios na. Mexinxin tti chojni que ditticaonha Jesucristo ttinxinha tti ján na xaxaon na ixin jehe na xa datsoanha na Dios. ² Ján na oxenhe Dios na, co xa xagoaha na quexén sontte na después. Pero noa na que are Jesucristo tsí, ján na sontte na inchin jehe ixin socon na jehe mero inchin jehe jí. ³ Co cain chojni que ditticaon jiji tojian na inchin Jesucristo jehe jian.

⁴ Pero cain chojni que nchehe jianha ditticaonha na tti coetonha Dios, ixin are nchehe ni jianha rročo ixin jehe ni ncheha ni tti coetonha Dios. ⁵ Jaha ra onoha ra que Jesucristo jói ngataha nontte para que cjoenga hna cain tti jianha que ján na jointtoho na co noha ra cai que jehe xonhi jianha joinchehe. ⁶ Mexinxin jañá cain chojni que te ngain Cristo sincheha sigue sinchehe cosa jianha. Pero cain chojni que tenchehe sigue nchehe cosa jianha, chojni mé xa datsoanha na ni ditticaonha na Jesucristo. ⁷ Jaha ra inchin xannchinnchinchjanhna co janha rrindattjo ra que dittoaxinha ra que xonhi chojni sinttayaha ra. Chojni que nchehe jian, chojni mé Dios ndačo ixin jehe na jian na inchin Jesucristo jian. ⁸ Pero tti chojni que tenchehe jianha, chojni mé chojni inchnji ixin inchnji jianha jinchehe desde are nacoexinxon vehe nontte. Co Jesucristo, tti Xenhe Dios jói Xan para joinchexantte Xan tti joinchehe inchnji.

⁹ Ni ná chojni que jehe na xenhe Dios na nchehe na sigue nchehe cosa jianha ixin chonda na iná vida que Dios joanjo ngain na, mexinxin čhoha sinchehe na sigue sinchehe na cosa jianha ixin jehe na xenhe Dios na. ¹⁰ Nohe ni quexehe chojni xenhe Dios co quexehe chojni tti xenhe inchínji ixin quexeho chojni que ncheha jian, o rinaoha chojni que ditticaon Jesucristo, chojni mé jeha chojni Dios.

xo dotticaon na Jesucristo chonda que sinao chó na

¹¹ Tti joajna ndoa que jaha ra coinhi ra are nacoexinxon ra vitticaon ra rročo jiji: que chonda na que sonao chó na naná na. ¹² Chondaha na que sontte na inchin Caín que mé chojni inchínji co nagoenxon xanchó. ¿Co quedonda nagoenxon xan? Ixin tti vanchehe Caín, mé jianha, co tti vanchehe xanchó mé jian.

¹³ Hermanos, xaoanha ra si rroningaconha ra chojni que ditticaonha Jesucristo. ¹⁴ Ján na donao na cain chojni que ditticaon Jesucristo inchin xanchó na, co jiji tjago ixin ovattohe na tti ndadenhe ni co jai chonda na iná vida naroaxin. Pero tti chojni que rinaoha icha chojni que ditticaon Jesucristo, chojni mé xa ndadiguenhe de ngain espiritue na. ¹⁵ Cainxin chojni que ningaconhe icha chojni, chojni mé Dios ndačo ixin xajeho inchin tti chojni que nadoenxon chojni. Co jaha ra noha ra que ni ná tti nadoenxon chojni chonda iná vida naroaxin que xonhi tiempo tsjexin. ¹⁶ Ján na chonxin na quexén Jesucristo rinao na ján na ixin jehe joanjo vidé para ixin ján na. Co jańá cai ján na chonda na que sonao chó na naná na co si nchao hasta sanjo na vidá na para ixin chojni que ditticaon Jesucristo. ¹⁷ Si ná ni chonda ni tti rrogondehe ni para sinttechonxin ni co sicon ni ná chojni que ditticaon Jesucristo rrogondehe na, co si jehe ni tsiacnoeha ni na ¿quexén nchao jehe ni rinao ni Dios ngain ansén ni? ¹⁸ Jaha ra inchin xannchinnchinchjanhna co janha rritetonha ra que chondaha na que jeha rrondačo na conixin rroha na ixin sonao na chojni, sino que rrochonda na que tsjenguijna na para jamé seguro ndoa donao na chojni.

Quexén chojni nchao rrochonda confianza ngattoxon con Dios

¹⁹ Jańá, para que nchao tsonoa na que ján na tti nichja na tti ndoa, co jamé sontte na seguro ngattoxon con Dios. ²⁰ Co masqui puede ansean na tsjanguia na ná cosa, pero Dios icha jie joachaxin chonda que ansean na co jehe nohe cainxin. ²¹ Co si ansean na xonhi tsjanguia na, ján na rrochonda na confianza ngattoxon con Dios, ²² co jehe rrochjá na cainxin tti sanchiehe na ixin dotticaon na tti jehe ttetonha co nttoho na tti nchexoxinhi Dios. ²³ Co janhi tti jehe ttetonha: que sotticaon na ngain Jesucristo Xenhe jehe Dios co ixin sonao chó na naná na inchin jehe Jesucristo ocoetoan na. ²⁴ Tti chojni que ditticaon tti coetonha Dios, chojni mé te na ngain jehe co jehe jí ngain jehe na. Noa na que jehe jí nganji na ixin chonda na Espíritu Santo que jehe chjá na.

4

Espíritu Santo co tti espíritu que ningaconhe Jesucristo

¹ Hermanos, dacaha ditticaon ra cain tti chojni que ndačo ixin tti jehe na ndačo na mé joajna que joixin de ngain Dios, sino que saho ttijho ra cuidado para sicon ra si chojni mé chonda Espíritu Santo que ttxin de ngain Dios o ni nahi. Ixin ngoixin nontte ndajicaon de chojni

jianha que ndačo ixin jehe na nichja na de ixin Dios pero ndoaha. ² Pero janhi sinchehe cain chojni que chonda Espiritu Santo que ttixin de ngain Dios para que jaha ra nchao rrochonxin ra: cain chojni que datsoan na co ndačo na ixin Jesucristo are jehe joí jehe joigoan ná xí, chojni mé chonda na Espiritu Santo que ttixin de ngain Dios. ³ Pero tti chojni que datsoanha que Jesús cjoí ná xí, chojni mé chondaha na Espiritu Santo que ttixin de ngain Dios, sino que chojni mé chonda tti espíritu que ningaonhe Cristo. Jaha ra ocoinhi ra que espíritu mé chonda que tsí, co jai espíritu mé ojí ngataha nontte.

⁴ Jaha ra inchin xannchinnchinchjanhna, co jaha ra chojni Dios co coixinha ra ngain cain chojni mé ixin Espiritu Santo que jí nganji ra chonda icha joachaxin que tti espíritu que jí ngain chojni que ditticaonha Jesucristo. ⁵ Chojni mé jecho chojni de ngataha nontte, co mexinxin tjago na cosa que joxon chojni xaxaon, co icha chojni que ditticaonha Jesucristo ncheoxinhi na ttinhi na cosa mé. ⁶ Pero ján na chojni Dios, co tti chojni que chonxin Dios ttinhi na tti ndačo ján na. Pero tti jeha chojni Dios, nímé ttinha na tti ndačo ján na. Co jañá, nchao satsoan na quexehe chojni chonda tti Espiritu Santo que nichja tti ndoa co quexehe chojni chonda tti espíritu que ncheyexon chojni.

Dios anto rinao na ján na

⁷ Hermanos, cain ján na chonda na que sonao chó na naná na ixin tti rinao chó ni ttixin de ngain Dios. Cain chojni que rinao icha chojni, chojni mé xenhe Dios co chonxin na Dios. ⁸ Co tti chojni que rinaoha icha chojni, chojni mé xa chonxinha Dios ixin Dios rinao cain chojni. ⁹ Dios cjoagoo na que jehe rinao na are jehe rroanha tti nacoaxinxon Xenhe ngataha nontte para que ján na rrochonda na iná vida naroaxin de ixin jehe Xan. ¹⁰ Ttinxin na que jeha ján na joinao na Dios, sino que jehe tti joinao na ján na, co mé rroanxin Xenhe para que de ixin jehe Xan cainxin tti jianha que jointtoho na oxenga hna.

¹¹ Hermanos, si Dios joinao na jañá, ján na cai chonda na que sonao chó na naná na. ¹² Xonhi tiempo ná chojni vicon na Dios, pero si rinao chó na naná na, Dios jí nganji na co jamé icha sonao chó na inchin Dios rinao na. ¹³ Dios chjá na Espiritu Santo, mexinxin ján na chonxin na que Dios jí nganji na co ján na te na ngain jehe. ¹⁴ Co janha na vicon na, co ndačhjan na que Dios Ndodá na rroanha Ndo Xenhe Ndo para que danjo Xan iná vida naroaxin ngain cainxin chojni ngoixin nontte. ¹⁵ Quexehe chojni que datsoan co ndačo ixin Jesús ján Xenhe Dios, chojni mé jí ngain Dios co Dios jí ngain jehe cai.

¹⁶ Co jañá ján na noa na co dotticaon na que Dios rinao na. Co Dios mé tti rinaonxin chó na co tti chojni que cainxin tiempo rinao icha chojni, chojni mé jí ngain Dios co Dios jí ngain chojni mé. ¹⁷ Jañá ján na rinao na icha chojni inchin Jesucristo rinao na ján na para que ján na rrochonda na confianza are tsí tti nchanho que Dios sinchejuzguehe cain chojni. Ixin ján na te na ngataha nontte jihi co donao na icha chojni inchin joinchehe Jesucristo are jehe nttihi ngataha nontte. ¹⁸ Dios anto rinao na ján na co si ján na rinao na Dios, xonhi joaxaon rrochonda na. Ixin si ndoa rinao na Dios čhoha rrochonda na joaxaon ixin Dios joantsje cain joaxaon que vonttechonda na. Si čhonja chojni chonda joaxaon

rröchö que ixin jehe joinchehe cosa jianha co xagoen castigoe Dios, ixin si xagoen ni Dios, mé ixin xa antoha jian rinao ni Dios.

¹⁹ Ján na rinao na Dios ixin jehe tti joinao na ján na saho. ²⁰ Pero si chonja chojni ndačo: “Janha rinaho Dios”, co xajeho tiempo ningaconhe na iná chojni que ditticaon Jesucristo, chojni mé ncheyaxon. Ixin si ná ni rinaoha ni iná chojni que ditticaon Jesucristo que ovicon ni, mexinxin ¿quexén sinao ni Dios tti xonhi tiempo vicon ni? ²¹ Jehe Ndo coetoan na Ndo jihi: que tti chojni que rinao Dios cai chonda que sinao icha chojni que ditticaon Jesucristo.

5

Quexén ján na nchao tsixian na ngain cosa jianha

¹ Cain chojni que ditticaon que ixin Jesús tti Cristo que Dios rroanha ngataha nontte, chojni mé xenhe Dios. Co si sinao ni ná ndodaha, cai rinao ni xenhe ndodaha mé. ² Mexinxin si rinao na Dios co nttoho na tti jehe ttetonha, noa na que cai rinao na cain xenhe Dios, rroöchö cain chojni que ditticaon ngain Jesucristo. ³ Ixin si rinao ni Dios, chonda que sitticaon ni tti jehe ttetonha, co tti jehe ttetonha tanguilha, ⁴ ixin cainxin chojni que xenhe Dios nchao tsixinhi na ngain cosa jianha ngataha nontte. Co tti confianza que ján na chonda na ngain Jesucristo, mé tti jointtagacha na de cain cosa jianha que jí ngataha nontte. ⁵ Co jehö chojni que ditticaon ixin Jesús Xenhe Dios nchao tsixinhi ngain cain cosa jianha mé.

Tti ndačo Juan de ixin Jesucristo Xenhe Dios

⁶ Jesucristo joiguite ngain jinda co vinttji jni are ndavenhe, jañá para cjoagoe chojni ixin Dios tti rroanha jehe. Jeoha cjoago mé are joiguite, ixin cai cjoago mé are vinttji jni co ndavenhe. Co Espiritu Santo tti ndačo ján que ixin Dios rroanha Jesucristo, co Espiritu mé tti ndoa. ⁷ Ngajni jí ní tti ndačo ján de ixin cain jihi: Ndodá na, co Jesucristo tti dinhi Palabra, co Espiritu Santo, co canio jihi inchin jehö nacoa. ⁸ Co cai jí ní ngataha nontte que ndačo ján de ixin cain jihi: Espiritu Santo, jinda, co jni, co canio jihi ndačo xajeho. ⁹ Ján na dotticaon na tti ndačo chojni, pero tti ndačo Dios icha rentte, mexinxin chonda na que sotticaon na tti ndačo Dios de ixin Xenhe. ¹⁰ Co tti chojni que ditticaon ngain Xenhe Dios, chojni mé ditticaon ngain ansén tti ndačo Dios de ixin Jesús, pero tti ditticaonha jamé, jehe ncheguinihi Dios inchin ná tti nichja ndoaha ixin chojni mé ditticaonha tti ndačo Dios de ixin Xenhe Ndo. ¹¹ Janhi tti ndačo Dios: que de ixin Xenhe, jehe Dios chjá na iná vida naroaxin que xonhi tiempo tsjexin. ¹² Chojni que ditticaon Xenhe Dios cai chonda na jehe vida naroaxin jihi, pero tti chojni que ditticaonha Xenhe Dios, chojni mé chondaha vida naroaxin.

Juan ttjexin carté co danjo icha consejo

¹³ Janha rricjin nganji jaha ra xo ditticaon ra ngain Jesucristo, para que noha ra jian que ixin chonda ra iná vida naroaxin que xonhi tiempo tsjexin.

¹⁴ Ján na chonda na confianza ngain Dios ixin noa na que si sanchiehe na quexeho cosa inchin jehe rinao, jehe tsinhi quehe sanchiehe na. ¹⁵ Co jañá inchin noa na que Dios ttian na tti ján na danchiehe na jehe, cai noa na que orochonda na tti joanchiehe na.

¹⁶ Si çhonja chojni sicon que ná chojní Cristo jinchehe ná cosa jianha, pero cosa mé jiquininxinha para que Dios rrorroanha castigo de ndasitján almé chojni mé, chojni que sicon jamé chonda que sinchetsenhe ñao Dios para ixin chojni que jinchehe cosa jianha mé, co Dios sanjo iná vida naroaxin para ngain chojni que jinchehe cosa jianha mé, si jeha ná cosa jianha que jiquininxin castigo de ndasitján almé chojni. Jí cosa jianha que jiquininxin para Dios rrorroanha castigo de sitján almé chojni que nchehe cosa mé, co ndaçhjanha que sinchetsenhe ni ñao Dios para chojni que nchehe cosa jianha mé. ¹⁷ Cainxin cosa jianha ncheçoxinha Dios, pero te cosa jianha que ça jiquininxinha castigo de sitján almé ni.

¹⁸ Noa na que tti chojni que chonda Dios inchin Ndodé, chojni mé ncheha na sigue nchehe na cosa jianha ixin Xenhe Dios jinda chojni mé co inchínji catteha na.

¹⁹ Noa na que ján na chojní Dios na, pero tti icha chojni que ditticaonha Jesucristo, chojni mé inchínji ttetonhe.

²⁰ Noa na cai que Xenhe Dios joí Xan ngataha nontte para ttjenguijna na Xan para datsoan na Dios tti ján ndoa. Co ján na te na ngain tti mero ndoa, rroçho, ngain Jesucristo, Xenhe Dios. Jehé Xan tti mero Dios ndoa co jehe Xan tti çhjá na iná vida naroaxin que çonhi tiempo tsjexin.

²¹ Jaha ra ço inchin xannchinnchinchjanhna, ncheha ra caso cain cosa que chojni nchesayehe inchin Dios pero que jeha Dios ndoa. Amén.

Yoxin Carta que Dicjin Juan

Chojni que ditticaon Jesucristo chonda que sinao chó na naná na

¹ Janha tti representante de Jesucristo tti ditticaon jehe de osé tiempo, co cjin na carta jihi para nchí que ditticaon Jesucristo. Dios coinchiehe nchí mé conixin xenhe ncha tti ni janha rinaho ndoa, co jeoha janha, cai cain chojni que joatsoan tti ndoa. ² Rinaho jaha ra de ixin jehe tti ndoa que chonda na ngain ansean na co que sehe nganji na para cainxin tiempo. ³ Dios tti Ndodá na conixin Xenhe, tti chonda cain joachaxin, sinchenciaon nganji ra co tsiaconoaha ra co sanjo ra tti chjoin que tsonohe ansean ra. Cain jihi sehe nganji ján na que joatsoan tti ndoa co tti rinao chó na.

⁴ Atto chahna janha ixin coian que canxion xanha te xan conforme ngain tti ndoa, jañá inchin Dios Ndodá na coetoan na. ⁵ Co jai, nttatsanha ñao jaha que ján na sonao chó na naná na. Tti rricjinha jihi jeha ná cosa naroaxin que ján na vitoan na, xajeho tti ján na chonda na de are nacoexinxon na gotticaon na. ⁶ Tti rinaonxin chó ni rrocho ixin chonda ni que sintte ni inchin coetonha Dios. Inchin ocoinhi jaha ra de are nacoexinxon na gotticaon na, ján na vitoan na para sonao chó na co sonao na Dios.

Tti chojni que ncheyehe icha chojni

⁷ Ngoixin ngataha nontte chji chojni que ncheyehe icha chojni co chojni mé datsoanha na ixin Jesucristo tti Dios rroanha ngataha nontte inchin ná xí ndoa co jian. Chojni mé tti niningaconhe Jesucristo, co ncheyehe na icha chojni. ⁸ Jaha ra chonda ra cuidado para que sinchet-janha ra tti joacha ra co jamé jaha ra sayehe ra cain tti jaha ra ojoacha ra.

⁹ Quexeho chojni que ndasitján de ngain tti cjoago Jesucristo, chojni mé ditticaonha Dios, pero tti chojni que sitticaon tti cjoago Jesucristo, chojni mé jí ngain Ndodá na co Xenhe Ndo cai. ¹⁰ Si chonja chojni sitsjaha jaha ra co ditticaonha jihi, chjeha ra na joachaxin para rronichja na ngain nihngo ni nichjeha ra na inchin nichjehe ra chojni Jesús ¹¹ ixin tti chojni que rronichjé chojni mé inchin chojni Jesús, jehe tsjenguijna chojni mé para sincheyehe na icha chojni.

Joexin joajné Juan

¹² Chonda atto tsje que rrondattjo jaha ra pero irinaoha sinttaha conixin xón co ndajni ixin janha rrochoan para saso sasotsjaha ra co rronichja na janha co jaha ra para que jamé icha jian rrochá na.

¹³ Ntíhi cain chojni que ditticaon Jesucristo, tti chojni que Dios coinchiehe rroanha joajna para ixin jaha. Amén.

Ninxin Carta que Dicjin Juan

Juan nichja jian de ixin ná xí vinhi Gayo

¹ Janha tti representante de Jesucristo tti ditticaon jehe de osé tiempo, cjin na carta jihi para ixin xiamigona Gayo, tti janha ndoa rinaho.

² Janha danchia Dios que jehe jian sinchenciaon nganji, co ixin xonhi tti tsonihi cuerpoa, jañá para sarihi jian ngain cuerpoa inchin jianxin ansean. ³ Janha atto chahna are joí canxion chojni que ditticaon Jesucristo co coequinna na ixin jaha jian ditticaon Jesús co quexén rridarihi jaha ngain tti ndoa. ⁴ Xonhi cosa jí que janha icha rrochananxin jeha tsonona que chojnina te na inchin ndačo tti ndoa.

⁵ Jaha rrihi soji ngain tti jaha rrinchehe ngain quexeho chojni que ditticaon Jesucristo co icha jian ixin jaha ttjenguijna chojni que joixin na de iná nontte. ⁶ Co nimé ni ndačo ngattoxon con cain chojni que xatte para servicio nttihi quexén jaha rinao chojni mé. Nttatsanha ñao, ttjenguijna chojni mé de ixin tti rrogondehe na para que sinchehe na sigue ngain viajé na para ixin Dios. ⁷ Co jehe na sacjoi na viaje de ixin Jesucristo, co xonhi vanchia na ngain chojni que chonxinha Dios. ⁸ Mexinxin ján na chonda na que tsjinho na cuidado de ixin jehe na para tsjenguijna na na, co jañá ján na tsjenguijna na na de ngain xa de rrondate na chojni tti joajna ndoa.

Cosa nchaoha que Diótrefes nchehe

⁹ Janha cjin na ná carta para cain chojni que xatte para servicio nttiha, pero Diótrefes čhoha nchehe caso tti janha ttetonha ixin jehe nchexoxinhi dehe tti icha nohe de ngayé cain na. ¹⁰ Mexinxin are janha saso, janha rronichjá para rronattjan tti jehe nchehe, ixin nichja feo co nichja ndoaha de ixin janha. Co xa jiha contento conixin cain yá, jehe ttjenguijnaha tti chojni que čhji viaje de ixin Jesucristo, co tti chojni que ttjenguijna chojni mé, jehe Diótrefes ndačo ngain na que sincheha na jamé, co denguxin na de ngain cain chojni que xatte para servicio nttiha.

¹¹ Janha rritetonha que rroeha tti ejemplo jianha inchin ejemploe Diótrefes, jaha rroeha joxon tti ejemplo jian. Tti chojni que nchehe jian, mé chojni Dios, pero tti chojni que nchehe jianha, chojni mé xa chonxinha na Dios.

Tti jian ejemplo que joinchehe Demetrio

¹² Cainxin chojni nichja na jian de ixin Demetrio, co tti jehe nchehe xago que jehe Demetrio seguro ditticaon Jesucristo. Janha na cai chonxin na ixin quexén nchehe jehe Demetrio, co jaha ra noha ra que janha na nichja na tti ndoa.

Joexin joajné Juan

¹³ Janha rrichonda atto tsje tti rronattjo, pero rinaoha sinttaha conixin ndajni co lapi ¹⁴ ixin janha rinaho sicon jaha daca, cottimeja tsjoan na janha co jaha.

¹⁵ Que tsonoha čhjoin ngain ansean. Cain xiamigoa na nttihi rroanha na joajna para ixin jaha. Nttatsanha ñao, jaha mismo chjehe joajna naná xiamigoa na.

Carta Que Dicjin Judas

Judas rroanha joajna ngain tti chojni que ditticaon Dios

¹ Janha Judas na, janha ná ninchehe xé Jesucristo na, co janha xanchó Jacobo na. Cjin na carta jihi para cain jaha ra xo Dios Ndodá na vayaha ra para te ra chojni Ndo. Jaha ra tti chojni que jehe Ndo cjoenchjinha Ndo iroin jaha ra ditticaon ra Jesucristo. ² Dios anto tsiaconoaha jaha ra, co rrochjá ra tti çhjoin que tsonohe ansean ra cain ra, co sinoa ra icha co icha.

Tti chojni que tjago cosa que jeha ndoa

(2 Pedro 2.1-17)

³ Hermanos, janha anto joiçaxanho de rrocjinha ra are saho de ixin quehe rroçho tti vida naroaxin que ján na chonda na. Pero hasta tti jái nchoe janha chonda que rricjinha ra carta jihi, para rrinttatsanha ñao ra que çonhi chojni sinttacoanha ra oje cosa de ixin tti jian joajné Jesucristo. Dios rroanha joajna mé nacoa nttiha para ngain cain chojni que ditticaon jehe co mé donda para cainxin tiempo. ⁴ Jamé rrindattjo ra ixin tsje chojni jianha otencheoenhe na icha chojni cosa que jeha ndoa. Jehe na ndaço na ixin Dios anto jian nganji ján na, mexinxin nchao sinchehe ni inchin rinao ni co çonhi castigo rrochonda ni, co ndaço na ixin ndoaha jí Dios, tti nacoaxinxon que ttetonha ján na, co ndaço na que jeha ndoa de ixin Jesucristo, tti chonda cain joachaxin para ixin ján na. Pero ngain tti jitaxin Palabré Dios, nttiha ndaço desde osé tiempo de ixin quehe castigo tequininxin cain chojni jianha mé.

⁵ Masqui jaha ra onoha ra cain jihi, pero janha rinaho sinttaçaxaon ra que ixin Dios, masqui jehe joantsjexin cain chojni Israel de nonttehe Egipto, pero después, jehe joinchetján tti chojni que vitticaonha jehe. ⁶ Co tti cain ángel que joinaoha vitticaon Dios, cain ángel mé Dios coiaxinhi ngain infierno, tti lugar anto naxin xehe, co nttiha teçhoaxin cadena para cainxin tiempo hasta tsija tti nchanho que Dios sinchejuzgá. ⁷ Cai ciudad de Sodoma co ciudad de Gomorra co cain ciudad çhian de nttiha cain chojni mé vitticaonha na Dios inchin vinttenchehe cain ángel que teaxinhi jai. Co jehe na icha jé cosa jianha joinchehe na. Jehe na joiatte na çhihi iná na co jeha na xo xí na joiattea chó na para joinchehe na cosa jianha que tequininxinha ngain cuerpoe na. Cain chojni mé che na conixin çohi de are maho, co mé ná ejemplo para cainxin chojni que nchehe jianha rrochonxin na ixin çonhi tiempo tsjexin roche na ngain çohi.

⁸ Pero masqui jamé, jai ça te chojni jianha co jehe nimé ni nttacoanha ra tti jeha ndoa, co chojni jihi tonoeha na ixin tenchehe na cosa jianha. Mexinxin conixin cuerpoe na nchexin na cosa jianha, co ditticaonha na joachaxin que chonda Cristo, co nichja na feo de ixin tti chonda icha joachaxin que jehe na. ⁹ Ni tti arcángel Miguel, are jehe co inchínji coetoxin na cuerpoe Moisés de ixin quexehe tti chonda joachaxin ngain cuerpo mé, ni are mé jehe arcángel mé ndaçhoha feo de ixin quehe tsonhe inchínji, sino que jeha ndaço ngain inchínji: “Dios tti sinttasat-taha jaha.” ¹⁰ Pero cain chojni jianha tehe, jehe na nichja na feo de ixin cosa que jehe na chonxinha na. Co cain cosa que chonxin na ttinxinha na

jian tti chonxin na, mé inchin chonxin coxigo que chondaha joarrixaon. Co jehe na nchehe na jamé para ndanchetjanxin na almé na jeha na.

¹¹ ¡Atto tangui tsonhe chojni mé! ixin jehe na nchehe na jianha inchin joinchehe Cain. Co ixin jehe na rinao na sacha na tomi, mexinxin vačhjenda na de tti nttiha nao inchin conhe Balaam. Co inchin Dios joinchetján Coré tti joinaoha vitticaon ngain Dios, cai Dios sinchetján chojni mé. ¹² Cain tti nchehe chojni jianha jiji ná joasoaxin para ixin jaha ra are jinttecoho ra na ngaxinhi nihngo. Nttiha jehe na jine na co dihi na hasta tti ičhoha co tjanogaxin na co řonhi respeto chonda na ngaxinhi nttiha. Co jehe na inchin tti ttingaria coleco pero que dicao cuidado jeha de ixin jehe. Co jehe na inchin tti ttjoi que chondaha řhin, jeha řhintto sadicao ttjoi mé. Jehe na inchin tti nttá que danjoha ttochjoin. Co nttá mé rročo que ndadixema nttá jian co đigačhjengui nttá conixin cainxin noehe nttá. ¹³ Chojni jiji inchin tti olé ndachaon que ttiaho caxineno ngandehe nda, mé tti joasoaxin que jehe na nchehe na. Co jehe na inchin tti conotse que ndadinchetján direcioen. Chojni jiji tti ndačo Dios, que jehe na tsji na ngain infierno tti anto naxin xehe co řonhi tiempo sačhjexin na de nttiha.

¹⁴ Cai Enoc, ná tti cjoí xanntti icha řančhjen de ngain Adán, jehe nichja de ixin jiji cai ixin Dios chjé joachaxin are jehe ndačo: “Janha vicon jehe tti chonda cainxin joachaxin joí conixin anto tsje miles de ángel ¹⁵ co sinchejuzguehe cain chojni co sinchecondená cain chojni jianha de ixin cainxin cosa jianha que nchehe na, co de ixin cainxin palabra jianha que jehe na nichja na de ixin Dios.” ¹⁶ Jehe na ncheřoxinhi na tjanguihi na iná chojni, co jehe na ncheřoxinhi na ttequin na cuentoe iná chojni, co jeha ttjé na tti ncheřoxinhi cuerpoe na. Jehe na nichja na palabra orgulloso, co nichja na jian de ixin canxion chojni pero jeha para que chojni mé sinchehe jian ngain jehe na.

Tti vitonhe chojni que ditticaon Jesucristo

¹⁷ Pero jaha ra, hermanos, řaxaon ra que desde are saho ondattjo ra cain representanté Jesucristo: ¹⁸ “Ngain tiempo que ochian tsí Jesucristo iná, sintte chojni que tsjanao na cosa de Dios co sinchehe na cosa jianha inchin jehe na rrořaxaon na.” ¹⁹ Co cain chojni jiji tti ttjé pleito co ncheřoxinhi na nchehe na cain cosa jianha que jí ngain mundo jiji, co chojni jiji coha Espíritu Santo de Dios ngain na.

²⁰ Pero jaha ra, hermanos, dintte ra soji ngain tti jian que jaha ra ditticaon ra. Nchecoanxinhi ra Dios conixin joachaxin Espíritu Santo. ²¹ Dintte ra řhjoin ngain vidá ra inchin rinao Dios co chonhe ra tti nchanho que Jesucristo rochjá na tti iná vida naraoxin que řonhi tiempo tsjexin. Co jehe rrochjá na vida mé ixin jehe anto ttiaconoa na.

²² Ncheguitticaon ra tti chojni que chondaha seguro ixin Cristo rochjá na vida jiji. ²³ Ttjenguijna ra cain chojni mé para que jehe na rrocheha na ngain řohi. Co ttiaconoehe ra icha chojni cai, pero ttjiho ra cuidado de ncheha ra tti jianha que jehe na tenchehe na ngain vidé na.

Nttihi joexinxin joajné Judas

²⁴⁻²⁵ Tti nacoaxinxon Dios chonxin cainxin cosa, co jehe tti ttjenguijna na ján na para řonhi castigo rrochonda na de cain cosa jianha que jointtoho na. Co jehe mé tti chonda joachaxin para senda jaha ra para que řonhi cosa jianha sinchehe ra, co para que are tsonchienhe ra

ngattoxon con jehe xonhi jianha rrochonda ra co anto rrochaha ra. Co de ngain nombré Jesucristo rrondačo na ixin Dios jiquininxin tsosayehe co jehe jiquininxin cain joachaxin desde are saho co jai co para cainxin tiempo. Amén.

Tti Vicononxinhi Juan

Tti joinchenohe Jesucristo Juan

¹ Jihi tti Dios joinchenohe Jesucristo, para que Jesucristo joinchenohe cain chojni que tenchehe xé cain tti chonda que siconhe otoi. Co Jesucristo rroanha ná ángel de jehe para joinchenohe Juan, xinchehe xé jehe, cain jihi. ² Co janha Juan na ndachjan nao cainxin tti vicononxinna, co janha tti ndachjan ixin joajné Dios que Jesucristo joinchesegurá, joajna mé ján ndoa joajna.

³ Anto chjoin para ixin tti chojni que tsjehe xón jihi; co anto chjoin para ixin cain tti chojni que ttinhi joajna jihi que joixin de ngain Dios, co nchehe na caso cain tti jitaxin ngain xón jihi, ixin ochiaon joí tiempo are cainxin tti jitaxin ntthi siconhe.

Juan rroanha joajna ngain yáto nihngo

⁴ Janha Juan rricjin na joajna jihi para nganji ra xo ditticaon ra Jesucristo ngain nonttehe Asia. Dayehe ra tti jian co tti chjoin que tonche ansean ra, ixin cayoi mé ttixin de ngain Dios, tti ttjen jai, tti vehe are saho, co tti tsí iná; co cai de tti yáto espíritu que te ntthi ngaca lugar tti ttjen Dios dayehe ra cayoi joajna jihi; ⁵ co cayoi joajna jihi cai ttixin de ngain Jesucristo, tti testigoe Dios que nichja nao, co jehe tti saho xechon, co jai jehe tti chonda joachaxin para ngain cain xí que ttetonha ngataha nontte jihi. Co jehe Cristo anto rinao na ján na co ojointaroa na conixin jní que jehe cointtji para ixin cain cosa jianha que ján na jointtoho na. ⁶ Co jehe ochjá na joachaxin de tsetonha na conixin jehe co de sontte na dané Dios, Ndodé jehe. ¡Jehe Jesucristo jiquinixin tosayehe co cainxin joachaxin para cainxin tiempo! Amén.

⁷ ¡Tsjexin ra, Cristo tsí ngacjan ttjoi! Cainxin chojni sicon na mé hasta cai tti cjoaya ngain jehe Cristo. Co chojni de cain rajna de ngoixin mundo rrotsjanga na are sicon na mé. Ján, jañá siconhe.

⁸ Cristo, tti chonda cain joachaxin, tti jí jai, tti vehe desde are saho, co tti tsí iná, mé jehe ndachho: “Janha tti icha saho varichon de cainxin cosa co janha sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra.”

Are Cristo xago ngain Juan

⁹ Janha Juan, ná hermano de jaha ra de ngain Cristo, co janha rridetan tanguí cai inchin jaha ra; co janha chonda parte ngain tti ttetonha Dios inchin jaha ra; co janha cai tonona chjoin de ixin tti paciencia que Cristo chjá na. Janha viaxinna ngain isla que dinhi Patmos ixin ndattjan chojni joajné Dios que Jesucristo joinchesegurá. ¹⁰ Co ná nchanho domingo joí joachaxín Espíritu Santo nganji na janha, co coian anto sén noton na inchin ná tté chojni, que mé inchin are toyao ná trompeta. ¹¹ Co chojni mé ndachjenji na:

—Janha tti icha saho varichon de cainxin cosa, co janha sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra. Jaha cjin ngain ná libro tti rridicon jaxon, co rroanha cain mé ngain tti chojni que ditticaon na na janha ngain tti

yáto nihngo que te ngain regioen Asia; jihi rrocho tti ngain nihngo Efeso, Esmirna, Pérgamo, Tiatira, Sardis, Filadelfia, co ngain Laodicea.

¹² Janha ngaria tsjá para vicon quensen jinichjahna. Co are janha jointtaha mé, janha vicon yáto candelero de oro. ¹³ Co ngayé tti yáto candelero mé janha vicon ná tti inchin xenhe ná xí. Co jehe jingá ná lontto jini que jicaxin hasta ngataha nontte, co jittedonga ná cinturón de oro ngain pechoe. ¹⁴ Co xájá anto roa xa, inchin chjon roa, o sea inchin chintta ngataha jnanchaha. Co jmacon xá xohi teche. ¹⁵ Rotté conguixima inchin chia que dinhi bronce que xottexin ngain xohi, co digoan chia pulido. Co tté anto soji inchin ruido que nchechjian jinda de tsje río. ¹⁶ Ngá rá lado jian jichonda yáto conotse, co de ngain rroha vachjexin ná espada anto yao que chonda filo de yoixin lado. Co ngá con jitunguixin inchin nchanho are anto soa.

¹⁷ Are janha vicon mé, joaritsinga ngaca rotté xá ndavenhe na. Pero jehe coín rá lado jian ngataha na, co ndachjenji na:

—Xaonha jaha, ixin janha tti icha saho varichon de cainxin cosa, co janha tti sarihi are cainxin cosa ndatsjexin. ¹⁸ Janha tti rrichon jai. Masqui venhe na, pero jai rrichon para cainxin tiempo. Janha chonda joachaxin ngain tti ndadenhe ni co ngain lugar tti ttji cain chojni que ndadenhe. ¹⁹ Mexinxin cjin tti jaha vicon, tti jitonhe jai co tti siconhe después. ²⁰ Janhi rrocho tti yáto conotse que jaha vicon ngain rana lado jian na, co tti yáto candelero de oro: tti yáto conotse rrocho tti dicao joajna ngain tti yáto nihngo. Co tti yáto candelero rrocho tti yáto nihngo.

2

Ntitihi tsexinxin joajna para tti yáto nihngo: Joajna para ngain nihngo Efeso

¹ Cjin joajna jihi ngain jehe tti dicao joajné Dios ngain nihngo que jí ngain ciudad de Efeso: “Janhi ndacho jehe tti chonda tti yáto conotse ngá rá jian co tti rridehe ngayé tti yáto candelero de oro: ² Janha nona cain tti jaha ra nchehe ra co janha chonxin ixin anto soji nchehe ra xá ra, co ixin chonda ra paciencia, co ixin dittoaxinha ra que sintte chojni jianha ngayaha ra. Co janha nona ixin vaquehe ra prueba tti chojni que ndacho ixin jehe na representantena na janha, pero ndoaha, co jaha ra vatsoan ra ixin jehe na ncheyaxon na. ³ Anto chonda ra paciencia, vetan ra tangui co anto joinchehe ra xa para ixin janha, co masqui jamé, xonhi tiempo goan ra desanimado. ⁴ Pero janha chonda ná cosa nchaoha que tenchehe ra jaha ra: que ixin irinaoha ni ra jai inchin are nacoexinxon ra vitticaon ni ra. ⁵ Mexinxin xaxaon ra quexén vintte ra are nacoexinxon ra vitticaon ni ra co ttentoxinhi ra vidá ra co nchehe ra inchin vanchehe ra are mé. Si nahi, janha toin saso nganji ra co sinttjianxin ningoa ra de tti jí ningo, pero si tsentoxinhi ra vidá ra isinttjianha ningo. ⁶ Pero masqui jamé, anto nchao ixin jaha ra ningaconhe ra tti nchehe chojni nicolaítas, ixin janha cai ningacoan tti nchehe chojni mé. ⁷ Jaha ra que ttinxin ra jian, ttinhi ra tti ndacho Espíritu Santo ngain nihngo tehe: Tti chojni que tsixinhi de sincheha cosa jianha, janha rrochjaha joachaxin para sine na tti ttochjoin de ngain nttattochjoin que danjo vida, que nttá mé jí nnta ngain huerté Dios.”

Joajna para ngain nihngo Esmirna

⁸Co cjin joajna jihi ngain jehe tti dicao joajné Dios ngain nihngo que jí ngain ciudad de Esmirna: “Janhi ndačo jehe tti icha saho vehe de cainxin cosa, tti sehe are cainxin cosa ndatsjexin, co jehe tti ndavenhe co cjin jichon jai: ⁹Janha nona cain tti nchehe ra, co chonxin cain tti tangui que tedetan ra co nona ixin anto noa ra de ngain cosa de ngataha nontte jihi, pero masqui jamé, anto rico ra de ngain Dios. Co janha nona ixin chojni judío que ditticaonha nganji na janha, chojni mé nichja jianha de ixin jaha ra, pero chojni mé chojni Satanás. ¹⁰Jaha ra x̄aonha ra de cain cosa tangui que sattohe ra, ixin inchínji tsiaxinhi canxion de jaha ra ngain cárcel para que cainxin ra satto ra prueba. Co chonda que tangui tsonha ra inchin tté nchanho. Pero jaha ra nchehe ra sigue ditticaon ra Dios hasta que ndasenhe ra co janha rrochjaha ra iná vida naroaxin inchin ná premio para ixin jaha ra. ¹¹Jaha ra que ttinxin ra jian, ttinhi ra tti ndačo Espíritu Santo ngain nihngo tehe: Tti chojni que tsixinhi de sincheha cosa jianha, x̄onhi tsonhe chojni mé are icha chojni ndasenhe yoxin nttiha.”

Joajna para ngain nihngo Pérgamo

¹²Co cjin joajna jihi ngain jehe tti dicao joajné Dios ngain nihngo que jí ngain ciudad de Pérgamo: “Janhi ndačo jehe tti jichonda espada anto yao que chonda filo de yoixin lado: ¹³Janha nona cain tti tenchehe ra co nona que ixin jaha ra te ra ngain lugar tti ttetonha Satanás. Pero masqui jamé, jaha ra cain tiempo jian ditticaon ni ra. Co hasta cointtoeha ra de vitticaon ni ra ni ngain tti tiempo que Antipas, tti testigona que vitticaon na janha cainxin tiempo, nagoenxon na ngayaha ra nttiha ngain lugar tti jí Satanás. ¹⁴Pero janha chonda canxion cosa nchaoha que tenchehe ra jaha ra: que ixin nttiha ngain ciudad de Pérgamo chonda ra canxion chojni que nchehe na inchin joinchehe Balaam, tti joinchecoenhe Balac que x̄én para joinchejianha chojni Israel ngattoxon con Dios ixin joine na cosa que tosayexin ídolo co ixin vancheyehe na iná nchí que jeha nchíchihi na. ¹⁵Co cai nchaoha ixin nttiha ngayaha ra te canxion chojni que nchehe inchin chojni nicolaítas, co tti nchehe na, mé tti janha ningacoan. ¹⁶Mexinxin ttentoxinhi ra tti tenchehe ra, ixin si nahi, janha saso daca nganji ra co tsetoquinha chojni mé conixin tti espada que jidačhjexin de rroha na janha. ¹⁷Jaha ra que ttinxin ra jian, ttinhi ra tti ndačo Espíritu Santo ngain nihngo tehe: Tti chojni que tsixinhi de sincheha cosa jianha, janha rrochjaha chojni mé joachaxin para sine tti maná que jima jai. Co rrochjaha chojni mé ná x̄o roa, co nganito x̄o mé setaxin ná nombre naroaxin para ixin chojni mé que x̄onhi chojni chonxin nombre mé sino que jeho tti chojni que sayé x̄o mé.”

Joajna para ngain nihngo Tiatira

¹⁸Co cjin joajna jihi ngain jehe tti dicao joajné Dios ngain nihngo que jí ngain ciudad de Tiatira: “Janhi ndačo jehe tti Xenhe Dios, tti jiche inchin x̄ohi ngain jmacon, co rotté inchin chia que dinhi bronce que digoan pulido: ¹⁹Janha nona cain tti nchehe ra co chonxin ixin anto rinao ni ra janha, co ixin anto ditticaon ni ra janha, co ixin anto tenchehe ra x̄a para ixin janha, co ixin chonda ra paciencia. Co janha nona que jai jaha ra icha tsje tenchehe ra que are nacoexinxon ra vitticaon ni ra. ²⁰Pero janha chonda ná cosa nchaoha que tenchehe ra jaha ra: que ixin dittoaxin ra que dehe ngayaha ra ná nchí que nchehe

ncha inchin vanchehe nchi que vinhi Jezabel. Janhi nchehe nchi jiji; ndacho ncha ixin nichja ncha joajna que daye ncha de ngain Dios, pero jehe ncha jecho ncheyehe ncha chojni que nchehe xana janha para que jehe na tsontaonxin na ina nchi que jeha nchichihi na co jine na cosa que tosayexin idolo. ²¹ Janha ochjaha ncha tiempo para que jehe ncha tsentoxinhi ncha tti jinchehe ncha, pero jehe ncha xa choha ncha. Co xa ttinttoeha ncha de danjo ncha cuerpoe ncha ngain tsje xi. ²² Co jai janha sinttaha que jehe ncha tsonihi ncha co setsingataha ncha nontte, co cai cainxin chojni que nchehe inchin jehe ncha setan na tangui si jehe na tsinttoeha na de tti tenchehe na. ²³ Co janha nasoenxon cain chojni que ocoangui na ditticaon na cain tti ndacho ncha. Jame cainxin chojni ngain cainxin nihngo tsonohe na ixin janha chonxin hasta tti ngain joarrixaoen cada chojni co ngain ansen na. Co janha rrochjaha ra cada ra inchin tti jaha ra joinchehe ra. ²⁴ Pero icha ra que te ra nttiha ngain ciudad de Tiatira, jaha ra xo ncheha ra tti nchehe nchi me, ni xonhi tiempo joatsoan ra tti jehe na ncheguinh na tti secreto anto jima de Satanás, janha rrindatto ra que irrochjaha ra ina cosa tangui hasta que jecho tti ochonda ra. ²⁵ Pero ttenchjinha ra tti jian que jaha ra ochonda ra jai hasta que janha sihi ina. ²⁶ Cain tti chojni que tsixinhi de sincheha cosa jianha co tti nisinchehe sigue sinchehe na inchin janha rinaho hasta que tsjexin mundo, janha rrochjaha cain chojni me joachaxin de tsetonhe na cain naci6n, ²⁷ jaña inchin Ndodana chjana Ndo joachaxin janha. Co jehe na tsetonhe na cain naci6n conixin na nttacotto de chia. Co chojni naci6n que sitticaonha sicaonxin nttacotto me hasta rrochjeca cuerpoe como si rrocji na chi. ²⁸ Co cai janha rrochjaha chojni me tti conotse que nchengasán are ndoyo. ²⁹ Jaha ra que ttinxin ra jian, ttinhi ra tti ndacho Espiritu Santo ngain nihngo tehe.”

3

Joajna para ngain nihngo Sardis

¹ Co cjin joajna jiji ngain jehe tti dicao joajne Dios ngain nihngo que ji ngain ciudad de Sardis: “Janhi ndacho jehe tti chonda tti yato espiritue Dios co tti yato conotse: Janha nona cain tti nchehe ra co nona ixin jai jaha ra ondadiguenhe ra de ngain espiritua ra masqui chojni ndacho na ixin xa techon ra. ² Mexinxin, xingamaha ra, co chjehe ra fuerza cain cosa que xa ji masqui cosa me ondajidenhe, ixin janha vicon que tti nchehe ra xa jeha jian ngattoxon con Dios de janha. ³ Mexinxin xaxaon ra tti coangui ra, co nchehe ra sigue me jai, co ttentoxinhi ra tti tenchehe ra jai. Si sincheha ra jame, janha saso contra nganji ra xa na tti chehe sin que tsonoaha ra quesa o quehe hora. ⁴ Masqui nchaoha tenchehe ra canxion ra, pero cai nttiha ngayaha ra ngain ciudad de Sardis te canxion chojni que xonhi quitta dichje na lonttoe na; me rrocho xonhi cosa jianha rridinchehe na. Co jehe nime ni sacji nganji na janha conixin lonttoe na roa, ixin jame tequininxin na. ⁵ Cain tti chojni que tsixinhi de sincheha cosa jianha, chojni me tti sinttenga lonttoe roa, co janha tsonxantteha nombre na de ngain xon tti tetaxin cain chojni que chonda ina vida naroaxin. Co janha rronda chjan ixin chonxin chojni me ngattoxon con Ndodana co ngattoxon con cain angel que te nttiha. ⁶ Jaha ra que ttinxin ra jian, ttinhi ra tti ndacho Espiritu Santo ngain nihngo tehe.”

Joajna para ngain nihngo Filadelfia

⁷Co cjin joajna jiji ngain jehe tti dicao joajné Dios ngain nihngo que jí ngain ciudad de Filadelfia: “Janhi ndačo jehe tti anto jian co tti nichja tti ndoa, co tti chonda joachaxin de rey David que are jehe danttjé ná puerta, ni ná chojni čhoha ttejé puerta, co are jehe ttejé ná puerta ni ná chojni čhoha danttjé puerta. ⁸Janha nona cain tti nchehe ra. Janha coín nganji ra ná puerta jixangué co ni ná chojni čhoha tsejé puerta, ixin masqui jaha ra chondaha ra tsje fuerza, jaha ra joinchehe ra caso ngain joajnana janha co xonhi tiempo ndache ra icha chojni ixin chonxinha ni ra. ⁹Mexinxin janha rrorroanha nganji ra tti chojni que nchehe inchin rinao Satanás, chojni mé judío na pero ditticaonha na nganji na janha inchin jiquininxin chojni judío de ngain ansén na. Janha rrorroanha chojni mé nganji ra co tsetoan na que sinttettoxin nttajochjiji na ngaca rottea ra para que tsonohe na que janha ján rinaho ra. ¹⁰Jaha ra chonda ra paciencia inchin janha coetonha ra, co mexinxin janha tsjenguijna ra para que xonhi tsonha ra are tsí tiempo are Dios saquehe prueba ngain cain chojni ngoixin mundo jiji. ¹¹Janha sihi toin. Jaha ra nchehe ra sigue tti jian que jaha ra tenchehe ra para que xonhi chojni santsjaha ra premiao ra que sayehe ra. ¹²Cain tti chojni que tsixinhi de sincheha cosa jianha, janha rrondačjan que chojni mé sintte na inchin columna que jiquehe ningoe Dios de janha, co jehe nimé xonhi tiempo sachjexin na de nttiha. Co nganito jehe na janha tsentaxin nombré Dios, co nombré tti ciudé Dios, rročo tti Jerusalén naroaxin que tsixin de ngajni tti ttjen Dios. Co janha tsentaxin nganito jehe na tti nombrena naroaxin. ¹³Jaha ra que ttinxin ra jian, ttinhi ra tti ndačo Espiritu Santo ngain nihngo tehe.”

Joajna para ngain nihngo Laodicea

¹⁴Co cjin joajna jiji ngain jehe tti dicao joajné Dios ngain nihngo que jí ngain ciudad de Laodicea: “Janhi ndačo jehe tti mero ndoa, tti jian testigoe Dios que nichja ndoa, co tti vehe icha saho de cain tti joinchechjan Dios: ¹⁵Janha nona cain tti nchehe ra. Co nona ixin jaha ra inchin jinda que jeha quin ni jeha soa. Mé rročo que rinaoha ra rrocjan ra inchin chojni que ditticaonha nganji na janha ni inchin chojni que jian ditticaon nganji na janha. ¡Icha nchao si ditticaon ni ra o ditticaonha ni ra! ¹⁶Pero ixin jaha ra jeha inchin jinda yáso co jeha quin ra ni soa ra, janha tsoncjan jaha ra de ngain rroha na janha. ¹⁷Ixin jaha ra ndačo ra ixin anto rico ra co ixin de cain cosa, anto jian te ra co xonhi nchetján ra. Pero jaha ra tonoaaha ra que techinhi ra co tangui tonoha ra ngain espiritua ra, cai noa ra, chejo ra co ttolocho ra de ngain espiritua ra. ¹⁸Mexinxin janha rrindattjo ra que ttehna ra de nganji na janha oro jian que dixotte ngain xohi co que ixonhi jinche jiyá oro; jamé para jaha ra ndoa sintte ra rico. Co ttehna ra lonto roa de nganji na janha para sinttengaha ra co rroxanotaon tti joasoaxin que chonda ra jai. Co ttehna ra xóan de nganji na janha para sinttjingui jmacon ra para que nchao sicon ra. ¹⁹Janha nttasattá co nttacastigá cain chojni que janha rinaho. Mexinxin chonda ra que ttentoxinhi ra vidá ra hasta que anto sinao ra sinchehe ra tti janha rrittetonha ra. ²⁰Tsjexinxin ra, janha rrindanguia puerté nchia para rrinichjá chojni. Si čhonja chojni tsinhi ttana co santtjé na nchiandoha na, janha sixinhi co sinequinha chojni mé, co jehe sine nganji na janha. ²¹Cain tti chojni que tsixinhi de sincheha cosa

jianha, chojni mé nttiha sariquinha tti janha rrihi rritetonha, inchin janha coixinna co joacha tti rritetonha čhica Ndodana. ²² Jaha ra que ttinxin ra jian, ttinhi ra tti ndačo Espíritu Santo ngain nihngo tehe.”

4

Janhi tocoanxin ngajni tti ttjen Dios

¹ Después de cain jihi, janha tsjá iná co vicon ná puerta jixangué ngajni co tti tté Jesucristo que nichjahna icha saho que inchin tté ná trompeta are toyao, mé ndachjenji na janha:

—Tani nttihi co tsjagoha cain cosa que chonda que siconhe después de cain jihi.

² Ngain rato mé joí Espíritu Santo nganji na janha conixin anto tsje joachaxin, co janha vicon ná nttaxintaon importante jí nttiha ngajni, co ngataha nttaxintaon mé tajitaha xá figuré ná tti xí. ³ Co tti jitaha nttaxintaon mé ngá con jehe anto jitonguíxin inchin ná xo fino que dinhi jaspe o xo que dinhi cornalina. Co ngandanji nttaxintaon mé jí ná conchecha que jitonguíxin inchin tti xo que dinhi esmeralda. ⁴ Co ngandanji nttaxintaon mé janha vicon iveinticuatro nttaxintaon, co nttiha tetaha veinticuatro nittetonha que tengá na lontto roa co techjinga na corona de oro. ⁵ Co de ngain tti nttaxintaon saho que janha vicon, de nttiha tedačhjexin xoí rayo co icha ruido co jidatte. Co nttiha ngain nttaxintaon mé teche yáto candil de xohi, que mé tti yáto espiritue Dios. ⁶ Co nttiha ngaca nttaxintaon mé jí ná cosa inchin ndachaon que nchao dicondoxin ni inchin xořao.

Co ngandanji nttaxintaon mé jí nó cosa que jichon. Co cosa mé ngoixin ngama chonda jmacon de ngajinxin co notonxin. ⁷ Tti saho de tti canoi cosa jihi jí inchin ná coleón. Co tti yoxin jí inchin ná coxintá. Co tti ninxin jichonda con inchin ngá con ná xí. Co tti nonxin jí inchin ná coaguila que jitjaganga. ⁸ Canoi cosa que techon mé techonda incjaon nenečhán cada. Co ngoixin ngama co ngaxinhi techonda jmacon; de ttie co de nchanho joxon tendačo:

Santo, santo, santo,

Dios, soixin que chonda cainxin joachaxin,

soixin tti Dios que varihi desde are saho, co rrihi jai, co soixin tti sihi iná.

⁹ Co cada nttiha que jehe tti canoi cosa que techon nchesayehé co danjo gracias ngain jehe tti jitaha nttaxintaon icha importante, tti jichon para cainxin tiempo, ¹⁰ cada nttiha mé tti veinticuatro nittetonha dinttettoxin nttajochjihi na ngain jehe tti jichon para cainxin tiempo, co ttín na coroné na nttiha ngaca nttaxintaon mé, co ndačo na:

¹¹ Soixin tti Dios na na janha na, soixin tti jiquininxin

cainxin gloria, co jiquininxin tosayaha co cainxin joachaxin;

ixin soixin tti joinchechjian cainxin cosa,

co ixin soixin jamé joinao, mé texin co conchjianxin cainxin cosa.

5

xón co Colecoe Dios

¹ Cottleja janha vicon ixin jehe tti jitaha nttaxintaon mé jiyá xón ngá rá lado jian. xón mé jixea inchin ná rollo, co jitaxin de ngaxinhi xón mé co de ndojaxin, co jijexin xón conixin yáto sello. ² Co vicon janha ná ángel que chonda tsje joachaxin que jidanchiangui anto sén co jindačo:

—¿Quensen chonda joachaxin de santtjé xón jihu co tsinchje cain sello que jiyá xón?

³ Pero ni de nttiha ngajni, ni nttihi ngataha nontte, ni de ngangui nontte coha ná chojni que nchao rroganttjé xón mé, ni para rrotsjehe na ngain xón. ⁴ Co janha anto tsjanga ixin xa xonhi quensen tsoxiré xón co tsjao xón, ni para rrotsjehe xón. ⁵ Cottimeja ná de tti veinticuatro nittetonha ndachjenji na janha:

—Jaha itsjangaha icha, ixin Coleón que joixin de ngain grupoe Judá de chojni Israel, tti mé cjoí razé rey David, mé ojoacha para que jehe nchao santtjé xón jihu co tsinchje tti yáto sello que jiyá xón.

⁶ Cottimeja ngaca tti nttaxintaon icha importante co ngayé jehe tti nó cosa que techon, co ngayé tti veinticuatro nittetonha, janha vicon ná Coleco tajingattjen va nttiha masqui dicon ni ixin digoén na va. Co jichonda va yáto ntehe va co yáto jmacon va. Co tti yáto jmacon va mé rroçho tti yáto espíritu que Dios rroanha ngoixin ngataha nontte. ⁷ Jehe Coleco mé cjoí va co coá va xón que jiyá ngá rá lado jian de jehe tti jitaha nttaxintaon icha importante nttiha. ⁸ Are jehe Coleco coá va xón mé, tti canoi cosa que techon co tti veinticuatro nittetonha vinttettoxin nttajochjihu na ngattoxon con Coleco mé. Cada nittetonha mé techonda na naná arpa co teyá na naná vaso de oro tecaon tsjoca, co mé rroçho cain tti nchecoanxin cain chojni Dios. ⁹ Co tetsje na ná himno naroaxin que ndaçho janhi:

Soixin jiquininxin de sayehe xón yá co tsinchje cain sello que jiyá xón; ixin soixin onagoenxon na ngataha nontte, co jnia cjoengaxin hna cain tti jianha que nchehe chojni de cain raza, chojni de cain nguigoa, chojni de cain rajna, co chojni de cain nación.

¹⁰ Soixin ochjana ni ra joachaxin de tsetonha na conixin soixin co de sintte na dané Dios de ján na.

Co ochjana ni ra joachaxin de tsetonha na ngataha nontte.

¹¹ Cottimeja tsjá iná co coian tté de anto tsje ángel que tate ngandanji nttaxintaon icha importante nttiha co ngandanji tti canio cosa que techon co ngandanji tti veinticuatro nittetonha que te nttiha. Nttiha te anto tsje millones de ángel. ¹² Co tendaçho sén:

Tti Coleco que nagoenxon na ngataha nontte, co mé co jiquininxin sayé va cain joachaxin co cain cosa que jí, co jehe va jiquininxin sayé va cain tti nohe Dios, co cain fuerza, co jehe va jiquininxin tsosayehe va co tsocoanxinhi va.

¹³ Co cai cain cosa que Dios joinchechjian que te nttiha ngajni co nttihi ngataha nontte, co tti te ngangui nontte, co tti te ngain ndachaon, co cain cosa que jí coian tendaçho janhi:

Tti jitaha nttaxintaon co tti Coleco, cayoi mé tequininxin tsocoanxinhi co tsosayehe, co joachaxín jehe sehe para cainxin tiempo.

¹⁴ Co tti canoi cosa que techon nttiha tendaçho:

—¡Ján, jamé tsonhe!

Co tti veinticuatro nittetonha vinttettoxin na nttajochjihu na co joinchesayehe na jehe tti jichon para cainxin tiempo.

6

Tti yáto sello que jiyá xón

¹ Cottimeja janha vicon que Colecoe Dios coinchje va saho sello que jiyá xón mé, co ngain rato mé coian nichja ná de tti nó cosa que techon nttiha. Té jehe anto soji inchin are datte, co jehe cosa mé ndačo:

—jı̃xacoı co tsjehe!

² Janha tsjá co vicon ná conxin roa. Co tti jitaha va jiyá ná chijno. Co digayé ná corona ixin ojoacha, co sacjoi para joinchehe sigue joigacha icha.

³ Are Colecoe Dios coinchje va tti yoxin sello, janha coian nichja tti yoxin cosa que techon nttiha. Co jehe cosa mé ndačo:

—jı̃xacoı co tsjehe!

⁴ Co vačhje ná conxin jatse. Co tti jitaha va vayé joachaxin de saqueha contento ansén chojni ngataha nontte para que jehe na tsexinhi na tseto na co nasoenxon chó na. Co jehe tti jitaha conxin mé vayé ná espada anto jie.

⁵ Are Colecoe Dios coinchje va tti ninxin sello, janha coian nichja tti ninxin cosa que techon nttiha. Co jehe cosa mé ndačo:

—jı̃xacoı co tsjehe!

Janha tsjá co vicon ná conxin ttie. Co tti jitaha va jiyá ná balanza ngá rá. ⁶ Co ngayé tti canoi cosa que techon, nttiha janha coian tté Dios que ndačo:

—Jeho nacoa kilo de trigo rentte tti dacha ni ngain ná nchanho. Co jamé rentte ní kilo de cebada cai. Pero nchexincoaha ra aceite ni vino.

⁷ Are Colecoe Dios coinchje va tti nonxin sello, janha coian nichja tti nonxin cosa que techon nttiha. Co jehe cosa mé ndačo:

—jı̃xacoı co tsjehe!

⁸ Janha tsjá co vicon ná conxin sine. Co tti jitaha va dinhi Muerte. Co noton mé jóı tti representanté lugar tti tji chojni ndadiguenhe. Co cayoi jehe na vayé na joachaxin para nadoenxon na ná cuarta parte de cain chojni ngoixin mundo conixin guerra, jintta, chin, co coxigo čhintto de ngataha nontte.

⁹ Are Colecoe Dios coinchje va tti naonxin sello, janha vicon ngangui altar que jí nttiha, cain almé cain chojni que vintteguenhe ixin vandache na icha chojni tti jian joajné Dios co ixin cjoı na jian testigo de joajna mé.

¹⁰ Cain almé chojni jı̃hi tendačo sén:

—Dios, soixin tti jian co cain tiempo nchehe tti soixin ndačo, ¿quejanhi tiempo xa tsončjanha para sinchejuzguehe co sinchecastigá tti chojni que nagoenxon na na janha na que te ngataha nontte?

¹¹ Cottimeja cain almé chojni mé vayé na lontto roa co vitonhe na que xa sinchejogaha na vé nchion, hasta rroxetteja senhe cainxin chojni que chonda que ndasenhe inchin cain tti chojni que te nttiha, ixin jehe na xa tenchehe na xé Jesucristo.

¹² Are Colecoe Dios coinchje va tti incjaonxin sello, janha tsjá co vicon que anto soji coingui nontte. Co nchanho ndaconaxin xehe inchin lontto ttie, co conittjao ngoixin va ndacjan va inchin jni. ¹³ Co conotse que te ngajni vinttji va para ngataha nontte inchin are nttahigo dingongui nntta ttochjoın nntta are anto soji tja čhintto. ¹⁴ Co ngajni ndavitján inchin ná xón are xea xon. Co cain jna co cain isla coinguixin de tti te. ¹⁵ Cottimeja cain rey de ngataha nontte, conixin icha chojni importante co chojni rico, co xittetonha ngain xisoldado, co icha chojni que chonda joachaxin, co cainxin chojni que te esclavo co cainxin chojni libre; cainxin chojni

mé tavinttema na ngaxinhi cueva co ngayé ttjao ngain jna. ¹⁶ Co vinttendačo na ngain jna co ngain ttjao:

—Dinttji ra ngataha na janha na, co ttema ni ra de ngattoxon con tti jitaha nttaxintaon icha importante, co de ngain tti anto soji castigo que sanjo Colecoe Dios.

¹⁷ Ixin ojoí nchanho para castigo icha soji de cainxin castigo, ¿co quensen tsixinhi ngain castigo jihi?

7

Chojni Israel que Dios coinchiehe para vayé selloe

¹ Después de cain jihi, janha vicon nó ángel tatengattjen ngataha tti nó lado de ngataha nontte tti ttixin čhintto. Co tatequehe tti nó čhintto para que xonhi čhintto tsja ngataha nontte, ni ngataonhe ndachaon, ni ngataon ni ná nttá. ² Cai vicon iná ángel que joixin de tti čhinxin nchanho co jichonda selloe Dios que jichon. Jehe ángel jihi coyaotte soji tti nó ángel que vayé joachaxin para sinchenihi ngataha nontte co ngain ndachaon co ndačo:

³—Āa ncheniha ra nontte ni ndachaon ni cain nttá, hasta que janha na tsjexin tsín na selloe Dios ngain nttattjen cain ninchehe xé Dios de ján na.

⁴ Co janha coian ixin cain tti chojni que vayé selloe Dios ngain nttattjen cjoí ciento cuarenta y cuatro mil chojni de ngayé cain tti tteyó grupoe chojni Israel. ⁵ Tteyó mil de tti chojni que vayé sello cjoí de ngain grupoe Judá, tteyó mil na de ngain grupoe Rubén, tteyó mil na de ngain grupoe Gad, ⁶ tteyó mil na de ngain grupoe Aser, tteyó mil na de ngain grupoe Neftalí, tteyó mil na de ngain grupoe Manasés, ⁷ tteyó mil na de ngain grupoe Simeón, tteyó mil na de ngain grupoe Leví, tteyó mil na de ngain grupoe Isacar, ⁸ tteyó mil na de ngain grupoe Zabulón, tteyó mil na de ngain grupoe José, co itteyó mil na de ngain grupoe Benjamín.

Tti anto tsje chojni que tengá lontto roa

⁹ Después de cain jihi, janha tsjá co vicon anto tsje chojni de cainxin nación, co de cain raza, co de cain nguigoa co de cain rajna que jí ngataha nontte nttihi. Co cain nimé tatengattjen na nttiha ngaca nttaxintaon icha importante, co ngaca Colecoe Dios. Vintte anto tsje chojni mé que hasta ni ná chojni coixinha coequin na, co tengá na joxon lontto roa, co cain na teyá na cajne ngá rá na. ¹⁰ Cain na tetoyao na co tendačo na:

Ján na chonda na iná vida naroaxin de ixin Dios

tti ttjen ngataha nttaxintaon importante

co de ixin Colecoe Dios.

¹¹ Co cainxin ángel de nttiha tatengattjen nttiha ngandanji tti veinticuatro nittetonha, co ngandanji tti nó cosa que techon cai. Co cain ángel mé vinttecjañantaha nontte ngaca nttaxintaon mé co joinchesayehe Dios. ¹² Cain ángel mé ndačo:

¡Amén! Para cainxin tiempo Dios de ján na jiquininxin

tsocoanxinhi, jiquininxin nohe cainxin, co jiquininxin que chojni sanjo na gracias ngain,

co jehe jiquininxin tsosayehe, co jiquininxin cain joachaxin co fuerza.

Amén.

¹³ Cottimeja ná de tti venticuatro nittetonha mé joanchianguina janha co ndačo:

—¿Quensen cain chojni jihi que tengá lontto roa co de ttinó joixin na?

¹⁴Janha ndattjan:

—Soixin noha,

Co jehe ndachjenji na:

—Cain chojni jiji tti ni anto tangui conhe na co jehe cain niyá ni joincheroaxin lonttoe conixin jní tti Colecoe Dios. ¹⁵Mexinxin jai jehe na te na ngandaxinhi Dios co nchesayehe na Dios de nchanho co de ttie ngain nchiandoha Dios. Co jehe Dios, tti retaha nttaxintaon yá, senda cain chojni yá. ¹⁶Cain chojni yá isenha na jinta ni jinda, ni irrochjanha na ni tanguiha tsonohe na ngandaohé soa, ¹⁷ixin tti Colecoe Dios que jí ngaca nttaxintaon mé tti senda jehe na, inchin tti ttingaria coleco dicao cuidado de ixin coe, co jehe sicao va ngain tti jíchinxin jinda que danjo iná vida naroaxin. Co Dios tti sinchexema ndacon cain jehe na.

8

Tti yatoxin sello conixin tti oro que chexin tsjoca

¹Are Colecoe Dios coinchje va tti yatoxin sello que jiyá xón mé, nttiha ngajni xonhi ruido vehe inchin rioho hora. ²Cottimeja janha vicon tti yáto ángel que tengattjen nttiha ngattoxon con Dios, co cain ángel mé vayé naná trompeta. ³Cottimeja janha vicon iná ángel conixin ná chi de oro que chexin tsjoca, co joiguengattjen ángel nttiha ngaca altar. Co vayé ángel mé anto tsje tsjoca, para sanjo cain tsjoca mé conixin cain joatotsenhe ñaoe cain chojni Dios nttiha ngataha altar de oro que jí nttiha ngaca nttaxintaon Dios. ⁴Nchin de tsjoca mé conixin cain tti joatotsenhe ñaoe chojni Dios cjoinhi de ngá rá ángel mé para ngattoxon con Dios. ⁵Cottimeja jehe ángel mé coá jehe chia que chexin tsjoca mé, co joinchecaon de xoittja que jí nttiha ngain altar mé co cjoa para ngataha nontte. Cottimeja coexinhi anto joatte, co anto vehe ruido, anto cjoa rayo, co soji coingui nontte.

Tti joiconhe are coyao trompeta

⁶Cottimeja tti yáto ángel que teyá tti yáto trompeta ovinnte listo para sanoa trompeta.

⁷Tti saho ángel vanoa trompeta, co vania ttoni co xohi que jittectjan jni. Cain mé vinttji para ngataha nontte co che ná tti ninxin parte de ngataha nontte, conixin ná tti ninxin parte de cain nttá, conixin ná tti ninxin parte de cain ca yoa.

⁸Tti yoxin ángel vanoa trompeté, co joiguetsiangui ngangui ndachaon ná cosa inchin ná jna jie que jiche conixin xohi. Co ná tti ninxin parte de ndachaon ndacjan nda jni. ⁹Co ná tti ninxin parte de cain cosa que techon ngangui nda ndavenhe, co ná tti ninxin parte de cain barco que jí ngain nda ndaxantte.

¹⁰Tti ninxin ángel vanoa trompeté, co ná conotse anto jie vetsingaxin va de ngajni, co jiche va conixin xohi. Co vetsinga va ngain ná tti ninxin parte de cain rio co cain tti techinxin jinda. ¹¹Co conotse mé vinhi va Tsja co ná tti ninxin parte de cain jinda mé ndacontsja nda. Co anto tsje chojni ndavintteguenhe na ixin vihi na jinda mé, que anto ndacontsja.

¹²Tti nonxin ángel vanoa trompeté, co conihí ná tti ninxin parte de nchanho, co cai ná tti ninxin parte de conittjao, co cai ná tti ninxin parte de conotse. Mexinxin ná tti ninxin parte de cain cosa mé ndaconaxin xehe, co cain mé vanjoha xoí ngoixin ná tti ninxin parte de nchanho ni de ttie.

¹³ Cottimeja janha tsjá co coian jindačo ná ángel que jitjaganga hasta ngosine ngajni co nichja sén, co ndačo:

—¡Anto tangui tsonhe cain chojni que te ngataha nontte are sanoa tti iní ángel trompeté!

9

¹ Are tti naonxin ángel vanoa trompeté, janha vicon ná conotse que xincanjinxin va de ngajni para ngataha nontte. Co conotse mé vayé va llavé tsaga anto nihnga. ² Cottimeja conotse mé vantté va jehe lugar mé co nttiha cjoinxin ná nchin anto jie inchin nchin que ttxin de ngain ná horno anto jie. Co nchin mé ndajoinchenaxin xehe nchanho co čhintto. ³ Co de ngain nchin mé vachjexin anto tsje coxoali que cjoaganga va ngataon nontte. Co cain coxoali mé vayé va joachaxin inchin joachaxin que chonda conttanchia nttihi ngataha nontte. ⁴ Co vitonhe va que xonhi sinchehe va ngain cain ca que te ngataha nontte, ni ná cosa yoa, ni ngain ná ntá yoa, sino que jehó sinchenihi va cain tti chojni que chondaha marca de selloe Dios ngain ntattjen. ⁵ Pero coaha va joachaxin de nasoenxon va chojni mé, sino que jehó sincheguetan va chojni mé tangui cuerpoe ngoixin naho conittjao. Co tti anto tsín na mé inchin ttinxin ná chojni are nehe ná conttanchia. ⁶ Ngain cain nchanho mé chojni sino na ndasenne na, pero čhoha senhe na. Masqui jehe na anto sino na ndasenne na, pero čhoha ixin la muerte satsjixin de ngain na.

⁷ Jehe coxoali mé te va inchin conxin que te listo para guerra. Ngataha já va tetaha ná cosa que te inchin ná corona de oro, co ngá con va te inchin ngá con chojni. ⁸ Co xajá va inchin xajá nčí, co neno va te xá neno coleón. ⁹ Co ngoi cuerpoe va tengá ná cosa inchin chia, co ruido que nchechjian nenehe va are tjaganga va inchin ruido que nchechjian tsje carroe conxin are ttinga carro para ngain guerra. ¹⁰ Chonda va nttané va xá nttané conttanchia que chonda nchaha. Co nttiha ngain nttané va chondaxin va joachaxin para ncheninxin va chojni ngoixin naho conittjao. ¹¹ Cain coxoali mé chonda va ná tti ttetonha ngain va co jehe mé tti ángel de ngain tti tsaga anto nihnga; co jehe ángel jihi dinhi de ngain nguigoa hebreo Abadón, co ngain nguigoa griego dinhi ángel jihi Apolión, co cayoi nombre mé rročo: tti nchexante cain cosa.

¹² Ojoexin tti saho cosa anto tangui, pero xa ditján iyó cosa tangui.

¹³ Are tti ángel incjaonxin vanoa trompeté, janha coian ná tté ángel que vachjexin de ngayé tti nó ntehe altar de oro que jí nttiha ngattoxon con Dios. ¹⁴ Co jehe tté ángel mé ndačo ngain jehe tti incjaonxin ángel que jiyá trompeta:

—Tonxindanguehe tti nó ángel que tečia te ngaca río Eufrates que anto jie.

¹⁵ Jamé xindanguehe jehe tti canoi ángel mé, para nagoenxon ná tti ninxin parte de cain chojni, ixin ángel mé ote listo para sinchehe jamé ngain hora mé, ngain nchanho mé, ngain conittjao mé, co ngain nano mé. ¹⁶ Janha coian quejanhi tsjexin xisoldadoe canoi ángel mé, co de tti xitetaha conxin, yó ciento de millón tsjexin xa.

¹⁷ Co jañá viconxin con janha cain conxin yá. Co xitetaha va, ngain pechoe xa tedicaoxin xa chia de ní color; jatse inchin xohi, co azul inchin ngajni, co sine inchin azufre. Co cain conxin mé techonda já va inchin já coleón, co de ngain rroha va tedačjexin xohi, co nchin, co azufre. ¹⁸ Tti

ninxin parte de cain chojni ndavintteguenhe na de ixin jehe tti ní tipo de castigo que tedačhjexin ngain rroha conxin, co castigo mé: xohi, co nchin, co azufre. ¹⁹ Ixin tti cjoayaxin cain conxin mé techonda va ngain rroha va co ngain nttané va. Nttané va chonda já xá conché, co, conixin nttané va mé goenxin va chojni.

²⁰ Pero tti ittoha chojni que xehe, tti nindavenha de ixin jehe chin jiji, nimé cointtoeha na de nchehe na cosa jianha que jehe na tenchehe na, ni cointtoeha na de nchesayehe na espíritu jianha, co cain ídolo de oro, de plata, de bronce, de xo, co de nttá. Co cain ídolo mé čhoha dicen, ni ttinha, ni čhjiha. ²¹ Ni cai cain chojni mé cointtoeha na de nadoenxon na chojni, ni de dantonga na chojni, ni de ncheyehe na iná nčí o iná xí, ni de ttehe na cosé iná chojni.

10

Angel conixin ná librochjan

¹ Cottimeja janha vicon iná ángel que chonda tsje joachaxin que jixincanjinxin de ngajni ngacjan ttjoi conixin ná conchecha ngataha já. Co ngá con ángel mé jitonguixian xá nchanho, co rotté inchin columna de xohi. ² Co ángel mé jiyá ná librochjan que jixangué. Co coín rotté lado jian ngataonhe ndachaon, co rotté lado cjon coín ngataha nontte. ³ Cottimeja ángel mé coyao sén inchin are soji tojiehe ná coleón. Co are jehe coyao, yáto tti dattehe nichja conixin tté jehe mismo. ⁴ Co después de que yáto tti dattehe mé nichja, janha rroquentaxin cain palabra mé, pero coian tté Dios desde ngajni que ndachjenji na:

—TtENCHJINHA cain jiji, co ndačhoha tti ndačo tti yáto dattehe yá, co ttentaxinha palabra yá.

⁵ Cottimeja jehe tti ángel que janha vicon tajingattjen de ngataonhe ndachaon co ngataha nontte, tsín rá lado jian para ngajni, ⁶ co joinchejurá de ixin tti jichon para cainxin tiempo, tti joinchechjian ngajni, nontte, ndachaon co cainxin cosa que jí ngain cain parte yá, co ángel mé ndačo:

—Itsončhjenha icha tiempo, ⁷ ixin are tsí tti nchanho que tti yatoxin ángel tsxinhi sanoa trompeté, are mé otsonhe tti anto jimao que xaxaon Dios desde are saho, inchin jehe ndačo ngain ninchehe xé, rročo ngain cain profeta.

⁸ Tti tté Dios que janha coian joixin de ngajni, cjan nichja nganji na janha iná co ndačo:

—Jaha ttji co ta tti librochjan que jixangué que jiyá ángel jiha tti jingattjen desde ngataonhe ndachaon co ngataha nontte.

⁹ Cottimeja janha cjoí ngain ángel mé para joiganchiá librochjan mé co jehe ndachjenji na:

—Jenhe, dayehe librochjan co jintte librochjan. De ngain rroha tsonoha anto dulce inchin tsjen, pero de ngaxinhi tsé anto ndatsontsja.

¹⁰ Cottimeja janha coá librochjan mé de ngá rá ángel mé co joine. Co de ngagaha rroha na, janha conona que anto dulce inchin tsjen, pero después que janha joine ndaconsja ngaxinhi na. ¹¹ Cottimeja ndachjenji na na:

—Jaha chonda que rocjan rrondache chojni iná tti ndačo Dios de ixin tsje rajna, de ixin tsje nación, de ixin tsje nguigoa co de ixin tsje rey.

11

Tti yó testigo

¹ Cottimeja janha vayá ná nttá que jí inchin ná nttá que xattechoaxin, co vitonna:

—Dingattjen co dattechoha nchiandoha Dios conixin altar cai, co ttequin quejanhi chojni nchesayexin Dios nttiha. ² Pero dattechoaha tti patio que jí ndoja de nchiandoha Dios, ixin mé ovayé chojni de icha nación, co nimé ni feo sinchehe ngain tti ciudad santa ngoixin cuarenta y dos conittjao. ³ Co janha rrorroanha yó testigona que rronichja ngain chojni de ixin janha ngoixin tti mil doscientos sesenta nchanho mé, co cayoi testigo mé sinttengá lontto ttie inchin lontto dinttengá chojni que ta joachjaon are ndadenhe ná nifamilié.

⁴ Jehe tti yó testigo mé tti yó nntaolivo, co tti yó candelero que te ngattoxon con Dios que ttetonha ngataha nontte. ⁵ Co si çhonja chojni sinao sinchenihi jehe testigo tehe, jehe de rroha sinttecjaxin xohi que ndatsjaga cain tti chojni que rroningaconhe. Co jañá chonda que senhe quexeho chojni que sinao sinchenihi testigo mé. ⁶ Jehe cayoi testigo jihi chonda joachaxin de tsejé ngajni para que irrochjeha çhin ngataha nontte ngoixin tiempo que jehe rronichja de ixin Dios. Co cai chonda joachaxin para que jinda tsoncjan nda jni, co para sincheguetan tangui cain chojni ngataha nontte conixin cain tipo de chin cainxin nttiha que jehe sinao. ⁷ Pero are jehe tsjehe xé, tti coxigo jianha tsajinxin va de ngain tti tsaga anto nihnga, co tsetocaho va jehe cayoi testigo mé, co jehe tsixinha ngain va. Jehe va tsjaya va co nasoenxon va jehe cayoi testigo jihi. ⁸ Co cuerpoe sinttji cuerpo ngá nttiha de tti ciudad que anto jie, tti cjoixin crucificado Cristo. Co ciudad mé ogoan inchin ciudad de Sodoma co nonttehe Egipto tti vehe joxon cosa jianha. ⁹ Co para ní nchanho co rioho, chojni de cain rajna, chojni de cain raza, chojni de cain nguigoa, co chojni de cain nación sicon na cuerpoe jehe cayoi testigo jihi, co tsançhjandaha na cayoi cuerpo jihi para que rroxavá. ¹⁰ Cain chojni que te ngataha nontte rroché na ixin ndasenhe cayoi testigo jihi, co anto rroché na que hasta rrorroenhe chó na regalo ná na co ná na ixin tti cayoi xi mé que vanichja de ixin Dios, ná cosa anto tangui para ixin jehe na. ¹¹ Pero después de tti ní nchanho co rioho mé, Dios joinchexechon cayoi xi mé, co vintteguingattjen xa iná, co cain chojni que vicon mé anto vintteçhaon na. ¹² Cottimeja jehe cayoi testigo mé vinttequinhi tté Jesucristo que joixin de ngajni co ndaço anto sén:

—Tani ra nttihi noi.

Cayoi testigo mé savinttecajín para ngajni ngacjan ná ttjoi co cain chojni que ningaconhe vicon na. ¹³ Co ngain rato mé anto soji coingui nontte, co ná tti ttexin parte de ciudad mé ndaxantte co yáto mil chojni ndavintteguenhe na ixin coingui nontte. Co ittoha chojni que xa xehe, joinchecoanxinhi na Dios que ttjen ngajni ixin anto vintteçhaon na.

¹⁴ Ojoexin tti yoxin cosa anto tangui yá, pero toin tsí tti ninxin.

Tti yatoxin trompeta

¹⁵ Tti yatoxin ángel vanoa trompeté co anto sén coinhi ni tté de tsje chojni que joixin de ngajni que ndaço:

Tti joachaxin para ttetonha ngataha nontte ojoiguehe para Dios conixin Cristo; co jehe Dios tti tsetonha para cainxin tiempo.

¹⁶ Cottimeja tti veinticuatro nittetonha que tatetaha na nttaxintaoen na nttiha ngattoxon con Dios, cainxin nimé vinttecjañantaha na nontte co joinchecoanxinhi na Dios. ¹⁷ Co ndaño cain nimé:

Chjaha ra gracias soixin

Dios que chonda cainxin joachaxin,

soixin tti ttjen jai, tti joarihi desde are saho, co soixin tti rrocjan sihi iná, chjaha ra gracias ixin soixin vayehe tti anto soji joachaxian co soixin ocoexinhi coetonha.

¹⁸ Chojni de cain nación ndavinttecoñao na,

pero ojoí nchanho que soixin sinchecastigá na,

co cai ojoí rato que soixin sinchejuzguehe cain chojni que ondavenhe, co rrochjehe ninchehe xá que nichja na de ixin soixin tti tequininxin na sayé na,

co cai tti chojni que coequininxin para ixin soixin, co tti chojni que nchesayehe nombrea,

masqui jehe na yeye na o nchinnchin na;

co joí tti rato que soixin sinchetján cain chojni que ncheyehe co nchetján icha chojni nttihi ngataha nontte.

¹⁹ Cottimeja ningoe Dios que jí nttiha ngajni xiré, co vicon ni tti cajón que jingá tti tratoe Dios que jí nttiha ngaxinhi nihngo. Co anto congúixin, co goan ruido, co vattehe, co coingui nontte, co anto vinttji ttoni.

12

Tti nchí conixin tti colantta jie de yáto já

¹ Cottimeja ngain ngajni cononxin señal anto jie jiji: ná nchí jisiamá ncha nchanho inchin ná vestido jingá ncha, conixin conittjao ngangui rotté ncha, co ngataha já ncha jitaha ná corona de tteyó conotse. ² Jehe nchí jiji jiyá ncha chjan, co jitoyacaho ncha dolor co jidetan ncha tangui ixin sincheconcjihi ncha chjan. ³ Cottimeja nttiha ngajni cononxin iná señal jiji: ná colantta jie co jatse va que jichonda va yáto já va co tte nttehe va co cada já va tetaha naná corona. ⁴ Conixin nttané va coingajinxin va ná tti ninxin parte de cain conotse que jí ngajni co cjoa va cain conotse mé para ngataha nontte. Co jehe colantta jiji tavengattjen va ngattoxon con jehe tti nchí que osincheconcjihi chjan, para rojine va xenhe ncha nttihi rroconcjihi xan. ⁵ Co nchí mé joincheconcjihi ncha ná xanxí, co xanxí mé xan tsetonhe cain nación inchin rrocji conixin ná nttacotto de chia. Cottimeja xenhe ncha mé vañjehe ncha xan para sacjoí xan para ngain Dios co ngain lugar tti jí nttaxintaoen Dios. ⁶ Co jehe nchí jiji sacoinga ncha para ngagaha jna. Nttiha Dios joinchecjienhe ncha ná lugar para que nttiha rrochjé na ncha sine ncha ngoixin mil doscientos sesenta nchanho.

⁷ Después vehe ná guerra nttiha ngajni, co arcángel Miguel conixin cain ángel de jehe coetocaho na colantta jiji conixin cain ángel de jehe va.

⁸ Pero colantta conixin cain ángel de jehe va coixinha joacha ngain guerra mé, co iveha lugar nttiha ngajni para ixin jehe colantta jiji conixin cain ángel de jehe va. ⁹ Co jañá sacjoixin de nttiha jehe tti colantta que anto jie, jehe tti jí desde anto tsje nano que dinhi inchínji co Satanás, tti ncheyehe chojni de ngoixin mundo. Jehe colantta mé conixin cain ángel de jehe va saxincanji para ngataha nontte.

¹⁰ Cottimeja janha coian tté ná ángel anto sén de ngajni que ndaño:

—Ojoí tiempo que Dios tsjenguijna chojni, co Dios ocjoago joachaxin que jehe chonda co osiquetonha Dios de ján na, co ocjoago joachaxin Cristoe Dios; ixin osajcoixin inchínji de nttihi, jehe mé tti tjanguihi cain chojni que ditticaon ngain Cristo, jehe tti vacjanguihi na de ttie co nchanho ngattoxon con Dios de ján na. ¹¹ Jehe cain nimé ocjoa na cha ngain coxigo yá de ixin jní Jesucristo, tti Colecoe Dios, conixin joajné Dios que jehe na ndache na icha chojni nttihi ngataha nontte, ixin jehe na x̄aonha na de ndavenhe na, sino que jehe na vintte na dispuesto de vintteguenhe na. ¹² Mexinxin jí razón que chaha jaha ngajni, co cain jaha ra que te ra nttiha. Pero anto tangui para ixin cain tti te ngataha nontte co cain tti te ngain ndachaon, ixin inchínji oxincanji ngayaha ra. Co jehe anto jitoñao ixin nohe que tsjeha tiempo dittoehe.

¹³ Co are coxigo mé vicon va que osaxincanji va ngataha nontte, jehe va coexinhi va joinchehe va feo ngain tti nchí que joincheconcjihi xanxichjan. ¹⁴ Pero jehe nchí mé vayé ncha yó nenechán coaguila yeye, para que nchao cjoaganga ncha para ngain tti lugar que vayé ncha ngagaha jna. Lugar mé cjin de ngain coxigo mé co nttiha sayé ncha tti sine ncha ngoixin ní nano co rioho. ¹⁵ Pero jehe coxigo mé cjoaxin va jinda de ngain rroha va para conchjan ná rio para que rroguetsiangui jehe tti nchí mé. ¹⁶ Pero nontte cjoenguijna jehe tti nchí mé ixin nontte xiré co nttiha saxincanji jehe tti río que coxigo mé cjoaxin va rroha va. ¹⁷ Mexinxin jehe va anto coñao va ngain tti nchí co sacjoi va joiquetocaho va tti icha chojni ncha que x̄a xehe, tti chojni que ditticaon cain tti ttetonha Dios co cain tiempo nchehe na sigue de nchehe na tti ndoa que ndačho Jesucristo.

13

Tti yó coxigo yeye co jianha

¹ Janha joaringattjen ngandehe ndachaon, co vicon cjoinxin de ngain ndachaon ná coxigo jie co jianha va que jichonda va yáto já va co tte ntehe va. Co cada ntehe va techonda naná corona co ngain cada já va techonda ná nombre que ncheofendé Dios. ² Jehe coxigo jianha que janha vicon, jí va inchin ná cotigre, co rotté va inchin rotté co-oso, co rroha va inchin rroha coleón. Co tti colantta jie joanjo va joachaxin ngain coxigo jihi para sinchehe va tsje cosa, co cai joanjo va nttaxintaoen va que tjago ixin chonda va joachaxin mé. ³ Ná de cain já jehe coxigo mé anto jie diconihi co chonda que ndarroguenhe va. Pero jehe herida mé ndacoñoenhe co chojni de ngoixin mundo anto x̄aon na co vitticaon na ngain jehe coxigo mé. ⁴ Co joinchesayehe na jehe colantta mé ixin joanjo va joachaxin ngain tti coxigo jianha, co cai joinchesayehe na tti coxigo jianha, co ndačho na:

—¡x̄onhi chojni chonda joachaxin inchin coxigo jie jihi, co x̄onhi chojni tsixinhi tsetocaho va!

⁵ Cai vayé coxigo mé joachaxin de nichja va inchin chojni orgulloso co para ndačho va cosa jianha de ixin Dios. Co vayé va joachaxin de coetonha va ngoixin cuarenta y dos conittjao. ⁶ Co janhi joinchehe coxigo mé: nichja va jianha de ixin Dios, de ixin nombré Dios, de ixin ningoe que jí ngajni, co de ixin cain cosa que jí nttiha ngajni. ⁷ Cai có va joachaxin de coetocaho va chojni Dios, hasta que cjoa va cha. Co cai vayé va joachaxin para ngain cain chojni de cain raza, de cain rajna, de cain nguigoa, co de

cain nación. ⁸ Jehe coxigo jianha mé joinchesayehe cainxin chojni que te ngataha nontte; jehó tti chojni que tetaxin nombré na ngain tti libro que desde are conchjian nontte jitaxin nombré cain chojni que chonda iná vida naroaxin, jehó chojni mé nijoinchesayehe na coxigo mé. Co jehe libro jihi jichonda Cristo, tti Colecoe Dios que ndavenxin ngataha nontte.

⁹ Si ðhonja chojni ttinxin jian, tsinhi tti ndaño jihi. ¹⁰ Tti chojni que ttiaxinhi icha chojni ngain cárcel, cain chojni mé chonda que siaxinhi na cai. Co tti chojni que nadoenxon iná chojni conixin espada, cain jehe na chonda que nasenxon na conixin espada cai. Mexinxin chojni Dios chonda que rrochonda na paciencia co sitticaon na jian.

¹¹ Después, janha vicon iná coxigo jianha que coajinxin va de ngadoho nontte. Jehe coxigo jihi jichonda va yó ntehe va inchin ntehe coleco, pero nichja va inchin colantta que chonda tsje já. ¹² Co jichonda va xajeho joachaxin que jichonda tti coxigo jianha que cjoinxin de ngain ndachaon, co de ngattoxon con jehe coxigo jihi vanchegonda va joachaxin jihi co joinchehe va para que nontte co cain chojni que te ngataha nontte sinchesayehe tti saho coxigo jianha que cjoinxin de ngain ndachaon co coxoenhe tti herida anto jie que vechonda. ¹³ Cai jehe tti coxigo que cjoinxin de ngadoho nontte joinchehe va jie milagro, co hasta vechonda va joachaxin de vanchexincanji va xohi de ngajni para ngataha nontte ngattoxon con cain chojni. ¹⁴ Co de ixin cain milagro jihi que jehe va coá va joachaxin de vanchehe va ngattoxon con tti coxigo que saho cononxin de ngain ndachaon, joincheyehe va cain chojni que te ngataha nontte, co coetonha va ngain na que sinchecjian na ná retratoe tti coxigo conixin já de ixin espada co masqui jamé, jehe va nchao vechon va. ¹⁵ Co tti coxigo que cononxinxin de ngadoho nontte vayé va joachaxin de chjé va vida jehe retratoe tti coxigo que cononxin de ngain ndachaon, para que retratoe co mé nchao nichja co coetonha va navenxon cain chojni que joinchesayehe retrato mé. ¹⁶ Co retrato jihi joinchehe icha, ixin coetonhe cain chojni desde yeye na co nchinnchin na, nirico co ninoa, o chojni libre o esclavo, cainxin na afuerza rrochonda na ná marca ngain rá na lado jian o nganito nttattjen na. ¹⁷ Co xonhi chojni nchao tsehna cosa ni sinchecji cosa si chondaha na marca mé o nombré coxigo mé, o quejanhi tsjexin nombré va. ¹⁸ Cain jihi rrogondehe joarrixaon; mexinxin tti chojni que ttinxin, nchao tsonohe quejanhi tsjexin coxigo jihi, ixin número mé rroño numeroe ná xí. Co número mé seiscento sesenta y seis.

14

Quexén tsje tti ciento cuarenta y cuatro mil chojni

¹ Después janha tsjá, co vicon jehe tti Colecoe Dios tajingattjen va ngataha tti jna que dinhi Sión. Co ngain jehe va te ciento cuarenta y cuatro mil chojni que tetaxin nganito nttattjen na nombré jehe va conixin Ndodé va. ² Cottimeja janha coian ná ruido que joixin de ngajni, que ruido mé inchin tti ruido que nchecjian tsje río co inchin are dattehe ngayé jna, co mé coinhi ni inchin are tsje chojni tedinga arpa. ³ Co tetsje na ná són naroaxin nttiha ngaca lugar tti jí nttaxintaoen Dios co nttiha ngattoxon con tti canoi cosa que techon, co ngattoxon con tti veinticuatro nittetonha que te nttiha cai. Ni ná chojni ðhoha coangui són mé, sino que jehó tti ciento cuarenta y cuatro mil chojni que vayé iná

vida naroaxin de ngayé cain chojni que te ngataha nontte. ⁴ Cain chojni jiji tti xonhi nchí ni xí joincheyehe, mexinxin vittohe joxon chojni jian co ditticaon na cainxin tti tteonha jehe tti Colecoe Dios. Jehe na vayé na iná vida naroaxin co mexinxin vačhjeyexin na de ngayé cain chojni ngataha nontte para te na inchin ná regalo anto jian para ixin Dios co para ixin jehe Colecoe Dios. ⁵ Vinchoeha ni ná mentira ngain rroha na; cain chojni mé joxon chojni jian ngattoxon con Dios.

Tti joajna que joiaho tti ní ángel

⁶ Cottimeja janha vicon iná ángel que jitjaganga ngosine ngajni co jichonda tti jian joajné Dios que ndoa para cainxin tiempo co que danjo iná vida naroaxin. Co ángel mé cjoí joindache chojni que te ngataha nontte; chojni de cainxin nación, de cain raza, de cain nguigoa, co de cain rajna. ⁷ Co ángel mé jindačo sén:

—Ķagonhe ra jehó Dios co jehó jehe tti nchecoanxinhi ra ixin ojoí hora que jehe sinchejuzguehe cain chojni. Nchesayehe ra tti joinchechjian ngajni, nontte, ndachaon, co cain parte tti tečhinxin jinda.

⁸ Cottimeja rroé iná ángel, que ndačo:

—Ondaxante tti ciudad jie que vinhi Babilonia, ixin jehe tti joinchecoan chojni de cainxin nación conixin tti vino que jehe joinchechjian, co jiji rročo ixin joinchecoenhe chojni para vechonda na icha nchí que jeha nchíchihi na.

⁹ Cottimeja rroé tti ninxin ángel, que jindačo sén:

—Si čhonja chojni nchesayehe tti coxigo jianha conixin retratoe va co sittoexin na senganito marqué va nganito nttattjen na o nganito rá na, ¹⁰ chojni mé chonda que sayé tti anto soji castigo que ttixin de ngain Dios ixin Dios tsoňao. Co castigo jiji rročo ixin chojni mé rroche na ngain xohi conixin azufre ngattoxon con cain ángel Dios conixin Cristo. ¹¹ Co nchin que tsjinxin de ngain cuerpoe chojni mé tsajinhi nchin mé para cainxin tiempo, co xonhi tiempo sinchejogaha cuerpoe cain chojni mé ixin rroche na de nchanho co de ttie. Jamé tsonhe cain tti chojni que nchesayehe tti coxigo jianha conixin retratoe va, o dayé na marca de nombré va. ¹² Mexinxin cain tti chojni que tequininxin para ixin Dios co ditticaon na nchehe na tti tteonha Dios co tti tteonha Jesús, chojni mé rrongondehe na paciencia.

¹³ Cottimeja janha coian tté ná ángel que joixin de ngajni co ndachjenji na:

—Janhi cjin: “De nntihi pa ndaha anto čhjoin tsonohe cain tti chojni que xa ditticaon Jesucristo are ndasenne na.” “Ján”, ndačo Espiritu Santo, “ixin sinchejogaha na de ngain xé na, co cain tti jian que jehe na joinchehe na, mé tti tsonchiencaho na ngain Dios.”

Tti cosecha que ttjinxin de ngataha nontte

¹⁴ Cottimeja janha tsjá co vicon ná ttjoi roa, co ngataha ttjoi mé tajitaha ná tti jí inchin ná chojni. Jichjinga ná corona de oro co jiyá ná joso anto yao. ¹⁵ Co vačhjexin de ngaxinhi nihngo ngajni iná ángel, que jindačo sén ngain jehe tti jitaha ttjoi mé:

—Ķanguihi josoa co ttjejo cosecha ixin ojoí hora co cosecha ngataha nontte joexin cha cosecha.

¹⁶ Cottimeja jehe tti jitaha ttjoi mé joinchegatto josoe ngataha nontte, co joatse tti cosecha que jí ngataha nontte.

¹⁷ Cottimeja iná ángel vačhjexin de ngaxinhi nihngo que jí ngajni; cai ángel mé jidicao ná joso anto yao. ¹⁸ Co vačhjexin de ngain altar nttiha iná ángel, que chonda joachaxin para ngain xohi, co ángel jiji vayé jehe tti ángel que jichonda tti joso anto yao co ndačo:

—Xanguihi josoa co ttjejo cosecha de uva que jí ngataha nontte, ixin ojoexin dichje uva.

¹⁹ Co jehe ángel mé joinchegatto josoe ngataha nontte, co joatse cosecha de uva que jí ngataha nontte. Co coenga cain uva mé ngá ná tanque jie tti nchao seninxin na ttouva, co jiji rročo tti castigo anto soji que rrorroanha Dios. ²⁰ Cain ttouva jiji ndoja de ngain ciudad veninxin na tto, co de ngain tanque que veninxin na tto, nttiha vačhjexin jni, co jni jiji cjoinxin jni de ngataha nontte hasta tti noinxin dicaoxin conxin frenoe va, co trescientos kilómetro cjinxin vingo jni jiji.

15

Tti yáto ángel co tti yáto último cosa tangui para ixin chojni

¹ Cottimeja janha vicon ngajni iná señal jie co hasta joinchexaon na. Janha vicon yáto ángel conixin tti yáto último cosa tangui, co cosa mé tsjexinxin corajé Dios.

² Cai vicon xá ná ndachaon que nchao dicondoxin ni que jittecjan nda mé xohi. Co tti cain chojni que coixinhi cjoa cha ngain tti coxigo jianha conixin retratoe va, conixin tti quejanhi tsjexin nombré va cain chojni mé tatengattjen na ngandehe ndachaon mé conixin arpa que Dios joanjo ngain na. ³ Co tetsje na ná són inchin soen Moisés tti cjoí ninchehe xé Dios, co inchin soen Colecoe Dios; co són mé ndačo son: Anto importante co čhjoin cainxin cosa que soixin joinchehe, oh Dios, soixin tti chonda cain joachaxin;

nao co anto ndoa cain nttiá soixin, co soixin tti Rey para cainxin nación.

⁴ ¿Quensen rrožagoanha soixin?

¿O quensen sinttacoanxianha soixin?

Ixin jeho soixin tti anto santo,

co tsí chojni de cainxin nación para sinttacoanxinha na, ixin jehe na ovicon na tti jian que soixin nchehe.

⁵ Después de cain jiji, janha tsjá, co vicon tti nihngo que jí ngajni xiré, tti vechjianxin tti yó tabla que vetaxin tti tte mandamiento que coetonha Dios. ⁶ Co de ngain lugar mé vačhjexin jehe tti yáto ángel que sasicao tti yáto cosa tangui ngataha nontte. Co ángel mé tengá lontto anto fino co hasta tetonguixima lontto mé; xonhi jinche dica lontto mé. Co tettedonga cinturón de oro ngain pechoe. ⁷ Cottimeja ná tti nó cosa que techon joanjo ngain cada tti yáto ángel mé naná vaso de oro, tecaon de tti castigo que anto soji que ttixin de ngain Dios, tti jichon para cainxin tiempo. ⁸ Co jehe lugar mé ndacaon de nchin ixin Dios anto jian co chonda cain joachaxin. Co xonhi quensen nchao joixinhi nttiha hasta joexinja tti yáto cosa tangui que joicao tti yáto ángel.

16

Tti vaso de castigo

¹ Cottimeja janha coian tté Dios anto sén que vačhjexin de ngaxinhi que jí nihngo nttiha que ndačo ngain tti yáto ángel:

—Ttji ra co ttintjtjtte ra tti anto soji castigoe Dios que jí ngain tti yáto vasoa ra.

² Tti saho ángel cjoí co cointtjtjtte tti jiria vasoe ngataha nontte, co cainxin chojni que techonda marqué tti coxigo jianha, co nchesayehe na retratoe va, cain chojni mé vačhjema na tton anto feo co anto coín na.

³ Tti yoxin ángel cointtjtjtte tti jiria vasoe ngataonhe ndachaon, co jinda mé cjan nda inchin jní chojni que ndadenhe, co ndavenhe cain cosa que techon ngangui jinda mé.

⁴ Tti ninxin ángel cointtjtjtte tti jiria vasoe ngataonhe cain río co cain tti tetinxin jinda co cain jinda mé ndacjan nda jni. ⁵ Cottimeja janha coian ndačho tti ángel de jinda:

—Soixin joinchehe inchin jiquinixin ixin joinchejuzgá jañá, oh Dios santo, soixin que rrihi jai co joarihi are saho. ⁶ Ixin chojni jianha coingo na jní tti chojnia soixin, tti cain chojni que jian nichja de ixin soixin, co jai chojni jianha soixin joincheguihi na jni, ixin jamé tequinixin na.

⁷ Co cai coian nichja ná ángel desde ngain altar co ndačho:

—Ján, oh Dios, soixin que chonda cain joachaxin, joinchejuzguehe cain chojni yá ndoa inchin tequinixin na, co nao joinchejuzguehe na.

⁸ Tti nonxin ángel cointtjtjtte tti jiria vasoe ngataha nchanho, co nchanho vayé joachaxin de cjoaga chojni conixin xoí nchaon. ⁹ Co cainxin chojni anto feo che na. Pero jehe na coentoxinha na de tti jianha que jehe na tenchehe na, ni joinchecoanxinha na Dios, sino que ndačho na palabra jianha para ixin Dios, tti chonda joachaxin para ngain cain cosa tangui jihi.

¹⁰ Tti naonxin ángel cointtjtjtte tti jiria vasoe ngataha ntaxintaon tti coxigo jianha, co tti jehe va vaquetonha va ndaconaxin xehe. Co chojni anto coín na hasta joinchje neje na de ixin tti coín na. ¹¹ Pero masqui jamé cointtoeha na de joinchehe na cosa jianha que vanchehe na, sino que ndačho na palabra jianha para ixin Dios que ttjen ngajni; nichja na jañá ixin jehe na anto coín na.

¹² Tti incjaonxin ángel cointtjtjtte tti jiria vasoe ngain tti río anto jie que dinhi Eufrates, co jinda de ngain río mé ndaxema nda co xiré ná nttiha para ixin vatto tti rey que vinttequixin de ngain lado tti čhinxin nchanho.

¹³ Cottimeja janha vicon joí ní espíritu jianha. Ná vačhjexin de ngain rroha tti colantta que chonda tsje já, co iná vačhjexin de ngain rroha tti coxigo jianha, co tti ninxin espíritu jianha mé vačhjexin de ngain rroha tti ndačho ixin nichja joajné Dios pero ndoaha. Co canio espíritu jianha mé te xá corrana. ¹⁴ Jehe canio espíritu jihi, espiritue demonio que nchehe milagro, co vagačhje para joatse cain rey de ngoixin mundo para guerra ngain nchaon Dios, tti chonda cainxin joachaxin; co are mé jehe Dios tsjago joachaxin mé. ¹⁵ Co Cristo ndačho: “Tsjexin ra, janha sihi anto daca inchin ná xichehe. Anto čhjoin para ixin tti chojni que cain tiempo te listo para que tsí nchanho mé, co jamé chojni mé inchin tti chojni que ttenchjinha lonttoe co jamé xonhi tiempo čhji na ttolocho na co xonhi chojni nchao dicon cuerpoe na.” ¹⁶ Cottimeja tti ní espíritu jianha mé joatse cain rey que ttetonha ngataha nontte para ngain lugar que dinhi ixin nguigoa hebreo Armagedón.

¹⁷ Tti yatoxin ángel cointtjtjtte tti jiria vasoe ngataonhe čhintto. Co desde ngaxinhi nihngo que jí ngajni, co de ntaxintaon Dios vačhjexin tté Dios co ndačho sén:

—Ojoexin cain.

¹⁸ Cottimeja conguíxin cain lado, co anto goan ruido, co anto joatte, co coingui nontte anto soji que xonhi tiempo coingui nontte jamé desde que chojni vehe ngataha nontte. ¹⁹ Co tti ciudad que anto jie vichjenga hasta ní parte, co cain ciudad de ngoixin mundo ndaxantte ciudad. Co Dios xaxaon tti ciudad anto jie que dinhi Babilonia para que vayé ciudad mé tti castigo anto soji que Dios joanjo ixin jehe coñaöhe ciudad mé. ²⁰ Cain isla co cain jna ndavinttegutján. ²¹ Cai vinttjixin de ngajni para ngataha nontte ttoni anto yeye que yexin hasta cuarenta kilo. Co chojni ngataha nontte nichja na jianha de ixin Dios ixin vinttji ttoni mé, ixin mé ná castigo anto soji para ixin jehe na.

17

Castigo que vayé ciudad jianha

¹ Cottimeja joí ná de tti yáto ángel que chonda tti yáto vaso, co ndachjenji na jianha:

—Xacoi, co tsjagoha tti castigo que sayé tti nchí que nchecji cuerpoe ngain icha xí, rrocho tti jie ciudad jianha que tají ngandehé ndachaon. ² Cain rey que ttonha ngataha nontte joinchehe cosa jianha ngain ciudad mé, co cain chojni que te ngataha nontte ndavichoe na de ixin cosa jianha que nchehe chojni ngain ciudad mé.

³ Cottimeja are janha xa vicon tti cjoagohna Espíritu Santo, ná ángel sacjoinha para ngaha jna co nttiha viconxin ná nchí que jitaha ncha ná coxigo jianha co jatse va. Co ngoixin coxigo mé jitsama va de nombre feo para ixin Dios. Co jichonda va yáto já va co tte ntehe va. ⁴ Jehe nchí jiji jingá ncha lonto morado co jatse, co ditsonji ncha de oro, conixin xo que anto fino, co perla. Co jiyá ncha ná vaso de oro jicaon de cain cosa feo co jianha que nchehe ncha. ⁵ Co nganito nttattjen ncha jitaxin ná nombre que chojni xa chonxinha co ndacho: “Tti jie ciudad de Babilonia, tti cjoí inchin janné cain nchí que nchecji cuerpoe ngain icha xí, co de cain cosa jianha ngataha nontte.” ⁶ Cottimeja vicon jian que nchí jiji ndadicoan ncha conixin jní chojni Dios, tti chojni que nagoenxon na ixin cjoí na testigoe Jesús. Co are janha vicon yá, anto goan na admirado. ⁷ Cottimeja tti ángel que cjoagohna jiji, ndachjenji na:

—¿Quedonda rridoan admirado? Janha tsjagoha jaha quehe rrocho tti nchí yá, que mé jima jai; co sinttanoha quehe rrocho tti coxigo jianha que jitaha ncha, tti coxigo que chonda yáto já co tte ntehe. ⁸ Tti coxigo jianha que jaha vicon, yá ná coxigo que vechon are saho, pero jai coxigo yá ijichonha va. Pero masqui jamé, icha saho que jehe va ndasenne va para cainxin tiempo, jehe va tsajinxin va de ngá tsaga anto nihnga. Cain chojni que te ngataha nontte co tetaxinha nombré na ngain tti libro tti tetaxin nombré cain chojni que chonda iná vida nroaxin, cain tti chojni que tetaxinha nombré nttiha desde are conchjian nontte jiji, cain chojni jiji soan na admirado are sicon na coxigo jianha mé que vechon, co jai ijichonha va, pero que xa rrocjan va tsí va iná.

⁹ Nttihi jinichja nchion para ixin tti chojni que nchao ttinxin: Tti yáto já va, mé rrocho tti yáto jna que ciudad jie yá jitaha. ¹⁰ Co cai tti yáto já va yá rrocho yáto rey. Naho de tti rey yá ojoexin coetonha na, co ná de jehe rey yá jittetonha jai, co iná xa ttiha. Co are tsí tti último rey, jehe mé tsonchjenha tsje tiempo. ¹¹ Tti coxigo jianha que vechon are saho co

jai ijichonha va mé tti jninxin rey, masqui cai jihi iná de tti yáto rey, co después ndasitján para cainxin tiempo.

¹² Co tti tte ntehe va que jaha vicon, mé rrocho tti tte rey que xa ttexinha ttetonha; pero cain jehe sayé joachaxin de rey para jehó nchion tiempo. Co jehe na tsetonha na junto conixin tti coxigo jianha mé. ¹³ Jehe tti tte rey jihi te de acuerdo, co sanjo na joachaxin mé ngain tti coxigo jianha. ¹⁴ Co tsetocaho na Colecoe Dios, pero Coleco mé tsixinhi va sacha va ngain cain rey mé conixin ngain jehe coxigo jianha, ixin jehe Coleco tti ttetonha cainxin cosa co cain chojni, co jehe tti Rey de cainxin rey. Co cain chojni que te ngain jehe, mé Dios ndache na ixin tsí na ngain jehe, ixin jehe coinchiehe na; co cain tiempo ditticaon na jian ngain Dios.

¹⁵ Co ángel ndachjenji na cai:

—Cain ndachaon que jaha vicon tti jindehe tti nchí que rrocho tti jie ciudad cain ndachaon yá rrocho cain rajna, cain chojni, cain nguigoa, co cain nación. ¹⁶ Co tti tte ntehe va que jaha vicon co tti rrocho tte rey, cain yá tti rroningaconhe nchí jitaha va, co tsinttohe na ncha jehó ncha co ttolochó ncha; co sine na cuerpoe ncha, co tsjaga na ncha ngain xohi. ¹⁷ Jamé tsonhe tti ciudad mé ixin Dios coín ngain ansén tti tte rey yá para que sinchehe inchin rinao Dios, mexinxin jehe na vintte na de acuerdo para joanjo na joachaxin de rey ngain tti coxigo jianha hasta que tsoenja tti ndacho Dios. ¹⁸ Co tti nchí que jaha vicon, mé tti ciudad importante que ttetonha cainxin rey de ngoixin mundo.

18

Are xantte ciudad de Babilonia

¹ Después de cain jihi, janha vicon iná ángel que jixincanjinxin de ngajni conixin tsje joachaxin, co ngoixin ngataha nontte vingasantaha de ixin chíxo que joiaho ángel mé. ² Co jitoyao soji co ndacho:

—Ovetsinga Babilonia, tti ciudad anto importante, co jai ndacjan nchiandoha demonio, co cuevé cainxin clase de espíritu jianha, co caqué cain conttoa ttjoaha co feo. ³ Ixin chojni de cainxin nación ndavichoe na de ixin tti jianha que nchehe chojni de ngain ciudad mé, co cain cosa jianha mé inchin ná vino que nchecoan chojni mé, co cainxin rey de ngoixin mundo joinchehe na joxon cosa jianha ngain ciudad jihi, co xicomerciante de ngoixin mundo ndacjan xa rico de ixin cain cosa rentte que vaquehna ngain ciudad mé co vanchecji ngain icha chojni.

⁴ Cottimeja coian tté Dios que joixin de ngajni co ndacho:

—Dathjexin ra de ngain ciudad yá, jaha ra xo chojnina janha, para que sincheha ra tti jianha que nchehe icha chojni de ngain ciudad yá, ni rrotseha ra castigoe na. ⁵ Ixin tti jianha que jehe na tenchehe na, anto ndacotsje co vixintja chó co joiji hasta tti ngajni, co Dios xaxaon co nichja de ixin cain tti jianha mé que jehe na tenchehe na. ⁶ Danjo ra ngain ciudad yá inchin jehe joanjo ngain icha chojni, co ttjenguehe ra ciudad yá hna doble de tti jehe joinchehe nganji ra. Co ttinttecyan ra ná tti sihi yó nttiha icha soji que tti jehe ciudad yá cointtecyan para icha chojni. ⁷ Inchin chjoinxin que conohe ciudad yá co chjoin que vehe, jamé tsjexin dolencia co tangui nchegetan ra ciudad yá, ixin ndacho ngain ansén: “Nttili tarrihi janha inchin ná reina; janha jeha ganha na, ni xonhi tiempo setan tangui.” ⁸ Mexinxin ngain nacoa nchanho, tsí cain castigoe ciudad yá: jehe ndasenne, co tsa joachjaon, senhe

jintta co rroche conixin xohi, ixin Dios tti jichonda cain joachaxin jaña joinchecondená ciudad yá.

⁹ Cain rey de ngoixin mundo tti joinchehe jianha ngain ciudad yá co ché, cain rey mé rrotsjanga co tsa joachjaon de ixin ciudad yá are jehe sicon tsajinhi nchin are rroche ciudad yá. ¹⁰ Cjin sintte cain rey mé ixin rrořagoen castigo que sayé ciudad yá co rrondačo:

—¡Ay! ¡Anto tanguí para ixin jaha, ciudad que anto jie Babilonia, ciudad que chonda anto joachaxin! Ixin ngain nacoa rato joí cain castigoa.

¹¹ Cai cain xicomerciante de ngoixin mundo rrotsjanga xa co tsa xa joachjaon de ixin tti tsonhe jehe ciudad yá, ixin iseha quensen tsené xa carga que tsiaho xa. ¹² Inchin carga de oro, de plata de xo anto fino, de perla, de manta fino que dinhi lino, de seda de color morado co jatse; cai de cain clase de nttá que ĉhjoin xajni, de cain cosa que diconchjian joxon marfil, de nttá que anto rentte, de bronce, de hierro, co de marmol, ¹³ co carga de canela co icha ca que ĉhjoin xajni, tsjoca, mirra, perfume, vino, aceite, harina fina, trigo, co cai coxigo que tama, coleco, conxin, carro, co hasta chojni vanchecji xa para vaguittohe na de esclavo. ¹⁴ Cain xicomerciante mé rrondačo xa ngain ciudad jihi:

—¡Chondaha cain cosa ĉhjoin que anto vanttařoxinha, co nda-joinchetján para cainxin tiempo cain cosa rentte co cain cosa que anto jian que joarichonda!

¹⁵ Cain tti chojni que vanchexin negocio de ixin cain cosa yá co ndacorrigo na de ixin ciudad yá sinttengattjen na cjin de jehe ciudad, ixin rrořagoen na tti castigo que sayé ciudad yá co rrotsjanga na co tsa na joachjaon, ¹⁶ co rrondačo na:

—¡Ay! ¡Anto tanguí para ixin ciudad que anto jie vehe! Ciudad yá vehe inchin ná nčí que vengá lonto fino conixin lonto de color morado co jatse, co vetsonji ncha de oro, co de xo que anto fino conixin perla. ¹⁷ ¡Co ngain nacoa rato ndajoexin tti anto tsje cosa rentte que vechonda ciudad yá!

Cainxin xicapitán de ngain barco conixin cain chojni pasajero conixin cain ximarinero, co cain chojni que nchehe xa ngain ndachaon, tavinttengattjen na cjin, ¹⁸ co are vicon na nchin que jittjinxin de ngain xohi que jichexin ciudad yá, jehe na coyao na co ndačo na:

—¿Quexehe iná ciudad vehe icha importante inchin ciudad jihi?

¹⁹ Co de ixin joachjaon que coá na cointtjitte na jinche já na, co tsjanga na, coá na joachjaon, coyao na, co ndačo na:

—¡Ay! ¡Anto tanguí para ixin tti ciudad que anto jie vehe! ¡Conixin cain cosa rentte que vechonda ciudad yá corricoxin cain xí que chonda xa barco ngain ndachaon! ¡Co ngain nacoa rato ndaxante ciudad yá!

²⁰ Pero cain jaha ra xo te ra ngajni, co jaha ra xo cjoí ra representanté Jesucristo, co jaha ra xo nichja ra joajna que dayehe ra de ngain Dios, co cain ra xo chojni Dios, cain jaha ra mé chaha ra ixin ciudad yá goan condenado co Dios joinchehe jie para ixin jaha ra.

²¹ Cottimeja ná ángel que chonda tsje joachaxin tsín ná xo, co xo mé jí xo inchin ná xochin jie co joancahngui xo ngangui ndachaon, co ndačo:

—Cai janhi setsiangui Babilonia, tti ciudad anto jie, co iřonhi tiempo rrocjan ra sicon ra ciudad iná. ²² Iřonhi tiempo rrocjan tsinhi ni ngá nttié ciudad mé soen arpa, flauta, co trompeta. Ni iseha ngain ciudad mé ni ná chojni que chonxin ni ná tipo de xa, ni itsinha ni tti ruido que

nchechjian xottja ngataha xochin. ²³ Ni isingasanha ngain ciudad yá ni ná xoi lámpara co ixonhi tiempo tsinhi ni tti ruido de tti quié chojni que tottehe. Jamé tsonhe masqui xicomerciante que vinte ngain nttiha are saho vechonda anto tsje joachaxin, co masqui ciudad yá joincheyehe chojni de ngoixin mundo conixin joattosohe.

²⁴ De ngain ciudad yá vinchoexin jní chojni que nichja de ixin Dios, co jní chojni Dios, co jní cain chojni que vinttegoen na ngoixin ngain mundo jihi de ixin causexin Dios.

19

¹ Después de cain jihi, janha coian tté tsje chojni que joixin de ngajni que ndačo soji:

¡Nttocoanxini na Dios! Dios de ján na tti danjo iná vida naroaxin, co jehe chonda cain gloria co cain joachaxin,

² ixin jehe nchejuzgá inchin jiquininxin, co ndoa tti jehe nchejuzgá; ixin jehe joinchecondená tti ciudad jie co jianha, tti joincheconcaxa ngoixin mundo de ixin tti jianha que jehe joinchehe; Dios joinchecastigá ciudad mé ixin jehe vantsjehe vidé ninchehe xé jehe.

³ Cottimeja cjan cain chojni mé ndačo na iná:

—¡Nttocoanxini na Dios! Ixin tti nchin de ciudad mé xonhi tiempo tasehe de tsjinji nchin mé.

⁴ Co tti veinticuatro nittetonha co tti nó cosa que techon vinttejañantaha nontte co joinchecoanxini Dios que retaha nttaxintaoen, co vinttendačo na:

—¡Amén! ¡Nttocoanxini na Dios!

⁵ Cottimeja coinhi ni ná tté ángel que joixin de ngaca nttaxintaoen Dios que ndačo:

Nchecoanxini ra Dios de ján na
cain jaha ra xo nchehe ra xé
co xagonhe ra jehe
masqui nchinnchin ra o yeye ra.

Tti quiai are Jesucristo tsottehe

⁶ Co cai coian ná cosa que inchin tté tsje chojni co inchin are daxoin jinda de tsje río, co inchin are soji joattehe, co cain tté chojni mé ndačo: ¡Nttocoanxini na Dios! Ixin ocoexini coetonha Dios de ján na tti chonda cainxin joachaxin.

⁷ Cainxin na rrochá na, anto rrochá na co sonttosayehe na Dios mé, ixin ojoí tti nchanho que tsottehe Jesucristo, tti Colecoe Dios. Co čihi Jesucristo ojí ncha listo,

⁸ co jehe nchinovia mé vayé ncha joachaxin de vengá ncha tti lontto de ná manta anto fino que dinhi lino; co xonhi mancha chonda lontto mé, co hasta jitonguixima lontto.

Ixin jehe tti lino fino mé rročo tti vida nao que chonda cain chojni Dios.

⁹ Cottimeja jehe ángel mé ndachjenji na janha:

—Jaha ttentaxin janhi: “Anto čjoin para ixin cain tti chojni que Dios nichjé ixin tsji ngain quiai tti tsottehe Jesucristo, tti Colecoe Dios.”

Co ndachjenji na ángel mé:

—Cain jihi palabra ndoa que ndačo Dios.

¹⁰ Janha joarittoxin nttajochjihna ngaca rotté ángel para rrojinttsayá, pero jehe ndachjenji na:

—Ncheha yá, ixin janha jecho ná ninchehe xé Dios, jañá inchin jaha conixin cain chojni que dittacon cain tiempo tti ndoa que cjoago Jesús. Mexinxin jaha nchesayehe jecho Dios.

Ixin jehe tti joajna ndoa yá que cjoago Jesús, mé tti nchenichja cain chojni Dios joajné jehe.

Tti jitaha conxin coroa

¹¹ Cottimeja vicon ngajni jixangué co cononxin ná conxin roa, co tti jitaha va dinhi: jehe tti nchehe xé Dios conixin ansén, co tti ndoa. Ixin jehe ttetonha co tteto ngain guerra pero nao inchin jiquininxin. ¹² Jmacon chojni mé congúxin inchin neje xohi, co ngataha já jidicaoxin tsje corona, co jitaxin ná nombre nganito que jecho jehe chonxin nombre mé. ¹³ Chojni mé jingá ná lontto que diguingaxin jni, co nombré chojni mé, mé tti Palabré Dios. ¹⁴ Co terroé xisoldado de ngajni, tengá xa lontto de lino anto fino, co roa lontto mé co xonhi jinche yá lontto, co tetaha xa joxon conxin coroa. ¹⁵ Co jehe tti dinhi Palabré Dios, mé de ngain rroha jidachjexin ná espada anto yao, para sincheninxin chojni de cainxin nación; co tsetonhe cain nación jiji inchin conixin ná nttacotto de chia. Co jehe sinchejuzguehe cain nación jiji inchin tti deninxin ttouva conixin rotté, co jehe mé sincheguihi cain nación tti vino que sachjenguixin ttouva, pero mé rrocho que jehe tti sinchegayé na tti castigo anto soji que ttixin de ngain Dios tti anto doñahe na co tti chonda cainxin joachaxin. ¹⁶ Co nganito tti manta que jitsá chojni mé, co nganito rotté tetaxin nombre jiji: “Rey de cainxin rey, co tti Ttetonha de cain tti ttetonha.”

¹⁷ Cottimeja janha vicon ná ángel que tajangattjen ngataha nchanho, co coyaotte anto soji ngain cain conttoa que tjanganga para noi, co ndacho:

—Xacoi ra co xatte ra para ngain tti cena de Dios, ¹⁸ para sintte ra nntahe cain rey, co nntahe cain xigeneral, co nntahe cain xí chintto, co nntahe conxin, conixin nntahe xitetaha va, co nntahe cain chojni masqui chojni que te libre o esclavo, co de chojni nchinnchin co yeye.

¹⁹ Cottimeja janha vicon tti coxigo jianha conixin cain rey que ttetonha ngataha nontte, conixin cain xisoldadoe rey mé. Cain na xatte na para tsetocaho na jehe tti jitaha conxin coroa conixin cain xisoldadoe. ²⁰ Jehe tti coxigo jianha mé viaxinhi va ngain cárcel, conixin tti vandacho ixin jehe ná tti nichja joajna que vagayé de ngain Dios, pero jeha ndoa. Co jehe mé tti joinchehe tsje milagro ngattoxon con coxigo mé. De ixin jehe cain milagro mé, jehe tti jeha ndoa tti nichja mé, joincheyehe cain tti chojni que vittoexin coá marqué coxigo jianha co joinchecoanxinhi na retratoe va. Cottimeja jehe coxigo jianha mé conixin jehe tti jeha ndoa tti nichja, jamé techon savinttetsingangui tti xohi que jichexin conixin azufre. ²¹ Co tti icha chojni venxin na conixin tti espada que vachjexin de ngain rroha jehe tti jitaha conxin coroa, co cainxin conttoa hasta cojexin va nntahe cain chojni mé.

20

Tti mil nano

¹ Después janha vicon ná ángel que jixincanjinxin de ngajni conixin llavé tti tsaga anto nihnga co jiyá ná cadena anto jie. ² Jehe ángel jiji tse jehe tti conché mé, tti conché que ovehe desde sé co jehe mé tti inchinji co dinhi Satanás. Co ángel coiaxin va conixin cadena mé para mil nano. ³ Co

joancá va ngain tti tsaga anto nihnga, co nttiha coiaxinhi va. Co cointtohe ná sello ngain puerté tsaga mé para que isincheyehe va chojni de cainxin nación hasta que sattoja mil nano. Co después de tti mil nano mé, chonda que rroxindanguehe va nchion tiempo.

⁴ Cottimeja vicon tti tsje nttaxintaon importante, co nttiha tatetaha chojni que vayé joachaxin para sinchejuzgá. Cai janha vicon almé cain tti chojni que čhinji já ixin ndache na chojni tti joajné Dios que cjoago Jesús. Cain chojni mé joinchecoanxinha na tti coxigo jianha ni retratoe va ni vittoexinha na coá na marqué va nganito nttattjen na o nganito rá na. Janha vicon xechon cain chojni jihi co jehe na conixin Jesucristo coetonha na para mil nano. ⁵ Chojni mé tti saho chojni que rroxechon. Pero tti ni icha que vintteguenhe ixechonha na hasta después de tti mil nano mé. ⁶ ¡Anto čhjoin co jian tequininxin para ngain Dios cain tti chojni que rroxechon ngain jehe tti saho tiempo que rroxechon chojni! Tti yoxin nttiha que ndadenhe ni ichondaha ni ná joachaxin ngain na, sino que jehe na sintte na dána para ngain Dios co ngain Jesucristo, co jehe na conixin Jesucristo tsetonha na para mil nano.

⁷ Co are satto jehe tti mil nano mé, Satanás rroxindanguehe co sačhjexin de ngain tti siaxinhi, ⁸ co sačhje para sincheyehe Gog co Magog, rročo sincheyehe chojni de cainxin nación de ngoixin mundo, co satse cain xisoldadoe de ngain chojni que jehe sincheyehe para ngain guerra, co cain xisoldado jihi anto tsje xa inchin nchise ngain ndachaon. ⁹ Co coani xa hasta tti jicaxin nontte, co vixindanji xa tti sín chojni Dios co tti ciudad que Dios anto rinao. Pero Dios rroanha xohi de ngajni, que cjoaga cainxin xa. ¹⁰ Co Dios rroanha inchínji, tti joincheyehe cain xisoldado mé, para ngatte ndachaoen xohi que jichexin azufre, tti orroanha coxigo jianha conixin tti jeha ndoa ixin vayé joajné Dios. Nttiha rroche na de nchanho co ttie para cainxin tiempo.

Tti chojni que goenhe juzgado ngain tti nttaxintaon roa

¹¹ Cottimeja janha vicon ná nttaxintaon anto jie co roa, co cai vicon tti jitaha nttiha. Ngattoxon con mé, ndavitján nontte co ngajni, co ixonhi lugar vehe para rroquehe cayoi cosa jihi. ¹² Co janha vicon cain chojni que ndavenhe, tti yeye co tti nchinnchin, tatengattjen na ngattoxon con Dios. Co xiré cainxin libro, conixin iná libro cai, que mé tti libro que jitaxin nombré cain tti chojni que chonda iná vida naroaxin. Cain chojni que ndadiguenhe, mé goenhe na juzgado inchin jehe na joinchehe na are vinttechon na, inchin tetaxin ngain cain libro mé. ¹³ Ndachaon joanjo nda cain chojni que ndavenxin ngain nda co tti ndadenhe ni, co tti lugar que ttji cain chojni que ndadenhe, cayoi mé joanjo cain chojni que ndavenhe co te nttiha. Co cain chojni mé goenhe na juzgado; cada na inchin jehe na joinchehe na are vinttechon na. ¹⁴ Cottimeja tti ndadenhe ni, co tti lugar que ttji cain chojni que ndadenhe, cayoi mé savinttjiate ndachaoen xohi. Jehe xohi jihi rročo tti yoxin tiempo que ndadenhe ni, ¹⁵ co nttiha vinttjiate cain tti chojni que tetaxinha nombré ngain tti libro que tetaxin nombré cain tti chojni que chonda iná vida naroaxin.

21

Ngajni naroaxin co nontte naroaxin

¹ Después janha vicon ná ngajni naroaxin co iná nontte naroaxin, ixin tti saho ngajni co tti saho nontte ndavitján, co iveha ndachaon. ² Co janha Juan, vicon tti ciudad santa, tti Jerusalén naroaxin, que jixincanjinxin de ngajni, tti ttjen Dios. Ngoixin ciudad mé anto çhjoin jí inchin ná xannovia çhjoin diguitoxinhi para tsottehe xan ngain xixihi xan. ³ Co coian ná tté ángel que joixin de ngajni co ndaço sên:

—Tsjexin, Dios jí jai ngayé chojni. Jehe sehe ngayé na, co jehe na sintte na chojni jehe, co jehe Dios mismo sehe ngain na para sehe Dios de jehe na. ⁴ Dios sinchexema cain ndacon na, co isenha na, ni irrotsjangaha na, ni iseha joachjaon, ni iõonhi tti tsín na, ixin cain tti vehe are saho, mé ovatto.

⁵ Cottieja jehe tti jitaha nttaxintaon icha importante ndaço:

—Tsjexin, janha nttachjian cain cosa naroaxin.

Cai ndaço:

—Jaha ttentaxin cain jihi, ixin cain palabra jihi ndoa co nchao rrochonda ra confianza ngain palabra jihi.

⁶ Después ndachjenji na:

—Onchao jí cain. Janha tti icha saho varichon de cainxin cosa, co janha tti sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra. Tti chojni que denhe jinda janha rrochjaha chojni mé jinda para sihi, co jinda mé danjo nda iná vida naroaxin, co õonhi nttacobra chojni mé. ⁷ Tti chojni que tsixinhi de sincheha cosa jianha sayé cain jihi inchin herencia, co janha sarihi Dios de chojni mé co jehe sehe xanhna. ⁸ Pero cain tti chojni que õaon para ndaço ixin janha amigoe na, co tti chojni que ditticaonha nganji na janha, co tti chojni jianha, co tti chojni que dantsjehe vidé icha chojni, co tti chojni que chonda nñicoxe o xicoxe, co tti chojni que dantonga icha chojni, co tti chojni que nchesayehe ídolo, co cain chojni mentiroso; cain chojni mé chonda na que tsji na ngain tti jiche õohi conixin azufre, co mé rroço tti yoxin nttiha que ndasenne na.

Tti Jerusalén naroaxin

⁹ Cottieja joí ná de tti yáto ángel que teyá tti yáto vaso que tecaon tti último yáto castigo. Co ángel mé ndachjenji na:

—Õacoi, co tsjagoa xannovié Colecoe Dios.

¹⁰ Cottieja are janha õa vicon tti cjoagohna Espíritu Santo, jehe ángel mé sacjoinha ngataha ná jna anto jie co noi jna mé, co de nttiha cjoagonanxin Jerusalén, tti ciudad santa que jixincanjinxin de ngajni, tti ttjen Dios. ¹¹ Jehe ciudad mé jitonguixima de ixin chíõo que chonda Dios, co tti jehe jitonguixin mé inchin ná õo que anto fino, inchin ná õo que dinhi jasse, que õo mé nchao dicondoxin ni õo inchin õoõao. ¹² Ngandanji ciudad mé jindanji ná ttjarioho jie co noi co jichonda tteyó puerta co naná ángel jinda ngain cada puerta mé. Co nganito naná puerta mé tetaxin nombré tti ná tteyó grupoe chojni Israel. ¹³ Jí ní puerta lado tti çhinxin nchanho, co ní puerta lado norte, co ní puerta lado sur, co ní puerta lado tti diataonxin nchanho. ¹⁴ Co jehe tti ttjarioho jie que jindanji ciudad mé jichonda ttjarioho tteyó õo inchin de base, co nganito naná õo mé tetaxin nombré tti ná tteyó representanté jehe tti Colecoe Dios.

¹⁵ Tti ángel que jinichja nganji janha jiyá ná nttacotto de oro para joattechoaxin ciudad mé conixin ttjarioe co cain puerta que jichonda ttjario. ¹⁶ Ciudad mé cuadrada; rroço ixin tti jininxin ciudad õajeho

inchin tonxin ciudad. Jehe ángel mé joattechoha ciudad conixin nttacot-tohe, co jininxin ciudad dos mil dosciento kilometro, co inchin jininxin cai noinxin, co cai tonxin ciudad xajeho cai. ¹⁷ Cottimeja joattechoha ángel mé tti ttjarioho que jindanji ciudad, co ttjarioho mé jichonda sesenta y cuatro metros de noinxin. Angel mé joinchegonda medida que dattechoaxin chojni nntihi ngataha nontte.

¹⁸ Jehe ttjarioho que jindanji ciudad mé diconchjian joxon xo fino que dinhi jaspe. Co ciudad diconchjian joxon oro, co jitsjehe inchin xo xao que xonhi jinche yá. ¹⁹ Co tti tteyó xo que te de base ngain tti ttjarioho que jindanji ciudad, cain xo mé ditsonji xo de cainxin clase de xo fino: tti xo saho ditsonji de jaspe, xo yoxin conixin zafiro, xo ninxin conixin ágata, xo nonxin conixin esmeralda. ²⁰ xo naonxin conixin ónice, co xo incjaonxin conixin cornalina, co xo yatoxin conixin crisólito, co xo jininxin conixin berilo, co xo nanxin conixin topacio, co xo tteixin conixin crisoprasa, co xo ttejngoxin conixin jacinto, co xo tteyoxin conixin amatista. ²¹ Tti tteyó puerta, mé tteyó perla, co cada puerta diconchjian de nacoa perla. Co tti nntiha icha importante de ciudad mé jia joxon oro, co inchin xo xao que nchao dicondoxin ni.

²² Nntiha ngain ciudad mé janha viconha ni ná nihngo, ixin Dios, tti chonda cain joachaxin, mé tti nihngo para ixin ciudad mé conixin jehe tti Colecoe. ²³ Ciudad mé rrongondeha nchanho ni conittjao para sinchengasenhe, ixin mero chíxo que Dios chonda nchengasán ngain ciudad mé, co jehe Colecoe, mé tti xohi para ixin ciudad mé. ²⁴ Chojni de cain nación que chonda iná vida naroaxin, cain chojni mé ngoixin tti chji na chonda na joadingasán que danjo ciudad mé. Co cain rey de ngoixin mundo tsiaho ngain ciudad mé cain cosa importante que jehe chonda co sinchesayehe ciudad mé. ²⁵ Cain puerta que jichonda ttjarioe ciudad mé sijeha are nchanho, co nntiha xonhi ttie sehe. ²⁶ Co nntiha sicao na cain cosa importante de cainxin nación, co cain tti tosayexin cain nación jiji. ²⁷ Pero xonhi tiempo sixinhi nntiha cosa ttjoaha, ni ná chojni que nchehe cosa jianha o que ncheyehe icha chojni choha sixinhi nntiha. Sino que jehó tti chojni que tetaxin nombré ngain tti libro que tetaxin nombré cain chojni que chonda iná vida naroaxin, co Colecoe Dios jichonda libro mé. Jehó chojni mé tti sixinhi ciudad mé.

22

¹ Cottimeja jehe ángel mé cjoagohna ná río de jinda que xonhi jinche chonda, co jinda mé tti danjo iná vida naroaxin. Jinda mé anto dicondoxin ni nda inchin ná xo xao, co jida chjexin jinda mé de ngain nttaxintaoen Dios conixin de ngain Colecoe. ² Ngosine tti nntiha icha importante de ciudad mé co cayoxin ngandehe río mé te tti nttá que danjo vida. Co nttá mé danjo nnta ttochjoin tteyó nntiha ngá nano ixin danjo nnta ttochjoin cada conittjao. Co qué nttattochjoin mé jian ca para xingamenxin chojni de cainxin nación. ³ Nntiha seha chojni ni xonhi cosa que Dios joinchecondená. Nntiha sehe nttaxintaoen Dios conixin jehe Colecoe ngain ciudad mé, co ninchehe xé Dios co Jesucristo sinchecoanxinhi na jehe. ⁴ Jehe na sicon na ngá con Jesucristo co jehe sicon ngá con na jehe na, co nganito nttattjen na setaxin nombré jehe. ⁵ Nntiha ixonhi naxin xehe sehe, co cain chojni que sintte nntiha isondeha

na xohi de lámpara, ni de nchanho, ixin Dios tti chonda cain joachaxin, jehe tti sinchengasañehe na, co jehe na nitsetonha para cainxin tiempo.

Ochian joí tiempo que Jesucristo tsí iná

⁶ Cottimeja ángel mé ndachjenji na janha:

—Cain palabra jiji ndoa co nchao sehe confianza ngain palabra jiji. Co jehe tti chonda cain joachaxin, que mé Dios mismo que nchenohe cain chojni que nichja joajné, jehe Dios rroanha ángel de jehe para joicjagoe cain ninchehe xé tti siconhe toin.

⁷ Co Jesucristo ndačo:

—¡Janha sihi toin!

¡Anto čhjoin para ixin cain tti chojni que nchehe caso joajné Dios que jitaxin ngain libro jiji!

⁸ Janha Juan coian co vicon cain cosa jiji. Co después de coian co vicon, joarittoxin nntajochjihna ngaca rotté ángel tti cjoagohna cain jiji para rrojinttasayá. ⁹ Pero jehe ndachjenji na:

—Ncheha yá, ixin janha jehó ná ninchehe xé Dios, jañá inchin jaha conixin cain chojni que nichja de ixin Dios conixin cain chojni que nchehe caso tti jitaxin ngain libro jiji. Jaha nchesayehe Dios.

¹⁰ Cai ndachjenji na ángel mé:

—Jaha, ttemaha joajné Dios que jitaxin ngain libro jiji, ixin ochian joí tiempo que siconhe cain tti jitaxin nttihi. ¹¹ Mexinxin tančhjanda que tti chojni jianha sinchehe na sigue nchehe na tti jianha, co tti chojni ttjoaha sinchehe sigue ngain tti ttjoaha; pero tti chojni jian sinchehe na sigue de nchehe na tti jian, co tti chojni que coequininxin para ixin Dios sinchehe na sigue de ditticaon na jian cainxin tiempo ngain Dios.

¹² Co Jesucristo ndačo:

—Ján, janha sihi toin. Co siquian premio que rrochjaha cada chojni, inchin jehe na joinchehe na. ¹³ Janha tti icha saho varichon de cainxin cosa co janha tti sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra.

¹⁴ Anto čhjoin para ixin tti chojni que ttjén lonttoe para rrochonda na joachaxin de sine na ttochjoin de ngain tti nttá que danjo vida, co jamé nchao sixinxin na ngain cain puerté ciudad mé. ¹⁵ Pero tti chojni jianha sittohe na ndoja conixin tti chojni que dantonga icha chojni, co tti chojni que chonda nčhicoxehe o xicoxehe, co tti chojni que dantsjehe vidé icha chojni, co tti chojni que nchesayehe ídolo, conixin cain tti chojni que anto rinao ncheyehe icha chojni.

¹⁶ Co Jesucristo ndačo:

—Janha Jesús orroanha ángel de janha para joinchenohe cain jiji chojni de cain nihngo. Janha tti joixin de ngain razé rey David, co janha tti conotse que anto soji nchengasán are nttoyo.

¹⁷ Espíritu Santo co čhihi Coleco ndačo:

—Āacoi.

Co cain tti ttinhi jiji ndačo:

—Āacoi.

Cain ra xó senhe ra jinda co xó sinao ra sihi ra, xacoi ra co sihi ra jinda que danjo iná vida naroaxin, co xonhi tomi tsjenga ra hna.

¹⁸ Janha Juan rrindačhjan janhi ngain cainxin chojni que ttinhi co nchehe caso joajné Dios que jitaxin ngain libro jiji: Si čhonja chojni sinchecoehne na chojni icha cosa de ixin tiempo que tsí que jehó cosa

que jitaxin nttihi, Dios rrochjé na icha tsje castigo de tti cain castigo que jitaxin ngain xón jihi. ¹⁹ Co si čhonja chojni santsjehe na masqui nchion de ngain joajné Dios que jitaxin ngain xón jihi, Dios santsjehe na tti parte que jehe na chonda na ngain tti libro tti tetaxin nombré cain chojni que chonda na iná vida naroaxin, co santsjehe na tti parte que jehe na chonda na ngain tti ciudad santa. Co xón jihi nichja de ixin libro mé co ciudad mé.

²⁰ Tti ndačho cain cosa jihi, jehe ndačho:

—Ján, janha sihi toin.

Amén. ¡Xacoi, soixin Jesús!

²¹ Que Jesucristo, tti chonda cainxin joachaxin para ixin ján na, sint-tanchaon cainxin ra. Amén.